

॥ णमोऽत्थुणं समणस्स भगवओ महावीरस्स ॥

॥ अनन्तलब्धि निधान श्री गौतमस्वामिने नमः ॥

॥ नमामि नित्यं गुरु रामचन्द्रम् ॥

चान्द्रकुलीनाचार्य श्रीमदभयदेवसूरिशिष्य श्रीप्रसन्नचन्द्राचार्योक्त्या श्रीसुमतिविजय वाचकशिष्यैः
आचार्यप्रवर श्रीमद् गुणचन्द्रसूरिवरैर्विहितम्

सूरि महावीर चरितं

सम्पादकः

पूज्य गणिवर्य श्री नयवर्धन विजय महाराजः

प्रकाशकः

अमदावाद-पालडी-मर्चन्ट सोसायटी जैन संघः

श्रीगुणचंद
महावीरच०

॥२॥

ग्रन्थः

सिरि महावीर चरियं

प्रकाशनम्

वीरसंवत् २५२७ - विक्रम संवत् २०५७, दीपालिका महापर्व - आश्विन कृष्ण १४

मूल्यम् : २५०.०० रूप्यकाणि

मुद्रकः दुन्दुभि प्रिन्टर्स, ४०६, आनंद मंगल-२, सी. जी. रोड, अमदावाद-३८० ००९

प्राप्तिस्थानम्

श्री मर्चन्ट सोसायटी जैन संघ

C/o. अशोकभाई घेलाभाई शाह

३३ B, जैन मर्चन्ट सोसायटी, पुरुषोत्ता उपाश्रय सामे,

पालडी, अमदावाद-३८०००७

प्राप्ति-
स्थानादि

॥२॥

શ્રીગુણચંદ
મહાવીરચૉ

॥૩॥

પ્રકાશકીય

પ્રકાશકીય

અમારા શ્રીસંઘમાં વિ.સ. ૨૦૫૭ના વર્ષાચાતુર્માસ માટે અમારા શ્રીસંઘની આગ્રહભરી વિનંતીનો સ્વીકાર કરીને પૂજ્યપાદ જૈનશાસનના મહાન જ્યોતિર્ધર, દેવાંશી મહાપુરુષ, યુગપ્રધાનાવતાર, વ્યાખ્યાન વાચસ્પતિ તપાગચ્છાધિપતિ આચાર્ય દેવેશ શ્રીમદ્ વિજય રામચંદ્રસૂરીશ્વરજી મહારાજાના શિષ્યરત્ન પૂજ્યપાદ પ્રચર પ્રવચન પ્રભાકર ગણિવર્યશ્રી નયવર્ધન વિજયજી મ.સા. આદિ મુનિગણ, પૂજ્યપાદ સુવિશાલ ગચ્છાધિપતિ વાત્સલ્યવારિધિ આચાર્ય દેવ શ્રીમદ્ વિજય મહોદયસૂરીશ્વરજી મહારાજાની તારક આજ્ઞા થતાં અમારા શ્રીસંઘમાં ચાતુર્માસાર્થે પધાર્યા છે. પૂજ્યપાદશ્રીજીની પ્રભાવક નિશ્રામાં સુવિશુદ્ધ મોક્ષમાર્ગની પ્રરૂપણાની સાથો સાથ રત્નત્રયીની અનુપમ આરાધના થવાથી આ ચાતુર્માસ ચિરસ્મરણીય બન્યું છે.

પૂજ્ય ગણિવર્યશ્રી વ્યાખ્યાન દરમ્યાન ભવવૈરાગ્યોત્પાદક ‘શ્રીઉપમિતિ ભવપ્રપંચા કથા’ ગ્રંથનું વાચન કરે છે. આ ગ્રંથ તથા શ્રી કલ્પસૂત્ર વગેરે ગ્રંથો વહોરાવવા - જ્ઞાનપૂજા વગેરે દ્વારા જ્ઞાનદ્રવ્યની વૃદ્ધિ વિપુલ પ્રમાણમાં થવા પામી હતી, ત્યારે

॥૩॥

શ્રીગુણચંદ
મહાવીરચ.
||૪||

જ્ઞાનદ્રવ્યના સદુપયોગ માટે અમોએ પૂજ્યશ્રીને પૃચ્છા કરતાં આજે અપ્રાપ્ય એવા 'સિરિ મહાવીર ચરિયં' ગ્રંથની પ્રતિનું પુનર્મુદ્રણ પૂજ્યશ્રીએ સૂચવ્યું. પૂજ્યપાદશ્રીના સૂચન મુજબના આ ગ્રંથનું પુનર્મુદ્રણ કાર્ય મજબૂત, ટકાઉ કાગળ ઉપર અને અત્યંત સ્પષ્ટ રીતે કરાવવામાં આવ્યું છે. પ્રિન્ટર શ્રી જયેશભાઈએ આ ભગીરથ કાર્ય ઝડપભેર કરી આપ્યું છે, તેથી આજે તે મહાગ્રંથનું પુનઃ પ્રકાશન કરતાં અમો પરમહર્ષ અનુભવીએ છીએ.

જે પરમતારક પરમાત્માના શાસનમાં આજે આપણે મોક્ષમાર્ગની આરાધના કરીએ છીએ, તે શ્રમણ ભગવાનશ્રી મહાવીરદેવના જીવન ચરિત્રનો આ દઢદાર ગ્રંથ તે જ પરમાત્માના નિર્વાણ કલ્યાણકના મહામંગલકારી દિવસે પ્રકાશિત કરતાં અમો પરમ સંતોષની લાગણી અનુભવીએ છીએ.

દ્વિતીય આસો સુદ-૧૩
સંવત ૨૦૫૭

શ્રી મર્ચન્ટ સોસાયટી જૈન સંઘ
પાલડી, અમદાવાદ-૩૮૦૦૦૭

પ્રકાશકીય

||૪||

શ્રીગુણચંદ
મહાવીરચૉ

||૫||

પ્રસ્તાવના

|| નમામિ નિત્યં ગુરુ રામચન્દ્રમ્ ||

પ્રસ્તાવના

પરમતારકાવતંસ શાસનપતિ શ્રમણ ભગવાન શ્રી મહાવીર પરમાત્માનાં સમ્યક્ત્વ પ્રાપ્તિથી આરંભી મોક્ષપ્રાપ્તિ સુધીનાં સમગ્ર જીવનને વિસ્તારથી વર્ણવતા આ મહાગ્રંથ 'સિરિ મહાવીર ચરિયં'ની રચના, ચાંદ્રકુલના પ્રભાવક પુરુષ આચાર્ય દેવ શ્રીમદ્ ગુણચન્દ્રસૂરીશ્વરજી મહારાજે અત્યંત ભાવવાહી શૈલીએ કરી છે.

સંસાર સાગરમાં પરિભ્રમણ કરી રહેલા શ્રી તીર્થંકરદેવના તારકઆત્માની પળ સમ્યક્ત્વ પ્રાપ્ત ન થાય ત્યાં સુધી વાસ્તવિક દ્રષ્ટિએ કોઈ ગણના કરવામાં આવી નથી. સમ્યક્ત્વ પ્રાપ્તિથી જ તે તારકોના ભવોની ગણના શરૂ થાય છે. તેમાં ચરમતીર્થપતિ શ્રી મહાવીરપ્રભુના શ્રી નયસારથી પ્રારંભીને સ્થૂલ સત્તાવીસ ભવો ગણવામાં આવ્યા છે.

તારક શ્રી અરિહંત દેવોના આત્માનું તથાભવ્યત્વ અનાદિકાલથી જ વિશિષ્ટ અને લોકોત્તર કોટિનું હોય છે. અનેકાનેક અસાધારણકોટિના સદ્ગુણો બીજરૂપે તેઓમાં સૂક્ષ્મ નિગોદના અનાદિકાલથી જ અસ્તિત્વ ધરાવતાં હોય છે. પવનનો યોગ મળતા જ અગ્નિ જેમ જ્વળપથી વેગ પકડે

||૫||

શ્રીગુણચંદ
મહાવીરચ.

॥૬॥

છે, તેમ સમ્યક્ત્વનો યોગ મળતાં જ તે તારકોના સહજ સદ્ગુણો અતિદૃઢ, અતિવિકસિત અને ઉર્ધ્વમુખી બની રહે છે. વરબોધિ (શ્રેષ્ઠ સમ્યક્ત્વ)ને પામનારા આ તારકના આત્માઓ પ્રાયઃ કરીને વળથંભી અધ્યાત્મ સાધના સાધતા સાધતા મોક્ષમાર્ગના પ્રકાશન દ્વારા જગતમાં અનન્ય ઉપકાર કરી વહેલામાં વહેલા સ્વધ્યેયની સિદ્ધિરૂપ મોક્ષને પ્રાપ્ત કરતા હોય છે. છતાંય કોઈ કોઈ શ્રી તીર્થકરના આત્માઓની ભવસ્થિતિ જ લાંબી હોય તો સમ્યક્ત્વ પ્રાપ્તિ પછી પણ તેઓને ઠીક ઠીક સંસાર પરિભ્રમણ કરવું પડે છે. આપણા આરાધ્યપ્રભુ શ્રી મહાવીર દેવના આત્મા માટે આવું જ બન્યું હતું. સમ્યક્ત્વ પ્રાપ્ત કર્યા પછી પણ પ્રભુનો આત્મા ચિરકાળ સંસારમાં ભમ્યો છે, અનેક વખત એકેન્દ્રિયપણામાં પણ ગયો છે અને નરકમાં પણ ગયો છે. કર્મપરિણતિની વિચિત્રતાના કારણે પ્રભુના સમ્યક્ત્વ પ્રાપ્તિથી સિદ્ધિપ્રાપ્તિ સુધીના સુદીર્ઘ સમયગાળામાં આરોહ-અવરોહ ઘણા આવ્યા છે... પરમાત્માનો જીવ કેવા ઉચ્ચ અધ્યવસાયોની ભૂમિકાએ પહોંચ્યો ત્યારે સમ્યક્ત્વ પામ્યો અને તેમાં બહી પાછા કર્મના આક્રમણો આવ્યા, તો પરમાત્માનો જીવ પણ કેવું ચૂક્યો ! ગુણસ્થાનકોથી પતન પામતા તે કેવું સદ્ગુણધન ગુમાવી બેઠો ! અને એના પરિણામે તે તારકના આત્માને પણ સંસારમાં કેવું પરિભ્રમણ કરવું પડ્યું ! આવા આવા અનેક પાસાઓ પરમાત્માનાં જીવનનું વાચન કરવાથી જાણવા મળે છે, એટલું જ નહિ પણ એ વાચન આપણા આત્માને જાગૃત બનાવવાનું કામ કરે છે કે તારક તીર્થપતિના આત્માની પણ જો આ દશા થઈ શકે, તો આપણું તો સ્થાન જ ક્યાં છે ? માટે વધુને વધુ જાગૃતિ કેળવવી જોઈએ.

આ ગ્રંથ મહાસાગર જેવો છે. પ્રભુના ભવોની વિગતવાર રજુઆતની સાથે સાથે વચમાં કેટલીક અવાંતર વાતો પણ વહુ જ ઉપયોગી અને પ્રેરક છે.

વધુમાં વર્તમાન યુગમાં થયેલા કેટલાક શ્રદ્ધાભ્રષ્ટ પંડિતોએ પરમાત્માના જીવનની કેટલીક ઘટનાઓને કાલ્પનિક કહી નાખવા જેવું

પ્રસ્તાવના

॥૬॥

શ્રીગુણચંદ
મહાવીરચ.

|| ૭ ||

ધૃષ્ટતાભર્યું કૃત્ય પળ કરેલું છે. તે-તે પંડિતોની આવી કેટલીક-કેટલીક વાતોને રદીયો આ મહાગ્રંથ આપોઆપ આપતો જાય છે. હા ! મહાજ્ઞાની શાસ્ત્રકાર મહર્ષિઓની સત્યાર્થ પ્રતિપાદકતામાં જ જેને અશ્રદ્ધા હોય એવા શ્રદ્ધાકંગાલો માટે તો શ્રદ્ધા જન્માવવાનો કોઈ ઉપાય જ નથી હોતો.

તારકશિરોમણિ શ્રી તીર્થંકર ભગવંતો પ્રત્યે અનહદ-અપૂર્વ-અદ્ભુત-અનુપમ-અસાધારણ-અનન્ય ભક્તિભાવ હોવો તે દરેકે દરેક સાધકનું પ્રથમ લક્ષણ છે. શાસ્ત્રસમંદરનું અવગાહન કરતાં કરતાં પળ આખર તો એ ભગવદ્ભક્તિભાવને જ પામવાનો છે. શ્રી અરિહંતો પ્રત્યે જાગતા ભક્તિભાવમાં તો કરોડો-કરોડો ભવોના કાતિલમાં કાતિલ કર્મોની પળ કલ્લેઆમ કરવાની કલ્પનાતીત તાકાત રહેલી છે. આ ધ્યેયને સિદ્ધ કરવા માટે આ મહાગ્રંથનું વાચન ખૂબ ખૂબ સહાયક બની રહે તેવું છે.

શ્રી અર્હદ્ભક્તિના તાત્ત્વિક ભાવોને આત્માના એક-એક પ્રદેશે પ્રતિષ્ઠિત કરનારા મહાન યુગપુરુષ, એંદયુગીન પ્રવર-પ્રકૃષ્ટ ધર્મનેતા, સ્યાદ્વાદવાદઘૌતસકલ વિચારસાર, વ્યાખ્યાન વાચસ્પતિ, કલિકાલ કલ્પતરુ આચાર્યદેવ શ્રીમદ્ વિજય રામચંદ્રસૂરીશ્વરજી મહારાજાધિરાજાની મનઃસૃષ્ટિમાં આ ગ્રંથકૃતિનું એક આગવું-અપૂર્વ સ્થાન હતું. વારંવાર આ ગ્રંથનું પારાયણ કરીને તેઓશ્રીએ આ મહાગ્રંથનું ઉપનિષદ્ હૃદયમાં આત્મસાત્ કર્યું હતું.

અમદાવાદ-પાલડી-મર્ચન્ટ સોસાયટી જૈન સંઘના સત્પુરુષાર્થથી આજે આ મહાગ્રંથને નવજીવન અને ચિરાયુષ્યની પ્રાપ્તિ થઈ રહી છે, તે ખૂબ અનુમોદનીય છે.

તારકેશ્વર, ત્રિશલાનંદન, ત્રિજગદ્ગુરુ, ત્રિલોકપ્રકાશ, ત્રિભુવનપૂજ્ય શ્રી શ્રમણ ભગવાન મહાવીર પરમાત્માના ઉદ્બોધક જીવનનું કવન

પ્રસ્તાવના

|| ૭ ||

શ્રીગુણચંદ
મહાવીરચ.

॥૮॥

કરતા આ મહાકાય મહાગ્રંથનું વાચન કરવાના પ્રભાવે આપણે સૌ આપણા આત્માને આ તારક ભગવંત પ્રત્યેની અનન્ય શ્રદ્ધાથી સનાથ બનાવી દઈએ, કર્મવિપાકોથી ભયભીત બનાવી દઈએ, સદ્ધર્મના આરાધનામાં દત્તચિત્ત બનાવી દઈએ, સર્વજીવોના શ્રેયઃની સાધનામાં આત્મવીર્ય ફોરવવા ઉલ્લસિત બનાવી દઈએ અને એના પ્રતાપે આપણા પરમ વિભુ પરમાત્મા જ્યાં બિરાજમાન થયા, ત્યાં આપણાં આ તારક તાતની સાથે સાદિ-અનંત ભાગે આપણે પણ મિલન સાધીને ત્યાં સદા સ્થિર વની જઈએ, એજ એક મંગલકામના....

દ્વિ. આસો વદ ૪, સોમવાર

તા. ૫-૧૧-૨૦૦૧

મર્ચન્ટ સોસાયટી, પાલડી, અમદાવાદ

પૂ. જૈનશાસનના મહાન્ જ્યોતિર્ધર આચાર્યદેવ

શ્રીમદ્ વિજય રામચંદ્રસૂરીશ્વરજી મહારાજ-

પાદપદ્મપરાગ

મુનિ નયવર્ધન વિજય ગણી

પ્રસ્તાવના

॥૮॥

श्रीगुणचंद
महावीरच०

॥९॥

१ प्रस्तावः

प्रस्तावना
महावप्रजयन्तीशत्रुमर्दनवर्णनं
नयसारवर्णनं
अटवीमध्ये साधुभ्यो दानं
धर्मदेशना सम्यक्त्वं च
सौधर्मे देवत्वं धर्मकार्यं च

२ प्रस्तावः

विनीतावर्णनं
श्रीऋषभप्रभुवर्णनं
समवसरणवर्णनं

श्रीवीरचरित्रस्य विषयानुक्रमः

२	वामासुतमरीचिदीक्षा	११	परिवाङ्मृतं भोगदोषाः स्थावरदीक्षा	
३	अंगारवधकट्टणान्तः	१३	ब्रह्मदेवः	२८
३	पारिव्रज्यं	१४	३ प्रस्तावः	
३	मरीचिदेशनादि	१५	विश्वभूतेर्मधुकीडा	३१
४	इन्द्रचक्रिकृतमवग्रहदानं	१७	देव्याग्रहः कूटपुरुषाः रणयात्रा विश्वन-	
	मरीचेः कुलमदः	१९	न्दिक्कीडा विश्वभूतेरपमानं संवेगश्च	३६
	अष्टापदे चैत्यं तद्गुणाश्च	२०	संभूत्याचार्यवर्णनं देशना विश्वभूतिदीक्षा	
	कपिलदीक्षा मरीचिकालः आसुरि-		परिजनाक्रन्दः बोधश्च	
	दीक्षा अव्यक्तादि	२३	विश्वभूतेस्तपः गोनुग्रस्य पातः निदानं	४१
७	सूरसेनपरिव्राजकचरित्रं अग्निघोतदीक्षा	२५	महाशुके देवः	
९	सनत्कुमारे देवः श्वेतांबिकायां भारद्वाजः		रिपुमर्दनः अचलः मृगावती पुत्री राक्षी च	
१०	माहेन्द्रे देवः संसारः	२५	सप्त स्वप्नाः त्रिपृष्ठजन्म	४३

विषयानु-
क्रमः.

॥९॥

श्रीगुणचंद्र
महावीरच०

॥१०॥

प्रेक्षणकं अश्वघोषदूतापमानं सिंहवधः ५०
युद्धं प्रतिवासुदेववधः अंतःपुरविलापः
अंगादिदेशसाधनं कोटीशिलोत्पाटनं ६०
पोतनपुरे श्रेयांसजिनागमः धर्मकथा
सम्यक्त्वं ६२
गायकमृतिः देव्यपमानं सप्तमनरकगमनं ६३
धर्मघोषसूरिदेशना अचलदीक्षामोक्षौ ६३
प्रियमित्रचक्री अनार्यदेशसाधनं चक्रिकृद्धिः
वैराग्यं प्रोष्ठिलाचार्यदेशना दीक्षा शुक्रदेवः ७१
४ प्रस्तावः
नन्दनजन्म प्रोष्ठिलाचार्याः देशना ७२
नृपो नरसिंहः चम्पकमालादेवी मन्त्रिवर्गः
सुतचिन्ता घोरशिवागमः मन्त्रसाधनं
घोरशिवमूर्च्छा श्रीभवनपुरं अवन्ति-

सेनो राजा वीरसेनविजयसेनौ राज्यं
खेचरयुद्धं गगनवल्लभे विजयराजसुतो
जयशेखरः वैर्यमिततेजाः वीरसेनरा-
जस्यापहारः विजयसेनकृतो राज्याक्रमः
सोमदत्तगृहे स्थानं प्रस्थानं योग्याचार्यो
महाकालनामा प्रव्रज्या, अष्टशतेन होमः
क्षत्रियैः, वैताड्यगमनं चंपकमालाया
ध्वजस्वप्नः घोरशिवस्य राज्यं नर-
विक्रमाभिधानं हर्षपुराधिपदेवसेनदु-
हितुर्वरणं कालमेघमल्लजयः शीलवत्यै
पितृशिक्षा पुरप्रवेशः युवतिविभ्रमा
जयकुञ्जरवशीकरणं कुमारस्य प्रवासः
पाटलगृहे वासः शीलवत्या अपहारः
जयवर्धने राज्यं नद्या नरविक्रमापहारः

सामन्तभद्रः देशना सुतौ गोकु-
लिकगृहे सुतसंयोगः शीलदार्य शी-
लवत्या योगः मालाकाराय चौडराज्य-
दानं जयन्त्यां गुरोर्गमनं देशना पित्रा
योगः राज्याभिषेकः शिक्षा साधु-
नृपयोः १०९
नन्दननृपस्य दीक्षा विंशतिस्थानकारा-
धनं प्राणते देवः १११
देवानन्दाकुक्षाववतारः स्वप्नानामुपलंभश्च १११
इन्द्रस्तुतिः गर्भोपहारः देवानन्दाक्रंदः ११२
त्रिशलाकुक्षौ संक्रमः स्वप्ना वृद्धिर्मनोरथाः ११४
निष्पन्दत्वं शोकः अभिमदः ११५
श्रीवीरस्य जन्मनि दिक्कुमारीमहः ११७
अभिषेकसामग्री मेरुचालनं अभिषेकः १२३

विषयानु-
क्रमः.

॥१०॥

श्रीगुणचंद्र
महावीरच०

॥१११॥

नृपकृतो महः १२५
वर्धमाननामकरणं सुरपिशाचसर्परूपा-
भ्यामभीतिः लेखशालानयनं १२७
यशोदाभिधानकारणं १३०
यशोदया श्रीवीरस्य विवाहः, प्रियदर्शना-
जन्म १३२
मातापित्रोः स्वर्गमनं, नन्दिवर्धनस्य रा-
ज्याभिषेकः १३४
संवत्सरदानं नन्दिवर्धनकृता महानसशा-
ला लोकान्तिकागमनं च १३६
दीक्षाभिषेकः चन्द्रप्रभा शिबिका दीक्षा-
महोत्सवः १४१
५ प्रस्तावः
सोमब्राह्मणाय वस्त्रार्थदानम् १४४

कूर्मोरग्रामे गोपोपसर्गः शक्रकृता निर्भ-
र्त्सना दूहजंताश्रमे गमनं वर्षायाः
पक्षे गते निर्गमः अभिग्रहपंचकं १४८
वर्धमानप्रामस्यास्थिग्रामत्वे हेतुः वृषस्या-
प्रतिजागरणाद् द्वेषः मारिः चैत्यम् १५२
शूलपाणिकृता उपसर्गः तत्प्रतिबोधः
स्वप्रदशकं इन्द्रशर्मोक्तं तत्फलं (१) १५६
अच्छंदकस्य कुटिलता शक्रशिक्षादि १५८
सुवर्णवालाकायां वस्त्रार्थस्य पातः, नन्दि-
वर्धनाय लक्ष्ये दानं तस्य १५९
कनकखलाश्रमः (गोभट्टो विप्रः वना-
रसीप्रस्थानं विद्यासिद्धाकृष्टा रसवती
युवतिश्च शीलशार्द्व्यं जालन्धरे चन्द्र-
लेखाचन्द्रकान्ते ईशानचंद्रः रक्षाव-

लयं गंगायां प्रवेशः नास्तिकवाक्
जालन्धरे गमनं ईशानचन्द्ररक्षा यो-
गिनीशान्तिः परस्त्रीनियमः गृहे आ-
गमनं भार्योमरणश्रवणं धर्मघोषस्य
देशना दीक्षा मंडूकीविराधना क्रोधः
ज्योतिष्कः तापसः चंडकौशिकः
बोधः १७६
उत्तरवाचाला श्वेतांबिकायां प्रदेशि-
नृपकृता स्तुतिः १७७
सुरभिपुरं सुदंष्ट्रसुरोपसर्गः कंबलशंबलौ
मथुरा जिनदासः साधुदासी गंगोत्तरः
स्थूणाके गमनं पुष्यबोधः १८२
६ प्रस्तावः
राजगृहनालन्दायां तन्तुवायार्जुनशालायां
वर्षावासः (२) १८३

विषयानु-
क्रमः.

॥१११॥

श्रीगुणचंद्र
महावीरच०

॥१२॥

उत्तरापथे सिलिन्ध्रे केशवशिवापुत्रो मं-
खः पूर्वप्रियोपलब्धये पट्टिकाकृतिः मं-
खलीसुभद्रयोर्मैखत्वं गोशालजन्म,
श्रीवीरेण मीलनं कोलाके शिष्यत्वं प्रा-
गृहीताया नियतेः स्थालीस्फोटे दार्ढ्यं
ब्राह्मणग्रामे उपनन्दगृहदाहः चंपायां
वर्षावासः (३) कालाके पात्रालके च ताडनं
कुमारे मुनिचन्द्राः चौराके सोमाजय-
न्तीभ्यां मोचनं पृष्ठचम्पायां वर्षावासः (४)
कुतांगले हरिद्राः श्रावस्त्यां मनुष्यमांसं
हरिद्रुमेऽग्निः मंगलाग्रामे वासुदेवगृहे
आवर्ते बलदेवगृहे च स्थानं चौराके
मंडपदाहः कलंबुकायां कालमेघ-
स्तिनौ म्लेच्छदेशे गमनं पूर्णकलशे स्ते-

नवधः भद्रिलायां वर्षावासः (५) कद-
लीसमागमे जंबूखंडे चांस्तारिकाभक्तं
तंवाके नन्दिषेणाः कूपिके विजयाप्र-
गल्भाभ्यां मोचनं वैशालीप्रस्थानं (६)
गोशालो बाधितः अयस्कारघातः १९८
त्रिभेलकयक्षस्योत्थानपर्याणिका २१२
शालिशीर्षे कटपूतनोपसर्गः लोकावधिः २१३
आलम्बिकायां वर्षारत्रः (७)
गोशालमीलनं २१३
कुण्डागे मधुमथनगृहे गोशालचेष्टा मर्दन-
ग्रामे बलदेवगृहे च २१३
सालग्रामे सालज्जोपसर्गपूजे २१४
लोहार्गले जितशत्रुकृतः सत्कारः २१४

पुरिमताले वग्गुरश्रेष्ठिकृता पूजा, धर्मघोष-
सूर्युक्तं पूजाफलं दानं च २१७
तुन्नागपथे श्रीभूमौ च गोशालस्य ताडनं
राजगृहेऽष्टमो वर्षावासः (८) २१८
लाढवज्रभूमिशुद्धभूमिपूषर्गाः वृक्षमूले
वर्षावासः (९) २१८
सिद्धार्थकूर्मारग्रामयोरन्तराले तिलप्रभादि २१८
वैश्यायनस्योत्थानपर्याणिका तेजोलेइया
तन्निवारणं तदुपायप्रश्नोत्तरे २२३
कूर्मारसिद्धार्थपुरोरन्तराले तिलनिश्चयात्
प्रवृत्तिपरिहारो नियतिवाददार्ढ्यं च
श्रावस्त्यां तेजोलेइया पार्श्वन्तेवासि-
संगमः २२४

विषयानु-
क्रमः.

॥१२॥

श्रीगुणचंद
महावीरच०

॥१३॥

७ प्रस्तावः

वैशाल्यां शंखसत्कारः गंडकिकायां नावि-
कोपसर्गः ऋतुषट्कस्याविकारिता २१९
वाणिज्यग्रामे आनन्दगाथापतिः अव-
धिमान् २१९
श्रावस्त्यां वर्षारात्रः (१०) सानुषष्टिके
प्रतिमाः २२६
दृढभूमौ पेढाले संगमोपसर्गाः, संगम-
कस्य मौधर्माग्निर्वासनं २३१
आलंभिकायां विद्युत्कुमारेन्द्रस्तुतिः श्वेतां-
त्रिकायां हरिस्तहस्तुतिः श्रावस्त्यां स्क-
न्दप्रतिमासत्कारः कौशांब्यां चन्द्र-
सूर्यावतारः चाराणस्यामिन्द्रपूजा रा-

जगृहे ईशानार्चा मिथिलायां जनक-
स्तुतिः धरणेन्द्रवन्दना २३३
राजगृहे वर्षारात्रः (११) भूतानन्दस्तुतिः
जीर्णश्रेष्ठिभावना केवलिदेशना २३४
चमरेन्द्रोत्पातः सुसुमारे २४०
भोगपुरे माहेन्द्रोपसर्गः सनत्कुमारेन्द्र-
नतिः नन्दीग्रामे नन्दिस्तुतिः ४४१
चम्पापातः धारणीमरणं चन्दना कुत्सा-
धाभिग्रहः २४७
षाण्मासिकः कीलकोपसर्गः मध्यमापापायां
कीलकनिर्गमः २५०
तपःसंकलना केवलज्ञानं च ३५१
८ प्रस्तावः
समवसरणरचनं धर्मदेशना २५३

गणधराणां प्रतिबोधः दीक्षा चन्दनाया
दीक्षा संघस्थापना २५९
ऋषभदत्तस्य देवानन्दायाश्च दीक्षा २६०
क्षत्रियकुण्डे समवसरणं पर्पद्वा नन्दि-
वर्धनकृता स्तुतिः जमालिदीक्षा (मा-
त्रादिवचनप्रतिवचनानि) महः २६५
जमालेर्निहवत्वं प्रियदर्शनाया बोधः ज-
मालेर्गतिः २६९
कौशाम्ब्यां गुरप्रियलब्धवरे नृपस्य क्रोधः
चण्डप्रद्योतकृता मृगावत्याः प्रार्थना शी-
लरक्षार्थं छलं मृगावत्या दीक्षा या सा
सा सोदाहरणं आनन्दादीनां वाणि-
व्यग्रामादिषु बोधः कोशाम्ब्यां चन्द्र-
सूर्यावतारं कैवल्यं २७४

विषयानु-
क्रमः

॥१३॥

श्रीगुणचंद
महावीरचं

॥१४॥

आश्चर्यदशकं आनन्दश्रवणः गोशालक-

कृत उपसर्गः सर्वानुभूतिः सहस्रारे सु-

नक्षत्रोऽच्युते २७९

गोशालकदाहः अयंपुत्रः शिष्येभ्यो निर्ह-

रणादेशः सप्तमदिने सम्यक्त्वं आदेशः २८२

सिंहानीतौषधेन नीरोगत्वं श्रीवीरस्य २८३

गोशालकस्य भवाः २८६

राजगृहे धर्मदेशना मेघकुमारस्य दीक्षा

भग्नमनस्कत्वं पूर्वभवौ २८९

नन्दिषेणस्य दीक्षा, देवेन कृतो निषेधः

जिनेनापि, देश्यागृहे स्थानं दशकदश-

कबोधः दीक्षा देवत्वं २९०

सुदंष्ट्रजीवकर्षकस्य दीक्षा तन्मोचनं च २९१

तामलिम्यादिषु विहारः प्रसन्नचन्द्रादी-

नां बोधश्च २९१

राजगृहे समवसरणं २९२

प्रथमाणुव्रते हरिवर्मकथा २९८

द्वितीयाणुव्रते सत्यश्रेष्ठिकथा ३००

तृतीयाणुव्रते वसुदत्तकथा ३०३

तुर्याणुव्रते सुरेन्द्रदत्तकथा (शुभंकर-

कथा) ३१२

पंचमाणुव्रते वासवदत्तकथा ३१४

दिप्रते जिनपालितकथा ३१६

भोगोपभोगमाने रविपालकथा ३१९

अनर्थदण्डविरतौ कोरंटककथा ३२२

सामायिके कामदेवकथा ३२३

देशवकाशिके सागरदत्तकथा ३२५

पोषधोपवासे जिनदासकथा ३२७

अतिथिसंविभागे साधुरक्षितकथा ३२९

सेडुकद्विजवृत्तं ३३४

गागलिप्रव्रज्यादि ३३४

अष्टापद्यात्रा तापसानां बोधादि ३३५

मिथिलायां दुष्पमास्वरूपोक्तिः ३३७

आयुर्वर्धने विज्ञप्तिः ३३८

निर्वाणमहः गौतमकेवलं ३३९

परम्परा ग्रन्थकारकाणामितिहा च ३४१

इति श्रीमहावीरचरित्रस्य विषयानुक्रमः

विषयानु-
क्रमः.

॥१४॥

॥ नमो वीतरागाय ॥

॥ श्रीमहावीरचरित्रम् ॥

॥ श्रीमद्गुणचन्द्रसूरिवर्यनिर्मितं ॥

पयडियसमत्थपरमत्थवित्थरं भवचक्रकयसोक्खं । विष्णुरइ जस्स रविमंडलं व नाणं निहयदोसं ॥ १ ॥
जस्स य सोहइ पणमंतसकसंकंतनयणकमलवणं । कमविमलसरं तललीणमीणमंथरं नहंसुजलं ॥ २ ॥
संगमयपणइणीहिं कडक्खविक्खेवस्वोभदक्खार्हिं । जस्स मणागंपि मणो न चालियं नियपइण्णाओ ॥ ३ ॥
नरतिरियदेवविहिओवसग्गरिउवग्गविजयजायजसो । ओहामियऽणवीरो सो जयइ जिणो महावीरो ॥ ४ ॥
पणमह सिरिरिसहजिणिंदचंदमुहामकामवलदलणं । गिहिसाहुधम्मपासायमूलपीढाइयं जेण ॥ ५ ॥
अजियाइणो जिणिंदा सुरिंदसंदोहनभियकमकमला । धम्ममहिधरणधीरा सेसव्व जयंति सेसावि ॥ ६ ॥
सो जयइ जिणो पासो जस्स सिरे सहइ फणिफणकडप्पो । पायडियसत्तजीवाइतत्तसंखं व दार्वितो ॥ ७ ॥
कविसेवियपयकमला सुत्तीहि पसाहिया महाभोगा । गोवग्गजणियसोक्खा सरस्सई जयइ सरियव्व ॥ ८ ॥

श्रीमहा०
चरित्रे
१ प्रस्तावः
॥ १ ॥

दंसियसमग्गसग्गापवरगमग्गाण गोयभाईणं । गुणवंताण गुरूणं थुणामि पयपंकयं निच्चं ॥ ९ ॥
इय संथवणिज्जप्पयपणाममाहप्पनिहलियविग्घो । भव्वाण सोक्खमूलं धम्ममुवएसं पयंपेमि ॥ १० ॥
जलहिजलगलियरयणं व दुल्लहं पाविऊण मणुयत्तं । पुरिसत्थज्जणकज्जे उज्जमियवं बुहजणेणं ॥ ११ ॥
तत्थ पुरिसत्थमत्थयचूडामणिविन्भमो परं धम्मो । सो पुण पइदिणसच्चरियसवणओ हवइ भव्वाणं ॥ १२ ॥
तस्स य धम्मस्स जिणो पणायगो संपयं महावीरो । चरियंपि उ तस्सेव य सुणिज्जमाणं तओ जुत्तं ॥ १३ ॥
तं पुण निस्सेसागमसमुहसवणासमत्थसत्ताणं । निउणेणावि न गुरूणा समग्गमवि तीरण वोत्तुं ॥ १४ ॥
ता जह भुवणेक्कगुरू निप्पडिमपभावधरियधम्मधुरो । मिच्छत्ततिमिरमुसुमूरणेक्कमिहिरो महावीरो ॥ १५ ॥
अच्चंतमणंतमणोरपारभववारिरासिमणवरयं । पुवं परियट्ठिय तिरियतियसपुरिसाइभावेणं ॥ १६ ॥
ओसप्पिणी इमीए पढमं चिय गामर्चित्तगभवंमि । नीसेससोक्खमूलं सम्मत्तमणुत्तमं पत्तो ॥ १७ ॥
तत्तो पाविय देवत्तमुत्तमं भरहचक्कवट्ठिस्स । मिरिइत्ति सुओ होउं काउं जिणदेसियं दिक्खं ॥ १८ ॥
दुस्सहपरिसहनिम्महियमाणसो पयडिउं तिदंडिवयं । मिच्छत्तविलुत्तमई कविलस्स कुदेसणं काउं ॥ १९ ॥
तहोसेणं अयराण वट्ठिउं कोडकोडिसंसारं । छन्भवगहणे पुणरवि पारिवज्जं पवज्जित्ता ॥ २० ॥
दीहं संसारं हिंडिऊण रायग्गिहंमि रायसुओ । होऊण विस्सभूई घोरं संजममणुचरित्ता ॥ २१ ॥

मंगलं सं-
क्षिप्तवृत्तं.

॥ १ ॥

मरणे नियाणबंघं निवत्तिव सुरसुहं च भोत्तुणं । पोयणपुरे तिविद्व परिपालिय वासुदेवत्तं ॥ २२ ॥
 मूयाए पियमित्तो चक्कित्तं संजमं च अणुचरिउं । छत्तग्गाए नंदण नरनाहत्तं च पवज्जं ॥ २३ ॥
 परिपालिय बीसइकारणेहिं तित्थाहिवत्तमज्जिणिउं । पाणयकप्पा चविउं कुंडग्गामंमि नयरंमि ॥ २४ ॥
 सिद्धत्थरायपुत्तो होउं जंतूणमुद्धरणहेउं । सबविरइं पवज्जिय दुविसहपरीसहे सहिउं ॥ २५ ॥
 केवललच्छिं लहिउं संपत्तो मोक्खसोक्खमक्खंडं । अट्ठहिं पत्थावेहिं सिद्धंताओ तह कहेमि ॥ २६ ॥

द्वादशभिः कुलकम् ॥ अहवा-

कत्थ भुवणेक्कपहुणो चरियं अम्हारिसो कहिं कुकई ? । साहसमिममसममुयहिपवाहतरणाभिलासोव ॥ २७ ॥
 तहवि हु गुरुजणवयणोवरोहओ मुद्धलोयसुहबोहं । विरएमि चरियमेयं खमियवं एत्थ सूरीहिं ॥ २८ ॥
 एत्थ य पत्थुयचरिए नाणाविहसंविहाणगाइन्ने । अमयजलकुलतुले महलकलाणवल्लीणं ॥ २९ ॥
 कत्थवि जइवि हु किंपिप्पसंगओ किंपि बुद्धवयणाओ । सत्थंतराणुसरणाओ किंपि किर भण्णइ अउव्वं ॥ ३० ॥
 चरिएयरंति तहवि हु न संकियवं कहिंपि कुसलेहिं । उवकहपमुहं एत्तो पज्जत्तं बहुपसंगेणं ॥ ३१ ॥ विशेषकम्

अत्थि समत्थावरविदेहालंकारकप्पकप्पपहुमणिमउडविडंकविविहरयणकंतिविच्छुरियचरणजिणनाहविहरणप-
 संतडिंबडमरं अमरागारसमुत्तुंगसिंगसमुवहसियहिमगिरिवरं वरवेरुलियकणयकलहोयपमुहमहागरसोदिववसुंधराभोगं

श्रीमहा०
चरित्रे
१ प्रस्तावः
॥ २ ॥

भोगोवभोगलालसज्जनजणियपरितोसं सुरभूमिसोहगमडप्परफंसयं महावप्पं नाम विजयखेत्तं, तत्थ य विसालसा-
लवल्लयखाइयापरिक्खित्ता नाणाविहविहारवापीकूवमहासरसरियपरिसराभिरामा सुविभत्तत्तियचउक्कचच्चरचउप्पह-
पसोहिआ पासायसयमालालंकिया सुइनेवत्थमहिच्छच्छेयजणसंकुला पागसासणपुरिच्च दीसंतनाणाविहरयणा कम-
लासणमुत्तिच्च सबओमुही विंशगिरिमेहलच्च पुन्नागनागसोहिआ जहत्थाभिहाणा जयंती नाम नयरी

कुलसेलुत्तुंगथणत्थलीएँ नहनइजलोहहाराए । धरणीरमणीएँ मुहे जा सोहइ चित्तलेहच्च ॥ ३२ ॥

सत्तमुणिमेत्तगव्वियमणेगमुणिसंकुला सुरपुरिंपि । एगवुहं भूरिविबुहा हसइ च जा तूररसिएहिं ॥ ३३ ॥

जीए य कमलसंडाण भित्तविरहसंकोयपीडणाणि मुणिवराण करवालुप्पाडणं बालकुंजरेसुं कलहसहो रहंगमि-
हुणाण पियविरहवेयणा तंतुवायसालासु वसणुम्भवो, न कयाइ लोएसु, तहिं च-सायरपणमंतमहंतसामंतमउलिमा-
लामणिमसिणियपायवीढो पयंडभुयदंडमंडलियकोडंडनियत्तत्तिकखलुरुप्पखंडियसयसत्तुमुंडमंडियसमरंगणो, दप्पुम्भ-
डसुहडपरिवुडदंडनाहसहस्साणुसरिज्जमाणमग्गो मग्गणगणवंचाइरित्तपूरियमणोरहो, रहोच्च सुसिलिट्टलट्टसुचक्क-
यसंचरणो रणरसियपुरिसोच्च कयवहुक्कवयपरिग्गहो गहगणोच्च कविमुहगुरुवयणाणुगओ गओच्च अणवरयदाणवरिसो-
रिसिच्च निग्गहियल्लवग्गपयारो पायारोच्च पुच्चपुहइपालपवत्तियनयनयरीए हिमगिरिच्च डिंडीरपिंडपंडुरकित्तिसुरस-
रियाए जलहिच्च अणेगगुणगणरयणरासीए

महावप्र-
जयन्ती
शत्रुमर्दनव.

॥ २ ॥

विपक्खदप्पसंढणो नरिंदवंसमंडणो, अजायभंगसासणो कुनीइलोयनासणो ।

असेससोक्खकारणं करेइ लोयपालणं, नरिंदसत्तुमइणो म(ज)णंमि चित्तनंदणो ॥ ३४ ॥

जंमि य नराहिवे पवलवलसालिभुयपरिहारोवियधरणिभारे रायनीइमेत्तं मंतिणो सोहा हरिकरिरहजोहसामग्गी
आडंबरं असिचक्कावसरकुंतप्पमुहपहरणपरिग्गहो सेवगा पणयावेक्खासजीयनिरवेक्खंगरक्खपरिक्खेवपरिक्कप्पणा ।
तस्स य रण्णो विसिद्धायारपरिपालणपरायणो धम्मसत्थसवणवियाणियहेज्जोवादेयवत्थुसरूवो गंभीरिमाइगुणग-
णावासो पयइसरलो पयइविणीओ पयइपियंवओ पयइपरोवयारपरो पुहइप्पइट्ठाणनामंमि गामे नयसारो नाम गाम-
चित्तगो अहेसि । जो य तहाविहसाहुसेवाविरहेऽवि अलसो अकज्जपवित्तीए परम्मुहो परपीडाए सयण्हो गुणगणो-
वज्जणाए अचक्खू परलिहपलोयणाए । एवंविहगुणो य सो सविसेसगुणुकरिससाहणनिमित्तं भणिओ गुरुअणेण,
जहा—धणरिद्धी दूरं वड्डियावि दुव्विणयपवणपडिहणिया । एकपएच्चिय पुत्तय ! पणस्सए दीवयसिहव्व ॥ ३५ ॥

णीहारहारधवलोवि वच्छ ! सेसो गुणाण संघाओ । विणएण विणा वयणं य नयणरहियं न सोहेइ ॥ ३६ ॥

अचंतपिओऽवि परोवयारकारीवि भुयणपयडोऽवि । वज्जिज्जइ पुरिसो विणयवज्जिओ गुरुभुयंगोव्व ॥ ३७ ॥

इय दुव्विणयत्तणदोसनिवहमवलोकण बुद्धीए । पुत्त ! रमेज्जसु विणए समत्थकल्लाणकुलभवणे ॥ ३८ ॥

तहाहि—विणएणं हुंति गुणा गुणेहिं लोगोऽणुरागमुव्वहइ । अणुरत्तसयललोयस्स हुंति सवाओ रिद्धीओ ॥ ३९ ॥

श्रीमहा०
चरित्रे
१ प्रस्तावः
॥ ३ ॥

रिद्धीहि संगओ गयवरोव अणवरयदाणवरिसेण । मग्गणगणपणईणं उवयारं कुणइ लीलाए ॥ ४० ॥
 उवयरणेणं तेसिं लम्भइ आचंदकालिया कित्ती । तीएऽविहु लद्धाए किं नो लद्धं तिहुयणेऽवि ? ॥ ४१ ॥
 एसच्चिय जेण थिरा जुगविगमेऽविहु न वच्चइ विणासं । उप्पत्तिपलयकलियं सेसं पुण थेवदियहथिरं ॥ ४२ ॥
 इय गुरुजणसिक्खं गिण्हिऊण तह कहवि संपयट्ठो(सो) । वीसासट्ठाणं नरवइस्स परमं जहा जाओ ॥ ४३ ॥
 अन्नया य सत्तुमद्दणनराहिवेण भवणसंदणाइनिमित्तं पवरदारूहिं पओयणंमि संपत्ते आणत्तो एसो-भइ !
 गच्छसु तुमं पभूयं सगडसमूहं किंकरनरनियरं च गहाय दारुनिमित्तं महाडवीएत्ति, तओ सिरसा सासणं से पडि-
 च्छिय विसिद्धसंबलगसमेओ समग्गसामग्गीसणाहो पट्ठिओ गामर्चित्तगो, पत्तो य अणवरयममणेण महाडवीए,
 जा य केरिसी?-गयणयलाणुलिहंतमहंतचित्ततरुवराभोगावरद्धदिसावगासा अणवरयझरंतगिरिनिज्झरझंकारमणहरा
 जहिच्छविसरंतरुवरुयिरिंछहरिहरिणसदूलभीसणा महापुरिसवच्छत्थलिच्च सिरिवच्छालंकिया भिगरायकंधरच्च
 केसरविसरविराइया उवसनगरभूमिच्च मायंगकुलसंकुला सुहडावलिच्च धरियवाणासणा । तहिं च निउत्तपुरिसेहिं
 सरला य दीहरा य विसाला सुंदरा य सुजायवट्ठखंधवद्धा य तरुणो समारद्धा छिंदिउं, एवं च छिंदंताण जाओ मज्झणह-
 समओ, संपत्ता भोयणवेला, पमुणीभूओ भोयणकरणाय गामर्चित्तगो, उवणीया किंकरगणेण विचित्तखंडखज्जप्पहाणा
 रसवई, जइ पुण सत्थपरिन्भट्ठो वा मग्गं अयाणमाणो वा एत्थ तडियकप्पडियसमणप्पमुहो अतिही छुहाभिभूओ एज्ज

नयसारः
विनयः
काष्ठेभ्यो-
गमनं,

॥ ३ ॥

ता तस्स दाऊण सयं भुंजामित्ति संपधारिऊण गामचिंतगेण थेवं भूमिभागं गंतूण तक्खणमवलोइयं दिसावलयं,
 एत्थंतरे सत्थपरिब्भट्ठा संता परिसंता खुहापिवासाभिभूया मज्झंदिणदिणयरतावविगलंतसेयसलिलधरा तरुवरनि-
 वडणकडयडारावनिसामणसंभावियसत्थावासा समागया तं पएसं तवस्सिणो, दिट्ठा य तेण ससंभमं, गओ तदभिमुहं,
 गाढकरुणारसाउरिज्जमाणमाणसेण पणमिऊण पुच्छिया अणेण—भयवं ! किमेवं विजणविहारमायरह ? , साहूहिं भणि-
 यं—भइ ! सत्थेण(समं)पढमं अम्हे पत्थिया, भोयणकाले जाव असणपाणट्ठा गामं पविट्ठा ताव गओ सत्थो, अम्हेऽवि
 तुरंता सत्थाणुमग्गलग्गा इंता निग्गया एत्थ महाडवीए, गामचिंतगेण भणियं—अहो निकरुणया अहो दुट्ठसीलया अहो
 नरकनिवासलालसत्तणं अहो वीसत्थघाइत्तणं अहो पावाभीरुत्तणं अहो आजम्मा नियकुलकलंककरणं तेसिं सत्थियाणं,
 अविय—सत्तपयमेत्तसंथववसेऽवि सुयणाण वड्डए नेहो । आजम्मदंसणेऽविहु निदयचित्ताण न खलाणं ॥ ४४ ॥

सत्थाणुसरणकालेऽवि चारिया किं न पावबुद्धीहिं । एए महाणुभावा पढमं चिय साहुणो तेहिं ? ॥ ४५ ॥

जइ एएसिं सीहाइएहिं कीरेज्ज एत्थ विदवणं । ता नूणमेव तेसिं नरगेऽविहु होज्ज संवासो ॥ ४६ ॥

अहवा पावाण कहाएँ होउ नियधम्मदूसणकरीए । आगच्छह आवासं कुणह पसायं ममेयानिं ॥ ४७ ॥

इय भणिए ते मुणिणो जुगमेत्तनिहित्तवक्खुणो धीरा । तस्सावासंमि गया पच्चक्खा धम्मनिहिणो व्व ॥ ४८ ॥

पुण्णवससाहुदंसणसिणेहसंजायतिव्वसद्धेणं । विउलेहिं असणपाणेहिं तेणऽवि पडिलाहिया विहिणा ॥ ४९ ॥

श्रीमहा०
चरित्रे
१ प्रस्तावः
॥ ४ ॥

गहियभत्तपाणेहि य पडिनियत्तिऊण जीवोवरोहरहिए थंडिलंमि पडिक्कंता ईरियावहिया आलोइयं भत्तपाणं
कयं चितिवंदणं विहिओ तक्कालोचिओ सज्झाओ, सुहज्झाणेण खणंतरं गमिऊण समुज्झिय रागदोसं मुणिणो परि-
जिमियत्ति, गामर्चित्तगोऽवि कयत्थमप्पाणं मन्नंतो भोत्तूण समागओ तेसिं सगासे भणिउं पवत्तो—भयवं ! आग-
च्छह तुम्हे जेण नगरगामिणिं वत्तिणिं उवदंसेमि, तओ पत्थिया साहुणो तेण सद्धिं, तेसिं च मज्झे एगो मुणी
धम्मकहालद्धिसंपन्नो, तेण य णायं—जहा एस धम्मजोगोत्ति, ता अवस्सं सद्धम्मे निजुंजियव्वो होइत्तिचित्तिऊण
भणिओ सो गामर्चित्तगो—भो महायस ! कुमग्गपरिब्भमणपीडियाणं तण्हाल्लुहाभिभूयाणं अम्हाणं तहाविहपडि-
वत्तीए असणपाणदाणेण य परमोवयारी तंऽसि ता किंपि अणुसासिउं समीहामो, गामर्चित्तएण भणियं—भयवं !
किमेवमासंकह ?नियसिस्सनिव्विसेसं सिक्खवेहिति, तओ साहुणा पारद्धा धम्मदेसणा, जहा—

धणुसिक्खाविरहियपुरिसखित्तसरजणियराहवेहं व । तुडिजोगा मणुयत्तं लद्धूणं कुसलवुद्धिमया ॥ ५० ॥
सग्गापवग्गफलसाहगस्स धम्मस्स पायवस्सेव । मूलं सम्मत्तमहो जाणेयव्वं पयत्तेणं ॥ ५१ ॥
मिच्छत्तपंकपडलावलुत्तसन्नाणनयणपसराणं । सिरसूलमूलमेसा जणाण सम्मत्तवत्तावि ॥ ५२ ॥
जुत्ताजुत्तं केणवि करुणापरवुद्धिणोवइट्ठं पि । दुस्सुमिणंपिव सोउं नेव वंछंति तुच्छमई ॥ ५३ ॥
दढमूढगुरुपरूवणवसेण कम्मं च तं पकुव्वंति । जेण निमज्जंति अहो कूवक्खणुज्जयनरो व्व ॥ ५४ ॥

साध्वागमः
दानादि
उपदेशश्च.

॥ ४ ॥

जं मिच्छतोदयो अगुरुं पि गुरुं अदेवमवि देवं । धत्तूरिओन्व गेणहइ लेहुं व सुवण्णबुद्धीए ॥ ५५ ॥
 तेणं चिय पाणिगणो गणणाइकंतवेलमणुभवइ । तं किंपि दुक्खनिवहं जं जाणइ केवली सम्मं ॥ ५६ ॥
 इय भो देवाणुप्पिय ! मिच्छत्तं सयलदोसकुलभवणं । नीसेसदुग्गदुग्गइसंसग्गकरं लहुं चयसु ॥ ५७ ॥
 सम्मत्तं पुण नीसेसदोसविरहियमसेससुहफलं । जीवाण तिव्वजरमरणदुक्खवुच्छेयणसमत्थं ॥ ५८ ॥
 जं मोहणिज्जपवलत्तविगमओ गुरुवसा सयं वावि । उल्लसई कल्लाणयवलीजलकुलतुलं व ॥ ५९ ॥
 तत्तो अट्टारसदोसवज्जिए जिणवरंमि पडिवत्ती । देवोत्ति समुप्पज्जइ निरवज्जा वज्जघडियन्व ॥ ६० ॥
 सयमवि धम्मपरेसुं सिद्धंतवियारणेक्ककुसलेसुं । धम्मोवएसनिरएसु होज्ज साहसु गुरुबुद्धी ॥ ६१ ॥
 ता जिणवयणायण्णणविण्णायसमत्थतत्तरयणस्स । विरमइ य मई लोइयधम्माउ कुवस्सयाउन्व ॥ ६२ ॥
 अवगणइ गोपयं पिव दुग्गइदुहमयरभीसणावत्तं । कम्मजलुप्पीलाउलमरइरउहं भवसमुहं ॥ ६३ ॥
 तहा—सम्मत्तुत्तमसज्जाहविहियरक्खो खणेण विक्खिवइ । सुहडोन्व तित्थियभडुब्भडंपि मिच्छत्तसंगमं ॥ ६४ ॥
 पासायस्स व पीढं पुरस्स दारं व मूलमिव तरुणो । बारसविहधम्मस्सवि आई किंत्तिति सम्मत्तं ॥ ६५ ॥
 इय भो एवं लक्खिय निरवेक्खो लोइएसु मग्गेसु । सहइणनाणसारं सरहसमणुसरसु सम्मत्तं ॥ ६६ ॥
 ताहे भत्तिभरोणयभालवलमिलंतमउलकरकमलो । सोच्चा सो गुरुवयणं भत्तीए भणिउमाढत्तो ॥ ६७ ॥

श्रीमहा०
चरित्रे
१ प्रस्तावः
॥ ५ ॥

भयवं ! किमेवमुवइसह पावनिरयाण बुद्धिरहियाणं । पच्चक्खपसूणं पिव अम्हाणं दढमजोग्गाणं ॥ ६८ ॥
गुरुणा भणियं मा वयसु एरिसं जेण जोग्गया तुज्झ । जाणिज्झइ संपन्ना संपइ पच्चक्खलिंगोहिं ॥ ६९ ॥
कहमण्णहमेवंविहमहाडवीनिवडिया तए अम्हे । दिट्ठा पइपब्भट्ठा गाढस्समसुद्धिय(सिद्धिल)सव्वंगा ? ॥ ७० ॥
कह तत्थवि दंसणमेत्तओऽवि चिरदिट्ठवल्लहजणे व्व । पुलयपडलाणुमेओ उप्पण्णो तुह पमोयभरो ? ॥ ७१ ॥
कह वा भोयणसमओवणीयनियभोयणेण दाणमई । जाया अम्हाणुवरिं खुहापिवासाभिभूयाणं ? ॥ ७२ ॥
एवंविहपरिणामो उप्पज्झइ नेव पुण्णरहियाणं । एवंविहा य अतिही न य चक्खुपहं पवज्जंति ॥ ७३ ॥
रयणनिहाणं किं रोरमंदिरे किं मरुमि कप्पतरु । कत्थवि थलंमि जलकमलसंभवो हवइ कइयावि ? ॥ ७४ ॥
ता एवंविहविघडंतवत्थुसंघडणलिंगसद्धेया । कहमिव तुज्झ न सद्धम्मजोग्गया भइमुह ! होज्जा ? ॥ ७५ ॥
जेणेरिस सामग्गी निरवग्गहपुण्णपगरिसवसेण । सिवलच्छिपेच्छियाणं निच्छयओ घडइ मणुयाणं ॥ ७६ ॥
किंच—आरियखेत्तुप्पत्ती कुलमकलंकं नरत्तसंपत्ती । निरुवहयरूवलाहो रोगोरगदूरविगमो य ॥ ७७ ॥
आउयमवि पडिपुण्णं कलाकलावंमि कोसलं विमलं । साहूहिं समं जोगो एत्तियमेत्तं तए पत्तं ॥ ७८ ॥
एत्तो एगयरंपिहु पण्णं व सकम्मपवणपडिहणिया । संसारंमि भमंता अणंतसत्ता ण संपत्ता ॥ ७९ ॥
तुमए पुण सव्वमिमं उवलद्धं पुण्णपगरिसवसेणं । ता एत्तो निरुवममोक्खसोक्खफलदाणदुल्लियं ॥ ८० ॥

सम्यक्त्वं
योग्यता

॥ ५ ॥

सिहिणो सिहं व सारं फणिवइफणरयणचक्रवालं व । एकं अपत्तपुवं गिण्हसु जिणदेसियं धम्मं ॥ ८१ ॥ युग्मम्
 इय भणिए सो चित्तेउमारद्धो तिष्ठजायसंवेगो । कह नियकज्जपसाहणपरम्मुहाणं गुणनिहीणं ॥ ८२ ॥
 केवलकरुणारससायराण समगणियरायरोराणं । जाओ मह पडिबंघो गुरुण खणदंसणे वावि ? ॥ ८३ ॥ युग्मम्
 निप्पुण्णेषु जणेषुं चक्खुं पि खिवंति नेरिसा समणा । ता सव्वहेसि वयणं जुत्तं मह संपयं काउं ॥ ८४ ॥
 विस्संभरतलविलुलंतमउलिमह पणमिऊण गुरुचलणे । आणंदसंदिरंसूनयणो सो भणिउमाढत्तो ॥ ८५ ॥
 निक्कारणेक्कवच्छल ! भयवं नीसेससत्तताणपरा । आरोहेसु ममिण्हिं सम्मत्तं भवविरत्तस्स ॥ ८६ ॥
 ताहे गुरुणा जिणभणियनीईओ नायजोग्गयगुणेण । चित्तुच्छाहप्पमुहपहाणसउणोवलंभंमि ॥ ८७ ॥
 अरिहं देवो गुरुणो य साहुणो जिणमयं मयं तुज्झ । इय एवं आरोवियमाजम्मं तस्स सम्मत्तं ॥ ८८ ॥
 भणिओ य वच्छ ! निव्वाणलच्छिबीयं मए इमं दिण्णं । संकाइदोसविरहेण सव्वहा ता जएज्ज इहं ॥ ८९ ॥
 घन्नोऽसि तुमं भइय ! दुहसयरुहंमि भवसमुदंमि । जेण तए जिणधम्मो तरणतरंडोवमो पत्तो ॥ ९० ॥
 एयस्स पभावेणं पालिज्जंतस्स सव्वकालं पि । जीवेहिं अणंतेहिं दुक्खाण जलंजली दिण्णो ॥ ९१ ॥
 पयईएँ खणविणस्सरसंसारुब्भवसुहस्स कज्जेणं । एयंमि मा पमायं काहिसि तं भइ ! कइयावि ॥ ९२ ॥
 अह सो नमिउं चरणे गुरुण भवभीयपाणिगणसरणे । हरिसभरवंधुरगिरं उदाहरित्था वयणमेयं ॥ ९३ ॥

श्रीमहा०
चरीत्रे
१ प्रस्तावः
॥ ६ ॥

थेवोवयारिणोऽविहु लोया पूयं करिंति सविसेसं । एवंविहोवयारीण तुम्ह किं संपयं करिमो ? ॥ ९४ ॥
तहवि नियत्तह भयवं ! गिण्हह धणरयणभवणसंसारं । अहवा किमेत्तिणं ? जीयंपिहु तुम्ह आयत्तं ॥ ९५ ॥
गुरुणोववूहिओ सो ससरीरेऽवि हु मभत्तरहिण । सम्मं कयं महायस ! तयत्ति एवं जओ भणियं ॥ ९६ ॥
सम्मत्तदायगाणं दुप्पडियारं भवेसु बहुएसुं । सब्बगुणमेलियाहिंवि उवयारसहस्सकोडीहिं ॥ ९७ ॥
परमत्थेण महायस ! दिण्णं तुमए समत्थमम्हाणं । एयंमि धम्मकम्मंमि निच्चमब्भुज्जमंतेण ॥ ९८ ॥
इय गुरुणा सिक्खविउं जिणिंदधम्मस्स सब्बपरमत्थं । भणिओ सो अणुजाणसु एत्तो अम्हे गमणकज्जे ॥ ९९ ॥
दूसहगुरुदंसणविरहवेयणावाउलीकयसरीरो । दूरपहं अणुगच्छिय दंसिय मग्गं नियत्तो सो ॥ १०० ॥
भावेंतो गुरुवयणं चिंतंतो भवभयं महाघोरं । सम्मत्तभावियमई निययावासंमि संपत्तो ॥ १०१ ॥

तओ काऊणमणंतरकरणीयं भरिऊणं सगडाणि विसिट्ठकट्ठाणं नीसेसभिच्चजणसमेओ नियत्तो नियगाभाभिमुहं,
पत्तो य कालक्कमेण, पेसियाणि दारूणि नरिंदस्स । तओ पइदिणं अब्भस्संतो जिणधम्मं पज्जुवासंतो मुणिजणं
परिचित्तितो जीवाजीवाइणो नव पयत्थे रक्खंतो पाणिगणं बहु माणंतो साहम्मियजणं सव्वायरेण पभावेंतो जिण-
सासणं कालं गमेइ । अण्णया य मरणपज्जवसाणयाए जीवलोयस्स खणभंगुरत्तणओ सव्वाभावणं तहाविहुमुवक्कम-
णकारणं पाविऊण सोसम्मं परिपालियाविरयसम्मदंसणभावो कयपज्जंताराहणाविहाणो सुमरंतो पंचनमोक्कारं

सम्यक्त्वा-
रोप
आराधना.

॥ ६ ॥

पंचत्तमुवगओत्ति ।

उववण्णो सोहम्मे पलियाउसुरो तओ सुदिट्ठीओ । अंतोमुहुत्तमेत्तेण पत्तपज्जत्तभावो य ॥ १०२ ॥
जय जय नंदा ! भहत्ति वाहरंतेण किंकरजणेण । हरिसभरनिम्भरेणं कारियतक्कालकायवो ॥ १०३ ॥
उत्तुंगथोरथणवट्टलट्टरेहंतमोत्तियसरीहिं । छणमयलंछणसच्छहवयणाहिं कुवल्यच्छीहिं ॥ १०४ ॥
निम्मलकवोलतललिहियचित्तविच्छित्तिपत्तवलीहिं । करकिसलयपरिघोलिरचामीयरचारुवलयाहिं ॥ १०५ ॥
सुरसुंदरीहिं सद्धिं कीलंतो तेसु तेसु ठाणेसुं । रइसागरावगाढो कालं वोलेइ लीलाए ॥ १०६ ॥ तीहिंविसे०
कल्लाणगेसु पंचसु चवणप्पमुहेसु जिणवरिंदाणं । नंदीसरदीवाइसु परिचत्तासेसवाचारो ॥ १०७ ॥
भवजलहितरंडमिमं त्तिदुक्खतत्ताणममयमेयंति । मणवंच्लियत्थपूरणचिंतामणिपच्चलमिमंति ॥ १०८ ॥
अम्हारिसाणभविरइपराण इय विहियगाढवहुमाणो । हरिसभरनिम्भरंगो कुणइ य अट्ठाहियामहिमं ॥ १०९ ॥ तीहिंविसे.
द्विमवंतमहाद्विमवंतपमुहकुलपव्वएसु अणवरयं । दिव्वविमाणारूढो सिद्धाययाणि पेच्छइ य ॥ ११० ॥
सुणइ य पच्चक्खं चिय विहरंतऽरिहंतवयणकमलाओ । संसारुव्वेयकरं भत्तीए धम्मसव्वस्सं ॥ १११ ॥
दुक्करतवचरणकिसंग(सारए)संगवज्जिए मुणिणो । मणवयणकायगुत्ते भत्तीए पज्जुवासइ य ॥ ११२ ॥
इय पवरसिद्धिमंदिरसोआणपरंपरासरिच्छंमि । सिरिवीरनाहजिणवरचरियंमि गुणोलिनिलयंमि ॥ ११३ ॥

श्रीमहा०
चरित्रे
२ प्रस्तावः
॥ ७ ॥

अचंतुत्तमसम्मत्तलाभनामो समत्थिओ एसो । भव्वजणचित्तसंतोसकारओ पढमपत्थावो ॥ ११४ ॥ इइ
सम्मत्तलाभनिरूवणो पढमो पत्थावो ।

अह बिइओ पत्थावो

एवं लाभो बोहीएँ परमसिवसाहिबीयभूयाए । भणिओ एत्तो सम्मं मिरीइवत्तन्वयं सुणह ॥ १ ॥

एत्थेव संमत्थसमुद्दीववलओवगूढपज्जंते । मेरुविराइयमज्जे जंबूदीवंमि दीवम्मि ॥ २ ॥

आरोवियधणुगुणसच्छहंमि तह दाहिणद्धभरहंमि । गंगासिंधूण महानईण वहुमज्झयारंमि ॥ ३ ॥

अत्थि पसत्थविविहतसुसंडमंडियपरिसरा पेरंतपरुद्धपंडुच्छुताडनीवारविराइया नाणामणिरयणरइयधर-
णिवीढा अमरावइव नासचाहिद्विया अहिणवपुरिव्व नवकुलालंकिया जणयतणयन्व कुसलवलालसा विलासिणिन्व
दीहरच्छोवसोहिया रामएवसेणन्व अदिट्ठविहीसणदोसा पायालपुरिव्व अहीणजणाणुगया सुरिंदवयणोवरोहहरिसि-
यवेसमणजक्खविणिम्मिया बारसजोयणदीहा नवजोयणविच्छिण्णा समुत्तुंगकणयपायारपरिक्खत्ता पवरभवणमा-
लासहस्साभिरामा धणकणययणपरिपूरिया विणीया नाम नयरी ॥

जत्थ वम्महो इव अखंडरूवलावणजोव्वणगुणविन्ममो रेहइ पउरजणो, अकित्तिममंडणाओ सुरसुंदरीओ-
वि परिहवंति नियरूवेण तरुणीओ, जहिं च सूरुसु चेव सुव्वइ मग्गणसहो दोसियाणं दोसाभिलासो तरुवराणं गया-

विनीता-
श्रुपभव

॥ ७ ॥

परावत्तो रयणेषु बहरसदो ॥ तं च रक्खेइ खंचियचलियासणागयाखंडलकरकलियकणयकलसविहियरजाभिसेओ
तकालसंगहियउग्गभोगरायन्नखत्तियचउव्विहपहाणपरियरो सुरयइविइण्णकणयकडयतुडियमणिमउडपमुहदिब्बालं-
कारालंकियसरीरो सिरिउसभनराहिवो ॥

कसिणासाढचउत्थीएँ चत्तसव्वत्थसिद्धिवासो जो । उत्तरसाढानक्खत्तजोगमिंदुमि संकंते ॥ ४ ॥
कुलगरनाभिस्स गिहे चोहसगयपमुहसुमिणकयसूओ । मरुदेवीए गब्भे पाउब्भूओ महाभूर्इ ॥ ५ ॥
पुव्वज्जियपुण्णसमूहचलियसिंहासणेण सक्केण । भत्तीए जस्स पणया जणणी गब्भावयारंमि ॥ ६ ॥
चेत्तबहुलट्ठमीए उत्तरसाढासु अद्धरत्तंमि । भुवणजणजणियतोसो जाओ जो पुण्णचंदोव्व ॥ ७ ॥
जस्स थ जम्मणकम्मं तक्खणचलियासणा उ अकरिंसु । निययहिगारणुरूवं छप्पण्णदिसाकुमारीओ ॥ ८ ॥
वत्तीससुरिंदेहिं नीसेसामरसमूहसहिएहिं । मेरुंमि जम्ममज्जणमहसवो निम्मिओ जस्स ॥ ९ ॥
जस्सोरुवसभलंछणदंसणसंजायहरिसपुलएण । सिरिनाभिनरिदिणं उसभोत्ति पइट्ठियं नामं ॥ १० ॥
सुररायपाणितलसंठिओब्बुलट्ठिं करे धरंतेण । जेण जहत्थभिहाणं निम्मियमिक्खागुवंसस्स ॥ ११ ॥
लेहप्पमुहा वावत्तरी कला जेण देसिया पढमं । बहुभेयं कासवलोहचित्तघडवत्थसिप्पं च ॥ १२ ॥
कम्मं च खेत्तवाणिज्जपमुहमाई निदंसियं जेण । अविपक्कणविभक्खणदुक्खियजणजलणपयणं च ॥ १३ ॥

श्रीमहा०
चरित्रे
२ प्रस्तावः
॥ ८ ॥

दुन्नयपसत्यजणसिक्खणत्थमुवदंसिया जए जेणं । सिद्धजणरक्खणट्ठा सामाइ चउविहा नीई ॥ १४ ॥
दारपरिग्गहसमए जस्स सुरिंदेण परमरिद्धीए । पुंखणगविहिसणाहो विवाहमहूसवो विहिओ ॥ १५ ॥
वागरणळंदकहकब्बमग्गजोइसपमोक्खवहुविजा । लद्धा जेणुवइट्ठा पढमं चिय सुद्धबुद्धीए ॥ १६ ॥
नियनियकम्मनिसेवण नियमेणं गुरुजणस्स नमणं च । जायकुलाण ववत्था जेण समत्था कया भुयणे ॥ १७ ॥
किं बहुणा-जुत्ताजुत्तवत्थुविण्णाणसुण्णहियएसु । नीई अज्जवि विफुरइ जस्स कित्तिव्व सव्वगया ॥ १८ ॥
तस्स य गयतुरयपमुहरज्जंगपरिवुडस्स संसएसु य ववत्थासु य कुलायारेसु य परोप्परविसंवाएसु य सयल-
जणपुच्छणिज्जस्स नंदाए देवीए सुमंगलाए य समं विसयसुहमणुहवंतस्स वच्चंति वासरा, अण्णया य सुमंगलाए
देवीए भरहो वंभी य मिहुणगं जायं, तहा सुनंदाएऽवि देवीए बाहुवली सुंदरी य जुवलयं जायं, एवं वच्चंतंमि काले
पुणोऽवि सुमंगला देवी अण्णाणि एग्गूणपन्नासं पुत्तजुयलगाणि पसूया, ते य भरहप्पमुहा कुमारा वट्ठंति सरिरेण
नीसेसकलाकलावकोसलेण य, एवं च निदंसिय सयलकला कुलव्ववत्थाए सुहलोयवावारो उसभनरिसरो तेयासी-
पुव्वलक्खाइं जाव परिपालिऊण गिहत्थपज्जायं अवलोइऊण परलोयमग्गाणुरूवधम्मवाचारविरहियं भवपंकनिमज्जमाणं
(जणं)मणे अच्चंतकरुणारसालिद्धबुद्धी तक्कालचलियासणागयसारस्सयपमुहलोगंतियतियससमहियमुच्छाहियचित्तवित्ती
विणिवित्तभोगपिवासो भरहप्पमुहपुत्तसयसंविभत्तपरिचित्तवसुंधराभारो आसंवच्छरुगयवारिधारावरिसाभिणंदियदी-

ऋषभवाक्यं
भरतादि-
जन्म.

॥ ८ ॥

णमग्गणजणो चेत्तस्स बहुलट्ठमीए उत्तरासाढनक्खत्ते पच्छिमपहरावसेसे दिवसे कच्छमहाकच्छपमुहाणं नियनियपुण्ण-
 (त्त)निहित्तरज्जवावडाणं चउहिं सहस्सेहिं मंडलेसराणं परिवुडो देवदाणवुक्खित्तविचित्तचित्तोवसोहियसुदंसणाभि-
 हाणसिविकाधिरूढो परमविभूर्इए समग्गकाणणलच्छिलीलावणंमि उज्जाणे कयकट्टुकिट्टवकम्मो परिचत्तसवंगसं-
 गिरयणाभरणो सयमेव चाउमुट्ठियं लोयं काऊण कयसिद्धनमोकारो पडिवणणसव्वसावज्जजोगविरती वत्तीससुरेसरेहिं
 चउव्विहदेवनिकायसहिण्हिं सव्भावसाराहिं महत्थाहिं पसत्थाहिं गिराहिं थुव्वमाणो पंचिंदियदित्ततुरयदमणो
 समणो जाओत्ति ॥

सुररायनिसिद्धविसिद्धसमंसावलंवि वहमाणो । कच्छमहाकच्छपमोक्खभिक्षुलोएण परियरिओ ॥ १९ ॥
 परिचत्तसव्वसावज्जजोगसंगो तिगुत्तिगुत्तो य । अप्पडिबद्धो गामाणुगाममह विहरिओ भयवं ॥ २० ॥ जुम्मं ।
 धणकणयसमिद्धसमुद्धरा य मणुया मुणंति नो तइया । का भिक्षा के तग्गाहिणोत्ति भिक्षं भमंतंमि ॥ २१ ॥
 परमेसरंमि ताहे नियपहुपणएण कणगकरितुरए । इत्थी महत्थवत्थे पणया मणुया पणामेंति ॥ २२ ॥ जुम्मं ।
 भिक्षं अपावमाणा कच्छमहाकच्छपभिइणो मुणिणो । पइदियहमणसणेणं संजायसरीरसंतावा ॥ २३ ॥
 तेलोक्कनायगे मोणमस्सिए ते उवायमलभंता । परिसडियपंडुपत्ताइभोइणो काणणंमि ठिया ॥ २४ ॥ जुम्मं
 भयवंपि निप्पकंपो सुरसेलो इव विसिद्धसंघयणो । पइदिणमदीणचित्तो एगागी विहरइ महिंमि ॥ २५ ॥

श्रीमहा०
चरित्रे
२ प्रस्तावः
॥ ९ ॥

कच्छमहाकच्छसुया नमिविनमी रायलच्छिमिच्छंता । चिंतामणिन्व सन्वायरेण सेवंति भयवंतं ॥ २६ ॥
तन्भित्तिरंजियमणेण नागराएण दिन्नवरविज्जा । विज्जाहररायत्तं पाविय विगया जहाभिमयं ॥ २७ ॥
भयवंपि गामनगरागरेसु भिक्खं अपावमाणोऽवि । विहरंतो किसियतणू कुरुदेसे गयपुरंमि गओ ॥ २८ ॥
जिणदंसणसुमरियपुव्वजम्मसंजायतिवसद्धेण । सेज्जंसकुमारेणं सिरिवाहुबलिस्स पउत्तेणं ॥ २९ ॥
तक्कालागयपुरिसोवणीयपंडुच्छुगंडयरसेणं । संवच्छरपज्जंते भयवं पाराविओ तत्थ ॥ ३० ॥ जुम्मं ।
पडिया य कणयधारा तियसेहिं समाहयाइं तूराइं । मिलिओ य पउरलोओ तेणवि कहिओ सयुत्तंतो ॥ ३१ ॥
भयवंपि पारणयं काऊण वहलीयडंबइल्लसुवण्णभूमिपग्गहेसु देसेसु विहरमाणो तन्वासिमणुयाणं मोणमल्लिणोऽवि
समाहप्पेण भद्दगभावं जणंतो विविहत्तवचरणपरायणो असंकिलिट्ठयाए तक्कालियलोयस्स अतहाविहवेयणीयकम्मओ
य निरुवसग्गं संजममणुपालितो समइकंते एगंमि वाससहस्से विणीयनयरीपच्चासण्णंमि पुरिमतालंमि नयरंमि
संपत्तो, तस्स उत्तरपुरत्थिमे दिसीभाए सगडमुहं नाम उज्जाणं, तंमि नग्गोहपायवस्स हेट्ठा संठियस्स अट्ठमेणं भत्तेणं
पुव्वण्हदेसकाले फग्गुणवहुलेकारसीए उत्तरासाढानक्खत्ते भगवओ तिहुयणेक्कबंधवस्स ज्ञाणंतरियाए वट्ठमाणस्स
दिव्वं अणंतं लोयालोयगयमावाभावसहाववत्थुसत्थपरमत्थनिन्भासणसमत्थं केवलनाणं समुप्पण्णं ॥ अह जिणना-
हनाणुप्पायमाहप्पपरिकंपियसीहासणप्पलोयणपउत्तावहिमुणियनाणवइयरा पइयपडहप्पमुहगंभीरतूरवा संखोभि-

दीक्षा
पारणं
केवलं,

॥ ९ ॥

यसुरलोया सरभसपणचिरसुरसुंदरीभुयलयालोलंतरयणवलयरणज्झणारवनिम्भरभरियभुवणंतरा आगंतूणं वत्तीसं
ससुरा सुरिंदा समवसरणं विरइंति । केरिसं चिय ?—

अइसुरभिसिसिरमारुयपडिहयतणुरेणुतक्कणुकेरं । घुसिणघणसारगंधाभिरामसलिलोवसंतरयं ॥ ३२ ॥

आजाणुमेत्तविक्खित्तकुसुमरेहंतरयणमहिवीढं । डज्झंतधूवधूमंधयारघणसंक्रियसिंहंडिं ॥ ३३ ॥

मणिचामीयरनिद्धंतरुप्पपायारवलयतियकलियं । सव्वत्तोमुहमणिरयणरइयसिंहासणसणाहं ॥ ३४ ॥

डिंडीरपिंडपंडुरत्तत्तयरुद्धरविकराभोयं । पवणुव्वेल्लियकंकेल्लिपल्लुल्लिहियनहविवरं ॥ ३५ ॥

गयणद्वियसुरकरपहयगहिरवज्जंतदुंदुहिसमूहं । दिसिमुहपसरियनिम्मलभामंडलखंडियतमोहं ॥ ३६ ॥

सरयनिसायरकरनियरागारधुव्वंतचामरुप्पीलं । इय एवंविहमुहामदोसहरणं समोसरणं ॥ ३७ ॥ छहिं कुलयं ।

तंमि य भुवणेक्कपहू पवरे सीहासणे तियसपणओ । पुव्वासुहो निसीयइ तित्थस्स नमोत्ति भणिऊणं ॥ ३८ ॥

हरिसभरनिम्भरुम्भिणणपुलयपडलोवसोहियसरीरा । सट्ठाणेषु निलीयंति तक्खणं चउविहा देवा ॥ ३९ ॥

पूरिज्जइ अंबरमित्तजंततियसाण पंचवण्णेहिं । उद्धूयर्चिधेहिं विमाणलक्खमालासहस्सेहिं ॥ ४० ॥

एत्थंतरे जिणपउत्तिपरिन्नाणनिमित्तं पुव्वनिउत्ता केवलनाणुप्पत्तिनिवेयणत्थं तथा पहरणसालापाउब्भूयप-
भूयजक्खसमहिद्वियनिस्सामन्नफुरंतफारपहाभरनिकत्तियपयंडतमकंडुडापरचक्करयणवइयरसंसणत्थं च भरहनरिंवस्स

श्रीमहा०
चरित्रे
२ प्रस्तावः
॥१०॥

पुरओ जुगवं चिय समागया वद्धवेगा पुरिसा । तओ भरहो इहलोयतुच्छमुहमेत्तसंपायणपचलत्तं निच्छिऊण चकरय-
णस्स उभयलोगमुहजणगत्तं पुण परमेसरस्स पवरकरेणुगाखंधाधिरोहियसुयविरहविहुरमरुदेवासमेओ नीसेसकुमारनि-
यरपरियरिओ समग्गवलवाहणो हरिसभरनिब्भरंगो भगवओ केवलमहिमं काउं संपत्थिओ । अंतरेण मरुदेवीए
भगवओ छत्ताइछत्तपमुहं विभूइसमुदयं पेच्छंतीए तहाविहभवियव्वयावसेण सुहज्झाणपरायणाए अंतगडकेवलित्तं
जायं । भरहखेत्ते पढमसिद्धोत्ति परिचिंतिऊण देवदाणवेहिं कया तीसे महिमा, खित्तं खीरोयसायरे से सरीरं, भरहो
य परमपमोयमुव्वहंतो तित्थयरं तिपयाहिणीकाऊण बहुप्पयारं थोऊण सदेवमणुयासुराए सभाए आसीणो । सामि-
णावि सजलजलहरारावगंभीराए आजोयणप्पमाणखेत्तपडिप्फलणपचलाए पइजणमेककालं संसयसयवुच्छेयजण-
णीए वाणीए पारद्धा धम्मदेसणा ॥ रुहं ?

भो भो महाणुभावा ! दुलहं लहिऊण माणुसं जम्मं । उप्पत्तिपलयकलियं वियाणिउं भवसरूवं च ॥ ४१ ॥

कीसायासनिबंधणसयणसरीरेसु मोहवामूढा । धम्मोवज्जणरहिया निरत्थयं गमह नियजीयं ? ॥ ४२ ॥

सुमरह किं न निरंतरमणंतसो तिकखदुक्खसंतत्ता । विवसाएसु ववसिया जं भे चउसुं पि विगईसुं ॥ ४३ ॥

तथाहि—नरए परमाहम्मियपहरणछिज्जंतअंगपचंगा । तिरियत्ते वहवंधणदहणंकणवाहणाभिहया ॥ ४४ ॥

देवत्तेऽवि य ईसाविसायपेसत्ततावसंतत्ता । मणुयत्ते पुण दोगच्चवाहिविहुरा चिरं वुत्था ॥ ४५ ॥

समवसरणं
मरुदेवी-
मोक्षः
देशना,

॥१०॥

इय चउगइदुहनिवहं अणुसुमरिय मोक्खसोक्खकंसिल्ला । निरवज्जं पव्वज्जं पव्वज्जितं उज्जमह धम्मो ॥ ४६ ॥
 एवमाइ भगवओ धम्मदेसणं का(सो)ऊण भरहो सावगो जाओ, वंभी य पव्वइया, भरहपुत्तो पुव्वभववद्ध-
 गणहरनामगोत्तो उसभसेणो नाम, सो य जायसंवेगो पव्वइओ, सुंदरी पुण साविगा जाया, एस चउव्विहो समण-
 संघो पढमसमोसरणे भगवओ पाउच्चूओत्ति । ते य कच्छमहाकच्छवज्जा तावसा सुणिऊण जिणनाहकेवलनाणमहिमं
 भवणवइवाणमंतरवेमाणियजोइसियदेवगणपरिवुडं भगवंतं दट्ठूण पव्वइया । एत्थंतरे जायभववेरग्गा पडलगगतणं
 व रायसुहं उज्झिऊण भरहस्स पंच पुत्ताणं सत्त नत्तुयाणं सयाइं समकालमेव तंमि चेव समोसरणे पव्वज्जं पवण्णाइं ।
 अह गामचित्तगजिओ सोहम्मो पालिऊण देवत्तं । पलिओवमपज्जंते भरहनरिंदस्स भज्जाए ॥ ४७ ॥
 वम्माए गब्भंमि पाउच्चूओ सुसुभिणकयसूओ । पुव्वभवसाहुदंसणपावियधम्माणुभावेण ॥ ४८ ॥
 अद्धट्ठमदिवसाहिय नव मासे वसिय गब्भवासंमि । उववन्नो कयपुन्नो पवित्तनक्खत्तसुसुहुत्ते ॥ ४९ ॥
 दसदिसिमुहेसु पसरंतमुत्तमं निहयतिमिरसंभारं । जाओ सूरौव्व तओ मिरियजालं विमुबंतो? ॥ ५० ॥
 परमब्भुयभूयं जम्मवइयरं चक्किणा निसुभिऊण । तस्स जहत्थं ताहे मिरिइत्ति पइट्ठियं नामं ॥ ५१ ॥
 करकिसलयसोहिल्लो कंकिल्लितरुव्व जणमणाणंदो । देहोवचएण तओ कुमारमावं समणुपत्तो ॥ ५२ ॥
 अन्नया य सो मिरिई कुमारो भगवओ आइतित्थगरस्स असो गपुप्फवुट्ठिपमुहं च पाडिहेरविभूइं चउव्विहदेवनि-

श्रीमहा०
चरित्रे
२ प्रस्तावः
॥११॥

काएण कीरमाणं ददूण तीयाणागयपडुप्पणवत्थुसत्थवित्थरगयसंदेहसंदोहदहणपसमणेक्कपीऊसधाराणुगारिणिं
धम्मदेसणं निसामिऊण य करिकलहकन्नतालतरलमवलोइऊण जीवियं उव्वेलिरमहल्लविसवेल्लीसरित्थं निच्छि-
ऊण कुवल्लयच्छिसंजोगसमुब्भवमुहं अयंडतडिंदंडभंगुरं जाणिऊण पणइजणपेम्मप्पबंधं परूढगाढसद्धम्मपरिणामो
महाविभूर्इए पियामहस्स पासे पव्वइओत्ति ।

तओ सम्ममहिगयसमणधम्मो पंचप्पयारायारसमायरणपरायणो पंचसमिइसमिओ तिगुत्तिगुत्तो पंचमहव्वयर-
क्खणवद्धलक्खो ससरीरेऽवि निरवेक्खो रयणवणिओ इव परिचत्तलोहायरो सायरो इव मयरहिओ दिणयरो इव दो-
सुम्मूलणकरो नागराओव्व दूरुद्धखमावलओ मंदरो इव निम्महियजलही सुहडो इव निहयविसमकरणो गामा-
गरनगरेसु अप्पडिबद्धो थेराण पासे सामाइयाइं एक्कारसंगाइं ससुत्ताइं सअत्थाइं थिरपरिचियाइं करेमाणो सामिणा
सद्धिं विहरइत्ति ।

इओ य-भरहराया समुप्पन्नचक्करयणो चाउरंगवलकलिओ पुव्वदिसाए भागहत्तिथं दाहिणेण वरदामं पच्छि-
मेण पहासं उत्तरेण य चुल्लहिमवंतपरिसरं जाव साहिऊण छक्खंडभरहं सट्ठीए वाससहस्सेहिं बत्तीसनरवइसहस्सपरि-
यरिओ अइगओ विणीयरायहाणिं, कओ से बारस वासाइं महारायाहिसेओ, विसज्जिया य रण्णा नियनियट्ठाणेषु
दूरदेसागया नरवइणो ।

मरीचिजन्म
दीक्षा
विजयाः

॥११॥

अन्नया य भरहो अट्टाणउइए जुलभाउयाणं दूयं पेसेइ, भणावेइ य जहा-मम सेवं पडिवज्जह अहवा रज्जाइं परिहरह जुज्झसज्जा वा हवह उवायंतरं वा परिकप्पहत्ति, एवं च राइवणं सम्ममवधारिऊण गओ दूओ, निवे-इओ तेसिं भरहनरिंदाएसो, तं च समायन्निऊण कोवावरत्तनेत्तेहिं लीलाजट्टिताडियधरणिवट्ठेहिं भणियं तेहिं-रे इया-हम ! को भरहो ? को वा एरिसवत्तन्वे तस्साहिगारो ? जेण तस्स अम्हाणं च ताएणं दिण्णं रज्जं तम्हा ताओ चेव जं आणवेही तं करिस्सामोत्ति, रोसेण कंठे घेत्तूण निद्धाडिओ दूओ अवहारेणं । एत्थंतरे गामाणुगामेण विहरमाणो भयवं आइतित्थयरो अट्टावयंमि नगवरे समोसरिओ, आगओ चउव्विहदेवनिकाओ, तेऽवि अट्टाणउइंपि कुमारा तुरियं समोसरणमागया, सह्रिसं च सामी वंदिऊण निसन्ना सट्टाणे, पत्थावे य भरहाएसं कहिऊण पुट्ठं तेहिं-ताय ! कहेसु किं जुज्झामो उयाहु रज्जाइं चयामोत्ति, ताहे सामी तेसिं जोग्गयमुवलब्भ भोगनिवित्तिनिमित्तं असम्भावपट्टावणाए इंगालदाहगदिट्ठंतं कहिउमाढत्तो-

जह एगो किर पुरिसो भायणमेगं तु भरिउ सलिलस्स । इंगालाण निमित्तं काले गिम्हे वणंमि गओ ॥ ५३ ॥

तत्थेगत्य बहूइं खायरपमुहाइं सारकट्टाइं । सो मेलिऊण जलणं पज्जलइ तस्समीवगओ ॥ ५४ ॥

ज्ज्झंतकडसिहिताविउत्ति संलिन्नदारुसमिओत्ति । मज्झंदिणदिणयरपीडिओत्ति तणहाउरो सुत्तो ॥ ५५ ॥

तं पुच्चाणीयं जलमसेसमापियइ तत्थ सुमिणंमि । गिंभुम्भवदिणयरकिरणविदुरमरुथेरवसहोव्व ॥ ५६ ॥

श्रीमहा०
चरित्रे
२ प्रस्तावः
॥१२॥

तद्वि हि असमियतण्हो गेहे गंतूण सयलकलसजलं । निट्टविऊण निलीयइ पोक्खरिणीवाविकूवेसु ॥ ५७ ॥
पीए तस्सलिलंमिवि गंगाइमहानईसु ओगाढो । ताओऽविहु सोसेई पलएव्व पयंडमत्तंडो ॥ ५८ ॥
तत्तो जलहिजलं पिय अंजलिसलिलं व पियइ नो तद्वि । तस्स उवसमइ तण्हा अवि अहिययरं पवट्ठेइ ॥ ५९ ॥
ताहे अपावमाणो कहिंपि सलिलं समत्थभुवणेऽवि । अवलोइउं पवत्तो सो संतत्तो पयत्तेण ॥ ६० ॥
अह एगत्थ पएसे अहउंडो पूइयवो य (पूइयोव)सलिलोव(य) । तेणं दिट्ठो कूवो चिरेण परितुट्ठचित्तेण ॥ ६१ ॥
पविसिउमसमत्थो दीहरज्जुणा बंधिऊण तण्णूलं । सो खिवइ तत्थ तण्हासमत्थदुक्खस्स पसमट्ठा ॥ ६२ ॥
तो तक्कहियपूलयपेरंतगलंतविंदुसंदोहं । उहं विचारियमुहो आसायंतो गमइ कालं ॥ ६३ ॥
जह तस्स वाविदीहियसायरसलिलेहिं अहयतण्हस्स । नो किंपि होज्ज तेसिं तण्णमलग्गेहिं विंदूहिं ॥ ६४ ॥
एयं देवाणुपिया ! तुम्हाणं पुबकालिवमवेसु । उवभुत्तपवरपंचप्पयारसहाइविसयाणं ॥ ६५ ॥
पुणरवि सव्वाणुत्तरसव्वत्थविमाणपत्तसोक्खाण । तेत्तीसं अयराइं निव्विग्घमणंतरभवंमि ॥ ६६ ॥
जइ भो महाणुभावा ! तित्ती भोगे पडुब नो जाया । ता किं इमिणा होही मुत्तेणं तुच्छरज्जेण ? ॥ ६७ ॥
तो असुइसंभवेसुं तुच्छेसुं माणुसेसु भोएसु । अइयोव्वकालिएसुं पज्जंते दुहविवागेसुं ॥ ६८ ॥
मुहमडुरेसुं आवइसइस्सहेऊसु निंदनिज्जेसु । साहुजणवज्जिएसुं मुहुत्तमवि मा कुणह संगं ॥ ६९ ॥

९८ पुत्राणां
प्रमोद-
देशः.

॥१२॥

तक्खणकयवेयालियपवरज्जयणेण बोहिऊणेवं । ते जिणवरेण सम्मं मुणिदिक्खं गाहिया सन्वे ॥ ७० ॥
तो सुचरियसामन्ना विणिहयनीसेसघाइकम्मंसा । भुवणजणपणयचरणा जाया सन्वेऽवि केवलियो ॥ ७१ ॥
विहरंति जिणेण समं गामागरनगरमंडियं वसुहं । अह दूयं भरहवई पुण पेसइ बाहुबलियोऽवि ॥ ७२ ॥
तेणवि दूयं निम्मच्छिऊण भरहेण सह समारद्धो । दिट्ठीवायाइओ संगामो जाव पव्वइओ ॥ ७३ ॥
तत्थेवुस्सग्गठिओ कह लहुभाईण वंदणं काहं ? । बंभीसुंदरिपेसण ओयरणं कुणसु हत्थीओ ॥ ७४ ॥
बुत्ते चिंतानाणं जिणस्स पासंमि गमणमह तस्स । भरहोऽवि हयविपक्खं भुंजइ रज्जं सनगरीए ॥ ७५ ॥

इओ य-तस्स मिरियस्स दसविहचक्कवालसामायारीनिरयस्स सिद्धन्तपसिद्धसंजमकरणपरायणस्स संसारा-
सारयं परिभारितस्स अट्टारसविहं बंभचेरमणुपालेंतस्स बोलीणाइं बहूइं वरिसाइं, एगया य गिम्हमासे विप्फुरं-
तेसु जलणजालाकरालेसु रविकरेसु धम्ममाणलोहागरनिज्जा(ज्झा)मयसरिसेसु वायंतेसु स्वरसमीरणेसु विरहिणीजणहिय-
वव्व तत्तंमि महियलंमि अण्हाणवसविसप्पमाणबइलमलाविलसरीरत्तणेण पवहंतसेयसलिलुप्पिलाउलत्तणेण य
वाढं किलंतस्स दढचारित्तावरणीयकम्मदोसेण मइलहिययस्स परिचत्तकुमित्तस्सवि गुरुकुलवासे ठियस्सावि छट्ठट्ठमा-
इनिट्ठुरतवकिसियसरीरगस्सवि सयावि सुत्तत्थे विपरिभाविरस्स एक्कारसंगाइं तण्हाभिहयस्स पयंडगिंभसंतत्त-
सव्वगतस्स पल्हत्थं संजमओ झडत्ति चित्तं मिरियस्स ।

श्रीमहा०
चरित्रे
२ प्रस्तावः
॥ १३ ॥

अइगाढो मोहभडो जमेरिसाणवि मणो विकंपेइ । अघडंतघडणपडुयाण किं व सज्जं न कम्माणं ? ॥ ७६ ॥
अन्नं च—तावच्चिय धम्ममई तावच्चिय निंदियत्थपरिहारो । जावज्जवि मोहमहापिसायपासंमि नो पडइ ॥ ७७ ॥
एत्तो चिय मोक्खमहानिहाणमुक्खणिगमुज्जयं समणं । धाडिति विसहरा इव वावीस परीसहा सहसा ॥ ७८ ॥
अह मिरिइणा चिंतियं—न सव्वहा समत्थोऽम्हि सम्मभियाणिं समणत्तणमणुट्ठिउं, ता किं करेमि ? कमुवाय-
मणुसरामि ? किं देसंतरं वच्चामि ? कस्स वा साहेमि ?, होउ वा विकप्पिणं, पच्चजापरिचाएणं नियभवणगमणं
संपयं मे पत्तकालंति, अहवा—चउजलहिमेहलामंडलाए महिमहिलाए अहिवइस्स पयंडभुयदंडदलियदुहंतवइरिव-
ग्गस्स सयलपणमंतमहिवालमउलिकिरणावलिकन्बुरियवलय(चलण)स्स छन्नवइगामकोडिनाहस्स अप्पडिहयसा-
सणस्स भरहचक्कवइणो पुत्तो होऊण सयमेव परिच्चत्तं मंदिरमणुसरंतो कहं न लज्जामि ?, कहं वा तत्थगयं निह-
यपइणं मं जाणिऊण न लज्जाए हेट्टामुहा ठाइस्संति जणणिजणया ? कहं वा तुसारहारगोखीरकुंदेंदुधवलस्स
इक्खागुकुलस्स पढमकलंको न भविस्सामि ? के वा परिच्चत्तमंगीकयधम्मस्स न करिस्संति हीलं सहसंवहियावि
बंधुणो ? कस्स कस्स वा महापावकारिणो निदंसणं न भविस्सामि ?, ता सव्वहा न जुत्तं गिहगमणं, किं तु सव्व-
प्पयारेहिवि परिसुद्धं नियमणस्सेव नियमणं मे काउं जुज्जइ, तं पुण सेलसिरयलोदुट्टोलगंडसेलंपिव जुगंतसमय-
समीरणुदुयसिंधुसमुच्छलियमहलकलोलपडलं पिव पयंडमत्तंडमंडलपगलंतपहाजालं पिव ददसुक्काणणगयमहादुया-

परिणाम-
परावृत्तिः.

॥ १३ ॥

सणं पिव न मणागंपि सकेमि संठविउं, अयं च जइधम्मो अचंतमप्पमत्तचित्तमहासत्तनिव्वहणिज्जो, अहं पुण दुहंतग-
हभो इव समुदुरखंधसिंधुरमहलयणोवसरणं कायरो इव दुग्गसंगामभीमसवडं मुहुब्भडभिडंतसुहडभिउडिफडाडोवं
दुस्सहपरीसहचमूपराजियमाणसो न सकेमि अट्टारससीलंगसहस्साभिरामं सव्वहा जहुत्तं समणधम्ममणुचरिउं ।
अविय—

सुरसेलतुल्लभारो एसो अहि(अहयं तु)भग्गपरिणामो । आजम्मं वोढव्वो कह तं एवंविहेण मए ? ॥ ७९ ॥
एसोऽवि भवविरक्ख(क्क)णपडयपभावो पियामहो जइवि । करकलियामलयं पिव जाणइ मम विहडियं चित्तं ८०
तहविहु संसारुव्वेयविरत्तओ कहमहं महाघोरं । काउं मुणीण धम्मं तरामि एयाणुवित्तीए ? ॥ ८१ ॥
कीरइ अणुवित्तीविहु सद्धम्मगुरूण थोवदिणसज्जे । कज्जे आजम्मं पुण कायव्वो संजमो कह णु ? ॥ ८२ ॥
इओ य-(असुहं)गिहत्थभावं संजममकलंकमवि न सकेमि । काउं किलिह्वचित्तो कमुवायं संपवज्जामि ? ॥ ८३ ॥
एवं च तस्स किंकायव्वयाअ मूढस्स अर्चितणीयमहिमयाए कम्मयाणं अपारसंसारसागरपरिभमाणुकूलसी-
लयाए जीवस्स अवस्सं भवियव्वयाए तहाविहभावस्स इओ तओ उभयमग्गाणुसारिणमुवायं मग्गमाणस्स सह-
सच्चिय सयमेव एयारिसी बुद्धी पाउब्भूया, जहा—किर भगवंतो मुणिणो मणवयणकायदंडत्तयरहिया असुभवावारप-
रिच्चाएणं सया संलीणसरीरा अहं पुण न एवंविहगुणजुत्तो, जओ पराजिओ इंदिएहिं अहिभूओ य उस्सिखलेहिं

रीमहा०
चरित्रे
प्रस्तावः
॥ १४ ॥

मणवयणकायदंडेहिं, तम्हा एरिसस्स मम हवउ सच्चरियपयडणपरं तिदंडं चिंधं, जइ पुण एयं अणवरयं पेच्छमाणस्स सदुच्चरियपच्छायावेण विसिट्ठपरिवालणुज्जमो होज्जा १, तहा मुणिणो सिरकेसावणयणेण सत्विदियनिग्गहेण य मुंडिया भवंति, मम पुण इंदियनिग्गहरहियस्स किं निरत्थयं मत्थयलुंचणेण १, अओ खुरमुंडणं मुणिवेसविसरिसत्त-परूवणपरं सिहाधरणं च संपज्जउत्ति २, तहा समणा भयवंतो तिविहं तिविहेण पच्चक्खायसुहुमवायरपमुहभे-यपाणाइवाया संजममणुपालेंति, मज्झं पुण अतहाविहजोग्गयाजुत्तस्स थूलपाणाइवायवेरमणं जुत्तंति ३, परिचत्तस-मग्गकिंचणा मुणिणो, अहं पुण न एयंविहो ता नियमग्गाविसरणनिमित्तं सुवणणपवित्तगाइमेत्तं मम किंचणमवि हवउ ४, तहा जिणवरुद्धिसमग्गसीलजलपक्खालियकम्ममलसेयत्तणेण निब्बं सुंदरगन्धाभिरामा (मुणिवरा) अहं पुण निम्मलत्तणेण दुगुंछियगंधो ता वार्हिपि तस्सावणयणनिमित्तं गंधचंदणाइपरिग्गहो मम समुचिओत्ति ५, तहा ववगयमोहा निक्कारणविमुक्कोवाइणपरिभोगा य तवस्सिणो, अहं पुण महामोहाभिभूतो सरीररक्खापरो अओ छत्तयधरणं उवाहणापरिभोगो य मम संपज्जउत्ति ६, तहा परिजुन्नसुद्धकुत्थियथोवसुक्खिलवत्थपरिग्गहा महानुभावा मुणिणो, अहं पुण गाढकसायकलुसियबुद्धिपसरो तम्हा धाउरसरत्ताणि वत्थाणि मए परिहियव्वाणि ७, तहा सावज्जजोगभीरुणो जइणो मणसावि न पत्थंति बहुजीवाउलं जलारंभं, अहं तु संसाराणुसारिबुद्धी तम्हा परिमिणं सलिलेणं पाणण्हाणाइं वावारमणुचरिस्सामित्ति ८ ॥

परिवाज
कता.

॥ १४ ॥

एवं सबुद्धिपरिकप्पिण जइविसरिसेण वेसेणं । मुणिधम्ममग्गच्चत्तो पारिच्चजं पवत्तेइ ॥ ८४ ॥
 गामागरनगराइसु सिरिरिसहजिणेण सह परिब्भमइ । सुस्सवणपक्खवायं निच्चं हियएण वहमाणो ॥ ८५ ॥
 अह तं करयलग्हियच्छत्तयं दीहलंबिरसिहंडं । पासविमुक्कतिदंडं पवित्तमाईहिं परियरियं ॥ ८६ ॥
 गेरुयरसरत्तंसुयविराइयं संझसूरबिचं व । चंदणचच्चियदेहं उवाहणारोवियकमं च ॥ ८७ ॥
 असरिसरूवं नीसेससमणसंघस्स मज्झयारंमि । दहुं कोऊहलिओ बहुजणो पुच्छए धम्मं ॥ ८८ ॥
 मिरिईवि सम्ममहिगयसुत्तथो तत्तदेसणसमथो । साहेइ वित्थरेणं मुणिधम्मविहिं जणस्स पुणो ॥ ८९ ॥
 जह एत्थं आजम्मं बायरसुहुमेसु सच्चजीवेसु । संघट्टणविहवणाइ वज्जणिज्जं पयत्तेणं ॥ ९० ॥
 कोहेण व लोभेण व हासेण भएण वावि माऽ(ना)सच्चं । जीवोवघायजणगं भासेयच्चं विणासेऽवि ॥ ९१ ॥
 गामे वा नयरे वा थोवं वा भूरि वा न चेत्तच्चं । सच्चित्तमचित्तं वा सच्चमदत्तं पि तिविहेण ॥ ९२ ॥
 देवनरतिरियरमणीसु पवरलायणसुंदरंगीसु । पच्चक्खभुयंगीसु व खणंपि नो अभिरमेयच्चं ॥ ९३ ॥
 धम्मोवयारि मोत्तुं वत्थपडिग्गहपमोक्खमुघरणं । सेसमहिगरणरूवं परिहरियच्चं पयत्तेण ॥ ९४ ॥
 संथारगमेक्कं वज्जिऊण नेवोवहाणतूलीओ । फासस्साणुगुणाओ कइयावि य पत्थणिज्जाओ ॥ ९५ ॥
 अरसविरसन्नपाणेहिं पीडिण्णावि महुइदित्तरसे । नो भोयणंमि चित्तं निवेसियच्चं मणागंपि ॥ ९६ ॥

श्रीमहा०
चरित्रे
२ प्रस्तावः
॥ १५ ॥

रम्मेसु बउलमालइकुवलयगंधेसु तदियरेसुं पि । घाणिंदियगोयरमइगएसु तुलेण होयवं ॥ ९७ ॥
रूवेसु सुंदरेसुं नयणमणाणंदणेसु दिट्ठेसु । तवइरित्तेसुं वा तोसपओसा न कायवा ॥ ९८ ॥
सहेसु वेणुवीणाकिन्नरकंदुब्भवेसु विविहेसु । खरमज्जारभवेसुवि सुणिएसु समेण होयवं ॥ ९९ ॥
तज्जणतालणहीलणकरणपसत्तेऽवि बालिसजणंमि । चिररूढगाढपणएव रूसियवं न थेवंपि ॥ १०० ॥
जयपयडेहिवि नीसेसलोयविम्हयकरेहिवि गुणेहिं । जुत्तेण मणागंपिवि माणो न मणंमि ठवियवो ॥ १०१ ॥
विस्सासविणासणकारिणित्ति सुहगइदुवारपरिहोत्ति । दुहनंदियत्ति माया परिहरियवा कुभज्जव ॥ १०२ ॥
थेवंपि कज्जळिहं पाविय पावस्स छलणसीलस्स । लोहस्स पिसायस्स व अवगासो नेव दायवो ॥ १०३ ॥
सच्छायं तिव्वफलं महसउणं पवरसीलतरुसंडं । भंजंतो दुट्ठमणो बंधेयवो वणकरिब ॥ १०४ ॥
निसंसंवंधं सावज्जजोग्गये जंतुदुक्खजणगे तु । सच्चेऽवि भासियवे जीहावि पडिक्खलेयवा ॥ १०५ ॥
तत्तायगोलओ इव पमत्तचित्तंगविविहवावारो । किं नेव विहवेज्जा ? ता देहो संठवेयवो ॥ १०६ ॥
सत्तरसभेयभिन्नो जइधम्मो नूणमप्पमत्तेणं । जं कायव्वो निच्चं तेणेसो दुक्करो होइ ॥ १०७ ॥
गिम्हुण्हपीडिणवि न छत्तयं न उवाहणाओऽवि । परिभुत्तवा हेओ सव्वोऽवि सरीरसकारो ॥ १०८ ॥
नो सिरलोयप्पमुहं कट्ठाणुट्ठाणमवि विमोत्तवं । रत्ताइवणवत्थंपि पत्थणिज्जं कयाइ नवि ॥ १०९ ॥

साधुधर्म-
बोधनं.

॥ १५ ॥

इय जइधम्मो सच्चो कायव्वविही निवेइओ तुम्ह । अक्खंडं सिक्सोक्खं जइ वंछह ता तयं कुणह ॥ ११० ॥

एवमायन्निऊण जणो पहिट्ठमणो भणिउमादत्तो—भयवं ! जइ एवंविहो चरणधम्मो ता कीस तुम्हे छत्तप्प-
मुहमुवगरणं गिण्हह ? सिरलोयाइयं च न सम्ममायरहत्ति, मिरिइणा भणियं—भो भो महाणुभावा ! मा एवमासं-
कह, जहा एसो अण्णहा भासइ अण्णहा करेइत्ति, अहं हि संसाराणुसारिबुद्धी पराजिओ मोहमहामलेणं पडिक्ख-
लिओ उस्सिखलकसायखलेहिं मुसियपसमधणो दुइंतिदियचोरेहिं सायरमवलोइओ दुग्गइदुक्खरक्खसीए, ता मम
दोसगुणविभावनं उज्झिऊणं नीओवणीयं पिव महामणिं खचरसमप्पियं पिव परमविज्जं मायंगदेसियं पिव समी-
हियपुरपंथाणं रोगविदुरवेज्जोवइदुं व परमोसहं अंगीकरेह सबहा तुम्हे मुणिधम्मंति ।

एवमाइन्निऊण संजायभववेरग्गा निउणबुद्धिपरिभावियपरमत्था तणं व परिचत्तपुत्तकलत्तमित्तवित्ता जिण-
धम्मनिवेसियथिरचित्ता समणदिक्खागहणत्थं पाउब्भवंति अणेगउग्गभोगराइण्णपमुहा जणा, मिरिईऽवि ते
सिस्सभावेणोवट्ठिए णाऊण भगवओ भुवणपईवस्स संसारतरुगहणदहणदावानलस्स अट्ठप्पयारपवरपाडिहेरपयडप्प-
भावस्स उसभसामिणो समप्पेइ । एवं च पइदिणं सद्धम्मदेसणाए पडिबोहेमाणो नियदुच्चरिअं निरंतरं निंदमाणो
सुस्समणपक्खवायं वहमाणो सुत्तत्थाइं मणे परिभावेमाणो सुहसीलयाए सबुद्धिपरिकप्पियपरिवायगवेसं धरेमाणो
गामागराईसु सामिणा सद्धिं विहरमाणो कालं गमेइत्ति ।

श्रीमहा०
चरित्रे
२ प्रस्तावः
॥ १६ ॥

अह अन्नया कयाई भयवं गामागरेसु विहरिऊण अट्टावयंमि समोसरिओ, भरहचक्कवट्टीचि भाउणो पच्चइए निसामिऊण संजायतिव्वसोगो जइ पुण भोगे दिज्जमाणे अज्जवि गेण्हंतित्ति संचित्तिऊण भगवंतं उसभसामिं सविणयं वंदिऊण भाउगे भोगेहिं निमंतेइ, इहलोइयसुहनिरवेक्खेहिं भणिओ तेहिं—

भो महायस !—सयमेव परिचत्ते दुहनिवहुप्पत्तिकारणुब्भूए । उरनिहयसल्लतुल्ले कहमिव भोगे अणुसरामो ? १११
अच्छंतु पेम्मनिब्भरतरुणीसंबंधबंधुरा भोगा । तेसिं न संकहंपिवि सोउं संपइ समीहामो ॥ ११२ ॥

एवं भोगेसु पडिसिद्धेसु भरहो परिचत्तसंगाण एएसिं आहारदाणेणावि ताव धम्ममायरामित्ति विकप्पिऊण पवरलक्खणभोयणभरिएहिं पंचहिं सगडसएहिं असणदाणत्थमुवट्ठिओ, पुणरवि निवारिओ तेहिं—अहो महायस ! न कप्पइ आहाकम्मं आहडं च असणयाणं परिभोचुं मुणीणं, तओ गिहनिमित्तसंसिद्धभोयणेण निमंतेइ, सोऽवि रायपिंडो न कप्पइत्तिकाऊण निसिद्धो साहहिं, हा सव्वपगारेहिं परिचत्तो अहमियार्णि एएहिंति दढं चित्तसंतावमुवगओ भरहचक्कवट्टी, तं च सोगविदुरं नाऊण वियाणमाणेणावि सक्केण तस्स परितोसनिमित्तं पुच्छिओ भयवं सप्पभेवमोग्गहं, पुट्ठेण य भगवया भणियं—सुरिंद ! पंचविहो उग्गहो, तंजहा—देविंदोग्गहो रायावग्गहो गिहिबइअवग्गहो सागारियावग्गहो साहम्मियावग्गहो, तत्थ देविंदावग्गहो जहा किर जंबुदीवदाहिणस्सेत्ताहिवई तुमं, अहो सक्क ! तुहाणुजाणावणेण कप्पइ समणाण तहिं विहरित्तए, राया पुण लक्खंडभरहाहिवई जहा संपयं भरहो, तस्साणुणाए

इन्द्रकुता
अवग्रह-
पृच्छा.

॥ १६ ॥

मुणीहिं तद्देसे वसियधं, गिहवई य मंडलेसरो, सोऽवि समंडलनायगतणेण अणुण्णवणजोग्गो, नदणुमए चेव ठाइयधं, सागारिओ पुण सेज्जायरो, सेज्जा य सनिमित्तकयतहाविहगेहसालापमुहो भवणविसेसो, तद्दाणेण तरइ संसारसायरंति सेज्जातरो गुणनिप्फन्ननामो । कहं पुण सेज्जाए तरइत्ति ? भन्नइ—

तत्थ ठिया मुणिवसहा सज्झायज्झाणझोसियसरीरा । जं धम्मदेसणाईहिं भवलोयं उवयरंति ॥ ११३ ॥

जं वा अपुव्वसत्थं पढंति तइ संजमे पयट्ठंति । छट्ठमाइयतवो दुक्करमवि जं पवज्जंति ॥ ११४ ॥

अन्नत्तोऽविहु जं वत्थपत्तभत्ताइणा न सीयंति । परमत्थेणं सव्वत्थ तत्थ सेज्जा भवे हेऊ ॥ ११५ ॥

इय-सेज्जादाणेण महल्लदुक्खकलोलसंकुलमगाहं । संसारसायरं गोपयं व दाया लहुं तरइ ॥ ११६ ॥

इहरा सेज्जाऽभावे न जीवरक्खावि निव्वहइ सम्मं । किं पुण समग्गसद्धम्मपालणं होज्ज निव्विग्घं ? ॥ ११७ ॥

साहम्मियावग्गहो पुण सिद्धंतपसिद्धनाएण परोप्परं समणाण एगखेत्ते निवसिउकामाणमवगंतवो । एवं च पंचविहावग्गहपरूवणमायन्निऊण पंचंगपणिवायपुरस्सरं सक्को भणिउमाढत्तो-भयवं ! जे इमे अज्जप्पभिइं दाहि-णखेत्ते समणा निग्गंथा विहरंति एएसि णं अहं ओग्गहमणुजाणामि, भगवया भणियं-जुत्तमेयं, एयं च आयन्निऊण भरहोऽवि जायपरितोसो भणइ-भयवं ! अहंपि भारहे वासे साहुणो विहरमाणे अणुमण्णेत्ति । तंपि तद्दाऽऽनीयमसणं

श्रीमहा०
चरित्रे
२ प्रस्तावः
॥ १७ ॥

अणुवयगुणवयसिक्खावयगुणसंगयाणं सावगाणं सकवयणाओ भरहेण दावियं, तथा एवंपि निज्जरा होउत्ति मण्णमा-
णेण सावगाणं पइदिणं भोयणदाणं कयं, भयवंपि अन्नत्थ विहरिओ ।

तेऽवि सावगा परिचत्तासेसघरवाचारा भरहपणीयजिणथुइगम्भे वेदे परावत्तयंता छट्ठे मासे परिण्णाणनिमित्तं का-
गिणीरयणेण उत्तरासंगनाएण आलिहियतिरेहा निरवज्जविच्चीए कालं गमेति । अन्नया य भयवं पडिबोहिऊण तेसु तेसु
ठाणेसु भव्वजणं पुणरवि अट्ठावयमागओ, देवेहिं कयं विसालसालत्तयविहारं छत्ताइच्छत्तरमणिज्जं आज्ञाणुमेत्तभूमि-
निहित्तरुंदंतभमरं पंचप्पबारपुप्फपुंजोवयारं गयणंगणोयरंततियसविमाणमालासहस्साभिरामं मंदमंदमुद्धयवेजयंती-
सयसोहियं पवरमणिमयमहप्पमाणासोगतरुविराइयं पंचवन्नरयणविणिम्मियसिंघासणं समवसरणं, तत्थ य निसन्नो
तइलोकपियामहो भयवं पढमजिणो, निविट्ठा कमेण गणहरपमुहा साहुवग्गा, आसीणा अणेगसुरकोडिपरिवुडा
वत्तीसंपि सुरिंदा, विण्णायजिणागमवुत्तंतो समागओ सन्नविभूर्इए भरहो, परमभत्तीए पणमिय भयवं आसीणो
उचियभूमिभाए ।

अह सो तथाविहं भवणच्छरियं नीसेसतिहुयणसिरिविरइयंपिव सन्नभुदयगेहंपि व समवसरणसोहं भगवओ
परमिस्सरियं च पासिऊण हरिसुप्फुल्लोयणो पुच्छिउमेवं पवत्तो-ताय ! जारिसा तुम्हे भवणगुरुणो एवंविहपूयाप-
रिसपत्ता किमेत्थ भरहे अण्णेऽवि एरिसा भविस्संति न वा ?, भगवया भणियं-भविस्संति, भरहेण भणियं-केरिसा ?,

अवग्रहा-
नुक्ता
शलाका-
प्रश्नः ।

॥ १७ ॥

ताहे तेवीस जिणे अजियाई वीरनाहपज्जंते । समबुद्धिवलायारे तिहुयणजणपणयपयपउमे ॥ ११८ ॥
 तह तेसिं च अण्णोऽण्णमंतरं सयलकालकलणेणं । वण्णं पमाणमाउं गोत्तं तह जणणि जणगा य ॥ ११९ ॥
 जम्मणनघरे य तहा कुमाररज्जाइ सव्वपरियागं । सिद्धिगईपज्जंतं भयवं भरहस्स साहेइ ॥ १२० ॥
 पुणरवि पुच्छइ भरहो मम सारिच्छा कईह होहिंति ? । सगराई एकारस चकहरे कहइ सबन्नू ॥ १२१ ॥
 अण्णुट्ठोऽविहु भयवं पुणोऽवि वागरइ भरहनाहस्स । नव वासुदेवबलदेवजुवलए भाविणो भरहे ॥ १२२ ॥
 पुणरवि भणिओ भरहाहिवेण तइलोकमंदिरपईवो । अवलोइऊण परिसं खयरामरनियरपरियरियं ॥ १२३ ॥
 छट्ठमाइतवकिसियसाहुसुधम्मकारिणिहिकलियं । भयवं ! किमेत्थ कोऽवि हु पाविस्सइ तित्थयरलाभं ? ॥ १२४ ॥
 तह चक्कवट्टिलिंछिं चोइसवररणगुणमहग्घवियं । अहवावि वासुदेवत्तणंपि पावेज्ज भरहंमि ? ॥ १२५ ॥
 ताहे कलियकुलिं गं मिरिइं एगंतसंठियं भयवं । दावइ जह एस जिणो चरिमो होही तुह सुओत्ति ॥ १२६ ॥
 एसोच्चिय गामागरनगरसमिद्धस्स भारहद्धस्स । सामी तिविहुनामो पढमो तह वासुदेवाणं ॥ १२७ ॥
 एसो महाविदेहे पियमित्तो नाम चक्कवट्ठीवि । मूयाए नयरीए भविस्सई परमरिद्धिजुओ ॥ १२८ ॥
 एवं च आयज्जिऊण भरहनरिंदो पढिट्ठमणो पणमिऊण भयवंतस्स चरणसरोरुहं तक्खणमेव अणेगसुहसेणाव-
 इनिवहपरिवुडो पयट्ठो नियसुयस्स मिरियस्स वंदणणिमित्तं, तदंतरे चारणलद्धिसंपन्ने ओहिनाणघरे मणपज्जवनाणिणो

भीमहा०
चरित्रे
२ प्रस्तावः
॥ १८ ॥

विगिहृतयकरणनिरप सूरामिमुदायावणापरायणे वीरासणाइदुकरकायकिलेसकारए भंगियसुयपढणेकमाणसे यमहामु-
णिणो परमभत्तीए ठाणे ठाणे विणयपणमंतमउलिमंडलं बंदंतो अणिमिसदिट्ठीए पेच्छमाणो यपत्तो जत्थ सो एकदे-
सविमुक्कवेणुतिदंडो पंडुरपुंडरियनिवारियरविकरपसरो नियमइपरिकप्पियपवित्तिगाइउवगरणविसरिसरुवदंणको-
उहलाउलियागयलोयधम्मकहणवक्खित्तचित्तो मिरिई निवसइत्ति, तं च दूराओ चिय निस्सामण्णभत्तिभरनिस्सरं-
तुव रोमंचच्छलेण अंतरे अस्सायंतं व सिणेहसवस्सदुगिरंतो पढमदंसणुत्रामियमत्थयनिवडंतकुसुमनिभेण अग्घं व
वियरंतो विमलकरयलंगुलिमुहारयणकिरणजालेण दिसामुहपसरिएण मंगलदीवनिवहं व बोहिंतो पयाहिणादाणेण
तिगरणभत्तिपगरिसं व साहंतो भूमितलविलुलंतुत्तमंगं पणमिऊण पमोयभरनिभरगिरं भणिउमाढत्तो, कहं?—

वच्छ ! तुमं चिय नीसेसपवरलक्खणनिहाणभूओऽसि । सुकयत्थाणं मज्झे तुज्झ परं पढमिया रेहा ॥ १२९ ॥
तिहुयणभुवणस्सुवरिं इक्खागूणं न होइ कह वंसो ? । जत्थ विमला विरायइ विजयपडाइव तुह कित्ती ॥ १३० ॥
तुह भाविरिद्धिमायन्निऊण रंजिज्जए न कस्स मणं ? । कह वा नो वंदिज्जइ तुह पयपउमंकिया पुहइ ॥ १३१ ॥
कीरंतु नाम दुक्करतवोविहाणाइं भव्वलोएणं । जं तेसि फलं तं पुण तुमएच्चिय पावियं सबं ॥ १३२ ॥
जओ-सिट्ठोऽसि तुमं ताएण भारहे कुंडगामनयरंमि । सिद्धत्थपत्थिवसुओ किर चरिमो एत्थ तित्थयरो १३३
पुणरच्चि दसारवग्गे आइमो तं तिबिहुनामेण । पोयणपुरंमि नयरे तिखंडभरहस्स सामित्ति ॥ १३४ ॥

मरीचि-
वन्दनं.

॥ १८ ॥

मृयाप नयरीए महाविदेहंमि तह य चकवई । वत्तीससहस्समहानरिंदसंदोहनयचरणो ॥ १३५ ॥
 पारिवज्जं जम्मं च तुज्झ नो पणिवयामि किंपि अहं । जं होहिसि तित्थयरो चरिभो तं तेण वंदामि ॥ १३६ ॥
 एवं थोऊण बहुं गिराहिं अब्भहियभावगम्भाहिं । जयकुंजरमारूढो विणीयनगरिं गओ भरहो ॥ १३७ ॥
 मिरिईवि इमं सोउं हरिसुग्गयपुलयजालपीणंगो । गरुयकुलजम्मसहजायभूरि गंभीरिमं मोत्तुं ॥ १३८ ॥
 जिणयणत्थविभावणसंपन्नविवेयमवि परिच्चइउं । देहुग्गयनिरवग्गह लज्जापसरंवि पडिखलिउं ॥ १३९ ॥
 दुत्तारवेगपफुरियफारमुम्मायमेक्कमासज्ज । दप्पुब्भडमप्फोडिय तिवइं मल्लो व रंगंमि ॥ १४० ॥

पचासन्नमहासुणिसमक्खमह लोयमज्झयारंमि । आणंदसंदिरच्छो फुडक्खरं भणिउमादत्तो ॥ १४१ ॥ चउहिं कलावयं ।
 जइ पढम वासुदेवो महाविदेहंमि चकवटीवि । चरमो तित्थयरोऽविहु अहं भविस्सामि भरहंमि ॥ १४२ ॥
 ता तिहुयणेऽवि नूणं अण्णो नो पुण्णवं ममाहितो । कस्सऽण्णस्स व एरिस फलदायी होज्ज सुकयतरू ॥ १४३ ॥
 तथा—अज्जो तित्थयराणं पढमो जणगो य चकिवंसस्स । अहयं च दसाराणं अहो कुलं उत्तिमं मज्झ ॥ १४४ ॥
 थयं नियकुलचंगिमउक्कित्तणपच्चएण संजणियं । नीयागोयं कम्मं मिरिइपरिवायगेण दढं ॥ १४५ ॥
 भयवं च जयपियामहो विहरिऊण तेसु तेसु गामागरपुरमडंबदोणमुहपमुहेसु ठाणेसु किंचूणं पुव्वसयसहस्सं
 केवल्लिपरियागं पाउणित्ता आउयकम्मस्स सावसेसयं नाऊण अट्ठावयपव्वयमारूढो, तओ महामासबहुलतेरसीए अभि-

श्रीमहा०
चरित्रे
२ प्रस्तावः

॥ १९ ॥

ईनक्खत्तमुवागए चंदे पुवण्हसमयंमि सुसमदूसमाए एगूणनउइपक्खेसु सेसेसु कयचउइसमतवोकम्पो दसहिं मुणि-
सहस्सेहिं सद्धिं परिचत्तचउविहारो कयपाओवगमणो पज्जंकासणसंठिओ वेयणियाउयनामगोयकम्माणं अंतं
करित्ता सिवमयलमणुत्तरं पत्तोत्ति ।

अह बत्तीसंपि सुरिंदा दुस्सहदुक्खविदुरेण भरहनरिंदेण समेया वाहण्णवाहाउल्लोयणजुयला पणमिऊण भग-
वंतं नंदणवणाओ सरसगोसीसकसणागरुपमुहसोक्खकट्ठाइं आणावित्ति ।

तओ—पुब्बेण जिणस्स कए वट्ठायारं चियं रयावित्ति । दक्खिणदिसाए तंसं इक्खागुकुलुम्भवनिमित्तं ॥ १४६ ॥

अवरेण उ चउरंसं वित्थरवंतं विसिट्ठकट्ठेहिं । अवसेसाण मुणीणं सरीरसकारकज्जेणं ॥ १४७ ॥

ताहे स्त्रीरोदय(जल)ण्हवणसुइसुरहिचंदणविलित्तं । आरोवेत्ति सरीरं चियाए सक्का जिणिंदस्स ॥ १४८ ॥

भवणवइपमुहदेवा ण्हवियविलित्ताइं सेससाहूणं । आरोवेत्ति दुहत्ता देहाइं नियनियचियासु ॥ १४९ ॥

तत्तो अग्गिकुमारा जहकमं तासु सक्कवयणेणं । वयणेहिं निराणंदा मुयंति जालाउलं जलणं ॥ १५० ॥

एवं सरीरसकारमायरेणं सुरेसरा काउं । नियनियठाणेसु गथा विच्छायमुहा विगयसोहा ॥ १५१ ॥

भरहनरिंदो पुण महासोगाभिभूओ सगिहमागओ, तत्थ य दढवज्जपडणाइरित्तसोगसंभारजज्जरियसरीरो मज्जु-
पूरियगलसरणी संकंदणपोक्कमुकारा(वा)णुसाररोयणारावविहियसोगपमोक्खो अट्ठावयसेलसिहरंमि सवरयणमयं महंतं

आदि०
निवाग.

॥ १९ ॥

धूमं रयावेइ, बाहुवलिपमुहाण य नवणउईए भाउगाणं अण्णाणि नवनउइ धूमाणि निवत्तावेइ, तहा भगवओ नि-
 व्वाणलाभप्पएसे तिगाउयउस्सेहं जोयणायामं सिंहनिसा(सेज्जा)इयं सव्वरयणविणिम्मियनियनियवणणप्पमाणोववेय-
 चउवीसजिणपडिमाहिट्टियं सुविभत्तसालिभंजियाभिरामतोरणावद्धबंधुरामिलाणवंदणमालं दुवारदेसोभयपासपइट्टिय-
 लट्ठपुंडरीयपिहाणपुण्णकणयकलसं सरसपंचप्पयारपुण्णपुंजोवयारकलियं कालागुरुकुंदुरुक्ककप्पूरपमुहवत्थुसिद्धधूयधूमं-
 धयारियदिसाहोयं अणेगतियसंगणाजणुत्तालकरतालपुरस्सरदिज्जमाणरासयं भत्तिभरनिब्भरगायंतकिंनरनियरं दूरदेसा
 गयविज्जाहरचारणमुणिजणविचित्तथुइथोत्तखवहंतहलबोलं पइट्टियलोहमयजंतदुवारपालं जिणभवनं कारावेइ ।
 जं च—संसारोयहिनिवंडतसत्तसंताणजाणवत्तं व । रेहइ पवणुदुयधवलधयवडाडोवरमणिज्जं ॥ १५२ ॥

इक्खागुकुलुब्भवभूवकित्तिक्कूडं व संठियं पयडं । सोहइ महीए केलाससेलसमसीसियाएव्व ॥ १५३ ॥

पवणपणोल्लिरजलहरपडलाउलसिहरपरिसराभोगं । परिभमिरभमरनियरं विरायए कुमुयमउलं व ॥ १५४ ॥

मज्जे पवणपणोल्लिरएयमहदयपलोयणेण जणे । पवयसिरनिवडिरगयणसरियकित्तीफुडं जाया ॥ १५५ ॥

भरहनरिंदनिवेसियजिणमंदिरदंसणाणुसारेणं । सेसजणोऽवि पयट्ठो जिणविंबाईण कारवणे ॥ १५६ ॥

जुत्तं च एयं, जेण—

एयं खु दुग्गइदुवार(पिहाण)फलिहोचमं जिणा विति । नीसेससत्तसंताणताणदाणेक्कहेउं च ॥ १५७ ॥

श्रीमहा०
चरित्रे
२ प्रस्तावः
॥ २० ॥

एको(तो)चिय तक्कालियमुणिगणहरकेवलीहिं न निसिद्धं । चेइहराभावे जं तित्थुच्छेओ भवे पच्छा ॥ १५८ ॥
तथा—जिणसंतर्चिवदंसणविन्नायजहत्थवत्थुपरमत्थो । पडिवज्जइ जइ किरियं कोई संसारभयभीओ ॥ १५९ ॥
मुणिणोऽवि वंदणत्थं इओ तओ इति नियविहारेणं । तेऽवि य करंति सद्धम्मदेसणं समयनीईए ॥ १६० ॥
पडिवुज्झंति य भव्वा गिणहंति जिणिंदधम्ममकलंकं । एवं च तित्थबुद्धी होइ कया सव्वकालंपि ॥ १६१ ॥
किं बहुणा?—जिणभवणाइनिवेसणसमुवज्जियपुण्णपगरिसवसेणं । सग्गापवग्गलच्छी निवसइ भव्वाण करकमले ॥ १६२ ॥
इय सो अरहनरिंदो निवेसिऊणं जिणिंदवरभवणं । उवमुंजइ नियरज्जं विसयसमिद्धं बहुं कालं ॥ १६३ ॥
अह अन्नया पविट्ठो आयंसघरंमि विमलफलिहमए । नियरूवपेच्छणकए सव्वालंकारियसरीरो ॥ १६४ ॥
विविहपयारं पेच्छंतयस्स अह अंगुलीयगं गलियं । करकिसलयाउ ताहे बीभच्छा अंगुली जाया ॥ १६५ ॥
ववगयसोहं तं पासिऊण सव्वंगसंगि याभरणं । मुकं साहावियरूवदंसणत्थं महीवइणा ॥ १६६ ॥
अत्थमियसयलतारं व नहयलं लुणियसस्समिव छेतं । ववगयकमलं व सरं तरुं व संछिन्नसाहगं ॥ १६७ ॥
दहुं च कट्ठघडियं व निप्पहं विगयरूवलायन्नं । चम्मावणद्धनिविडट्ठिपंजरागारमह देहं ॥ १६८ ॥
तो चिंतिउं पवत्तो सुनिउणबुद्धीए जायसंवगे । वेरग्गावडियमई सरीरासारयं भरहो ॥ १६९ ॥
एवंविहनिंदियदेहकारणा कह मए महापावं । कयमचंतरउइं अहो विमूढेण चिरकालं ? ॥ १७० ॥

चैत्यकृतिः
केवलं च.

॥ २० ॥

कह या विसयामिसमोहिण्ण जिणनाहदेसिओ धम्मो । निप्पुण्णएण न मए सिवफलओ सम्ममायरिओ ॥ १७१ ॥
 किं चिंताभणियह कप्पतरुवरं कामधेणुमह यावि । कोऽवि सयन्नो कहमवि लद्धूण परम्मुहो होज्जा ॥ १७२ ॥
 ते बाहुबलिपमोक्खा धण्णा मह भाउणो महाभागा । जेहिं असारसरीरेण साहिओ सुंदरो मोक्खो ॥ १७३ ॥
 एमाइसुहज्जवसाणजलण(जाले)जलाविउं झत्ति । निहड्डो तणरासिब मोहपसरो भरहवइणा ॥ १७४ ॥
 उप्पाडियं च केवलनाणं निप्पच्चवायसुहदेउं । देविसमप्पियलिं गो गेहाओ निग्गओ ताहे ॥ १७५ ॥
 दसहि सहस्सेहिं नरेसराण तक्कालगहियदिक्खाणं । परियरिओ भयवं भरहकेवली विहरिओ वसुहं ॥ १७६ ॥
 अह पुव्वसयंसहस्सं केवलपजायपालणं काउं । एकसमयेण निव्वाणमुवगओ भरहमुणिवसहो ॥ १७७ ॥
 इओ य सो मिरिई परिच्चायगो सार्मिमि निव्वाणमुवगएऽवि साहूहिं समं गामागरनगराइसु अप्पडिबद्धो
 विहरइ, अपुव्वठाणेसु य धम्मदेसणं कुणइ, जो य कोवि पडिबुज्जइ पव्वज्जागहणं च समीहेइ तं साहूणं समप्पेइत्ति ।
 एवं च तस्स विहरमाणस्स अन्नया कयाइ सरीरगेलण्णया महती पाउच्चूया, तवसेण य सो न तरइ अप्पणो निमित्तम-
 सणपाणंपि आहरिउं, न खमइ सरीरचेट्ठंपि अणुट्ठिउं, न पहवइ वइमेत्तमवि भासिउंति, ते य सगासट्ठिया पेच्छंति
 साड्डणो तं तहट्ठियं तहावि असंजउत्ति कलिऊण न पुच्छंति सरीरवत्तं, न समप्पेति भत्तपाणं, न दंसंति वेज्जस्स, न
 उवयरंति ओसहाणं, किं बहुणा ?, न संकहंपि करिंति तस्स, मिरिईवि जातसंकिलेसो चित्तेइ-अहो निहया

श्रीमहा०
चरित्रे
२ प्रस्तावः
॥ २१ ॥

अहो निरप्पणचित्ता अहो सकज्जपसाहणपरायणा अहो लोयववहारपरम्मुहा अहो नियउदरभरणरसिया इमे सा-
हुणो जं उवयारिणंपि चिरपरिचियंपि एगगुरुदिक्खियंपि पासपरिवत्तिणंपि समाणधम्मपडिवद्धंपि अणवरयगुणग-
हणपरायणंपि ममं सिणिद्धचक्खुक्खेवमेत्तेणवि णाणुगिण्हंति, अहवा न सम्ममणुचितियमेयं मए, जओ एए
महाणुभावा सरीरस्सवि पडियारमकुणंता कहं मम अस्संजयस्स उवयारे वटंतु?, केवलं जइ अहंपि इमाओ रोग-
महण्णवाओ पारं पावेमि ता निच्छियं पव्वज्जागहणुज्जुयं कमवि सयमेव पद्दावयाभि, न एगागीहिं तीरिजंति
सोदुमाषयाओ, अह कहंपि भवियव्वयाए वसेण खओवसमओ वेयणीयस्सं चिरकालभवियवत्तणओ पारिवज्ज-
पासंडवंसस्स तहाविहोसहसामग्गीउवहारओ ववगयरोगो सो समत्थसरीरो संपन्नो, विहरिओ य अण्णत्थ ।

अण्णया य धम्मदेसणं कुणमाणस्स तस्स कविलो नाम रायपुत्तो सगासमल्लीणो, तेणावि पंचमहव्वयरक्ख-
णपहाणो पसमाइगुणाहिद्धिओ पंचिंदियनिग्गहविसुद्धो निस्सेयसफलदायी परूविओ से सुस्समणधम्मो, कविलेण
य वुत्तं-भयवं ! अण्णहा तुम्हे वज्झनेवत्थमुवहह, इमं च अण्णहा पण्णवेह, किमेत्थ तत्तं?, मिरिइणा भणियं-
भइ ! एसो सुसाहुधम्मो तुह निवेइओ, इमं पुण जहुत्तसाहुधम्मासमत्थयाए पवलपावकम्मयाए दुग्गइगमणसी-
ल्याए य सवुद्धिसिप्पपरिकप्पियं कुलिंगं मए अब्भुवगयं, तात ! एयं पारगच्छियं, अओ पडिवज्जमु निस्सं-

भरतनि-
र्वाणं कपि-
लदीक्षा.

॥ २१ ॥

१ यद्यपि चतुर्णां धातिनामेव क्षयोपशमस्तथापि अत्र प्रागुदितस्य वेदनीयस्य क्षयः नवस्य चोदयनिरोध इति क्षयोपशमता ज्ञेया, न तु मिश्रीभावात्ताऽत्र ।

सयं समणधम्मं, कविलेण वुत्तं-भयवं ! तुम्ह संतिए एत्थ तहावि अत्थि किंपि णिज्जराठाणं नवा ?, मिरिइणा भणियं-भइ ! समणधम्मे ताव अत्थि, इहावि मणागंति, एवं च तेण अजहट्टियवत्थुदेसणओ निविट्ठो सागरोव-मकोडाकोडिमेत्तो संसारोत्ति । नणु किं एत्तियमेत्तविवरीयकहणेऽवि एवं संभवइ ?, किमिह चोज्जं?, जेण-

विवरीयजिणागमपयमेत्त(स्स)परुवणेऽवि मिच्छत्तं । अप्पत्थभोयणेण व दुहजणगं रोगमज्जिणइ ॥ १७८ ॥

एत्तोच्चिय मूलुत्तरगुणगणविरहेऽवि लिंगधारीवि । सुवइ सव्वन्नुमयं जहट्टियं पन्नवेमाणो ॥ १७९ ॥

किं एत्तोऽवि हु ए(पा)वं जं सरणगए णु भवभएण जणे । उम्मग्गदेसणातिक्खल्लग्गवाएण विदवइ ॥ १८० ॥

गरुयंपि कयं पावं न तहा जीवस्स दुक्खमावहइ । जह जिणवरवयणपत्तयसमयविवरीयपरिकहणं ॥ १८१ ॥

अलं वित्थरेण । पत्थुयं भण्णइ-

सो कविलो सन्निवायाभिभूओ इव परमोसहं महागहपरिग्गहिओ इव तहाविहं मंतकिरियं पुव्ववुग्गाहिओ इव सम्मपरिकहणं महापवलमिच्छत्तणओ न पडिवण्णो मणागंपि समणधम्मं, तओ मिरिइणा चित्तियं-न ताव परिगिण्हइ एस जइधम्मं, ममावि छत्तागाइपरियरुव्वहणे गामंतरगमणे सरीरगेलण्णे अब्बंतिगपओयणे एगेण सहाइणा कज्जमत्थि, तम्हा पच्चावेमि एयंति चित्तिऊण कविलो गाहिओ नियदिक्खं, सिक्खविओ किंपि वज्जं कट्ठाणुट्ठाणं, एवं च सो नियंसियकासायवत्थजुयलो पाणिपरिग्गहियतिदंडो पवित्तिगापमुहोवगरणपरियरिओ

श्रीमहा०
चरित्रे
२ प्रस्तावः
॥ २२ ॥

गामाणुगामं पियरं व देवयं व सामियं व परसोवगारिणं व रयणनिहाणदेसगं व जीवियदायारं व मिरिईं पज्जुवासंतो परिभमइत्ति, एवं च काले वोळंतंमि मिरिईं चउरासीईं पुव्वसयसहस्साईं सव्वाउयं पालइत्ता अणालो-
इयपडिक्कंतनियदुचरिओ कालं काऊण वंभलोए कप्पे दससागरोवमाऊ देवो जाओत्ति ।

सोऽवि कविलो अपढियसत्थपरमत्थो वज्झोवगरणधरणमेत्तरसिगो जहादिट्ठकट्ठाणुट्ठाणपत्तपरमकट्ठो एगागी परियडइ । मुणिविलक्खणागारदंसणेण पुव्वकमेण समल्लियइ य से समीवे धम्मसवणत्थं बहू जणो, सोऽवि अ-
वियक्खणत्तणओ समणसत्थेसु तहाविहधम्मदेसणमवियाणमाणो 'युक्तायुक्तपरिज्ञानशून्यचित्तस्य देहिनः । अलब्ध-
मध्यताहेतुमौनं सर्वार्थसाधनम् ॥ १ ॥' इति परिचितंतो गाढपरिगहियमोणव्वओ दिणमणियं करेइ । अन्नया
य आसुरिरायपुत्तपमुहं सिस्सगणं पवाविऊण जथादिट्ठं वज्झाणुट्ठाणं दंसिऊण य चिरकालं कयवालतवो मरिऊण
वंभलोए कप्पे देवो उववज्जइ । तहिं च—

असुयं अदिट्ठपुव्वं सुरलच्छि पेच्छिऊण तारिच्छं । अणुचित्तिउं पयत्तो अइविम्भियमाणसो कविलो ॥ १८२ ॥
किं मन्ने होज्ज मए दारुणरूवं तवं समायरिउं (यं) ? । किं मयलंछणसच्छहमणुचरियमणुत्तमं सीलं ? ॥ १८३ ॥
किं वा दुक्करतवनियमनिरयचित्तेसु साहुपत्तेसु । होज्ज निहित्तं वित्तं नियमुयजुयलज्जियं पुव्वि ? ॥ १८४ ॥
किं वा साहसमवलंबिऊण खित्तं हवेज्ज नियदेहं । पज्जलियतिव्वजालासहस्सजडिलंमि जलणंमि ॥ १८५ ॥

सांख्य-
मतम्.

॥ २२ ॥

एमाइविविहसंसयसंकियचित्तो खणं विगमिऊणं । सम्मं वियाणणट्ठा ओहिण्णणं पउंजेइ ॥ १८६ ॥
 पारिव्वज्जपवन्नं अह देहं नियइ तं विगयजीयं । तेऽवि ससिस्से गंथत्थवाहिरे मुद्धबुद्धीए ॥ १८७ ॥
 ताहे नियदंसणपक्खवायओ चत्तदेवकायव्वो । ओयरिओ आयासे सिस्साणं तत्थ(त्त)कहणट्ठा ॥ १८८ ॥
 वरपंचवण्णमंडलमज्झगओऽदिस्समाणरूवो य । आसुरिपमुहे सिस्से भासइ संबोहिऊणेवं ॥ १८९ ॥
 अव्वत्ताओ वत्तं पभवइ इच्चाइ तत्तसंदोहं । तो सट्ठितंतगंथं तं सोच्चा आसुरी कुणइ ॥ १९० ॥
 अव्वोच्छित्ती य तओ जाया सीसप्पसीसवग्गस्स । एवं सति वित्थरियं सवत्थ तिदंडिपासंडं ॥ १९१ ॥
 कविलोऽवि हरिसियमणो ठाणाओ तओ गओ सुरावासं । तत्थ य अणण्णसरिसे पंचविहे मुंजए भोए ॥ १९२ ॥
 अह सो मिरिई आउयखयंमि चइऊण वंभलोगाओ । दूरदिसागयनेगमपणिआउलविण्णिमग्गंमि ॥ १९३ ॥
 परिसरेदेसट्ठियसाहुवग्गपारद्धधम्मकम्मंमि । नीसेसगामतिलए कोल्लागे संनिवेसंमि ॥ १९४ ॥ जुम्मं ।
 छक्कम्मनिरयचित्तो वेयत्थवियारकुसल्लबुद्धी य । जाओ जयपयडजसो नामेणं कोसिओ विप्पो ॥ १९५ ॥
 सो विसयपसत्तमणो दविणज्जणकयविचित्तवाचारो । पाणवहपमुहगुरुपावठाणनिरवेक्खचित्तो य ॥ १९६ ॥
 मिच्छत्तनिहयबुद्धी तिदंडिदिक्खं निसेविउं अंते । असीई उ पुव्वलक्खे सव्वाउं पालिऊण मओ ॥ १९७ ॥

श्रीमहा०
चरित्रे
२ प्रस्तावः
॥ २३ ॥

अह सकयकम्मजणिए सुरतिरिपामोक्खविविहठांगंमि । उववज्जिऊण वहुसो पसुव विवसो दुहाभिहओ ॥ १९८ ॥
भमिऊण चिरं कालं भवंमि थूणायसंनिवेसंमि । माहणिमाहणपुत्तो जाओ सो पुस्समित्तोत्ति ॥ १९९ ॥ जुम्मं ।
तत्थवि चिरकालं निवसिऊण निविन्नकामभोगो सो । परिवायगदिक्खं पडिवज्जेउण धम्मवुद्धीए ॥ २०० ॥
काऊण तवं विविहं पालिय नियसमयसिद्धधम्मविहिं । सव्वाउयं च धरिउं बावत्तरिपुव्वलक्खाइं ॥ २०१ ॥
मरिऊण पुस्समित्तो तत्तो सोहम्मदेवलोगंमि । दिव्वाभरणविभूसियदेहो देवो समुप्पन्नो ॥ २०२ ॥
कालकमेण तत्तो चइऊणं चेइयंमि य निवेसे । अग्गिज्जोओनामा(स)वंभणो(अह)समुप्पन्नो ॥ २०३ ॥
सो य चउसट्ठिं पुव्वलक्खाइं परिपालिऊण आउयं गहिऊण परिवायगदिक्खं मरिऊण ईसाण देवलोगे
मज्झिमाऊ तियसो होऊण चिरं कालं भोगे भुंजिऊण आउक्खए चुओ संतो मंदिराभिहाणसंनिवेसे सोमिलस्स
वंभणस्स सिवभहाए भारियाए पुत्तत्तेण उववन्नोत्ति, कयं च से अग्गिभूइत्ति नामं, सो य पत्तो तारुन्नं, अन्नया
य तत्थ संनिवेसे परिभममाणो समागओ सूरसेणो णाम परिव्वायगो, सो कुसलो सट्ठितंतसिद्धंते वियक्खणो धम्मकहाव-
क्खाणे छेओ परचित्तपरिण्णणे, तं चागयं सोऊण समागओ बहुजणो, आरद्धो य तेण नियदरिसणतत्तपरूवणापवंचो,
आणंदियहियओ गओ य सट्ठाणं जणो, जाया पसिद्धी, वीयदिवसे अग्गिभूई अण्णो य लोओ आगओ तस्स सयासं,
कया उचियपडिवत्ती, उवविट्ठो संनिहियपदेसे, कहिओ य तेण महया पगारेण नियदरिसणाभिप्पाओ, हरिसिया

सूरसेन-
परि०.

॥ २३ ॥

सत्वे, एत्थंतरे एगेण मणुसेण पुच्छिओ सो परिवायगो, जहा भयवं ! मयलंछणे इव जणनयणाणंदे मुत्ताकलावेव सह-
रिसहरिणच्छिसिहिण(हण्डि)संवासोचिए नंदणवणे इव विविहविलासजोग्गे जलहिंमि व लावणपुण्णे रसायलेव भुयं-
गसंगसमुचिए भग्गवम्महसोहग्गे किमेरिसंमि तारुण्णे अणुद्धियं तुमए पव्वज्जागहणंति ?, न खलु मुणालतंतुरज्जू परि-
खमइ मत्तसिंधुरखंधबंधणपरिक्खेवं न याचि सहइ सहयारमंजरी जरढढेकपरिक्खेवचरणभारं न य पभवइ धाराकराल-
करवालत्तिहुल्लेहलीलं कमलदलं, न सव्वहा तुह एरिसी सरीरसिरी काउमरिइ निट्ठुरजणजोग्गं तवचरणंति, केवलं
होयधमेत्थ पणइणीविरहेण वा धणभंगेण वा सयणविप्पियदंसणेण वा अण्णेण वा केणइ कारणेणं, बाढं कोऊहलं
मे, साहेह सव्वहा जइ न दूरमकहणिज्जंति । परिवायगेण भणियं—भइ ! तुम्हारिसाणवि किं किंपि अकहणि-
ज्जमत्थि ?, सुणसु जइ अत्थि कोऊहलं, अहं किर पुवं कोसंवीए नयरीए असंखदविणभायणं अणेगाणं दीणाण
दुत्थियाण विदेसियाण भयंताण य सत्ताणं ताणदाणपरायणो आसि, अण्णया य रयणीए मे पसुत्तस्स सहसा
समुच्छलिओ तुमुलो रवो, तओ संभंतोऽहं समुद्धिओ सयणीआओ जाव पेच्छामि आइद्धियनिसियस्सग्गे दढावच-
दपरियरे चावचककुंतपमुहाउहहत्ये हण हणत्ति भणंते धरणियलगयंपि सयं निहित्तमिव अत्यसंचयं गिण्हमाणे
तहट्टियाउ चेव तुरंगमंदुराओ अप्पायत्ताओ करेमाणे संमुहट्टियं परियणं विविहप्पयारेहिं विहवेमाणे कंसं दोसं
घरवक्खरं च अवहरेमाणे जमसुहडे इव कलिकालमित्ते इव पावपियामहे इव भीसणे निक्खिे भिल्लपुरिसे, ते य

श्रीमहा०
चरित्रे
२ प्रस्तावः
॥ २४ ॥

ददूण मरणभयविहारेण सिग्धं अवक्कमिऊण मए वाहरिया आरक्खिया, त य जाव मत्ता इव मुच्छिया इव गयचे-
यणा इव बहु बोलावियावि हुंकारमेत्तमवि न दिंति ताव नायं मए नूणमेए ओसोवणिमंतेण वा ओसहपओगेण
वा एएहिं चोरेहिं निहयचेयणा कया भविस्संति, कहमण्णहा एवं निहा विह्वेजा ?, होउ वा ताव सजीवियं
रक्खामित्तिपरिभाविऊण सणियं सणियं निल्लुको एगत्थ वणगहणे, भिल्लावि भवणसिलायंभाइयं मोत्तूण सेसं
वराडमेत्तंपि गहाय गया, कमेण पहाया रयणी, उट्ठिओ जणो, जाया पुरे वत्ता, आगओ लोओ अहं च, अवलोइयं
गेहं जाव तत्थ एगदिणभोयणमेत्तंपि नत्थि, खीणविभवत्तणओ कलंतराइपउत्तंपि दविणजायं न पावेमि, जओ
नत्थि कोऽवि निव्वाहो तओ चित्तियं मए-

नीसेसजणपहाणत्तणेण ठाऊण एत्थ नयरंमि । संपइ कप्पडिओ इव कह निवसंतो न लज्जामि ? ॥ २०४ ॥
दीणाण दुत्थियाण य दाउं भोयणविहिं कुणंतस्स । इण्हि तु निओदरभरणमेत्तनिरयस्स का सोहा ? ॥ २०५ ॥
कह वा तुरगारूढो पुर्व्वि भमिऊण पुरिसपरियरिओ । वच्चिस्सं एगागी इण्हि तु पयप्पयारेण ? ॥ २०६ ॥
कह वा सहपंसुकीलियबंधवलोयस्स वंछियत्थस्स । अविपूरितो जीयं निरत्थयं उव्वहिस्सामि ? ॥ २०७ ॥
दुव्वहगव्वुदुरवइरिविसरदुव्विसहदुव्वयणजायं । पम्भट्टलट्ठविभवो पच्चक्खं कह सुणिस्सामि ? ॥ २०८ ॥
ता मोत्तूण इमं ठाणं देसंतरं वच्चाभित्ति चित्तिऊण चलिओऽहमुत्तरावहाभिमुहं, कालंतरेण पत्तो एगंमि सन्नि-

सूरसेन-
वृत्तं.

॥ २४ ॥

वेसे, भिक्षापरिभ्रमणेण कथा पाणवित्ती, बुत्थो तत्थेव किंचिकालं, अण्णदिवसे य दिट्ठो मए एगो तिदंडी,
बंदिरुण सवायरेण उवविट्ठो से समीवे, पुच्छिओऽहं जहा मए तहा तेणवि नियवइयरं, निवेइओ य मए संखेवेण,
तिदंडिणा भणियं-पुत्त ! परिचयसु सोयसंतावं, अणुसरसु धीरत्तणं, सबसाहारणो हि एस वइयो, किं च—

किं वयणिज्जं जं निंदिए जणे नो धिरत्तणं कुणइ ? । पुरिसुत्तमंपि लच्छी लड्डइ महिलच्च दुव्वीला ॥ २०९ ॥
नो सुइकुलं न रुवं नो विण्णाणं न विक्रमं न वलं । बालच्च गयविवेया अवेक्खए किंपि मुयमाणा ॥ २१० ॥
अहवा जलनिहिकल्लोलसंगसंलग्गचंचलत्ताए । कोत्थुहमणिसहजम्मणवहियदढनिट्ठुरत्ताए ॥ २११ ॥
मयलंछणसमसी(सा)सियमइलाणुस्सरणबद्धसीलाए । सुरगइतुरंगसंगइदूरुज्झियवरविवेयाए ॥ २१२ ॥
दुस्सहविसमेत्ती(व)सदावियपज्जंतदुहविवेगाए । कंबुसिणेहसमुच्छूढगाढकुडिलत्तबुद्धीए ॥ २१३ ॥
तह पारियायपणयप्पभावजडजायपक्खवायाए । निच्चं लवणोयहिवासमुक्कमधुरत्तभावाए ॥ २१४ ॥
एयाए सच्चरियं कहां हवेज्जा महाणुभावाए ? । न हि विसरिससंसग्गी विसिट्ठुगुणसाहणं कुणइ ॥ २१५ ॥
ता चयसु सौगमहुणा पोरुसमुबहसु कुणसु करणिज्जं । न हि विण्णायसरूवे गुप्पंति कहिंपि सप्पुरिसा ॥ २१६ ॥
किं भइ ! तुमं एगो इमीए मुक्को ? जमेवमइगरुयं । संतावं वहसि न पत्तकालमहुणा समायरसि ॥ २१७ ॥
भणियं च मए भयवं ! किं पुण एत्तोऽवि पत्तकालं मे ? । तेण कहियं ! मद्दायस ! निच्छअओ सबहा धम्मो ॥ २१८ ॥

श्रीमहा०
चरित्रे
२ प्रस्तावः
॥ २५ ॥

एयविउत्ताण जाओ विहडंति समुदुरावि रिद्धीओ । एएण संपउत्ताण हुंति दूरं पलीणावि ॥ २१९ ॥
 एयं च मए आयन्निऊण संजायभवविरागेणं । एसा तिदंडिदिक्खा पडिवत्ता दुक्खनिम्महणी ॥ २२० ॥
 ता भद् ! तए वेरग्गकारणं जं पुरा अहं पुट्ठो । तं एयं तुह सिद्धं एत्तोचिय कुणसु धम्ममइं ॥ २२१ ॥
 एत्थंतंरंमि एयं सोच्चा ओभिनवहलरोपंचो । पुणरुत्तनिवेसियपारिवज्जदिक्खाभिमुहबुद्धी ॥ २२२ ॥
 सो अग्गिभूइनामो मिरीइजीवो तिदंडिणं नमिउं । भालयलनिमियपाणी पथंपिउं एवंमाठत्तो ॥ २२३ ॥
 भयवं ! जाए वेरग्गकारणे तारिसंमि तुम्हेहिं । जं दिक्खापडिवत्ती विहिया तं सम्ममायरियं ॥ २२४ ॥
 एयस्स निसामणओ ममावि घरवासवासणा विमया । छिन्नो मायामोहो विवेदरयणंपि विष्कुरियं ॥ २२५ ॥
 ता नियदिक्खादाणेणऽपुग्गहं कुणसु संपथं मज्झ । इय वुत्ते तेणं सो पवज्जं गाहिओ सहसा ॥ २२६ ॥
 काऊण तवं तो सो धरिउं छप्पण्ण पुवलक्खाइं । सवाउयं तदंते सणंकुमारे सुरो जाओ ॥ २२७ ॥
 कालक्कमेण चविउं सेयवियाए पुरीए पवराए । वंभणकुले पसूओ भारद्वाओत्ति नामेण ॥ २२८ ॥
 तत्थवि सकम्मजणिए सुहदुक्खे भुंजिऊण थेरत्ते । पुवक्कमेण पुणरवि पारिवज्जं पवज्जेइ ॥ २२९ ॥
 काऊण य बालतवं कुदेसणापावधूलिपडलेणं । अवगुंडिऊण वाढं रम्मन्ताणं व बहुकालं ॥ २३० ॥
 सवाउयमणुपालिय चउयालीसं तु पुवलक्खाइं । पंचत्तगओ संतो तियसो होऊण माहिंदे ॥ २३१ ॥

स्वावरभवः
परिभाष-
कताः

॥ २५ ॥

निम्मलमणिरयणमउहजालउज्जोविए विमाणंमि । नियपरियणपरियरिओ कीलइ सच्छंदलीलाए ॥ २३२ ॥
 आउक्खएण तत्तो चविउं सो मणुयतिरियजोणीसु । नरयकुदेवेसुंपिय पुणरुत्तं परिभमेऊण ॥ २३३ ॥
 रायग्गिहंमि नयरे दियवरकविलस्स कंतिमइयाए । गिहिणीए गच्छम्मी पुत्तत्तेणं समुप्पन्नो ॥ २३४ ॥
 जाओ समुचिअसमए नामंपि य थावरोत्ति से विहियं । सत्तेण य गत्तेण य कुमारभावं च वोक्कंतो ॥ २३५ ॥
 अणवरयमरणजरजम्मवाहिदुहनिवहपीडियं लोयं । दइडूण काउकामोवि धम्ममइमोहमूढो सो ॥ २३६ ॥
 नो वच्चइ दुक्करतवविहाणनिरयाण जिणमुणिंदाणं । पासंमि कयावि हु नेव अन्नतिथियजणस्सावि २३७ जुम्मं ।
 एवं अच्छंतो सो पेच्छइ एगं तिदंडिणं समणं । चिविडियनासावंसं भग्गोट्टुउडं दलियदसणं ॥ २३८ ॥
 कुमुयं व चंददंसणवसेण कमलं व दिणयरुग्गमओ । सालत्तयतरुणचरणताडणाओ असोगुव ॥ २३९ ॥
 तं पासिऊण वियसंतनयणनलिणो परं पमोयभरं । अइदुलहवलहसंगमे व सो पाविओ झत्ति ॥ २४० ॥
 पइजम्मपरिन्वायगदिक्खागहणुब्भवंतुनेहाओ । तत्तपरिपुच्छणट्ठा तस्स सगासं समलीणो ॥ २४१ ॥
 नमिउं चरणे सवायरेण सो पुच्छिओ य भम्मविहिं । जोगोत्ति कलिय तेणवि तिदंडिणा साहिओ तस्स २४२
 अन्नं च इमं सिट्ठं जहाऽहमिह दुक्खिओ ठिओ पुर्विं । विसयपिवासानडिओ कुसलेण तहा न ठायवं ॥ २४३ ॥
 अह थावरेण भणियं भयवं ! कह तं ठिओ इह दुहत्तो ? । विसयपिवासानडिओ कहेहि कोऊहलं मज्झ ॥ २४४ ॥

श्रीमहा०
चरित्रे
२ प्रस्तावः
॥ २६ ॥

भणियं च तेण भइय ! सुणसु पुरा विसयसलिलपडिहत्थं । अन्नाणमीणभीमं विसोत्तियालोलकलोलं ॥ २४५ ॥
निहज्जिमजलवेलाविलासमवसत्तदुत्तरावत्तं । पावविकप्पणपंकं निस्संखपवंचसंखउलं ॥ २४६ ॥
अभिमाणघोरघोसं पयंडकंदप्पवाडवग्गिसिहं । दोसघणपडलकिन्नं तारुणमहन्नवं पत्तो ॥ २४७ ॥ तीहिं विसेसयं ।
तवसेण य परिचत्तसगिहसंवासो दूरुज्झियसयणबंधवो परमतावसो इव विसट्टकंदोट्टनयणासु पवरपओहरासु
महाभोगसालिणीसु समुल्लसंतकलोलबाहुविलासासु हंसगाणुसरियपयकमलासु सालसकुलकलरवासु सरसीव सुंदरासु
विलासिणीसु कयाभिरई समाणो एगया अणंगसेणाभिहाणाए वेसाए समं वुत्थो बहुं कालं, तदणुरागवसेण य
पवरभूसणदाणेण अणवरयमहामोल्लदोगुल्लसमप्पणेण तंबोल्लफुल्लविलेवणोवणयणेण य निट्ठवियं पियापियामहपमुहपुरि-
सज्जियं दविणजायं, जाओऽहं निट्ठणचंगो, सुणिओ दाइगाए, तओ निप्पीलियालत्तयं व पयत्तपीयवारुणीचसगं व
भुत्तावसेस भोयणं व तेहिं तेहिं अवमाणकारणेहिं परिचत्तो म्हि तीए, तयणंतरं निग्गओऽहं वेसाघराओ, गओ
नियगेहे, दिट्ठं च तमणेगच्छिइसयसंकुलं पच्चमट्ठपुवसोहं मसाणं व भयजणगंति, तओ महाविसायाभिभूओ पयट्ठो
देसियालिए, गच्छंतेण य पइदिणं एगत्थ सुन्नसन्निवेसे दिट्ठं भूमिनिवडियं रक्खावलयं, गहिउं मए विहाडियाओ
निविडजउजडियाओ रक्खागंठिओ, दिट्ठं च एगस्स मज्झनिहित्तं लिहियपवरक्खरं भुज्झखंडं, वाइयं च कोऊहलेण,
परिभाविओ य तल्लिहियगामनामदिसाभागलंछणसमेओ रयणकोडिप्पमाणनिहाणवइयरो, हरिसियमणेण संगो-

स्थावरभवः
परिव्राज-
कता.

॥ २६ ॥

वियं च तं सवपयारेण, पट्टिओ तयणुसारेणं, पत्तो अकालखेवेण भुज्जलिहियंमि गामे, निरुविओ निहाणप्पएसो,
 अवलोइयाइं लिंगाइं, जाव सव्वाणिवि लिहियाणुसारेण मिलंति, तओ मे पाउच्चूओ परमप्पमोओ, पसत्थनिसाए य
 दिसावलिपवखेवपुरस्सरं खणिउमाढत्तो णिहाणप्पएसं जाव य हत्थप्पमाणमेत्तं तं न खणाभि ताव समुट्ठिया उच्च-
 डफडाडोवभीसणा तडिसिहातरललंतजीहजुयला मुहमारुयसंवलयजलणफुलिं गुग्गारदारुणा पुच्छच्छटाताडिय-
 धरणिवट्ठा दीवयसीहा फुरंतरत्तदित्तनेत्ता महाभुयंगा, तेहि य संदंसेहि य तडतडत्ति तोडियं मह सरीरं, निचिट्ठो
 महाविसावेगेण निवडिओऽहं भूमीए, विइकंता रयणी, ममाणुकंपाएव समुग्गओ भयवं दिणयरो, अवलोइओऽहं
 गामजणेण, विण्णायविसविगारेण य दयाए पडियारिओ, तहाविहोसहमंतकिरियाए जायं च पगुणं सरीरं, पुट्ठोऽहं
 गामजणेण रयणिवइयरं, कहिओ य मए तस्स जहट्ठियनिहाणवुत्तंतो, तओ तत्थेव वीसमिऊण कइवय वासराइं
 पुणरंवि पत्थिओ एगदिसाए, अण्णया य गच्छंतस्स मिलिओ एगो पुरिसो, समाणसीलयाए य जाया मज्झ तेण
 समं मेत्ती, पत्थावेण य तेण एगंते सव्भावेण निवेइओ मम विवरप्पवेसजक्खिणीसाहणक्कप्पो, अच्चत्थिओ य
 सव्वायेरेण जहा-जइ तुमं सहाईभवसि ता विवरं पविसामो, भोगगाढलोलुयाए पडिवण्णमेयं मए, तओ अखं-
 डपयाणएहिं गया वलयामुहं नाम विवरं, धिरइया से दुवारपूया, तप्पियाओ जोइणीओ, सुमुहुत्तनक्खत्तंसि गहाय
 वाढं पत्थयणं परिकलियहत्थपईवा पविट्ठा तत्थ, उच्चनीयठाणाणि वोळिंता सणियं सणियं गया दूरदेसं, दिट्ठा य

श्रीमहा०
चरित्रे
२ प्रस्तावः
॥ २७ ॥

झडत्ति एगत्थ विज्जुपुंजभासुरा पवरकणगसिंहासणनिविट्ठा एगा जक्खकन्नगा, अविय—
गंडयलललंतुज्जलकुंडलकिरणोलिविच्छुरियवयणा । नाणामणि(मय)भूसणससिरियरेहंतदेहलया ॥ २४८ ॥
आमलयथूलमोत्तिथनवसरहारावरुद्धथणवट्ठा । पप्फुलमणहर(हरा)वम्महतत्तरुत्तरुणसाहव ॥ २४९ ॥
पायालसिरिव रइव देवरमणिव जणियमणमोहा । ललियकरकलियलीलासरोरुहा सुंदरावयवा ॥ २५० ॥
भुवणच्छेरयभूयं रूवं दहुं अदिट्ठपुवं से । मयरद्धपसरविट्ठुरा अम्हे तप्पासभल्लीणा ॥ २५१ ॥
सावि अम्हे आगच्छंते पेच्छिऊण सन्निहियपज्जलंतपयंडजालाकराले झडत्ति कुंडे पविट्ठा, अम्हे गुण महा-
मोग्गराहया इव विहाणवयणा चिंत्तिउं पवत्ता—किं पच्छाहुत्तं नियत्तामो उयाहु तत्थेव तदंगसंगसंलग्गलायन्न-
पुत्ते जलणकुंडे पयंगो इव अत्ताणं खिवामो?, केवलं दारुणो दहणो खणद्धेणवि दहइ देहं, संसइओ य तीए सद्धिं
मीलगो, जीवंता पुणोऽवि महाइं पेच्छिस्सामो, ताव सहसच्चिय एगनिकुंजाओ कुंजरोव गरुयंगभारो अंगभारधरह-
रियधरणितलो धरणितलताडणसमुच्छलंतपडिसद्वयसहस्सवहिरियदिसाभोगो दिसाभोगपसरंतकज्जलगवलगुलि-
यालिवलयकालप्पभाजालो करधरियमहंतनरसिरकवालो कालरत्तिजणगो इव दुप्पेच्छो वयणेण व धूमवर्त्ति सुय-
माणो फारकुंफाररउद्दकसिणभुयंगवद्धकेसभारो समायओ तं पएसं झडत्ति खेत्तवालो, तओ तेण अचंतरोसारुणच्छेण
पेच्छिऊण भणिया अम्हे—रे रेपुरिसाहमा ! विणट्ठसीलसमायारा कायरडियमेत्तवित्तसियसरीरा किं नियचित्तावट्ठं

स्वावरभवः
परिव्राज-
क्ता.

॥ २७ ॥

न सुणह? जं एत्थ आगया, ता एण्हिमणुभवह दुविणयकलंति भणिऊण पवणपणुण्णळिणपण्णं व भएण कंभमाणा
सहसच्चिय चरणे धरिऊण बालच्छगलगद अम्हे महया वेगेण उल्लालिया तओ पएसाओ, निवळिया य पलयासुइ-
विवरदुवारमूले, तओ समागयमहानिहावेगा इव भणिऊण जामिणिं समुग्गयंमि दिणयरे उन्नीळियनयणकसला
परिवित्तिउं पवत्ता—अहो को एसप्पएसो? केणेहाणीया? कहं वा धरणीए पसुत्ता? कत्थ वा तं विवरं? कहिं
वा सा कण्णगा? ।

सुमिणं माया वेयं विभीसिया व? महविच्चमो धावि? । एवं चिर संसइया होऊणं सुमियवरवत्था ॥ २५२ ॥
ठाणाउ तओ चलिया पत्ता वेण्णायडंमि वयरंमि । तत्थवि विजासिद्धो दिट्ठो सिवसुंदरो नाम ॥ २५३ ॥
तो बहुविहप्पयारं विणएणाराहियो पयत्तेणं । तुट्ठेण तेण दिण्णो मज्झं कच्चाइणीमंतो ॥ २५४ ॥
कहिओ य साहणविही तओ भए चंडिगाए गेहंमि । गुरुणा जहोवइट्ठो पारद्धो जाव होमविही ॥ २५५ ॥
साहसरहियत्तणओ तणग्गकंपेवि भयविसिट्ठस्स । धिट्ठत्तणओच्चिय मंतसाहणं मम कुणंतस्स ॥ २५६ ॥
उत्तालुत्तालकरालकालवेयालचंडपरियरिओ । एगो महापिसाओ सहसच्चिय उट्ठिओ जीमो ॥ २५७ ॥ जुम्मं ।
ताहे तारिसविगरालदंसणुप्पणमरणभयविहुरो । विस्सुमरियमंतपओ पहाविओऽहं सगिहहुत्तं ॥ २५८ ॥
तेणावि धिट्ठुस्सिक्खिओत्ति भणिऊण विगयसंकेण । अइलंवपाणिणा करिसिऊण नीओ सिवाए पुरो ॥ २५९ ॥

श्रीमहा०
चरित्रे
२ प्रस्तावः
॥ २८ ॥

ताहे मुट्ठीएँ हओ तहा जहा चिविडिया ममं नासा । अत्रेऽवि अग्गदंता भग्गा निब्भग्गरूवेण ॥ २६० ॥
ता भो महायस ! तएजं पुट्ठोऽहं सवइयरं पुवं । सो एस जइ न पत्तिज्जसीह ता पेच्छ मज्झ मुहं ॥ २६१ ॥
अह थावरेण भणियं भयवं ! पच्चक्खदिस्समाणेऽवि । भोगपिवासादोसे को मइमं नेव पत्तियइ ? ॥ २६२ ॥
जुत्तं तुम्हेहिं कयं अहंपि काउं इमं समीहामि । ता अणुगिण्हह संपइ पारिवज्जप्पयाणेणं ॥ २६३ ॥
दिण्णा य तेण दिक्खा जाओ सो धम्मकरणनिरयमणो । दढतवियदुस्सहतवो मिच्छत्तविलुत्तबोहेणं ॥ २६४ ॥
चोत्तीसपुव्वलक्खे सत्ताउं पालिऊण पज्जंते । मरिऊण वंभलोए उववण्णो भासुरो तियसो ॥ २६५ ॥
नियबुद्धिसिप्पिकप्पियतिदंढिदंसणपरूढनेहेणं । पारिवज्जग्गहणं छम्भवरगहणाह संपत्तं ॥ २६६ ॥
सकुलपसंसावइयरनिवद्धदढनीयगोयकम्ममेणं । माहणपमुहे नीए कुलंमि जम्मं च पिरियस्स ॥ २६७ ॥
दहूण जिणवरागमविवरीयपरूवणं कुलपसंसं । दूरं परिवज्जह भो वियक्खणा ! सबकालंपि ॥ २६८ ॥
इय वद्धमाणचरिए महल्लकल्लाणवल्लिपरियरिए । मिच्छत्तपंसुमइलियजणमणमल्लालणजलंमि ॥ २६९ ॥
भरहसुयपढमपयडियतिदंढिपासंडसंसणागम्भो । भव्वजणविम्हयकरो सम्मत्तो वीयपत्थावो ॥ २७० ॥
॥ इति गुणचंदसूरिरिए सिरिमहावीरचरिए वीयपत्थावो सम्मत्तो ॥

स्थावरभवः
परिवाज-
कता.

॥ २८ ॥

(ततीयपत्थावो)

तिहंदिभवसमेया भणिया वत्तवया य मिरिइस्स । एत्तो य जहावित्तं साहिज्जइ विस्सभूइस्स ॥ १ ॥

इहेव जंबुदीवे दीवे भारहवाससिरसेहरोवमे पइदिणभवंतविविहमहूसवे नीसेसनयरविक्षाए रायगिहे नयरे पढमो सोंडीरचक्कस्स वल्लहो गुणिवग्गस्स सम्मओ पयइलोयस्स पाणप्पिओ पणइजणस्स भुयदंडलीलारोवियभूमि-
भारो विसुद्धबुद्धिपगरिसधीमंसियधम्मवियारो विस्सनंदी नाम नराहिवो, मयणलेहा नाम से भारिया, विसाहनंदी
कुमारो, तहा परुढगाढपेम्माणुबंधो सरीरमेत्तविभिण्णो विसाहभूती जुवराया, तस्स रुवाइगुणरयणरोहणधरिणी
धारिणी नाम देवी । इओ य सो मिरिइजीवो बंभलोगाओ जुओ संतो चउग्गइयं संसारकंतरमणुपरियट्टिऊण अणं-
तरभवजणियतहाविहकुसलकम्माणुभावेण समुप्पण्णो तीसे गन्धमि पुत्तत्ताएत्ति, अण्णया पसूओ विसिट्ठे वासरे,
कयं विस्सभूइत्ति से नामं, कमेण परिचत्तवालभावो गाहिओ सो पिउणा कलाकलावकोसलं, तारुणमणुप्पत्तो परि-
णाविओ वत्तीसं सुररमणीविन्भमाओ पवररायकुलसमुब्भववालियाओ, ताहि य समं बहुप्पयारं कीलंतो कालं
गमेइत्ति । अण्णया य सयलतइलोयदरिसियवियारो तरुवराणंपि विहियलावण्णो मुणीणंपि कयचित्तचमक्कारो स-
मागओ महुमासो, जत्थ य—

पोढपुरंधियोरथणमंडलपडिहयगमणवेगओ । पिययमविरहविडुरतरुणीयणदीहरसासतरलिओ ॥ २ ॥

श्रीगुणचंद
महावीरच०
३ प्रस्तावः
॥ २९ ॥

चंदणनीधकुमुयकमलयरकुवलयगंधधंधुरो । दाहिणपद्मगुदिसिहिं पवियंभइ नावइ गंधसिंधुरो ॥ ३ ॥
अणं च—चंचलचरणचलणपरिवोलिरमंजुलकणयनेउरं । करयलरणक्षणंतमणिकंकणकलरवपसरभणहरं ॥ ४ ॥
कणिरनियंवरिचकंचिगुणकिंकिणिधालयलालयं । सहइ वरंगणाण चाउदिसिं चच्चरि चारुगीययं ॥ ५ ॥
एवंविहं महुसमयं दहुं विस्सभूई कुभारो समग्गविभूईए चाडुकरनरभडचेडपरिकिन्नो अंतेउरतरुणीजणपरिय-
रिओ गओ पुप्फकरंडयं नाम उज्जाणं, जत्थ तरुवराभोगे गायंतिव अमंदमयरंदविंदुपाणपरवसभभिरभमरगुंजिएहिं
पणचंतिव खरपवणुबेलिरमहल्लपलवमुएहिं हसंतिव डिंडीरपिंडपंडुरपरिप्फुडकेवइदीहरदलेहिं । जम्मि य—
जंबुजंवीरखज्जरसाहिंजणा, सज्जनलियरिफणिसप्पला अज्जुणा ।
खइरसिरिखंडकप्पूरपूगीतला, पीलुनिंववलिवउयवडपिप्पला ॥ ६ ॥
कयलिनोमालियामाहवीसालयासहईसग्गनवनीवहिंतालया ।
वउलवंसालिताविच्छयाकच्छिया, सबकालंपि रेहंति जलसुत्थिया ॥ ७ ॥
जं च—कहिंचि सहयारतरुमंजरीमंडियं, कहिंचि वेइल्लफुलंतगंधद्वयं ।
कहिंचि कंकेलिनवपल्लवालंकियं, नाइतरुणीकमालत्तवालंकियं ॥ ८ ॥
कहिंचि नवपाडलापुप्फनियराउलं, कहिंचि विरुटंतभमरावलीसंकुलं ।

वसन्तर्तुवः

॥ २९ ॥

कहिंचि वरमालईमउलमालच्चियं, नाइनियविहवदंसणेण रोमंचियं ॥ ९ ॥

अण्णं च—कारंउहंसवणचक्कावभासंडकीरकुरोहिं । जीवंजीवकविंजलजलवायसखंडरीडेहिं ॥ १० ॥

हारीयपंचवण्णयपोरेवपपमुहविहवपक्कीहिं । सुसिणिद्धवंधवेहि व सेविज्जइ जंसयाकालं ॥ ११ ॥

जत्थ य वम्महदुस्सहसराभिघाएहिं जजरंगीओ । वालमुणालुप्पलसत्थरेसु सिसिरेसु रमणीओ ॥ १२ ॥

विणयंति विरहिणीओ दिणाइं करपिहियसवणजुयलाओ । परदुयताररवारसियसवणमुच्छायमभएणं ॥ १३ ॥ जुम्मं ।

रेहंति जत्थ चंपयतरुणो नवकुसुमनियरसेहरिया । आरुढमयणजलणव्व पहियनिवहाण दहणत्थं ॥ १४ ॥

खरपवणुदुयमयरंदपिंजरं पेच्छिऊण रविविंवं । मज्झण्णेऽवि डु संझं संकंति रहंगभिहुणाइं ॥ १५ ॥

जत्थऽकूखमयणदमणा तरुणो मुणिणो य सुमणसोवेया । सुहलवलीलालसिया भुयगीओ विलासिणीओ य ॥ १६ ॥

तत्थ एवंविहंमि उज्जाणे सो विस्सभूर्इ कुमारो पवरतरुणीजणसमेओ अणिमिसाए दिट्ठीए पेच्छमाणो वण-
लच्छिं कोऊहलाउलियपरियणदेसिज्जमाणमग्गो काण्णंतरेसु परिब्भममाणो सायरं पसीयह कुमार ! पेच्छह इओ
मंजरिज्जइ सहयारावली इओ फुल्लंति मल्लियाओ इओ पल्लविज्जंति बालकंकिल्लिणो इओ कोरइज्जंति कुरुवयनि-
उरुंवा इओ कुसुमिज्जंति कणियारनियरा इओ मउरिज्जंति पुन्नागाइसाहिणोत्ति, एवं उज्जाणपालेण निदंसिज्जमाण-
तरुणो वणकीलाए दिणाइं गमेइत्ति । अंतरा य सुणेइ राइनीईसत्थाइं विमरिसेइ गूढत्थपयाइं अभिणयावेइ वि-

श्रीगुणचंद
महावीरच०
३ प्रस्तावः

॥ ३० ॥

सिद्धकविजणविरइयाइं नाडयाइं भरहविज्जावियक्खणेहिं हावभावहत्ययाइपत्थावणपडुएहिं नाडइज्जपुरिसेहिं नि-
सामेइ य वेणुधीणाणुनयं गायणज्जणाओ बहुवोलणप्पयारमणहरं पंचमगेयं, तहा एगंतदेसट्ठिओ निसुणेइ दुईणं
सोचालंभवयणाइं । कहं ?—

तीसे संकेयं संसिऊण पडिजुवइमणुसरतेणं । नाह ! तए जाजीवं दिन्नो लहुयत्तणकलको ॥ १७ ॥

सुहय ! तुह विरहदुस्सहसिहिपसमत्थं ममाहरंतीए । तीसे सरसीसुं निट्ठियाइं नवनलिणिनालाइं ॥ १८ ॥

परिसरसहयारुग्गयनवमंजरिखंडणेण पइदियहं । तीसे ताण निमित्तं घट्ठा मज्झंगुलीण णहा ॥ १९ ॥

पच्चासण्णे कयविविहकलरथे नीलकंठकलयंटे । परिसंता मज्झ भुया पइक्खणं उडुवंतीए ॥ २० ॥

एइ पिउ एइ पिउ एसो सो हवसु तं खणं धीरा । थक्का मेण्हि जीहा पुणरुत्तं वाहरंतीए ॥ २१ ॥

इय एरिसा अवत्था वट्ठइ तुह पणयिणीए दुविसहा । जइ जीवंति वंलसि कुमार ! ता तं लहुं सरसुं ॥ २२ ॥

तहा कयाइ गोत्तखलियपरिकुवियकामिणीपसायणप्पवणवयणप्पवंचविरयणेण कयाइ सुयसारियासंलाववि-
णोएण कयाइ परोप्परसवत्तिकामिणीकयकलहकोलाहलनिसामणेण कयाइ णाणाविहदूरदेसोवणीयापुवतरुसंदोह-
दोहलगदाणेण, कयाइ संमयवणसिहंडितंडवावलोयणेण विविहं कीलइ । अण्णया य कुमारस्स कामिणीहिं समं
दुरोदरेण रमंतस्स समागओ मज्झंदिणसमओ ।

विश्वभूति-
कोडा.

॥ ३० ॥

तओ अंतेउरसमेओ चलिओ जलकीलानिमित्तं, पत्तो काणणसरसीए, तयणंतरं च-
 सरसीतडविडविसरात्रमुक्कझं पुच्छलंतसलिलभरं । झिलइ महलकलोलपेलणुवेहिरो कुमरो ॥ २३ ॥
 मड्डाए तरुणीओ रणंतमणिमेहलाकलावाओ । खिप्पंति पराप्परपेल्लरीउ भयतरलियच्छीओ ॥ २४ ॥
 करकलियकणयसिंमयसलिलपहारेहिं पोढरमणीओ । विह्वइ कुमारो कोवभरियदरपाडलाट्टीओ ॥ २५ ॥
 पियकरफुंसुल्लासिरनियंवतडतुट्टमेहलगुणाहिं । निवडंतकिंकिणीहिं पलाइयं झत्ति वालाहिं ॥ २६ ॥
 घोरघणव(धा)मसमजलवट्टियपूराएँ झत्ति सरसीए । कमलाइं वयणलायण्णनिज्जियाइं व बुडुंति ॥ २७ ॥
 इय विविहसलिलकीलाहिं कीलिउं जुवइसत्थपरियरिओ । ओयरिओ सरसीओ गओ कुमारो नियावासं ॥ २८ ॥
 एत्थंतरे अत्थमिओ गयणचूडामणी दिणनाहो, मउलिया कमलसंडा समं माणिणीमन्नुणा, विप्पउत्ताइं
 चक्कनायमिहुणाइं सह मिहुणदिणविरहेण, पवट्टियाणंदा इओ तओ परिचममिउं पवित्ता कोसिया समं पंसुलिविल-
 याहिं, निलीणाइं नियट्टाणेसु सउणिकुलाइं समं मुणिजणेण, तहा निसायरसेणं व भीसणं पसरियमंधयारं, मयर-
 द्धओव विप्फुरिओ सबओ पढमप्पओसपईवनिवहा, एवं पयट्टे संझासमए कुमारो काऊण पओसकिचं तेहिं को-
 ऊहलनम्मालाववंकभणियगीयाइविणोएहिं विगमिऊण खणंतरं पसुत्तो सुहसेज्जाए, कमेण य पभाया रयणी,
 समुग्गओ सहस्संसुमाली, उट्टिओ कुमारो सयणीयाओ, कयपाभाइयकायवो पुवविहीए दोगुंदुगुव विलासिणीम-
 ज्झगओ विलसइत्ति । एवं च तत्थ सायंदिणमभिरममाणस्स सरंति वासरा ।

श्रीगुणचंद
हावीरच०
३ प्रस्तावः

॥ ३१ ॥

अत्रया य विस्सन्दिणो महारायस्स अग्गमहिंसीए दासवेडीओ पुप्फकलंगदणत्थमागयाओ पुप्फकरंडगुजाणं,
दिट्ठो ताहिं विस्सभूइकुमारो अंतोउरसमेओ बहुप्पयारं तथा विलसंतो, तं च ददूण समुप्पणगाढामरिताहिं ईसी-
सहभिज्जमाणमाणसाहिं सिन्धमेव पडिनियत्तिऊण कहिओ रावग्गमहिंसीए कुमारस्स काणणकीलावइयारो, खणं-
तरे य दीहं नीससिऊण पुणो भणियं ताहिं—देवि! किं तुज्झ जीविणं? किं वा रज्जवित्थरेणं? किं वा विभवेणं?
जइ तुभ्ह पुत्तो विसाहनंदी पुप्फकरंडगुजाणे न कीलेज्जा, एवं च आयत्तिऊण अवियाररमणीयत्तणओ इत्थीसहा-
वस्स अदूरदंसित्तणओ मइप्पसरस्स अभीरुत्तणओ नियकुलकलंकुग्गमस्स पक्कओ महापरिकोवो देवीए, परिचत्तं
भोयणं उज्झिओ सरीरसकारो पेसियो नियनियठाणेसु यहीवग्गो, कइवयदासवेडीपरिवुडा य पविट्ठा कोवघरंमि,
रयणिसमए य समागयेण विस्सन्दिनरिंदेण देविं अपेच्छमाथेण पुट्ठो कंचुगिप्पसुहो परियणो, कहियं च एगेण-
देव! अमुगंमि येहे मिलाणवयणकमला केणवि कारणेण देवी गयत्ति, तओ राया तमायत्तिऊण ससंभमं तत्थेव
गओ, दिट्ठा य कोवेण मिसमितंती उहसाशरोगाउरव दीहं नीससंती देवी, दिन्नासणे आसीणो नराहिवो
भणिउमादत्तो य-देवि! किमेरिसी अवत्था? किमत्थ कारणं?, साहेसु परमत्थं, न ताव सुमरेमि थोवंपि निय-
दुच्चरियं, न यावि ममाणुवित्तिपरायणो परियणोऽपि मणागंमि अवरज्झइ तुज्झ, नेव य विविहरयणाभरणसंभारेहिं
खूणमत्थि, ता किं निरत्थओ एस कोवाडंवरोत्ति?, देवीए भणियं—महाराय! सचं चिय नत्थि केणावि पगारेण

विश्वभूति-
क्रीडा
देवीकोपः

॥ ३१ ॥

खणं, केवलं किमेण निरत्यण सयलज्जणसामण्णेण?, रावणा भणियं—किं पुण अनिरत्ययं सयलज्जणासामण्णं च?, देवीए भणियं—महाराय! पुष्पकरंडगुज्जाणे परिमोगो, राइणा जंपियं—किं तेण तुज्झ?, देवीए बुत्तं—तेण मे पओयणं विसाहनंदिकुमारस्स रमणत्थंति, राइणा भणियं—देवि! मा कुप्पसु, मुंचसु असदज्झवसायं परिहरसु इत्थीज्जणसुलभं चावलं तमिक्खेसु नियकुलकमं, किं तुमए दिट्ठो कोऽवि अम्हाणं कुले सुओ वा एगंमि पुष्पकरंड-गुज्जाणट्ठिए पुर्विपि पविसमाणो?, ता कदं पुव्वपुरिसागयं ववत्थं चूरेमि, सब्बहा अण्णं किंपि पत्थेसु, देवीए भणियं—महाराय! गच्छ नियमंदिरे, उज्जाणलाभाभावे केत्तियमेत्ता अण्णपयत्थपत्थणा? ।

रज्जेणं रट्ठेणं धणेण सयजेण वंथवजणेणं । ससरीरपालणेणवि न कज्जं किंपि मह एत्तो ॥ २९ ॥

जीवंतीविडु नरनाह! नाहमेयं तुहप्पसाएणं । जइ पुत्तं कीलंतं पेच्छामि तदाऽफलं जीयं ॥ ३० ॥

नरनाह! तुह समक्खंपि नेस पुज्जइ मणोरहो जइ मे । पच्छा दूरे सेसं भोयणभेत्तेऽवि संदेहो ॥ ३१ ॥

वज्जघडिओऽसि मन्ने जमेगपुत्तंपि परिसवदुहत्तं । दट्ठूण सुहं चिट्ठसि अहह महानिरणुतावोऽसि ॥ ३२ ॥

इय सलिलेहि व बहुविहवयणेहिं णारिदमाणसं तीए । तडमिव महानईए दुहाकयं नेहनिविडंपि ॥ ३३ ॥

रत्ता भणियं सुंदरि! मा संतप्पसु करेत्तु करणिजं । अच्छउ सेसं दूरे जीयंपिह तुज्झ आयत्तं ॥ ३४ ॥

एवं वहुं संठविज्जण गओ नरिंदो अत्थाणमंडयंमि, आहया मंतिणो, साहिओ तेसिं रहंमि समग्गो देवीको-

श्रीगुणचंद
महावीरच०
प्र स्तावः
॥ ३२ ॥

वचइयरो सकुलकमववत्था य, मंतीहिं भणियं—देव! वीसत्था होह, अम्हे गंतूण देविं परूवेमो, अणुन्नाया य राइणा गया देवीए सगासं, भणिया य अणेगप्पगारेहिं, न य कहंपि संबुज्झइ, तओ विलक्खवयणा समागया राइणो सगासे, भणिउं पवत्ता य—देव! निच्छयं देवी गाढजणियकोवा मरणंपि अब्भुवग्गमेज्जा, ता सवहा जहा तहा अणुणयणजोग्गा, रत्ता भणियं—भो किमेवं वाहरह?, किं तुम्हे न जाणह अम्ह कुलकमं?—जमेगंमि रममाणे उज्जाणे अन्नो न पविसइ, वसंतमासपविट्ठो य मासग्गसो चिट्ठइत्ति, मंतीहिं भणियं—देव! जाणेमो, केवलं दुन्निग्गहो इत्थीमहागहो, राइणा सविसायं भणियं—

एगत्तो मज्जाया पल्हत्थिज्झइ कुलकमपरूढा । अन्नत्तो मरइ पिया आवडियं संकडमियाणिं ॥ ३५ ॥

संपज्झइ धुवमेण्हिं अपत्तकालेऽविय विहिवसेणं । दढनेहवंधवंधुरबंधवज्जणचित्तविच्छेओ ॥ ३६ ॥

महिलायत्तो राया जुत्ताजुत्तं न पेच्छए किंपि । इय अवजसो दिसासुं अखलियपसरो चिरं भमिही ॥ ३७ ॥

ता मंतिणो उवायं तमियाणिं कुणह कंपि परिसुद्धं । जह सा जीवइ देवी सकुलववत्था य निव्वहइ ॥ ३८ ॥

एवमायन्निऊण जं देवो आणवेइत्ति भणिऊण ठिया एगंते मंतिणो, सुनिउणवुद्धीए य सम्मं निच्छिऊण कज्जतत्तं साहियं नरिंदस्स, जहा—देव! एयं पत्तकालं किल पच्चंतराया देसमुस्सिंखलो विह्वेइ य, एतदत्थसंवद्धा लेहारिया कीरंति, ते य तुम्हाण लेहे सम्पपेति, तत्थावधारणाणंतं पयाणयं च दवाविज्झइ, तहा कए खुब्भइ सामं-

अनुनयः-
प्रपञ्चश्च.

॥ ३२ ॥

तवग्गो, कुमारोऽवि विन्नायवइयो फुप्फकरंडगुज्जाणं मोत्तूण एहत्ति, एयं च उभयमवि सुपडिविहियं भवइ, एव-
 मायन्निकुण अच्चुवगयं राइणा, उट्टिया मंतिणो, साहिओ देवीए एगंतट्टियाए एस वइयो, सहरिसाए कयं तीए
 भोयणं, पमुक्को कोवाडंबरो, वीयदिवसे य लिहियकवडलेहहत्था उद्धूलियजंघा गाढपरिस्समकिलंता उवट्टाविया
 मंतीहिं अपुवपुरिसा, नीया य रायसमीवे, खित्ता तेहिं लेहा, वाइया सयमेव राइणा, विन्नाओ तदत्थो, कवडको-
 वप्फडाडोवपुव्वं च भणिया नियपुरिसा—रेरे पुरिसा ! ताडेह सन्नाहभेरिं, नयरदूरे पइट्टह गुडुरं आयट्टह दिव्वा-
 उहाइं समप्पह जयहत्थि जेण करेमि पत्थाणंति वुत्ते तहत्ति निवत्तियं पुरिसेहिं, इओ य भेरीसहसवणओ संखुद्धं
 सामंतमंडलं पगुणीकया मयगलंतगंडत्थला कुंजरघडा, संवूढा सुहडसत्था, चउद्दिंसिपि पयट्टाईं तुरयघट्टाईं, मिलिया
 सेणाहिवइणो, किं बहुणा ?—हलहलियं सयलं भूमंडलं, ठिओ पत्थाणंमि णरिंदो, एत्थंतरे अविन्नायपरमत्थो पत्था-
 णट्टियमुवलब्भ नराहिवं निग्गओ पुप्फकरंडगुज्जाणाओ विस्सभूई कुमारो समागओ रायसमीवे निवडिओ चलणेसु
 पुट्टो वइयरं, साहिउमारद्धो य नरिंदेण, जहा—वच्छ ! अत्थि पच्चंतसीमालो पुरिससीहो नाम मंडलाहिवो, सो य
 पुव्वं पणयभावं आणावत्तित्तणं पडिवज्जिऊण य संपइ दरिसियतिव्ववियारो निहयसीमागामजणो अम्ह मंडलमइक्क-
 मइ, ता पुत्त ! महंतो एस मे परिभवो । अविय—

सपियपियामहपमुहज्जियं महिं पेच्छिऊण हीरंति । कह सकलंकं जीयं निरत्थयं संपइ वहामो ? ॥ ३९ ॥

श्रीगुणचंद
महावीरच०
३ प्रस्तावः
॥ ३३ ॥

अज्जवि केऽवि सपुरिसा पयंडभुयदंडदलियपडिवक्खा । गिण्हंति परस्स महिं अम्हे न नियंपि रक्खामो ॥ ४० ॥
भग्गुच्छाहं रिउवग्गनंदणं मुक्कचित्तवट्ठं । निवडियसहं च सीमंतिणीओ जणयंति किं पुत्तं ? ॥ ४१ ॥
ता पुत्त ! पत्तकालं अवजसपंकप्पसमणजलकप्पं । जरविहुरंगरसायणमहुणा सरणं रणे मज्झ ॥ ४२ ॥
एवं च रणणा सिट्ठे कोवदट्ठोदुपुडो उट्ठिऊण निवडिओ चरणेसु कुमारो, विन्नविउमाढत्तो य-ताय ! मुंचह
कोवसरंभं, केत्तियमेत्तो सो दुरायारो ?, नहि लीलादलियमत्तमायंगकुंभत्थलो केसरी समोत्थरइ गोमाउयं, निय-
कुलसिलोच्चयसमुच्चसिहरदलणदुल्ललियं निवडइ एरंडकंडे सहस्सनयणकुलिसं, नेव य पडिपुण्णमंडलहरिणंकदि-
णयरकवलणलालसो गिलइ तारयजालं गहकल्लोलो, ता पसीयह विरमह तुम्हे देह ममाएसं अवणेमि तुम्ह
पसाएण तस्स धट्ठसोडीरिमस्स भुयदंडकंडुं, न य अम्हारिसेसु विज्जमाणेसु जुत्तमेयं तायस्स, तुम्ह पयावोच्चिय
साहेइ कजाइं । तहाहि—

पुव्वमहासेलुच्छंगसंगिणो उग्गमे च सूरस्स । दूरदिसिपसरियंपि डु तिमिरं किरणच्चिय हणंति ॥ ४३ ॥
गंभीरगहिरघोसा विवरंमुहवाहिउग्गवइनिवहा । आगयगयाइं रयणायरस्स वेलच्चिय करेइ ॥ ४४ ॥
उब्भडदंडुडामरविलसिरवरपत्तकोसगम्भाइं । हिमगिरिणो कमलाइं हणंति पवणुडुयतुसारा ॥ ४५ ॥

प्रयाणं
कुमार-
विज्ञप्तिश्च.

॥ ३३ ॥

इय भणिण गाढोवरोहेण दिण्णो आपसो राइणा कुमारस्स, पणामपुब्बयं पडिच्छिऊण दवावियं तेण पयाणयं,
चलियं चाउरंगं सेन्नं, कहं चिय?—

गंडत्थलपगलंतुग्गदाणधारंधयारियदियंता । चलकन्नतालवाडियमयगंधायद्वियदुरेहा ॥ ४६ ॥

अइघोरघोसगलगज्जिविहियखीरोयमहणसंकासा । उज्जलताराभरणा गयणाभोगव भासंता ॥ ४७ ॥

कयलीवणकयसोहा गेरुयरसलित्तवियडकुंभयडा । जंगमया कुलसेलव पत्थिया हत्थिणो सिग्घं ॥ ४८ ॥

चलिया य पवणवेगा खरखुरसिहखणियखोणिणो तुरया । फेणुगिरणमिसेणं जसं व कुमारस्स वियरंता ॥ ४९ ॥

करकलियकुंतकोदंडसेलभल्लयसुत्तिक्खकरवाला । सन्नद्धवद्धकवया पयंडभुयदंडवलकलिया ॥ ५० ॥

नियसोंडीरिमवसओ रिउसेन्नं जरतणं व विगणिंता । सपहुप्पसायपरवसहियया जीएऽवि निरवेक्खा ॥ ५१ ॥

पइखणविमुक्कहकारपुक्कारुकरिसतुट्टसन्नाहा । गेहनियत्तियदइया चलिया दप्पुब्भडा सुहडा ॥ ५२ ॥

बहुविहपहरणभरिया रहनिवहा घणघणारवरउहा । सब्बपहेसु पयट्टा पवणुद्धुयधयवडाडोवा ॥ ५३ ॥

इय चातुरंगसेन्नं नरवइवयणेण वड्डियाणंदं । मुणिदाणजायपुन्नं व कुमारपासं समलीणं ॥ ५४ ॥

तओ भंजंतो गिरिसिहराववद्धमहल्लभिल्लपल्लीओ निब्भच्छंतो जणवयविहवणवद्धलक्खं चरडपक्खं अवलोयंतो
नगनगरगाभारामरमणीयं महीमंडलं पडिच्छंतो मग्गे सामंतसमप्पियं विविहालंकारकरितुरयपमुहं पाहुडं पत्तो

श्रीगुणचंद्र
महावीरच०
३ प्रस्तावः

॥ ३४ ॥

विज्झगिरिसमीवं, एगत्थ निवेसिओ खंधावारो, तओ य पहाणवियक्खणपरियणाणुगओ चलिओ कोउहलेण विज्झ-
गिरिमवलोइउं । अंतरे य—

उत्तंगमत्तकुंजरकुलाइं पेच्छइ जहिच्छचाराइं । रेवातडरूढमहलसलईकवलणपराइं ॥ ५५ ॥

निसुणइ पेम्मभरालसजुवईपरिकिन्नकिन्नरावद्धं । करकलियतालकलरवसंचलियं पंचमुग्गारं ॥ ५६ ॥

निज्झरझंकाररवायणणघणघोससंकियमणाणं । तंडवमस्सिक्खियपंडियाण पेक्खइ सिंहंडीणं ॥ ५७ ॥

तयणंतरं च पुरओ पयट्ठो समाणो गायंतं व पवणगुंजियसरेणं हसंतं व विप्फुरियफारफुलिं गुग्गारेहिं पणचं-
तं व समीरपसरियमहलजालाकलावेहिं विलुलियकेसपासं व गयणंगणलंबमाणधूमपडलेण नियइ दारुणं दावानलं,
तं च अइलंधिऊण कमेण पहाणपुरिसं व तुंगायारं सुवंसपडिवद्धं च, नरेसरं व वररयणकोसं जणाणुगयपायच्छायं च,
काऊरिसं व दुट्ठसत्ताहिट्ठियं निट्ठुरसरुवं च, महियाहियं व दुलंधणिज्जं पओहरोवसोहियं च, आरूढो विंझगिरिं ।
तओ चिरं काणणेसु निज्झरेसु विवरेसु दुरारोहसिहरेसु कयलीलीलाहरेसु देवोवभोगुब्भडगंधेसु सिलावट्टएसु विवि-
हमणोहरप्पएसु विहरिऊण परिस्संतो उवविट्ठो एगंभि माहवीलयाहरे । एत्थंतरे पट्ठियमेगेण चारणेण—

विंझो साराणुगओ निब्बं चिय नम्मयाए परियरिओ । सारंगजणियसोहो गयकुलकलहो दयावासो ॥ १ ॥
उच्छूढखमाभारो विबुहपिओ मयणसुंदरसरीरो । एवंविहो तुमं पिव कुमार! किं अब्भहियमेत्थं? ॥ २ ॥ एयमा-

विन्धे-
गमनं.

॥ ३४ ॥

यन्निऊण परितुट्ठो कुमारो, भणियं च—अहो साहु सिलेससारं पढियमेण, ता देह एयस्स दीणारलक्खगं, जं देवो आणवेइत्ति भणिऊण पडिवन्नं भंडागारिण, खणंतरेण गओ नियआवासं । कयं पयाणयं, कमेण य पत्तो पचंत-देसं, तहिं च पेच्छइ पमुइयपक्कीलियं गोमहिसिपसुकरहरासहपउरं धणधणसमिद्धं सुद्धगामागरनगरं नियजण-जाणवयं, विम्हियजणेण य आहूया विसयमहत्तरा सिट्ठिणो य, तंबोलदाणाइवहुमाणपुरस्सरं पुच्छिया य लोयसु-त्थासुत्थवत्तं, तेहिं भणियं—देव ! तुम्ह भुयपंजरंतरनिलीणाणं अम्हाणं को सयन्नो मणसावि असुत्थयं काउं समीहेज्जा ?, न हि जीवियसावेक्खो पंचाणणगंधकेसरकुरलिं तोम्हेज्जा भुयगरायफणफलगमंणिं वा गिणहेज्जत्ति, केवलं एत्ति-यमेव असुत्थं—

जमेत्थ दावियसुद्धायारेहिं पणतरुणीगणेहिं, नयणचावपमुक्ककडक्खियमग्गणेहिं । दिसिदिसिनिइयपह-णिवि पइदिणु पंथियहुं, हीरइ हियउं हयासहि पहि पेक्खंतियहिं ॥ १ ॥ विसयदोसदुहसंचयकहणपरायणहं, धम्ममग्गु देसंतह पइदिणु सुणिजणहं । भोगुवभोगु जहिच्छइ गिहिं निवसंतएहिं, अम्हेहिं करणु न लब्भहिं भवभयसंकियहिं ॥ २ ॥

इय निसुणिऊण कुमरेण दरवियसियकबोलं हसिऊण सुचिरं पसंसिऊण य तवयणविन्नासं दवावियतंबोला वि-सज्जिया सिट्ठिणो विसयप्पहाणा य, तयणंतरं दूयवयणेण भणाविओ पुरिससिंघो, जहा-कुमारो तुह दंसणुस्सुओ

श्रीगुणचंद
महावीरच०
३ प्रस्तावः

३५ ॥

वट्टइत्ति, एयमायन्निऊण य पुरिससिंघनरवइणा कुमारस्स आणयणनिमित्तं पेसिया नियपहाणपुरिसा, तदणुरोहेण समागओ कुमारो, पवेमिओ नगरंमि परमविभूईए पुरिससीहेण, काराविओ भोयणं, समप्पिया करितुरयसंदणा, उवणीयमण्णंपि पभूयं दविणजायं, विन्नत्तो य भालतलघडियकरसंपुडेण तेण-कुमार ! गाढमणुग्गहिओम्हि तुमए जं नियचरणकमलेहिं पविच्चीकयं मह भवणं, ता कइवयदिणाइं पडिवालेह एत्थेव, पुणोऽवि दुलहं तुम्हेहिं सह दंसणंति भणिए वुत्तो कुमारेण-भो नरिंद ! अपुवो तुह पेम्मपयंचसारो पियालावो अणणविणयववहारो अच्छेरयभूया पडिवच्ची मणसावि अचित्तिणिज्जं सज्जणत्तणं, ता एरिस तुह गुणगणेण गाढमारिसियं मम खणद्धेणवि चित्तं, जइ पुण कइवय वात्तराणि तुमए सद्धिं वसामि नूणं न पइ परवसस्स नियचित्तस्स हवामि, सच्चं च इमं पट्ठिज्जइ-“अत एव हि नेच्छन्ति, साधवः सत्समागमम् । यद्वियोगासिलूनस्य, मनसो नास्ति भैषजम् ॥ १ ॥” ताऽणुजाणेसि मं गमणाएत्ति वुत्ते दुस्सहतव्विओगसोगदूमियमणोऽसुधरं हयभयरहसमग्गसामग्गीए अणुगच्छिऊण कुमारं वलिओ पुरिससीहो, कुमारोऽवि अक्खंडपयाणगेहिं चलिओ रायगिहनगराभिमुहं । इओ य विस्सनंदिणा नरिंदेण सो नियपुत्तो विसाहनंदी भणिओ—

वच्छ ! जहिच्छं वणलच्छिपेच्छणं कुण मयच्छिमज्झगओ । परिसंकं सकस्सवि अवहंतो एत्थ उज्जाणे ॥ १ ॥
एवमायन्निऊण विसाहनंदी कुमारो वड्डियाणंदसंदोहो पमुक्कनीसेसवाधारंतरो अंतेउरसमेओ विचित्तकीलाहिं

पुरुषसिंहा-
भ्यागतिः।

॥ ३५ ॥

उज्जाणे संटिओ कीलइत्ति । सो य विस्सभूई अणवरयमागच्छंतो संपत्तो रायगिहे, नियनियठाणे पेसियसामंतसे-
णावइपसुहपरियरो गाढाणुरागेण य चिरदंसणुकंठिओ पुव्वप्पवाहेण पुप्फकरंडगुज्जाणे पविसिउमादत्तो, भणिओ य
दुवारदेसट्टिएण पडिहारेण—कुमार ! न जुत्तं तुम्ह एत्थ पविसिउं, जेण विसाहनंदी अंतैउरसहिओ इह पविट्ठो
कीलइ, विस्सभूइकुमारेण भणियं—भइ ! कइया पविट्ठो ?, तेण भणियं—तुम्ह गमणाणंतरमेव, एवमायन्निऊण समु-
प्पन्नतिवकोवभरारुणनयणो णिडालतडघडियभिउडिभासुरियवयणो तक्कालुच्छलियसेयविंदुजलजडिलियसरीरो कु-
मारो एवं चित्तिउमारद्वो—

पच्चंतकुद्धनरवइवइयरववएसओ धुवं पुव्विं । उज्जाणाओ इमाओ नियवुद्धीए नीणिओ रत्ता ॥ १ ॥

जेण सयं चिय दिट्ठो सो देसो सुत्थगामपुरगोद्वो । परचक्कचोरअभिमरभयरहिओ धणकणसमिद्धो ॥ २ ॥

ता नूणं नियपुत्तस्स कीलणट्ठं इमंमि उज्जाणे । अवजसपरिहरणत्थं कवडमिमं विरइयं सव्वं ॥ ३ ॥

बाढं अजुत्तभेयं आयरियं निच्छियं नरिदेण । न हि विस्सासपरव्वसहिययंमि जणे घडइ माया ॥ ४ ॥

एवं खणं निग्गमिऊण तेण समुप्पन्नससहिगकोवाइरेगेण तज्जिया विसाहनंदिपुरिसा—रे रे दुराया! मए अप-
रिचत्तेऽपि उज्जाणे केण तुम्हे पवेसिया ? को वा तुम्ह पुरिसायारो ? कहं वा अविण्णायपरक्कमा एत्थ सच्छंदमभिरमह ?
मए निहयाणं कत्तो वा तुम्ह परित्ताणंति भणिऊण दुव्विसहाभिमाणपरव्वसयाए नियवलदंसणत्थं पद्वओ निट्ठुरमु-

श्रीगुणचंद
महावीरच०
३ प्रस्तावः

॥ ३६ ॥

द्विपहारेण फलभरणयसाहो पकिट्टो कचिट्टपायवो, तदभिघाएण य कुलसेलताडियं व थरहरियं मेइणीवट्टं तुट्ट-
निविडबंधणाइं निविडियाइं सयरुफलाइं दंसियाणि य विसाहनंदिपुरिसाणं, सगच्चं भणिया य-रे रे पुरिसाहमा!
जह एयाणि पाडियाणि तहा पाडेमि तुम्ह मुंडाणि, अवणेमि दुविणयसीलयं, विहाडेमि उज्जाणरमणकोऊहलं,
केवलं लज्जेमि तायस्स वीहेमि नियकुलकलंकस्स विचिकिच्छेमि लोयाववायस्सत्ति भणिऊण उवसंततिव्वकोहावेगो
संवेगमग्गमुवगओ एवं चित्तिउमाढत्तो-

विसयपरव्वसहियया हीलं किं किं जणा न पेच्छंति । कथं व न दुकरंमिवि ववसाए संपयट्ठंति ? ॥ १ ॥

को वा न आवयावत्तवट्ठिया तिक्खदुक्खरिंछोली । दंभोलिनिविसेसा अतक्किया निवडइ सिरंमि ॥ २ ॥

तुच्छोवि विबुहजणनिंदिओऽवि को वा विमुक्कमज्जाओ । न करेज्जा दुव्विणयं विसयपसत्ताण सत्ताणं ॥ ३ ॥

विसयाणं पुण निधिग्घकारणं निच्छयं मयच्छीओ । विहिणा पावेण विणिम्मियाउ नणु केण कज्जेणं ? ॥ ४ ॥

नूणं न दुग्गदुग्गइयडणदुहाइं कयावि सुमिणेऽवि । पेच्छेज्जा मणुयजणो जइ जुवइपरंमुहो होज्जा ॥ ५ ॥

पासव्व करिवराणं हरिणाण व वागुरा विसमबंधो । पंजरमिव विहगाणं पईवकलियव्व सलभाणं ॥ ६ ॥

मीणाणं जालंपिव जणाण सेच्छापयारसुहियाणं । अहह विसमं महंतं महिलाजंतं कयं विहिणा ॥ ७ ॥

अविय-नवमालइपरिमलमंसलोवि नवसुरहिक्कुसुमवरगंधो । किं कुणइ तेसि जेसिं मणंमि नो वसइ हरिणच्छी ॥ ८ ॥

विश्वभूते-
वैराग्यम्.

॥ ३६ ॥

अइरेगुदीवियवम्महोऽवि निम्महियसयललोओऽवि । जुवईविरत्तचित्तं नो चालइ मलयपवणोऽवि ॥ ९ ॥
 सरयनिसायरकिरणज्जलावि नो कोमुई मणागंपि । दावेज्ज वियारं पंचवाणबलदलणधीराणं ॥ १० ॥
 जोव्वणतिमिरच्छाड्यविवेयनयणो पुरा गिहे वसिओ । अहह कहं दुट्ठमई निरत्थयं एत्तियं कालं ? ॥ ११ ॥
 अहवा किमइकंतत्थसोयणेणं निरत्थणं मे । अज्जवि किंपि न नट्टं करेमि सद्धम्मकम्ममहं ॥ १२ ॥

एवं च गरुयसंवेगावन्नमाणसो सव्वहा पवड्डमाणविसयविरागो निच्छियसंसारासारत्तो गओ संभूइसूरिस्स पासे, जो य केरिसो ?—

अइपसत्थगुणरयणसायरो, तेयरासिना वइ दिवायरो । सोमयाए संपुन्नचंदओ, जो विसुद्धसुहवेल्लिकंदओ ॥ १ ॥
 मेरुसेलसिहरव निच्चलो, संधकज्जभरवहणपच्चलो । सुरनरिंदपणिवयसासणो, दुट्ठकामतमपडलणासणो ॥ २ ॥
 तवऽग्गिदड्डपावओ विसुद्धभावभावओ, सया तिगुत्तिगुत्तओ पसत्थलेसजुत्तओ ।
 पयंडदंडवज्जिओ जिणिंदमग्गरंजिओ, पणट्ठमाणकोहओ विणीयमायमोहओ ॥ ३ ॥
 जणाण बोहकारओ कुत्तिथिदप्पदारओ, अपुव्वकप्परुक्खओ पणट्ठसत्तुपक्खओ ।
 मुणिंदविंदवंदिओ असेसलोयनंदिओ, अणेगळिन्नसंसओ पणट्ठसव्वदोसओ ॥ ४ ॥
 तस्स एवंविहस्स गुरुणो पलोयणेण समत्थत्तिथदंसणपुयपावं पिवऽप्पणं मण्णमाणो सव्वायरेण पणमिऊण

श्रीगुणचंद
महावीरच०
३ प्रस्तावः

॥ ३७ ॥

चरणकमलं उचविद्धो सन्निहियभूमिभागे, गुरुणाऽवि पारद्धा महुमहणापूरियपंचयणरवाणुकारिणा सरेण धम्मदे-
सणा । जहा—

संसाररुंदरंगे सइलूसेहिं व चित्तरुवेहिं । सो नत्थि किर पएसो जीवेहिं न नच्चियं जत्थ ॥ १ ॥
चउगइजलपडलाउलभवणवेऽणेगसो करंतेहिं । दुहिएहिं मज्जणुम्मज्जणाइं कुम्मेहि व कहिंपि ॥ २ ॥
आरियखेत्तुप्पत्ती नो पाविज्जइ पभूयकालेऽवि । तीएवि हु पत्ताए कहिंचि कम्मक्खओवसमा ॥ ३ ॥
धम्मत्यकामसाहणकारणमेगंतियं न मणुयत्तं । पावंति पावविहया भममाणा विविहजोणीसु ॥ ४ ॥
लद्धेऽवि तत्थ जरकाससासकंदूपमोक्खदुक्खेहिं । निहयाण धम्मकम्मुज्जमोऽवि दूरेण वच्चेज्जा ॥ ५ ॥
नीरोगत्ते पत्तेऽवि रुद्धारिद्विहुयसरीरा । उदरभरणत्थवाउलचित्ता वोळित्ति नियजीवं ॥ ६ ॥
इस्सरिएऽविहु बहुदविणवद्धणारद्धविविहवावारा । लोभेण भोयणंपिहु काउं न तरंति वेलाए ॥ ७ ॥
संतोसेणवि मिच्छत्तपंकपसरेण मइलमइविभवा । सव्वण्णुमयं सम्मं सुयंति नेवावबुज्झंति ॥ ८ ॥
सव्वण्णुधम्मवोहे जाएऽवि हु कम्मपरिणइवसेणं । नीसेसगुणावासो गुरुवि न कहिंपि संपडइ ॥ ९ ॥
लद्धेऽवि गुरुमि समत्थवत्थुवित्थारपयडणपईवे । सिद्धिपुरपरमपयवी न पयट्ठइ तहवि विरइमई ॥ १० ॥
तीएवि तिक्खबहुदुक्खलक्खनिरवेक्खकारणं पावो । पसरंतो न पमाओ खलिउं तीरेइ वणकरिब ॥ ११ ॥

संभूतिधरे-
रूपदेशः।

॥ ३७ ॥

इय उत्तरोत्तरमहप्पबंधहेउप्पसाहणिज्जंमि । मोक्ससुहे धण्णाणं केसिं पि मणो समुल्लसइ ॥ १२ ॥
 अन्नेसिं एवंविहसमग्गसामग्गिसंभवेऽवि मई । उप्पज्जइ संसारियसुहेसु विरसावसानेसु ॥ १३ ॥
 को वाऽविहु सलहेज्जा को वा नामं पि तेसिं गिण्हेज्जा । जे भोगामिसगिद्धा रमंति इह सारमेयव ॥ १४ ॥
 अविय-जोव्वणपडलच्छाइयविवेयनयणा मुणंति तरुणीण । केसेसुं कुडिलत्तं न उणो तासिं चिय मणंमि ॥ १५ ॥
 बहुहारावुद्दामं उब्भडनासं सुदीहरच्छं च । पवियंभियसत्तिलयं नियंति वयणं न उण नरयं ॥ १६ ॥
 परिणाहसालिवित्तं सि धि(थ)णेसुं न धम्मबुद्धिसु नियंति । पेहंति तणुयमुयरं साणंदा न उण नियआउं ॥ १७ ॥
 सुरमणुयगईपरिहंपि सुंदरं भुयजुयं पसंसंति । जंघोरुजुयं अइअसुइयंपि उवमिति रंभाए ॥ १८ ॥
 इय भो देवाणुप्पिय ! विप्पियहेउंपि जुवइजणदेहं । मणमोहणवम्महचुण्णपुण्णचित्ता अभिलसंति ॥ १९ ॥
 तेचिय पमाणमवलंविऊण भोगेसु को पयट्टेज्जा ? । कुपहपवण्णो किं होज्ज कोइ कुसलाणुसरणिज्जो ? ॥ २० ॥
 नवजोव्वणोऽवि निप्पडिसरूवकलिओऽवि लच्छिनिलओऽवि । पवरविलासीवि तुमं भद्द ! धुवं धम्मजोग्गोऽसि २१
 तेणेवंविहपवरोवएसरयणाइं तुज्झ दिज्जंति । न कयावि पुण्णरहिया चिंतामणिलाभमरिहंति ॥ २२ ॥
 इय भणियंमि गुरुहिं समहिगसंजायधम्मपरिणामो । भत्तिभरनिब्भरंगो कुमरो भणिउं समाढत्तो ॥ २३ ॥
 भयवं ! सव्वमसेसं कहियं तुम्हेहि सिवसुहकएणं । ता सम्मं पव्वज्जं निरवज्जं देहमह इण्हि ॥ २४ ॥

श्रीगुणचंद
महावीरच०
३ प्रस्तावः

॥ ३८ ॥

एवं च भणिए सो गुरुणा समुज्झियरयणाभरणो अंगीकयगुरुचरणसरणो सिद्धंतभणियविहाणेण गाहिओ जिणिंददिकखं सिक्खविओ पइदिणं कायव्वकलावं जाणाविओ सिवसुहनिबंघणं संजमधणं पाढिओ सामाइयप-
मुहं सुत्तंति । इओ य कुमारपव्वज्जासवणवज्जासणिताडणुप्पण्णपरमसोगो अंतोउरसमेओ समं जुवराएण समागओ विस्सनंदी, सविणयं सूरिं वंदिऊण पणमिओ अणेण विस्सभूई साहू, भणिओ य सोपालंभं सप्पणयं च एसो-पुत्त !
किं जुत्तमेयं पवरकुलुप्पन्नाणं तुम्हारिसाणं ? अनिवेइऊण नियवुत्तंतं जमेवंविहं दुक्करं साहुकिरियं पडिवण्णोऽसि, ता वच्छ ! साहेसु को तुज्झ चित्तनिव्वेयहेऊ ? किं वा अरुह दूसणं पडिवण्णो ? केण वा तुम्ह वयणं पडिकूलियं ?, कि-
मेवं एकपएच्चिय अदक्खिणत्तणमभुवगओऽसि ? हवउ वा सेसजंपणेण, तुमं विणा कस्सेयारिणं अम्हे सकज्जं सा-
हिमो ? विसमावयानिवडिथाणं को वा आलंबणं ?, ता सव्वहा अज्जवि परिच्चयसु पव्वज्जं पडिवज्जसु रज्जं कीलेसु
जहिच्छं पुप्फकरंडगुज्जाणे मा पूरेसु सत्तुमणोरहे मा अणाहीकरेसु बालकमलिणीवणं व सस्सिरीयं बहुजणं मा उवे-
क्खेसु पुव्वपुरिसरक्खियं नियजणवयं मा पडिवज्जसु गाढगंठिनिट्ठुरहिययत्तणंति ।

तो विस्सभूइमुणिणा पसमपहाणं पयंपियं एयं । भो मुंचह संतावं कुणह जहावंछियं कज्जं ॥ १ ॥
नो किंचिवि वयणिज्जं इहऽत्थि सव्वेऽवि निययकज्जेसु । उज्जमह सेसचागेण जेण लोगेऽवि पयडमिमं ॥ २ ॥
सयणाइसिणेहविमोहिएहिं कीरंति जाइं पावाइं । दुग्गइगयाण ताइं कडुयविवागं फलं देति ॥ ३ ॥

विश्वभूति-
दीक्षा.

॥ ३८ ॥

न य बहुमुवयरिओऽविह विहरे थेवंपि कुणइ साहारं । सयणजणो मोत्तूणं एकं जिणदेसियं धम्मं ॥ ४ ॥
 इय भणिए नियदुच्चरियपेहणुप्पण्णगाढसंतावो । काऊण पायपडणं जहाऽऽगयं पडिगओ राया ॥ ५ ॥
 विस्सभूई सम्ममहिगयसाहुधम्मो गुरुचरणसुस्सुसापरो दूरुज्झियसुहिसयणसंथवो जीवियमरणनिरवेक्खो
 पांचिंदियदित्तसत्तुविजयपरो बहं कालं गुरुकुलं पज्जुवासेइ । अण्णया य सम्मं समहिगयसुत्तत्थो विसेसेण विहियम-
 णपरिकम्मो जोगोत्ति कलिऊण गुरुणाऽणुण्णाओ समाणो एगलविहारित्तणं पडिवज्जिऊग छट्ठमाइ निट्ठुरं तवो-
 कम्मं कुणमाणो सम्मं परीसहचमूं अहियासेज्जमाणो वीयरागोव्व गामनगरागराइसु अममाएंतो पइक्खणं वीरास-
 णुक्कुडयासणाइं कुणमाणो पइदिणं सूराभिमुहं आयावित्तो नियजीवियब्भहियं पाणिगणं रक्खित्तो वायालीसदो-
 सविमुद्धविरसाहारगहणेण संजमसरीरमणुपालेंतो गामाणुगामं विहरेंतो समागओ सुरिंदपुरिविब्भमाए मडुराए नय-
 रीए, ठिओ थिपसुपंडगविवज्जिए उक्किट्ठतवनिरयमुणिजणसंगए एगंतदेसे, तहिं च निवसंतो एगया परमसंवेग-
 गयमाणसो नियजीवियनियमणत्थं चिंतिउमारद्धो । जहा—

एसोऽभिकंखइ सुहाइं जिओ दुहाइं, दूरेण मोत्तुमभिवंछइ तुच्छबुद्धी ।
 एवं न जाणइ जहा न क्हिंपि धम्मसंबंधसिद्धिविरहेण भवन्ति ताइं ॥ १ ॥
 भोगे समीहइ करेइ रइं कहासु, देसित्थिपत्थिवसुभोयणसंगयासु ।

श्रीगुणचंद
महावीरच०
३ प्रस्तावः

॥ ३९ ॥

सीउण्हदंसमसगाइ परीसहे य, सम्मं तितिक्खइ न मूढमई पमाया ॥ २ ॥

सत्तू वरं निसियधारकरालकालकंतिच्छडालकरवालकरो सुकुद्धो ।

घायत्यमुज्जुयमई वरमुग्गभोगभोगीसरो डसिउमुद्धमरो रुणच्छो ॥ ३ ॥

उहंडमारुयपईवियदीहजालामालाउलो य जलणो वरसंगलगो ।

नीसेसदोसनिलओ न खणंपि नूणं, जुत्तो न गंतुमहमो हि इमो पमाओ ॥ ४ ॥

एए हि सत्तुपमुहा मणुयाण दिंति, तिब्बावि एगभवगोयरमेव मञ्जुं ।

एसो पईभयसुदुस्सहतिक्खदुक्खलक्खक्खणी तदहिगं परिवज्जणिज्जो ॥ ५ ॥

वज्जणमेयस्स पुणो आहारचागओ घडइ सम्मं । ता सव्वहेव जुत्तं मम काउं उग्गतवचरणं ॥ ६ ॥

इह संपहारिऊण य समारद्धं तेण मासखमणं, कओ विसेसेसुज्जमो समादत्तो पइदिणं ज्ञाणप्पबंधो निरुद्धो मणप्पसरो, एवं च कमेण पडिपुण्णे मासक्खमणे पडिलेहियभंडोवगरणो अतुरियं अचवलं जुगमेत्तनिहित्तचक्खुपसरो सुत्तत्थपोरिसिपज्जंतकाले चलिओ भिक्खानिमित्तं उच्चावयगिहेसु गोयरचरियाए, परिभममाणो उग्गमउप्पायणादोसे सम्मं निरुवेमाणो लाभालाभेसुवि अरत्तदुट्ठो पगिट्ठतवाणुट्ठाणकरिसियसरीरत्तणेण य तणंपिव पवणेणावि पकंपमाणो परिसोसियमंससोणियत्तणेण य पयडसिराजालावणद्धऽट्ठिपंजरो धवलपाडिवयमयलंछणो इव कलावसेसो तं रायम-

विश्वभूति-
वैराग्य
तपःकर्म.

॥ ३९ ॥

ग्गमोगाढो जत्थ सो विसाहनंदीकुमारो पिउच्छाए रण्णो अग्गमहिंसीए धूयापरिणयणत्थं पुव्वमावासिओ चिट्ठइत्ति । अहं तं मुणिं दट्ठूण जायपच्चभिण्णाणेहिं पुरिसेहिं भणिओ विसाहनंदी कुमारो, जहा-सामी ! मुणह तुम्हे एवं पवइ-यगं ?, सो भणइ-सम्मं न जाणामि, तेहिं भणियं-कुमार ! एसो सो विस्सभूई कुमारो जो पुर्विं पवइओ, तं लक्खिऊण जाओ तस्स पुव्वामरिसेण कोवोत्ति, एत्थंतरे सो तवस्सी तंमि पएसे वच्चमाणो इरियासमिईवक्खित्तचित्तत्तणेण अत-क्कियमेव पणोल्लिओ अहिणवपसूयाए गावीए, पडिओ य निसट्ठो धरणीए, ताहे तेसिं विसाहनंदिपमुहपुरिसेहिं दट्ठूण तं तहानिवडियं संजायगाढहरिसेहिं कओ सिंहनाओ अप्फोडिया तिवई दिन्नाओ तालाओ पारद्धो कलयलो, भ-णियं च महया सहेण-भो भो कत्थ गयं तमियाणिं कविट्ठफलपाडणवलं जेण गोमेत्तेण विनिवाडिओऽसि ?, इमं च निसामिऊण वलियकंधरो विस्सभूई जाव विप्फारियलोयणो अमरिसेण पलोएइ ताव दिट्ठा विसाहनंदिमुपहा पच्च-भिण्णाया य, तयणंतरं च पलीणो से उवसमपरिणामो ववगओ विवेओ समुच्छलिओ महाकोयो समुल्लसियं वीरियं, धाविऊण य सा गहिया सिंगेसु गावी पडाइयव भमाडिथा सीसोवरिं पक्खित्ताय धरणीए, भणिया य ते, जहा--रे रे दुरायारा ! दुरुम्मुक्कपरक्कमा हीणा सव्वसो य विरहिया मं उवहसह, न मुणह जहा दुव्वलस्सऽवि पंचाणणस्स सिगा-लसहस्सेहिवि न लंघिज्जइ परक्कमो, सुलहुयस्सवि विहंगरायस्स न तीरइ सोढुं सुयंगमेहिं चडुलचंचुप्पहारो, तहा—जइविहु निट्ठुरतवक्कम्मकिसियकाओ वियाणिओऽहमिह । तहवि न रे ! तुम्हाणं लक्खेणवि अत्थि मम गणणा ॥ १ ॥

श्रीगुणचंद
महावीरच०
३ प्रस्तावः
॥ ४० ॥

रे पिसियपोसिया विउसदूसिया किं परेण भणिएण ? । अच्छिपडियावि तुम्हे न कुणह मे किंपि परियावं ॥ २ ॥
निब्भच्छिऊण एवं साहिकखेवं सुतिक्खवयणेहिं । गंतूण य नियठाणं साहू चित्तेउमाढत्तो ॥ ३ ॥
अज्जवि न मणागंपिवि पुवाणुसयं चयंति मइ एए । पवज्जोवगयंमिवि निक्कारणवइरिणो पावा ॥ ४ ॥
अहवा एयाणं वालिसाणं किं एत्थ दूसणं ? जेण । पुवायरियाण सुहासुहाण एसो दसावागो ॥ ५ ॥
ता तह करेमि संपइ परभवपत्तो जहा य सुमिणेवि । एवंविहअवमाणट्ठाणं नो कहिंपि पेच्छामि ॥ ६ ॥
इय कयसंकप्पो सो अविभावियसमयसत्थपरमत्थो । अविचित्तिउत्तरोत्तरसंसारवडणदुहनिवहो ॥ ७ ॥
भत्तं पच्चक्खाउं नियाणवंधं च काउमुज्जुत्तो । पच्चासण्णमुणीणवि समक्खमेवं पजंपेइ ॥ ८ ॥
जइ ताव ममं दुक्करतवस्स छट्ठट्ठमाइरुवस्स । सज्झायझाणसहियस्सिमस्स सव्वायरकयस्स ॥ ९ ॥
वायालीसेसणदोसरहियसुहुंछभोयणस्सऽविय । सुत्तत्थतत्तचित्तण[पर]गुरुजणविणयाणुचरणस्स ॥ १० ॥
पंचमहव्वयधरणस्स वावि फलमउलमत्थि नणु किंपि । अतुलियवलकलिओऽहं ता होज्जा अण्णजम्मंमि ॥ ११ ॥
एवं च नियमिऊणं ठिओ सुद्धसिलायले, निसामियनियानवंधा य समागया इयरसमीववत्तिणो तवस्सिणो,
भणिओ य सबहुमाणं तेहिं-भो महाणुभाव ! सयंचिय मुणियजुत्ताजुत्तस्स नत्थि जइवि तुह किंपि कहणिज्जं त-
हावि एयं निवेइज्जइ-जेण न लोहकीलियानिमित्तेण कोऽवि कुणइ देवउलपलीवणं, न वा कोडिप्पमाणरयणरा-

विश्वनन्दि-
हास्यं नि-
दानं च.

॥ ४० ॥

सिणा किणिज्जइ कागिणी नेव य गोसीसचंदणागरुपमुहसारदारूणि दहिऊण कीरंति इंगाला, न य एवंविहनिक्कलं-
कसुचिरचरियविहितवेहिं किंपागफलं पिव पज्जंतदारुणो काउं जुज्जइ नियाणबंधो, अण्णं च—

किं पवणगुंजिएहिं कंपिज्जइ मंदरो रउदेहिं । दुज्जणवयणेहिं मणो किं वा पक्खुहइ साहूणं ? ॥ १ ॥

चिरकालुव्वूढं किं मज्जायमइकमंति जलनिहिणो । हरिणंकदिणयरा किं तिभिरप्पसरेहिं रुज्झंति ॥ २ ॥

निम्नलगुणरयणमहानिहाण ! तुम्हारिसावि सप्पुरिसा । ववसंति एरिसं जइ धम्मसिरी ता कमल्लियउ ? ॥ ३ ॥

कत्थ व वच्चउ विणओ ? वोढुं को वा खमो खमभियाणिं ? भग्गनिवासो गच्छउ कत्थ वराओ विवेओऽवि ? ॥ ४ ॥

एमाइविविहवयणेहिं भासिओ जा न देइ पडिवयणं । नियनियठाणेसु गया ताव मुणिंदा निराणंदा ॥ ५ ॥

विस्सभूइवि अविचलियणियाणबंधज्झवसाओ अणालोइयपडिकंतो कालमासे कालं किच्चा उक्कोसट्ठितीओ
महासुके देवलोगे देवो समुप्पण्णो, तत्तो उच्चट्ठित्ता जहा वासुदेवो होही जहा य से पिया पयावइत्ति भविही तहा
एत्तो कहिज्जइ ।

इहेव जंबुदीवे दीवे भारहे वासे पोयणपुरंमि नयरे जहत्थाभिहाणो रिउपडिसत्तू नाम राया, तस्स य सयल
अंतेउरपहाणा भदा नाम अग्गमहिसी, तीसे चउमहासुमिणपिसुणिगावयारो अयलो नाम पुत्तो, अच्चंतमहावलो
विस्सुओ य, एगया य तीसे देवीए पाउब्भूओ गम्भो, जाया य कालेण सव्वलक्खणपडिपुण्णसरीरा कण्णगा,

श्रीगुणचंद्र
महावीरच०
३ प्रस्तावः

॥ ४१ ॥

कथं च उच्यसमए मिगावइत्ति से नामं, कमेण य निरुवमारूढजोवणगुणा एवं सोहिउं पवत्ता—
 कसिणसुसिणिद्धकुंचिरचिदुरचओ तीए उत्तमंगंमि । वयणेंदुविब्भमागयविडप्पसोहं समुव्वहइ ॥ १ ॥
 भालतलेऽवि लुलंती अतिकुडिला चिदुरवल्लरी तीसे । रेहइ वम्महरणो विजयपसत्थिअ आलिहिया ॥ २ ॥
 सरलेहिं लोयणेहिं तीए कवोलेहिं चंदकंतेहिं । अहरेण पउमरागेण रयणट्ठाणं व सहइ मुहं ॥ ३ ॥
 संखो इव रेहावलयलंछियं कंठकंदलं विमलं । संठियविचित्तमणिलट्ठगंठियं सोहए तीए ॥ ४ ॥
 कंदप्पनरिंदनिवासविब्भमे तीए थोरथणवट्ठे । हारो पडिहारतुलं आलंबइ लंवमाणो सो ॥ ५ ॥
 रंभाभिरामपीवरमूरुजुयं कणयकमलकंतिहं । थंभजुयलं व छज्जइ विसयमहासोक्खभवणस्स ॥ ६ ॥
 वहलालत्तयरसर्पिंजरं व मणिकुट्टिमंमि संकंतं । कमलोवहारसोहं चलणजुयं दावए तीसे ॥ ७ ॥
 एवंविहा य वरजोगत्तिकाऊण सा सव्वालंकारविभूसियसरीरा भद्दाए पेसिया पिउणो पायवंदणत्थं, गया
 चेडीचक्कवालपरिवुडा निवडिया नरिंदचलणेसु पेच्छिया संभमभरियच्छिणा सव्वायरं रण्णा पणयालावपुरस्सरं च
 आरोविऊण तमुच्छंगे रूवेण जोव्वणगुणेण य वाढमक्खित्तचित्तो विचित्तिउमाढत्तो—अहो मुरसुंदरीरूवाइसयपराभव-
 करं रूवं अहो सव्वावयवसुंदरं लायणं अहो सरयचंदचंदिमानिम्मलं कंतिपडलं, अहो वेणुवीणाविज्जणी वाणी,
 सव्वहा भुयणच्छेरयभूयमिमीए किंपि विलसियं, नूणं पुवं एरिसं न निम्मियं खत्तियकुले कन्नगारयणं परमेसरेण

प्रजापति-
स्वरूपम्.

॥ ४१ ॥

विहिणा, तेणं चिय मयरद्धएण परिगहिया रई तिसूलपाणिणाऽवि परिणीया पव्वयसुया महुमहेणवि मंदरुम्महिय-
खीरजलहिसमुद्धिया जलमाणुसी पणइणी कया पुरंदरेणावि पुलोममुणिकन्नगा उव्वूढत्ति, अहो अहं नमो मज्झं
जस्स अंतेउरे रयणायेरेव्व एरिसं कण्णमारयणं समुप्पणंति ।

अह कोमलुच्छुचावोऽवि वम्महो पंचकुसुम विसिहोऽवि । वज्झधणुलोहनिट्टुरसहस्सवाणो व विप्फुरिओ ॥ १ ॥

जत्तो जत्तो सा धवलपम्हले लोयणे परिक्षिबइ । तत्तो तत्तो सोऽविहु निसियं सरधोरणिं मुयइ ॥ २ ॥

अत्थाणजणोऽविहु वम्महेण संताविओ हु पासेण । रिउपडिसत्तू राया तदेगचित्तो विसेसेण ॥ ३ ॥

एवं च मयणसरप्पहारविहुरियमाणसो सो नरिंदो परिभाविउं पवत्तो—अहो एसा इयाणिं वरजोग्गा वट्टइ
ता किं कायव्वं ?, किमेरिसरूवाइसया कण्णगा परस्स दाऊण सगिहाओ निस्सारिज्जइ-?, सव्वहा न जुत्त-
मेयं, जइविहु जणो अविसेसेण कण्णमाणं अण्णप्पयाणेण पउत्तो तहावि गडुरिकापवाहो एसो नालं वगट्ठाणं सुबु-
द्धीणंति कयनिच्छओ अणवेक्खिउं गरुयमाचंदकालियं लोयाववायं अविमंसिऊण चिरप्परूढं नायमग्गमनिग्गहि-
ऊण मयणवेयणं अप्पणा चेव तं परिणेउकामो कहकहवि आगारसंवरं काऊण धूयमंतेउरं विसज्जेइ, वोयदियहे
वाहराविऊण सेट्ठिसत्थवाहपमुहं नयरमहाजणं सामंतसेणावइवग्गं च सुहासणत्थं सवहुमाणं भणइ—भो भो
पहाणलोया ! तुम्हे कुलववत्थाणं जुत्ताजुत्ताणं नयाणं संसयत्थाणं लोयधामववहाराणं परूवगा निच्छयकारगा य,

श्रीगुणचंद
महावीरच०
३ प्रस्तावः

॥ ४२ ॥

अम्हाणंपि सब्बत्थेसु पुरावि पुच्छणिज्जा, ता संपयं साहेह जमेत्थ विसए रयणमुप्पज्जइ तस्स को सामी ?, अविण्णा-
यपरमत्थेहिं तेहिं भणियं—देव ! किमेत्थ पुच्छणिज्जं ?, तुम्हेच्चिय सामिणोत्तिवुत्ते तिक्खुत्ते एयमेव वयणं भणावि-
ऊण नरवइणा उवट्ठाविया साऽवि य कन्नगा, भणिया य ते—अहो धूया एसा मम अंतेउरे रयणभूया पाउब्भूया
अओ तुम्हाणुण्णाओ अहमेयं सयं परिणेउं वंछामि, अणइक्कमणिज्जं खु तुम्ह वयणं अम्हाणंति, एवं भणिए लज्जाव-
सवलंतकंधरा अवरोप्परमुहमवलोयमाणा ओहयमणसंकप्पा अपरिभाविद्यवयणविसट्ठमाणचित्तपीडा गया नियनियठा-
णेसु पुरजणपमुक्खा, सा कण्णया अवरवासरे वारिज्जमाणेणऽवि भद्दाए देवीए पडिखलिज्जमाणेणऽवि कुलमहत्तरएहिं
उवहसिज्जमाणेणवि नम्मसचिवेहिं सोवालंभं वज्जिज्जमाणेणवि मंतीहिं दुहविवागमणुसासिज्जमाणेणवि धम्मगुरूहिं अ-
णुसरियविंझेण करेणुयइ(ण)व अणिवारियपसरेण गंधवविवाहेण परिणीया सा नरिंदेण, ठविया अग्गमहिंसीपए, तीसे
सद्धिं विसयसुहमणुमुंजइत्ति । सा य भद्दा देवी दट्ठूण तारिसं जणनिंदणिज्जं उभयलोयविरुद्धं तियचउक्कवच्चरेसु जणह-
सणिज्जं रण्णो वइयरं संजायगाढचित्तसंतावा अयलेण पुत्तेण समं महया रिद्धिवित्थरेणं पहाणजणसमेया गया दक्खि-
णावहं, तत्थ य पसत्थभूमिभागे निवेसिया नयरी निम्मियाइं धवलहराइं ठवियाइं सुरागाराइं कारावियाइं पाया-
रगोउराइंति, सा य पुरी महंतीए ईसरीए कारियत्ति माहेसरित्ति गुणनिप्फण्णनामेण देसंतरेसु पसिद्धिं गया ।
तत्थ य अयलो कुमारो भद्दादेविं मोत्तूण पिउपासमागओ, एवं च काले वच्चंतंमि लोणेणं तस्स राइणो सधूया-

पुत्री-
कामिता.

॥ ४२ ॥

कामित्तणेण पयावइत्ति नामं कयं । अणया य सो विस्सभूई महासुक्कदेवलोयाओ चविऊण उववण्णो मिगावइए
देवीए गम्भंमि पुत्तत्ताए, तओ सा रयणिंमि सुहपसुत्ता सत्त महासुमिणे पासित्ता णं पडिबुद्धा, पहिट्ठहियया य गया
रण्णो सगासे, निवेइओ सुविणवुत्तंतो, रत्ता भणियं-देवि ! निच्छियं भुवणविक्खायजसो सयलसामंतमउलिमंडल-
मसिणियकमकमलो पयावपडिहयपडिवक्खो कुलकेऊ तुह पुत्तो भविस्सइ । जेण-

एवंविह सुमिणाइं देवि ! पुण्णेहिं कहवि दीसंति । हरिसभरनिम्भरंगी अभिनंदसु ता तुममिमाइं ॥ १ ॥

इइ जंघिऊण रण्णा वाहरिया सुमिणपाढगा कुसला । ते य नरिंदाएसं तहत्ति पडिवज्जिउं सहसा ॥ २ ॥

ण्हाया कयवलिकम्मा परिहियसुविसुद्धसुंदरदुगुला । सिरनिहियक्खयकुसुमा निडालकयरोयणातिलया ॥ ३ ॥

करकलियनिमित्तागमपोत्थयसत्था समत्थनयनिउणा । पज्जायागयविज्जा समागया झत्ति निवभवनं ॥ ४ ॥

सीहासणेसु सव्वात्थरेण उववेसिया नरिंदेणं । फलफुलदाणपुव्वं सुमिणत्थं पुच्छिया ताहे ॥ ५ ॥

तेहि य निमित्तसत्थाइं वित्थरेणं सबुद्धिविहवेणं । परिचित्तिऊण तह निच्छयं च काऊण अण्णोऽण्णं ॥ ६ ॥

भणिओ पयावइनिवो जहेरिसाणं विसिट्ठसुमिणाणं । अणुभावेणं नूणं पयडो नीसेसभुवणंमि ॥ ७ ॥

तिक्खंडभरहसामी अप्पडिहयसासणो य तुह पुत्तो । होही अप्पडिमवलो इह पढमो वासुदेवोत्ति ॥ ८ ॥

आयन्निऊण एवं पहिट्ठचित्तेण ते नरिंदेण । दाऊण धणं विविहं विसज्जिया नियनियगिहेसु ॥ ९ ॥

श्रीगुणचंद
महावीरच०
३ प्रस्तावः
॥ ४३ ॥

सा य मिगावई देवी पुणोऽवि नरिंदेण कहिए सुमिणपादगसिट्टे सुमिणट्टे पहिट्टहियया सुहंसुहेणं गच्चमुवहइ, अणया य पडिपुण्णंमि समए पसत्थंमि वासरे सुकुमारपाडलपाणिपल्लवं तमालदलसामलसरीरं सयलपुरिसप्पवरल-
क्खणविराइयं तिपिट्टकरंडगाडंवरभिरामं दारयं पसूया । विण्णायसुयजम्मो पहिट्टो पयावई, कराविओ सुरमं-
दिरेसु महसवो, तथा—

दिज्जंतऽनिवारियकणयदाणनंदिज्जमाणमग्गणयं । पम्मुक्कपुण्फपुंजोवयाररेहंतरायपहं ॥ १ ॥

मंगलकलयलमुहलुम्मिलंतमहिलाजणाभिरमणिज्जं । पारद्धसंतिकम्मं जायं नयरं च तं सहसा ॥ २ ॥

अवरवासरे य तस्स दारयस्स परमविभूईए तिपिट्टकरंडगदंसणनिच्छियाभिहाणवीएण पइट्टियं तिविट्टुत्ति
नामं कुलयेरीजणेणं, अह सो तिविट्टू पंचघाईपरिक्खित्तो महारयणं व हत्थाओ हत्थं संचरंतो अणेमवेडचाडुकर-
परिगओ कुमारभावमणुप्पत्तो,

ताहे पिउणा जोगोत्ति जाणिउं सोहणे तिहिमुहुत्ते । उवणीओ सो विहिणा लेहायरियस्स पढणत्थं ॥ १ ॥

सयलो कलाकलावो अकालखेवेण गुरुसयासाओ । नियडुद्धिपगरिसेणं सविसेसो तेण गहिओत्ति ॥ २ ॥

अह मुणियसच्चनायच्चवित्थरो गुरुपए पणमिऊण । तदणुण्णाओ कुमरो गओ सगेहंमि परितुट्ठो ॥ ३ ॥

अयलेण भाउणा सह खणमविय विओगमसहमाणो सो । पवरुज्जाणाईसुं निस्संको कीलइ जहिच्छं ॥ ४ ॥

मृगावत्याः
स्वप्नाः त्रि-
पृष्ठजन्म च.

॥ ४३ ॥

कोमलकायस्सवि तस्स भुयबलं पेक्खिऊण जायभया । पमिलाणवणकमला सहस्समल्लावि कंपंति ॥ ५ ॥
 लीलाएविहु पयपंकयाइं सो जत्थ जत्थ मेल्लेइ । वज्जाहयव्व धरणी तहिं तहिं थरहरइ वाढं ॥ ६ ॥
 परिहासेणवि जे तेण पाडिया कहवि मुट्ठिघाएणं । ते नूणं जइ परगेहिणीए पुत्तेहिं जीवंति ॥ ७ ॥
 खिवइ य जत्तो दिट्ठिं तत्तो चिय सायरं विणयपणया । अहमहमिगाए धावंति किंकरा मुक्कवावारा ॥ ८ ॥
 जस्साएसं वियरइ थेवंपि अणायरेणऽवि कुमारो । सो लद्धनिहाणो इव मन्नइ कयकिच्चमप्पाणं ॥ ९ ॥
 सो भणइ जत्थ ठाणे तत्थ समप्पंति सेसवावारा । तस्सेव परक्कमवण्णणेण लोयस्स पुणरुत्तं ॥ १० ॥
 इय पुव्वभवज्जियसुकयकम्मवसवट्ठमाणसोक्खस्स । अयलसमेयस्स सरंति वासरा अह तिविट्ठुस्स ॥ ११ ॥
 इओ य-रायगिहे नयरे भारहद्धवसुंधराहिवमणिमउडकोडिलीढपायवीढो पयलकालमायंडमंडलुड्डामरपयावकंतदि-
 सिचक्को निविसंकभुयदंडमंडवनिलीणरायलच्छिविलाससुंदरो समरसीमनिहयमत्तमायंगकुंभत्थलगलियमुत्ताहलविरइ-
 यचउक्को महागोपुरपरिहसन्निहवाहुवद्धवीरवलओ निसियधारुक्कडचक्कनिकंतिथवइरिग्गीवो आसग्गीवो नाम राया
 पडिवासुदेवो पवरं पंचप्पयाररमणिज्जं विसयसिरिमणुहवइ । एवं च वोळंतंमि काले सो विसाहनंदी कुमारो चिरं
 रज्जमणुपालिऊण मओ समानो नरयतिरिएसु भमिऊण उववण्णो एगंमि गिरिकंदरे सिंहत्तणेणं, पमुक्कबालभावो
 य इओ तओ हिंडंतो उवइवेइ तस्स रण्णो पहाणसालिछेत्तनिवासिकरिसगजणे, ते य तेण उवइविज्जमाणा आ-

श्रीगुणचंद
महावीरच०
३ प्रस्तावः

॥ ४४ ॥

गया आसग्गीवनरिंदस्स सगासे, साहिओ सीहवइयरो, इमं च वागरियं जहा-देव ! इमाओ कयंतविब्भमाओ सिंहाओ न रक्खह अम्हे ता करिसावेह नियत्तेताई, अम्हे अन्नत्थ वच्चिस्तामो, राइणा भणियं-भो भो किमेवं का-यरा होह?, तहा करेमि जहा न मणागंपि पीडइ एस दुट्ठसत्तो, तओ निरुविया जहकमं सोलसवि सहस्सा नरिंदाणं सीहपसरपडिक्खलणत्थं, गया य पहिट्ठा करिसगा सट्ठाणंमि । अण्णया य आसग्गीवो सुरसुंदरीविब्भमंमि अंतेउरी-जणे वेसमणधणाइरेगे कोसविभवे अण्णसरिसे करितुरगाइरज्जंगे सुरवइसमंमि आणाइस्सरिए अच्चंतं मुच्छिओ गिद्धिओ चिंतिउमारद्धो-किं मण्णे एरिससमग्गसामग्गीपरिवुडस्स परेण मणेणवि अण्णभिवणिज्जस्स निच्चंमि अप्प-मत्तचित्तअंगरक्खपरिक्खेवस्स अण्णसुमरणमेत्तकरतलपाउभवंतअप्पडिइयगइचक्काउहस्स ममावि संभवेज्ज कोइ वि-णासकरणपच्चलोत्ति?, जइ ताव तं जाणेमि कहवि ता करेमि पडिविहाणं, रक्खेमि सब्बप्यारेण अप्पाणंति संप-हारिऊण आहुओ नेमित्तिओ, दावियमेगंते आसणं, निसन्नो सो तत्थ, सक्कारपुव्वं पुट्ठो य सव्वायरेण, जहा भइ ! नेमित्तिओ ! सम्मं चिंतिऊण साहेसु, कोऽवि अत्थि किं ममावि मञ्जुकारी न वत्ति?, तेणवि य निमित्तबलेण अव-लोइऊण भणियं-देव ! पडिहयममंगलं, कहमणिट्ठं साहिज्जइ?, रत्ता वुत्तं-भइ ! मा संखुब्भ, साहेसु जहापुच्छियं, नेमित्तिणं जंपियं-जइ एवं ता अत्थि तुब्भंमि मञ्जुकारी, रत्ता कहियं-कहं सो नेओ?, तेण वुत्तं-देव ! जो सा-लिच्छेत्तसीहं वावाइस्सइ तुहसंतियं च नीसेसमंडलाहिवसम्माणट्ठाणं चंडवेगद्वयं धरिसेही सो निच्छियं मञ्जुकारी

सिंहरक्षणं
निमित्त-
श्रवणं.

॥ ४४ ॥

जाणियवो, सवप्पयारेहिं रक्खणिज्जो य, एयमायन्निऊण रत्ता विसज्जिओ नेमिच्चिओ, सयंपि उवविट्ठो अत्थाण-
मंडवे, पुच्छिया य अमच्चाइणो-अहो को संपयं नरवई दंडाहियो कुमरो वा अतुलवलपरक्कमो सुणिज्जइत्ति, तेहिं
भणियं-देव! तुम्हाणंपि सयासाओ कोऽवि अतुलवलो? जेण साहिज्जइ, महीए सूरमंडले पहवंतंमि विप्फुरइ ता-
रगगरुई?, राइणा भणियं-वडुरयणा वसुंधरा, किमिह न संभवइ?, मंतीहिं भणियं-देव! निच्छियं न सुणिमो,
सवणपरंपराए पुण सुणिज्जंति-पयावइनरिंदस्स कुमारा अनन्नसरिसपरक्कमा लीलादलियसेससोंडीरवलावलेवत्ति,
एयमायन्निऊण राइणा भणिओ चंडवेगो-जहा भइ! गच्छसु एयस्स राइणों सगासे साहेसु य तस्स अमुगं मम
पओयणं, जं देवो भणइत्ति पडिच्छिऊण सासणं निग्गओ, गओ महया पुरिसपरियारेणं परिक्खित्तो पोयणपुरा-
भिमुहं चंडवेगो। इओ य पयावइराया कयपवरसिंगारो परिहरियमहामुल्लदुगुल्लो कुमारपमुहपरियणाणुगओ अंते-
उरमज्झे ठिओ चिट्ठइ, वट्ठइ य तत्थ पेच्छणयं, केरिसं?—

विविहंगहारविन्भमविचित्तकरणप्पओगरमणिज्जं । रणझणिरमंजुमंजीरमणहरारावसंवलयं ॥ १ ॥

दढदेहायासवसुच्छलंततुट्ठंतहारसरिविसरं । भूमंगविन्भमुब्भडपसरियवहुहावभावभरं ॥ २ ॥

कलयंठकंठगायणपारद्धविसुद्धतारगेयसरं । ताडियपडुपडहुम्मिस्समंजुगुंजंतवरमुरवं ॥ ३ ॥

इय एरिसंमि तरुणीजणस्स नट्टंमि संपयट्टंमि । अदिट्ठरूवपुवे संपन्ने परमरंगे य ॥ ४ ॥

श्रीगुणचंद
महावीरच०
३ प्रस्तावः

॥ ४५ ॥

सुत्तव चित्तलिहियव लेवघडियव रज्जुनद्धव । मइरामयनिष्फंदियव विमुक्कऽन्नवावारा ॥ ५ ॥
अणमिसनयणनिवेसा जणपरिसा तक्खणेण सा जाया । अइतुट्ठ तिविट्ठुकुमार रायलोएण सह झत्ति ॥ ६ ॥
एत्थंतरे खीरोयनिम्महणपज्जंतुट्ठियविसुग्गारोव कंप्पियविबुहसत्थो कयंतोव अणिवारियागमणो पविट्ठो सो चंड-
वेगाहिहाणो दूओ, तं च दट्ठूण ससंभममुट्ठिया, सामिदूओत्ति कलिऊण कया महती पडिवत्ती, पुट्ठो य आसग्गीव-
नरिंदस्स सरीरारोग्गवत्तं, सिरसा पडिच्छियं सात्थणं, संवरियपेच्छणगवावारो नियनियगेहेसु गओ जणो, रंगभंग-
करणेण य बाढं अमरिसिओ तिविट्ठुकुमारो, पुच्छिओ अणेण एगो पुरिसो-अरे ! को एस ? किं वा एयागमणेण अब्भु-
ट्ठिओ ताओ ? कहं वा पविसमाणो दुवारेच्चिय न रुद्धो पडिहारेण ? तेण भणियं-कुमार ! एसो खु रायाहिरायस्स पहा-
णदूओ, अओ सामिध दट्ठवोत्ति राइणा अब्भुट्ठिओ, अओच्चिय पडिहारेणवि न खलिओ, एयाणुवित्तीए चेव सुहेणेत्थ
निवसिज्जइ, पभुचित्ताणुवत्तित्थणं हि सेवगधम्मो, कुमारेण भणियं-जाणियव कोऽवि कस्सवि पभू सेवगो वा, होउ
ताव किं एएण ? अनिबडियपुरिसायाराणं विफलो अत्तुकरिसो निरत्थओ तुंडमंडवो अणुचिओ भुयवलावलेवो अजुत्तो
नेवत्थफडाडोवो, ता एयं एत्थ पत्तकालं-अरे ! साहेज्जसु तुमं मम जया एसो सनयराभिमुहं वचेज्ज, जेण करेमि
एयस्स पाहुन्नयं, जं कुमारो आणावेइत्तिभणिऊण अब्भुवगयं पुरिसेण, सो य दूओ गुणदोसे राइणा समं भासिऊण
साहियनरिंदपओयणो परिगहियविविहपाहुडो कयसक्कारसम्माणो चलिओ सनयराभिमुहं, अंतरा य गच्छंतो

दूतागमः
नृत्यभंगश्च.

॥ ४५ ॥

विन्नायगमणवइयरेणं पडिरुद्धो तिविदुकुमारेण अयलपरिगएणं, भणिओ य—

रे दूयाहम ! अइदुद्ध धिद्व पाविद्व कत्थ वच्चिहिसि । पेच्छणयरंगभंगं तइया काउं मम समक्खं ? ॥ १ ॥
 निब्भग ! गरुयराउलसेवणओऽविदु पभूयकालेणं । पत्थावापत्थावं न मुणसि किं सिक्खिओ तंसि ? ॥ २ ॥
 नियजण ! वयणविन्नासपमुहगुणवित्थरेण उवहससि । सक्कगुरुं पि विदुक्कुह अन्नेव वियट्ठिमा तुज्झ ? ॥ ३ ॥
 ता पाव ! पावसु फलं सदुठचेट्ठियतरुस्स दुव्विसहं । सुमरेसु य इट्ठदेवं माऽकयधम्मो धुवं मरसु ॥ ४ ॥
 इय भणिऊण तिविदू निट्ठुरमुट्ठिप्पहारमुग्गिरिउं । जा हणइ नेव दूयं अयलेणं जंपियं ताव ॥ ५ ॥
 भो भो कुमार ! विरमसु गोहच्चंपिव विमुंच एयवहं । दूया रंडा भंडा कयावराहावि अहणणिज्जा ॥ ६ ॥
 ताहे भणिया पुरिसा ! रे रे सिग्घं इमस्स पावस्स । मोत्तूण जीवियव्वं सेसं अवहरह वत्थाइं ॥ ७ ॥
 पुरिसेहिं तओ कुमरस्स वयणओ लट्ठिमुट्ठिपभिईहिं । गहिऊण तं समत्थं धणाइयं अवहडं तस्स ॥ ८ ॥
 भयभरविट्ठुरत्तणओ नियंसियं वत्थमविय से गलियं । भूमीए निवडणेणं धूलीए धूसरियमंगं ॥ ९ ॥
 अह खमणगोव्व मुणिउव्व पंडरंगोव्व तक्खणं जाओ । सो चंडवेगदूओ नियजीवियरक्खणट्ठाए ॥ १० ॥
 सेसो पुण परिवारो जीवियक्खी य पहरणे मोत्तुं । सयलदिसासु पलाणो दंसणमेत्तेऽवि कुमरस्स ॥ ११ ॥
 एवं च लुंचविलुंचियं काउं दूयं वलिया कुमारा, जाणिया य वत्ता पयावइणा, तओ भीउव्विगो चित्तिउमाढत्तो—

श्रीगुणचंद
महावीरच०
३ प्रस्तावः

॥ ४६ ॥

अहो असोहणं कयं कुमारेहिं, एयंमि पडिकूलिए परमत्थेण आसग्गीवो पडिकूलिओ, अजहावलमारंभो मूलं विणा-
सस्स, न य कुमारावरद्धे मम निदोसत्तणं वयणसएणवि कोऽवि पडिवज्जिही, पडिवज्जिएवि पयडो खलु एस वव-
हारो जं भिच्चवराहे सामिणो दंडो, ता विसममावडियं, अहवा अलं चिंतिएण, उवाओ चेव उवेयस्स साहगोत्ति-
निच्छिऊण आणाविओ दूओ, सविसेसं कया पडिवत्ती, समप्पियाइं महामोलाइं पाहुडाइं, कओ य चउग्गुणो
दाणक्खेवो, भणिओ य एसो-अहो महायस! वालभावसुलभनिच्चिवेयत्तणेण जोवणवसविसंठुलचिद्धियत्तणेण राय-
कुलजम्मसहयदुललियत्तणेण य जइवि बाढं अवरद्धं कुमारेहिं तुम्ह तहावि सब्हा न कायवो चित्तसंतावो, न वो-
ढवो अमरिसो, मम निव्विसेसोऽसि तुमं, डिंभदुव्विलसियाणि न करिंति चित्तपीडं कहवि जणगत्थाणीयस्स, अहं
जणगो चेव एएसिं, उत्तरोत्तरगुणपगरिसारोहणं पुण तुमए इमेसिं कायव्वं, ता कुणसु पसायं परिहरसु अवमाणं,
दूएण भणियं—महाराय! किमेवमाउलो भवसि?, किं कोऽवि नियडिंभेसु दुव्विणयमासंकेइ?, पेमपरवसहियएसु
वा एगमवि अवराहं न मरिसेति?, राइणा भणियं—एवमेवं, जाणामि तुज्झ चित्तवित्तिं लक्खेमि पडिवन्नभरधवल-
त्तणं, केवलं तहा कायव्वं जहा देवो कुमारवइयरं न निसामेइ, इइ भणिए पडिवज्जिऊणं चलिओ चंडवेगो, कमेण
गच्छंतो पत्तो आसग्गीवनरिंदसमीवं,

अह पुवागयनरकहियकुमारवइयरनिसामणा रुसिओ । आवद्धभिउडिभीमो रत्तच्छो पेच्छिओ राया ॥ १ ॥

चण्डवेगा-
वमानं क्षा-
मणादि च.

॥ ४६ ॥

नायं च जहा पुत्रागएहिं सिद्धो स वइयरो रत्नो । ताहे कयप्पणामो उवविट्ठो सो नियट्ठाणे ॥ २ ॥
 पुट्ठो य तओ रत्ना कहिओ नीसेसवइयरो तेण । जइ कुमरेहिं पइओ अयाणमाणेहि निरवेक्खं ॥ ३ ॥
 जइविहु देवऽवरद्धं बालत्तणओ सुएहिं मम किंपि । तहवि पयावइनिवई अहिगं सोगं समुव्वइ ॥ ४ ॥
 चूडामणिब सीसेण सासणं तुम्ह धरइ विणयनओ । निभिच्च(ब्भंत)भिच्चभावं सविसेसं दंसइ सयावि ॥ ५ ॥
 न मुणिज्जइ जुवईणं मंजीररवो कयावि तस्स गिहे । मागहलोएणं तुह गुणनिवहं संथुणंतेण ॥ ६ ॥
 किं वहुणा ? महिवइणो मए सुदिट्ठा कया समग्गा । किं तु नियसाभिभत्तीए तुलइ नो कोऽवि तेण समं ॥ ७ ॥

अह आसग्गीवनरिंदेण सुमरियं नेमिच्चिगवयणं परिकंपिओ मणेणं, चिंतियं च-अहो निव्वडियं ताव एगं नेमिच्चि-
 गवयणं, वीयंपि जइ इत्थमेव हवेज्ज ता निच्छियं अकुसलंति परिभाविऊण आहूओ अवरो दूओ, भणिओ य जहा-
 गच्छसु रे पयावइस्स सगासे, भणसु स तं मम वयणेण-जेण सालिच्छेत्तेसु करिज्जमाणेसु सबलवाहणो गंतूण केसरि
 परिकखलहत्ति, जं देवो आणवेइत्ति भणिऊण निग्गओ दूओ, कमेण पत्तो पयावइस्स भवणं, सक्कारिओ रणणा, पुट्ठो
 य आगमणपथोयणं, साहियं च तेण स्त्रीहरक्खणरूवं नरिंदसासणं, अब्भुवगयं च पयावइणा, सट्ठाणे य पेसिऊण
 दूयं एवं उवालद्धा कुमारा—

पुत्ता ! अकाल एव हि तुम्हेहिं पवोहिओ धुवं मच्चू । आसग्गीवनरिंदस्स धरिसिओ जमिह सो दूओ ॥ १ ॥

श्रीगुणचंद
महावीरच०
३ प्रस्तावः

॥ ४७ ॥

तेणेव अयंडे चिय दारुणरूवा इमा भमावडिया । आणा कयंतविभमपंचाणणरक्खणाणुगया ॥ २ ॥
कुमारेहिं भणियं-ताय ! कहं मच्चू पवोहिओ ?, रत्ता भणियं-पुत्ता ! सुणेह, आसग्गीवनरिंदस्स सालिखेत्तस्स केसरी
करिसगजणं विह्वेइ, सो य पइवरिसं वारोवारणण जहक्कमं सव्वनरिंदेहिं रक्खिज्जइ, संपयं पुण धरिसियदूयकुविण्ण
आसग्गीवेण अपत्थावेच्चिय अहं समाइट्ठोऽमिहि, ता एयं मच्चुएपडिबोहणंति, तेसिं कहिऊण समाढत्तं पयाणयं, एत्थं-
तरे विन्नत्तं कुमारेहिं-ताय ! अम्हे वच्चाओ, रत्ता भणियं-पुत्तया ! बालया तुम्हे, न जाणह अज्जवि कज्जाकज्जं, ता विर-
मह इमाओ अज्जवसायाओ, अहं सयमेव वच्चिस्सामि, तेहिं भणियं-सव्वहा मोक्कलह, गंतवमवस्समम्हेहिं, महंतमेयं
कोऊहलं, केरिसो सो केसरित्ति ?, राइणा भणियं-अरे पुत्ता ! हरिणंकमंडलनिक्कलंके कुले समुप्पत्ती कुबेरसमइरेगो धण-
संचओ अविगलं आणाईसरियं कलाकलावंमि विमलंमि विमलं कुसलत्तणं समत्थसुत्थत्थेसु पवीणआ नीसेसेसु पहरणेसु
परमो परिस्समो य नीरूवमं वीरियं अप्पडिमा रूवलच्छी, एएसिमेगयरंपि उम्मग्गपवत्तणसमत्थं, किं पुण एगत्थ
समवाओ ?, एयाणि य सच्चाणिवि तुम्ह संति, ता एएहिं हीरमाणाणं तुम्हाणं को पडिक्खलणकारी ?, जम्हा
बद्धमच्छरा वेरिणो उस्सिस्खला खला अविभावणिज्जागमाओ आवयाओ अच्चंतं पमत्तचित्ता य तुम्हे, न जाणिज्जइ
केरिसो विवागो हवइ ?, अओ सुयह गाढग्गहंति, तेहिं भणियं-ताय ! हवउ किंपि, निच्छयं गंतवमम्हेहिं, तओ
निवारिज्जमाणावि चलिया कुमारा पहाणराइणा समेया कइवयकरितुरयरहपरियणपरियरिया, पत्ता य तेसु सालिच्छे-

सिंहरक्षणा-
देशः हठात्
कुमार-
गमनं.

॥ ४७ ॥

तेसु जत्थ सो केसरी निवसइ, पुढा य तेहिं करिसगा—अरे किह अन्ने राइणो पुर्विं सीहं रक्खियाइया ?, तेहिं भणियं—
 कुमार ! पयंडगुडाडोवभासुरेहिं पवरकुंजरेहिं पवणाइरेगवेगसुंदरंगेहिं जचतुरंगेहिं उडुंडगंडीवसेल्लभल्लिनारायकुंतपमु-
 हपहरणहत्येहिं सुहडसत्येहिं विरइऊण तिउणपायारपरिक्खेवं अचंतमप्पमत्तचित्ता मरणमहाभयवेवंतसवसरीरा केस-
 रिगुहामुहनिहियानिमेसनयणा रक्खिंसु नराहिवा, तहा रक्खमाणाणवि पइक्खणं सीहनायवससमुच्छलंतपडिसहायन्न-
 णेण अवगणियतिकखंकुसपहारा करडितडपणट्टमयजला विहडंति करिचडा गाढखलितखलिज्जमाणाइं विदिसो
 दिसिं फट्टंति तुरयघट्टाइं विमुक्कपोरिसाभिमाणाणि इट्ठदेवयमणुसरमाणाणि सवओ पलायंति पायक्काणि, कुमारेण
 भणियं—अहो महापरक्कमो अहो अनन्नविप्फुरियं वीरियं अहो ओहामियसयलसुहडदप्पमाहप्पं अहो भुवणच्छ-
 रियं चरियं तस्स केसरिणो जं तिरियमेत्तस्सवि एवं परिसंकिज्जइ, अरे केत्तियं पुण कालं एवंविहपरिकिलेसेण एस
 पडिक्खलिज्जइ ?, तेहिं भणियं—कुमार ! जाव सयलंपि करिसणं ण सगिहे पविसइ, कुमारेण भणियं—भो करिसगा !
 को वासारत्तदुविसहसीयवायाभिहओ नियसुहिसयणपमुहपहाणलोयरहिओ चिक्खल्लोलंमि मेइणितले मेहमालाउले
 दिसिवलए अणवरयं निवडंतीसु दिसिवहूमुत्तामणिहारविब्भमासु मुणीणंपि कयमयणवियारासु तंडवियसिहंडिमंड-
 लीसु विरहिणीहिययनिहित्तंगारासु वारिधारासु एत्तियं कालं पडिवालेहि ?, ता दंसेह तं पएसं जत्थ सो निवसइत्ति,
 जं कुमारो आणावेइत्ति भणिऊण दूरट्टिएहिं चेव कहिया सा केसरिगुहा, तओ पुणो पुच्छिया कुमारेण—अरे ! केत्तिओ

श्रीगुणचंद
महावीरच०
३ प्रस्तावः

॥ ४८ ॥

तस्स परिवारो?, तेहिं भणियं-कुमार! नियसरीरमेत्तो, कुमारेण भणियं—जइ एवं ता
निरत्थयं धी धी वित्थरंति किं पत्थिवा विगयलज्जा । नियभुयवलावलेवं गिज्जंतं मागहजणेण? ॥ १ ॥
बहुसुहडकोडिसंबुडहरिकरिसंमदलियमहिवट्ठा । असहायं केसरिणं जमिमे न सरंति भयविहुरा ॥ २ ॥
एसो जयंमि धन्नो जणणी एयस्स चेव पुत्तमई । जस्स गलगज्जिएणवि गरुयावि मुयंति नियजीयं ॥ ३ ॥
जस्सऽनिवारियपसरं पोरिसमेवंविहं परिष्फुरइ । एगागिणोऽवि स कहं न लहइ पंचाणणपसिद्धिं? ॥ ४ ॥
इय सुचिरं तं पसंसिऊण गरुयकोऊहलाऊरिज्जमाणमाणसो नियत्तियसेसपरियरो रहवरारूढो चलिओ गुहा-
भिमुहं कुमारो, कमेण य स पत्तो गुहादेसं, एत्थंतरे दंसणकोउगेण मिलिओ बहुलोगो, ठिओ उभयपासेसु,
कओ महंतो कोलाहलो, अह कलयलायन्नणजायनिद्दाविगमो जंभाविदारियरउद्वयणो परिभुत्तकुरंगरुहिरपाडलु-
गारदाढाकडप्पेण संझारुणससिकलं व विडंबमाणो पडिधुणियकडारकेसरो सदुब्भडकंधरो उच्चिलिरमहल्लंगूलवेलि-
ताडियधरणितडाराववहिरियदियंतरो पढमपाउसमेहोव गज्जंतो उट्ठिओ केसरी, लीलाए मंदं मंदं कुमारदुत्तमव-
लोइउं पयत्तो य, तिविद्धूवि निरुवयंतो फलभरेण य सस्सं निसुणंतो केयाररक्खिगाजणरासए करंतो तस्सालावं
पेच्छंतो काणणरम्मयं ताव गओ जाव निवडिओ चक्खुगोयरे स सारंगाहिवो, तं च ददूण चित्तियं कुमारेण—अहो
एस महाणुभायो महीए चरणेहिं परिसकइ, अहं पुण पवरतुरयसंपगहियं विचित्तपहरणपडिहत्थं रणज्झणिरकिंकिणी-

सिंहेन भु-
द्धम् शौ-
र्यस काष्ठा,

॥ ४८ ॥

जालसंपरिखितं संदणं अधिरूढो, ता विसरिसं जुज्झं, न जुत्तमेयं उत्तमाणंति भावितो कुवियकयंतजीहाकरालं
अयसिकुसुमप्पगासं करवालं गहिऊण दाहिणकरेण वामेण य पडिपुण्णचंदमंडलविन्भमं फुरंतफारतारगाभिरामं फरगं
च ओयरिऊण रहाओ लिओ भूमीए, ताहे पुणोऽवि चित्तेइ-एस वराओ वयणंतरनिगूढदाढाकरपेरंतकुंठकुडिलनह-
मेत्ताउहो अहं तु तिवखग्गखग्गफलहत्थो, एयमवि न जुत्तिजुत्तंति विभाविऊण खग्गं फलहगं च परिचयइ, एत्थं-
तरंमि ददूण तारिसं वइससं तिविदुस्स उप्पन्नगाढकोवो सीहो चित्तेउमाढत्तो—

कह मत्तमहामायंगतुरयरहजोहवूहरयणेणं । रक्खिज्जंतोऽहमहो महायरेणं महीवइहिं ॥ १ ॥

कह मज्झ दंसणपहे कीणासस्स व न कोइ निवडंतो । सुदुवि पगिट्ठवलदप्पिओऽवि रणकम्मरसिओऽवि ? ॥ २ ॥

कह एण्हि दुद्धमुहो तत्थवि णवणीयकोमलसरीरो । तत्थविय तुरगकरिवरपकलपाइक्कपम्मुक्को ? ॥ ३ ॥

तत्थवि य अवन्नाए ओयरिऊणं रहाओ पवराओ । अइवियइं लीलाए भासमाणो महिंमि ठिओ ॥ ४ ॥

तत्थेव य सभुयबलावलेवमुक्कप्पहरणाडोवो । मसगंव मं गणंतो एसो पविसइ मम गुहाए ॥ ५ ॥

किं वा जीवंतोहिं नो दीसइ किं सुणिज्जए नेव । जं एरिसावि दावेंति संपयं मज्झ अवमाणं ? ॥ ६ ॥

जइवि हु कुंजरसिरदारणोचिया मज्झ कुडिलनहविसिहा । तहविहु इमस्स दंसेमि गाढदुब्बियणसाहिफलं ॥ ७ ॥

इय चित्तिऊण गलगज्जियरवेण फोडितोव बंभंडभंडोयरं, पुच्छच्छडाच्छोडणेण दलितोव मेइणीतलं, विडंबिय-

श्रीगुणचंद
महावीरच०
३ प्रस्तावः

॥ ४९ ॥

वयणदाढामऊहनिवहेण भरंतोव्व गयणंतरालं रत्तनयणपहासरेण अयंडनिवडंतविज्जुदंडुडामरं व करंतो दिसिचक-
वालं वेगागमणवसविसंडुललुलंतकेसरभारेण अंतरे अमायंतं व कोवनिवहं उगिरंतो सज्जियदीहरकमुल्लासवसवि-
सेसखामोयरत्तणेण अंतरा तुट्टिऊणं व अग्गकाएण गसिउकामो एगहेलाए भुवणजणकवलणकए कयंतुव्व भात्तमाणो
झडत्ति पत्तो तिबिदुकुमारस्स मुणालकोमलकरकमलगोयरं, तओ तिबिदुणा एगेण करेण हेट्टिलोदुपुडं अवरेणुत्तरोट्टं
अणायरेण गहिऊण जिणणपडं व परिसडियपंडुपत्तं व भुज्जतरुत्तयं व दुहा तडयडत्ति फालिऊण परिमुक्कोत्ति, एत्थं-
तरे उक्किट्टसीहनाओ जयजयरवो य कओ लोएणं, अन्नं च—

गंधव्वजक्खरक्खसविज्जाहरकिन्नरेहिं गयणंमि । विक्कमदंसणसंजायहरिसपप्फुल्लनयणेहिं ॥ १ ॥

पहयाइं पडहकाहलमुयंगदुंदुहिपमोक्खतूराइं । कओ य जयजयरवो अहो सुजुज्झंति भणिऊण ॥ २ ॥

तियसंगणाहिं वियसियकुवलयदलदामदीहरच्छीहिं । मुक्का य कुमुमबुट्ठी दसद्धवन्ना भसलमुहला ॥ ३ ॥

मणिमउडकणयकुंडलकडिसुत्तयतुडियहारपमुहाइं । पवराभरणाइं लहुं सुरेहिं दिन्नाइं कुमारस्स ॥ ४ ॥

तथा—गिज्जंतुदामगुणं विविहविलासुल्लसंतगोवज्जणं । नचंततरुणिसत्थं जायं रणणंपि सुपसत्थं ॥ ५ ॥

सो य सीहो तहा दुहाकओऽपि गरुयाभिमाणेण परव्वससरीरो फुरफुरंतो विचित्तेइ—एवं नाम अहं निराउहेण
एगागिणा कुमारेमेत्तेण अजुज्जेणं लीलाए विणिहओ, अहो मम काउरिसत्तणं अहो असामत्थं अहो निस्सारसरी-

सिंहमा-
रणम्

॥ ४९ ॥

रत्तणं अहो दइवविपरंमुहया, सव्वहा निरत्थयमुवूढो सारंगरायसहो एत्तियं कालं, दुहु दुहु एरिसजीविणंति, एवं च तस्स फुरुफुरायमाणस्स सुणियतदभिप्पाएण कुमारसारहिणा भणियं महुसररेणं—

भो भो लीलानिहलियमत्तमायंगपुंगवसमूह ! । सारंगराय ! निप्पडिमसत्तिवित्तासियविपक्ख ! ॥ १ ॥

अविलंघियसज्जियकमनियवलपरिभूयनरवइसहस्स ! । सप्पुरिस ! कीस एवं निरत्थयं अमरिसं वहसि ? ॥ २ ॥

मा सुणसु जहा एएण बालरूवेण विणिहओऽहमिह । जं एसो नियकुलनहयलेकचंदो जणाणंदो ॥ ३ ॥

वररायलक्खणधरो समग्गवीरग्गणी गुणावासो । निहुरभुयदंडबलो तिविहुनामो वरकुमारो ॥ ४ ॥

भावी भरहद्धवसुंधराएँ सामित्तणेण परिकहिओ । पढमं चिय सुमिणयपाढएहिं किर वासुदेवोत्ति ॥ ५ ॥

तं मिगसीहो भइय ! एसो पुण नरसमूहसीहोत्ति । सीहे सीहेण हए का अपसिद्धी ? किमवमाणं ? ॥ ६ ॥

अह सो केसरी इमाणि सारहिवयणाणि महुमिव अमयंपिव सवणपुडएहिं सम्मं पाऊण उवसंतचित्तो मरिऊण नरगे नेरइओ उववन्नो । सो य किर सारही एस काले भगवओ महावीरस्स पत्तित्थयरत्तस्स पढमो यणहरो गोयमनामो भविस्सइ । तिविहुकुमारोऽवि तं सीहचम्मं गहाय पढिओ सनयराभिसुहं, गच्छंतेण य भणिया करिसगा, जहा—रे इमं केसरिचम्मं गेणिहऊण समप्पेज्जह घोडयगीवराइणो, भणेज्जह य तं जहा—वीसत्थो निच्चओ भुंजेसु सालिभोयणं, जायं संपइ अणावाहंति । पडिवन्नं च करिसगेहिं, तिविहुवि गओ सनयरंति, पयावइ पण-

श्रीगुणचंद
महावीरच०
३ प्रस्तावः

॥ ५० ॥

मिऊण कहिओ सयलवुत्तंतो, जाओ पुरे पमोओ । ते य करिसगा गया आसग्गीवसयासे, निवेइओ पयावइसुय-
विणासियसीहवइयरो, एवमायन्निऊण य खुभिओ मणंमि राया, चित्तिउमाढत्तो-अहो पडिपुन्नं नेमित्तिगाइदं संपइ
संविहाणगदुगं, ता निच्छियं पयावइसुआओ मम भयं, किं पुण कायवं?, निवडइ इयाणिं जमरायस्स दंडो, विहडइ
सुदढगुणरज्जुनिगडियावि रायलच्छी, विलोदंति दाणमाणवसीकयावि सेवगा, विवरंसुहे विहिंमि किं किं न वा
होइ?, केवलं अज्जवि न मोत्तवा बुद्धिपुरिसयारा, जेण एएहिं भाविणोऽवि अणत्था उवहणिज्जंति गलियाओवि
संपयाओ पुणरवि पाउच्चवंति, तम्हा न जुत्तमुवेक्खणं, जावज्जवि लहुओ वाही ताव चिगिच्छणिज्जो, नहि लहु-
ओत्ति जलणफुलिंगो न डहइ केलासगिरिगरुयंवि दारुरासिं, न वा परिच्चविज्जमाणोवि दिट्ठिविसभुयंगपोयगो न
विणासं पयच्छेज्जा, ता इमं पत्तकालं-ते पयावइसुए उवलोभपुव्वयमिह आणावेऊण विस्संभिऊण य दाणसम्माणा-
इहिं विणासाविज्जंतित्ति संपहारिऊण य तेसिं आणयणनिमित्तं वाहरिओ दूओ, भणिओ य-अरे पयावइं एवं भणि-
ज्जासि-तुमं हि असमत्थो सेवाए, ता सिग्घं कुमारे पेसेहि जेण तेसिं इयरा सामंतभुत्ती दिज्जइ, जइ पुण न पेसेसि
ता जुज्झसज्जो होज्जाहित्ति, जं सामी आणावेइत्ति पडिवज्जिऊण निग्गओ नयराओ दूओ, कमेण य पत्तो पोयण-
पुरं, दिट्ठो राया, कयसक्कारो उवविट्ठो आसणे, पुच्छिओ य पयावइणा आगमणकारणं, तेण भणियं-राया आस-
ग्गीवो आणवेइ-तुमं जराज्जरियसरीरो अच्चंतं परिणयवओ आपसदाणाणुचिओ य ता पेसेसु नियसुए जेण ते

अश्वग्रीव-
भयं आन-
यनादेशः।

॥ ५० ॥

सहत्थेण पूणमि, वरकरितुरगनगरागरगामदाणेण य करेमि गरुयदेसाहिवे, एवमायन्निऊण चित्तिं पयावइणा-अतु-
लबलो आसग्गीवो दुराराहणिज्जो असमिक्खित्तिक्खदंडनियाडणदुविसहो य, अदिट्ठपरभया य मम कुमारा, विसे-
सेण तिविदुत्ति विभाविऊण भणिओऽणेण दूओ-भइ ! कुमारा न मुणंति सेवाविहिं न जाणंति वत्तवविसेसं न लक्खंति
उचियाणुचियं न खमंति नरिंदाएसमणुट्ठिउं, ता अहं सयमेव सबलवाहणो सामिसालं ओलग्गिस्सामि, तेण भणियं-न
एस आएसो पभुस्स, किं वा तुज्झ इमिणा मुणीणंपि दुक्करेण सेवाधम्मेण ? उवभुंजसु निरंतरमंते उरमज्झगओ जहि-
च्छियं विसयसोक्खं, कुमारावि तत्थ गया सपहुपसाएण जइ पाउणंति रायलच्छि ता किमिव अक्कलाणं तुह हवे-
ज्जा ?, जओ देवो आसग्गीवो सीहवइयरनिसामणेण परमंसंतुट्ठहियओ काराविउं इच्छइ महामंडेलोवभोगं आरोविउं
समीहेइ समुच्चपीलुखंधे काराविउं वंछइ पाणिग्गहणंति, राइणा विचित्तिं-अहो एस दूओ इंदवारुणीफलंपिव
बाहिं रमणीयं अर्द्धिभतरदुहविवागं उभयरूवं भासइ, ता सबहा दुहावहमेयं, सम्मं परियालोयणिज्जं, अइरहसकय-
कज्जाइं पज्जंतदारुणाइं हवंतीति निच्छिऊण पेसिओ दूओ निययआवासे, ठिओ सयमेगंते, वाहराविया विसमत्थनि-
णयकरणत्तिक्खबुद्धिणो मंतिणो, सुहासणासीणा य भणिया-अहो आसग्गीवो मम एवमाणवेइ-कुमारे सिग्घं
पेसेहिति, ता साहेह किमिह करणिज्जं ?, मंतीहिं भणियं-देव ! उद्दामपरक्कमो गूढमंतप्पयारो य आसग्गीवो, तुम्हे

१ परमसंतुष्टः परं असंतुष्टः २ मण्डलं-देशः खतं च ३ पीलुः-स्वर्णं वृक्षश्च ४ पाणिग्रहणं-विवाहः करबन्धश्च

श्रीगुणचंद
महावीरच०
३ प्रस्तावः

॥ ५१ ॥

पुण तस्सेव सेवगा अणवरयं आणानिहेसवत्तिणो अप्पवला य, ता को तेण सह विरोहो?, ससत्तीए अणणुरवकोव-
करणं हि निदाणं विणासस्स, राइणा भणियं—जइ एवं ता पेसिज्जंतु कुमारा, मंतीहिं भणियं—देव! असंजायवला
सेवाविहिअणभिन्ना य कहं पेसिज्जंति?,

अन्नं च—जइविहु अइयिसमत्थप्पसाहणे होज्ज कहवि लच्छीवि। तहविहु भुयंगभीमे विलंमि न खिवेज्ज कोऽवि करं ॥ १ ॥

अमुणियगम्मागम्मप्पयारमविगलियकलुसदोसं च। नरवइचित्तं सलिलं व कुणइ निन्नेसु नूण रइं ॥ २ ॥

कप्पासकणिक्काणं व सा णो परकज्जसाहिगा सेवा। उभयत्थविणासणकारिणी उ सेवा नरिंदाणं ॥ ३ ॥

जह भणियविहाणपरंसुहाण पुरिसाण सिद्धिलचित्ताणं। दुस्साहिबव्व विज्जा विणासमच्चिरा कुणइ सेवा ॥ ४ ॥

इय देव! नरिय कुमराण जोग्गया काऽवि सामिसेवाए। ता संठवेह दूयं सिणेहवग्गूहिं वग्गूहिं ॥ ५ ॥

इइ वुत्ते पयांवइणा आहूओ नरिंददूओ, भणिओ य सामवयणेहिं, जहा—भइ! गच्छ तुमं साहेसु आसग्गी-
वस्स, अणुचिया तुम्ह सेवाए कुमारा, पयावई सयमेव ओलग्गिहित्ति, दूएण भणियं—भो पयावइ! किमेवं पित्त-
पलाविओ इव पुणरुत्तं वाहरसि?, कुमारे पेसेसु, जुज्झसज्जो वा हवसु, एस देवस्स आएसोत्ति भणिऊण निग्गओ
दूओ, अंतरे य दुव्वयणायत्तणेण रुट्ठेण तिचिद्धणा कुमारेण निहुरलट्ठिमुट्ठिप्पहारोहिं हणिऊण कंठे घेत्तूण य अवहारेण
निद्धाडिओ, पत्तो य कमेण आसग्गीवनरिंदमंदिरं, निवेइओ निस्सेसो पयावइवइयरो, तमायत्तिऊण परिकुविओ

कुमारयोर-
प्रेषणं.

॥ ५१ ॥

राया, खुभिया य सहा, कहं ?—

अणवरयविणिंतुहामसेयविंदुम्भडं मुहं सुहडो । परिमुसइ कोऽवि कोवुग्गमेण अहियं दुरालोयं ॥ १ ॥
 नवकुवलयमालाविन्ममंमि निम्मलपहंमि करवाले । निवडइ य भमररिंछोलिसच्छहा कस्सविय दिट्ठी ॥ २ ॥
 परपक्खक्खोभकरिं कोवसिहाडंवरण भयजणणिं । पचक्खं नियसत्तिं व कोऽवि सत्तिं करे धरइ ॥ ३ ॥
 कस्सवि निडालवद्धं रेहुक्कडभिउडिभंगदुप्पेच्छं । खयसमयसमुग्गयराहुमंडलं सहइ गयणं व ॥ ४ ॥
 केणावि कुलिसनिट्ठुरमुट्ठिपहारेण ताडिया धरणी । अविणीयधारणेणं कयावराहव कं पेइ ॥ ५ ॥
 संभावियरणरसनिस्सरंतरोमंचपीवरकरस्स । चिरपरिहियाइं कस्सवि विहडंति य कणयकडयाइं ॥ ६ ॥
 कोऽविहु मच्छरसंभारतरलियं वयणभासणसयण्हं । कट्ठेण दसणदट्ठोदुसंपुडेणं खलइ जीहं ॥ ७ ॥
 इय जाया कोवभरुलसंतदेहाण विविहकिरियाओ । संगामसंगमुकंठियाण सुहडाण तवेलं ॥ ८ ॥
 एत्थंतरे भणियं आसग्गीवेण—अरे उवेक्खियाणं दुरायाराणं एस चिय गई, को तस्स दोसो?, अन्नहा—
 नियधूयापरिणयणावराहकालेऽवि जइ तमहं निगिण्हंतो ता किं एवं पसरं लहंतो, तद्दा—जो नियधूयं कामेइ
 सो नियसामिं पि दुहइ किमजुत्तं ? । किं वा एएण ?, इयाणिं पि विणिवाएमि एवं महापावकारिणं, ता रे ताडेह
 पत्थाणविजयडकं, पगुणीकरावेह कुंजरसाहणं, संजत्तावेह तुरयघट्टाई, जोत्तावेह संदणगणं, वाहरावेह समगं

श्रीगुणचंद
महावीरच०
३ प्रस्तावः

॥ ५२ ॥

नरवइवगंगति, वयणाणंतरमेव कथं पगुणं सयलं किंकरजणेण, एत्थंतरे गओ राया मज्जणघरं, परमविभू-
ईए कथं मज्जणं, नियंसियाइं कासकुसुमसुंदराइं अंवराइं, वद्धाइं केसेसु सुरहिकुसुमाइं, कओ सवंगिओ चंदणर-
सेणंगरागो, विहिओ पुरोहिण्ण असिवोवसमनिमित्तं संतिकम्मविही, खित्ता दोवक्खया सिरे, पइट्ठिओ पुरओ मंगल-
कलसो, दंसियं घयपुण्णभायणं, लिहिया अट्ठमंगलया, उवणीओ य आघोरणेण सिंगारियसरीरो सिंदूरपूरारुणकुंभ-
त्थलो गंडयलगलंतमयजलो वइरिदलणदुद्धरो जयकुंजरो, तंमि आरूढो आसग्गीवो, धरियं फारफेणपुंजुज्जलं नियप-
रिमंडलविजियपडिपुण्णचंदमंडलं लंबंतमुत्ताहलकलावावचूलयं सियायवत्तं, ठिया य उभयपासेसु चामरग्गाहिणीओ,
वज्जियाइं दिसिकुंजरगलगज्जिगंभीराइं भंभासुगुंदमइलढक्कापमूहतुराइं, ठिओ पत्थाणंमि पत्तियोत्ति । एत्थंतरे—

चलंतकण्णचामरा पयंडदप्पदुद्धरा, गलंतगंडमंडला तमालनीलसामला ।

अलंघणिज्जविक्रमा महागिरिंदविन्भमा, रणंतवद्धधंटया महागयाणुपट्टिया ॥ १ ॥

पलंबपुच्छसोहिया असेससिक्खगाहिया, सुवेयतुट्ठसामिणो समीरवेगगामिणो ।

विसिट्ठलक्खणंकिया परेण नो निरिक्खिया, दिणिंदवाइविन्भमा पयट्टिया तुरंगमा ॥ २ ॥

विचित्तचित्तबंधुरा महाउहोहनिन्भरा, जओवलंभपच्चला रणंतकिंकिणीकुला ।

निलीणभूरसत्थया पगिट्ठकेउमत्थया, दुसज्जवेरिमहणा पवाहिया पसंदणा ॥ ३ ॥

अश्वग्रीव-
प्रयाणं.

॥ ५२ ॥

सरासिचक्रधारिणो विषक्खसूरदारिणो, ससामिभत्तिमंतया अईव जुत्तिजुत्तया ।

जएकलाभलालसा अर्चितणिज्जसाहसा, सरीरबद्धकंकडा पयट्टिया महाभडा ॥ ४ ॥

अह लाडचोडभरहट्टकच्छकालिंगपमुहनरवइणो । आणाभेत्तेणं चिय समुज्झियासेसनियकज्जा ॥ ५ ॥

सन्नद्धबद्धकवया बहुपहरणसालिणो जयपसिद्धा । आसग्गीवसयासं पत्ता सयलेणवि बलेणं ॥ ६ ॥

एवं च समग्गसंवाहगे जाए दवावियं रणणा पयाणयं, चलिओ खंधावारो, गच्छंताण य सहसचिय समुच्छलियं
खरसमीरणंदोलणेणं, निवडियं छत्तं भग्गो दंडो गयणंगणाओ फारकुलिंगदारुणा पडिया उक्का, दिवसेचिय उल्लसिया
तारया, जायं रुहिरवरिसं, निरब्भंमि चेव अंबरे फुरिया सोयामणी, अविण्णायसरूवो तडत्ति विहडिओ जयकुंजरो, नि-
न्निमित्तं चिय जलणजालाकलावेण कवलियाइं जच्चतुरंगमपुच्छाइं, परिगलिया सयमेव भग्गदंडा जयपडाया, जाया य
पलीणमयजला हत्थिमंडली, अणवरयरेणुवरिसदुरालोयं विच्छाइभूयं दिसाचक्रं, अंसुप्पवाहो मुक्को देवयापडिमाहिं,
परोप्परं हसियाइं चित्तकम्मरूवाइं, उट्टमुहेहिं दीणस्सरं परुन्नं सारमेणहिं, एवमाईणि उप्पन्नाणि बहूणि असिवाइंति ।

ताहे असिग्निरिक्खणसंजायमहाभया कुसलमइणो । आसग्गीवणरिंदं भणन्ति विणओणया सचिवा ॥ १ ॥

देव ! हिमं व विलिज्जइ पयावभेत्तेण तुम्ह पडिवक्खो । किमकंडविडुरकरो पारद्धो समरसंवाहो ? ॥ २ ॥

तुह तुरयखरखुरुदुयरयपडलेणं पणट्टकरपसरो । सूरौचि अंतरिज्जइ को अन्नो जो परिप्फुरइ ? ॥ ३ ॥

श्रीगुणचंद
महावीरच०
३ प्रस्तावः
॥ ५३ ॥

ता सुयह विजयजत्तं नयराभिमुहं लहुं नियत्तेह । असिबोवसमनिमित्तं कीरंतु य होमजागाई ॥ ४ ॥
नहु एरिस असिबेहिं कोसलं किंपि देव ! पेच्छामो । पूरिजंति किमेवं सत्तूण मणोरहा धणियं ? ॥ ५ ॥
एवमाइन्निऊण भणियं रत्ता—भो भो किमेव वाउलत्तणं तुम्हे निन्निमित्तं पडिवत्ता ?, किं न सुणह मम भुय-
दंडपरक्कमं ? न वा सुमरह चिरपभूयसमरसम्महविहवियपडिवक्खसंपत्तविजयं ? न वा पेच्छह अपरिकलियसंखं भरिय-
निण्णुन्नयमहिविभागं महोदहिसलिलं पि व चाउहिंसिं पसरियं चाउरंगं बलं ?, किमिव अट्टाणे धिय भयह, किं वा
सनयराभिमुहं मं नियत्तावेह ?, न हि पारद्वक्थुपरिचाइणो सलहिज्जंति पुरिसा, न य तहाविहसंदिद्धकइवयअमं-
गलमेत्तेणवि खुब्भंति वीरा, जओ—

गहगणचरियं सुमिणाण दंसणं देवयाण माहप्पं । सुणखररसियप्पमुहा सउणा य तहा जणपसिद्धा ॥ १ ॥
उक्कानिवडणरुहिराइवरिसपमुहाइं दुन्निमित्ताइं । सबाइं घुणक्खरसंनिभाइं को तेसि भाएज्जा ? ॥ २ ॥
ता धीरा होह, निवाडेमि नीसेसदुन्निमित्तसत्थं मत्थए पयावइस्स, इति भणिऊण विसुमरियनिमित्तिगवयणो
अवस्संभवियव्वयाए विणासस्स पडिक्कलयाए देवविलसियस्स वारिज्जमाणोऽवि पुराणपुरिसेहिं पडिखलिज्जमाणोऽवि
कुसउणेहिं सोवरोहं नियत्तिज्जमाणोऽवि अंतेउरजणेण छत्तमंगं सुणाविज्जमाणोऽवि निमित्तपाढगेहिं सयलबलसमेओ
गंतुं पयट्ठो, कमेण य पत्तो सदेससीमासंबत्तिणं रहावत्तपयदेसं, तहिं च खंधावारनिवेसं कारावेऊण वाहराविओ

दुर्निमित्तेषु
मन्त्रिशिक्षा.

॥ ५३ ॥

दूओ, भणिओ य-अरे गच्छसु पयावइस्स सगासे, भणसु य तं-एस आगओ आसग्गीवो राया जुञ्जसज्जो वट्ठइ, सिग्घं संमुहो एहि, कुमारपेसणेण संभाणं वा करेहि, मा अकालेच्चिय कुलक्खयं जणेमुत्ति, जं देवो आणवेइत्ति पडिच्छिऊण से सासणं नीहरिओ दूओ, कमेण य गओ पयावइस्स मूलं, कहिओ णरिंदाएसो, रुढो तिविट्ठुकुमारो, भणिउमादत्तो य—

रे दूय ! तुममवज्झो निब्भयचित्तो ममोवरोहेण । धोडयगीवं गंतुं फुडक्खरं भणसु वयणमिमं ॥ १ ॥

मा होहिसि विगयभओ वडुपरिवारोत्ति चिंतिउं अचिरा । सीहोव मइसिलिं वं एस तिविट्ठु तुमं हणिही ॥ २ ॥

अज्जवि पयावइनिवो नियनामत्थं फुडं सुमरमाणो । रक्खइ तं जइ परिहरसि निट्ठुरत्तं वहसि पणयं ॥ ३ ॥

अहउभिणिविट्ठमईणं सुट्ठु भणियं पि दोसमावहइ । ता किं निरत्थएणं सिक्खादाणेण एएण ? ॥ ४ ॥

दूएण तओ भणियं अज्जवि दुस्सिक्खिया दढं तुम्हे । न सुणह देवस्स बलं तेणेवमसंकमुल्लवह ॥ ५ ॥

अह पयावइणा भणियं-भइ ! वच्च नियनरिंदसगासं, साहेसु य जहा-एस आगओ पयावइत्ति, एवमाइन्निऊण निग्गओ दूओ, राइणावि काराविओ सेन्नसंवाहो, तओ पक्खरिज्जंतदप्पियवग्गतुंरंगं गुडिज्जंतगयघडं समरपरि-हत्थुच्छहंतफारफारक्कचक्कं चंडगंडीवगुणज्झणकारमुहलुच्छलंतधणुदरं रहारुढपवरवीरं नाणाउहहत्थसमुत्थरंतमुहड-सत्थं चलयं चाउरंगं बलं, तेण य परिवुडो पयंडगुडाडोवभासुरकुंजरकंधराधिरुढो नीहरिओ पुराओ पयावई, एत्थं-

श्रीगुणचंद्र
महावीरच०
३ प्रस्तावः

॥ ५४ ॥

तरे नीलचलंतमहंततालज्झयाणुसारमिलियसामंतपरिगण पबलनीलीनीलयदुउलनियंसणेण करयलफुरंतहलमुसल-
पहरणेण संगामसंगमुक्कंखिरेण अयलकुमारेण अणुगम्ममाणमग्गो आमलगथूलमुत्ताहलहारेण गयणाभोगोव नहसुरस-
रिपवाहेण सोहंतवियडवच्छत्थलो तरुणतरणिकिरणसन्निगाससिचयजुयलेण वडवानलजालाकलावेण जजरासिच
रेहंतदेहो सवणकयकणयकुंडलकंतिपसरेण तक्कालसंगमूसुरायसिरिसरागतिरिच्छच्छिविच्छोहेहिं व भासमाणवयणो
पुरो पइद्वियरणलट्टिनिविट्टुकणयकचिलगरुलकंतिपडलच्छलेण कोवं व उगिरंतो तिविट्टुकुमारो, सिग्घं गंतूण मि-
लिओ पयावइनरिंदस्स, भणिउभाट्तो य-ताय ! नियत्तह तुम्हे, देह ममाएसं, कित्तिथमेत्तो एसो घोडयग्गीवो ?,
अवणेमि तुम्ह पसाएण एयस्स धिट्टुसोंडीरयं, न य बहुसहाओत्ति संकणिज्जं, जओ भोयणमेत्तसहायिणो इमे,
परमत्थेण एगागी चेव एसो, रायणा भणियं-पुत्त ! लीलाविहाडियसमुक्कडकेसरिकिसोरस्स अविगणियपडिवक्ख-
लक्खस्स किं असज्झं तुह परक्कमस्स ?, केवलं दूरट्टिया कोऊहलपेच्छगा एत्थ अम्हे, कुमारेण वुत्तं-एवं होउ,
अह विसिट्टुसउणोवलंभवहंतपरितोसाणं अणवरयपयाणगेहिं वचंताणं तोसिं तस्स रहावत्तपव्वयस्स समीवे संप-
त्ताणं अवरोप्परासन्नदंसणवसेण जाए हलबोले परिकप्पियपक्खरगुंडाडोवाइं उट्टियाइं तुरक्कहत्थिसाहणाइं उडुयध-
यचिंधाइं, संपलग्गाइं उभयबलाइं, तओ-ताडियसरतूरतुट्टजणं भयथरहरंतकायरगणं, उहामबंदिसहपढणुच्छहंतसु-
हडं वरधूलिधूसरियरहघयवडं ॥ १ ॥ खरखुरूपकप्परियतुरयपक्खरियनियतुरयघट्टलोट्टावियकुंतयरं । आसवारकरु-

त्रिपृष्ठाच-
लयोगमर्न.

॥ ५४ ॥

क्खयतिक्खकरवालविदारियसूरसिरं गुंडियगुरुकरडिघडफोडियतुरयघटं अन्नोन्नमिलणजायनिविडसंघटं ॥ २ ॥
 सरलसेलकलोलकीलिज्जंतकुंभपलायंतगयं सुन्नपुन्नहिंदंतचंडचंडुलइयं । तिसूलभल्लिसेलभिन्नवेलंतनरं, उत्तालनियडियल-
 त्तलत्तधरं ॥ ३ ॥ दंतिदंतसंघट्टपयट्टानलकणं, उद्धवाहुनचंतकवधपबन्धघणं । विप्फुरंतकुंतग्गघायघुम्मियरहियं, सारि-
 मज्झजुज्झंतजोहघायदुव्विसहं ॥ ४ ॥ कुंभिकुंभघायसमुच्छलियरुहिरप्पवहं भूमिवट्टनिचेट्टपडियसमुत्तुंगमायंगरुद्धपहं ।
 महल्लच्छभल्लभल्लुंकमुक्केफकारभीसणं, संगामरसियसुहडलोयतोसणं ॥ ५ ॥ काऊण(दंडपडण)विचित्तसमरवाधारं ॥
 धाणुकदुकधाणुकयाहं, फारक्कियभडफारक्कियाहं । कुंतयरभिडियसमवग्गियाहं, खग्गाउहउक्खयखग्गियाहं ॥ १ ॥
 पडिखलियतुरंगतुरंगमेहिं, मेलंतसेलभडदुग्गमेहिं । मयगलगिलंतमयगिण्णमंड, अन्निमट्टपरोप्परबद्धसुंड ॥ २ ॥

पाउन्भवंतअइघोररोस खणि खणि विमुक्कभीसणनिघोस ।
 चाउहिसि सुहड समोत्थरेवि पहरंति समरि नियपाण देवि ॥ ३ ॥
 नाणाउहहत्थनरिंदवग्ग अवरोप्परजुज्झितसंपलग्ग ।
 गयजीविय निवडहिं दंडनाह, पवहंतरुहिरपहजुय अगाह ॥ ४ ॥
 सेसारुणच्छुरणबद्धकच्छु, मह दंसह आसग्गीवु हत्थु ।
 इय जंपिरु रिउ पडिसत्तुराओ, एत्थंतरि पडिपहरंतु आउ ॥ ५ ॥
 तो वंगकल्लिगनगराहिवेहिं, जुगवं चिय मुक्कमहाउहेहिं ।

श्रीगुणचंद
महावीरच०
३ प्रस्तावः

॥ ५५ ॥

पडिखलियउ पयावइ जुज्झमाणु, साहुव जाओ परिचत्तुमाणु ॥ ६ ॥
आसग्गीवह सेत्रेण अइवहुसंखेण हरिकरिसंदणदुद्धेण ।
निम्महिय परकसु पहणिय उज्जसु कयउ पयावइ तक्खणेण ॥ ७ ॥
मुणिवि तं निजियं जायकोबुग्गमो, भिउडिभीमाणणो पायडो नं जमो ।
अवलु पयलंतइलमुसलदिवाउहो, सिग्घवेगेण सत्तूण ठिओ संमुहो ॥ ८ ॥
तयणु चिरलद्धजयवायगव्वुदुरा, ते नरिंदा समुवूढदढमच्छरा ।
सेल्लनारायसरनिरयमेलंतया, अयलपासंमि वचंति वग्गंतया ॥ ९ ॥
हरिसभरतडयडुत्तुट्ठकंकडगुणो, सोयते पेच्छिउं वाढमखुभियमणो ।
जंपए रे लहुं चयह चक्खुप्पहं, कीस वच्चह विणा कारणं जमगिहं ? ॥ १० ॥
किं न भो नियह मह लंगलं सियसिहं, कुवियकीणासजीवं व अइदुस्सहं ।
वइरिवच्छत्थलीयिलिहणुडामरं, जस्स कंतीहिं अरुणिज्जए अंबरं ॥ ११ ॥
किं न वा मुसलमलिवलयकसिणप्पहं, धरणिमणिसारपरमाणुनिम्मियमुहं ।
जयह तुब्भे जमेवं रणे उज्जया, तेहि वुत्तं अरे तुज्झ का चंगया ? ॥ १२ ॥

त्रिपुष्पाश्व-
ग्रीवयो-
र्युद्धम्.

॥ ५५ ॥

जेण दीसंसि तुह सन्निहा हालिया, धरइ लीलाएँ मुसलंपि किल महिलिया ।

एवमुल्लाविरं वइरिसत्यं बलो, सरइ वेगेण करकलियसियलंगलो ॥ १३ ॥

केऽवि मुट्ठिप्पहारेण ताडइ भडे, अवरि मुसलेण चूरइ सहावुम्भडे ।

हलसिहग्गेण केसिंपि उरु दारए, अन्नि चलणप्पहारेण मुसुमूरए ॥ १४ ॥

एकघाएण पाडइ महाकुंजरे, तणयपूलं व गयणे खिवइ रहवरे ।

मुयइ करुणाय परिचत्तसवलाउहे, ठाइ निग्गयपयावोऽवि नो से मुहे ॥ १५ ॥

इय निट्ठुरगत्तेण निरुवमसत्तेण निट्ठुरेण बलदेवेण बलु बलु विरियहं ।

तक्खणि विद्धंसिओ भडमउ नासिउ सयलदिसामुह पसरियहं ॥ १६ ॥

एवं चिय पइदिवसं दोणहवि सेन्नाण जुज्झमाणाणं । विविहप्पधारभीमं एयं जायं समरठाणं ॥ १७ ॥

एगत्थ पडियनरवइपियंगणाकरुणरुन्नरवभीमं । अन्नत्थ बंदितज्जणसवडंमुहचलियपडिसुहडं ॥ १८ ॥

एगत्थ दंतिदसणग्गभिन्नसूरासिलेहहयरहियं । अण्णत्थ भीयकायरनियमुहखित्तंगुलीवलयं ॥ १९ ॥

एगत्तो ऊसियकरमाद्वयऽण्णोण्णवीरवरपुरिसं, अबत्थोर्मिठविणट्ठुर्मिठपरिभमियगयनिवहं ॥ २० ॥

एगत्थुत्तालिमिलंतघोरवेयालविहियहलवोलं, अन्नत्थ सिवागणखज्जमाणगयजीवनरनिवहं ॥ २१ ॥

श्रीगुणचंद
महावीरच०
३ प्रस्तावः

॥ ५६ ॥

एगत्तो दंसणतिक्खचक्खिज्जंतमहिगयजणोहं, अन्नत्तो भडतोसियमागहगिज्जंतवरचरियं ॥ २२ ॥
इय विहियविविहभीसणकिरिएहिं उभयसेन्नसुहडेहिं । समरंगणं सुराणवि जायं अच्चंतभयजणमं ॥ २३ ॥
किं च—रणट्टाणनिवडियकण्णसीसकरचरणजंचतणुखंडं । विहिणो घरं व नज्जइ जयजणघडणुज्जयमइस्स ॥ २४ ॥
एवं च बहुइं वासराइं महासम्महेण निवाडियाणेगसुहत्थिसु तिक्खनारायनिम्भिन्नकुंभिकुंभत्थलेसु, चुरियचारु-
तुंगसिंगरहवरेसु मुसुमूरियनरवइसहस्सेसु जायंतेसु आओहणेसु पेच्छिऊण बहुजणक्खयं तिविट्ठुणा भणाविओ
दूयवयणेण आसग्गीवो, जहा—किमणेण निरत्थएणं निहोसपरियणक्खएणं?, तुमं च अहं च परोप्परवद्धवेरा, ता
अंगीकरेह नियभुयबलं, सम्मं ठवेहि चित्तावट्ठं विमुंच कायरत्तं परिचय परपुरिसायां दावेहि सहत्थकोसलं मेलेहि
सरीरसोकुमलं पगुणो भवाहि असहाओ मए एगागिणा सह जुज्झिउंति, सम्ममवधारिऊण गओ दूओ, निवेइओ
आसग्गीवस्स कुमारसंदेसगो, पडिवन्नो य राइणा, जाए बीयदिवसे विचित्तपहरणपडिहत्थं जोत्तियपवरतुरयं
सारहिमेत्तपरियत्तपरियं संदणमारुहिऊण ओइण्णा रणभूमीए आसग्गीवतिविट्ठुणो, ठियाइं उभयपासेसु सपहुपरक-
मावलोयणकोऊहलाइं दोन्निवि बलाइं, रुंदसंदचंडिकोहंडिपमुहदेवउवजाइयसयदाणपरायणाइं निलीणाइं उच्चपएसेसु
अंतउराइं, पेक्खणुकंखिरा य गयणंगणमोगाढा सुरकिंनरकिंपुरिसविज्जाहरा, लंबंतमुक्कजडाडोवो पाणिपरिगहिय-
छत्तगो संगामदंसणुवूढगाढहरिसो पइक्खणअट्टट्टहासे मुयमाणो देवसमूहं च सोवओगं कुणमाणो वियंभिओ अंतरे

त्रिपृष्ठाश्व-
श्रीवयो-
युद्धम्.

॥ ५६ ॥

नारयमुणी । एत्थंतरे आसग्गीवेण भणिओ तिविद्दु—

गिरिगुहनिवाससि(स्त्रि)न्ने रोगजराजज्जरंगए सीहे । निहए करुणाठाणे अहो तुमं बलमयं वहसि ॥ १ ॥
 किमहं तं न समत्थो विणासिउं पढममेव लीलाए । किं तु मयमारणे अवयसो सिया तेण नो हणिओ ॥ २ ॥
 जइ कहवि दुद्धवयणोत्ति कलिय नो सिक्खविंति तं कुसला । किं एत्तिएणऽवि मुहा परंमुहो सुंदर ! नयस्स ॥ ३ ॥
 सच्चं चिय न कयंतो कुद्धो विहवइ करचवेडाए । किं तु दुबुद्धी दाउं परस्स हत्थेण मारेइ ॥ ४ ॥
 जं चिय किंचि परूढं बाहुबलं तुज्झ नरजणम्महियं । पक्खुम्भेओव पिक्खीलियाण तंपि हु वहट्ठाए ॥ ५ ॥
 थेरस्स पयावइपत्थिवस्स पुत्तच्छलेण तं भइ । नूणं विणासपिसुणो समुग्गओ धूमकेउव ॥ ६ ॥
 ताहे तिविद्दुणा सो भणिओ बुद्धत्तणस्स तुह पढमो । पाओ पाउम्भूओ दुव्वयणुलावरूवो किं ? ॥ ७ ॥
 किं वा सन्निहियकयंतसंगसंजायनिहुरसहावो । निम्मेरं थेर ! समुल्लवेसि वन्नसि समाहप्पं ॥ १ ॥
 रणकसवट्ठयनिवडियपवरसोडीरिमासुवण्णस्स । अत्तुकरिसो सोहइ नरस्स वन्निज्जमाणोऽवि ॥ ९ ॥
 ता संवरेसु वयणं खणमेक्कं अंतरे परिभमंतु । तुज्झ महच्चिय बाणाऽरिपक्खमहणा महावेगा ॥ १० ॥
 आसग्गीवेण पुणो भणिओ डिंभोत्ति मज्झ नो घायं । दाउं खमंति हत्था ताहे पहरसु तुमं पढमं ॥ ११ ॥
 तिविद्दुणा भणियं—भो घोडयग्गीव ! पुरा मम तायस्स तुमं सामिसइमुवइंतो ता तयणुवित्तीए चेव अणइकम-

श्रीगुणचंद
महावीरच०
३ प्रस्तावः

॥ ५७ ॥

णिज्जवयणोऽसि अओ अवहिओ होहि एसा निवडइ कयंतदिट्ठि व दुविसहा विसिहपरंपरत्ति भणिऊण आयन्नमा-
कट्ठिय कोबंडं रणज्झणाविया पडंचा, मुक्का सलोहा मम्मावेहिगा खलालिच्च निहुरा सरधोरणी, तओ आसग्गीवेण
धणुवेयकुसलयाए अद्धमग्गमपत्तेच्चिय खंडिया तिकखलुरुपेहिं, पुणरवि कुमारेण भिच्चोव्व सपक्खो निरवेक्खगामी
खित्तो नारायनिवहो, सोऽवि निप्पुण्णजणमणोरहोव्व पडिखलिओ आसग्गीवेण, किं बहुणा?—

जं जं सत्थं किंपिवि खियइ नरिंदस्स संमुहं कुमरो । तं तं आसग्गीवो दक्खत्तणओ पडिक्खलइ ॥ १ ॥
आसग्गीवोऽवि पयंडकोवज्जी सुयइ पहरणं जमिह । वेज्जोव्व रोगजायं कुमरोऽवि तयं पडिहणेइ ॥ २ ॥
अह भरह्वाहुवलिणोव्व गाढममरिसभरेण पहरंता । खयसमए राहुसणिच्छरव रेहंति ते दोऽवि ॥ ३ ॥
एवं परोप्परं जुज्झिराण तेसिं पगिट्ठदप्पाणं । सचराचरावि धरणी धरहरिया पयभरकंता ॥ ४ ॥
एत्थंतंरंमि अणवरयखिवणओ पहरणुच्चओ सब्बो । आसग्गीवनरिंदस्स निट्ठिओ सुकयरासिच्च ॥ ५ ॥
ताहे किंकायव्वयवाउलचित्तेण खेयविहुरेण । अविभग्गपसररिउदप्पदंसणुबूढकोवेणं ॥ ६ ॥
आवयधणं व दढपणयचित्तमित्तं व पियकलत्तं व । विसमावडिणं नरवरेण संसुमरियं चकं ॥ ७ ॥
अह जलणुब्भडपसरंतकिरणमालासहसपल्लवियं । जुगविगमुग्गयमायंडचंडमंडलयदुप्पेच्छं ॥ ८ ॥
रुद्धमारुणनयणं व मिलियनीसेसविज्जुपडलं व । आसग्गीवस्स झडत्ति चक्करयणं करे चडियं ॥ ९ ॥

विपृष्ठाश्च-
ग्रीवयो-
र्युद्धम्.

॥ ५७ ॥

तयणंतरं च पहरिसतडत्तितुद्वंतवम्मवंधेण । तेण विमुकं वहणट्टयाए सिग्घं तिविदुस्स ॥ १० ॥

गंतुं कयाडघियडे वच्छयले तं जवेण कुमारस्स । चिरदंसणुस्सुयं वल्लहं व तुवेण संलग्गं ॥ ११ ॥

एत्थंतरंमि दढचकतुंवसंघट्टधायविवलंगो । मुच्छानिम्मिलियच्छो पडिओ धरणीयले कुमरो ॥ १२ ॥

आसग्गीववलेणं ताहे संपन्नवहुपमोएणं । जयजयसहुम्मिस्सो पकओ कोलाहलो सहसा ॥ १३ ॥

तथा—जाव य उग्गीरियविविहपहरणा नावडंति सत्तुभडा । ताव तिविदुक्कुमारेण तक्खणं विगयमुच्छेणं ॥ १४ ॥

ओ घोडयगीव ! गओऽसि नासमहुणत्ति संलवंतेणं । तं चिय तस्साभिमुहं मुकं चकं झलहलंतं ॥ १५ ॥

तो तं तालफलंपिय तडत्ति छेच्छूण तिवक्खधाराए । आसग्गीवस्स सिरं करे ठियं पुण तिविदुस्स ॥ १६ ॥

अह निहयंमि आसग्गीवे हरिसवसविसप्पमाणसमुच्चरोमंचेहिं सहसच्चिय जयजयरवं करतेहिं सुरासुरेहिं सरसपा-
रियायतरुमंजरीनियरसंवलिआ सोरभभरगंधलुद्धमिलंतभसलजालमुहला अणवरयविणिंतामंदमयरंदविदुसंदोहविच्छु-
रियसयलदिसा कमलकुवलयमालइपमुहा मुक्का पंचवन्नकुसुमवुट्ठी, उग्घोसियं च महया सहेण जहा—भो भो पत्थिवा !
परिचयह कोवकंडुं मुयह दुव्वहदुविणयपणयं परिहरह आसग्गीवपक्खवायं उज्झह असज्झवावारं पणमह सवायरेण
तिविदुं, एसो खु एत्थ भरहस्सेत्ते समग्गवलवंतपुरिसप्पहाणो पुव्वभवसमुवज्जियसुकयसंभारवसविसप्पमाणमहल्लक-
लाणनिहाणो उप्पन्नो पढमो वासुदेवोत्ति । एवं च आयन्निऊण संभंतविलोयणेहिं दूरपरिमुक्कपहरणपवंधेहिं अहमह-

श्रीगुणचंद
महावीरच०
३ प्रस्तावः

॥ ५८ ॥

मिगाए पडिक्खलंतमणिकिरीडकोडिमसिणियकमनहनवहेहिं भालयलघडियकरसंपुडेहिं पंचंगपणिवायपुरस्सरं
पणमिओ पत्थिवसहस्सेहिं तिविट्ठु । विन्नत्तो य—

देव ! परायत्तेहिं जुत्ताजुत्तं अयाणमाणेहिं । अम्हेहिं जमवरद्धं तमियाणिं खमह नीसेसं ॥ १ ॥

कुणह पसायं नियचरणनलिणसेवापयाणओ अम्हं । मोत्तूण तुमं एक्कं अन्नो नो विज्जए नाहो ? ॥ २ ॥

एयमायन्निऊण तिविट्ठुणा भणियं—भो भो नरेसरा ! किमेवं जंपह ? को तुम्ह दोसो ?, परायत्तचित्ताणं एस-
च्चिव गई, ता मुयह पडिभयं, पसंतडिंबडमराइं भुंजह नियनियरज्जाइं, मम छत्तच्छायापरिग्गहियाण पुरंदरोऽवि न
पहवेइ तुम्हाणंति । एत्थंतरे तिविट्ठुसेवोवगयनरवइवग्गावलोयणसंपन्नासग्गीवविणासनिच्छयं समागयं तं पएसमं-
तेउरं, दिट्ठो छिन्नगलनाडिनिस्सरंतरुदिरपंकविलुत्तगतो रत्तचंदणकयंगराओव्व उवरि परिभमंतपिसियासिपक्खि-
निवारियरविकरपसरो धरियमहप्पमाणलत्तोवमंव सन्निहिनिवडियपहाणपुरिसवग्गो अत्थाणगओव्व आसग्गीवनरिंदो ।
अह अदिट्ठुपुव्वं अच्चंततिक्खदुक्खावहं तारिसमवत्थंतरं से पासिऊण अक्कंदिउमारद्धमेवमंतेउरं—

हा हा कयंत ! निक्करुण ! किं तए पाव एवमायरियं ? । जं एवंविहपुहईपहूऽवि एसो हयास हओ ॥ १ ॥

किं एत्तियाहिं निहयाहिं तुज्झ तिच्ची न सुहडकोडीहिं । उप्पन्ना निप्पुन्नय ! जमेस रायावि संहरिओ ॥ २ ॥

हे चक्क ! निक्किव ! कहं सपडुविणासाजसो तए विहिओ ? । तुम्हेहिऽवि किं जक्खा ! उवेक्खियं निग्घिणा एयं ? ॥ ३ ॥

त्रिपृष्ठस्य
जयः अश्व-
श्रीवान्तः पु-
रविलापः

॥ ५८ ॥

हे काल ! बद्धवरवंसजाय तुज्झवि गुणेण किं तेण ? । हा हा रक्खामणिणो वीसत्थविणासगा तुम्हे ॥ ४ ॥
 धी धी पुरोहियाहम ! चिरकालं तप्पियं तए जलणं । निलज्ज ! कहसु संपइ असिवं किं जं पडिक्खलियं ? ॥ ५ ॥
 हे अंगरक्खवग्गा ! तुम्हेऽविहु कीस संपइ पलाणा ? । हा हा एगए चिय सवंपि परंमुहं जायं ॥ ६ ॥
 हा पाणनाह ! संपइ पडिहयपडिवक्खसुहडलक्खंमि । तुमए सग्गोवगए तडकिही कस्स जयढका ? ॥ ७ ॥
 हा रायलच्छि ! वेहव्वदूसिए कीस जीवसि इयानिं ? । इहराणुहवसि दुक्खं दूमिज्जंती कुनाहेहिं ॥ ८ ॥
 इय विलविरीहिं निदयताडियथणवट्टतुट्टहाराहिं । वेहव्वदुक्खभरभज्जिरीहिं पल्हत्थवलयाहिं ॥ ९ ॥
 अणवरयघोरगलियंसुवाहं रुत्तं तहा मयच्छीहिं । जह तहेसगएणं रुत्तं पक्खीणवि गणेणं ॥ १० ॥
 ताहेऽणुजीविणा परियणेण पम्मुक्कपोक्करुत्तेण । आसग्गीवसरीरं खित्तं जालाउले जलणे ॥ ११ ॥
 एत्थंतरे अंतेउरीजणवेहव्वदुक्खमसहमाणोव्व पयंडरणकम्मदंसणभयभीओव्व तिक्खासिखंडियहयरुंडावलोयणु-
 त्तरहत्तरंगोव्व समीरणुदुयरुहिरसीयरासारसंसित्तोव्व आलोहियमंडलो झडत्ति चक्खुगोयरमइकंतो सहस्स-
 किरणो, गवलगुलियालिवलयक्खलतिमिरपडलपडकयावगुंठणा फुरंततारनयणा अणवरयनिवडंतउक्काफुलिं-
 गुग्गारच्छलेण मणोइरित्तपरिपीयसुहडजणरुहिरगंडूसं व मुयंती महारक्खसिव भयजणणी पसरिया रयणी, ठिओ
 नियनियट्ठाणेसु जणो, कमेण य जाए पहायसमए भणिया तिविहुणा नियपुरिसा-भो भो गच्छह संगामभूमिं,

श्रीगुणचंद
महावीरच०
३ प्रस्तावः

॥ ५९ ॥

निरुवेह पहारपरव्यसे जोहनिबहे करेह ओसहघायबंधाइणा परित्ताणं परिमग्गह दुद्धतुरंगमपल्हत्थिए पत्थिवेत्ति-
सम्मं निउंजिऊण(अंतेउरेण)समं समग्गनरवइयग्गपरियरिओ समेओ पोयणपुरं, तओ नयरलोएण कयं वेजयंती,
सहस्साभिरामं ठाणठाणनिबद्धमंचारूढविलासिणीनट्टरमणिज्जं पमुक्कसुरभिपुप्फुंजोवयारकलियरायमग्गं पदयपड्ड-
पड्डहपमुहजयतूरनियरं नयरं पविट्ठो महया विभूइए तिविट्ठू, जहोचियठाणेसु ठिओ सेसो परिवारो । तओ कइवय
वासराइं तत्थ ठाऊण पुणोऽवि समग्गवलकलिओ चक्कलत्तधणुमणिमालागयासंखरयणपरिगओ निग्गओ दिसि-
विजयनिमित्तं तिविट्ठू, कमेण पसाहियं भारहद्धखेत्तं, अपणयपुव्वा नामिया पत्थिवा, गाहिया सेवावित्तिं, गहियाइं
तेहिंतो करितुरयरयणपमुहाइं पहाणपाहुडाइं, एवं च नीसेसमंडलाहिवसहस्साणुगम्ममाणमग्गो पेच्छंतो अपुव्वा-
पुव्वनयराइं ठावितो अंगवंगकलिंगाइसु अन्नन्ननरिंदे पत्तो मग्गहाविसए, तहिं च दिट्ठा कोडिपुरिसवोज्झा महा-
सिला, सा य भुयबलावलेवओ लीलाए वामभुयदंडेण उक्खिविऊण छत्तगं व धरिया सीसोवरिं, अतुलियबलावलोय-
णहरिसुप्फुललोयणेहि य कओ नरवईहिं जयजयारवो, पढियं च मागहग्गणेहिं, कहं?—

देव ! मणालागारो तुज्झ करो कलियरुंदकोडिसिलो । सिरिधरियधरणिवट्ठस्स बहइ सेसस्स समसीसिं ॥ १ ॥

तुह एधंविहलीलाइएण चित्तं न कंपए कस्स । जइ सब्बहावि पत्थरविणिम्मिओ होज्ज सो न जणो ? ॥ २ ॥

इय मागहेहिं णेगप्पयारवयणेहिं संयुणिज्जंतो । मोत्तूणं कोडिसिलं चलिओ राया सपुरहुत्तं ॥ ३ ॥

त्रिखण्ड-
साधनं
कोटीशि-
लोत्पादनं

॥ ५९ ॥

गच्छन्तो य पत्तो दंडगारन्नपरिसरं, तर्हि च खंधावारनिवेशं काऊण ठिओ कइवय वासराइं, एगया य रयणी-
मज्झनिम्बरपसुत्ते सेयगजणे अणुरत्तविरत्तपरिवारचारमुवलंभिउं करकलियचको कयवेसपरियत्तो अणुवलक्खिज्जमाणो
जामकरिघडारूढेहिं अंगरक्खेहिं नीहरिओ एगागी वासुदेवो निययगुडुराओ, अमुणियपयप्पयारो य इओ तओ
परिब्भमंतो जाव खंधावारनिवेशमइक्कमिऊण गच्छइ ताव निसामेइ थेवदेसंतरियं मंदं मंदं कोलाहलं, तं
च निसामिऊणुप्पन्नकोऊहलो पधाविओ तयभिमुहं, कमेण पत्तो एगं बहलतरुवरसंछन्नं काणणं, तर्हि च पत्तस्स
उवसंतो सो कोलाहलो, तओ किं विभीसिया एसा? मइविब्भमो वा ममेत्ति जाव चित्तेइ ताव काणणम्भंतराओ
समुट्ठिओ सदुक्खनरघणियसहो, तदणुभाणेण य पुणो पट्ठिओ तिविदू, अह वच्छत्यलविप्फुरंतकोत्थुममणिमऊढवि-
द्धंसियंभयारे जाए तत्थ पएसे थेवंतरगएण हरिणा दिट्ठो रुक्खेण समं विविहबंधणवद्धो पुरिसो, (पुच्छिओ सो
उचिधायरेण) भो को तुमं? केण वा इममवत्थंतरं पाविओसित्ति?, तेण जंपियं-महाणुभाग! निविडबंधणत्तणओ
न सक्केमि परिकहिउं, ता अवणेहि बंधे जेण साहेमित्ति कहिए तिविदुणा चक्केण निकंतिया बंधा, जाओ वीसत्थो,
भणिउं पयत्तो य-अहो निष्कारणपरमबंधुव्व निसामेहि मम वित्तंतं, अहं रयणसेहरो नाम विज्जाहरो रूवलावन्नसुं-
दराइणुणावडिभूयाए सिंहलरायधूयाए विजयवईनामाए पुब्बं चिय बहुप्पयारपत्थणार्हिं दिन्नाए परिणयणत्थं
संपयं समग्गसामग्गीसणाहो जाव तत्थ पट्ठिओ ताव एत्थप्पएसे संपत्तो समाणो वाउवेगाभिहाणेण वेरिणा वि-

श्रीगुणचंद
महावीरच०
३ प्रस्तावः

॥ ६० ॥

ज्जाहरेण सच्चस्समवहरिऊण दुक्खेण मरउत्ति विभावितेण एवं गाढं वंधिऊण चत्तोऽम्हि, तिविहुणा भणियं-तुमं विज्जाहरो होऊण केण कारणेण भूमिगोयरधूयं उव्वोदुमिच्छसि?, तेण जंपियं-महाभाग! अपुव्वं किंपि से रूवं असरिसं च लायन्नंति, तिविहुणा चितियं-जइ सच्चं चिय एवंविहगुणोव्वेया सा ता मम जोग्गा परिणेउंति विभाविऊण भणिओ एसो-अहो तुमए उव्वूढावि एसा तेण वेरिणा हीरिही, ता किं निरत्थएण तदुवलंभेण?, विज्जाहरेण जंपियं-सच्चमेयं जइ तुम्ह सत्ती अत्थि ता तुम्हे परिणेह, परिचत्ता-मए इयारिणं, पडिवन्नं तिविहुणा, कयप्पणामो गओ सट्ठाणं विज्जाहरो, हरिणावि सिंहलेसरं अणेगप्पयारोहिं पत्थिऊण परिणीया सा विजयवई धूया, आगओ य निययपुरं, पडिच्छिओ महारायाभिसेओ, जाया वत्तीसं सहस्सा जुवईणं-

अह निच्चपयट्ठविसट्ठगीयझंकारमिस्समुरवरवे । नडचेडचाडुकारयकिंकरनरनियरपरियरिए ॥ १ ॥

सुविभत्तचित्तविच्छित्तिसुंदरे मंदिरे निवसमाणो । अइपडिठ्ठयपडिवक्खं तिसंखंडभरहं च रक्खंतो ॥ २ ॥

भयवसनमंतसामंतमंडलो तरुणिसत्थमज्झगओ । आखंडलोव्व भुंजइ विसए पंचप्पयारेऽवि ॥ ३ ॥

नवरं विजयवईए नामंपिहु नेव गिण्हइ तिविहु । ईसाविसायवसओ सा य पओसं समुव्वहइ ॥ ४ ॥

एवं वोलंतंमि काले अन्नया नियमाहप्पनिहयदुब्बिक्खाइदुक्खनिवहो समागओ भयवं सेयंसत्तिथयरो, विरइयं देवेहिं विसालसालवलयपरिविखत्तं विचित्तमणिमयसिंहासणाभिरामं भवभयत्तसत्तसंताणेकसरणं समोसरणं, तओ

विद्याधर-
मोक्षःविज-
यवत्युदाहः

॥ ६० ॥

सायरमिलंतसुरिंदसंदोहथुणिज्जमाणो उवविट्ठो सिंहासणे जिणो, एतयंतरे जिणागमणनिउत्तपुरिसेहिं वद्धाविओ तिविट्ठो,
कहिओ जिणागमणवइयरो, तओ हरिसभरसमुल्लसंतरोमंचेण य दवाविं पीइदाणं सद्धुवालसकलहोयकोडीओ तेसिं
पुरिसाणं, समग्गबलवाहणो अचलेण समेओ य गओ वासुदेवो वंदणवडियाए, उत्ताइच्छत्तपमुहं जिणाइसयमवलोइऊण
परिचत्तसयलरायचिंधो दूराओ चिय पयचारेण गंतूण तिपयाहिणापयाणपुब्बयं जयगुरुं नमंसिऊण एवं थोउं पवत्तो—

जय संसारमहोयहिपडंतजणजाणवत्त ! जयनाह ! । परमसिवमोक्खकारण ! रणवजिय ! विजियमयमाण ! ॥ १ ॥

निम्महियमोहमाहप्प ! दुट्ठकंदप्पदप्पनिहलण ! । मायाविसवल्लिविणासपरसु जय जय जयप्पवर ! ॥ २ ॥

जय संजमसिरिवल्लह कोहमहाजलणसजलजलवाह ! । जय निम्मलकेवलकलियसयलजीवाइयपयत्थ ! ॥ ३ ॥

जय विण्हुकुलंबरपुण्णचंद ! सुररायनमियपयकमल ! । निप्पडिमपसमवरपुरपायार ! गुणोहसाहार ! ॥ ४ ॥

जय करुणामयसारणिसरिच्छ ! निच्छिन्नकम्मदुममूल ! । दुहसेलदलणदंभोलिसरिसनामग्गहण ! देव ! ॥ ५ ॥

नाह ! तुह पायपंकयममंदमयनिवहकंतिमयरंदं । फुल्लंघयं व धण्णो सयाऽवितण्हो समलियइ ॥ ६ ॥

को तुह जिणवर ! वयणं अमयं व समत्थदोसहरणखमं । पाऊण कुतित्थियवक्ककलुससलीलं समीहेइ ॥ ७ ॥

जइविहु दूरमसारो संसारो तहवि देव ! तुम्हेहिं । विहरंतेहिं मुणिज्जइ सारो निब्बुइपुरिओऽवि ॥ ८ ॥

आसग्गीवाइनरिंदविजयलाभाइ(मेऽवि)नेरिसो नाह ! । जाओ ममप्पमोओ जह दंसणमेत्तओ तुज्झ ॥ ९ ॥

श्रीगुणचंद
महावीरच०
३ प्रस्तावः

॥ ६१ ॥

ता पसिय भुवणबंधव ! जइवि तुमं सवहा विगयरगो । मिथचरणदंसणुगहेण मम तइवि सेयंस ! ॥ १० ॥
एवं च सुचिरं योऊण सो तिविट्ठुनरिंदो निविट्ठो समुचियट्ठणे, भगवयावि आजोयणमित्ताणुसारिणीए वाणीए
समारद्धा धम्मदेसणा, जहा-भो भो देवाणुपिया ! कहकहवि चिरं संसारकंतरमणुपरियट्ठमाणेहिं तुम्हेहिं पा-
विओ एस मणुयजम्मो, जायं अविकलपंचिदिअत्तणं, संपत्ता निकलंकवुं गारोगाइया सामग्गी, समुल्लसिया सद्धम्म-
बुद्धी, ता दुगुञ्जह मिच्छत्ताविरइसंगं समीहह संमत्तनाणचरित्तवित्तं पेच्चए पमावपरपाणिगणदुहविदागं अणुचि-
तह खणदिट्ठनट्ठसरुवयं सव्वभावाणं विमंसह पुणो दुल्लहत्तणं आरियखेत्ताइलाभस्स, अन्नं च—

तुच्छेदियसुहलवमेत्तलालसा कीस वसह निस्संका ? । किं तुम्ह कयंतेण निम्भयपत्तं सयं लिहियं ? ॥ १ ॥

किं वा केणवि अजरामरत्तणं तुम्ह दावियं ? अहवा । मरणाइदुक्खरहियं ठाणं वा कत्थविय दिट्ठं ? ॥ २ ॥

अहवा सासयभावत्तकारणं किं रसायणं लद्धं ? । जेणुसुगत्तठाणेऽवि गाढमंदायरा होह ॥ ३ ॥

भो भो देवाणुपिया ! सद्धम्मोवज्जणे समुज्जमह । परिहरह पावमित्तेहिं संगतिं दुक्खसयजणणिं ॥ ४ ॥

पडिवज्जह निरवज्जं पवज्जं देसविरइमहवावि । निमुणह पसिद्धसिद्धंतदेसणं मोहनिम्महणिं ॥ ५ ॥

अत्तसमं पाणिगणं रक्खह पालेह सीलमकलंकं । साहम्मिएसु रज्जह वज्जह विसएसु य पवित्तिं ॥ ६ ॥

निग्गुणजणं उवेक्खह अत्तुकरिसं सक्कावि परिहरह । अप्पत्तपुच्चगुणगणमन्भस्सह नासह कसाए ॥ ७ ॥

भगवतः
स्तुतिः
देशना च.

॥ ६१ ॥

संतोसं च निसेवह परपरिवायं कयावि माऽऽयरह । ईसरिए मा म(ज्जह मा र)ज्जह पावकज्जेसुं ॥ ८ ॥

दाणार्इसु पयट्टह सेवह सुविसुद्धबुद्धिणा गुरुणो । परउवयारे गिज्झह मा मुज्झह बुज्झह सतत्तं ॥ ९ ॥

एवं च भगवओ धम्मकहमायन्निऊण हरिसुप्फुल्ललोयणेहिं केहिंवि परिचत्तपुत्तकलत्तेहिं पडिवन्ना सबविरई, के-
हिंवि परिग्गहियं सम्महंसणं, अन्नेहिं अंगीकया देसविरई, अन्ने य छिन्नसंसया जाया बहवे पाणिणो, हलहरनारा-
यणेहिंवि अणाचक्खणिज्जं पमोयभरमुद्धहंतेहिं पडिवन्नं सम्मत्तरयणं । अह समइकंताए पोरिसीए वंदिऊण जयगुरुं
गया निययावासं । भयवंपि अन्नत्थ विहरिओ । एवं च वच्चंतंमि काले अच्चंतसुहसागरावगाढस्स तिविठुराणो
एगया समागया परिभूयकिन्नरकंठा गायणा, तेहि य पदंसियं गीयकोसलं, हरियं हिययं तिविठुस्स,
अन्नं च—गीउग्गारो तेसिं जस्स मणागंपि विसइ सवणंमि । उज्झियनियवावारो चित्तलिहिउव सो सुणइ ॥ १ ॥

अच्छउ दूरे एयं तिरियाविडु तेसि गेयवसणेणं । निम्मीलियच्छिणो उच्छहंति नो भोयणार्इसु ॥ २ ॥

एवंविहसुस्सरयागुणेण हरिस्स ते सयावि पासवत्तिणो परमप्पसायठाणं जाया ।

अन्नया य सुसेज्जानिसन्नस्स वासुदेवस्स रयणीसमए समारद्धंतेहिं गेयं, जणिओ बाढं चित्तस्स अक्खेवो, निहागम-
णकाले य निरुविओ वासुदेवेण सेज्जावालो, जहा—भइ ! जया मम निहा एइ तथा इमेगायणा तुमं विसज्जेज्जासि, जं
देवो आणेवइ तं करिस्सामित्ति पडिवज्जियं सेज्जावालेणं, खणंतरेण य आगया राइणो निहा, तेऽवि अविसज्जियत्ति तद्देव

श्रीगुणचंद
महावीरच०
३ प्रस्तावः

॥ ६२ ॥

गाइउमारद्धा, नवरं पच्छिमरयणिसमए पबुद्धेण राइणा ते तहा गायंते निसामिऊण, पुच्छिओ सिज्जावालो-अरे ! कीस
एए न विसज्जिया ?, तेण भणियं-देव ! अइसवणसुहत्तणेणं मए खणंतरं पडिवालिया, एयमायन्निऊण जायगाढकोवो
आगारसंवरं काऊण तुण्हिको ठिओ तिविहू, उग्गए य कमलसंडपडिवोहणे मायंडमंडले उट्टिऊण सयणीयाओ कयपा-
भाइयकायवो निसण्णो अत्थाणमंडवे राया, ठिया य नियनियट्ठाणेसु सामंतमंतिसुहडाइणो, एत्थंतरंमि सुमरिओ रा-
इणा रयणिवइयो, आहूओ सेज्जावालो, भणिया य नियपुरिसा-अरे गीयस्स (ररत्तत्तणेण ममाणाभंजगस्सेयस्स) तत्तत-
उयतंबरसं खिवेह सवणेसुत्ति, एयमायन्निऊण नीओ सो तेहिं एगंतदेसे, कढियतउयतंबयरसेण भरिया कन्ना, महावेयणा-
भिभूओ गओ य सो झत्ति पंचत्तं । तिविट्ठुणावि गाढामरिसवसेण निवद्धं निविडं दुहविवागवेयणिज्जं कम्मं । सावि सिंहे-
लेसरसुया ठाणे ठाणे अत्तणो पराभवं पेच्छंती हरिणा वयणमेतेणवि अविगणिज्जंती सुचिरमप्पाणं झूरिऊण मया
तिरिएसु य उववन्ना, सेसं उवरि भन्निही । तिविट्ठुवि कालंतरेण विविहसोक्खमणुभुंजमाणो रजे रट्ठे (य) मुच्छाणु-
बंधमुव्वहंतो नियभुयवलेण सेसपुरिसवग्गमवमन्नंतो विविहपागाइवायकिरियाए महारंभमहापरिग्गहेहिं अइकूरज्झवसा-
णेण य परिगलियसम्मत्तरयणो नारगाउयं (निकाइऊण) चुलसीईवाससयसहस्साइं सबाउयं पालिऊण कालमासे
कालं किच्चा उववन्नो सत्तममहीए तमतमाभिहाणाए अप्पइट्ठाणंमि नरयावासे लक्खपमाणे पंचधणूसियसरीरो
नारगो । अइगाढपावकम्मेहिं पुव्वभवसंचिएहिं गरुएहिं निहओ विसहतो दुक्खाइं परमतिक्खाइं चाउदिसिनिट्ठुर-

शय्यापा-
लकवधः

॥ ६२ ॥

वज्रसूलतिक्खखग्गभिज्जमाणंगो अइदीणकरुणसइं पइक्खणं विलवमाणो य ।

किं पुच्चभवंमि मए कयंति जेणेरिसंमि ठाणंमि । निच्चंधयारतमसे उववन्नो कुच्छणिज्जंमि ? ॥ १ ॥

एवं विचिंतयंतो खणे खणे घोरवेयणाभिहओ । पज्जलियगेहमज्झप्पविट्ठपंगुव विलवेइ ॥ २ ॥

अयलोऽवि कयतप्पारलोइयकायवो गाढसोगाभिभूओ सुसाणं व भवणं मन्नमाणो अदिट्ठपुच्चयं पिव पियजणं च अवगणितो विसं विसयं मन्नमाणो बंधुणो बंधणं परिकप्पेमाणो पवरतरुसंडमंडिए नंदणवणे कमलकुवलयकल्हाराबंधुरासु सरसीसु सिंगारागारचारुवेसासु अंतेउरीसु खणंपि चक्खुमक्खिवतो कत्थवि रइं अलभमाणो अच्चंतं संसारासारयं भावेंतो सेयंसतित्थयरुवइट्ठधम्मवयणाइं चिंतितो वइरिभवणं व गिहावासं परिचइउकामो सयणोवरोहेण कइवयवासराइं ठाऊण गओ धम्मघोसायरियसमीये, वंदिओ परमाए भत्तीए, सूरिणाऽवि दिव्वणाणेण णाऊण तस्सा-भिप्पायं समारद्धा धम्मदेसणा, जहा—

खणसंजोगविओगं खणपरियदंतविविहसुहदुक्खं । नडनच्चियव संसारविलसियं चित्तरुवधरं ॥ १ ॥

दट्ठूण को पमायइ जिणिंदधम्मंमि सोक्खहेउम्मि ? । अच्चंतवल्लहे वा मयंमि को सोयमुव्वहइ ? ॥ २ ॥

जइ एगस्सेव भवेज्ज एत्थ वल्लहजणेण सह विगमो । ता परिभवोत्ति काउं सोगोऽवि जणेण कीरेज्जा ॥ ३ ॥

जाव य समग्गभरहाहिवावि भरहाइणो कयंतेणं । विज्झविया दीवा इव पवणेण पयंडवेगेण ॥ ४ ॥

श्रीगुणचंद
महावीरच०
३ प्रस्तावः

॥ ६३ ॥

ता कीस कुसलमइणो अट्टाणे चिय कुणंति संतावं ? । नाए वत्थुसरूवे खिज्जंति न जेण सप्पुरिसा ॥५॥ तीहिं विसेसयं ।
नियजीवियस्सवि जया धरणोवाओ न तीरए काउं । तत्थऽण्णजीवियवे चलंमि कह कीरइ थिरत्तं ? ॥ ६ ॥
इयरजणस्स व सोगो काउं न उं जुज्जए तुह कहंमि ।
किं गिरितरूणि(ण) मंतरमणिलेण चलंति जइ दोवि (अणिलेण गिरितरूणि चलिज्ज नवि मंदरो उ गिरी) ॥७॥
एसो खु सुद्धवुद्धिस्स विब्भमो जं पियस्स मरणंमि । अकंदणेण सिरकुट्टणेण अवणिज्जई सोगो ॥ ८ ॥
उत्तममईण पुण भवविरूवयाऽऽलोयणेण निवेओ । उप्पज्जइ तत्तो चिय विसेसधम्मज्जमो होइ ॥ ९ ॥
इय चयसु सोगपसरं सरेसु संसारदारुकरवत्तं । पच्चज्जं निरवज्जं चिच्चा रज्जं च रट्ठं च ॥ १० ॥
एयं च समायन्निऊण ववगयसमग्गसोगसंतावो हलहरो भणिउमाढत्तो-भयवं ! सच्चं तुम्हेहिं करुणापरहि-
यएहिं ममोवइट्ठं, ता पसिय इयाणिं देह पवज्जं निरवज्जंति वुत्ते पवाविओ सो गुरुणा, सिक्खविओ समणधम्मं,
देसिया दसविहचक्कवालसामायारी, अब्भुवगया य तेण सम्मं । अह गामागरेसु अप्पडिबद्धो विहरिऊण किंपि कालं
दुक्करतवचरणोहिं सोसिऊण सरीरं कम्मनिवहं च पत्तो सो सासयसोक्खं मोक्खंति ॥
तिविट्ठूवि तेत्तीसं सागरोवमाइं अप्पइट्ठाणे अणुहविऊण दुक्खं जुओ समाणो उववन्नो सीहत्ताए एगंमि गिरिकंदरे,
तओ—उम्मुक्कवालभावो विगयासंको समग्गरणंमि । परिभवइ कूरचित्तो जमोव अनिवारियप्पसरो ॥ १ ॥

अचलस्य
वैराग्यं,

॥ ६३ ॥

दारइ गइंदकुंभत्थलाइं अइतिकखनक्खनिवहेण । सारंगकुलं अचलं तासइ गलगज्जिमेत्तेण ॥ २ ॥
 हिंसइ विविहजीवे इय एवं जीविरुण चिरकालं । मरिरुण पुणो जाओ नेरइओ नरयपुढवीए ॥ ३ ॥
 छिंदणभिंदणसामलिसूलारोवणवराइं दुक्खाइं । रोमुद्धोसकराइं सुमरणमेत्तेणवि जणाणं ॥ ४ ॥
 आमरणंतं सोढुं भमिओ विविहासु तिरियजोणीसु । अह एगत्थ भवंमी कम्मखओवसमभावेणं ॥ ५ ॥
 लद्धूण माणुस्सत्तं काउं लद्धुमाइ तवचरणं । भोगफलमज्जिऊणं उववन्नो देवलोगंमि ॥ ६ ॥
 तओ आउक्खएणं चुओ समाणो रिद्धित्थिमियसमिद्धे निरंतरमुप्पज्जमाणजिणचक्रवट्टिबलदेववासुदेवपहाणपुरि-
 ससरिए हिए एगवीस(परियरिए एगस)रूवकालपरिकलिए अवरविदेहे खेत्ते मूयाए रायहाणीए धणंजयस्स रा-
 इणो सयलंतेउरपहाणाए धारिणीए देवीए चउइसमहासुमिणसूइओ सो तिविहुजीवो कुच्छिसि पुत्तत्तेण उवव-
 न्नोत्ति । समुच्चियसमए य कयं से पियमित्तोत्ति नामं । वट्ठिओ य देहोवचएणं विण्णाणपगरिसेण य, अण्णया य
 सो धणंजयराया सरयनिसायरसरिसवयणं तरुणतरणिपडिबुद्धपुंडरियलोयणं मणिखंडमंडियकुंडलुल्लिहियपीणगंड-
 मंडलं अकुडिलुचुंगनासावंसं बालप्पवालपाडलोद्धसंपुडं कुंदमउलमालासिणिद्धसुसिलिट्ठदंतपंतिं पसत्थरेहावलयेहं-
 तकंठकंदलं मंसलसुविसालवच्छत्थलं महानयरगोपुरपयंडवाहुदंडं संगयपासोवसोहियसुप्पमाणमज्झभागं वियसिय-
 सयवत्तसरिच्छातुच्छनाभिं जचतुरयवट्टियकडिभागं सुरिंदवारणकरकरणिजंघाजुयलं सुपइट्टियलद्धसुकुमालरत्ततलं

श्रीगुणचंद
महावीरच०
ने प्रस्तावः

॥ ६४ ॥

चलंतं कुमारं पेच्छिऊण जायपरमसंतोसो पवररायकुलपसूयाओ कण्णगाओ परिणाविऊण पसत्थवासरे रज्जे अभिसिंचिउं तओ तहाविहाण य सूरिणं पासे पव्वज्जं पडिवज्जइ । पियमित्तस्सवि अप्पडिहयसासणं रज्जं करित्तस्स कालक्केमेण समुप्पन्नाइं चउइस रयणाइं, ताणि य इमाणि—

सेणावइ गाहावइ पुरोहिय तुरय वट्ठइ गयित्थी । चकं छत्तं चम्मं मणि कागणि खग्ग दंडो य ॥ १ ॥

एवं सो पियमित्तो समुप्पन्नचक्काइरयणो अणेगनरनाहनिवहपरियरिओ चक्करयणदंसिज्जमाणमग्गो विजयजत्ताए मागहतित्थाभिमुहं संपत्थिओ, कमेण य तस्सादूरदेसं पत्तो समानों खंधावारनिवेसं कऊण मागहतित्थाहिवस्स देवस्स साहणत्थं अट्ठमभत्तं तवोकम्मं पडिवज्जइ, तस्स पज्जंते य हयरहजोहपुरिवुडो जोत्तियपवरतुरंगं चाउग्घंटं रहमारूढो चक्काणुमग्गेण केत्तियंपि भूमिभागं गंतूण कुवियकयंतभूविब्भमं अणेगंरयणकिरणजालकच्चुरियदिसावलयं वामपाणिणा सज्जीकयजीवं कोदंडं गिण्हिऊण तहा वज्जसारतुंडं विविहरयणविरइयपंखदेसं मणिविणिम्मियचक्कवट्ठिनामचिंधं दाहिणकरेण सरं आयन्नमाकट्ठिऊण मागहतित्थाहिवस्स सम्मुहं मुयइ, सोऽवि सरो दुवालस जोयणाइं गंतूण मागहदेवस्स सहाए निसन्नस्स तस्स पुरओ निवडिओ, तं च सो दट्ठूण निदुरनिडालवट्ठनिविट्ठमिउडिभीसणवयणो गाढकोवभरारुणनयणो भणिउमाढत्तो—

रे रे कस्स कयंतेण सुमरियं? कस्स वल्लहं न जियं? । को मज्झ कोवदीवयसिहं व वंछइ पयंगोव? ॥ १ ॥

सिंहादि-
मवाः प्रिय-
मित्रचक्री,

॥ ६४ ॥

किं केणइ भुयबलदप्पिण देवेण अहव मणुएणं । जक्खेण रक्खसेण व एसो खित्तो सरो होही ? ॥ २ ॥

इय खणमेगं परिचित्तिऊण गिण्हइ सरं सहत्थेणं । पेच्छइ य चक्कवट्टिस्स नामयं मणिविणिम्मवियं ॥ ३ ॥

एवं च ववगयसंसओ उवसमियकोवविगारो विविहमहामोलचित्तमणिरयणाभरणनामंकियसरसणाहो पियमित्त-
चक्कवट्टिणो सगासमुवगंतूण मत्थए अंजलिं काऊण य विजएणं वद्धावेइ, भणइ य-जहाऽहं इयाणिं तुम्ह आणा-
निहेसवत्ती किंकरनिविसेसो, ता पडिच्छइ इमं पीइदाणंति भणिऊण आभरणाहं सरं च समप्पेइ, चक्कवट्टीवि तं
सकारिऊण सम्माणिऊण य सट्ठाणे विसज्जेइ, रहंपि परावत्तिऊण खंधावारमुवागच्छइ, भोयणाइ काऊण य किंकर-
पुरिसेहिं मागहदेवस्स अट्ठाहियामहिमं कारावेइ । तस्स य पज्जंते चक्काणुमग्गेण खग्गाचावनारायकणकप्पणिसू-
ललडलिभिडिमालपमुहपहरणहत्थसुहडसत्थाणुजायमग्गो हत्थिरयणमारुढो नरिंदो कालपीयरत्तपंडुरवण्णाणेगविंध-
सहस्सेहिं छायामाणोव अंबरतलं हयहेसियगयगुलगुलाइयरहघणघणाइयरवेहिं बहिरयंतोव जीवलोयं वरदामति-
त्थाभिमुहं वचइ । कमेण य तर्हि पत्तो समाणो पुबविहीए वरदामदेवस्स अट्ठमभत्तं रयणपहरणं अट्ठाहियामहिमं च
करेइ । एवं पहासतित्थाहिवस्सऽवि, नवरं पभासतित्थदेवो मालं मउडं मुत्ताजालं कडगतुडियाणि य चक्कवट्टिस्स
पीइदाणं पयच्छइत्ति । तओ पुणोऽवि जक्खसहस्सपरिवुडेण अंतरिक्खगएण चक्करयणेण दंसिज्जमाणमग्गो चक्कवट्टी
सिंधुमहानईए दाहिणिल्लेणं कूलेणं सिंधूदेविभवणाभिमुहं गओ, तत्थवि अट्ठमभत्तं पगिण्हइ तस्स पज्जंते य सिंधु-

भीगुणचंद
महावीरच०
३ प्रस्तावः
॥ ६५ ॥

देवीए सुहासणत्थाए चलियं सीहासणं, ओहिनाणमुणियचक्रवट्टिसमागमां य नाणामणिकणगरयणभत्तिचित्ताणि
दोन्नि भद्दासणाइं कडगाणि तुडिगाणि वत्थाणि पगहिऊण चक्रवट्टिसगासमागया पंजलिउडा विणएण सम-
प्पेइ, रायाऽवि तं सक्कारिय सम्माणिय सट्ठाणे विसजेइ । तओ पुणरवि चक्रयणं वेयड्डपवयाभिमुहं गंतुमारद्धं,
रायाऽवि सबलवाहणो तदणुसारेण य(गच्छइ)कमेण य पत्तो वेयड्डपवयस्स नियंवदेसं, तत्थ य खंधावारं निवे-
सावेइ, वेयड्डगिरिकुमारदेवोऽवि पुव्वनाएण चलियासणो विविहालंकारहत्थो सेवं पडिच्छइ । कइवयदिणाणंतरं च
तिमिसगुहासमीवमुवागयस्स चक्किणो अट्टमभत्ततवचलियासणो कयमालयदेवो भालयलविलुलंतकरकमलो झडत्ति
चक्खुगोयरमागओ, थीरयणजोगं रयणालंकारं अन्नाणि य विविहाणि भूसणाइं पणामेइ, आणानिहेसं च वडुम-
न्निऊण गए तंमि राया विजयसेणं सेणावइं रयणभूयं सद्दाविऊण एवं वागरेइ-भो विजयसेण ! गच्छाहि तुमं
सिंधुमहानईए पच्चत्थिमिल्लदेसं नगनगरागराइपरिन्निखत्तं सिग्घं साहिऊण एहित्ति, जं देवो आणवेइत्ति विणएण
सासणं पडिच्छिऊण सेणाहिवो विहियतक्कालोचियमज्जणाइवावारो महापरकमो तेयंसी मेच्छभासाविसारओ
विस्सुयजसो पवरकुंजरखंधाधिरूढो सन्नद्धवद्धकवओ उप्पीलियसरासणधणुपट्ठो अणेगगणनायगदंडनायगपरिवुडो
धरियधवलायवत्तो चलंतविमलचामरो पहयत्तूरववहिरियदियंतरो सिंधुमहानईतीरमुवागच्छइ ।

ताहे स चम्भरयणं सिंधुमहानइजलंमि वित्थरइ । वारसजोयणमेत्तं नावारूवेण तरणट्ठा ॥ १ ॥

प्रियमित्रस्य
दिग्विजयाः

॥ ६५ ॥

तो तंमि समारूढो हरिकरिपाइकचक्रपरियरिओ । वीसत्थो पवणवसुल्लसंतसुमहल्लोलं ॥ २ ॥
 गोपयमिव सिंधुनदं लंघित्ता मेच्छजाइए सवे । आणानिदेसे संठवेइ रयणाइं गिणहेइ ॥ ३ ॥
 सामी ! तुम्हे सरणं गई य एमाइ जंपमाणे ते । ठविउं सट्ठाणेसुं विणियत्तइ विजयसेणो तो ॥ ४ ॥
 पियमित्तचक्रवट्ठिस्स पायपंकयजुयं पणमिऊण । रयणाइं समप्पइ सो मिलक्खुविजयं च वज्जरइ ॥ ५ ॥
 पुणरवि रण्णा भणिओ सेणाहिर्वई जहा तुमं भइ ! । गच्छसु तिमिसगुहाए कवाडउग्घाडणत्थाए ॥ ६ ॥
 ताहे तहत्ति सम्मं पडिसुणिऊणं समग्गवलकलिओ । गंतुं गुहासमीवे अट्ठमभत्तं तवो कुणइ ॥ ७ ॥
 अह तिक्खुत्तो पहणइ निविडेणं तिच्चदंडरयणेणं । ते तिमिसगुहाकवाडे महप्पमाणे वइरघडिण ॥ ८ ॥
 दंडाभिधायपरिपेलियाइं कुंचारयं करेताइं । कुकलत्तकहियगुज्झं च ताइं विहडंति वेगेण ॥ ९ ॥
 तयणंतरं च बलिउं साहइ सो चक्रवट्ठिणो वत्तं । सोऽवि य गयमारूढो समग्गसेणाए संजुत्तो ॥ १० ॥
 चउरंगुलप्पमाणं रोगासिवनासणं मणिं धेत्तुं । चक्काणुमग्गलग्गो तिमिसगुहं विसइ भयराइओ (महराया) ॥ ११ ॥
 तत्तो तिमिसगुहंतंधयारविद्धंसणठ्ठमइगरुए । मंडलगे सो विलिहइ कागिणिरयणेण भित्तीसु ॥ १२ ॥
 ताहे मंडलगमऊहजालउज्जोयहणियतिमिराओ । नीहरइ सुहेण समं सेणाए सो गुहारिंतो ॥ १३ ॥
 इओ य वेयह्णपरभागवत्तिणो विलाया महापरक्कमा अपरिभूयस्साम्पत्था कणगरययधणधन्नसमिद्धा नियनियट्ठाणेसु

श्रीगुणचंद
महावीरच०
३ प्रस्तावः
॥ ६६ ॥

निवसंता बहूणि गंधवनगररुहिरवरिसभूमिकंपपमुहाइं उप्पाइयसयाइं पेच्छंति, तते णं ते ताणि पेच्छिऊण उवि-
ग्गा निराणंदा ओहयमणसंकप्पा विणि(दीण)यं पिव अप्पाणं मन्नंता जाव चिट्ठंति ताव सहसच्चिय उक्किट्ठिसी-
हनायकलयलरवेण समुदमहणसंकं समुप्पायमाणो निसियकरवालसेल्लभल्लिकुंतपहरणकरेहिं सूरैहिं अणुगम्ममाणो
पत्तो तेसिं देसं पियमित्तनरवई, तं च आगयं निसामिऊण ते मिलेच्छा पयंडकोवारुणच्छा परोप्परं मंतंति-भो भो
एस कोइ कयंतचोइओ अम्ह विसयं उवइविउकामो वट्ठइ, ता तहा करेमो जहा एस अंतरा चेव विणस्सइत्ति,
एवं संपहारित्ता पीडियदुब्भेयकवया विचित्तपहरणहत्था समुदुयमगरनरवसहसदूलगरुलाइचिंधा पोरुसाभिमाण-
मुवहंता अहमहमिगाए गंतूण चकिणो अगगसेण्णेण संपलग्गा जुज्झिउं, तओ य अगगसेण्णं हयपरकमं निवडियसु-
हडं पडिभग्गरहवरं खंडियजच्चतुरंगवग्गं पडिखलियनरवइजणं तेहिं कयं पेच्छिऊण विजयसेणो सेणाहिवई जाय-
कोवो कमलामेलगनामं आसरयणं आरुह्णिऊण कुवलयदलसामलं सवत्थ अप्पडिहयं नरवइहत्थाओ खग्गरयणं
च गहिऊण ते विलाए चाउडिसिंपि पसरिए पडिखलइ । किं बहुणा?—

तिमिरंव दिणयरेण भुयगसमूहोव पक्खिराएणं । सेणाहिवेण निहया भीया ते अइगया सगिहं ॥ १ ॥
वेत्तूणं घरसारं पुत्तकलत्ताइयं च मरणभया । अइदूरमवकंता सिग्घं विसमेसु ठाणेसु ॥ २ ॥
ताहे सिंधुनईए कूले परिचत्तसववावारा । उत्ताणा निवसणा अट्ठमभत्तं पगिण्हंति ॥ ३ ॥

प्रियमित्रस्य
दिग्विजयः।

॥ ६६ ॥

सत्तुबलहणणहेउं पुर्विपिय पाडिहेरकरणपरे । सुमरंति एगचित्ता कुलदेवे मेहमुहनामे ॥ ४ ॥

अट्टमभत्तस्संते तत्तो चलियासणा सुरा एंति । गयणंगणमोइत्रा भणंति किं सुमरिया अम्हे ? ॥ ५ ॥

सिट्ठं च चिलाएहिं जह अम्हे रिउबलेण पडिहणिया । ता तुम्हे मुसुमूरह रिउपक्खं अम्ह रक्खट्ठा ॥ ६ ॥

देवेहिं तओ भणियं एसो पियमित्तनाम वरचक्की । काउमिमस्स विणासं अहो न सक्कोऽवि सक्केइ ॥ ७ ॥

ता भो अणभिभवणिज्जो एस, केवलं तुम्ह पक्खवायमणुसरंता किंपि उवसग्गेमोत्ति निवेइऊण तेसिं अंति-
याओ ते मेहमुहा अवक्कमंति, नरवइखंधावारस्स उवारिं मेहनिवहं विउवंति, तओ जुगमुसलमुट्ठिप्पमाणधाराहिं
निरंतरं वारिनिवहं सत्तरत्तं जाव मुयंति । पियमित्तचक्कवट्ठीऽवि तं तहाविहं विच्छिऊण दिवचम्मरयणं परामुसइ,
तंपिय खिप्पमेव दुवालस जोवणाइं तिरियं पवित्थरइ, तत्थ सो समत्थोऽवि खंधावारो समारुहइ, पुणोऽवि नरिंदो
नवनवइसहस्सकंचणसलागपरिमंडियं महरिहं विविहभत्तिचित्तं डिंडीरपिट्ठपंडुरं छत्तरयणं खंधावारस्स उवारिं वारस
जोवणाइं समहियाइं वित्थारेइ, भणिरयणं च किरणजालं मुयंतं सरयरविसरिच्छं छत्तमज्झभागे ठवेइ, गाहावईवि
चम्मरयणेगदेसंमि तद्विवसपइन्ननिप्फण्णपूयाणं सवधण्णणं अणेगकुंभसहस्साइं उवट्ठवेइ, एवं च सो राया सव-
प्पयारेहिं अणुच्चिगो चम्मरयणमारूढो छत्तरयणच्छत्तोवरिमविभागो भणिरयणकओज्जोओ गाहावइउवट्ठावियधन्न-
निचभो निवभनजगभोव मुहेण अच्छेइ । किं बहुणा ?

श्रीगुणचंद
महावीरच०
३ प्रस्तावः

॥ ६७ ॥

नवि से लुहा न वाही नेव भयं नेव विज्जए दुक्खं । विजयाहिवस्स रण्णो खंधावारस्सवि तहेव ॥ १ ॥
अह पियमित्तनरिंदो संपत्ते सत्तरत्तपज्जंते । चित्तेइ को णु एसो जो मं विद्वइ सलिलेणं ? ॥ २ ॥
एत्थंतरंमि आबद्धपरियरा विविहपहरणसमेया । सोलस जक्खसहस्सा मेहमुहाणं गया पासे ॥ ३ ॥
भणिया य तेहिं रे रे अप्पत्थियपत्थिया धुवं तुम्हे । जं चक्खवट्ठिणोऽविदु उवसग्गं एवमायरह ॥ ४ ॥
ता मुंचह चक्खुपहं अहवा जुद्धत्थमभिमुहा होह । इइ भणिए मेहमुहा गया चिलायाण पासंमि ॥ ५ ॥
साहंति सव्वइयरमसमत्थत्तं च अत्तसत्तीए । नरवइसेवाकज्जे पेसेंति य ते चिलाएऽवि ॥ ६ ॥
अह मुक्ककेसहत्था पहरणरहिया नियंसिओल्लपडा । भयवसविसंडुलंगा गंतूण नमंति ते मेच्छा ॥ ७ ॥
कणगं विचित्तरयणे अन्नंपि विसिट्ठवत्थुमपिंति । पडिवज्जिय तस्सेवं नियावराहं च स्वामेंति ॥ ८ ॥
एवं च पवज्जियसेवा मिलेच्छा सम्माणिऊण चक्किणा विसज्जिया सट्ठाणेषु, सेणावईवि सिंधुमहानईए बीअखंड-
साहणत्थं पेसिओ पुव्वविहीए, तं च साहिऊण पच्छाऽऽगए तंमि पियमित्तो राया चक्काणुमग्गेण पट्ठिओ वेयट्ठा-
भिमुहं, कमेण य पत्तो पव्वयनियंबदेसं । तओ मणसीकरेइ उत्तरदाहिणसेढिविज्जाहरे, तेऽविय भयखुभियचित्ता
नाणाविहकणगरयणपसुहपहाणवत्थुसमप्पणपुव्वयं नरवइणो सिरसा सासणं पडिच्छंति । सेणावईऽवि पुव्वकमेण गंगा-
महानईपुव्वखंडं साहिऊण पासमल्लियइ ॥

मेघमुखोप-
द्रवः उत्तर-
खंडजयः।

॥ ६७ ॥

पुष्पकमेण पुणरवि खंडगुहं लंघिऊण नरनाहो । चउरंगवलसमेओ गंगापच्चत्थिमे कूले ॥ १ ॥
 खंधावारनिसेसं काऊणं पवररयणपडिपुण्णो । अट्टमभत्तपुरस्सरमह गिण्हइ नव महानिहिणो ॥ २ ॥
 मणवंछियत्थकरणेक्कपच्चला वहरनिम्मियकवाडा । बहुपुत्रपावणिज्जा इमेहिं नामेहिं ते नेया ॥ ३ ॥
 नेसण्ण पंडुए पिंगले य तह सव्वरयण महपउमे । काले य महाकाले माणवग महानिही संखे ॥ ४ ॥
 एएसिं चिय चक्की निहीणमनिहीणपोरिसारंभो । सक्कारपुव्वयं कारवेइ अट्टाहियामहिमं ॥ ५ ॥
 गंगापुरत्थिमिल्लं सेणावइणा दुइजमवि खंडं । गाहावइ तत्थ ठिओ भुंजंतो विविहविसयसुहं ॥ ६ ॥

एवं च सो पियमित्तचक्कवट्ठी पसाहियछवखंडो निज्जियपडिवक्खचक्को अप्पणो आणाए ठवेंतो नराहिवे दंसेंतो
 नियपरक्कमं सम्माणंतो सेवगज्जणं विरयंतो दीणाणाहाण अणवरयदाणं बत्तीसनरवइसहस्साणुगम्ममाणो पडिनियत्तो
 मूयानयरीए, पडिच्छिओ दुवालसवारिसिओ महारायाभिसेओ । एवं च कयकायवो बत्तीसाए बत्तीसबद्धनाडयस-
 हस्साणं सोलसण्हं जक्खसहस्साणं तिण्हं तिसट्ठीणं सूयसयाणं अट्टारसण्हं सेणिप्पसेणीणं चउरासीए तुरगसयस-
 हस्साणं चउरासीए पवरकुंजरसयसहस्साणं छण्णउइए मणुसकोडीए वावत्तरीए पुरवरसहस्साणं बत्तीसाए जण-
 वयसहस्साणं छन्नउइए गामकोडीणं नवणउइए दोणमुहसहस्साणं चउवीसाए कच्चडसहस्साणं अडयालीसाए
 पट्टणसहस्साणं चउवीसाए मडंबसहस्साणं वीसाए आगरसहस्साणं सोलसण्हं खेडसयाणं चउदसण्हं संवाहसह-

श्रीगुणचंद
महावीरच०
३ प्रस्तावः
॥ ६८ ॥

स्साणं अन्नेसिं च राईसरसेट्टिसेणावइपमुहाणं जणाणं आणिस्सरियसारं सामित्तमणुपालितो दिव्वं विसयसुहमणु-
भुंजंतो य कालं बोलेइ ।

एगया य पसंतचित्तो भवणोवरिभूमिगाए ओलोयणगओ जाव दिसावलयमवलोएइ ताव सहसच्चिय पेच्छइ
गयणंगणे समुत्थियं थेववित्थारं मेहखंडं, तं च-कज्जलभसलगवलकोइलकालिंदीजलसामलं फुरंतविज्जुदंडुडामरं
धंतकलहोयधवलगोपंतिमणहरं समुल्लसंताखंडलगंडीवाडंवररमणिज्जं मंदमंदमुकविंदुसंदोहसुंदरं गंभीरगज्जिररवतं-
डवियसिंहंडिगणं खणमेगं दिसामुहेसु पसरिऊण सहसच्चिय समुच्छलियपवलपवणप्पणोलिज्जमाणं सवहा पणट्ट-
मवलोइऊण चित्तेइ-अहो केरिसी वत्थुपरिणई? जं तारिसं घणपडलमच्चंतनयणाभिरामं खणमेत्तमुन्नइं पाविऊण संपयं
सबुच्छेयमावन्नं, एयाणुमाणेणं चिय सववत्थूणं एसा गई, खणविगमधम्मं य एत्थ किं पडिबंधट्ठाणं?, का वा रई?
को वा उत्तरोत्तरकायव्वविहाणुज्जमो? कइं वा खणमेत्तंपि वज्जवत्थूसु विस्सासो, अच्छंतु वा वज्जवत्थुणो, जं
इमं सयलमणोरहमंदिरं सरीरं जस्स किर निमित्तं कीरइ करितुरयरहजोहजुवइपुरागरपसुहरज्जंगोवज्जणसमुज्जमो
तंपि उप्पायधम्मत्तणेण पच्चक्खदिट्ठविणट्ठमेहमालं व धुवं विणस्सरसीलं, अओ कुसला कहमेयस्स निस्सार-
पोगगलचओवचयरुवस्स अट्ठिभिजवसारुहिरमंससुकाइविलीणकारणसमुच्चभवस्स विविहरोगनिवहपरिगगहियस्स पइ-
दिवसणहाणविलेवणभोयणपमुहोवयारपरिपालणिज्जस्स सीयतावायंकाइदोसरक्खणिज्जस्स परमदुगुच्छणिज्जगंधस्स

चक्रिक्रद्धिः
वैराग्यं च.

॥ ६८ ॥

असुहृपडिपुण्णकलसस्सेव वाहिरमेत्तरमणीयस्स दुज्जणचेट्ठियस्सेव अवियारसुंदरस्स महानरिंदस्सेव विसिट्ठविस-
याणुरागिस्स दुद्धपाणपरन्वसमज्जारस्सेव अणवेक्खियपयंडजमदंडाभिघायस्स विविहप्पयारेहि उवलालणत्थं मि-
ण्हंति रज्जं करेति निरवेक्खचित्ता पाववावारं सयावि रक्खणत्थं विविहपहरणदत्थं धरेति सुहडसत्थं अणवरयसं-
तावकरं कोहलोद्वाइषेरिनियरं निब्बं पचासन्नट्ठियंपि अणवेक्खिऊण जोयणसहस्संतरियं संकंति सत्तुनिवहं सक-
ज्जमत्ताणुरागिणंपि निक्खवडपेम्मं मण्णंति परियणं अवस्संभाविनिहणंपि धुवं लक्खंति धणं, ता अहो तेसिं पम-
त्तचित्तया अहो निव्विवेयया अहो महामोहमहिमया अहो इहलोयपडिबंघपरवसया अहो आगामिदुक्खनिरवे-
क्खया अहो दुहविवागावलोयणपडिकूलया, इह चित्तयंतस्स पढियमेगेण कालनिवेयण वेयालिएण—

विच्छायं पच्छिमासागयमिममहुणा सूरबिंबं मिलंता, रोवंति वाऽलिजालुब्भडरवमिसओ पुंडरीयाण संडा । कंदंते
चक्कवाया गुरुविरहमहादुक्खसंतत्तगत्ता, धी संसारो (संसारो धी) असारो जमिह फुडमहो सासयं नत्थि किंपि ॥१॥

राइणाऽपि एवमायन्निऊण चित्तियं अहो अणिच्चयाए संबद्धं साहु पढियं एएण, जुत्तो संपयं मम धम्मज्जमो काउंति
निच्छिऊण पसुत्तो रयणीए । ततो खणे खणे भवनिग्गुणत्तं पेहमाणस्स पाणिवहपमुहाइं दुक्कियाइं गरिहंतस्स संसारुव्वेयं
वहमाणस्स सुहिसंबद्धं बंधणं व गणेंतस्स भोगे भुयंगेव परिकप्पितस्स मायंदजालं व जीवलोयविलसियमवलोयंतस्स
विसालसेज्जाएपि तल्लुवेळिं करेंतस्स कहकहवि बोलीणा रयणी, समुग्गओ दिवायरो । एत्थंतरे पढियं मागहेण—

श्रीगुणचंद
महावीरच०
३ प्रस्तावः
॥ ६९ ॥

पडिहयपडिवक्खं चकदिन्नेकसोक्खं, मिउकररमणिज्जं सज्जणासंसणिज्जं ।
तुममिव रविर्विवं पुव्वसेलावलंबं, उदयमिममियाणिं जाइ दोसेकहाणिं ॥ १ ॥
इमं च उदयसहसुंदरं सिलोगमायन्निऊण संभावियापुव्वलाभो नरवई समुट्टिऊण सयणिज्जाओ कयपाभाइयकायवो
निसन्नो सीहासणे । एत्थंतरे समागया उज्जाणवालया, कयप्पणामा विन्नविउमाढत्ता य—देव ! वद्धाविज्जह तुम्हे
जेण समागया भगवंतो बहुसीसगणसमेया पोट्टिलाभिहाणसूरिणो, समोसरिया य तुम्ह उज्जाणेत्ति । एवमायन्नि-
ऊण निम्भरं पमोयभरमुव्वहंतो दाविऊण तेसिं चिंताइरित्तं पारिओसियं पवरवारणस्संधाधिरूढो सव्वपरियणस-
हिओ महाविभूईए गओ चक्की उज्जाणे, वंदिया सव्वायेरणं सूरिणो, उवविट्ठो य जहासन्निहियधरणीए,
जोडियकरसंपुडेण साहिओ गुरुणो मेहविगमदंसणुम्भूओ सद्धम्मसमुज्जमसंमुहो नियचित्तपरिणामोत्ति, गुरुणा भणियं-
भो महाराय ! कुसलाणुसारिणी तुज्झ बुद्धी, संपन्नो कम्मविवरो करकमलं निलीणा मोक्खलच्छी, जस्स तुह एवं-
विहा वासणा, ता महाराय ! तिविहा पुरिसा भवंति, तंजहा—उत्तिमा मज्झिमा जहन्ना य । तत्थ—
उत्तमपुरिसा भवभंगुरत्तणं जाणिऊण णियमईए । परिचत्तगिहकलत्ता परलोयहियं पवजंति ॥ १ ॥
गरुयं रोगायकं तहाविहंपि अ विओगदुक्खं च । ददूण मज्झिमा पुण कहमवि लग्गंति जिणधम्मे ॥ २ ॥
जे उ जहन्ना ते सब्बहावि विविहावईनिमग्गावि । दुक्खसयपीडियाविहु न मुत्तिमग्गंमि लग्गंति ॥ ३ ॥

आचार्यो-
पदेशः.

॥ ६९ ॥

करुणोयहिणा गुरुणा भणिज्जमाणावि विविहवयणेहिं । अच्छउ काउं धम्मं सहहिउंपि यि न सकंति ॥ ४ ॥
 इय मज्झिमा जहन्ना य हुंति धम्माहिगारिणो न तथा । जह मुणियभवसरूवा सभावओ उत्तिमा पुरिसा ॥ ५ ॥
 ता भो महायस ! तुमं जोग्गो सवण्णुभणियधम्मस्स । संपइ करेसु सहलं एयायरणेण नियजीयं ॥ ६ ॥
 नहि विन्नायसरूवे चिंतामणिपमुहदिव्वरयणंमि । अग्गहणिच्छा जायइ क(इ)यावि (वि)सुद्धिबुद्धीण ॥ ७ ॥
 अन्नं च-जललवतरलं जीयं सुरिंदकोदंडविच्चमं पेमं । गयकण्णतालचवलं पुण्णंपि सरीरलायणं ॥ ८ ॥
 मारुयपणुण्णपण्णं व भंगुरं सुंदरंपि तारुणं । आवयलक्खनिमित्तं वित्तंपि कहंपि पविट्ठं ॥ ९ ॥
 एएसिं एकेकंपि नूण वेरग्गकारणं गरुयं । सुहबुद्धीणं जायइ किं पुण सवेसि समवाओ ? ॥ १० ॥
 अच्छरियमिमं जे एरिसेहिं संवेगभावहेऊहिं । निच्चं विज्जंतेहिवि न मोक्खमग्गे पयट्ठंति ॥ ११ ॥
 किं बहुणा कुणसु तुमं संपइ सद्धम्मकम्मपडिवत्तिं । बहुविग्घो सेयत्थो कालविलंबो न ता जुत्तो ॥ १२ ॥
 एवं सोच्चा चक्कवट्ठिणा भावसारं चलणेसु निवडिऊण भणिओ गुरू-अवितहमेयं, इयाणिं समीहामि अगाराओ
 अणगारियं पडिवज्जिउं, गुरुणा भणियं-भइ ! मा पडिवंधं करेसु, जुत्तमेयं तुम्हारिसाणं मुणियपरमत्थाणंति बुत्ते
 वंदिऊण गुरुं गओ नयरीए चक्कवट्ठी । समाहूया नायरयमंतिसामंतसेणावइपमुहपहाणपुरिसा, भणिया य-भो भो
 इयाणिं जाया अह गिहपरिचायबुद्धी, काउं वंछामो निग्गंधपावयणपडिवत्तिं, ता खमियवं तुम्भेहिं जं मए पुरा

श्रीगुणचंद
महावीरच०
३ प्रस्तावः

॥ ७० ॥

निओइया आणानिहेसे, काराविया सेवाविहिं, पीडिया समहिगकरगहणेणत्ति, तेहिं भणियं-देव !
 वज्जोवलेहिं घडियं हिययं अम्हारिसाण निम्भंतं । जं एरिसाइं वयणाइं तुम्ह सोउं न विहडेइ ॥ १ ॥
 जणणीजणगा जेणं पढमं उवगारिणो परं जाया । परमुत्तरुत्तरगुणेसु नूणं अम्हे तए ठविया ॥ २ ॥
 ता कह इयाणिं तुह चरणकमलसेवाविवज्जिया गेहे । निग्घिणचित्ता अम्हे निवसंता नेव लज्जामो ॥ ३ ॥
 जह तुम्हे तह को वा अवराहपयं तित्तिक्खिही अम्ह । जह इहलोए तह परभवेऽवि ता नाह ! तं सरणं ॥ ४ ॥
 एवं भणिए राइणा वुत्तं-जइ एवं ता निययगेहेसु गंतूण सट्ठाणे पुत्ते ठविऊण य कयसयलकायघा पवरसिबिगा-
 धिरूढा ममंतियं पाउब्भवह, तहत्ति पडिवज्जिऊण गया ते सगिहेसु, कयं तक्कालोचियं किच्चं, राइणावि
 अभिसित्तो नियरज्जे पुत्तो, समप्पिया करितुरगाइणो, कयमज्जणालंकारपरिग्गहो य चारुसिबिगाधिरूढो तेहिं सवेहिं-
 वि पवज्जागहणाभिलासीहिं परिवुडो दिज्जंतंतेसु अणियारियप्पसरं कणगाइदाणेसु वज्जंतंतेसु चउविहत्तुरेसु नच्चंतंतेसु तरुणि-
 सत्थेसु थुणंतंतेसु मागहनिबहेसु गओ उज्जाणं, ओयरिओ सिबिगाओ, तिपयाहिणीकाऊण वंदिओ सूरी परिचत्ता-
 भरणस्स य दिन्ना से गुरूहिं पवज्जा, अंगीकया य तेण भावसारं । अह पट्ठियजिणिंदुहिंदुसिद्धंतसत्थो गुरुजणपय-
 आराहणुत्तचित्तो परिहरियपमायुम्मायमायापवंचो बहुविहतवकम्मासेवक्खीणदेहो ॥
 विमलगुणकळावं अज्जिणंतो जिणंतो, कुसुमसरपमोक्खं वेरिवग्गं समग्गं ।

प्रियमित्र-
दीक्षा,

॥ ७० ॥

नियजियमिव सन्ने पाणिणो रक्खमाणो, खणमिव अचयंतो सुत्ततत्तथचित्तं ॥ १ ॥

सुहदुहमणिलेइसत्तुमित्ताइएसुं, तुलमिव समरुवं चित्तवित्तिं धरितो ।

तिणमिव पडलगं छंडिउं सवसंगं, विहरइ वसुहाए निप्पकंपो महप्पा ॥ २ ॥

तो वासकोडिमेगं पव्वज्जं पालिऊण कयमरणो । सुकंमि देवलोए जाओ देवो महिहीओ ॥ ३ ॥

इय बीरनाहचरिए सुपवित्ते दुक्खदारुकरवत्ते । सिबपुरसंसुहपत्तियमंगलकलसेक्खवरसउणे ॥ ४ ॥

उसभजिणकहियहरिचक्खवट्टिपयपवरलाभपडिबद्धो । जणमणविम्हयजणणो संमत्तो तइयपत्थावो ॥ ५ ॥ जुम्मं ॥

(इति तइओ पत्थावो)

चतुर्थः प्रस्तावः

हरिचक्खवईण इमा भणिया वत्तवया पयत्तेणं । एत्तो नंदणनरवइवित्तंतं मे परिकहामि ॥ १ ॥

अत्थि सयलवसुंधरारमणीरयणकज्जपूरोवमा वेसमणरायहाणिविग्गममा छत्ता नाग नयरी, तत्थ धम्मराओ नयमग्गपव्वत्तणेण कयंतो कोवेण अज्जुण्णो कित्तीए बलभहो भुयबलेण मयलंछणो सोमयाए दिणयरो पयावेण पवणो सरीरसामत्थेण गुरु गुरुबुद्धिविभवेण महुमहो बलिसत्तुदमणेण वम्महो रुवेण सयलजयपायडजसो जियसत्तू नाम राया, तस्स य मयरद्धवपणइणीसमइरेगरुवविभवेऽवि विगयदप्पा इत्थिभावेऽवि दूरपरिचत्तमाया जइत्थाभिहाणा

श्रीगुणचंद
महावीरच०
४ प्रस्तावः

॥ ७१ ॥

भद्रा नाम देवी, तीए सद्धिं अणुरूवविसयसोक्खमणुहवंतस्स राइणो वचंति वासरा, अन्नया य सो पियमित्तो
आउयक्खएणं देवलोगाउ चइऊण समुप्पण्णो तीसे पुत्तत्तणेण, कयं च समुचियसमए नंदणोत्ति नामं, धवल-
पक्खससहरव वट्ठिओ सरीरेणं कलाकलावेण य । अन्नया पिउणा जोगोत्ति कलिऊण निवेसिओ नियपए, जाओ
सो नंदणो राया, पुव्वप्पवाहेण पालेइ मेइणीं । एवं च तस्स निज्जिणंतस्स सत्तुनिवहं इंदियगणं च वित्थारंतस्स
दिसामुहेसु निम्मलं जसप्पसारं गुणनिवहं च पणासंतस्स दोससमूहं पिसुणवग्गं च नित्तस्स समुन्नइं कोसं वंधुजणं
च परिपालितस्स साहुलोयं गुरुजणोवएसं च समइकंताइं चउवीसवाससयसहस्साइं । अन्नया य बाहिरुज्जाणे समोसदा
भयवंतो भीमभवजलहितरणतरंडा विसुद्धसन्नाणाइगुणरयणकरंडा मोहमहामल्लपेल्लणपयंडा कुमयतमोमुसुमूरण-
चंडमायंडा मिच्छत्तंधजगअवलंबणेक्कदंडा पडिबोहियभवियकमलखंडा सुगहियनामधेया पोट्टिलाभिहाणा थेरा,
तओ सो राया विण्णायतदागमणो वियसियवयणो समुलसियकवोलो वियंभियसवंगरोमंचकंचुओ समागओ वंद-
णत्थं । तओ तिपयाहिणीकाऊण पढमदंसणुच्छलियहरिसपगरिसविप्फारियाणं धवलदिट्ठिवायाणं छलेण विल-
सियसभमरसियकुसुमेहिं पूयापन्भारंपिव सव्वंगियं गुरुणो करेमाणो पयलंतनयणाणंदजलेण पक्खालेउमुवट्ठिओव्व
चरणे चरणेकरसियमाणसो माणसोयरहिओ हिओवएसोवलंभकामो कामोवघायसूरस्स सूरिणो निवडिऊण चलणेसु
परमपमोयसुव्वहंतो भणिउमाढत्तो—

नन्दन-
जन्मादि.

॥ ७१ ॥

वज्जिहरहरिसुराणंपि अज्ज मन्नामि अप्पयं अहियं । जं तुम्ह पायपउमं दुल्लहलंभं मए पत्तं ॥ १ ॥
 ते दूरनिरंतरवित्थरंतसुहनिवहभाइणो मणुया । जे तुम्ह चलणकमले कुणंति भसलत्तणं धन्ना ॥ २ ॥
 जीविज्जइ कज्जि एत्तियस्स तुच्छेऽवि जीवलोयंमि । जेण किर कहवि तुम्हारिसेत्थ दीसंति तित्थसमा ॥ ३ ॥
 उव्वहउ मही भुवणत्तएवि पयउं वसुंधरा नामं । जा अज्जवि तुम्ह सरिच्छपुरिसरयणाइं धारेइ ॥ ४ ॥
 इय थुणिऊणं विरए भत्तीए नंदणे नरिंदंमि । जोगोत्ति कलिय कहिउं पारद्धो सूरिणा धम्मो ॥ ५ ॥
 भो नरवइ ! संसारे सुचिरं परिभमिय दुक्खसंतत्ता । नरयाइगईसु केऽवि पाणिणोऽणंतकालेणं ॥ ६ ॥
 बालतवायरणाओ अहवावि अकामनिज्जरवसेण । पावंति माणुसत्तं कहकहवि हु रिद्धिसंजुत्तं ॥ ७ ॥ जुम्मं ॥
 पत्ते य तंमि अविगणियभवभया चत्तधम्मपडिबंधा । हीलियधम्मायरिया उवहसियविसिद्धजणचेट्ठा ॥ ८ ॥
 विसएसु पसज्जंती पाणिवहाईसु संपयट्ठंति । भंगुरमवि ससरीरं मन्नंता सासयं मूढा ॥ ९ ॥ जुम्मं ॥
 अन्ने पुण मणवंछियभोगुवभोगोवलंभभावेऽवि । आणिस्सरियपहाणे विस्संभरनायगत्तेऽवि ॥ १० ॥
 विसयवामूढाविहु धम्मगिरं सुणिय धम्मगुरुमूले । नरवइ ! नरसिंहो इव पवज्जं संपवज्जंति ॥ ११ ॥ जुम्मं ॥
 अहवा पुण्णवसज्जियरज्जदुगुहामलच्छिविच्छडो । नरविक्रमनरनाहो तस्सेव सुओ महासत्तो ॥ १२ ॥
 एए च्चिय महणिज्जा पवरं एयाण चेव पुरिसत्तं । जेसिं जणविम्हयकरं चरियं सलहिज्जइ जयंमि ॥ १३ ॥

श्रीगुणचंद
महावीरच०
४ प्रस्तावः

॥ ७२ ॥

इमं च सोचा नंदणनराहिवेण जंपियं-भयवं! को एस नरसीहो? को वा तस्स सुओ नरविक्रमो? कहं वा एसो रज्जदुगं लद्धणवि पव्वजं पव्वोत्ति सवित्थरं साहेह, महंतं मे कोउगं, सूरिणा जंपियं-निसामेहि ।

अत्थि कुरुविसयतिलयभूया अदिट्ठपरचक्रभया जणनिवहाणुगया जयंती नाम नयरी,
पालेइ तं च ससहरसरिच्छपसरंतकित्तिपन्नारो । निप्पडिमपयावकंतसत्तुपणिवइयकमकमलो ॥ १ ॥

उत्तुंगतुरयसिंधुरपकलपाइकचकवलकलिओ । सक्कोव्व सुरपुरिं परमविक्रमो राय नरसिंघो ॥ २ ॥

विसमच्छो इत्थीलोलुओ य दुग्गाववद्वनिच्चरई । जस्स हरोऽवि न सरिसो तस्स समं कं जणं भणिमो? ॥ ३ ॥

तस्स य नीसेसअंतेउरप्पहाणा वयणलायण्णावगणियपडिपुण्णचंदमंडला सललियवेलहलगइविजियराय-
हंसा कुम्मुण्णयकमलकोमलपाडलचलणजुपला रायहाणिव्व मयरद्वयनरनाहस्स विसालसालव्व विमलसीलसाली-
णयामहामोल्लभंडस्स मंजूसव्व सव्वरइसोक्खमणिखंडभंडारस्स चंपयमाला नाम भारिया अहेसि, जीसे भंगुरत्तणं
तिरिच्छच्छिविच्छोहेसु न धम्मकम्मुच्छाहेसु तरलया विमलमणिमुत्ताहारे न विसिट्ठलोयववहारे तणुत्तमुदरस्स न
सरस्स कुडिलत्तं केसकलावस्स न सप्पणयालावस्स, अवि य—

नियरूवविजियसुरवहुजोव्वगणव्वाए कुवलयच्छीए । उब्भडसिंगारमहासमुद्धद्वरिसवेलाए ॥ १ ॥

को तीए भणियविम्ममनेवत्थच्छेययागुणसमूहं । वण्णेउ तरइ तूरंतओऽवि जीहासण्णंपि? ॥ २ ॥

नरविक्रम-
चरित्रं.

॥ ७२ ॥

तथा—नियचकसंधिरक्खणवियक्खणो पयइपालणाभिरओ । अन्नोऽन्नवद्वपणओ दूरं संतोससारो य ॥ ३ ॥
 सुप्पणिहियपणिहियओ पमुणियरिउचकगुविलवावारो । पडुभत्तो गुणरागी निवूढभरो महारंभो ॥ ४ ॥
 एकेकपहाणगुणो मंतिजणो बुद्धिसारपमुहो से । अत्थी समत्थनयसत्थ(नि)समणवित्थरियमइपसरो ॥ ५ ॥
 अणवरयमसुरकीरंतडमरभयविहुरसुरवहूमुहडं । हीरंतपवररयणं जो सोचा तियसरायपुरिं ॥ ६ ॥
 उवहसइ सुरगुरुंपिव सबुद्धिमाहप्पपडिहयविपक्खो । तस्स किर मंतिवग्गस्स भणसु केणोवमं कुणिमो ? ॥ ७ ॥ जुम्मं ।
 एवंविहगुणे मंतिजणे समारोवियरज्जचित्तमहाभरस्स लीलाए चिय धरं धरंतस्स गामागरनगराउलं धरणिमंडलं
 वसमुवणितस्स जायमरणभयवामोहं दुहंतसामंतसमूहं पवत्तयंतस्स दीणाणाहजणमणोवंछियपूरणेक्कपच्चलाओ महा-
 दाणसालाओ कारित्तस्स तुंगसिंगोवहसियहिमसेलसिहरसिंगाई मयणाइमंदिराई निसामित्तस्स धम्मत्थपयासण-
 समत्थाई समयसत्थाई आराहित्तस्स दुक्करतवचरणसलिलपक्खालियपावमलाई गुरुवरणकमलाई निवारित्तस्स ज-
 णियजणवामोहं धम्मविरोहं सम्माणित्तस्स गुणगणोदग्गं पणइसयणवग्गं पुवज्जियसुकयसमुब्भवंतचित्ताइरित्तसो-
 क्खस्स पुरिसत्थसेवणब्भुज्जयस्स नयविणयवंतस्स दाणाणंदियवंदिजणसंदोदुग्गुल्लट्ठचरिबस्स वोळित्ति वासरा तस्स
 राइणो भुयणपयडस्स । अन्नया य विचित्तचित्तमणहरंमि मंदिरंमि पच्छिमरयणीसमए सुहसेज्जाए सुत्तस्स तस्स
 मंदीभूयंमि निदापसरे वियक्खणेण पढियमेक्केण जामरक्खगपुरिसेण—

श्रीगुणचंद
महावीरच०
४ प्रस्तावः
॥ ७३ ॥

जे पुवपुरिसवंसप्परोहगाढप्परूढमूलसमं । वेरिकुलकमलनिहलणकुंजरं सयलगुणनिलयं ॥ १ ॥
पुत्तं ठविउं नियए पयंमि पडिवन्नसंजमुज्जोगा । इह परभवे य कह ते पावित्ति न निव्वुइं पुरिसा ? ॥ २ ॥ (जुम्मं)
एवं च सोच्चा चित्तियं रत्ता-अहो दुलंभमेयं, जओ मम एत्तियकालेऽवि पउरासुवि पणइणीसु न एकस्सवि कुलालं-
बणस्स पुत्तस्स लाभो जाओ, अच्छउ सेसं, एवं ठिए य किं करेमि? किं समाराहेमि?, कथ वच्चामि? कस्स
साहेमि? को उवाओ? के वा एरिसकज्जे सहाया? को य मे पुरिसयारो? का वा पुवकम्मपरिणइत्ति खणं किं-
कायवयमूढयं अणुभविय तवेलं चेव अंगीकयसत्तभावो एवं सम्मं परिभाविउं पवत्तो-

परलोयपवत्ताणं जइवि सुएहिं न होइ साहारो । जं सवंसय उवरिं गओवि नगओ दुहं कुणइ ॥ १ ॥
तहविय पुवनराहिवसंतइवुच्छेय दुक्खमक्खिवइ । मज्झ मणो पुवनरिंदरक्खिओ कुरुजणवओ य ॥ २ ॥ (जुम्मं)
एत्थंतरे जायाइं समुट्ठियभारुंडकारुंडवहंसचक्कवायकुलकोलाहलाउलियाइं दिसिमुहाइं वियलंतपभापसरो वि-
च्छाईभूओ तारयानियरो पसरिया सिंदुरेणुपुंजर्पिंजरा सूरसारहिपभा ताडियाइं पडहसुरवज्जलरिभंभाभेरीभंकार-
भासुराइं पभायमंगलतूराइं समुग्गओ कमलसंडपयंडजइविच्छइखंडणुडामरकरपसरो दिणयरो, तओ उट्ठिऊण स-
यणिज्जाओ निस्सरिओ वासभवणाओ कयपाभाइयकिच्चो अंगरक्खपीढमहप्पमुहपहाणपरियणाणुगओ अत्थाणीमंडवे
गंतूण राया अणेगमणिकिरणविच्छुरियंमि सूरौव पुवपवयसिहरंमि कणयसिहासणंमि निविट्ठो, तयणंतरं च ठियाओ

नरसिंहस
सुतचिन्ता.

॥ ७३ ॥

उभयपासेसु चामरग्गाहिणीओ निविट्ठा य नियनियट्ठाणे मंतिसामंतसुहडखंडरक्खपाभोक्त्ता पहाणपुरिसा पडि-
च्छियाइं पच्चंतरायपेसियमहरिहपाहुडाइं चित्तियाइं रज्जकज्जाइं, खणंतरे य पेसियनीसेससामंतपभिइजणो कइय-
यपहाणजणपरियरिओ एगंतट्ठिओ रयणिक्खइयरं बुद्धिसारपमुहाण मंतीणं संसिऊण पुच्छिउमेवं समारद्वो-भो
मंतिणो ! सुणह तुम्हे समयसत्थाइं बुद्धिह तंतमंतपडलाइं पज्जुवासह विज्जासिद्धे सयंपि सवोवहासुद्धबुद्धिणो विवे-
यह गुविलंपि कज्जजायं, ता साहह कहमिमस्स सुयलाभचित्तासायरस्स पारं वच्चिस्सामोत्ति ? खणंतरं च चित्तिय
जुत्ताजुत्तं भणियं मंतिवग्गेण-देव ! सुट्ठु सट्ठाणे समुज्जमो, अम्हे पुरावि देवस्स एयमट्ठं विन्नविउकामा आसि,
संपयं पुण सयमेव देवेण सिट्ठे लट्ठं जायं, किं तु देवो अम्हे उवायं पुच्छइ, तत्थ य किं साहेमो ?

अइदिबनाणनयणोवल्लभरूवंमि एत्थ वत्थुंमि । कमुवायविहिं भणिमो ? किं वा पच्चुत्तरं देमो ? ॥ १ ॥

आगारिगियगइभणिइगोयरं मिणइ मारिसो अत्थं । एवंविहे य कज्जे अम्हं को बुद्धिवावारो ? ॥ २ ॥

एयं पुण जाणेमो नियनियकम्माणुरूवठाणेसु । जीवा उवायविरहेवि होंति पुत्ताइभावेणं ॥ ३ ॥

हसिऊण भणइ राया जइ एवं जणणिजणगविरहेऽवि । गयणंगणे पइक्खणमुववज्जंतीह किमजुत्तं ? ॥ ४ ॥

कम्मपहाणत्तणओ ता मा एगंतपक्खमणुसरह । जं दव्वखेत्तकालावि कारणं कज्जसिद्धिमि ॥ ५ ॥

अह भालयलमिलंतकरकमलं जं देवो आणवेइ अवितहमेयंति मन्निऊण बुद्धिसारपमुहो मंतिवग्गो भणिउमा-

श्रीगुणचंद
महावीरच०
४ प्रस्तावः
॥ ७४ ॥

ठत्तो—देव ! जइ एवं ता निसामेहि, अत्थि इहेव साहियपयंडचंडियाविज्जो मुंडमालालंकियविग्गहो निउणो पि-
सायसाहणेसु साहसिओ साइणीनिग्गहे कयकरणो खेत्तवालावयारेसु खोइक्खमो कन्नविज्जासु ओसहीसहस्ससंपि-
ट्ठरसायणपाणपणासियजराविहुरो विवरपवेसपरितोसियजक्खिणीलक्खपरिभोगप्पयारपरूवणपंडिओ महच्चइयवे-
सधारी घोरसिवो नाम तवस्सी ।

अवि य—आगिट्ठमि पगिट्ठो खुन्नो पन्नगमहाविसुद्धरणे । विक्खेवकरणदक्खो अमूढलक्खो वसीकरणे ॥ १ ॥
जं सत्थेसु न सिट्ठं बंधुरबुद्धीहिं पुवपुरिसेहिं । जं नो पुव्वकईणवि कहिंपि मइगोयरंमि गयं ॥ २ ॥
जुत्तीहिवि जं विहडइ सुयंपि जं सहहंति नो कुसला । जं सुइरंपि इ दिट्ठं संदिज्झइ तंपि दंसेइ ॥ ३ ॥ (जुम्मं)
भणइ य अत्थि असज्झं मज्झं भुवणत्तएवि नो किंपि । जइ सो एयसमत्थो एत्थवि देवो पमाणंति ॥ ४ ॥
एवं सोच्चा रत्ता कोउहलेण भणिया पहाणपुरिसा—अरे आणेह तं सिग्घमेव, जं देवो आणवेइत्ति भणिऊण
निक्खंता ते य रायभवणाओ, गया तस्सासमपयं, पणमिऊण निवेइयं से आगमणप्पओयणं, तओ हरिसुप्फुल्लो-
यणो कयकिच्चमप्पाणं मन्नंतो तो चलिओ घोरसिवो रायपुरिसेहिं समं, पत्तो य रायभवणं, दुवारपालनिवेइओ गओ
रायसमीवं, दिन्नासणो उचविट्ठो, सम्माणिओ उचियपडिवत्तीए नरवइणा, खणंतरे य पुच्छिओ एसो—भयवं ! कयरीओ
दिसाओ आगमणं ? कत्थ वा गंतवं ? किं वा एत्थावत्थाणप्पओयणंति !, घोरसिवेण भणियं—महाराय ! सिरिपवयाओ

घोरशिवा-
गमः.

॥ ७४ ॥

आगओऽम्हि, संपयं पुण उत्तरदिसिसुंदरीसवणकन्नपुरे जालंधरे गन्तुमिच्छामि, जं पुण पुच्छह अवत्थाणपओयणं तत्थ य तुम्ह दंसणमेव, संपयं एयंपि सिद्धंति, नरवइणा भणियं—भयवं! निरवग्गहा सुणिज्जइ तुम्ह सत्ती मंततंतेसु ता दंसेसु किंपि कोउगं, तओ जं महाराओ निवेयइत्ति पडिवज्जिय तेहिं तेहिं दिट्ठिवंचणदेवयावयारणनरवेहपुप्फवेहनट्ट-मुट्ठिसुहदुक्खपरिजाणणप्पमुहकोऊहलेहिं वसीकयं घोरसिवेणं नरिंदचित्तं, अह अवसरं लहिकण भणियं राइणा-भयवं! किं एएसु चेव कोऊहलेसु तुह विन्नाणपगरिसो उआहु अन्नत्थवि अत्थि?, मुणिणा भणियं—किमेवमसं-भावणागम्भमम्हारिसजणाणुचियं वाहरसि?, एगसहेणेव साहेसु जं दुक्करंपि कीरइ, तओ राइणा निवेइओ पुत्त-जम्मलाभविसओ वुत्तंतो, घोरसिवेण भणियं—किमेत्तियमेत्तेण किलिस्ससि?, अहमेयमट्ठं अकालेवि अविलंबं पसा-हेमि, राइणा भणियं—जइ एवं ता परमोऽणुग्गहो, केवलं को एत्थ उवाओ?, घोरसिवेण भणियं—एगंते निवे-यइस्सं, तओ उक्खित्ता कुवलयदलसच्छाहा मंतीसु राइणा दिट्ठी, उट्ठिया य इंगियागारकुसला सणियं सणियं नरिं-दपासाओ मंतिणो, जायं विजणं, घोरसिवेण जंपियं—महाराय! कसिणचउहसीनिसिए मए बहुपुप्फफलधूवक्ख-यबलिभक्खपरियरेण तुमए सह भयवं महामसाणहुयासणो तप्पणिज्जो, राइणा चित्तियं—कहं नु मए पुप्फाइपरि-यरेण सह हुयासणो तप्पणिज्जोत्ति?, अवसट्ठोत्ति, अहवा अभिप्पायसाराइं इसिवयणाइं, नो विसंबंधलक्खणदूसण-मावहंति, मुणिणा भणियं—महाराय! सुण्णचक्खुक्खेयो इव लक्खीयसि, राइणा भणियं—मा एवमासंकह, निवेयह

श्रीगुणचंद
महावीरच०
४ प्रस्तावः

॥ ७५ ॥

जहा पारद्धं, मुणिणा भणियं—तओ सो भयवं हुयासणो—उम्भडपयडियरूयो पयंडजालाकलावभरियनहो । दाही तुज्झं वंलियफलनियरं कप्परुक्खोव ॥ १ ॥ राइणा भणियं—जइ एवं ता सव्वहा आगमिस्सं चउद्दसीनिसाए, एस अत्थो साहियव्वोत्ति, पडिवन्नं च तेण, अह कयकुसुमतंवलदाणसम्माणे सट्ठाणंमि गए घोरसिवे राया निव्वत्तियदेव-याचरणकमलपूयापडिवत्तीहिं तेहिं तेहिं अस्सदमणाइएहिं विचित्तविणोएहिं अप्पाणं विणोएंतो पइक्खणं दिणाइं गणमाणो य कालं गमेइत्ति, कमेण य पत्ताए कसिणचउद्दसीए आहूयं मंतिमंडलं, निवेइयं रहस्सं, पुच्छियं च-संपयं किं कायव्वंति?, मंतीहिं पभणियं—देव ! किंपागफलाइंपिव मुहंमि महुराइं परिणइदुहाइं अन्नाइं तदियराइं दुहावि दीसंति कज्जाइं, अत्थस्स संसओऽविहु पवित्तिहेउत्ति किं तु निहिट्ठो, अविमुक्काविस्सासेहिं सव्वहा उज्जमेयवं, एवं भणिए राइणा कुसुमतंवालाइदाणपुव्वगं सम्माणिऊण मंतिवग्गो पेसिओ सगिहे, जाए य रयणिसमए सयं कयवे-सपरियत्तो नियत्तियपीढमद्दाइपरियणो समग्गवल्लिफलफुल्लपमुहसाइणपडलसमेओ करकलियतिक्खग्गखग्गमंडलो घोरसिवसमेओ अलक्खिज्जंतो अंगरक्खेहिं अमुणिज्जंतो दासचेडचाडुकारनियरेहिं वारिज्जमाणो पवत्तिज्जमाणो य पडिकूलेहिं अणुकूलेहि य अणेगेहिं सउणेहिं सव्वंगनिविट्ठविसिद्धरक्खामंतक्खरो संपत्तो महीवई महामसाणदेसं । जं च केरिसं ?—

निलीणविज्जसाहगं पचूढपूयवाहगं, करोडिकोडिसंकडं, रडंतघूयककडं ।

हुताश-
तर्पण-
स्वीकृतिः-

॥ ७५ ॥

सिवासहस्रसंकुलं मिलंतजोगिणीकुलं, पभूयभूयभीषणं कुसत्तसत्तनासणं ॥

पधुदुदुसावयं जलंततिवपावयं, भमंतडाइणीगणं पवित्तमंसमग्गणं ॥ १ ॥

कहकहकहट्टहासोवलक्खगुरुरक्खलक्खदुप्पेच्छं । अइरक्खरक्खसंवद्धगिद्धपारद्वघोररवं ॥ २ ॥

उत्तालतालसहुम्मिलंतवेयालविहियहलवोलं । कीलावणं व विहिणा विणिम्मियं जमनरिंदस्स ॥ ३ ॥

तत्थ य निरुविओ सलक्खणभूमिभागो घोरसिवेण, खित्तं च वलिविहाणं कया खेत्तवालपडिवत्ती खणिया वेइया भरिया खाइरंगाराणं मसाणसमुत्थाणं, भणिओ य राया-अहो सो एस अवसरो ता ददमप्पमत्तो ईसाणकोणे हत्थसयदेससंनिविट्ठो उत्तरसाहगत्तणं कुणमाणो चिट्ठसु, अणाहूओ य मा पयमवि चलेज्जासित्ति पुणो पुणो निवारिय पेसिओ नरिंदो, गओ य एसो, घोरसिवेणावि आलिहियं मंडलं, निसन्नो तहिं, निवद्धं तहिं पउमासणं, कयं सकलीकरणं, निवेसिआ नासावंसग्गे दिट्ठी, कओ पाणायामो, नायविंदुलवोववेयं आढत्तं मंतसुमरणं, समारूढो ज्ञाणपगरिसंमि । इओ य चित्तियं राइणा-अहं किर पुवं सिकखं गाहिओ मंतीहिं, जहा-अविस्सासो सव्वत्थ काय-वोत्ति, निवारिओ य सव्वायरं पुणो पुणो एएण जहा अणाहूएण तए नागंतव्वंति, ता समहियायरो य जणइ संकं, न एवंविहा कावालियमुणिणो पाएण कुसलासया हवंति, अओ गच्छामि सणियं सणियमेयस्स समीवं, उवलक्खेमि से किरियाकलावंति विगप्पिउं जाव पट्ठिओ ताव विप्फुरियं से दक्खिणलोयणं, तओ निच्छिययंछियत्थलाभो करकलिय-

श्रीगुणचंद
महावीरच०
४ प्रस्तावः

॥ ७६ ॥

करवालो कसिणपडकयाधगुंठणो मंदं मंदं भूमिविमुक्कचरणो गंतूण पुट्टिदेसे ठिओ घोरसिवस्स, सुणिउमाढत्तो य,
सो य झाणपगरिसत्तणेण अणावेविखय अवायं अविभाविय पडिकूलत्तं विहिणो अविन्नायतदागमणो नरवइथोभक-
रणदक्खाइं मंतक्खराइं पुव्वपवित्तविहिणा समुच्चरितो निसुणिओ रत्ता, परिभावियं चऽणेण—अहो एस दुट्ठतवस्सी
मं थोभविहिणा विबलं काऊण सन्निहितनिहित्तकत्तियाए परिकुवियकयंतभमुहकोणकुडिलाए विणासिऊण हुयवहं
तप्पिउं वंछति, पहाणनरोवहारविहिणा हि सिज्झंति दुट्ठदेवयाओ, ता किमेत्थ जुत्तं?, अवि य—

एतस्स किं इयाणि वावडचित्तस्स तिव्खखग्गेण । कदलीदलं व सीसं लुणामि पासंडिचंडस्स ॥ १ ॥

अहवा दुद्धररिउगंधसिंधुराघायदंतुरग्गेण । खग्गेण मज्झ लज्जिज्झईह घायं करंतेण ॥ २ ॥

केवलमुवेहणिज्जो नयेस एयंमि होइ पत्थावे । जं थोभकरणविहिणा मरणं मह वंछई काउं ॥ ३ ॥

तथापि—झाणावरोहवक्खित्तचित्तपसरंमि हणिउकामस्स । सग्गं गयावि गुरुणो होहिंति परंमुहा मज्झ ॥ ४ ॥

ता जुत्तमिणं ठाऊण दूरदेसंमि बोहिउं एयं । पढमं दिन्नपहारे पडिपहरेउं ममेयंमि ॥ ५ ॥

इय चिंतिऊण रण्णा ठाउं दूरे पयंपियं एयं । गिण्हसु करेण सत्थं रे रे पासंडिचंडाल ! ॥ ६ ॥

इइ सोच्चा झाणेगग्गभंगरोसोवरत्तनयणजुओ । भालयलघडियभडभिउडिभीसणो उट्ठिओ सोऽवि ॥ ७ ॥

करकलियनिसियकत्तियनियंतकसिणप्पमोलिजडिसंगो । अह तिव्वगव्वघोरं घोरसिवो भणिउमाढत्तो ॥ ८ ॥

घोरशिव-
जालस्फोटः

॥ ७६ ॥

रे रे दुट्टनराहिव ! विलज्ज निस्सत्त मा पलाइहिसि । सुयविसयतिकखदुक्खाओ जेण मोएमि तं ज्ञत्ति ॥ ९ ॥
 रण्णा पढियं मा गज्ज निष्फलं पहर रे तुमं पढमं । न कयाइवि अम्ह कुले पढमपहारो कओ रिउणो ॥ १० ॥
 तत्तो विचित्त वग्गणसुनिउणकरणप्पयारकुसलेण । घोरसिवेणं रत्तो पवाहिया कत्तिया कंठे ॥ ११ ॥
 रत्तावि तक्खणं चिय दक्खत्तणओ इमस्स सत्थजुओ । हत्थो पहारसमए बद्धो नियवाहुबंधेण ॥ १२ ॥
 भुयदंडनिविडपीडणविहडियदढपहरणंमि हत्थंमि । मुट्ठिप्पहारपहओ निवाडिओ सो धरणिवट्ठे ॥ १३ ॥
 दढमंतंतंसिद्धीवि विहडिया तस्स तंमि समयंमि । विवरंमुहंमि दइवे अहवा सव्वं विसंवयइ ॥ १४ ॥
 अह वीसमिऊण खणं घोरसिवो फुरियवीरिओ सहसा । पारद्धो रत्ता सह जुज्जेउं बाहुजुज्जेणं ॥ १५ ॥
 मल्लाण व खणमुट्ठीण पडणपरिवत्तणुव्वलणभीमो । सरहसहसंतभूओ अह जाओ समरसंरंभो ॥ १६ ॥
 निविडभुयदंडचंडिमसंपीडणविहडियंगवावारो । मुच्छानिमीलियच्छो अह निहओ सो महीवइणा ॥ १७ ॥
 एत्थंतरंमि तियसंगणाहिं वियसंतसुरहिकुसुमभरो । जयजयसहुम्मीसो पम्मुको नरवइसिरंमि ॥ १८ ॥
 हारद्धहारकंचीकलावमणिमउडमंडियसरीरा । रणज्झणिरमहुरनेउरखपूरियदसदिसाभागा ॥ १९ ॥
 नवपारियायमंजरिसोरभरहसुम्मिलंतभसलकुला । धरियधवलायवत्ता तहागया देवया एका ॥ २० ॥ जुम्मं ।
 तीए भणियं नरसिंघ ! निच्छियं तंसि चेव नरसिंघो । जेणस महापावो खत्तियखयकारओ निहओ ॥ २१ ॥

श्रीगुणचंद
महावीरच०
४ प्रस्तावः
॥ ७७ ॥

रण्णा भणियं कह देवि! कहसु खत्तियखयंकरो एस? । मइ जीवन्ते संपइ, पडिभणइ निव तओ देवी ॥ २२ ॥
एएण किंपि सिद्धिं समीहमाणेण पावसमणेण । हणिया कलिंगवंगंगहूणपंचालपमुहनिवा ॥ २३ ॥
दिट्ठिप्पयंचमाइंदजालपमुहेहिं कूडकवडेहिं । अच्छरियाइं दावितएण को को न वा नडिओ? ॥ २४ ॥
न य केणवि एस जिओ न यावि एयस्स लक्खियं सीलं । तुमए उभयंपि कयं अहह मई निम्मला तुज्झ ॥ २५ ॥
इय तुह असरिससाहससुंदरचरिएण हरियहिययाए । मम साहसु किंपि वरं जेणाहं तुज्झ पूरेमि ॥ २६ ॥
ताहे मउलियकरकमलसेहरं नामिउं सिरं राया । भणइ तुह दंसणाओऽवि देवि! अन्नो वरो पवरो? ॥ २७ ॥
भणियं सुरीएँ नरवर! इयरजणोव्व न जइवि पत्थेसि । तहवि तुह वंछियत्थो होही मज्झाणुभावेण ॥ २८ ॥
इय भणिए नरवइणा पराएँ भत्तीएँ पणमिया देवी । लच्छिव पुण्णरहियाण झत्ति अहंसणं पत्ता ॥ २९ ॥
नरिंदोऽवि तारिसमच्चभुयं देवीरूवं सहसच्चिय नयणगोयरमइकंतमुवलब्भ चिंताकलोलमालाउलो एवं परि-
भावेइ—किमेयं सुमिणं उआहु विभीसिया अहवा एयस्स चेव दुट्ठकावालियस्स मायापवंचो किं वा मम मइ-
विन्भमो उयाहु अवितहमेयंति?,

इय जाव निवो संदेहदोलमालंबिउं विकप्पेइ । मा कुणसु संसयं ताव वारिओ गयणवाणीए ॥ १ ॥
घोरसिवोवि मत्तो इव मुच्छिओ इव दढदुघणताडिओ इव महापिसायनिप्फंदीकओ इव मुसियसारवक्खरो इव

घोरशिव-
पराजयः

॥ ७७ ॥

पियविरहमहागहगहिओ इव दुट्टोसहपाणप्पणट्ठचित्तचेयणो इव खणंतरं चिट्ठिय सिसिरमारुएण समासासियसरीरो
 थोवोवलद्धचेयणो मंदमंदमुम्मीलियलोयणजुयलो लज्जावसविसंदुलसव्वंगोवंगो अइदीणवयणो दीहमुस्ससिय राया-
 णमवलोइउं पवत्तो, नरवइणावि दढसंजायकरुणभावेण अइदुक्खिओ एसोत्ति उवलक्खिय भणिओ घोरसिवो-
 भो किमवलोएसि?, घोरसिवेण सगग्गयं भणियं-महाराय! अवलोएमि नियकम्मपरिणइचिलसियं, राइणा
 भणियं-किमेवं सविसायं जंपसि?, सव्वहा धीरो भव परिहर दुरज्झवसायं परिचय कोवकंडुं विमुंच विजयाभिलासं
 अणुसर पसमाभिरइं पियसु करुणारसं परिचित्तेसु जुत्ताजुत्तं समुज्झसु खुदजणोचियं वाचारंति, अह समीहियत्य-
 सिद्धी न जायत्ति सम्मसि ता गिण्हसु इमं परिकुवियकयंतजीहाकरालं नीलपहापडलसामलियसयलदिसिचक्कवालं
 मम करवालं, करेसु मम सरीरविणासणेण नियसमीहियसिद्धिं, जओ मुक्को मए संपयं पोरिसाभिमाणो तुह कज्जसाह-
 णट्ठाएत्ति । अवि य—

अच्छउ तरंगभंगुरमसारगं नियसरीरयं दूरे । जीयंपि हु परहियकारणेण धारंति सप्पुरिसा ॥ १ ॥
 जं पुण पढमं चिय तुज्झ कारणे नो समप्पिओ अप्पा । विहिओ य ज्ञाणविग्घो एयं नणु कारणं तत्थ ॥ २ ॥
 मम विरहे एस जणो एसो नीसेससाहुवग्गो य । धम्मभंसमवस्सं पाविस्सइ पावलोयाओ ॥ ३ ॥
 इण्हि तुह गुरु दुक्खं उवलक्खिय वद्धकक्खडसहावं । निरवेक्खं मज्झ मणो जायं सेसेसु कज्जेसु ॥ ४ ॥

श्रीगुणचंद
महावीरच०
४ प्रस्तावः

॥ ७८ ॥

घोरसिवेण भणियं—महाभाग ! मा एवमुल्लवेसु, जीवसु तुमं मज्जीविण्णावि जाव जलहिकुलसेलससितारयदिवायरे, पसीयसु मे, वियरसु एकं पसायंति, राइणा भणियं—किमेवं वाहरसि ?, जीवियदाणाओऽवि किमवरमदेयं ? ता असंभंतो पत्थेसु, घोरसिवेण भणियं—जइ एवं ता अणुजाणसु मम एयंमि पज्जलंतजालासहस्सकवलियसलभकुलसंकुले मिसिमिसंतद्धदद्धकलेवरुल्ललंतविस्सगंधुदुरे मसाणहुयासणे पवेसुज्जमं, हवसु धम्मबंधवो, नन्नहा मे पुवांवहिय-महापावपव्वयकंतस्स अवस्सं विस्सामो भविस्सइत्ति, रण्णा भणियं—कुओ तुह पुवं पावसंभवो ?, जओ कयाइं तुमए विविहाइं तवचरणाइं आपूरियाइं पावभक्खणदक्खाइं मंतज्झाणाइं पूइयाइं देवकमकमलाइं निव्वत्तियाइं वेयरहस्सज्झयणाइं उवासिओ गुरुजणो पवट्टिया धम्ममग्गेसु पाणिणो, ता न सव्वहा वोत्तुमवि जुत्तमेयं भवारिसाणं, घोरसिवेण भणियं—महाराय ! अलमलं मम पासंडिचंडालस्स वीसत्थधाइणो पयडियविचित्तकूडकवडस्स दक्खिन्नर-हियस्स निसायरस्सेव निक्करुणस्स, किंपागतुरुफलस्सेव वाहिरमेत्तरमणीयस्स वगस्सेव सुसंजमियपाणिप्पायप्पया-रस्स भुयंगमस्सेव परच्छिदावलोयणनिरयस्स दुज्जणस्सेव मुहमहुरभासिणो संकित्तणेणं, एवं च सव्वहा विरत्तोऽमि पावपंकपडिहत्थाओ नियकडेवराओ, नेव य अन्नो पावविसोहणोवाओ, राइणा भणियं—भो भो किमेवं पुणो पुणो अत्ताणं अत्ताणं व पुरिसं दूसेसि ?, पयडक्खरं निवेएसु नियपुव्ववित्तंतं, घोरसिवेण भणियं—महाराय ! गरुओ एस वुत्तंतो, राइणा भणियं—किमजुत्तं ?, साहेसु, घोरसिवेण भणियं—जइ एवं ता निसामेहि—

घोरशिव-
पश्चात्तापः

॥ ७८ ॥

अस्थि सुरसरितुसारपवित्तपरिसरुहेसं विविहावणभवणमालाविभूसिधं समूसियसियवेजयंतीरेहंतसुरमंदिरसिहरं
 सिरिभवणं नाम नयरं, तत्थ य पयंडमायंडमंडलुद्दामपयावपरिसोसियविपक्खजलासओ अणेगसमरवाचारविद्धत्तजसो
 अवंतिसेणो नाम राया अहेसि, जस्स विजयजत्तापत्थियस्स पत्थिवसहस्साणुगम्ममाणमग्गस्स उहंडपुंडरीयपंडुरच्छत्त-
 च्छाइयगयणाभोगा नट्टदिवसावगासव सोहंति दस दिसाभागा, जस्स य गज्जंतमत्तकुंजरगंडत्थलगलंतनिरंतरमयजला-
 सारजायदुद्धिंधयारभीयाभिसारियव अणुसरइ कवाडवियडं वच्छत्थलं रायलच्छी, जस्स चउविहाउज्जघोरघोसं मे-
 होहरसियंपिव सोऊण दूरं पलायंति रायहंसा, जस्स समरंगणेषु रोसारुणाओ पडिसुहडेसु पडिबिंबियाओ पप्फु-
 लसुकुमारकरवीरकुसुममालाउव रेहिति दिट्ठीओ, तस्स य नियरूवलावन्नजोवणगुणावगणियरइप्पवायाओ नीसे-
 सपणइणीपहाणाओ दुवे भारियाओ अहेसि, पत्तलेहा मणोरमा य, पढमाए जाओ अहमेको पुत्तो वीरसेणो नाम,
 बियाए पुण विजयसेणोत्ति, गाहिया दोऽवि अहे धणुवेयपरमत्थं कुसलीकया चित्तपत्तच्छेयविणोएसु सिक्ख-
 विया य खेडयस्सग्गगुणवणियं जाणाविया महल्लजुद्धं, किं बडुणा?, मुणाविया सब्बकलाकलावं, अन्नया य उचिओत्ति
 परिचितिय ठाविओऽहं ताएण जुवरायपए, दिन्ना य मज्झ लाडचोडमरहट्टसोरट्टपसुहा देसा कुमारभुत्तीए, परिपालेमि
 जुवरायत्तणं, ममंपि अणुमग्गमणुसरइ सुहडाडोवसंकुडा पगलंतगंडत्थला दप्पुदुरसिंधुरघडा, ममावि मग्गओ धावंति
 तरलतरतुरंगपहकरा, मज्झंपि परसुसेलचंडगंडीवसरविसरकुंतगयापहरणहत्थाइं वित्थरंति चउहिसिंवि पुरिसवलाहंति,

श्रीगुणचंद
महावीरच०
४ प्रस्तावः

॥ ७९ ॥

दुइयस्सवि मज्झ सवत्तभाउणो दिन्नाहं ताएण कइक्ख गामसयाहं, एवं च विसयसुहमणुहवन्ताणं वसंति वासरा ।

अण्णया खणविपरिणामधम्मयाए जीवलोयविलसियाणं पइसमयविणाससीलयाए आउयकम्मदलियाणं अप्प-
डिइयसासणत्तणओ जममहारायस्स सुरिंदचावचवलायाए पियजणसंपओगसमुब्भवसुहस्स पाविओ अवन्तिसेणराया
पंचत्तंति, कयंमि य तम्मयकिच्चे मंतिसामंतसरीररक्खप्पामोक्खपहाणलोएण निवेसिओऽहं रायपए, पयट्ठियाहं
मए तायस्स सग्गंगयस्स कएण तडियकप्पडियदीणाणाहाणिस्सियविदेसिज्जणाण महादाणाहं काराधियाहं उत्तुं-
गसिंसुंदराहं देवमंदिराहं निरुवियाहं अवारियसत्ताहं, कालक्कमेण य विगओ मम सोगो, वसीकयं सामंतचकं, नि-
वासिया नियमंडलविलुंपगा पयट्ठिओ पुवपुरिसमग्गो । अन्नया य—

सियसिंधुरखंधगओ विलयाजणधुवमाणसियचमरो । धरियधवलायवत्तो किंकरनरनियरपरियरिओ ॥ १ ॥

उम्मग्गपयट्ठुहामतुरयघट्ठुक्खउदयरओहो । नयरओ निग्गओऽहं वणलच्छीपेच्छणट्ठाए ॥ २ ॥

जाव य तत्थ पेच्छामि पुप्फफलसमिद्धवंधुरं तरुणतरुणं परिब्भमामि माहवीलयाहरेसु अवलोएमि कयली-
दलाणं रुंदत्तणं निरिक्खामि संपिडियससिखंडपंडुरं केयइपत्तसंचयं अग्घाएमि अणग्घवउलमालियासुरहिपरिमळं
करेमि करतलेण सोरभभरलोभमिलंतरणज्झणंतफुलंधयरिंछोलिलिहिज्जमाणमयरंदं नवसहयारीमंजरीपुंजं ताव सह-
सच्चिय सुणेमि नियपरियणकलयलं । कहं ?—

वीरसेनवृत्ते
राज्याप्तिः.

॥ ७९ ॥

सामी ! पेच्छह गयणंगणंमि कह वट्टए महाजुज्झं ? । सज्झसकरमइभीमं सुराण विज्जाहराणं वा ॥ १ ॥
 एवं सोच्चा मएवि उत्ताणीकयानिमेसलोयणेण उट्ठमवलोयमाणेण दिट्ठा विविहप्पयारेहिं जुज्झमाणा गयणंमि
 विज्जाहरा, ते य एवं जुज्झंति—

सियभल्लयसच्चलसिल्लसूल अवरोप्परु मेल्लहिं मिंडिमाल । वंचावहि तक्खणि लद्धरक्ख पुण पहरह जय जस सव्वपक्ख ?

खणु निट्ठुरमुट्ठिहिं उट्ठियंति, खणु पच्छिमभागमणुवयंति ।

खणु जणगजणणि गालीउ देंति, खणु नियसोंडीरिम कित्तयंति ॥ २ ॥

अच्छी निमीलियसुय रहिं चिर साहिय विजयविज्ज, उणु खणे खणे जायहिं जुज्झसज्ज ।

अविगणिय मरण रणरसियचित्त, भुयदंडमहाबलमयविलित्त ॥ ३ ॥

इय तेसिं खयरानं परोप्परं जुज्झिराणमेकेणं । लद्धूण छलं अत्तो पहओ गुरुमोग्गरेण सिरे ॥ ४ ॥

पडिओ धरणीवट्ठे ममंतिए विगयचेयणो सो य । मुच्छानिमीलियच्छो विच्छाओ छिन्नरुक्खोव ॥ ५ ॥

एत्थंतरे तयणुमग्गेण चेव कट्ठियनिसियखग्गो पधाविओ इयरो विज्जाहरो तस्स वहनिमित्तं, मुणिओ य मए
 जहा एसो एयस्स विणासणकए एतित्ति, तओ मए भणिया सहवेहिणो धाणुहिया अंगरक्खा य, जहा—

रे रे रक्खह एयं भूमीतलनिवडियं महाभागं । एयं विणासणुज्जुयमितं खयरं पडिक्खलह ॥ १ ॥

श्रीगुणचंद
महावीरच०
४ प्रस्तावः

॥ ८० ॥

असिखेडयहत्थेहिं तस्संगं छाइयं वरभडेहिं । ओगासमलभमाणो रुद्धो खयरो तओ भणइ ॥ २ ॥
हे भो नरिंद ! मुंचसु एयं खयराहमं मम वहट्ठा । एसो खु मज्झ वइरी विणासियवो मएऽवस्सं ॥ ३ ॥
भणिओ य मए खयरो किं पलवसि तं पिसायगहिओव । किं एस खत्तधम्मो ? जेणेवमहं करेमिति ॥ ४ ॥
किं चावरद्धमिमिणा जेणेयं मारिउं समीहेसि । सो भणइ एस मम दारभोगरसिओत्ति ता हणिमो ॥ ५ ॥
ताहे मए स भणिओ साहू इयरो व होउ नऽप्पेमि । सरणागयरक्खणलक्खणं च राईण खत्तवर्यं ॥ ६ ॥
उच्चद्धभिउडिभंगो रोसारुणनयणजुयलदुप्पेच्छो । फरुसक्खरेहिं खयरो ताहे मं भणिउमाढत्तो ॥ ७ ॥
रे रे दुट्ठनराहिव ! मा बोइसु केसरिं सुहपसुत्तं । दिट्ठीविसाहितुंडं कंइयसु मा करग्गेण ॥ ८ ॥
जालालिभीममग्गि अवक्कमसु य मा तुमं पयंगोव । जइ वंछसि चिरकालं रज्जं काउं महियलंमि ॥ ९ ॥
भणिओ य मए एसो किं रे वाहरसि मुक्कमज्जाय ! । सप्पुरिसमग्गलगस्स मज्झ जं होइ तं होउ ॥ १० ॥
चिरकालजीविणवि पेरेतेऽवस्समेव मरियवं । ता अवसर दिट्ठिपहाओ कुणसु जं तुज्झ पडिहाइ ॥ ११ ॥
जइ एवं ता विहिणो मा दाहिसि दूसणं तुमं राय ! । इय भणिऊण सरोसो खयरो सो गयणमुप्पइओ ॥ १२ ॥
तयणंतरं मए निरुविओ सो भूमितलनिवडिओ विजाहरो जाव अज्जवि सजीवो ताहे काराविया
चंदणरसच्छडापहाणा सिसिरोवयारा संवाहियाइं सरीरसंवाहणनिउणेहिं पुरिसेहिं सवंगाइं, खणंतरेण लद्धा तेण

विद्याधर-
रक्षा.

॥ ८० ॥

चेयणा उम्मीलियं नयणनलिनं अवलोइयं दिसिमंडलं आलविओ पासवत्ती परियणो-भो भो महायस ! कहमहमिह महीवट्टे निवडिओ ?, कत्थ वा वेरिविज्जाहरो ?, को वा एस देसो ?, किंणामं इमं नयरं ? को वा एसो छत्तच्छायानि-वारियरविकरपसरो परिचलंतधवलचामरजुयलो मज्झकए नरनियरं वावारित्तो पुरो संठिओ चिट्ठइ महायसो नराहिव-इत्ति ?, इमं च सोच्चा निवेइयं से परियणेण गयणपडणाओ आरब्भ सवं जहावित्तंति । तओ सो खयरो दीहं नीससिय मम पच्चासत्ते ठाऊण जोडिय करसंपुडं विन्नविउमाढत्तो-महाभाग ! धन्ना सा महिमहिला जीसे तं पई कयलक्खणा इमे भिच्चा सेवंति जे तुह चरणकमलं धन्ना ते सुहडा जे तुह कज्जे तणं व नवि गणंति नियजीवियं, अहो ते परो-वयारित्तणं अहो सप्पुरिसकम्माणुवत्तित्तणं अहो नियकज्जनिरवेक्खया अहो सरणागयवच्छलत्तणं, न सव्वहा मम मणागंपि पीडमुप्पाएइ सत्तुपराभवो जं तुमं सयमेव पुरिसरयणभूओ दिट्ठोसि, मए भणियं-महाभाग ! अणवेक्खिय-जुत्ताजुत्तविचारो हयविही जं तुम्हारिसाणवि निवडंति एरिसीओ आवयाओ, अणुभूयपुव्वमवि पावंति विसमं दसाविवागं, सव्वहा असरिसमिमं जेण न कयाइं रंभायंभो सहइ मत्तमायंगगंडयलकंडूवुच्छेयं, (न रेहइ जुज्जमाणो मुणालतंतू) पासंमि, को पुण साहेसु एत्थ वइयरो ?, खयरेण भणियं-किमेत्थ कहियवं ?, पच्चक्खमेव दिट्ठं महा-णुभागेणं, मए भणियं-सम्मं निवेएसु, खयरेण भणियं-जइ कोऊहलं ता निसामेसु—

कलहोयकूलकोडीविराइओ रयणकोडिविच्छुरिओ । वेयड्ढगिरी तुमएवि निमुणिओ भरहखेत्तंमि ॥ १ ॥

श्रीगुणचंद
महावीरच०
४ प्रस्तावः
॥ ८१ ॥

सुरसिद्धजकुस्वरकुस्वसकिंनरकिंपुरिसमिहुणरमणिजो । सुरहिवरकुसुमतरुसंडमंडिउद्दामदिसिनिवहो ॥ २ ॥
विज्जाहररमणीजणरमणीयं विजियसवपुरसोहं । तत्थऽत्थि गयणवल्लभनयरं नामेण सुपसिद्धं ॥ ३ ॥
तत्थ य राया निवसइ समग्गविज्जासहस्सबलकलिओ । पणमंतस्वयरमणिमउडकिरीडटिविडिक्कियग्गकमो ॥ ४ ॥
नियवलतुलियाखंडलपरक्कमो गुरुपयावहयसत्तू । तिहुयणविक्खायजसो नामेणं विजयरओत्ति ॥ ५ ॥
रूवाइगुणसमिद्धाए तस्स भज्जाए हिययदइयाएँ । कंतिमईए पुत्तत्तणेण जाओ अहं एक्को ॥ ६ ॥
पकओ पुरे पमोओ मह जम्मे तत्थ स्वयरराएणं । करिणो मोत्तूण परे विमोइया वंधणेहिंतो ॥ ७ ॥
अह सुपसत्थंमि दिणे सम्माणिय पणइसयणगुरुवग्गं । जयसेहरोत्ति नामं ठवियं मम गुरुजणेणंति ॥ ८ ॥
गयणंगणपरिसक्कणपमोक्खविज्जाओ गाहिओ अहयं । अह तरुणभावपत्तो गुरुहिं परिणाविओ भज्जं ॥ ९ ॥
पउमावइत्ति नामेण पवरविज्जाहरिंदिकुलजायं । रूवाइगुणगेणंण विजयपडायंव कामस्स ॥ १० ॥ जुम्मं ।
एस पुण वइरिस्वयरो रहनेउरचक्कवालपुरगहुणो । सिरिसमरसिंहनामस्स अत्तओ अमरतेओत्ति ॥ ११ ॥
बालवयस्सो मम गाढरूढपेमाणुबंधसव्वस्सो । विस्सासपयं सवेसु पुच्छणिज्जो य कज्जेसु ॥ १२ ॥
सहसयणपाणभोयणचंकमणट्टाणकरणनिरयाणं । अहं दोणहवि कालो बोलइ दढमेक्कचित्ताणं ॥ १३ ॥
अह परियणेण मज्झं निवेइयं एगया रहट्टाणे । जह एस तुज्झ मित्तो विरूवचारी कलत्तंमि ॥ १४ ॥

जयशेखर-
वृत्तम्.

॥ ८१ ॥

असहहणाओ मए स परियणो वारिओ खरगिराहिं । अघडंतमेवमन्नं न भासियव्वं मह पुरोत्ति ॥ १५ ॥
 सयमवि दिट्ठं जं जुत्तिसंगयं तं वयंति सप्पुरिसा । सहसत्ति भासियाइं पच्छाऽपत्थं वाहित्ति ॥ १६ ॥
 रविकरपसरोच्च जणे घणपडलच्छाइओऽवि विप्फुरिओ । अह एस वइयरो गोविओऽवि पणयाणुरोहेण ॥ १७ ॥
 रायभवणाओ सगिहंमि एगया आगओऽम्हि पेच्छामि । सयमेव तं कुमित्तं अणज्जकज्जंमि आसत्तं ॥ १८ ॥
 दट्ठूण तं तहट्ठियमेगंते जाव चिंतिउं लग्गो । नियपरियणपरियरिओ तावेस पलाइओ झत्ति ॥ १९ ॥
 अहमवि पहरणसहिओ नियथोवपहाणपुरिसपरियरिओ । तस्साणुपहे लग्गो सोऽवि य अहंसणं पत्तो ॥ २० ॥
 मणपवणजइणवेगेण जाव पत्तोऽम्हि एत्थ ठाणंमि । ता एस महापायो मम पडिओ चक्खुमग्गंमि ॥ २१ ॥
 परियणपुरिसावि मए सयलासु दिसासु पेसिया पुवं । एयस्स विणासकए अहमेक्को एत्थ संपत्तो ॥ २२ ॥
 असहायं मं दट्ठुं एसो सहसत्ति जुज्झिउं लग्गो । एत्तो अन्नं सव्वं जायं तुम्हंपि पच्चक्खं ॥ २३ ॥
 एत्थंतरंमि सन्नाहकरणदढगूढकायदुद्धरिसा । भूमियलं पेक्खंता खयरा तत्थागया तुरियं ॥ २४ ॥
 पुट्ठा य मए साहह किं भो तुज्झं समागमणकज्जं ? । तेहिं कहियं सामी इह सुवइ निवडिओ अम्हं ॥ २५ ॥
 सो दंसिओ य तेसिं तो ते दट्ठूण तस्स पडियरणं । अचंतहरिसियमणा मं पइ भणिउं समाढत्ता ॥ २६ ॥
 संमं कयं नराहिव ! जमेवमेयस्स पालणा विहिया । जं एयकए वाढं परितप्पइ खयरनरनाहो ॥ २७ ॥

श्रीगुणचंद
महावीरच०
४ प्रस्तावः

॥ ८२ ॥

एयस्स मग्गणकए सवत्थवि पेसिया खयरसुहडा । जं एको चिय पुत्तो एसो सिरिखयरनाहस्स ॥ २८ ॥
ता जयसेहरकुमारं पेसह एयं जहा समप्पेमो । सुहिसयणजणणिजणयाण दंसणुकंठियमणाणं ॥ २९ ॥
भणिओ मए स खयरो कुमार ! तुह परियणो भणइ किंपि । ता साह तुमं चिय किं पुणेसि पच्चुत्तरं देमो ॥ ३० ॥
कुमरेण तओ भणियं एगत्तो तुज्झ असरिसो पणओ । एगत्तो गुरुविरहो दोन्निऽवि दोलंति मह हिययं ॥ ३१ ॥
ताहे विसिद्धभोयणदिबंसुयरयणभायणाईहिं । सम्माणिऊण कुमरो सट्ठाणं पेसिओ स मए ॥ ३२ ॥
तेणावि भणियमेयं नरिंद ! काएण एस वचिस्सं । हिययं तु निगडजडियं व तुम्ह पासे परिव्वसिही ॥ ३३ ॥
वरमत्थस्वओ वरमन्नदेसगमणं वरं मरणदुक्खं । सज्जणविरहो पुण तिकखदुक्खलक्खंपि अक्खिवइ ॥ ३४ ॥
इय भणिउं सोगगलंतनयणजलविंदुधोयगंडयलो । काऊण मम पणामं सपरियणो अइगओ गयणं ॥ ३५ ॥
अहंपि तेसिं गयणुप्पयणसामत्थमवल्लोहंतो पुवदिट्ठसमरवावारसरंभमणुचितयंतो चित्तयंतो केत्तियंपि वेलं विलंबि
नियरज्जकजाइं अणुचित्तिउं पवत्तो, विसुमरियं च मम भोगपमुहकज्जकोडिकरणपसत्तस्स तं गयणनिवडियविज्जाहरमार-
णउज्जुयदुद्धखयरस्स सामरिसं वयणं । एगया य रयणीए जाव कहवयपहाणजणपरियरिओ नियदेससुत्थासुत्थपरिभाव-
भावणेण य रायंतररहस्सायन्नणेण य गयतुरयगुणवन्नणेण य किन्नराणुकारिगायणजणपारद्धकागलीगीयसवणेण य
सायरपणचिरवारविलासिणीचित्तपयक्खेवनिरिक्खणेण य नम्मालावकरणेण य बिंदुचुयपहेलियापणहुत्तरजाणणेण य

जयशेखर-
गमनं.

॥ ८२ ॥

विणोयंतो चिट्ठामि ताव अयंडविहडियवंभंडभंडुडामरो जुगंतपणचिरभेरवपहयडमडमेंतडमरुयनिनायनिहुरो खरनहर-
 निहारियमयगलगलगजियदारुणो पासपरिवत्तिभवणभित्तिपरिफालणसमुच्छलंतपडिसहयसहस्सदुविसहो समुट्ठिओ
 हलवोलोत्ति, तं च सोऊण विप्फारिनयणजुयलो सयलदिसिमंडलमहपवलोयमाणो पेच्छामि तडिदंडपयंडकरवाल-
 वावडकरे भवणंगणमभिसरंते हणहणहणत्ति भणंते विज्जाहरे, ते य दट्ठणमम परियणो भयभरथरहरंतसरीरो करुणाइं
 दीणाइं वयणाइं समुल्लवित्तो सयलदिसासु सिग्धं पलाओत्ति, ताहे पहरणरहिओ एगागीवि ठाऊणाहं तेसिं संमुहं
 जंपिउमेवं पवत्तो य-रेरे किं गलगहियव्व निरत्थयं धिरसमारसह? के तुब्भे? केण पेसिया? किं वा आगमणकज्जं?,
 तेहिं भणियं-रे रे नरिंदाहम! तइया अम्ह पडुणो सत्तुरक्खणेण वयणमवगणिय संपयं धिट्ठयाए अयाणमाणो इव के
 तुब्भे केण पेसिया किं वा आगमणकज्जंति पुच्छसि, जइ पुण विसेसकहणेण तूससि ता निसामेहि, अम्हे विज्जा-
 हरा रहनेउरचक्कवालपुरविज्जाहरनरिंदसिरिसमरसिंचनंदणेण वेरिखयरासमप्पणपरूढगाढकोवानलेन सिरिअमरते-
 यकुमरेण तुह दुव्विणयतरुफलदंसणत्थं पेसियत्ति, मए भणियं-जइ एवं ता जहाइद्वं उवचिट्ठहत्ति, तओ अखयसरीरं
 चेव मं गहिऊण उप्पइया ते गयणमग्गेण, गया य दूरदेसं, मुक्को य अहं एगत्थ भुयंगभीमे गिरिनिगुंजे, भणियं च
 मए-किं रे! एवं मुंचह? जं नेव पहरह, तेहिं भणियं-एत्तिया चेव पडुणो आणा, पडुचित्ताणुवत्तणं हि सेवगस्स
 धम्मो, एवं भणिय उप्पइया ते तओ ठाणाओ। अहंपि कोइलकुलगवलपुलियसामलासु सयलदिसासु केसरिकि-

श्रीगुणचंद
महावीरच०
४ प्रस्तावः

॥ ८३ ॥

सोरनिहयनिहारियसारंगपमुक्कविरसारावभीसणेसु काणणेसु वणमहिसावगाहिजंतपल्लसमुच्छलंतपंकपडलदुग्गेसु म-
ग्गेसु तरुवरसाहासंहरिसवसनिवडंतदहणनिदज्झमाणेसु वेणुगहणेसु पज्जलंतपईवसिहाभीसणविप्फुरंतरत्तलोयणेसु
इओ तओ वियरंतेसु निसायरणेसु वराहतिक्खदाडुक्किणलेट्टुनियरुचावचासु वणत्थलीसु अमुणियमग्गुम्मग्गो
विमूढदिसाभागो असोढपयप्पयारो एकंमि गुरुतरुवरे समारुहिउं साहाए पसुत्तोमिह, दुट्ठमहिलव्व कट्ठेण समा-
गया निहा, पच्छिमरयणिसमए य जामकरिघडव्व पासमल्लीणा चित्ता पवोहमंगलतूरेहिं पिव रसियं पुराणसि-
यालेहिं मागहेहिं व पढियं सुयगणेहिं, अह उइयंमि सयलनिहुयणभुवणप्पईवंमि दिवायरंमि उट्ठिऊण कयपाभाइ-
यकिच्चो ओयरिऊण तरुवराओ एकदिसाए पयट्ठो गंतुं, खणंतरेण य तरुणतरुचक्कलाववद्धपरियरो कोदंडकंडवावड-
करो नियपणइणीए अणुगम्ममाणो गुंजाफलमालियामेत्तकयाभरणो भुयंगकंचुयनिव्वत्तियकेसकलावसंजमणो त-
क्खणविणिवाइयसिहंडिससिहमुहविरइयकन्नपूरो दिट्ठो एक्को पुलिंदो, सो य पुच्छिओ मए-भो महाणुभाग ! का एसा
अडवी ? को वा नियसिहरग्गभग्गरविरहतुरयमग्गो एस गिरिवरो ? का वा नयरगामिणी वत्तिणित्ति ?, पुलिंदेण भ-
णियं-अणामिया नाम एसा अडवी, सज्झाभिहाणो य एस गिरिवरो, एसावि वित्तिणी कंचणपुरनयरमणुसरएत्ति ।
तओ लग्गोऽहं तीए वत्तणीए तावसतवस्सीव कंदमूलफलेहिं पाणवित्ति करिंतो पत्तो कइवयवासरेहिं कंचणपुरं,
तत्थ य मुणिवरो इव निप्पडिक्खद्वो वीयरगो इव सव्वसंगरहिओ ठाऊण कइवय दिणाणि पेच्छंतो पुव्वट्ठाणाइं अव-

अमितते-
जसा वीर-
सेननयनं.

॥ ८३ ॥

लेएंतो गामागरे निरुर्वितो धम्मियजणकारावियाइं समुत्तुंगसुंदरागाराइं सुरमंदिराइं कप्पडिओ इव दाणसालासु पा-
णर्वित्तिं कुणमाणो अणवरयपयाणएहिं पत्तो सरज्जसीमासन्निवेसं, तत्थ य कइवयदिणाणि वीसमिय पुणरवि चलिओ
नियनयराभिमुहं । इंतेण य सुणिऊण नियलहुभाउणो विजयसेणस्स संपत्तरज्जस्स विभववित्थरं चित्तियं मए—नूणं
विजयसेणेणाहिद्धियंमि रज्जे न जुत्तं तत्थ मे गमणं । जेण—

पुव्वकयधम्मकम्माणुभावओ पाविऊण रज्जसिरिं । चिंतामणिव्व दाउं को वंछइ वल्लहस्सावि ? ॥ १ ॥

पिच्छामि तहाविय मित्तमंतिसामंतवयणविन्नासं । जं नट्टं नणु रज्जं तं दिट्ठं हरणकालेऽवि ॥ २ ॥

इह चित्तयंतो पत्तो कमेण सिरिभवणनयरं, अलक्खिज्जमाणो पुरजणेण पविट्ठो सहपंसुकीलियस्स सोमदत्ता-
भिहाणस्स वयंसस्स गिहे, सो य ममं दट्ठूण झडत्ति जायपच्चभिन्नाणो सहरिसं पाएसु निवडिय गाढं परुन्नो,
भणित्तामदत्तो—

तुह विरहे मम नरवर! वरिसं व दिणं न जाइ पज्जंतं । हिमहारचंदचंदणरसावि दूरं तर्वित्ति तणुं ॥ १ ॥

भवणं पेयवणं पिव पणइणिवग्गो य डाइणिगणोव्व । सयणावि भुयंगा इव न मणंपि मणा सुहावित्ति ॥ २ ॥

एत्तियदिणाइं लोएण धारिओ कहवि गुरुनिरोहेण । जंतो इण्हिं विदेसे जइ नाह! तुमं न इंतोऽसि ॥ ३ ॥

तो एयं वरभवणं एसो धणवित्थरो इमे तुरया । एसो किंकरवग्गो पडिवज्जसु तं महीनाह ! ॥ ४ ॥

श्रीगुणचंद
महावीरच०
४ प्रस्तावः

॥ ८४ ॥

एमाइं पणयसाराइं वयणाइं भासंतो भणिओ मए सोमदत्तो—पियवयंस ! किं सोयविहुरो हवसि ? किं वा निय-
भवणधणाइयं समप्पेसि ? किमेवं तुह पणयसारो पयडीभविस्सइ ? को वा अन्नो ममाओवि तुह पाणप्पिओ ? किं
वा तुह दंसणाओऽवि अन्नं ममेहागमणप्पओयणं ? ता धीरो भव , अच्छउ सबस्ससमप्पणं, तुह जीवियंपि ममायत्तं
चेव, तओ काराविओऽहं णहाणविलेवणभोयणपमुहं कायवं, खणंतरेण पुच्छिओ मए—पियवयंस ! साहेसु किमि-
याणिं कायवं ? सोमदत्तेण भणियं—देव ! किं निवेदेमि ? मं एकं पमोत्तुणं अत्रे सवेऽवि संतिसामंता दढपक्खवाया
विजयसेणे, नेच्छंति नाममवि तुह संतियं भणिउं, जइ सो कहवि आगमिस्सइ तहावि एयस्स चेव रज्जं, जओ एयस्स
मुद्धा मती अम्ह दढं वसवत्ती थेवंपि वयणं न विलंघेइत्ति, विजयसेणो पुण नियसरीरमेत्तेण तुम्ह विरहे वाढं परि-
तम्मइ, भणइ य—जइ एइ जेढ्ढभाया ता धुवं समप्पेमि रज्जधुरं, जहाजेढ्ढरज्जपालणमेव अम्ह कुलधम्मोत्ति, एवं ठिए
किंपि न जाणिज्जइ जुत्ताजुत्तं, ता एत्थेव अलक्खिज्जमाणो तुमं चिट्ठसु कइवयदिणाणि जाव उवलक्खेमि नरिंदाईण
चित्तं, मए भणियं—एवं हवउत्ति, तओ सोमदत्तेण सामेण य दंडेण य भेएण य उवप्पयाणेण य आढत्ता संतिसामं-
तादओ भेइउं, निट्ठुरवज्जगंठिंपिव न य केणवि भिज्जंति उवाएणं, नाओ य तेहिं समागमणवइयरो, निवारिया य
रायदुवारपाला जहा न सोमदत्तस्स रायभवणे पवेसो दायवोत्ति, विजयसेणस्सवि सिट्ठं जहा तुम्ह जेढ्ढभाया
पंचत्तं गओत्ति निसामिज्जइत्ति, तेणावि एवं निसामिय कओ महासोगो; पयट्ठियाइं मयकिचाइंति, एवंति मह

अटवीतः
सोमदत्तगृहे
गमनं.

॥ ८४ ॥

रज्जकज्जविसयं जं जमुवायं घडेइ सो निउणो । दइयो पडिकूलो इव तं तं विहडेइ निकरुणो ॥ १ ॥ अन्नया य गाढवि-
सायवसविसंडुलेण सुणियपरमत्थेण भणियं सोमदत्तेण-देव ! निम्मज्जाएहिं मंतिसामंताईहिं तुम्ह पंचत्तगमणवत्ता
निवत्तिया राइणो पुरो, ता जइ कहंपि रायवाडियाए निग्गयस्स विजयसेणस्स दंसणपहे ठाऊण नियदंसणं
ठावेसि ता जुत्तं होइत्ति, जओ तुम्ह दंसणं बाढमभिकंखइ एसो, पडिवन्नं च मए एयं तदणुरोहेण, अन्नया य
पवरकरेणुगाखंधगओ निग्गओ विहारजत्ताए विजयसेणो, पासायसिहरमारुहिऊण य ठिओ अहं से चक्खुगोयरे,
झडत्ति दिट्ठोऽहमणेण, सागयं २ चिरागयबंधवस्सत्ति हरिसुफुल्ललयणो य जाव सो वाहरिउं पवत्तो ताव तक्खणा
चेव मंतिसामंतपमुहेहिं रइया अंबरे अंतरवडा, कओ हलबोलो, नियत्तिओ विहारजत्ताओ राया । भणियं च-

असिवं तुह किंपि इमं जं देव ! पिसायदंसणं जायं । किं पंचत्तगयजणो दीसइ य कयावि पच्चक्खो ? ॥ १ ॥

ता लहु गच्छइ भवणं संतिं कारेइ देह भूयवलिं । पारंभइ होमविहिं सुमरइ मञ्जयं मंतं ॥ २ ॥

वियरसु सुवण्णदाणं माहणसमणाण तक्कुयजणाणं । एवं कहिए सिग्घं मिंठेणं चोइया करिणी ॥ ३ ॥

भवणंमि तओ गंतुं जं जह भणियं तहेव नीसेसं । अइमुद्धबुद्धिभावा करावियं विजयसेणेण ॥ ४ ॥

अहं पुण निरुच्छाहो निराणंदो ववगयधीरिमभावो अवयरिय तओ ठाणाओ सोमदत्तस्स अकहमाणो चेव
पच्छन्नदेसे ठाऊण चित्तिउमाढत्तो, कहं ?—

श्रीगुणचंद
महावीरच०
४ प्रस्तावः

॥ ८५ ॥

अणवरयकणयवियरणपरितोसियमाणसावि कह पावा । सामंता मत्ता इव पुरद्वियंपिडु मुणंति न मं ? ॥ १ ॥
कह वाऽवराहमणेण (सहणेण) भूरिसोगु(मइ) सपयंमि ठवियावि । न गणंति मंतिणो मं तणं व पम्मुक्कमज्जाया ? ॥ २ ॥
कह नयरमहत्तरया उवयरिया णेगसोऽवि कज्जेसु । माणंति न मं सप्पणयवयणमेत्तेण विहयासा ? ॥ ३ ॥
जयसेहरकुमरो सो विज्जाहररायसुकुलजाओऽवि । तह उवयरिओऽवि कहं उवेहए मं तदियरोच्च ? ॥ ४ ॥
होउ वा, किं एएण विगप्पिएण?, अत्तहियमियाणि कीरइ मुच्चइ इमं नयरं गम्मइ अन्नत्थ देसे ओलग्गिज्जइ
अन्नो गरुओ नरवइत्ति, अहवा सयलजयपयडपरक्कमस्स सिरिअवंतिसेणमहानराहिवस्स सुओ होऊण कइवय दिणाइं
रज्जरिद्धिमुद्धुरमणुभविय कहमियाणि अन्नस्स हेट्ठा ठाइस्सामित्ति सव्वहा न जुत्तं परिचित्तिउं, भेरवपडणेण अत्त-
परिच्चाओ चेव संपयं मे सव्वोवाहिविसुद्धोत्ति निच्छिऊण निग्गओ नयराओ लग्गो भेरवपडणाभिमुहं, वत्तिणीए
अखंडपयाणेहिं पवचंतो संपत्तो तरुणतरुसंडमंडियं उब्भडसिहंडितंडवाडंबरमणिज्जं हंससारसकर्पिजलकोकिलकु-
लकलकलरवमुहलं पुंनागनागजंबुजंबिरनिंबंबचंपयासोयसोहियपरिसरुहेसं भेरवपडणपच्चासन्नं एकमुवचणं, दिट्ठो
य तत्थ अणेगजणनमंसिज्जमाणचरणो सल्लक्खणनरसिरकवालमेत्तपरियरो मंतज्झाणपरायणो करकमलकलियजो-
गदंडो समत्थनाणविज्जाणपरमपगरिसपत्तो ससाहसपरितोसियवेयालो महाकालो नाम जोगायरिओ, पणमिओ य मए
सच्चायरेणं दिज्जासीसो य निविट्ठो संनिहियधरणिवट्ठे, अवलोइओऽहं तेण सिग्गिद्वाए दिट्ठीए, खणंतरे संभासिओ य-

घोरशिव-
निवेदः

॥ ८५ ॥

मह ! उद्विग्गचित्तो इव लक्ष्मीयसि, ता किं भट्टलच्छीविच्छद्भोत्ति उयाहु विदेसागओत्ति, अन्नं वा किंपि कारणं ?, मए भणियं—भयवं ! अम्हारिसा पुत्तरहिया पाणिणो पए पए उद्विग्गचित्ता चेव, कित्तियाइं कारणाइं साद्विज्जंति ?, तेण जंपियं—तहावि विसेसयरं सोउमिच्छामि, मए भणियं—भयवं ! किं एएण ज्ञाणविग्गकारण नियवइयरसाह-
णेण ?, महाकालेण भणियं—किं तुज्झ ज्ञाणचित्ताए ?, जहाइदं कुणसु, तओ मए विज्जाहरायलोयणं च जुज्झनिवडि-
यस्सररक्खणं च महाडविनिवाडणं च नियनगरागमणं च मंतिसामंतपमुहजणावमाणणं च रज्जावहारदुक्खं च
उवयरियविज्जाहरोवेक्खणं च नयरनिग्गमणं च भेरवपडणं पडुच्च समागमणं च सिट्ठमेयस्स, अह महाकालेण
भणियं—अहो विरुद्धकारित्तणं हयविहिणो जमेरिसे असमसाहसघणे जणे विणिम्मिय एरिसतिक्खदुक्खभायणं
करेइ, अहवा—

साहसघणाण हिययं दुक्खं गरुयंपि सहइ निवडंतं । इयराण दुहलवेणवि विहडइ जरसिप्पिणिपुडं व ॥ १ ॥
जह निवडइ गुरुदुक्खं तहेव सोक्खंपि संभवइ तेसिं । इयराण तुल्लसुहदुक्खसंभवो निवकालंपि ॥ २ ॥
कस्स व निरंतरायं सोक्खं ? कस्सेव नावया इति ? । को दूसिओ खलेहिं नो ? कस्स व संठिया लच्छी ? ॥ ३ ॥
इय नाउं चय सोयं पुणोऽवि तुह वंछियाइं होहिंति । सूरुओवि रयणितमनियरविगमओ पावए उदयं ॥ ४ ॥
जं पुण तुमए भणियं भेरवपडणं करेमि मरणदं । तं बुहजणपडिसिद्धं सत्तियधम्मे विरुद्धं च ॥ ५ ॥

श्रीगुणचंद
महावीरच०
४ प्रस्तावः

॥ ८६ ॥

जेण-वंभणसमणच्चिय मरणकज्जमभुज्जमंति नो धीरा । विहिविहडियंपि कज्जं घडंति ते बुद्धिविहवेणं ॥ ६ ॥
तहा-चत्तविसायपिसायं अणलसमविमुक्कविकमेकरसं । अणुसरइ सिरी दूरं गयावि पुरिसं हरिसियव ॥ ७ ॥
तओ मए भणियं-भयवं ! विमूढचित्तलक्खो ण्हि संपयं, न जाणामि जुत्ताजुत्तं न मुणामि उवायं न समीहेमि
खत्तधम्मं न वियारेमि जणनिंदं न लक्खेमि सुहदुक्खं, सब्बहा कुलालदढदंडचालियचक्काधिरूढं व मम मणो न
मणागंपि कत्थवि अवत्थाणं पावइ, तो भयवं ! तुमं चेव साहेहि, किं कायवं ? को वा उवाओ समीहियत्थसि-
द्धीए?, महाकालेण भणियं-वच्छ ! पवज्जसु मम पवज्जं, आराहेसु चरणकमलं, अन्भस्सेसु जोगमग्गं, होहिंति
गुरुभत्तीए मणोरहसिद्धीओ, तओ भयसंभंतो इव सरणागयवच्छलं दालिहाभिभूओ इव कप्पपायवं महारोगपी-
डिओ इव परमवेज्जं पहीणचक्खुबलो इव पद्दहदेसगं सद्वायेरेण तमाराहिउं पवत्तो, दूरमागरिसियं च विणएण मए
तस्स चित्तं, निउत्तोऽहमेक्को तेण नियरहस्सठाणेसु सिक्खाविओ निस्सेसाइं आगिट्ठिपमुहाइं कोऊहलाइं, अन्नया
य पसत्थेसु तिहिनक्खत्तमुदुत्तेसु परमपमोयमुद्धंतेण तेण एगंते उवइट्ठो मम तइलोकविजओ मंतो, कहिओ साहण-
विही जहा-अट्ठोत्तरसयपहाणखत्तिएहिं मसाणहुयासणो तप्पणिज्जो, कायवं दिसिदेवयानलिवियरणं, पवहियवं
अणवरयमंतसुमरणं, तओ एस सिज्झिहिई, काही य एगच्छत्तधरणियलरज्जदाणं, पडिवन्नो य मए विणयपणएण,
समाढत्तो य साहिउं, गओ कलिंगपमुहेसु देसेसु, आरद्धो य जहालाभं खत्तियनरुत्तमेहिं होमो जाव एत्तियं कालंति ।

महाकाल-
सेवा त्रैलो-
क्यविजयः

॥ ८६ ॥

ता नरसेहर ! नरसिंघ जं तए पुच्छियं पुरा आसि । किं अप्पाणं निंदसि इणमो नणु कारणं तत्थ ॥ १ ॥
 भयवसविसंठुलंगा सारंगा इव विचित्तकूडेहिं । जं सत्ता विद्विया तमियणिं दहइ मह हिययं ॥ २ ॥
 दुज्झाणकलुसबुद्धित्तेण पुवं न याणियं एयं । तुह दंसणेण इणिं विवेयरयणं समुलसियं ॥ ३ ॥
 नरसिंहेणं भणियं सच्चं पावं कयं तए भूरि । जं कीडियाणवि वहे पावं गुरु किमु नरिंदाणं ? ॥ ४ ॥
 तेसि विणासे जम्हा धम्मभंसो य सीमविगमो य । अवरोप्परं च जुज्झं विलयाजणसीलविलओ य ॥ ५ ॥
 ता ठाणे तुह दुच्चरियगरिहणं धम्मगोयरा बुद्धी । एवं ठिएऽवि जलणप्पवेसणं तुज्झ नो जुत्तं ॥ ६ ॥
 तित्थेसु वच्च कुरु देवपूयणं मुंच निंदियं भावं । पायच्छित्तं पडिवज्ज सुगुरुसयासे पयत्तेण ॥ ७ ॥
 निंदसु पइक्खणं दुक्कयाइं निसुणेसु धम्मसत्थाइं । उत्तमसंसर्गिं कुणसु चयसु तिवं कसायं च ॥ ८ ॥
 ईसाविसायमुच्छिद भिंद विसमविसयतरुनियरं । नियजीयनिविसेसं नीसेसं पेच्छ पाणिगणं ॥ ९ ॥
 पसमरसं पिबसु सया दूरं परिहरसु खुद्वचरियाइं । जुत्ताजुत्त वियारसु सब्बकज्जेसु जत्तेणं ॥ १० ॥
 खणपरिणइधम्मत्तं चित्तेसु भवंमि सब्बवत्थूणं । नियमुकयदुकयसचिवत्तणं च लक्खेसु परजम्मे ॥ ११ ॥
 इय जयमाणस्स सया सुद्धी तुज्झं भविस्सइ अवस्सं । जलणपवेसं सलभा कुणंति कुसला उ न कयावि ॥ १२ ॥
 एवं संठविऊण मरणदुरज्झवसायाओ घोरसिवं जाव विरओ नरिंदो ताव पइयपडहमुरवपमुदत्तरनिनायवहि-

भ्रीगुणचंद
महावीरच०
४ प्रस्तावः

॥ ८७ ॥

रियदियंतरा विचित्तमणिभूसणकिरणकञ्चुरियमसाणंगणा गयणाओ ओयरिया विज्जाहरा, परमपमोयमुबहंता निव-
डिया घोरसिवचरणेसु, भणिउमादत्ता य-देव ! अम्हे गयणवल्लहपुराहिबविजयरायविज्जाहरिंदसुएण सिरिजयसे-
हररायकुमारेण पेसिया तुम्ह आणयणनिमित्तं, ता कुणह पसायं, आरुहह इमं समुदुयविजयवेजयंतीसहस्साभि-
रामं उज्जंतकसिणागरुकप्पूरपूरसुरहिधूवधूमंधयारियदिसाभोगं मणिकणगरयणरइयविचित्तविच्छित्तिभित्तिभागं कुसु-
मावयंसाभिहाणं वरविमाणं, घोरसिवेण भणियं-भो विज्जाहरा ! मुयह मम विसए षडिबंधं, अन्नोऽहमियाणिं त्रिगय-
भोगपिवासो, विजणविहारेसु रण्णेसु जाया निवासबुद्धी बद्धा मिगकुलेसु सयणसंबंधसद्धा पलीणो मायामोहो
जलणजालाकलावकवलिवमिव पेच्छामि जीवलोयं, ता जहागयं गच्छह तुम्हे, जहादिट्ठं च से निवेएज्जहत्ति, विज्जा-
हरेहिं भणियं-मा भणह एयं, जओ जहिणाओ तुम्ह पासाओ गओ जयसेहरकुमारो तहिणादारब्भ जाओ रहने-
उरचक्कवालपुरनाहेण सिरिसमरसिंघखेयराहिवइणा सह महासमरसंरंभो निवडिया अणेगसुहडा, कहमवि महाक-
ट्टेण निप्पिट्ठो सो अमरतेयाभिहाणो दुट्ठमित्तो, चडिया इयाणिं परोप्परं संधी, कयाइं अन्नोऽन्नघरेसु भोयणवत्थ-
दाणाइं, अओ एत्तियकालं नियकज्जकोडियावडत्तणेण संपयमेव नाओ तुम्ह अडविनिवाडणपामोक्खो बइयरो,
कुमारेण तओ अच्चंतजायतिवसोगसंदब्भेण विसज्जिया अम्हे सव्वासु दिसासु तुम्हावलोयणत्थं, भणिया य-अरे
सिंघं जत्थ पेच्छह तं महाणुभावं तत्तो सव्वहा आणेज्जह, नन्नहा भोयणमहं करिस्सामि, तओ सव्वत्थ निउणं निउणं

जयशेखर-
नरागमनं.

॥ ८७ ॥

निरुवंता पत्ता एत्तियं भूमिभागं, एत्थ आगएहि य निसामिओ तुम्ह सद्दो, को पुण भीसणे मसाणे एत्तियवेलं
 होहिति कोऊहलेण सुणंतेहिं कुमारपचाणयणकालागएहिं पुरा तुम्ह निसुयसद्दाणुमाणेण पच्चभिन्नायत्ति, ता कुणह
 पसायं जयसेहरकुमारजीवियदाणेण, एत्थंतरे विण्णायपरमत्थेण भणियं पत्थिवेण-भो महासत्त ! परिचय फरुस-
 भावं, पणयभंगभीरूणि भवंति सप्पुरिसहिययाणि ता अंगीकरेसु एएसि पत्थणं, घोरसिवेण भणियं-महाराय !
 बाढं विरत्तं मम रज्जादीहिंतो चित्तं, गाढपावनिबंधणं खु एयं, रण्णा भणियं-मा मेवं जंषेसु, जओ-

सन्नायं दिसओ विसिट्ठमुणिणो पालितयस्साणिसं, सासितस्स विसिट्ठनीइ मणुए दाणाइं दितस्स य ।
 धम्मो होइ निवस्स वस्समइणो रज्जेऽवि संचिट्ठओ, नो साहुस्स स सत्थवज्जियविहीजुत्तस्स गुत्तस्सवि ॥ १ ॥
 घोरसिवेण भणियं-महाराय ! एवमेवं, राइणा भणियं-जइ एवं ता गच्छह तुम्हे, पडिच्छह [वि]जयसेहरकुमार-
 पूयापडिवत्ति, घोरसिवेण भणियं-महाराओ निवेयइ तं कीरइत्ति, तओ पहरिसिया विज्जाहरा, सायरं पणमिउं
 तेहिं राया विन्नत्तो-अहो महायस ! परमत्थेण तुम्हेहिं दिन्नं अम्ह पढुणो जीवियं, अह पमुक्ककवालपमुहकुर्लिगो-
 वगरणो विओगवेयणावसविसप्पमाणनयणंसुधाराधोववयणो घोरसिवो माढमालिगिय नरवइं सगग्गयगिरं
 भणिउमाढत्तो-

कुम्भमतिमिरुम्भामियलोयणपसरेण तुज्झ अवरद्धं । जं किंपि पावमइणा तमियाणिं खमसु मम सवं ॥ १ ॥

श्रीगुणचंद
महावीरच०
४ प्रस्तावः

॥ ८८ ॥

सीसो इव दासो इव रिणिओ इव किंकरो इव तुहाहं । ता साहसु किं करणीयमुत्तरं राय नरसिंह ! ॥ २ ॥
रन्ना भणियं जइया नियरज्जसिरिं समग्गमणुहवसि । मम संतोसनिमित्तं तइया साहिज्जसु सवत्तं ॥ ३ ॥
एवं काहंति पयंपिऊण विजाहरोहिं परियरिओ । दिवविमाणारूढो सो झत्ति गओ जहाभिमयं ॥ ४ ॥
रायावि पत्ततिहुयणरायसिरिवित्थरं पिव सयलमुकयसंचयपत्तोवचयंपिव समत्थपसत्थतित्थदंसणपूयं पिव अप्पाणं
मन्नंतो पाणिपइद्वियखग्गरयणो गओ नियभवणं, निसण्णो सेज्जाए सुत्तो खणंतं समागआ निहा, निसावसाणे य
रणज्झणंतमणिनेउररवाणुमग्गलग्गचक्कंगखलियचंकमणा अणायरसट्ठाणणिउत्तलट्ठकंचीकलावप्पमुहाभरणा सहरिस-
पधावियखुज्जिवामणिपुलिंदिपमोक्खचेडीयाचक्कवालपरिवुडा पविट्ठा चंपयमाला देवी, दिट्ठो राया निहावसनिस्स-
हसेज्जाविमुक्कसवंगोवंगो, भणियं चऽणाए-परिणीयपुत्तिओ इव हयसत्तू इव विट्ठत्तदविणोव परिपढियसवसत्थोव
निब्भयं सुयइ नरनाहो, अह खणंतरे पवज्जियाइं पाभाइयमंगलतूराइं पयडीहूयाइं दिसिमुहाइं, पढियं मागहेण-
लंघेउं विसमंपि दोसजलहिं गंजित्तु दोसायरं, गोत्तं पायडिउं सवीरियवसा चंकंमिउं भीसणे ।
आसाअंगसमुब्भवेण महसा सारेण संपूरिउं, सूरु देव ! तुमं पिवोदयसिरिं पावेइ सोहावहं ॥ १ ॥
एवं च निसामित्ता पबुद्धो राया, चित्तिउमाढत्तो य-अहो सारस्सयंपिव वयणं जहावित्तवत्थुगम्भं कहं पढियं
मागहेण ?, एवमेव पुणो पुणो परिभावेमाणो उट्ठिओ सयणाओ, अवलोइया य हरिसवसवियसंतनयणसहस्सपत्ता

चम्पकमा-
लाखमः।

॥ ८८ ॥

देवी चंपयमाला, पुट्टा य सा आगमणपओयणं, भणियं च तीए-देव ! अज्ज पच्छिमद्वजामे सेसरयणीए सुहपसु-
 त्ताए सुमिणयंमि सहसच्चिय वयणंमि पविसमाणो मए अनणुप्पमाणो मणिरयणमालालंकिओ पवणसमुदुयंचला-
 भिरामो फलिहमयडिंडिरपंडुरडंडोवसोहिओ महज्झओ दिट्ठो, एवंविहं च अदिट्ठपुवं सुमिणं पासिऊण पडिबुद्धा
 समाणी समागया तुम्ह पासंसि सुमिणसुभासुभफलजाणणत्थं, ता साहिउमरिहइ देवो एयस्स फलंति, रत्ता
 भणियं-देवि ! विसिट्ठो तए सुमिणो दिट्ठो, ता निच्छियं होही तुह चउसमुद्दमेहलावलयमहिमहिलापइस्स कुल-
 केउस्स पुत्तस्स लाभो, जं तुम्हे वयह अवितहमेयंति पडिवज्जिय निवद्धा देवीए उत्तरीयंमि निट्ठुरा सउणगंठी,
 खणंतंरं च मिहोकहाहिं विगमिय गया देवी निययभवणं, रायावि कयपाभाइयकायव्वो निसण्णो सभामंडवंमि
 अह पढममेव गाढकोउहलाउलिज्जमाणमाणसा समागया बुद्धिसागरपमुद्दा मंतिणो, भूमितलविलुलियमउलिमंडला
 निवडिया चरणेसु, दिन्नासणा निविट्ठा सट्ठाणेसु, विन्नविउमाढत्ता य-देव ! अज्ज चउजामावि सहस्सजामव कहमवि
 पभाया अम्ह रयणी घोरसिवमुणिवइयरोवलंभसमूगुत्तणेणं, जइवि किंपि पसंतवयणावलोयणाइलिं गोवगया कज्जसिद्धी
 वट्ठइ तहावि विसेसेण तुम्हेहिं साहिज्जमारिणं सोउमिच्छामो, ता पसियउ देवो रयणिवइयरनिवेयणेणंति, ताहे तेसिं
 वयणाणुरोहओ ईसिं विहसियं काउं जहा घोरसिवेण समं मसाणदेसंमि संपत्तो जह विन्नाओ छोभमायरमाणो
 जहा य सो भणिओ गिण्हसु सत्थं जह तेण कच्चिया वाहिया कंठे जह पडिरुद्धो बाहू सकत्तिओ जह महीयले

श्रीगुणचंद
महावीरच०
४ प्रस्तावः

॥ ८९ ॥

निहओ जह उट्ठिओ पुणोऽविहु निष्कंदो जह हओ पच्छा सुरसुंदरीहिं खित्तो जह कुसुमभरो समागया देवी जह
दिन्नो तीए वरो जह सा अहंसणं पत्ता जहा घोरसिवो निधेयमुपगओ पट्ठिओ य मरणत्थं जह पुब्वइयरो तेण
संठिओ (निवेइओ) जह व संठविओ जह परिचियविज्जाहरविमाणमारुहिय सो गओ नमिउं संखेवेणं तह नरवरेण
सिट्ठं समत्थंपि, सोखेमं हरिसिओ मंतिवग्गो, पयट्ठिओ य नयरीए महंतूसवोत्ति ।

अह अन्नया कयाई चंपयमालाएँ रायमहिलाए । दुहिसत्तरक्खणंमी दीणाणाहाण दाणे य ॥ १ ॥

देवगुरुपूयणंमी पणईणं चित्तियत्थदाणे व । उप्पण्णो दोहलओ विसिट्ठगम्भाणुभावेण ॥ २ ॥ जुम्मं ।

चित्तेइ य सा एवं ताओ धन्नाओ अम्मयाउ इहं । इय पुन्नदोहलाओ जाओ गम्भं वहंति सुहं ॥ ३ ॥

एवं च अपुज्जंतदोहलयसंकप्पवसेण कसिणपक्खमयलंछणमुत्तिव्व कसित्तणमणुभविउं पवत्ता देवी । अन्नया य
पुट्ठा नरवइणा-देवि ! किमेवं पइदिणं कसित्तणं पावेसि?, साहेसु एयकारणं, गाढनिबंघे सिट्ठं तीए नियमणवंछियं,
ताहे परं पमोयमुव्वहंतेण विसेसयरं पुरियं नरिंदेण, माणियडोहला व धरणिव्व निहाणसंचयं दिसव्व नलिणीनाहं
सुहंसुहेणं गम्भं वहमाणी देवी कालं गमेइ, अण्णया य पडिपुण्णेसु नवसु मासेसु अद्धट्ठमराइंदिएसु सुभेसु तिहि-
करणनक्खत्तमुहुत्तेसु पुरंदरदिसिव्व दिजयरं कोमलपाडलकरपडिपुण्णसव्वंगोवंगसुंदरं पुत्तं पसूया । तओ सहरिसं
गयाओ नरिंदभवणंमि चेडीयाओ, दिट्ठो राया, भणिओ य-देव ! वद्धाविज्जसि जएण विजएण य तुमं, जओ

श्मशानवृ-
चोदितिः.

॥ ८९ ॥

इयाणि चैव पसूया देवी चंपयमाला, जाओ य समुज्जोतियसयलदिसामंडलो तेयरासिध पुत्तोत्ति, इमं च सोच्चा नरि-
देण दिन्नं तासिं भूरि पारिओसियं, कओ दासित्तविगमो, आहूया पद्दाणपुरिसा, समादिट्ठा य जहा पयट्ठेह नीसेस-
नयरीए तियचउक्कचच्चेसु खंदमुगुंदसूरिंदगयमुहमंदिरेसु य परममहसवं, वियरह अणिवारियपसरं कणयदाणं सुयह
चारगाहितो जणंति वुत्ते जं देवो आणवेइत्ति भणिऊण पुरीए पारद्धं तेहिं वद्धावणयं ।

कहं चिय?,—पंचप्पयारवन्नयविरइयसुपसत्थसत्थियसमूहं । विक्खित्तक्खयदोवापवालसोहंतमहिवीढं ॥ १ ॥

रहसपणच्चिरतरुणिगणवच्छत्थलतुट्ठहारसिरिनियरं । अन्नोन्नावहरियपुण्णपत्तवट्ठंतहलबोलं ॥ २ ॥

पडिभवणदारविरइयवंदणमालासहस्सरमणिज्जं । कमलपिहाणामलपुन्नकलसरेहंतगेहमुहं ॥ ३ ॥

वज्जंताउज्जसमुच्छलंतघणघोरघोसभरियदिसं । चिन्ताइरित्तिदिज्जंतदविणसंतोसियत्थिगणं ॥ ४ ॥

पमुइयनीसेसजणं कुलयेरीकीरमाणमंगलं । इय नरवइकयतोसं वद्धावणयं कयं तत्थ ॥ ५ ॥

एत्थंतरे मंतिसामंतसेणावइसत्थवाहपमुहा पद्दाणलोया गहियविविहतुरयरयणसंदणपमोक्खविसिद्धवत्थुवित्थरा
गंचूण नरवइं वद्धाविसु ?

इओ य सो घोरसिवो विज्जाहरेहिं नेऊण समप्पिओ जयसेहरस्स कुमारस्स, तेणावि पिउणोव गुरुणोव तदागमणे
कओ परममहसवो, पुट्ठो य एसो पढमदंसणाओ आरब्भ सववुत्तंतं, धरिओ पद्दाणविलेयणभोयणदिवंसुयदाणपुरस्सरं

श्रीगुणचंद
महावीरच०
४ प्रस्तावः

॥ ९० ॥

कइयवि वासराइं, अन्नदियहे चाउरंगसेणासण्णाहेण जयसेहरकुमारेण गंतूण सिरिभवनंमि नगरे विजयसेणरण्णो दंसिऊण जहावित्तं संसिऊण य दुइंतमंतिसामंतुस्सिखलदलणपुवं सो घोरसिवो सहत्थेण निवेसिओ रायपए, विजय-सेणोऽवि ठविओ जुवरायत्ते, एवं कयकायव्वो जहागयं पडिगओ जयसेहरो, घोरसिवोऽवि पुवंपिव भुंजिउं पवत्तो नियरजंति । अन्नया तेण सुमरिऊण नरसिंहनरवइणो रज्जसंपत्तिवुत्तंतनिवेयणं पुव्वकालपडिवन्नं तक्खणंचिय विसज्जिया पहाणपुरिसा विसिट्ठपाहुडसमेया नरसिंहनरवइणो समीवे नियवइयरनिवेयणत्थं, पत्ता य ते अणवरयपयाणएहिं जयंतीनयरिपरिसरुहेसं, निसुणिया य रत्ता, पवेसिया य महाविभूर्इए, समप्पियाइं रत्तो तेहिं पाहुडाइं, साहिओ घोरसिवनरवइसमाइद्वुत्तंतो, हरिसिओ राया, सम्माणिया उचियपडिवत्तीए, पेसिया य सट्ठाणंमि ।

अन्नदिवसे य समारद्धो कुमारस्स नामकरणमहूसवो, समाहूओ कुलथेरीजणो, तओ वज्जंतसे चउव्विहाउज्जेसु नचंतसे तरुणीसत्थेसु मंगलमुहलेसु वारविलयाजणेसु पढंतसे मागहेसु पइट्ठियं कुमारस्स पुव्वपुरिसक्कमागयं नरवि-क्कमोत्ति नामं, कालक्कमेण य विइकंतवालभावो नीसेसविज्जापारयस्स लेहायरियस्स चेडयचक्कवालपरिवुडो महा-विभूर्इए पढणत्थमुवणीओ, अकालक्खेवेण य बुद्धिपगरिसेण जाओ एसो कलासु कुसलो, कहां चिय?—

पत्तडो धणुवेए कुसलो नीसेसमलविज्जासु । कयकिच्चो करणेसुं विचित्तचित्तेसु निउणमई ॥ १ ॥

परभावलक्खणम्मी वियक्खणो जाणओ समयसत्थे । पत्तच्छेये छेओ निम्माओ सदमग्गेसु ॥ २ ॥

धोरशिवे
राज्यं हरि
विक्रमजन्म.

॥ ९० ॥

निउणो मंतवियारे तंतपओगेसु कुसलबुद्धी य । पुरिसकरितुरयनारीगिहलक्खणबोहनिउणो य ॥ ३ ॥

आउज्जनट्टजूयप्पओगबहुभेयगेयचउरो य । किं बहुणा?, सबत्थवि गुरुव सो पगरिसं पत्तो ॥ ४ ॥

एवं च गहियकलाकलावं कुमरं घेत्तूण गओ कलायरिओ नरवइसमीवं, अब्भुट्ठिओ परमायरेणं नरवइणा, दवावियास-
णो उवविट्ठो पुट्ठो य-किमागमणकारणंति, कलायरिएण भणियं-देव ! एस तुम्ह कुमारो गाहिओ नीसेसकलाओ सुरगु-
रुव पत्तो परमपगरिसं, न एत्तो उत्तरेण गाहियवमत्थि, ता अणुजाणेउ देवो अम्हे सट्ठाणगमणायत्ति, अह अकालक्खे-
वसिक्खियकुमारकलाकोसलसवणपवहुमाणहरिसभरनिब्भरेण नरवइणा आचंदकालियसासणनिबद्धदसग्गहारदा-
णेण पवरचामीयरयणरासिवियरणेण विसिट्ठवत्थफुल्लतंतोलसहत्थसमप्पणेण य सम्माणिऊण परमायरेणं पेसिओ
कलायरिओ सट्ठाणं, कुमारोऽवि निउत्तो गयतुरयवाहीयालीसु समकरणत्थं, सो य दढासणबंधधीरयाए महाबलेण
य जाममेत्तेणवि समसुवणेइ सत्त मत्तसिंधुरे पवणजवणवेगे परमजब्बे चउइस तुरंगमे अट्ठ महामल्ले य, एवं च राया
असमबाहुबलेण य मइपगरिसेण य कलाकोसलेण य नयपालणेण य विणयपवत्तणेण य समओचियजाणणेण य
असरिससाहसत्तणेण य मयणाइरेयरुवविभवेण य जणवच्छलत्तणेण य बाढमक्खित्तचित्तो कुमारमेकमेव पढावेइ
मंगलपाठेसु लेहेइ चित्तभित्तिसु निसामेइ कित्तीसु गायावेइ गीएसु अभिणच्चावेइ नट्टेसु, अविय-

रुहेवि दुट्ठसीलेऽवि रूवरहिएऽवि गुणविहीणेऽवि । लोओ पुत्ते पणयं किंपि अपुवं पयासेइ ॥ १ ॥

श्रीगुणचंद
महावीरच०
४ प्रस्तावः

॥ ९१ ॥

किं पुण चिरकालसमुभवंमि नीसेसगुणमणिनिहिंमि । सकुलंभुद्धरणखमे न होज्ज नेहो नरवइस्स? ॥ २ ॥
एगया य अत्थाणमंडवनिसन्नंमि नरवइंमि पायपीढासीणे कुमारे नियनियट्ठाणनिविट्ठेसु मंतिसामंतेसु समारद्धंमि
गायणजणे मणोहारिसरेण गेए पणचिरंमि चित्तपयक्खेवनट्टविहिवियक्खणे वारविलासिणीजणे पच्चासन्नमागंतूण
विन्नवियं पडिहारेण-देव ! हरिसपुरनयराहिवइस्स देवसेणभूवइस्स दूओ दुवारे देवदरिसणं समीहेइ, राइणा
भणियं-भइ ! सिग्घं पवेसेहि, जं देवो आणवेइत्ति भणिऊण पवेसिओ अणेण, कया से उचियपडिवत्ती, पुट्ठो य
आगमणप्पओयणं, दूएण जंपियं-देव ! हरिसपुरपहुणा देवसेणनरिंदेण रूवजोवणगुणोवहसियनागकन्नगाए निय-
सुयाए सीलवइनामाए वरनिरूवणत्थं पेसिओऽम्हि तुम्ह पासे, रण्णा जंपियं-भइ ! पेच्छसु पायपीढासीणं कुमारं,
परिभावेसु य किमणुरूवो वरो न वत्ति, दूएण भणियं-देव ! विन्नवणीयं अत्थि किंची, रत्ता भणियं-विन्नवेसु, दूएण
जंपियं-जइ एवं ता निसामेसु, अत्थि अम्ह नराहिवस्स देवसेणस्स समग्गवीरवग्गपहाणो कालमेहो नाम
महामल्लो, तस्स य किं वन्निज्जइ बलपगरिसंमि?, तथाहि-

दढकढिणकायवणमहिसजूहनाहेण सह सरोसेणं । सीसेण संपलग्गइ जुज्जेउं सो वलमएणं ॥ १ ॥

सुंडादंडे धेत्तूण पाणिणा मत्तदंतिनाहंपि । तद्धिणपसूयसुरहीसुयं व कहेइ लीलाए ॥ २ ॥

भारसयसंकलंपि हु तोडइ हेलाए जुण्णरज्जुं व । नियमुट्ठिपहारेण य सिलंपि सो जज्जरं कुणइ ॥ ३ ॥

देवसेनद-
तविज्ञप्तिः

॥ ९१ ॥

मंसस्स विरुद्धं किर लोहं एयंपि तत्थ विवरीयं । जं नाराया खित्तावि तस्स वाहिंपि न छिवंति ॥ ४ ॥

इय सो नियगाढवलावलेवओ तिहुयणं जरतणं व । मन्नंतो भमइ पुरे निरकुसो मत्तहत्थिव्व ॥ ५ ॥

अन्नया य तस्स पसिद्धिमसहमाणा समागया देसंतराओ मल्ला, दिट्ठो तेहिं राया, साहियं आगमणपओयणं, समाहूओ य रण्णा कालमेहमल्लो, निवेइओ से तव्वइयरो, अब्भुवगयं तेण तेहिं समं जुज्झं, सज्जीहूया दोवि पक्खा, कओ अक्खाडओ, विरइया उभयपासेसु मंचा, निविट्ठो अवलोयणकोऊहलेण नीसेसअंतेउरसमेओ नरवई पुरपहाणपुरिसवग्गो य, समाढत्तं च भुयाहि य अड्डपायइयाहिं च बंधेहि य विसमकरणपओगोहिं मल्लेहिं सह तेण जुज्झिउं, खणंतरेण य दढमुट्ठिप्पहारेहिं निहया कालमेहेण देसंतरागया मल्ला, कओ लोणेण जयजयसहो, दिन्नं से नरिंदेण विजयपत्तं, सम्माणिओ विचित्तवत्थाभरणेहिं, गओ नियनियट्ठानेसु नयरजणो, रायावि अंतेउरपरियरिओ संपत्तो नियमंदिरं, बीयदिवसे य सव्वालंकारविभूसिया काऊण देवीए पउमावईए पेसिया सीलवई कण्णगा पिउणो पायवडणत्थं, चेडीचक्कवालपरिवुडा य सा पत्ता नरिंदसगासे, निवडिया चरणेसु, निवेसिया रण्णा उच्छंगे, पुच्छिया य-पुत्ति ! केण कारणेण आगयाऽसि ?, तीए भणियं-ताय ! तुम्ह पायपडणनिमित्तं अम्मगाय पेसियम्हि, राइणा चित्तियं-अहो वरजोगत्ति कलिऊणं नूणं देवीए पेसिया, ता किमियाणि कायव्वं ?-

एकं चिय मह तणया परूढपणयाएँ अग्गमहिसीए । एसा वरस्स जोग्गा को पुण एयाएँ होज्ज वरो ? ॥ १ ॥

श्रीगुणचंद
महावीरच०
४ प्रस्तावः
॥ ९२ ॥

एयाए चित्तवित्तिं अवियाणिय जइ वरेज्ज नियपुत्तो । जो वा सो वा आजम्म दुक्खिया होज्ज ता एसा ॥ २ ॥
इति परिभाविऊण पुच्छिया सा नरवइणा-पुत्ति ! को तुज्झ वरो दिज्जइ ? किं सुरुवो उयाहु समरंगणसवडंसुह-
सुहडपडिक्खलणपयंडपरक्कमो किं वा समरभीरुओत्ति, तओ ईसिं विहसिऊण भणियं तीए-ताओ जाणइ, राइणा
भणियं-पुत्ति ! अवरोहकयकज्जाइं न सुहावहाइं होंति ता सम्ममणुचित्तिय भणसु, तीए भणियं-ताय ! जइ एवं
ता जो एयं कालमेहमल्लं नियभुयवलेण महियपरक्कमं करेज्जा सो मम वरो होज्जत्ति, राइणा चित्तियं-अहो बलाणु-
रागिणी मम तणया, को पुण समत्थो एयस्स वइयरस्स ?, भणिया य सा-पुत्ति ! मा कुणसु एवं, अतुलमल्लो खु
एसो, ता अन्नं वरं पत्थेसु, तीए भणियं-ताय ! जइ परं हुयासणो अन्नोत्ति, इय तीए निच्छयसुवलम्भ रत्ता पेसिया
सव्वनरवईणं दूया, निवेयाविओ एस वुत्तंतो, एयं च अणभुवगच्छमाणा नरवइकुमारा एवं पयंपत्ति-

को बोहेज्ज कयंतं ? को वा हालाहलं विसं भक्खे ? । को कालमेहमल्लेण जुज्झिउं सह पवज्जेज्जा ? ॥ १ ॥

तेण न कज्जं रज्जेण किंपि न कज्जं च तीए भज्जाए । जा लब्भइ खित्तसंसयजीवियवेहिं कट्टेण ॥ २ ॥

एवं च निब्भग्गजणमणोरहेहिं असिद्धकज्जेहिं चेव पडिनियत्तिऊण दूएहिं रण्णो कहिओ मल्लजुज्झाणभुवग-
मग्गभो नीसेसनरेसरकुमारवुत्तंतो, तं च सोऊण गाढसोगाउलो जाओ देवसेणनरवई, एत्थंतरे विन्नत्तो मंतिसामं-
तेहिं-देव ! किमेवं उच्छन्नूच्छाहा होह, अज्जवि देवेण अनिरुविओ चिठ्ठइ कुरुदेसाहिवनरवइसुओ नरविक्रमकुमारो,

शीलमत्याः
प्रतिज्ञा.

॥ ९२ ॥

राइणा भणियं-सोऽवि एवं चेव परंमुहो हविस्सइ, मंतिसामंतेहिं वुत्तं-देव ! मा एवं जंपह, जओ अपोरिसे(परिमे)ओ तस्स बलपगरिसो असंभावणिज्जो निजुद्धपरिस्समो अणाइक्खणिज्जा मल्लविज्जाए कोसल्लया, किं बहुणा ?, नरसिंहनरवइ-साहसतोसियाए भगवईए जो दिण्णो तस्स किं वन्नियवं ?, सरीरमेत्तेण चेव सो नरूवो सेसगुणेहिं निच्छियं देवोत्ति, एयं च समायणिऊण संजायहरिसेण देवेण पेसिओऽहं तुम्ह समीवे, ता देव ! एयं तं विण्णवणिज्जंति, राइणा भणियं-भइ ! वररयणपुत्रकेसरिगुहव सेसाह्मिमतथमणिच समगं चिय भयहरिसे जणेइ विण्णत्तिया तुज्झ, दूण्ण कहियं-देव ! एवमेयं, तओ राइणा अद्धच्छीए पेच्छियं कुमारवयणं, कुमारोऽवि तक्खणं चिय उट्ठिओ निवडिओ रण्णो चरणेसु, भणिउमाढत्तो य-ताय ! समाइसह किं कीरउत्ति ?, राइणा भणियं-कुमार ! निसुणियं तए दूयवयणं ?, केरिसो वा तुह भुयदंडपरक्कमो ?, कुमारेण भणियं-ताओ जाणइ, तओ राइणा जोग्गयमुवलब्भ अब्भुवगयं मल्ल-जुज्झं, सम्माणिऊण सट्ठाणं पेसिओ दूओ, गओ जहागयं, निवेइयं च तेण जहावित्तं देवसेणरण्णो, जाओ से परमो पमोओ, निरुवियं परिणयणजोग्गं लग्गं, पेसिया य धरागरिसगा पहाणपुरिसा, अणवरयपयाणएहिं पत्ता जयंति-नयरिं, विरइओ आवासो, अणुरुवसमए दिट्ठो राया, सिट्ठं नियकज्जं, तओ पउरकरितुरगसुहडकोडिपरिवुडो पेसिओ तेहिं समं कुमारो, पत्तो कालक्कमेण हरिसपुरनगरसमीवे,

तो तं इंतं नाउं, रत्ता काराविओ पयत्तेणं । वंसग्गवद्धधयर्चिधवंधुरो ज्ञत्ति नयरमहो ॥ १ ॥

श्रीगुणचंद
महावीरच०
४ प्रस्तावः
॥ ९३ ॥

विहिया नरोहिं कुसलेहि कुसुमछडाडोवसुंदरा मग्गा । खित्ता य कुसुमपयरा रणज्झणिरभमंतभमरउला ॥ २ ॥
नचंतनाडइज्जा तालायरकहगपवररमणिज्जा । जाया चउक्कचच्चरचउम्मुहप्पमुहदेसावि ॥ ३ ॥
ठाणे ठाणे रइया दसद्ववण्णेहिं सुरभिकुसुमेहिं । विच्छित्तिविचित्ताओ लंबंतुहामदामाओ ॥ ४ ॥
भवणंपि तस्स जोग्गं निरुवियं सत्तभूमियं रम्मं । चंदणरसलिहियपसत्थसत्थियं थंभसयकलियं ॥ ५ ॥
तं नत्थि जं न विहियं कुमरागमणे पुरंसि नरवइणा । अहवा हरिसुकरिसा पुरिसा किं किं न कुंवंति ? ॥ ६ ॥
एत्थंतरे समागया पहाणपुरिसा, पणमिऊण भणियं तेहिं—देव ! वद्धाविज्जह तुम्हे पुरसमीवसमागयकुमारकु-
सलोदंतसवणेण, तओ समुद्धयविजयवेजयंतीसहस्साभिरामाए चाउरंगिणीए सेणाए समेओ सियासिंधुरखंधाधि-
रूढो पडिपुण्णचंदमंडलाणुकारिणा छत्तेण धरिज्जमाणेणं निग्गओ राया कुमाराभिमुहं, खणंतरेण दिट्ठो कुमारो
समालिंगिओ गाढपणयं पुट्ठो य सरीरारोग्गयं, दट्ठूण कुमारसरीरसंठाणसिरिं चित्तियं रणणा—निच्छियं इयाणिं विण-
स्सइ कालमेहमल्लस्स बाहुवलमडप्फरोत्ति, अह मुहुत्तमेत्तमणुगच्छिय पुवनिउत्तनियनियट्ठाणेषु पेसिओ कुमारप-
रियरो, कुमारोऽपि विमुक्को तंमि चेव पासाए, दवावियाइं करितुरयाईणं जोग्गासणाइं, कुमारस्सवि कए पेसिया
पउरवंजणभक्खभोयणसमिद्धा रसवई, कयं च अन्नंपि तकालोचियं करणिज्जं, आहूया य अवरणहसमए पहाणपुरिसा,
भणिया य—भो गंतूण निवेयह कुमारस्स जहा एसा अम्ह सुया बलाणुराणिणी, ता दंसेह कालमेहमल्लस्स विजएण

हरिविक-
माभ्युप-
गमः ।

॥ ९३ ॥

नियसामत्थंति, जं देवो आणवेइत्ति भणिऊण ते गया कुमारसमीवे, निवेइओ तस्स नीसेसवइयरो, अम्भुवगओ कुमारेण, ततो वीयदिवसे आढत्तो अक्खाडयपरिक्खेवो निबद्धा मंचा परमकोऊहलाउलिज्जमाणमाणसो मिलिओ नयरजणो, ठिओ मंचंमि संतेउरो नरवई, आरूढा य एकदेसंमि चेडीचक्कवालपरिवुडा पाणिपइद्वियलट्टपप्फुलफुल-माला सीलमई रायसुया, पडिक्खलिओ सवत्थ जणसंचारो, कओ अंगरक्खेहिं परिक्खेवो, वज्जियं पलयकालगजं-तपक्खुहियपुक्खलावत्तपगज्जिररवगंभीरं चउव्विहमाउज्जं, जाओ अवसरो, मंचाओ तओ कुमारो गाढुप्पीडियनियं-सियकडिलो दढवद्धकेसपासो पमुक्काभरणसंभारो कुलथेरीकयरक्खो जलणुम्भडगुरुपयावदुप्पेक्खो संनिहियपाडिहे-रोव भासुरो झत्ति अवयरिओ, तहा—

कंठतडुम्भडपरिहियपयतलविलुलंतविमलयणमालो । आवद्धमलवलओ गजंतो पलयमेहोव ॥ १ ॥

मयभिंभलरत्तच्छो गवुद्धुरकंधरो तुरियचवलं । पेच्छयजणपरियरिओ संपत्तो कालमेहोवि ॥ २ ॥

रे मरु ! मेहसु लहुं पुव्वज्जियविजयगव्वमेत्ताहे । अणुसरसु ममं सिग्घं अह भणिओ सो कुमारेण ॥ ३ ॥

सोउं कुमारवयणं जरोव गवो झडत्ति तस्स गओ । अणुचित्तिउं च लग्गो जुत्ताजुत्तं सवुद्धीए ॥ ४ ॥

कहं ?—जइ एस मए विजिओ एयजणाओ तहावि नो कुसलं । अह एएण जिओऽहं वित्तिच्छेओ तओऽवस्सं ॥ ५ ॥

अतुलवलविक्रमस्स उ इमस्स विजएऽवि मज्झ संदेहो । ता उभयपासरज्जुव संकडं एयमावडियं ॥ ६ ॥

श्रीगुणचंद्र
महावीरच०
४ प्रस्तावः
॥ ९४ ॥

इय बहुभेयविकप्पणवसाउलिज्जंतचित्तवित्तिस्स । फुटं तडत्ति हिययं तस्स कुमित्तस्स व रहस्सं ॥ ७ ॥
तओ जाओ कलयलो, उग्घोसियं च जणेण-अहो महप्पभावं दंसणं कुमारस्स, जेणावलोयणमेत्तेणवि वज्जगंठिव
निटुरं फुटं तडत्ति हिययमेयस्स, ता जयइ सबहा कुमारो, एत्थंतरे ओयरिऊण मंचाओ चेडीजणपरिवुडाए सील-
मईए खित्ता कुमारकंठदेसे समं नियचित्तवित्तीए वरमाला, पवज्जियाइ असंखघोससंखोभियभवणाइ मंगलतूराइ, जाओ
णयरे पमोओ, तुट्ठो राया सह मंतिसामंतेहिं, पारद्धो विवाहो महाविभूर्इए उभयपक्खपरितोसेणं, निवत्तिए य तंमि—
पगलंतमयजलुब्भडकरडतडुद्दामभमिरभमराणं । सुहलक्खणंकियाणं पंचसयाइ गइंदाणं ॥ १ ॥
मणपवणजविणवेगाण जच्चतुरंगाण वंकगीवाणं । वारस्स चेव सहस्सा रहाण दो तुंगसिंगाणं ॥ २ ॥
कणगस्स तीस कोडी चीणंसुयपमुहवत्थरासीओ । दिन्नाओ कुमारस्सा पाणिस्स विमोयणे रत्ता ॥ ३ ॥
कयमन्नंपि सविसेसं कायवं, जाओ अवरोप्परं पणयभावो । अवरवासरे य पेसिया कुमारेण पहाणपुरिसा देवसेण-
नरवइस्स पासे नियट्ठाणगमणाणुन्नागहणनिमित्तं, गंतूण निवेइयं तेहिं नरवइस्स, तओ देवसेणेण पुनरवि सम्माणो
पहाणवत्थुसमप्पणेण कुमारो, निरुवियं गमणजोगं दिणं, निउत्ता दंडनायगा अणुगमणत्थं, अह पसत्थवासरे
ससुरप्पभिर्इण कयमुचियकायवो पत्थिओ कुमारो हरिकरिनरनियरसमेओ सनयराभिमुहं । एत्थंतरे—
सघालंकारधरिं सीलवइं चेडियाजणसमेयं । लच्छिं व कुमारपुरो काउं रत्ता भणियमेयं ॥ १ ॥

कालमेघ-
मल्लमरणं.

॥ ९४ ॥

पुत्ति! पविचं सीलं पालेज्जसु मा करेज्जसु कुसंगं । अणुवत्तिज्जसु गुरुजणमवणिज्जसु दुव्विणयभावं ॥ २ ॥
 सेविज्जसु नयमग्गं मियमहुरक्खरगिरं वएज्जासि । आराहेज्जसु सपियं देवो भत्ता कुलवहूणं ॥ ३ ॥
 कुमरोऽवि इमं वुत्तो एसा एक्का सुया ममं इट्ठा । लायव सहयरी जह हवइ सया तह तए किच्चं ॥ ४ ॥
 इय सिक्खविउं राया धूयं विरहग्गिदूमियसरीरो । अणुगमिऊण कुमारं नियनयराभिमुहमह चलिओ ॥ ५ ॥
 कुमारोऽवि पेच्छंतो नगनगरागरगामकाणणरमणिज्जं मेइणिं साहित्तो विसमपल्लीनिलीणे भिल्लाहिवइणो
 पयट्ठंतो पुव्वनीईओ अवलोयंतो तावसजणनिसेविए अणवरयडज्जंतययमहुसमिहमहोसहिसमुच्छलंतवहलधूमपडल-
 कयमेहसंकसिहंडितंडवाडंबररमणिजे आसमपए, पइदिणपयाणएहिं संपत्तो जयंतीए नयरीए बाहिरुज्जाणे, वद्धाविओ
 नरसिंघनरवई, काराविया नयरसोहा, जाया समुद्धयविचित्तचीणंसुयचिंधवंधुरा रायमग्गा, अह पसत्थंमि मुहुत्ते
 अंतेउरपुरप्पहाणजणपरियरिएण नरिंदेण अणुगम्ममाणो नरविक्रमो नयरिं पविसिउमारद्धो, ठिया य रायमग्गोभय-
 पासपासायमालासु तदवलोयणकोऊहलाउला कुसुमुम्मिस्सक्खयहत्था लोयसत्था, जाया य कुमारखवपलोयणपा-
 उब्भवंतविविहवियाराण जुवईजणाण विब्भमा । कहं चिय ?—

द्दूण कावि पडिज्जुवइकंतगंडत्थलंतसंकंतं । कुसुमक्खएहिं ताडइ ईसाइंतिव्व रायसुयं ॥ १ ॥
 पवियंभियकुसुमाउहवसवियसियलोयणा पलोयंती । न मुणइ सकडिल्लंपिहु पवणेणायट्ठियं अवरा ॥ २ ॥

श्रीगुणचंद
महावीरच०
४ प्रस्तावः

॥ ९५ ॥

कुमरपल्लोयणवामूढमाणसा निचला गिहग्गया । अनिलचलंचलचूडा काविहु रेहइ पडायव ॥ ३ ॥
अम्मे ! जामि पलोइदुं दसदिसं कोलाहला सुवए, सा मा गच्छ मयच्छि ! निच्छियमिमो सो एइ रण्णो सुओ ।
दिट्ठे जम्मि पणट्ठनिव्वुइमणा मुद्धावरा मग्ग(ङ्ग)णा, वट्ठंती विव सासुयाएँ पुरओ अन्ना इमं जपइ ॥ ४ ॥
इय एवं सविलासाहिं नयरनारीहिं सच्चविज्जंतो । कुमरो वहुसमेओ संपत्तो निययभवणंमि ॥ ५ ॥
तहिं गएण य कया सविसेसं गुरुजणाण पणामाइपडिवत्ती, समप्पिओ य रण्णा अंबरतलमणुलिहंतो निययभव-
णनिव्विसेसो पासाओ कुमारस्स, तत्थ ट्ठिओ य सो सक्को इव देवलोए धरणो इव पायाले विसयसुहं भुंजंतो
कालं गमेइ, अन्तरंतरा य तुरगवाहियालिं च मत्तसिंधुरदमणं च मल्लजुज्झम्भसणं च राहावेहकोऊहलं च धम्मसत्थ-
सवणं च देसंतरनयरवत्तानिसामणं च गुरुचरणनिसेवणं च मग्गजणमणोरहपूरणं च करेइत्ति । अह कुमारस्स का-
लकमेण सीलमईए सह विसयसुहं भुंजमाणस्स कुसुमसेहरविजयसेहरनामाणो जाया दोन्नि पुत्ता, ते य बल्लहा पिया-
महस्स, विविहप्पयारेहिं उवलालिज्जमाणा वहुंति । अन्नया राइणो समीवे निसत्रंमि नरविक्रमे जहोचियठाणनिवि-
ट्ठंमि सेवगजणे मयभरसंभरियसच्छंदजमुणावणविहारो तडयडारायतोडियनिविडघडणुत्तरतारसयप्पमाणलोहनिगडो
सयखंडचुन्नियमहालाणखंभो निदयकरप्पहाराहयारोहगवग्गो पहाविओ नयरमज्जेग जयकुंजरो उम्मूलियगरुयहुममो-
डियगुरुविडवकडयडरउहो कुंभत्थलपणोल्लणपाडियसुरभवणसिहरग्गो अइकदिण्णकरप्फालणविहाडिउद्दामतुंगपागारो

विवाहः
गजोपद्रवः.

॥ ९५ ॥

अइवेगुचालियकन्नतालविद्वियभसलउलो अइरभसभरपहावणसपक्खकुलसेलचल्लिकयसंको दढदंतदंडताडणढलढ-
लियट्टालयसमूहो करघायदंतवेहणचरणुप्पीडणनिवाडियजणोहो सव्वत्थ भमइ भीमो जमोव्व जुगविगमसमयंमि, अह
मंदरमहिज्जमाणमहोयहिघोसघोरे समुच्छलिए तियचउक्कचचरेसु जणाणं अकंदियरवे पुच्छियं नरवइणा-भो भो
किमेवं नयरे कोलाहलो सुम्मइत्ति?, जणेण भणियं-देव! एस तुम्ह जयकुंजरो भग्गालाणखंभो नयरं विद्वेइ,
एवं सोच्चा विसज्जिया कुमारपमुहा पहाणलोया जयकुंजरगहणनिमित्तं, भणिया य-अरे! सव्वहा सत्थघायं परिहरं-
तेहिं एयस्स वट्टियव्वं, एवं च पडिवज्जिय गया ते तदभिमुहं, न य पेच्छंति कमवि उवायं जेण हत्थी वसमुवग-
च्छइत्ति, एत्थंतरे वेलामासवत्तिणी गुरुगन्धभारवसविसंडुलनिवडंतचरणा गाढपाणभयकंपंतसरीरजट्टी इओ तओ
य धावंती एगा कुलंगणा दिट्ठा जयकुंजरेण, तओ उलालियकरग्गो पवणवेगेण धाविओ तीसे अभिमुहो, सावि
कुंजरं तहा सिग्घमागच्छंतं पेच्छिऊण सज्झसभरनिरुद्धपयप्पयारा कलुणाइं दीणाइं विलविउं पयत्ता, कहं चिय?-

हे माइ भाय ताया तायह मं मा उवेक्खह इयाणिं । एसो मम वहणट्ठा दुट्ठकरी पासमल्लियइ ॥ १ ॥

हं हो पेच्छगलोया । निक्करुणा करिवरं पडिक्खलह । गुरुगन्धभरकंता एसा संपइ विवज्जामि ॥ २ ॥

अहह कहं पावकरी एसो सो आगओ मम समीवे । निस्सरणा नित्ताणा कमुवायं संपइ सरामि ? ॥ ३ ॥

किं कोऽवि महापुरिसो परोवयारत्थधरियनियपाणो । एत्थ न पेच्छइ सहसा मं दुक्खत्तं विणस्संतिं ॥ ४ ॥

श्रीगुणचंद
महावीरच०
४ प्रस्तावः

॥ ९६ ॥

इय दीणकलुणवयणाइं णेगसो भासिऊण खणमेकं । मुच्छानिमीलियच्छी धसत्ति सा महियले पडिया ॥ ५ ॥
सोवि करिवरो दहरोसभररत्तणेत्तो संपत्तो तीसे थेवंतरेण, दिट्ठा य सा कुमारेण भयवसभूमिनिस्तहनिवडियंगी,
चित्तियं च-अजुत्तमजुत्तमियाणि उवेहणं एयाए, जओ—
एकं अबला एसा अन्नं गुरुगम्भभारविवसंगी । अन्नं पुण मुच्छाए निमीलियच्छी धरणिपडिया ॥ १ ॥
अन्नं च पुणो तायस्स एस जयकुंजरो अतीव पिओ । सत्थेण न हंतव्वो विसममिमं निवडियं कज्जं ॥ २ ॥
अहवा रूसउ ताओ जं भवइ तं करेउ मम इण्हि । हंतव्वो एस करी दुच्चलजणपालणं धम्मो ॥ ३ ॥
इय निच्छिऊण निविडवद्धदुगुलंचलो तुरंगाओ अवयरिऊण अवलोइज्जंतो नरनारीजणेण निवारिज्जंतो पासव-
त्तिपरियणेण पडिखलिज्जमाणो अंगरक्खेहिं निरवेक्खो नियजीवियस्स सिग्घं पधाविऊण मेहस्स व मयजलासार-
पसमियरयनियरस्स कयगंभीरगलगज्जियस्स सहस्सनयणोव थेवंतरेणासंपत्तस्स जयकुंजरस्स करणप्पओ-
गवसेण आरूढो पट्टिदेसंमि कुमारो, ताडिओ य कुलिसनिट्ठरेण मुट्ठिप्पहारेण करी कुंभत्थलंमि, अह खरयरं रोस-
मुवागओ मणागंपि अनियत्तंतो नारीवहाओ सो कुमारेण जमजीहादुव्विसहाए खग्गधेणूए आहओ सन्वसत्तीए
कुंभजुयलंतराले, तओ पढमुग्गमंतरविमंडलाओव्व करपसरो खरपवणपणुन्नकमलसंडाओव मयरंदनीसंदो महागिरि-
गेरुयागराओव्व निम्भरसलिलुप्पीलो कुंभत्थलाओ से वूढो महारुहिरप्पवाहो, सहसच्चिय विगयनयणोवलंभो विहलं-

सगर्भ
युवतिरक्षा.

॥ ९६ ॥

घलीभूओ मओ इव मुच्छिओ इव दढपाससहस्ससंजमिओ इव निचलो ठिओ करी, तओ अवयरिऊण कुमारेण संठविया
सा भूमिगथा इत्थिया, विमुक्का य समीहियपएसंमि, सयंपि गओ नियमंदिरं, सोऽवि करिवरो गहिओ आरोहेहिं,
पारद्धो अणवरयजलवडसहस्सखेवेण सिसिरोववारो, पयट्ठाविवाइं घायविसोहणाइं, महाविमदेण नीओ निययावासे,
निवेइयं नरवइणो जहावित्तं, रुट्ठो राया, परं सोयमुवागओ, भणिउमाढत्तो य—

रे रे वचह पुरिसा ! निस्सारह तं सुयं दुरायारं । जयकुंजरेऽवि निहए अज्जवि इह वसइ जोऽलज्जो ॥ १ ॥

अव्वो साहसतुट्ठाए तीए देवीए सुंदरो दिन्नो । पुत्तो अभित्तरूवो देवाविहु विप्पयारंति ॥ २ ॥

नूणं मूढो लोओ तम्मइ पुत्तस्स जो निमित्तंमि । न मुणइ एवंविहदोससाहणे पयडसत्तुत्तं ॥ ३ ॥

अन्नाणविलसियमिणं गइं अपुत्तस्स जं निवारंति । इहलोयप्पडिणीओ परलोयमुहो कहां होज्जा ? ॥ ४ ॥

नीसेसरज्जसारं एयं जयकुंजरं हणंतेण । कह मह सावेक्खत्तं पुत्तेण पयासियं भणसु ? ॥ ५ ॥

ता जह पुवं एकेण रक्खियं खोणिवलयमक्खंडं । रक्खिस्सामि तहेण्हि निस्सारह वेरियं एयं ॥ ६ ॥

जो एरिसं अणत्थं वीसत्थो कुणइ वसइ निस्संको । सो नूण ममंपि विणासिऊण रज्जंपिहु हरेज्जा ॥ ७ ॥

इय पुणरुत्तं नरवइस्स निच्छयमुवलब्भ विमणदुम्मणा गया कुमारसमीवं रायपुरिसा, तं च पणमिऊण सामव-
यणा निविट्ठा एगदेसे, पलोइऊण य तेसिं मुहसोहं भणियं कुमारेण—किं भो ! गाढमुविग्गा दीसह ? , साहह किमेत्थ

श्रीगुणचंद
महावीरच०
४ प्रस्तावः

॥ ९७ ॥

कारणं?, खणंतरं निरुद्धकंठं चिद्विय दीदुण्दुण्दुमुक्कनीसासपुरस्सरं दुस्सहविरहविहुरनिस्सरंतवाहप्पवाहं परामुसियलो-
यणजुयलं भणियं पुरिसेहिं—कुमार! निब्भग्गसिरसेहरा किं सोहेमो?, कुमारेण भणियं—कहं चिय?, पुरिसेहिं भणियं—
जेण तुम्हेहिं सह दुस्सहो दीहविरहो भविस्सइत्ति, इंगियाकारकुसलत्तणओ परियाणिऊण तेसिमभिप्पायं भणियं
कुमारेण—किं कुविओ ताओ निविसयमाणवेइ?, रायपुरिसेहिं भणियं—कहमेयं परुसक्खरं देवदुल्लहाणं तुम्ह भणि-
ज्जइ?, सयमेव जाणह तुम्हे जमेत्थ पत्तकालं, तओ वत्थतंबोलाइणा पूइऊण रायपुरिसा सट्ठाणे पेसिया कुमारेण,
वाहराविया य निययसेवगा, भणिया य—भो महाणुभावा! वारणसिरवियारणकुविण ताएण निविसओ आणत्तोम्हि,
ता गच्छह नियट्ठाणेषु तुम्हे, अवसरे पुणरवि एज्जहत्ति, सम्माणिऊण सप्पणयं पेसिया, देवी य सीलमई भणिया,
जहा—गच्छसु पिए! तुमंपि पियहरं, पत्थावे पुणरवि एज्जाहि, सा य खणमवि विओगदुक्खमसहमाणी जमुणाजलस-
च्छहं सकज्जलं नयणवाहप्पवाहं सुंचंती रोचिउं पयत्ता, संठविया कुमारेण तेहिं तेहिं मडुरवयणेहिं, नेच्छइ य सा खण-
मवि विओगं, तओ भणिया कुमारेण—पिए! दुग्गा मग्गा आजम्मसुहलालियाणं दढमजोग्गा य, असंजायसरीरवला
वालजुयलपरिबुडा य तंसि, ता विरम सबहा ममणुग्गहं कुणमाणी इमाओ असग्गहाओत्ति, सीलमईए भणियं—
अज्जपुत्त! तइया ताएण तुह किमुवइदुं?, कुमारेण भणियं—न सरामि, सीलमईए जंपियं—मम एकचिय धूया एसा
अचंतं निबुइठाणं छावव सहचरी जह हवइ सया तह तए किचंति, कुमारेण भणियं—पिए! सुमरियभियभियार्णि,

नरविक्र-
मस्य
प्रवासः.

॥ ९७ ॥

तीए जंपियं-ता कीस नियत्तेसि मं?, कुमारेण भणियं-मग्गगाढपरिस्समकारणेण नियत्तेमि, जइ पुण अवस्समेवागंतवं
मए समं ता पउणा भवसु, विमुंचसु भवणनिवासाभिरइं परिचय सुकुमारत्तणंति, सीलमईए भणियं-एसा समसुह-
दुक्खसहा जाया पगुणम्हि, तओ करकलियसरासणो पिट्ठिप्पएसवद्धतोणीरो सुयजुयलसमेयाए सीलमईए सहिओ
सुहपसुत्तेसु नयरलोएसु पसंतेसु गीयरवेसु सट्ठाणनिविट्ठेसु अंगरक्खेसु पमत्तेसु जामकरिधडाधिरूढेसु सुहडेसु इओ
तओ पेसिएसु नियचेडगेसु नीहरिओ नयराओ कुमारो, अविच्छिन्नप्पयाणएहिं परं रज्जंतरं गंतुं पवत्तो य ।

इओ य आयन्निऊण कुमारस्स विदेसगमणं सयलोऽवि नयरीजणो मुक्ककंठं विलविउमारद्धो, मंतिणोऽवि परिच-
त्तनीसेसरज्जवावारा हरियसवस्ससारा इव विमणदुम्मणा गंतूण नरनाहं उवलंभिउं पवत्ता, कहं विय ?

तिलतुसमित्तंपिहु नियपओयणं अम्ह साहिउं देवो । पुंघिं करिसु इण्ह पव्वयमेत्तेऽवि नो पुट्ठा ॥ १ ॥
ता देव ! जुत्तमेयं काउं किं तुम्ह थेवकज्जेऽवि ? । रज्जभरधरणधीरो जमेस निवासिओ कुमरो ॥ २ ॥
किं एगदुट्ठकुंजरकएण नियजीयनिव्विसेसस्स । पुत्तस्स एरिसगई विहिया केणावि नरवइणा ? ॥ ३ ॥
किं वा विंझमहागिरिपरिसरधरणीए कुंजरकुलाइं । हरियाइं तक्करेहिं जं देवो ववसिओ एवं ॥ ४ ॥
इत्थीए रक्खणओ किमजुत्तं नणु कयं कुमारेण ? । नियडिंभदुट्ठचेट्ठावि जणेइ जणयस्स संतोसं ॥ ५ ॥
पररज्जेसु य अजसो अम्हाण पयासिओ तए नूणं । जइ नरसिंघनराहिवरज्जमुवेक्खंति गुरुणो य ॥ ६ ॥

श्रीगुणचंद
महावीरच०
४ प्रस्तावः
॥ ९८ ॥

ता गिणहह नियमुदं सह भवणधणेहिं मोकलह अम्हे । न सहिस्सामो एत्तियमवजसरयफंसणं देव ! ॥ ७ ॥
इय मंतीहिं भणिए राया संजायचित्तसंतावो । अब्भुवगयनियदोसो ताहे ते भणिउमाढत्तो ॥ ८ ॥
मरिसह मम अवराहं जमपुच्छिय एरिसं कयं कज्जं । नो कोवभराओ जओ जुत्ताजुत्तं मए नायं ॥ ९ ॥
जह तुब्भे भणह तहा न कोऽवि दोसेऽवि चयइ नियपुत्तं । इय वइयरछउमेणं मन्ने लच्छीए छलिओऽहं ॥ १० ॥
जं पुण इय दोसाओ मंतिच्चविमोयणं कुणह तुब्भे । एसेव निरंजणसामिभत्तिजुत्ताण होइ मई ॥ ११ ॥
केवलमेक्को पुत्तो रज्जसमत्थो गओ विदेसंमि । तुम्हेवि उवेक्खह मं उभयं सोढुं न सक्कोऽहं ॥ १२ ॥
ता संपयं पसीयह रज्जं चित्तेह लहह कुमरस्स । सबत्थावि पउत्तिं एत्तो रोसेण पज्जत्तं ॥ १३ ॥
एवं गाढनिबंधेण पडिवन्नं मंतिजणेणमेयं, पेसिया य सयलदिसासु वरतुरयाधिरूढा पुरिसनियरा कुमारत्रेसण-
निमित्तं, गया य सबत्थ, निरूविओ सबजत्तेण, न केणवि दिसाभागमेत्तंपि वियाणियं, तओ कइवयवासराइं
वियरिय तेसु तेसु ठाणेषु अकयकज्जेहिं चेव नियत्तिज्जण तेहिं सिट्ठो सभानिविट्ठस्स मंतिजणसमेयस्स नरिंदस्स
कुमाराणुवलंभउत्तंतो, तं च सोच्चा अच्चंतं सोगं कुणंतो राया वागरिओ मंतीहिं-देव ! अलं परिदेविण्ण, न
कयाइ करतलाओ विगलिओ पुणोवि पाविज्जइ चिंतामणी, न य दढकुनयदंडताडिया पुणोऽवि मंदिरे निवसइ
रायलच्छी, न गाढमकारणावमाणिओ नियत्तइ सप्पुरिसजणो, राइणा भणियं-जइ पढममेव सो तुम्हेहिं नियत्तिओ

मन्त्रिणां
रोपः कुमा-
रान्वेषणं.

॥ ९८ ॥

होंतो ता जुत्तं हुत्तं, मंतीहिं भणियं—जइ मूलेऽवि से न रोसुप्पायणं देवो करेंतो ता जुतत्ततरं हुत्तं । अवि य—
 कज्जविणासे जाए जह बुद्धी बंधुरा पवित्थरइ । तह जइ पढमं चिय होज्ज देव ! ता किं न पज्जत्तं ? ॥ १ ॥
 धन्ना सबुद्धिविभवेण जाणिउं वत्थु तस्स य सखुं । पढमं चिय सुग्गहियं कुणंति सप्पस्स वयणं व ॥ २ ॥
 रत्ता बुत्तं सच्चं एयमहो केवलं बहुसणाहो । जाणेण विणा कह सो दूरपहं पाविओ होही ? ॥ ३ ॥
 मंतीहिं तओ भणियं जेणेसा विहडणा कया देव ! । सो दूरेऽवि नएज्जा नूण कुमारं लहुं दइयो ॥ ४ ॥

एवं चिरं परितप्पिय पुणोवि चारपुरिसे[हिं] कुमारवत्ताजाणणत्थं पेसिय नियनियठाणेसु गया मंतिणो, रायावि सुयविरहवेयणाविहुराए चंपयमालाए देवीए संठवणनिमित्तमंतेउरं गओत्ति ॥

इओ य सो कुमारो कमंकमेण गच्छंतो चिरकमलवणविहारुविग्गाए लच्छिदेवीए तुट्ठेण पयावइणा निवासनिमित्तं य विरइए नाणाविहतुरुणतरुसामलियसयलरविकरपसरे अणेगकोडीसरीयजणसंकुले संदणपुरवेलाउले संपत्तो, अवि-
 याणमाणो य तहाविहं गेहंतरं गोपुरपच्चासन्नस्स पाडलाभिहाणमालागारस्स मंदिरंमि पविट्ठो, दिट्ठो य सो पाड-
 लेण विन्नाओ य विसिट्ठागिईए जहा नूणं कोई एस महापुरिसोत्ति, तओ अब्भुट्ठिऊण सपणयं कया उच्चियपडिवत्ती,
 दंसिओ गिहस्स एगदेसो, निक्कारणवच्छलयाए य भायरं व तं उवयरिउमाढत्तो, कुमारोऽवि तत्थट्ठिओ सजूहभ-
 ट्ठोव पवंगमो दिणगमणियं कुणंतो अच्छइ । अन्नया य पुवसमाणियंमि निट्ठियंमि दविणजाए पाडलेण भणियं—कुमार !

श्रीगुणचंद
महावीरच०
४ प्रस्तावः

॥ ९९ ॥

महायस निव्ववसायाणं केरिसो निव्वाहो?, ता परिचयसु आलस्सं, गिण्हसु ममारामस्स एगदेसं, समुत्ति कुसुमाइं, गुंथिऊण य विविहमालाओ चिक्किणसु रायमग्गंमि जहा सुहेण चेव निव्वहइ तुह परिग्गहोत्ति ।

तओ-जह जह चाएइ विही विसरिसकरणेहिं निठुरं पडहं । धीरा पहसितवयणा नच्चंति तहा तह च्चेव ॥ १ ॥

इय चिंतिऊण सत्तधम्माणणुरूवंपि तयणुरोहेण पडिवन्नमेयं कुमारेण, पइदियहं च सह सीलमईए मालागारो-वदंसियकाणणेगदेसतरुकुसुमाइं उच्चिणिय नियगेहमागंतूण मालाओ विरएइ, पाडलगभज्जाए य समं सीलमइं तविककय-निमित्तं रायमग्गे पेसेइ, उप्पज्जइ वड्ड अत्थो, एवं च पइदिणं पुप्फविककयकरणेणं सुहेण संपज्जइ निव्वाहो, अन्नया पप्फुल्लविइल्लमालाओ गहाय सीलवई गया रायमग्गे, अह तीसे रूवेण जोद्धणेण य लायण्णेण य सोहग्गेण य अक्खि-त्तचित्तो समागओ एगो कोडीसरीओ देहिलो नाम नावावणिओ, भणिया य तेण-भदे ! केत्तिएण इमाओ मालाओ लब्भंति ?, तीए भणियं-पंचहिं सुवण्णधरणोहिं, तओ

दानेन वैराण्युपयान्ति नाशं, दानेन भूतानि वशीभवन्ति । दानेन कीर्तिर्भवतीति दुशुभ्रा, दानात्परं नो वरमस्ति वस्तु ॥ १ ॥

इय चिंतितेण तीसे चित्तावहरणत्थं समप्पिया तेण तिण्णि दीणारा, सहरिसाए तीए गहिऊण समप्पियाओ फुल्लमालाओ, विणएण भणिया य सा-भदे ! इओ दिणाओ आरब्भ मा अन्नस्स दाहिसि, समहिगतरमुल्लेणवि अहमेव गहिस्सामि, पडिवन्नं च तीए, गयाइं दोन्निवि नियनियगेहेसु, एवं पइदिणं सो तीए सगासाओ पुप्फमालाओ गि-

सन्दनपुरे
नरविक्रमः.

॥ ९९ ॥

ण्हइ, साऽवि समहिगदविणलोभेण तस्स चेवं दलयइ । अन्नया परतीरगमणनिमित्तं नाणाविहअमुल्लभंडभरियं जाणवत्तं
 ठाचियं अणेण समुहतीरे, सावि भणिया, जहा-कलेऽहं परतीरे गमिस्सामि, तम्हा तुमे समुहतीरे अमुगंमि पएसे
 आगंतूण नीसेसाइं कुंदवेइलनवमालईपाडलाइमुत्तयचंपयपमुहाइं कुसुमाइं समप्पेज्जासि, अहं ते चउग्गुणं मोल्लं
 दवाविस्सामि, पडिवन्नं च तीए हट्ठहिययाए, न मुणिओ कोऽवि परमत्थो, वीयदिवसे गया समग्गकुसुममालाओ
 गहिऊण निदिट्ठट्ठाणे, दिट्ठो सो वणिओ जाणवत्ताधिरूढो, पणामियाइं तीए कुसुमाइं, पसारिओ तेण हत्थो, तीएवि
 समप्पणं(णत्थं)पलंबिया मुणालकोमला नियमुयलया, तेणवि हरिसभरनिभरंगेण सकुसुममाला चेव गहिऊण आरो-
 विया सीलवई जाणवत्ते, उविखत्ता उवरिगाए, एत्थंतरे वज्जावियाइं मंगलतूराइं पयट्टियं पवहणं विमुक्का सियवडा
 वाहियाइं आवलयाइं चंडगंडीवविमुक्कंडव वेगेण गंतुं पवत्तं जाणवत्तं । इओ य सो नरविक्रमकुमारो अच्चंतं तदणाग-
 मणकालविलंबुच्चिगचित्तो इओ तओ सीलमइं पलोइउं पवत्तो, तं अपेच्छमाणेण य तेण पुट्ठा पाडिवेसिया, अवलो-
 इओ रायमग्गो, सम्मं निरिक्खिया तियचउक्कचचरा, अवलोइयाइं सयलदेवउलभवणकाणणाइं, निवेइया वत्ता पाड-
 लयमालागारस्स, तेणावि सवायरेण गवेसिया सीलमईसवट्ठाणेसु, कत्थविय पउत्तिमपावमाणेण सिग्घमेव नियत्तिय
 भणिओ कुमारो-महायस ! धीरो भव, परिचयसु कायरत्तं, कुमारेण भणियं-भइ ! न किंपि मम कायरत्तं, केवलं एए बालए
 जणणीविओगवसविसंडुलं रोयमाणे न सक्केमि पेच्छिउं, पाडलेण भणियं-एवं ठिएवि पुरिसाय(सयार)त्तं कायच्चं, ता

श्रीगुणचंद
महावीरच०
४ प्रस्तावः
॥ १०० ॥

पुत्रदिसिविभागे तीसे अन्नेसणनिमित्तं अहं गच्छामि, तुमं पुण पुत्तसमेओ चिय उत्तरदिसिहुत्तं इमाए नईए उभयकूलेसु उज्झरेसु य दरीसु य दुत्तडीसु य विसमप्पवेसेसु य अवलोइजासित्ति, एवं करेमित्ति पडिवज्जिय पुत्तजुयलसमेओ चेव गओ नरविक्कमो नईए पासदेसंमि, ते य पुत्तए मणागंपि सन्निहिममुंचमाणे संठविय चिंतिउमारद्धो । कहं चिय?—
किं होज्ज केणवि हडा? वसीकया वावि केणवि नरेण? । किं वा सरीरपीडाए होज्ज कत्थवि निसन्ना सा ॥ १ ॥
किं वा ममावमाणं किंपि हु दद्वुण विलयमावन्ना । पुरिसंतरंमि अहवा जाओ तीसे पणयभावो ॥ २ ॥
सुमरामि न तावऽवमाणकारणं होउ वाऽवमाणेऽवि । नो सा चएज्ज पुत्तं अवचनेहो जओ गरुओ ॥ ३ ॥
संभवइ न एयंपिहु जमन्नपुरिसं मणेऽवि चित्तेज्जा । कह तारिसकुलजाया सीलं मइलेज्ज ससिधवलं? ॥ ४ ॥
अहवा जुवईण मणं कुडंगगुविलं क एव जाणेज्जा? । वाहिंदंसियपणयाण कवडभरियाण मज्झंमि? ॥ ५ ॥
अन्नं वयंति पुवं पच्छा पुण वाहरंति गिरमन्नं । अन्नं धरेंति हियए साभिप्पेयं करेंति पुणो ॥ ६ ॥
गयणे गणंति गहगणमुयहिंमि जलंपि जे परिमिणंति । पेच्छंति भावि कज्जं न तेऽवि जाणंति जुवइयणं ॥ ७ ॥
सच्चं चिय जुवईओ एरिसियाओ न एत्थ संदेहो । केवलमेयाए मए दिट्ठं लहुयंपि नो विलियं ॥ ८ ॥
ता सबहा न उवेहणिज्जा होइ एसत्ति निच्छिऊण पुत्ते य नईकूले संठविय परकूलन्नेसणट्ठाए पविट्ठो नईए, पत्तो य मज्झयारे, एत्थंतरे अचंतपडिणियत्तणओ हयविहिस्स अघडंतवत्थुसंघडणसीलयाए भवियवयानिओगस्स बलवत्त-

शीलवत्य-
न्वेपणा.

॥ १०० ॥

णओ वेयणीयकम्मस्स गिरिसिरवरिसणवसविसप्पमाणसलिलप्पवाहेण पूरिया तक्खणेण नई, जाया अगाहा, खलिओ पयप्पयारो पवाहिओ तरुपलववारिपूरेण नरविक्रमकुमारो नीओ दूरप्पएसं, अह कहवि कुसलकम्मवसओ पावियमणेण फलगं, तंनिस्साए अवयरिओ तीरे तीए, नुवन्नो तरुवरच्छायाए, चिंतिउं पवत्तो—

कह नियनयरच्चाओ? कहेत्थ वासो? कहिं गया भज्जा? । कह पुत्तेहि विओगो? कह वा नइवेगवहणं च? ॥ १ ॥
 खरपवणाहयजरतिणनियरो विव देवया दिसिवलिव । एक्कपए चिय कह मज्झ परियरो विसरिओ झत्ति? ॥ २ ॥
 हे दइव ! तुज्झ पणओ एसोऽहं खिवसु सवदुक्खाइं । मज्झं सयणजणाओ जेणऽन्नजणो सुहं वसइ ॥ ३ ॥

एत्थंतरे पच्चासन्नजयवद्धणनयराहिवई कित्तिवम्मनामो नरवई अनिवत्तगसूलवेयणाए अपुत्तो सहसा पंचत्तमुवगओ, तओ मिलिआ मंतिसामंताइणो लोया, कओ पंचदिवाभिसेओ रज्जारिहं च पुरिसं सवत्थ मग्गिउं पवत्ता, खणंतरेण नयरब्भंतरे रज्जारिहमपेच्छंताणि वार्हि अवलोयणट्ठा निग्गयाणि पंच दिवाणि, गंतुं पयट्ठाणि य तसुहेसं जत्थ सो चिंताउरो नरविक्रमकुमारो निवसइ, अह तदग्गगामिणं पयंडसुंडादंदुडामरं वेगेण पवरकुंजरमिन्तं दट्ठूण विगप्पियं एवं कुमारेण—

मन्ने पुव्वभत्थं इयाणि दइवो समीहए काउं । कहमन्नहेह हत्थी दूरुलालियकरो एज्जा? ॥ १ ॥
 अहवा एउ इमो लहु कुणउ य मणवंछियं जहा मज्झं । ससुयदइयविरहपमोक्खदुक्खवोच्छेयणं होइ ॥ २ ॥

श्रीगुणचंद
महावीरच०
४ प्रस्तावः

॥ १०१ ॥

अह गलगजिं घणघोसविभ्रमं कुंजरेण काऊण । नियपट्टीए ठविओ इत्तिं कुमारो करग्गेण ॥ ३ ॥
हयहेसियं च जायं जयतूररवो वियंभिओ सहसा । सामंतमंतिलोएण परिवुडो तो गओ नयरं ॥ ४ ॥
जाओ पुरे पमोओ अपणयपुवावि पत्थिवा पणया । नरविक्रमेण रज्जं अत्तायत्तं कयं सवं ॥ ५ ॥
नरसिंघनिधिसेसा जाया करितुरयरयणभंडारा । सक्कोव देवलोए विलसइ सो विविहकीलाहिं ॥ ६ ॥
केवलमेको चिय फुरइ तस्स हिययंमि नट्टसल्लं व । दइयासुयदीहरविरहवइयरो दुस्सहो अणिसं ॥ ७ ॥

अन्नया जयवद्धणनयरासन्नज्जाणे अणेगसीसपरिवुडो सीहोव दुद्धरिसो सूरुव निहियतमपसरो चंदोव सोम-
सरीरो मंदरो इव थिरो जच्चकणगंय परिकखखमो दूरविवज्जियराओवि अणंतराओ धरियपयडजमवओवि नीसे-
ससत्तरक्खणवद्धलक्खो समिइवावारियमणपसरोऽवि सया पसंतचित्तो उत्तीसगुणमहामणिरोहणभूमिध्व धीनि-
हाणं व पच्चक्खधम्मरासिब भुवणभवणेक्कदीवोव सिवपंथसत्थवाहोव कम्मतरुनियरहववाहोव दट्ठजा-
यदप्पकंदप्पसप्पसन्नागदमणिब ससमयपरसमयजलप्पवाहसिंधुव लोयचक्खुव नियनियचिसंदुलकरणकुरंगे-
क्कपासोव मिच्छत्तजलाउलभवसमुदनिवडंतजंतुवोहित्थो पंचविहायारमहाभरेकनित्थारणसमत्थो जइधम्मे असमत्थे
सावयधम्मंमि संठवमाणो इयरे पुण जइधम्मे सिद्धंतपसिद्धनाएणं अपुवापुवजिणभवणाइं वंदमाणो गामाणुगामं
विहरंतो आगंतूण समंतभद्दाभिहाणो सूरु समोसरिओत्ति, जाया नयरे पसिद्धी, जहा असेसगुणगणावासो सूरु

जयवर्धने
नरविक्रमो
नृपः,

॥ १०१ ॥

आगओ, तओ कौलहलेण य भवनिव्वेणत्ति य संदेहपुच्छणेण य बहुमाणेण य धम्मसवणनिमित्तेण य नियनियद-
रिसणाभिप्पायविमरिसेण य समागया बहवे मंतिसामंतसेट्ठिसेणावइसत्थवाहदंडनाहप्पमुहा नयरलोया, निवडिया
चरणेसु, निविट्ठा जहासंनिहिया धरणिवट्ठे, सूरीवि पुवभवज्जियगुरुकम्मजलणजालालितत्तगत्तेसु करुणामयवुट्ठिपिव
दिट्ठिं सत्तेसु पेसंतो मंदरगिरिमंथमहिज्जमाणखीरोयरवगंभीरेण सहेण सद्धम्मदेसणं काउमारद्धो, कहं ?—

खरपयणपणुन्नकुसग्गलगजलविंदुचंचलं जीयं । सुररायचायचवलं खणेणवि गलइ सरीरवलं ॥ १ ॥
पेम्मंपि तुंगगिरिसिरसरंतसरियातरंगमिव तरलं । लच्छीवि छड्डणुड्डमरवंछिरी पेच्छइ छलाइं ॥ २ ॥
पयडपयट्ठियदारुणविविहवियारा महासमुद्दे व । निवडंति आवया आवयव निचं सरीरंमि ॥ ३ ॥
मणिमंततंतदिट्ठोसहीण वावारणेवि अविणासं । भुंजंता देंति दुहं विसया विसवल्लरीउव ॥ ४ ॥
मिच्छत्तमोहमोहियमईहिं कीरंति जाइं पावाइं । भवसयपरंपरासुवि वेरिव मुयंति नो ताइं ॥ ५ ॥
पियपुत्तकलत्ताईण जाण कज्जेसु वट्ठियं बहुसो । परलोयपयट्ठाणं ताणिवि नो हुंति ताणाय ॥ ६ ॥
इय भो नाउं जिणधम्ममणुदिणं सरह सरहसं कुसला ! । जावज्जवि वज्जमहासणिव निवडइ न तुम्ह जरा ॥ ७ ॥
तीसे पडणे पुण छिन्नपक्खपुडया विहंगवग्गव । उट्ठियदाढाभुयग्गव हरियरज्जा णरिंदव ॥ ८ ॥
सच्छंदगमणपरभीइजणणसव्वत्थसाहणविहीणा । चिररिद्धिं सुमरंता सुचिरं तुम्हे किलिस्सिहिइ ॥ ९ ॥

श्रीगुणचंद
महावीरच०
४ प्रस्तावः
॥ १०२ ॥

पज्जंतं एत्तो जंपिण जइ कामियाइं सोक्खाइं । भोत्तुं वंछह ता वीयरायवयणे समुज्जमह ॥ १० ॥
इय संसारनिस्सारत्तणपरिकहणेण पडिबुद्धा बहवे पाणिणो । वीयदियसे य समायन्नियसूरिसमागमणवुत्तंतो सम-
ग्गयतुरयनरनियरपरियरिओ भारियासुयसंपओगपुच्छणकए समागओ नरविकमनराहिवो, तओ वंदिण्ण सूरिं
चिंतिउमाढत्तो-अहो एयस्स भुवणच्छरियभूयं रुवं विमुक्कामयवुट्ठी दिट्ठी सजलघणघोससुंदरो सरो नीसेसपसत्थल-
कखणजुत्तं गत्तं पाणिगणकयरई भारई, तहा—

तमनिग्गहिओ चंदो तवंमि मंदा रुई दिणयरस्स । गिरिविहियाभिभवो सायरोऽवि को हुज्ज एयसमो ? ॥ १ ॥
तं नत्थि जं न जाणइ भूयं भव्वं भविस्समवि वत्थुं । ता होइ पुच्छणिज्जो नियदइयापुत्तवुत्तंतं ॥ २ ॥
इय निच्छिऊण उवविट्ठो उचियासणे राया, गुरुणावि पारद्धा धम्मकहा, पुणरवि पडिबुद्धा पभूयपाणिणो,
राइणावि पत्थावमुवलब्भ पुच्छिओ सूरि-भयवं! निच्छियं मए, जहा-तं नत्थि जं न जाणह तुब्भे, ता काऊणाणुकंपं
साहह कइया भारियाए सुएहि य सह मम समागमो भविस्सइत्ति, गुरुणा भणियं-महाराय ! धम्मज्जमेण तदंतरा-
इयकम्मक्खओवसमो जया होहिइ, राइणा भणियं-भयवं! जाणामि एयं, केवलं दुस्सहविओगविहुरो न सक्केमि
धम्मज्जमं काउं, चित्तनिरोहसव्वपेक्खो हि धम्मलक्खो कहमम्हारिसेहिं साहिउं तीरइ?, ता सव्वहा कुण्ह पसायं,
निवेयह अवरमुवायंति, गुरुणा भणियं-जइ एवं ता पज्जुवासेसु पइदिणं मुणिजणं, एयं खु परमोवाओ वंछियकज्ज-

सामन्तभ-
द्रदेशना.

॥ १०२ ॥

सिद्धीए, जओ-विहडइ निविडकम्मनिगडंपि हु भिंदइ दुग्गइं, लहु कल्लाणवल्लिमुल्लासइ नासइ दुक्खसंगइं ।

वंछइ लच्छि पास परिसप्पणु दप्पणु जिम पभासए, सुणिजणसंगमेवि किं किं जणु जं नवि सोक्खु पासए ? ॥१॥

तओ रोगिणव वेज्जोवइटोसहं पंथपरिभट्टेण व सुमग्गदेसणं तण्हाभिभूएण व विमलसलिलपडिपुण्णमहास-
रोवरनिवेयणं राइणा संममब्भुवगयमिमं गुरुवयणं, गओ य पणमिऊण सट्ठाणं ।

इओ य ते दोवि तस्स सुया नदीए कूलंमि निलीणा तण्हाल्लुहाभिभूया जाव खणंतरं चिट्ठंति ताव एगो गोउलिओ
दहिमहियाणि णयरे विक्किणिऊण समागओ तत्थ पाएसे, पेच्छइ देवकुमारनिविसेसरूवे करुणसरं रुयमाणे ते दोऽवि
दारगे, तओ पुच्छिया तेण—रे पुत्तगा ! कीस रोयह ?, केण तुम्हे एत्थ ठविया ? को वा तुम्ह एत्थ सयणजणोत्ति ?
जेट्टेण साहिओ सबो पुव्ववुत्तंतो, अह अणाहत्ति परिकलिरुण तेण जहासंनिहियअसणपाणदाणेणमहिनंदिऊण तेहिं
तेहिं पयरोहिं उवल्लोभिऊण य नीया ते नियगोउलंमि, समप्पिया य गोउलाहिवस्स, तेणावि पुत्तविरहियाए समप्पिया
नियदइयाए, सावि उदरुम्भवे इव परिपालेइ सव्वजत्तेण, उवयरइ खंडखज्जाइपमुहविसिद्धवत्थुप्पयाणेण अणवरयं,
सोऽवि गोउलाहिवई किल जयवद्धणनयराहिवस्स संबद्धोत्ति अन्नया कयाइ तेहिं दोहिवि पुत्तेहिं समेओ महामुल्लं
पाहुडमादाय नरविक्रमनरिंदंसणत्थं समागओ जयवद्धणनयरं, दिट्ठो य नरवई, पणमिओ सव्वायरेणं, समप्पियं पाहुडं,
दिट्ठो राइणा सहत्थेण तंबोलो, पुट्ठो य सयलसुत्थासुत्थवत्ताओ, एत्थंतरे निवडिया दोसु तेसु पुत्तेसु राइणो दिट्ठी,

श्रीगुणचंद
महावीरच०
४ प्रस्तावः

॥ १०३ ॥

जाओ गाढं पमोओ, परिभाविं च जहा धुवं एए वव लणयत्ति, तहावि पुच्छाभि एयं—को पुण एत्थ वइयरोत्ति
परिभाविय पुट्ठो गोउलाहिर्वई, कस्स भो एए पुत्तगत्ति?, तेण भणियं—देव! नम संबंधिणो, गेहिणीए आवालका-
लाओ उ वड्डियत्ति, राइणा भणियं—संमं साहेसु, जायसंखोभेण तेण सिट्ठो नईकूलाओ आरब्भ सयलो वुत्तंतो, एयमाय-
न्निऊण राइणा परमहरिसपगरिसमुव्वहंतेण ते दोऽवि दारगा गाढमालिंगिय उच्छंये निवेसिया, गोउलनायगेण भणियं—
देव! पुरावि मए विविहचेट्ठाहिं नाया एए जहा कस्सइ सामंतस्स वा सेणावइस्स वा नरवइस्स वा मग्गे गच्छंतस्स
केणावि विसमपओगेण पन्मट्ठा होहिति, कहमन्नहा एएसिं पइदिणंपि मट्टियाघडियदोघट्टघडभेडणेण य कित्तिम-
तुरयघट्टपयट्टणेण य संपिंडियसरिंडयपरिकप्पियसंदणवाहणेण य वुद्धिपइट्टियकट्टलट्टिखगुव्वहणेण य चाउरंगसेणा-
संमहुदामसंगामपरिकप्पणेण य डिंभाण गामागरनगरपसायदाणेण य विविहा कीला अहेसि?, न य एवंविहा चेट्ठा
पागयसुयाण होइ, तहा सव्ववेलासु मम तुम्ह दंसणत्थमंतस्स एयाणवि नरिंदभवनदंसणकए गाढनिव्वंधो आसि,
केवलमहं वावत्तिऊण विसिद्धवत्थदाणेण दिट्ठिवंचणेण य पुरा एंतो, इण्हि पुण गाढनिव्वंधं काऊण मम खणंपि पुट्ठिं
अमुंचमाणा समागयत्ति, अहो महाणुभावेण कहं ममोवयरियंति चिंतंतेण रत्ता परमपमोयभरनिव्वभरंगेण दिव्वं तस्स
तं चेव गोउलं गामसयं च आचंदकालियं सासणनिव्वद्धं भुत्तीए, पभूयवत्थतंवोलाइणा य पूइऊण पेसिओ सट्ठाणंति।
सयंपि पुत्तजुयलपरियरिओ गओ सूरिसमीवं, वंदित्ता परमायरेंण निवेइओ पुत्तसमागमवुत्तंतो, सूरिणा भणियं—महा-

पुत्रयुगल-
समागमः।

॥ १०३ ॥

राय ! सुमरिसि पुन्वभणियं अम्ह वयणं ? राइणा भणियं—भयवं ! नियनामंपिव सुमरामि, सूरिणा भणियं—महाभाग ! केत्तियमेत्तमेयं ?, गुरुजणपज्जुवासणेण तं नत्थि जं न सिज्झइत्ति, रत्ता भणियं—अवितहमेयं, किं पच्चक्खेवि अणुववन्नं भणिज्जइ ?, पसीयसु इयाणिं एकेण दइयवियोगदुक्खवोच्छेयणेणं, गुरुणा भणियं—मा ऊसुगो होसु, एवन्ति पडिव-ज्जिय पणमिऊण य सन्वायरेण गओ राया सट्ठाणं ।

इओ य सो देहिलो नावावणिओ अणुकूलपवणपणोलिज्जमाणसियवडवसवेगपयट्टियजाणवत्तो गंतुं पवत्तो ससु-इंमि, सीलमईवि तहाविहं अदिट्ठपुव्वं दइयरं अवलोइऊण हा पिय ! पाणनाह ! किमेवंविहं वसणं विसममावडियंति जंपिऊण य अकंडनियडियवज्जदंडताडियव्व मुच्छानिमीलियच्छी परसुल्लिन्नव्व चंपगलया निवडिया जाणवत्तभूमितले, समासासिया पासवत्तिणा परियणेण सिसिरोवयारेहिं, खणंतरेण लद्धचेयणा गाढसुयपिययमवियोगवसविसंडुला गलंतनयणजलप्पवाहा विलविउमेवं पवत्ता—

हा भुवणपयडपोरिस ताय ! सजीयस्स संनिहं दट्ठुं । किमुवेहसि अइदुहियं नियदुहियं संपयं एयं ? ॥ १ ॥

नरसिंहनराहिव ! नियवहुंपि किमुवेहसे अणज्जेण । एवंपि हीरमाणिं ? हा हा विपरंसुहो दइवो ॥ २ ॥

हा पाणनाह ! हा गोत्तदेवया हा समत्थदिसिनाहा । रक्खह रक्खह एयं हीरंती पावमिच्छेणं ॥ ३ ॥

एवमाईणि करुणाइं जंपंती सा संभासिया नावावणिएण—भदे ! कीस एवं विलवसि ?, धीरा भव, नाहं सुमि-

श्रीगुणचंद
महावीरच०
४ प्रस्तावः
॥ १०४ ॥

णेवि तुह पडिकूलकारी, जओ एसा समुद्धरा रिद्धी तुहायत्ता, एसोऽहं दासनिन्विसेसो, ता पडिवज्जसु सामिणीसहं, वावारेसु नियवुद्धीए गेहकज्जेसु एयं परियणंति, सीलमईए भणियं—

अवसर दिट्ठिपहाओ निट्ठुर! पाविट्ठ! धिट्ठ! दुचेट्ठ! । अहवा सासनिरोहेण जीवियं लहु चइस्सामि ॥ १ ॥

रे रे खत्तियकुलसंभवंपि णाजम्मसुद्धसीलंपि । मं एवमुल्लवंतो नियजीयस्सवि न लज्जेसि? ॥ २ ॥

किंच-खिज्जउ देहं निहरउ जीवियं पडउ दुक्खरिंछोली । नियतायदिन्ननामत्थविहडणं नेव काहामि ॥ ३ ॥

इय तीए निच्छयमुवलम्भ निवारियं तेण भत्तपाणं, छुहापिवासाभिभूयाएवि न परिचत्तो तीए नियनिच्छओ, एत्थंतरे तीए विमुद्धसीलपरिपालणतुट्ठाए सण्णिहियसमुद्देवयाए खित्तं महावत्ते तस्स जाणवत्तं, कओ जुगंतसम-यदारुणो समीरणो, समुल्लासिया कुलसिहरविग्गमा जलकल्लोला, विउवियाइं गयणे घोरायाराइं गंधवनयराइं, दंसिया गहिरगज्जिरवभीसणा फुरंतफारविज्जुपुंजपिंजरा जलहरा, तओ वाउलीहूओ कन्नधारो, जाया विहत्था सुहडसत्था, ठिया विमणदुम्मणा अवल्लावाहगजणा, बाढं वाउलीभूओ नावावणिओ, एत्थंतरे गयणट्ठियाए जंपियं देवीए—

रे रे जइ दुट्ठवणियतणय! णयचिरहिय हियकाम कामगइह दहणसारिच्छ रिंछोव तुच्छपेच्छय छयलगलथणसमाण माणवजणगरहणिज्जसील! सीलमइं धरिसिहसि एवं ता पाव! पावेसि इयाणिं विणासंति सोच्चा पंडुरपडपाउ-

समुद्रे शी-
लवत्याः
शीलं.

॥ १०४ ॥

रणो कयपूयावित्थरो विणयपणओ करकलियध्रुवदहणो सो विन्नविउं समाढत्तो-देवि! ममेकं दोसं दासस्स व
 खमसु परिहरसु कोयं न पुणो काहामीमं, पणए न परंमुहा देवा, ताहे भणियं देवीए-रे तुमं जइ सुहेण पालि-
 हिसि नियजणणिनिविसेसं एयं ता जीवसि हयास!, तेण तहत्ति सबं पडिवन्नं गाढभयवसट्ठेण, उवसंहरियं देवीए
 डमरं अहंसणं च गया। अह जाओ अणुकूलो पवणो, मग्गेण लगं जाणवत्तं, हरिसिया कन्नधाराइणो जणा, परि-
 तुट्ठो सो वणिओ, पडिओ सवायरेण चलणेसु सीलमईए, खामिया नियदुच्चरियं, भणिया य सा-सुयणु! मा काहिसि
 सबहा सोगं, अचिरेण तहा काहामि जहा मिलसि नियपिययमस्स, काराविया य पाणवित्तिं, समप्पिया निरुवद्व-
 निवासनिमित्तमेक्का उव्वरिगा, तओ पइदिणं मायरं व भयणिं व देवयं व गुरुं व सामिं व वत्थेण य भोयणेण य भेसहेण
 य तंबोलेण य संमं पडियरमाणो पत्तो परतीरं, विक्किणियाइं निययभंडाइं पाविओ भूरिअत्थसंचओ निवत्तियासे-
 सकज्जो वलिओ सनयराभिमुहं, अंतरे आगच्छंतस्स अणुकूलपवणपणोल्लियं लगं जयवद्धणनयरपरिसरंमि बोहित्थं,
 तओ विमुक्का नंगरा पाडिओ सियवडो उत्तरिओ बहुकिंकरनरपरियरिओ सो वाणिओ, गओ विचित्ताइं महरिहाइं
 परतीरभवाइं पाहुडाइं गहाय नरविक्रमनराहिवस्स दंसणत्थं, पडिहारनिवेइओ य पविट्ठो रायभवणं, दिट्ठो राया, सम-
 प्पियाइं पाहुडाइं, कओ राइणा सम्माणो, तओ समुहलंघणवइयरनिवेयणेण परतीरनयररायसरूववत्ताकहणेण नियक-
 याणगगुणदोसपडणेण य ठिओ नरवइस्स समीवे पहरमेकं, एत्थंतरे पणमिऊण विन्नत्तं तेण-देव! सुन्नं पवहणं समागच्छइ

श्रीगुणचंद
महावीरच०
४ प्रस्तावः

॥ १०५ ॥

रयणी ता अणुजाणह ममं गमणायत्ति, राइणावि पिययमाविओगविहुरेण एस चेव अज्ज दीहरनिसाए विणोयकारी
हवउत्ति परिचिंतयंतेण भणिओ सो-भइ! वीसत्थो इहेव चिट्ठसु, नियपहाणपुरिसेहिं रक्खावइस्सामि तुह जाण-
वत्तं, जं देवो आणवेइत्ति भणिऊण पडिवन्नं तेण, विसज्जिया य राइणा नियपहाणपुरिसा पवहणरक्खणत्थं, एत्थंतरे
उट्ठिया दोवि कुमारा, विन्नत्तं च तेहिं, जहा-ताय! अदिट्ठपुवं अम्ह पवहणं, गाढं च कोउयं तहंसणे, ता अणु-
जाणउ ताओ जेण गच्छामोत्ति, तन्निच्छयमुवलम्भ अणुन्नाया य नरिंदेण, गया य अंगरक्खनरपरिक्खत्ता ते जाण-
वत्ते, तं च इओ तओ निरिक्खऊण पसुत्ता तत्थेव । अह पच्छिमरयणिसमए पडिबुद्धा परोप्परं वत्ता काउमारद्धा,
खणंतरेण लहुएण भाउणा पुट्ठो जेट्ठो भाया-अहो भाय! कहसु किंपि अपुवं अक्खाणयं, इह ट्ठियाण न श्लिज्जइ
कहमवि विभावरी, जेट्ठभाउणा भणियं-भइ! किमन्नेण अक्खाणयसवणेण?, एयं चिय अप्पणोतणयं अक्खाण-
यमपुवं निसुणेहि, तेण जंपियं-एयमवि साहेहि, तओ

करकलियकुसुममाला जह जणणी रायमग्गमणुपत्ता । जह वलिया नो पुणरवि जह नयरे मग्गिया बहुसो ॥ १ ॥

जह ताओवि दुहत्तो अम्हेहिं समं गओ नईकूले । जह परतीरनिरुवणकएण सलिलंमि ओगाढो ॥ २ ॥

जह सरियनीरपूरप्पवाहिओ दूरदेसमणुपत्तो । जह अम्हे गोउलिण गोउलं पाविया विवसा ॥ ३ ॥

जह वुहिं संपत्ता रायउले जह गया तओ अम्हे । रायावलोयणत्थं जह विन्नाया य ताएणं ॥ ४ ॥

देहिलव-
णिजो जय-
न्त्यामाग-
मने.

॥ १०५ ॥

जह वा महल्लकोऊहलेण एत्थागया तहा सव्वं । अक्खाणयमप्पणगं उवइट्ठं लहुगभाउस्स ॥ ५ ॥

एयं च कहिज्जमाणमामूलाओ निसुणियं समग्गमवि समीवदेससंठियाए सीलमईए, तओ अपुवं अणाइक्खणिज्जं केवलमणुभवगम्मं नियसुयसाहियवइयरपरिन्नायसमुत्थहरिसपगरिसमुव्वहंती समुच्चरोमंचुच्चाइयकंचुया सुयसिणेहव- सपगलंतथणमुहसुद्धदुद्धधारा एह चिरकालपत्तगा पुत्तगा ! नियजणणिं गाढमालिंगहत्ति भणंती गया तेसिं पच्चा- सन्नं, निवेइओ पुच्चवित्तंतो, विन्नाया जेट्ठपुत्तेण, तओ गाढं कंठमवलंबिय चिरविरहदुहावेगसूयगविसंतुलवयणगच्चं निब्भरं सपुत्तावि रोविउं पवत्ता, विन्नायपरमत्थेण मुहुत्तमेत्तं विलंबिय समासासिया कुमारपरियणेण, अह उग्ग- यंमि दिणयरे परियणमज्झाओ एगेण पुरिसेण तुरियं गंतूण भणिओ नरविक्रमो—देव ! तुम्ह दइया कुमारेहिं एयस्स चेव नावावाणियस्स जाणवत्ते पत्तत्ति, तओ हरिसभरनिब्भरहियएण सविह्वयं पुच्छिओ राइणा एसो—भइ ! को एस वुत्तंतोत्ति ?, तेणवि संजायभएण भणियं—देव ! वियरसु मे अभयदाणेणप्पसायं जेण जहा वित्तं निवेएमि, पडिवन्नं नरिदेण, तओ पढमाणुरागाओ आरब्भ जाणवत्तारोवणकंदणोवलोभणदेवयाभेसणप्पमुहो साहिओ नीसेसो वुत्तंतो, एयमायन्निऊण य नरवइणा समग्गधणजाणवत्तसहिओ निव्विसओ आणत्तो सो वाणियगो, सीलमईवि देवी करेणुगाखंधगया धरियसियछत्ता चामरेहिं वीइज्जमाणी पएपए पडिच्छंती नयरजणकयं पूयासकारं ठाणे ठाणे वियर- माणा दीणाणाहाण कणगदाणं पवेसिया परमविभूईए निययमंदिरं, काराविओ पुरे अट्ठदिवसिओ मइसवो, अह

श्रीगुणचंद
महावीरच०
४ प्रस्तावः
॥ १०६ ॥

णहवियविलित्ताए नियंसियामलमहग्घवत्थाए सुयजुयलपरिखुडाए पमोयभरनिभरंगीए सीलमईए पुरओ पुवणु-
भूयं कहं कहंतेण तीसे य हरणपसुहं वित्तंतं निसुणमाणेण रण्णा मालागारस्स तस्स पाडलयनामधेयस्स सच्चरिय-
मणुवयारं तहाविहं सुमरियं झत्ति, तो भणिया सीलमई-पिए ! पियाविहु न एरिसो होइ जारिसओ स महप्पा
मालागारो सिणेहपरो, भणियं सीलमईए-सच्चमिणं नाह !, ता कुण पसायं सुसमिद्धिवियरणेणं महाणुभावस्स
तस्स तुमं, फलमेयं चिय लच्छीए नाह ! संझभरागचवलाए जं पूरिज्जंति मणोरहाओ उवयारिलोगस्स ।

इय सोच्चा से वयणं रण्णा संदणपुराउ सो सिग्घं । आणाविऊण ठविओ चोडयविसए महाराओ ॥ १ ॥

दिन्नो से भंडारो समप्पिया करितुरंगरहजोहा । किं बहुणा ? अत्तसमो सोऽवि कओ तेण नरवइणा ॥ २ ॥

अन्नदिवसे य भज्जासुयसमेओ नरविक्रमो महया रिद्धिसमुदएणं गओ उज्जाणे, दिट्ठो सूरी, सवायरेण पणमिऊण
पसाहिओ समीहियसंपत्तिवइयो, गुरुणा भणियं-महाराय ! एरिसकल्लाणवल्लिनिबंधणाणि मुणिजणचरणसेवणाणि,
राइणा चित्तियं-अहो अमोहं गुरुवयणं, अहो जिणधम्मस्स माहप्पं, सब्बा धन्नोऽहं जस्स मे एवंविहेण मुणि-
णाहेण समं संगमो जाओ, एवं च चित्तयंतेण रत्ता उवज्जियं सुगइकप्पतरुस्स सम्मत्तस्स वीयंति, गुरुणा भणियं-
महाराय ! पडिवज्जसु निच्छइयं संपइ जिणधम्मं, राइणा भणियं-भयवं ! दढमप्पमत्तुत्तमसत्तजणजोग्गो जिणधम्मो,
कहमम्हारिसजणा सकंति अणुपालिउं ? , गुरुणा नायं-अज्जवि निट्ठुरो मोहगंठी दढनिबंधणा मिच्छत्तवासणा

प्रियासमा-
गमः यथा-
भद्रकता च

॥ १०६ ॥

तिवाणुबंधो विसयपडिबंधो सवणमेत्ता विसेसधम्मवत्ता, तम्हा जहाभद्गत्तमेव एयस्स इण्हिमुचियंति चिंतिऊण
वुत्तो सो—महाराय ! जइ एवं ता पज्जुवासेज्ज सुसाहुणो पसंसेज्जसु जिणधम्मं अणुमोएज्जसु तप्पडिवन्ने भवजणे,
एत्तियमेत्तेणवि होही दढकम्मविगमो, एवंति पडिवज्जिऊण गओ राया सट्ठाणंमि ।

निप्पच्चवायमउले भोगे भुंजेति पंचरूवेवि । सवत्थ जायकित्ती नरविक्रमनरवई ताहे ॥ १ ॥

सूरीवि धम्ममग्गे आरोविय भूरि भवपाणिगणे । सीसगणसंपरिवुडो नयराउ विहरिओ बाहिं ॥ २ ॥

पडिबोहेंतो सूरुव भवकमलाइं वयणकिरणेहिं । कालकमेण पत्तो जयंतिनयरिं विहारेण ॥ ३ ॥

उग्गहमणुजाणाविय नयरीए बाहिं चंपगुज्जाणे । सद्धम्मकम्मउज्जुयजइजणसहिओ ठिओ भयवं ॥ ४ ॥

जाया पुरे पसिद्धी सिद्धंतविसारओ जहा सूरी । इह आगउत्ति ताहे वंदणवडियाए नयरिजणो ॥ ५ ॥

अंतेउरेण सहिओ हरिकरिरइजोहवूहपरिकिण्णो । नरसिंहभूमिनाहोवि आगओ सूरिपासंमि ॥ ६ ॥

सायरमह विणमंतुत्तिमंगमणिमउडलीढपयपीढं । पणमिय मुणिजणसहियं गुरुमुवविट्ठो धरणिवट्ठे ॥ ७ ॥

संसारासारयागन्भा, तओ सद्धम्मदेसणा । गुरुणा काउमाढत्ता, मोहविद्धंसकारिणी ॥ ८ ॥

जहा—वलयासिंधुनिम्मग्गवडवीयं व दुल्लहं । को माणुसत्तं संपप्प, पमाएज्ज वियक्खणो ? ॥ ९ ॥

खणोऽवि नाउकम्मस्स, जाइ जेणाविणस्सरो । तेणेस मुच्छिओ लोओ, निरुविग्गो कहं भवे ? ॥ १० ॥

श्रीगुणचंद
महावीरच०
४ प्रस्तावः

॥ १०७ ॥

भवेज्ज कोऽवि किं धीमं, निहाकरणलालसो । मंदिरे हववाहुग्गजालामालापलीचिए ? ॥ ११ ॥
 विएसे सुहगम्मेवि, सप्पाहेओ पयट्टइ । दुग्गेऽणंते भवट्ठाणे, जे न किंपि समीहए ॥ १२ ॥
 हए से नियबुद्धीए, ठाणे ठाणे विसीयइ । अन्ने सोक्खे न पावेइ, सिद्धिसद्धम्मसंवले ॥ १३ ॥
 वलेण तेण किं कज्जं ?, किं वा तेण धणेणवि ? । न जं सद्धम्ममग्गस्स, उवयारे निजुज्जइ ? ॥ १४ ॥
 जएज्ज सव्वहा धम्मे, पमायपरिहारओ । जीवघायनिवित्तिमि, पवित्तिमि सुहेसु य ॥ १५ ॥
 सुयाइमोहसंवद्धा, पावं कुब्बंति पाणिणो । तेण पावेण संतत्ता, निवडंति अहो गइं ॥ १६ ॥
 गइंदा इव वज्झंति, जोणिलक्खेसु णेगसो । किं किं दुक्खं न पेक्खंति, ते तिक्खमवियक्खणा ? ॥ १७ ॥
 तम्हा एवं नाउं जइधम्मं सव्वहा समायरह । एसो खु तिव्वदुहजलणसमणघणवरिसणसमो जं ॥ १८ ॥
 सग्गापवग्गमंदिररोहणनिस्सेणिदंडसारिच्चो । कम्ममुच्चडविडविहिहाडणेक्कधारुक्कडकुहाडो ॥ १९ ॥
 अचिरेण दिन्ननिस्सेससारनिस्सेयसो सुहत्थीहिं । अणुसरियवो सम्मं सुसत्तिजुत्तेहिं सत्तेहिं ॥ २० ॥
 रत्ता भणियं भयवं ! जं तुब्भे वयह तं पवज्जामि । जाव नियरज्जभारप्पणेण सुत्थं करेमि जणं ॥ २१ ॥
 गुरुणा भणियं जुत्तं एयं तुम्हं भवेक्कभीयाणं । निच्चिगं कुणह लहुं चयह पमायं पयत्तेण ॥ २२ ॥
 अह गुरुं पणमिऊण गओ राया सभवणं कयमणंतरकरणिज्जं आइया मंतिणो कहिओ निययाभिप्पाओ अवगओ

सुरेरागमनं
देशना च.

॥ १०७ ॥

मंतीहिं, एत्थंतरे समागया कुमारचारोवलंभनिमित्तं पुवपेसिया गूढपुरिसा, पणमिओ तेहिं राया, निवेइओ नयरनि-
 गमाओ आरब्भ जयवद्धणपुररज्जलाभपज्जंतो सवो कुमारवुत्तंतो, तुट्ठो राया, दिन्नं च चित्तियाइरित्तं तेसिं वित्तं, पेसिया
 य कुमाराणयणनिमित्तं बुद्धिसागरपमुहा मंतिणो, अणवरयप्पयाणएहिं पत्ता य ते जयवद्धणपुरं, नरविक्रमोवि नाऊण
 तेसिमागमणं सपरियणो निग्गओ अभिमुहो, पवेसिया वडुविच्छडेणं, कया जणगनिच्चिसेसा पडिवत्ती, पुट्ठा य उचि-
 यसमए आगमणप्पओजणं, निवेइयं तेहिं जहा-पव्वज्जापडिवज्जणाभिलासो राया, तुमंमि नियरज्जभरारोवणमणोरहो
 य देवस्स, अओ तुम्हाणयणनिमित्तं पेसियम्हि, इमं सोच्चा तक्खणमेव तत्थ रज्जे जेट्टपुत्तं ठविऊण समग्गनियखंधा-
 वारसमेओ चलिओ नरविक्रमो समं मंतीहिं, कालक्कमेण पत्तो जयंतिनयरिपरिसरं, विन्नायतदागमणो दूरं संमुहमागओ
 नरसिंहनरवई समं चंपगमालाए देवीए, तओ दूराओ चेव नरविक्रमो जणगमागच्छंतं पेच्छिऊण हरिसुप्फुल्लोयणो
 उयरिऊण करिवराओ मंतिजणसमेओ गंतूण निवडिओ चलणेसु जणयस्स जणणीए य, तेहिवि चिरदंसणुप्पन्नाणं-
 दसंदिरच्छेहिं गाढमालिंगिऊण निवेसिओ नियउच्छंगे, पुट्ठो य सरीरारोग्गयं, खणंतरे य पविट्ठाइं नियमंदिरं,
 पत्थावे पुट्ठो नरवइणा नरविक्रमो पुरीगमणकालाओ आरब्भ पुव्ववइयरं, साहिओ नरविक्रमेण समत्थोऽवि, एवं
 च चिरकालदंसणसमुब्भवसुहसंदोहमणुहवंताण गया कइवि वासरा, अन्नदियहे य भणिओ राइणा नरविक्रमो-पुत्त !
 पुव्वपुरिसपवित्तियवत्तिणीपरिपालणेण उस्सिखलजणताडणेण य एत्तियं कालं जाव मए पालियं रज्जं, इयार्णि पुण

श्रीगुणचंद
महावीरच०
४ प्रस्तावः

॥ १०८ ॥

ममाहिंतो सरीरवलेण य पुन्नपगारेसेण य विक्रमेण य समत्थो तुमं ता अंगीकरेसु रज्जमहाभरं, परिवालेसु पुव्वप-
वाहेण जणवयं, अहं पुण पुव्वपुरिसायरियं धम्ममग्गं अणुचरिस्सामि, कुमारेण भणियं-ताय ! विरमह इमाओ
अज्झवसायाओ, तुम्ह दंसणुस्सुओ चिरकालेण अहमिहमागओ, नवि य अज्जवि एस पत्थाओ पत्थुवत्थुस्स, निव-
सह ताव सगेहे च्चिय कइवय वरिसाई, राइणा भणियं-वच्छ ! किं न पेच्छसि जायविमलपलियसंगमुत्तिमंगं ?, न
वा निरुवेसि विसंठुलसयलट्ठिं सरीरलट्ठिं ?, न निरिक्खसि थेवपयासेवि चलंतिं दंतपंतिं ?, न विभावेसि वत्थुवि-
लोयणावलियं लोयणजुयलं ?, न कलयसि वलिपडलसंतयं सरीरत्तयं ?, न वा मुणसि समत्थकज्जासाहणजायसंदेहं
देहं ?, एवं च पच्छिमदिसावलंवि बिंबं व रविणो रयणीविराममलिणं मंडलं व ससिणो गाढजरत्तणपत्तं पत्तं व तरुणो
जायसूरत्थमणसंभावणं वणं व कमलाण पच्चमट्टलट्ठपुव्वसोहं अप्पाणप्पाणमवल्लोइऊण कहं खणमवि गेहे वसामि ?,
ता मुयसु पडिबंधं पडिवज्जसु मम वयणं भवसु धम्मसहाओ, तओ तायनिच्छयमुवल्लभ नरविक्रमो अणणुभूयपुव्व-
दुक्खकंतो वज्जताडिओ इव लेप्पघडिओ इव पत्थरुक्कीरिओ इव चित्तलिहिओ इव खणं ठाऊण वाढं रोविउं पवत्तो,
समासासिओ य रत्ता कोमलवयणेहिं, पडिवन्नो य तेण महाकट्ठेण रज्जाभिसेओ, समागए य पसत्थवासरे सव्वसा-
मग्गीए मंतिसामंतमित्तयप्पसुहमहाजणसमक्खं निवेसिओ नरविक्रमो निययसीहासणंमि, कओ अट्ठोत्तरकलस-
सएणं महाविभूर्इए रायाभिसेओ, पणमिओ य रत्ता मंडलाहिवपुरपहाणलोयपरियरिएण, भणिओ य सव्वायरेण

नरसिंह-
वैराग्यं नर-
विक्रमा-
भिषेकः।

॥ १०८ ॥

वच्छ ! जइवि नयविणयसच्चाइगुणगणमणिमहोयहो तुमं तहवि किंपि भणेज्जसि, एसा हि रायलच्छी अपडमंध-
 त्तणं जमज्जपाणं मयजणणं सूरससहरकरप्पसरासज्जमंधयारं, ता तहाकहंपि वट्टिज्जासि जहा न मइलिज्जइ ससहर-
 धवलं नियकुलं, जहा न खंडिज्जइ दूरप्परूढो पयावपायवो, जहा न पमिलायइ नीइकमलिणी, जहा न उरिंसखली-
 हवंति खला, जहा न विरचंति पयइणो, जहा करभरोहिं न पीडिज्जइ जणवउत्ति, एवं च वट्टमाणस्स पुत्त ! इहलोए
 इच्छिया होहिंति सयलवंछियत्थसिद्धीओ, किमंग पुण परलोएत्ति ?, एवं सिक्खविऊण नरसिंघनरवई पट्ठिओ समंत-
 भइसूरिसमीवंमि, तओ पउणाविया नरविक्रमनरवइणा सहस्सवाहिणी सिविगा से निक्खमणनिमित्तं, कयमज्जणो-
 वयारो सव्वालंकारविभूसिओ समारूढो तत्थ नरसिंहनरवई, उक्खित्ता पवराभरणविभूसियसरीरोहिं सुइनेवत्थेहिं
 पवरपुरिसेहिं सिविगा, तओ दिज्जंतेहिं महादाणेहिं वज्जंतेहिं चउव्विहाउज्जेहिं पढंतेहिं मागहसत्थेहिं गायंतेहिं
 गायणेहिं मंगलमुहरमुहीहिं नयरनारीहिं पणचिराहिं वारविलियाहिं महाविभूईए निग्गओ नयरीओ, पत्तो सूरि-
 सगासं, ओयरिऊण सिविगाओ तिपयाहिणपुव्वं पडिओ गुरुचलणेसु—

भालयलघडियकरसंपुडेण भणिओ गुरू तओ रण्णा । भयवं ! तायसु इण्ह जिणिंददिक्खापयाणेण ॥ १ ॥

पडिवन्नंमि य गुरुणा पुव्वुत्तरदिसिसमुज्झियाहरणो । एगनियंसियवत्थो पसंतवट्ठंतसुहलेसो ॥ २ ॥

सिद्धंतभणियजुत्तीए तत्थ सूरीहिं गाहिओ सम्मं । पव्वज्जं निरवज्जं कम्ममहासेलवज्जसमं ॥ ३ ॥

श्रीगुणचंद
महावीरच०
४ प्रस्तावः
॥ १०९ ॥

भणिओ य जहा भइय ! एसा संसारसिंधुनावव । तुमए गहिया दिक्खा ता सम्मं उज्जमिज्जासु ॥ ४ ॥
मा काहिसि खणमेकंपि पावमित्तेहिं दुहनिमित्तेहिं । संसर्गिं दुक्खेहिं विसयकसाएहिं सह भइ ! ॥ ५ ॥
एवं चंकमियवं भोत्तवं एवमेव सइयवं । एवं भासेयवं इच्चाइ निवेइयं गुरुणा ॥ ६ ॥
संमं संपडिबज्जिय छट्ठमस्वमणकरणस्त्रीणंगो । अप्पडिबद्विहारं विहरिय गामागराईसु ॥ ७ ॥
अहिगयजइधम्मविही विहियाणुट्ठाणनिच्चतल्लिच्छो । लच्छिच्च संजमं रक्खिऊण निम्महियकम्मंसो ॥ ८ ॥
सो मोक्खपयं पत्तो नरविक्रमनरवईवि तस्स सुओ । उवभुंजिय रज्जदुगं निययपए ठविय पुत्तं च ॥ ९ ॥
पावियसम्मत्तगुणो पज्जंते पालिऊण पव्वज्जं । कयदुक्करतवचरणो महिंदकप्पे सुरो जाओ ॥ १० ॥
इय नंदण ! नरपुंगव ! चरियं एएसिं पुरिससीहाण । तुज्झ मए परिकहियं जं तुमए पुच्छिअं आसि ॥ ११ ॥
सोऊण इमं तुममवि नरिंद ! धम्मे तहुज्जमं कुणसु । जह उत्तिमपुरिसाणं अचिरेण निदंसणं होसि ॥ १२ ॥
इमं च सोच्चा राया जायपन्वज्जापरिणामो गुरुं विन्नविउं पवत्तो-भयवं ! तुमं महातावतवियस्स व अमयधारा-
वरिसो छुहाभिभूयस्स व सुन्नखज्जगावणो दोगच्चचक्ककंतस्स व चिंतामणी दुरालोयंधधारगिरिगुहागयस्स व पयास-
दीवो नीरनिहिनिहित्तस्स व समासासदीवो वियडाडवीपडियस्स व पसत्थसत्थनाहो मह कहकहवि चक्खुगोयरं
गओ, ता इयार्णि परमपहु ! करुणाकुलभवण ! एयं पवाहओ अणाइयं अणवदग्गं अपरिच्छेयमिच्छाजलुप्पीलपडि-

श्रीसमन्त-
भद्रशिक्षा.

॥ १०९ ॥

हत्थं मोहमहावत्तदुत्तरिलं निरंतरुम्भवंतजम्भणमरणकलोलमालाउलं कसायकलुसपंकसंकुलं वियरंतविविहायंकनक-
 चक्काउलं वियारगोअरुत्तिण्णऽण्णाणतिमिरभरगुविलं पयइदुग्गेज्झमज्झं पयइभीसणं पयइविवागदारुणं पयइ-
 निग्गुणं पयइकिलेसायासाइदुक्खसंखोहकारणं रणं व कायरणं सव्वहा चित्तिज्जमाणमवि परमरोमुद्धोसजणगं भव-
 समुदं निरवज्जपव्वज्जाजाणवत्तेण सुवद्धेण नाणदंसणविहिसंछाइयल्लिहेणं संवरवज्जलेयेणं संममाविद्धेण तवपवणज-
 वेणं अणुलग्गेणं वेरग्गमग्गंमि अक्खोभेण विसुत्तियावीईहिं पडिपुण्णेण अणेगसीलंगरणसहस्सेहिं तुम्हेहिं कन्न-
 धारेहिं झत्ति समुत्तरिउं समीहामित्ति, सूरिणा भणियं—महाराय ! मा पडिवंधं करेहि, तओ नंदणनरिंदो पुत्तारो-
 वियरज्जभारो वार्हिं व मोत्तूण रायल्लिं विहगोव्व पंजराओ घरवासाओ निक्खंतो, जाओ य तिगुत्तिगुत्तो पंचसमि-
 इजुत्तो जियपरीसहो निहयपंचिदियपसरो समणो समियपावोत्ति । तओ कमेण अहिगयएक्कारसंगो कडाणं कम्माणं
 पुर्व्वि दुप्पडिक्कंताणं खवणत्थं मासंभासेण अणिकिस्सत्तेणं कायरदुरणुचरेणं घोरेणं तवोकम्मेणं अप्पाणं सोसितो
 अप्पडिबद्धविहारेणं विहरइ । तिथयरत्तलाभवीयभूयाइं वीसइ ठाणाइं सम्मं फासेइ य, कहं?—

सव्वजगजीववंधुरवंधवभूए जिणे जियकसाए । सिवपंथसत्थवाहे तत्थाहिं गिराहिं थुणमाणो ॥ १ ॥

ववगयजरमरणमए सिवमयलमणंतमक्खयं पत्ते । परमेसरे य सिद्धे समिद्धसोक्खे नमंसंतो ॥ २ ॥

सन्नाणचरणदंसणमहाभरुद्धरणपच्चलसहायं । चाउच्चन्नं संधं एक्के सरणंति मन्नंतो ॥ ३ ॥

श्रीगुणचंद,
महावीरच०
४ प्रस्तावः

॥ ११० ॥

करुणोयहिणो गुरुणो पंचविहायारधरणधीरस्स । अणुवकयज्जणाणुग्गहभावं सम्मं पसंसंतो ॥ ४ ॥
सद्धम्मसिद्धिलचित्ते सत्ते धम्मे धिरीकरेमाणे । परियायपमुहथेरे उववूहंतो य भयवंते ॥ ५ ॥
ससमयपरसमयपरूढगाढसंसयसहस्सनिम्महणे । सुस्सुसंतो निच्चं बहुस्सुए साहुणो पवरे ॥ ६ ॥
मासदुमासतिमासाइविविहतवकम्मकरणपडिबद्धे । विस्सामणाइणा तह तवस्सिणो पडिचरेमाणो ॥ ७ ॥
अंगाणंगसरूवे सुयंमि सव्वन्नुनिच्छियत्थंमि । अणवरयं गयचित्तो तयत्थपरिभावणुज्जुत्तो ॥ ८ ॥
तत्तत्थसद्दहाणप्पहाणसम्मत्तपवरवत्थुंमि । संकाइदोसजालं परिहरमाणो पयत्तेण ॥ ९ ॥
नाणाईणं उवयारपमुहविणयंमि बहुविगप्पंमि । अइयारपरंपरयं वज्जंतो निउणबुद्धीए ॥ १० ॥
पडिलेहणापमज्जणपमुहावस्सयविहीसु विविहासु । सद्धम्मवद्धलक्खो खलियं निच्चंमि रक्खंतो ॥ ११ ॥
सीले पिंडुग्गमपभिइदोसविरहा वणसु पंचसुवि । पाणवहाईएसु य विसोहयंतो य मालिन्नं ॥ १२ ॥
पइसमयं संवेगाइभावणाजालभावणुज्जुत्तो । ससरीरेऽविहु निच्चं ममत्तबुद्धिं अकुणमाणो ॥ १३ ॥
वज्जन्मभंतररूवं बारसभेयंमि घोरतवकम्मं । अनिगूहियनियसत्ती आयरमाणो य पइदिवसं ॥ १४ ॥
धम्मोवगारिसाहुण वत्थकंबलपमोक्खमुवगरणं । देंतो कोहाईणं निच्चं चायं कुणंतो य ॥ १५ ॥
आयरिओज्झायतवस्सिधेरसाहम्मियाण सेहाणं । कुलगणगिलाणसंघे वेयावच्चंमि वट्ठंतो ॥ १६ ॥

विंशतिस्था-
नकाराधनं.

॥ ११० ॥

एएसिंपि तहाविहआवयवसजायदुत्थचित्ताणं । ओसहदाणाईहिं समाहिभावं च जणमाणो ॥ १७ ॥

अक्खरपयगाहसिलोगमेत्तयं सवया अपुवसुयं । अहिगयसुत्तथोऽविहु सुयाणुरागेण पढमाणो ॥ १८ ॥

भत्तिं तह बहुमाणं तदिदुत्थाण सम्मभावणयं । विहिगहणं चिय निचं सुयस्स सम्मं पयासितो ॥ १९ ॥

भच्चाण धम्मकहणेण पइदिणं पवयणुन्नइं परमं । सियवायसाहणेण य कुणमाणो सुद्धचित्तेणं ॥ २० ॥

सो नंदणमुणिवसहो इय वीसइठाणगाइं फासित्ता । तित्थवरनामगोत्तं कम्मं वंधेइ परमप्पा ॥ २१ ॥

अह पमायपरिहारपरायणो एगं वाससयसहस्सं समणपरियागं पाउणित्ता पज्जंतसमए य सम्ममालोइयनिय-
दुच्चरियवग्गो समुच्चारियपंचमहव्वओ खामियसव्वसत्तसंताणो मासियसंलेहणासंलिहियसरीरो पंचनमोकारपरायणो
मरिऊण समाहीए समुप्पन्नो पाणयकप्पे पुप्फुत्तरवडिंसए विमाणे देवोत्ति ॥

ताहे सो सरभसभाविरेण नियपरियणेण परियरिओ । विलसइ तत्थ विमाणे अयराइं वीसइं जाव ॥ १ ॥

आउयकम्मविगमे य तत्तो चविऊण इहेव जंबुदीवे दीवे भारहे खेत्ते माहणकुंडग्गामे सन्निवेसे सयलवेयविज्जावियक्ख-
णस्स उसभदत्तस्स माहणस्स देवाणंदाए भारियाए गम्भे सो नंदणदेवजीवो मिरियभवकयकुलप्पसंसणदोससमुवज्जि-
यनीयगोयकम्मसामत्थेणं आसाढसुद्धलट्ठीए हत्थुत्तरे नक्खत्ते पाउम्भूओ पुत्तत्तणेणंति, दिट्ठा य तीए रयणीए सुहप-
सुत्ताए गयवसहाइणो चउइस महासुमिणा, तओ अदिट्ठपुव्वतहाविहसुविणोवलंभजायहरिसा गया उसहदत्तस्स

श्रीगुणचंद
महावीरच०
४ प्रस्तावः
॥ १११ ॥

माहणस्स सगासे, सिट्ठा चउद्दसवि सुमिणा, उमहदत्तेणवि ते सम्ममणुच्चित्तिऊण भणियं—

तुब्झ पिण्णं धणलाभो पंचविहविसिट्ठभोगलाभो य । होही नीरोगत्तं नूणं एयाणुभावेण ॥ १ ॥

रिउजउसामाधव्वणचउवेयधियक्खणं जणपसिद्धं । जणिहिसि पुत्तं च तुमं समहिगनवमासपज्जंते ॥ २ ॥

इय सा निसामिऊणं पहिट्ठचित्ता विमुक्ककुविगप्पा । निययावासमुवगया सम्मं गव्वं समुव्वहइ ॥ ३ ॥

जह्विसं चिय चिंतामणिव्व गव्वे जिणो समोइत्तो । करितुरगरयणनिवहो तह्विसं चिय न माइ गिहे ॥ ४ ॥

अणवरयहोमकरणुच्छलंतधूमोलिसामलं गयणं । उन्नयमेहासंकं कुणइ अकालेऽवि हंसाणं ॥ ५ ॥

अह भयवओ गव्वभगवस्स विइकंतेसु वायासीदिवसेसु वट्ठंते य तियासीतमदिणंमि सोहम्मकप्पवासी देविंदो सोहम्माए सभाए निसत्तो वत्तीसाए चिमाणसयसहस्साणं चउरासीए सामाणियसाहस्सीणं तायत्तीसाए तायत्तीसाणं चउण्हं लोगपालाणं अट्ठण्हं अगमहिसीणं तिण्हं परिसाणं सत्तण्हं अणियाणं सत्तण्हं अणियाहिवईणं चउण्हं चउरासीणं आयरक्खदेवसाहस्सीणं अत्तेसिंपि देवाणं देवीण य सामित्तमणुपालेमाणो इमं च जंबुदीवं दीवं विउलेणं अक्खलिय-पसरेण ओहिनाणेण करकमलनिलीणमुत्ताहलं व अवलोएमाणो भयवंतं चरिमतित्थयरं माहणपणइणीकुच्छीगयं पेच्छइ, तओ आणंदवियसियनयणकमलो हरिसवससगुच्छलियरोमंचं चियसरीरो संभमसट्ठाणचलियकडगतुडियके-ऊरकिरीडकुंडलाइमूसणो तक्खणविमुक्कसीहासणो पायपीढाओ पच्चोरुहइ, वेरुलियवरिट्ठरिट्ठरत्तरयणखंडमंडियाओ

देवानन्दा
मय्याः

॥ १११ ॥

पाउयाओ विमुंचइ, एगसाडियं उत्तरासंगं करेइ. निडालतडघडियकरसंपुडो सत्तट्ट पयाइं तित्थयरामिमुहं अणुगच्छइ,
तओ वामजाणुं अंचित्ता दाहिणजाणुं धरणियले निहट्टु तिकखुत्तो मुद्धाणं धरणियले निवाडेइ. नहा मत्थए अंजलिं
काऊण मुचिरं पराए भत्तोए संथुणइ. कहं?—

तुम्ह नमो जिण ! निहयारिवग्ग ! भयवंत णाह ! आइगर ! तित्थयर सयं चिय जायवोध ! पुरिसोत्तम ! पसिद्ध ! ॥ १ ॥

भवभीममहाडविपडियपाणिगणसत्थवाह गयवाह । सिव मयलमणंतसुहं संपावियकाम गयकाम ! ॥ २ ॥

परमेसर तत्थ गओवि ताय अक्खलियनाणनयणेण । एत्थ गयोपिहु पणयं मं पेच्छसु किंकरसरिच्छं ॥ ३ ॥

एवं च थुणिऊण पुष्पाभिमुहसीहासणनिसन्नस्स देविंदस्स एंवूवो संकप्पो समुप्पन्नो—अहो तित्थयरा भयवंतो न
कयाइ तुच्छकुलेसु दरिद्रकुलेसु किवणकुलेसु भिक्खागकुलेसु उप्पज्जिंसु वा उप्पज्जंति वा उप्पज्जिस्संति वा, किं तु उग्ग-
भोगराइन्नखत्तिथइक्खागहरिवंसाइएसु सयलभुवणसलाहणिज्जेसु, केवलं कहवि कम्मवसेण हीणकुलेसु अवयरियाविय
भयवंतो अजोणीनिकखंता चेव सकेहिं उत्तमकुलेसु संहरिजंति, जओ तीयपञ्चुप्पन्नाणागयाणं सुरिंदाणं जीयमेयं,
एवं च जुत्तं ममावि इमं चरिमत्तिथयरं इमाउ माहणकुलाओ कासवगोत्तस्स सिद्धत्थनरिंदस्स वसिट्ठगोत्ताए तिस-
लाए कुञ्छिसि संकामिउं, तिसलागन्मपि देवाणंदाए कुञ्छिसित्ति, एवं संपेहिंत्ता पायत्ताणीयाहिवइं हरिणेगमेसिं
तिसलाकुञ्छिसि गन्मोवसंहरणत्थं निरूवेइ, सो य हरिणेगमेसी सकाएसेणं उत्तरवेउवियरूवधरो मणपवणजइणीए

श्रीगुणचंद
महावीरच०
४ प्रस्तावः

॥ ११२ ॥

गर्हणं संपत्तो देवाणंदाए माहणीए समीवं, ओसोयणीदाणपुवंगं च तीसे अवहरइ भयवं गम्भाओ, माहणीवि
तक्खणं चिय वयणकमलेण ते चउइसवि महासुमिणे पडिनि यत्तमाणे पेच्छिऊण ववगयनिहा निदयताडियउरपंजरा
जरावेगविडुरियव नित्यामसरीरा अवहरिओ मम गम्भोत्ति सुचिरं अप्पाणं निंदंती करयलनिवेसियकवोला परमसो-
गसंभारं काउमारद्धा ॥

इओ य इहेव जंबुदीवे भारहवासतिलयभूयं समुत्तुंगपायारपडिहयविपक्खपक्खुक्खेवं विचित्तपासायसहस्ससिहर-
रुद्धदिसावगासं खत्तियकुंडगामं नाम नगरं, तत्थ य कसिणत्तणं कलयंठिकंठेसु सवावहारलोवो सहसत्थेसु कंटगु-
प्पत्ती कमलनालेसुं कुडिलत्तं कोदंडदंडेसु निट्ठुरत्तं तरुणीपओहरेसु मित्तविरोहो रयणियरस्स बंधो य सारणिसलि-
लेसु । जहिं च पढमाभासी पियंवओ करुणापरो वेसमणोव्व अणवरयदागरसिओ महातरुव्व सउणजणकयपक्ख-
वाओ पारद्विलुद्धव्व कयसारमेयसंगहो गेवेज्जयसुरजणोव्व अणिंदो सारयसलिलं व अकलुसो निवसइ लोओ । जत्थ
य चउइसिंपि अणवरयवहंतउरहट्टघडिमुहमुक्कसलिलसिचमाणाइं सव्वोउयफुल्लफलमणहराइं जंबूजंवीरखज्जूरता-
लतमालपमुहतरुसंडमंडियाइं परिभूयनंदणवणाइं सोहंति काणणाइं, जं च संकेयठाणं व तिहुयणलच्छीए समुप्पत्तिभू-
मिन्व विविहच्छेरयाणं लीलाभवणं व सिंगारस्स आवासोव्व धम्मस्स सुहमंडणं व वसुंधरारमणीए । तत्थ य पुरंदरोव्व
छिन्नभूधरपक्खो मुणिन्व समरसोवओगो सुरवारणोव्व दाणसित्तकरो जलनिहिन्व समज्जायाणुवती अणेगनरिंदमउ-

शक्रस्तुतिः
गर्भपरा-
वर्त्तः.

॥ ११२ ॥

लिमालानमंसियकमकमलो भुवणपसिद्धो सिद्धत्यो नाम नरिंदो ।

हरिपीलुपरिक्खित्तं भमंतविधिहग्गमहिसिपरिकलियं । सुन्नपि वसंतं पिय नज्जइ जस्सारिजगभवणं ॥ १ ॥

एगेसु पलाणेसुं जयत्तरवेण सत्तुसु परेसुं । पणमंतेसुं जेणं समरसुद्धं नेव संपत्तं ॥ २ ॥

तस्स य वम्महस्स व रई महुमहणस्सेव लच्छी सव्वंतेउरपद्दाणा रूवाइगुणगणाभिरामा तिसला नाम देवी,
जहत्थाभिहाणो य नंदिवद्धणो नाम पुत्तो सुदंसणा य धूया, अह आसोयवहुलेतरसीए अद्धरत्तसमए हत्थुत्तर-
नक्खत्ते सुकुमालहंसतूलीपडलसुंदरंमि दहिपिंडपंडुरपडपच्छाइयंमि गंगापुलिणविसाले सयणिज्जे सुहपसुत्ताए तिस-
लादेवीए पुव्वगम्भं देवाणंदाकुच्छिमि संकामिऊण दिव्वसत्तीए सो पुव्वभणिओ हरिणेगमेसिदेवो असुभपोग्गलाव-
णयणपुव्वयं जिणं कुच्छीए मोत्तूण पणमिऊण य जहागयं पडिगओ, गम्भाणुभावेण य सा तिसलादेवी पच्छिमरय-
णीसमयंमि चउद्दस सुमिणाणि पासइ, कहं चिय ?—

करडतडगलियमयसलिलगंधुद्धुरं, गुलुगुलंतं सुदंतं महासिंधुरं ।

वसहमुल्लासिसुइलंबपुच्छच्छडं, चारुसिंगं सुतुंगं रवेणुब्भडं ॥ १ ॥

घुसिणरसरागकेसरसडाडंबरं, केसरिं कंठरवभरियगयणंतरं ।

कुंभिकरकलियकलसेहि कयमज्जणं, लच्छिसुद्धामकामत्थियुयसासणं ॥ २ ॥

श्रीगुणचंद
महावीरच०
४ प्रस्तावः
॥ ११३ ॥

मालईमल्लियाकमलरेहंतयं, मालममिलाणमलिवलयलीढंतयं ।
किरणजालं सुयंतं ससिं सुंदरं, निहयतमपसरमइरुग्गयं दिणयरं ॥ ३ ॥
कलिहडंडगलोलंतसियधयवडं, पुन्नकलसं च सुहकमलगंधुब्भडं ।
कुसुयकलहाररम्मं मंहंतं सरं, बहुलकल्लोलमालाउरं सायरं ॥ ४ ॥
विबिहमणिधंमसालं विमाणं वरं, कंतिकच्चुरियगयणं च रयणुकरं ।
धूमरंहियं तहा हुयवहं सुमिणए, देवि वयणंमि पविसंतयं पेच्छए ॥ ५ ॥

पेच्छिऊण य इमे सुमिणे हरिसुद्धसियरोमकूवा परमाणंदमुवहंती गया सिद्धत्थपत्थिवसमीवें, कहिओ चउइस-
महासुमिणोवलंभवइयो, तेणावि नियमइविभवाणुसारेण संमं वित्तिऊण भणियं—सुंदरि ! सयलनरिंदसंदोहवंदणिज्जो
निरुवक्कमविकमकंतसत्तुचको निप्पडिमपयावपरिभूयरविमंडलो निरुवमसत्तो पुत्तो ते भविस्सइ, सायरं पडिच्छिऊण
य इमं अणाइक्खणिज्जभूरिहरिसपब्भारमंथरगई गया नियमवणं, तहिं च देवगुरुसंवद्धाहिं मंगल्लाहिं असिवोवघाय-
दक्खाहिं सुहावहाहिं कहाहिं रयणिसेसमइवाहिउं पउत्तत्ति, राइणावि जाए पभायसमए समाहूया अट्ठंगनिमित्तस-
त्थपरमत्थवियवस्सणा नेमिस्सिगा, आसणदाणपुव्वयं सक्कारिऊण पवरवत्थाइणा निवेइओ देवीदिट्ठचउइससुमिणवुत्तंतो,
तओ तै सम्मं निच्छिऊण परोप्परं जहावट्ठियमत्थं भणिउमारद्धा—देव ! एयारिससुमिणाणुभावेण नूणमुप्पज्जिही

त्रिशला-
स्वप्नाः.

॥ ११३ ॥

धम्मवरचक्कवट्ठी तिहुयणपूयणिज्जपायवीढो नियकुलनहयलमियंको अणुवमचरिओ तित्थयरो तुम्ह पुत्तोत्ति, एवमाय-
 त्तिऊण परमहरिसमुच्चहंतेण राइणा दवावियं तेसिं आसत्तपुरिससंतइदालिह्विह्वकरं मणोरहपहाइकंतं दविणजायं,
 विसज्जिया य नियनियठाणेसु, निवेइओ य एस वइयरो देवीए, जाओ य परमो पमोओ तीसे। एवं च पइदिणपुजं-
 तमणोरहाए जिणाणुभावेण दूरपलीणरोगाए सुररमणीसरिच्छवट्ठंतविलासाए बह्मिउमारद्धो गम्भो, तयणुभावेण य
 एवं सा सोहिउं पउत्ता—

अंतरनिहित्तरयणसंचया फलिहमयधरित्तिव । संकंतफारदिणनाहमंडला मेरुभित्तिव ॥ १ ॥

अंतद्वियमुत्ताहलरेहंतुदामजलहिचेलव । पढमुग्गमंतससहरपसाहिया गयणलच्छिव ॥ २ ॥

अंतोविफुरणसमुलसंतसोयामणीनिवहकिन्ना । उब्भडघणंतघणपडलपुन्ननवपाउससिरिव ॥ ३ ॥

इय गम्भगयजिणिंदाणुभावसोहंतकंतसवंगा । नवकप्पहुमलइयव मणहरा रेहए देवी ॥ ४ ॥

जह्विसं च भयवं भुवणमहासरेकरायहंसो तिसलादेवीए उदरकमलमइगओ तह्विसाओवि सुरवइययणेण तिरियजं-
 मगा देवा विविहाइं महानिहाणाइं सिद्धत्थनरिंदभुवणंमि भुज्जो भुज्जो परिकिस्वचंति, तंपि नायकुलं घणेणं धन्नेणं रज्जेणं
 रट्ठेणं बलेणं वाहणेणं कोट्टागारेणं पीइसक्कारेणं वाढमभिवट्ठइ, सिद्धत्थनराहिवस्सवि अचंतबाहुवलदप्पिणो तहाविह-
 विसमपएसु संठिया अपणयपुब्बावि वसमुवगया पचंतद्वियावि नराहिया । अन्नवासरे भगवओ अम्मापिऊणं एया-

श्रीगुणचंद
महावीरच०
४ प्रस्तावः

॥ ११४ ॥

रूवो वियप्पो समुप्पणो, जहा-जप्पभिई एस गब्भो संभूओ तप्पभिई धणकणगाइरज्जविभवेणं अम्हे वट्ठामो, ता जइया एस जाओ भविस्सइ तइया एयस्स इमं गुणनिप्फणं वट्ठमाणोत्ति नामधेयं वयं करिस्सामोत्ति, एवरूवाइं मणोरहसयाइं परिकप्पयंति ॥

अह भगवं भुवणपट्ट नाणत्तयपरिगओ महाभागो । करुणापरेकचित्तो ससुहविरत्तो महासत्तो ॥ १ ॥

चलणप्फंदणरूवं संहरितं सव्वमंगवाचारं । सेलेसिपवन्नो इव अणुकंपट्ठा सजणणीए ॥ २ ॥

तह कहवि वसइ गब्भे जह नियजणणीवि नो मुणइ सम्मं । तइलोकविम्हयकरो गरुयाणं कोऽवि वाधारो ॥ ३ ॥

नवरं तिसलादेवी तहट्टिए जिणघरे विचितेइ । किं गलिओ मम गब्भो ? उयाहु देवेहिं अवहरिओ ? ॥ ४ ॥

किं मज्झेवि विणट्ठो ? किं वा केणावि थंभिओ होज्जा ? । अहवा निप्पुन्नाणं रयणं किं करयले वसइ ? ॥ ५ ॥

जइ सच्चं चिय विगओ एसो ता निच्छयं निए पाणे । नीसेसदुक्खलक्खेकभायणेऽविहु परिचयामि ॥ ६ ॥

अट्टज्झाणोवगया करयलपल्हत्थिएण वयणेण । अचंतदुक्खवसया दूरुज्झियमंडणाभरणा ॥ ७ ॥

परिचत्तसमुल्लावा महियलकयरुक्खचक्खुविकखेवा । दीहुस्सासनिवारियमुहसोरभमिलियभसलकुला ॥ ८ ॥

इय भूरिसोगसंभारतरलिया गलियकेसपासा य । हिययंतो रोवंती देवी जावऽच्छए ताव ॥ ९ ॥

सिद्धत्थरायभवनंपि तक्खणं विमणदुम्मणं जायं । उवसंतमुइंगरवं उवरयवरगीयनिग्घोसं ॥ १० ॥

गर्भनिश्च-
लता.

॥ ११४ ॥

अह भयवं एवंविहवइयरसुवलक्खिऊण नाणेण । अंगं अंगावयवं चालइ जणणीसुहट्ठाए ॥ ११ ॥
 ताहे तुट्ठा देवी हरिसवसुल्लसिरलोयणकवोला । जायं झडत्ति भवणंपि राइणो पमुइयजणोहं ॥ १२ ॥
 तत्तो भयवं चित्तइ गम्भुम्भवमेत्तओऽवि कह जाओ । जणणीजणगाणमहो पडिवंधो कोऽवि अइगरुओ ? ॥ १३ ॥
 जं गम्भनिप्पकंपमेत्तेणवि एरिसा विसमरूवा । नियसंवेयणगम्मा एएसि दसा समावडिया ॥ १४ ॥
 जइ पुण जीवंतेसुवि समणत्तणमहमहो पवज्जिस्सं । तो मम विरहेण धुवं एए जीयं चइस्संति ॥ १५ ॥
 इय चित्तिऊण भयवं संतोसट्ठं सजणणिजणगाणं । इयरजणाणवि एवं ठिइं व लट्ठं पइट्ठंतो ॥ १६ ॥
 जीवंतेसुं अम्मापिईसु नाहं मुणी भविस्सामि । इय गम्भगओऽवि जिणो पडिवज्जइ नियममइगरुयं ॥ १७ ॥
 अह सा तिसलादेवी गम्भफुरणसंपत्तपरमपमोया पहाया नियंसियमहरघचीणंसुया सरसचंदणकयंगराया आवि-
 ष्ठपवररयणा तं गम्भं नाइउणहेहिं नाइसीएहिं नाइत्तित्तेहिं नाइकडुएहिं नाइकसाएहिं नाइअंबिलेहिं नाइमडुरेहिं
 सवोउयसुहावहेहिं भोयणेहिं परिवालयंती पूरियडोहला निम्भया पसंता सुहेण भवणतलसमारूढा कयाइ पवर-
 नाडयपेच्छणेण कयाइ पुराणपुरिसचरियायन्नणेण कयाइ विचित्तकोऊहलावलोयणेण कयाइ सहीजणपरिहासकर-
 णेण कयाइ उज्जाणविहारविणोएण कयाइ दुक्खियजणतवणिज्जपुंजवियरणेण कयाइ नयरसोहानिरिक्खणेण कयाइ
 बंधुजणसम्माणणेण कयाइ धम्मसंबद्धकहावियारणेण दिणाइं गमेइत्ति ।

श्रीगुणचंद
महावीरच०
४ प्रस्तावः
॥ ११५ ॥

अत्रया य निष्कण्ठसस्सोवसोहिण पण्डुरोगमारिपमुहाणिट्टे जणवण नियनियधम्मकरणुज्जएसु सनणलोएसु उवसंतपयंडुडमरेसु परोप्परं नराहिबेसु पमुक्कचाडभडचोरभयासु विलसंतीसु पयासु रेणुपडलविगमरमणिज्जासु जणमणाणंददाइणीसु सयलदिसासु उज्जाणतरुकुसुमसंबंधगंधुदुरेसु पयाहिणावत्तपरिभमणरमणिज्जेसु मंदं मंदं वायंतसेसु सभीरणेसु परमविजयसाहगेसु सवसउणेसु गंभीरघोसासु सयं चिय वज्जंतीसु विजयदुंदुभीसु चेत्तसुद्धतेरसीए सुरभव-
चवणकालाओ आरब्भ नवण्हं मासाणं अद्धट्टमाण य राईदियाणं विइकंताणं उच्चट्टाणं गएसु महागहेसु अहरत्त-
समए हत्थुत्तराजोगमुवागए चंदे तिसलादेवी पुव्वदिसिब पयासियसयलजीवलोयं भयवंतं दिणयरं व भवियजणरहं-
गमिहुणकयपरमसंतोसं पसूयत्ति ।

तयणंतरं च पवरपंचवण्णरयणविणिम्मियविविहविमाणमालारूढेहिं पदयपडुपडहपमुहजयतूरेहिं उक्कुट्टिसीहना-
यकलयलमुहलेहिं पवराभरणमणिविच्छुरियगयणंगणेहिं पहरिससमुल्लसंतसरीरेहिं अणेगेहिं देवेहिं देवीहि य इत्तेहिं
पडिनियत्तमाणेहि य देवलोयपुरिंपिब रमणिज्जं अमंदाणंदसंदोहजणगं च कुंडग्गामनयरं जायंति । सिद्धत्थरायभवणे
य वेसमणवयणाणुवत्तिणो जंभगा सुरा रयणकणगवत्थाहरणवासं वरिसंति, पत्तपुप्फफलगंधचुण्णवासं च सुयंति ।

अह जाए सूइकम्मपत्थावे अहोलोगवत्थवा चउसामाणियसहस्सपरिवुडा सत्तहिं अणिएहिं सत्तहिं अणियाहि-
वईहिं परियारिया-भोगंकरा भोगवई, सुभोगा भोगमालिणी । तोयधारा विचित्ता य, पुप्फमाला अणिदिया ॥ १ ॥

गर्भस्य दशा
जन्म च.

॥ ११५ ॥

एआओ अट्ट दिसाकुमारीओ जिणाणुभावचलियासणाओ ओहिन्नाणेण जिणजम्मवइयरं नाऊण दिव्विमाणारू-
ढाओ सविट्ठीए जिणजणणिसमीवमागच्छंति, तिपयाहिणीकाऊण य जिणमायरं पराए भत्तीए थुणंति, कहं चिय ?-

तुम्ह महायसि ! रामाजणेकसिररयणविब्भमे नमिमो । पयकमलं निम्मलकोमलंगुलीपवरदलकलियं ॥ १ ॥

इत्थीणं मज्झे चंगिमाए लद्धा तए पढमेरेहा । तुमए चिय निम्महिओ महिलालहुयत्तणकलंको ॥ २ ॥

पुत्तवईणं मज्झे तुमए चिय पावियं विजयपत्तं । मिच्छत्तंधजणस्सालंबणहेऊ तुमं जाया ॥ ३ ॥

सरयनिसायरकरनियरहारगोरो जसो तुमार्हितो । आसंसारं परिभमउ निब्भरं दससुवि दिसासु ॥ ४ ॥

मूढोचिय सुयपसवे परमाणंदं जणो समुवहइ । तुज्झ सरित्था धूयावि पुत्तकोडिंपि परिभवइ ॥ ५ ॥

तिहुयणपणमियचलणो जीए कुच्छिमि वाढमुबूढो । कलणाइकंतबलो चरिमजिणिंदो जयाणंदो ॥ ६ ॥

इय सुइरं जिणजणणिं पणमिय परमायेरेण जंपंति । देवि ! नहु भाइयधं अस्से जं दिसिकुमारीओ ॥ ७ ॥

परमेसरस्स भुवणेकचक्खुणो जिणवरस्स एयस्स । निययहिगारऽणुरूवं जम्मणमहिमं करिस्सामो ॥ ८ ॥

एवं भणिऊण तित्थयरजम्मणभवनस्स समंतओ जोयणपरिमंडलं भूभागं ववगयतणकट्टपत्तकयवरं दुरुस्सारिया-
सुइदुरभिगंधपोरगलं तक्खणं विउव्विएणं मणहरेणं सबोउयकुसुमगंधाणुवासिएणं संवट्ठणपवणेणं काऊण भगवओ
तित्थयरस्स तिसलादेवीए य अदूरे गायंतीओ चिट्ठंति ।

श्रीगुणचंद,
महावीरच०
४ प्रस्तावः
॥ ११६ ॥

एवं चिय चलियासणपउत्तदिबोहिसुणियपरमत्था । उड्ढुदिसावासाओ देवीओ इमा तओ इति ॥ १ ॥
मेहंकरा मेहवई, सुमेहा मेहमालिणी । सुवच्छा वच्छमित्ता य, वारिसेणा वलाहगा ॥ २ ॥
तो निहयरयं वेउविण्ण मेहेण महियलं काउं । गंधंधलुद्धफुलंधयाउलं पुप्फवरिसं च ॥ ३ ॥
जिणवरगुणगणमइकोमलेण सुइसोक्खकरणदक्खेण । अइदूरंमि ठियाओ गायंति सरेण मडुरेण ॥ ४ ॥
अह पोरत्थिमरुयगट्ठिईओ अट्ठवि दिसाकुमारीओ । बहुपरियणपरियरियाओ एयाओ आगया झत्ति ॥ ५ ॥
नंदुत्तरा य नंदा, आणंदा नंदिवद्धणा । विजया य वेजयंती, जयंती अपराजिया ॥ ६ ॥
रविमंडलसारिच्छं हत्थे धरिऊण दप्पणं ताहे । पुव्वदिसिंमि ठियाओ कित्तिंति गुणे जिणवरस्स ॥ ७ ॥
अह दाहिणरुयगनिवासिणीओ अट्ठवि दिसाकुमारीओ । नायजिणजम्मणाओ इति विमाणेहिं एयाओ ॥ ८ ॥
समाहारा पइन्ना य, सुप्पबुद्धा जसोहरा । लच्छिमई सेसवई, चित्तगुत्ता वसुंधरा ॥ ९ ॥
करपल्लवेण कलि(गहि)उं भिगारं सुरहिवारिपरिपुत्रं । दक्खिणपासे पडुणो गुणधवणपरा परिवसंति ॥ १० ॥
अह पच्छिमरुयगगया अट्ठेव पुणो दिसाकुमारीओ । भत्तिभरनिच्चराओ इमाओ पविसंति जिणगेहे ॥ ११ ॥
इलादेवी सुरादेवी, पुहवी पउमावई । एगनासा नवमिया, भद्दा सीया य अट्ठमी ॥ १२ ॥
करकलियतालियंटा विसट्ठकंदोद्वदीहरच्छीओ । पच्छिमदिसिंमि ठाउं थुणंति जिणनाहगुणनिवहं ॥ १३ ॥

दिशाकु-
मारीकृतो
महोत्सवः.

॥ ११६ ॥

अह उत्तरिल्लरुयगाभिहाणगिरिवासिणीओ अट्टेव । आगच्छंति इमाओ देवीओ दिसाकुमारीओ ॥ १४ ॥
 अलंबुसा मिस्सकेसी, पुंडरीकी य वारुणी । हासा सवप्पभा चेव, हिरिदेवी सिरी तहा ॥ १५ ॥
 वंदित्ता जिणजणणीं घेत्तुं सियचामरं करग्गेण । उत्तरदिसिम्मि गुरुणो पुव्वकमेणं परिवसंति ॥ १६ ॥
 अह विदिसिरुयगपच्चयवत्थवा चउ दिसाकुमारीओ । चित्ता य चित्तकणगा सतेय सोयामणीनाम ॥ १७ ॥
 नमिउं तिसलादेवीं जिणं च विदिसासु चउसुवि निलीणा । सुंदरपईवहत्था जिणगुणनिवहं पगायंति ॥ १८ ॥
 मज्झिमरुयगट्ठिओ पुणोवि चत्तारि दिसिकुमारीओ । देवी रुया रुयंसा सुरुया रुयगावई नामा ॥ १९ ॥
 आगंतूणं पुव्वकमेण नाभिं जिणस्स कप्पेति । चउरंगुलपरिवज्जं ताहे वियरं परिखणिंति ॥ २० ॥
 तं नाभिनालमह तत्थ ठाविउं पंचवण्णरयणेहिं । पूरिंति तं समग्गं तदुवरि पीढं च बंधंति ॥ २१ ॥
 पीढस्सोवरि हरियालिंगं च वियरंति नीलमणिरम्मं । लोयणआणंदयरिं दिव्वाए देवसत्तीए ॥ २२ ॥
 तयणंतरं तिन्नि कयलीहराइं विउवंति, तेसिं च मज्झभागे पवरपंचप्पयारमणिविणिम्मियकोट्टिमतलाइं विच्छि-
 त्तिचित्तरंगावलीमणहराइं दुवारदेसठवियपुण्णकणयकलसाइं दिव्वरुवरेहंतसालभंजियाभिरामाइं दाहिणपुव्वुत्तरदिसासु
 तिण्णि चउसालभवणाइं विसालाइं विरयंति, तेसिं च मज्झभागे महग्घमणिखंडमंडियाइं नियकिरणजालमुत्तिय-
 सुरिंदकोदंडाइं कणगसेलसिलाविच्छिन्नाइं तिण्णि सीहासणाइं ठविंति, तओ तित्थयरं करयलपुडेणं तित्थयरज-

श्रीगुणचंद
महावीरच०
४ प्रस्तावः

॥ ११७ ॥

णणिं च बाहाहिं घेत्तूण परमायरेण दाहिणदिसिचाउसालसीहासणे निसियावेंति, तओ सयपागसहस्सपागतेहोहिं पहाणगंधुदुरेहिं तेसिं सरीरमब्भंगिति, गंधुबट्टणेणं उघट्टेति, तओ पुबट्टिईए जिणं जणणिं च पुबदिसिचाउसाल-सिंहासणंमि आरोविऊण गंधोदएण पुप्फोदएण सुद्धोदएण मज्झिऊण पवरमणिरयणाभरणसंभारेण विभूसियसरीराइं काऊण परमायरेण पुबविहीए उत्तरदिसिचाउसालसिंहासणे निवेसिंति, नवरं नियकिंकरेहिं चोल्लहिमवंताओ गोसीसचंदणदारुगाणि आणाविऊण अरणिनिम्महणुट्टिएण जलणेण संतिनिमित्तं होमं च करेति, निवपभावपरि-विस्वयस्सवि भगवओ जीयंतिकाऊण रक्खापोट्टलियं बंधिऊण रयणपाहाणगे सवणमूले ताडिंति, एवं भणंति य-

सत्तकुलपवयाऊ अप्पडिहयसासणो हवसु देव ! । गयरोगसोगदुक्खो पणईयणपूरियासो य ॥ १ ॥

इय भणिऊण पट्टिद्धा जम्मणगेहे ठवित्तु जिणजणणिं । गायंति जिणिंदगुणे तिसलापासे समल्लीणा ॥ २ ॥

इय जम्मस्स य कायवचित्थरो तित्थनाहभत्तीए । वेगेण समत्थिज्जइ छप्पन्नदिसाकुमारीहिं ॥ ३ ॥

एत्थंतरे सोहम्मकप्पाहिबइस्स सकस्स सीहासणं चलइ, तच्चलणेण ओहिनाणेण भगवओ तित्थयरस्स जम्मं मुणिऊण ससंभमं सको सीहासणाओ उट्टेइ, सत्तट्टपयाणुगमणपुबयं परमाए भत्तीए तत्थट्टिओऽवि जिणं थुणिऊण पाइत्ताणी-याहिवइं हरिणेगमेसिं देयं आणवेइ-अहो भइ ! गच्छसु सोहम्माए सभाए मेघोघघोरघोसं जोयणपरिमंडलं सुधो-सघंटं तिक्खुत्तो ताडित्तो महया सदेणं एवमुग्घोसेहि-सको जंबुदीवभारहखेत्तभमुब्भवस्स जिणस्स जम्मणमहिमं

दिशाकु-
मारीकृतो
महोत्सवः।

॥ ११७ ॥

काउं पट्टिओ, ता भो देवा ! तुम्हे सबबलेणं सबविभूर्हणं सबनाडएहिं सवालंकारविभूसाए दिवच्छरागणेणं परिषुडा पवरविमाणाइं आरूढा मम सयासं पाउम्भवहत्ति, एवं भणिणं हरिणेगमेसी देवे देवरण्णो वयणं विणएण पडिसु-
णित्ता तुरियगईए सोहम्मसभाए गंतूण सुघोसं घंटं तिकखुत्तो ताडेइ, तीसे य पयंडनिग्घोसवसुच्छलंतपडिसह्यप-
डिफलणवसेण अन्नाइं एगूणाइं वत्तीसं घंटासयसहस्साइं समकालं रणज्झणारवं काउमारद्दाइं, एवं च दिसि दिसि
समुम्भवंतपडिनिग्घोसबहिरियदियंतरो सोहमरुण्णो समुप्पन्नोत्ति । एत्थंतरे—

पंचविहविसयसेवापमत्तचित्ता समंतओ देवा । तं एगकालवज्जिरघंटागणगुरुसरं सोउं ॥ १ ॥
चित्तंति सबओ किंचि (च) फुट्टवंभंडरवसमो घोरो । फालिहविमाणमालापडिफलणचउग्गुणीभूओ ? ॥ २ ॥
आपूरितोव दिसावगासमखिलं चराचरं लोणं । सद्देगसरूवंपिव कुणमाणो निययमहिमाए ॥ ३ ॥
संखुद्धमुद्धतियसंगणाहिं भयवेगतरलियच्छीहिं । हा नाह ! रक्ख रक्खत्ति जंपिरीहिं सुणिज्जंतो ॥ ४ ॥
दणुवइरणसुमरणतुट्ठतियसवंठोहकंठरवभीमो । अणिवारियं वियंमइ जयघंटारणरणारावो ॥ ५ ॥
इय चित्तावससिद्धिलियदइयादढकंठबाहुपासंमि । सबत्तो सुरनिवहे जायम्मि विमूढहिययंमि ॥ ६ ॥
खणमेत्तस्सऽवसाणे समत्थघंटारवंमि उवसंते । हरिणेगमेसिदेवो भणइ सुरे अवहिण जाए ॥ ७ ॥
भो भो तियसा ! सको तुम्हे आणवइ जह लहुं एह । जेण जिणजम्ममज्जणमहूसवो कीरण इण्हि ॥ ८ ॥

श्रीगुणचंद
महावीरच०
४ प्रस्तावः
॥ ११८ ॥

इय आणत्तियमायन्निऊण परिमुक्सेसवावारा । सुणियजिणनाइमज्जणमहसवा हरिसिया तियसा ॥ ९ ॥
तो मज्जणपोक्खरिणीए जंति, बहुविहजलेण मज्जणु करंति । कप्पूरमिस्सचंदणरसेण, आलिंपहि देहु सुबंधुरेण ॥ १० ॥
अइकोमलनिम्मलदूसजुअल, परिहंति वियंभियकंतिपडल । अइ कंठपइट्ठियलट्ठहार, दूरुज्झियकामुयजणवियार ॥ ११ ॥
अइसुरहिकुसुमनिम्मवियदाम, नवपारियायमंजरिसणाम । वंधंति सुगंधसमिद्ध सीसि, तक्खणकयकुंचिरचारुकेसि ॥ १२ ॥
मणिमउडकिरणविच्छुरियगयण, नियरूवमडप्फरहसियमयण ।
वरकडयतुडियभूसियसरीर, तणुकंतिपसरपरिभूयसूर ॥ १३ ॥
किवि मगरमरालयसन्निसन्न, किवि हरिणवसहसिहिप्पवन्न ।
आरुहवि केवि कुंजरि महंति, केवि तुंगतुरए वेगे वयंति ॥ १४ ॥
चीणंसुयचिंधसहस्सरम्म, अवलोयणिमेत्तह दिन्नसम्म ।
आरुहवि चलय किवि वरविमाणि, किंकिणिरवमुहरि महप्पमाणि ॥ १५ ॥
सहुलसरहहरिपट्ठि चडिय, किवि पट्ठियवेगेऽन्नोन्न घडिय ।
इय सुरसमूहह सवे वलेण, सुरवइ समीवमागय जवेण ॥ १६ ॥
एत्थंतरे खंभसहस्ससंनिविट्ठं फलिहमणिघडियसालभंजियाभिरामदारदेसं अणेगलंबंतमुत्ताहलमालं पवरवहरवे-

सौधमेन्द्रा-
गमनं.

॥ ११८ ॥

इगापरिक्खित्तेपेरंतविभागं रणंतघंटावलीमहुरसरसुहयं पवणकंपमाणनिविडजयपडागापयडं सिहरं व तिरियलो-
यमहामंदिरस्स फलं व पुवकयपुन्नमहापायवस्स तिहुयणसारपरमाणुविणिम्मियं व सयलविभूइविच्छिडाखंडभंडा-
गारं सोलसभेयरयणरासिघडियं व सुरवइवयणसंभंतपालकामरविउवियं जोयणसयसहस्सविच्छिणं पंचजोयण-
सयसमुवेहं वरविमाणमारूढो अणेगदेवदेविकोडिपरिबुडो पत्थिओ पुरंदरो, तओ पवणविजइणीए गईए तिरियम-
संखेज्जाणं दीवसमुदाणं मज्झंमज्झेणं नंदीसराभिहाणदीवस्स दाहिणपुरत्थिमिल्ले रइकरपवए आगंतूण तं दिव्वं
देविद्धिं विमाणवित्थारं व पडिसंहरिऊण जेणेव जंबुदीवो जेणेव दाहिणडुभरहं जेणेव भगवओ जम्मणभवणं तेणेव
उवागच्छइ, तयणंतरं च तेण दिव्वेण विमाणेण तिक्खुत्तो आयाहिणपयाहिणं भगवओ जम्मणभवणस्स काऊण विमाणं
उत्तरपुरच्छिमे दिसिभागे ठवेइ, तओ अट्ठहिं अगमहिंसीहिं चुलसीइए सामाणियसाहस्सीहिं समेओ जत्थ भयवं
तित्थयरो तित्थयरजणणी य ताहिं आलोएइ, पणामं करेमाणो पविसइ, सामिं समायरं तिपयाहिणपुवयं वंदइ,
वंदित्ता सविसेसं तिसलादेविं धुणइ, कहं ?—

जयसि तुमं देवि ! सगोत्तगयणपडिपुन्नचंदनवजुण्हे ! । सुविमुद्धसीलसालीणयाइ गुणरयणवरधरणि ! ॥ १ ॥

तिहुयणचिंतामणिकुच्छिधारिण ! तं धुवं जगे धन्ना । तुज्झं चिय सुहफलओ पसंसणिज्जो मणुयजम्मो ॥ २ ॥

एत्तियमेत्तेणं चिय तुमए उल्लंघिउव भवजलही । परमासीसट्ठाणं जायासि सुणीसराणंपि ॥ ३ ॥

श्रीगुणचंद
महावीरच०
४ प्रस्तावः

॥ ११९ ॥

एवं च थुणिऊण ओसोयणिदाणपुव्वगं तक्खणविउच्चियजिणपडिरूवं च ठविऊण तिसलादेवीसमीवे सयं पंच सरीरे विउच्चइ, तओ एगेण परमसुइभूओ सरससुरभिगोसीसचंदणपंकपंडुरोयरे करकमले कयप्पणामो सव्वहुमाणं तित्थयरं संठवेइ, एगेण य तस्सेव य पिट्ठिदेसट्ठिओ हरट्ठहासकुसुमप्पगासं चामीयरचारुदंडं पुंडरीयं घरेइ, दोहि य रूवेहिं भगवओ उभयपासेसु सुरसरिवारिप्पवाहविब्भमे चामरे मंदं मंदं चालेइ, एगेण पुरओ ठिओ धारासहस्सभीसणं समुच्छलंतकिरणपडलं सरयसूरमंडलं व दिसिवलयमुज्जोर्वितं पयंडपडिवक्खविक्खेवदारुणं कुलिसमुव्वहइ । एवं च पंचरूवेहिं समायरियनियनियकायवो अणेगदेवदेवीहिं परियरिओ-

संपत्तपावणिज्जं समत्थतित्थोहदंसणपवित्तं । अप्पाणं मन्नंतो हरिसेणंगे अमायंतो ॥ १ ॥

मंदरसेलाभिमुहं कंठपलंबंतरयणवणमालो । पयलंतदिक्खकुंडजुयलो आखंडलो चलिओ ॥ २ ॥

सिग्घाए दिवाए देवगईए कमेण गच्छंतो । जोयणलक्खुचत्तं संपत्तो मंदरगिरिंदं ॥ ३ ॥

जस्सावट्ठियरूवा पडिबिच्चियसिहरकाणणाभोगा । विमलपरिमंडला दप्पणव्व रेहंति ससिसूरा ॥ ४ ॥

जस्स रमणीययारंजियाइं गंधव्वदेवमिहुणाइं । उज्झियनियठाणाइं सिहरेसु सुहं परिवसंति ॥ ५ ॥

नाणाविहफलभरभंगुरग्गसाहाइं जत्थ रेहंति । सव्वोउयकुसुमसमिद्धिसुंदराइं तरुवणाइं ॥ ६ ॥

किविणो व कणगपरिहाणिवज्जिओ सज्जणोव्व अइतुंगो । सुमुणिव्व एगरूवो जो निच्चं सिद्धिखेत्तं व ॥ ७ ॥

प्रभोमैरौ
नयनं

॥ ११९ ॥

एगत्थुन्नयनवमेघगज्जिपरितुट्ठनीलकंठो जो । अन्नत्थ किन्नरारद्धगेयसुइनिच्चलकुरंगो ॥ ८ ॥

एगत्तो मरगयनिस्सरंतकिरणोलिसामलियगयणो । अन्नत्तो रवितावियफलिहोवलगलियजलणकणो ॥ ९ ॥

तत्थ एवंविहे मंदरगिरिंमि नीहारगोकस्त्रीरहारज्जलाए अइपंडुकंवलसिलाए विचित्तरयणप्पभापडलजलपक्खा-
लियंमि अभिसेयसिंहासणे पुवाभिमुहो सुरिंदो उच्छंगनिवेसियजिणो उवविसइ, एत्थंतरे जिणपुन्नमाहप्पचलियासणा
ओहिनाणविन्नायजहट्ठियपरमट्ठा नियनियसेणाहिवइताडियघंटारवपडिबोहियसुरयपमत्ततियसगणा तक्कालविउवि-
यपवरविमाणारूढा सवालंकाररेहंतसरीरा ईसाणप्पमुहा चंदमूरपज्जंता एगत्तीसंपि समागया सुरिंदा, कयपणामा
य ट्ठिया सट्ठाणेसु, एत्थ य पत्थावे अच्चुयतियसाहिवेण भणिया नियदेवा-अहो सिग्घमुवणमेह महरिहं पसत्थं
तित्थयराभिसेयं, तओ ते पहिट्ठचित्ता अट्ठोत्तरसहस्सं सुवन्नकलसाण अट्ठोत्तरसहस्सं कलहोयमयाणं एवं मणिमयाणं
सुवन्नरूपमयाणं रूपमणिमयाणं सुवन्नरूपमणिमयाणं भोमेयगाणं अट्ठसहस्सं रयणकलसाणं, एवं भिंगाराणं
पत्तेयं पत्तेयमट्ठसहस्सं विउवित्ता गया स्त्रीरोयसमुहं भरिया स्त्रीरसलिलेण सयलकलसा, गहियाइं उप्पलकुमुयसय-
पत्तसहस्सपत्ताइं,

एवं पसत्थतित्थाण मागहार्इण वरनईणं च । सलिलं म्होसहीओ सुकुमारा मट्ठिया जा य ॥ १ ॥

वक्खारसेल्लकुलपवएसु सोमणसनंदणवणेसु । अंतरनइहरएसु य जाणि य कुसुमोसहिफलाइं ॥ २ ॥

श्रीगुणचंद
महावीरच०
४ प्रस्तावः

॥ १२० ॥

आदाय ताई खीरोयसलिलपडिपुन्नपुन्नकलसा य । अच्युयसुराहिवइणो विणयप्पणया समप्पेंति ॥ ३ ॥
अह सो अच्युदेविंदो दहूण अभिसेयसमग्गसामग्गिं जायहरिसो सिग्घमासणाओ उट्ठित्ता दसहिं सामाणिय-
सहस्सेहिं तायत्तीसाए तायत्तीसेहिं चउहिं लोगपालेहिं तिहिं परिसाहिं सत्तहिं अणिएहिं सत्तहिं अणियावईहिं
चत्तालीसाए आयरक्खदेवसहस्सेहिं संपरिवुडो तेहिं विमलतित्थुत्थखीरनीरपरिपुत्तेहिं विमलकमलपिहाणेहिं
गोसीसचंदणपमुहपहाणवत्थुगन्धिणेहिं सव्वोसहीरससणाहेहिं बहुसहस्ससंखेहिं महप्पमाणेहिं कलसेहिं विउत्ति-
एहिं साभाविएहि य परेणं पमोएणं भगवओ भुवणिककबंधवस्स चरमतित्थयरस्स जंममज्जणमहूसवं काउं समुवट्ठि-
ओत्ति । एत्थंतरे चित्तियं सुरिंदेण, जहा—

लहुयसरीरत्तणओ कहेस तित्थेसरो जलुप्पीलं । सहिही सुरसत्थेणं सम कालमहो खिविज्जंतं ? ॥ १ ॥
एत्तियकुंभजलुप्पीलपेल्लिओ गरुयगंडसेलोऽवि । पल्हत्थिज्जइ नूणं किमेत्थ जुत्तं न याणेमो ? ॥ २ ॥
इय एवं कयसंकं सक्कं ओहीएँ जिणवरो नाउं । चालइ मेरुं चलणंगुलीए वलदंसणट्ठाए ॥ ३ ॥
तच्चालणे य—चंगतुंगिमरुद्धगयणग्गपरिकंपिय, सिहरसयकडयडंततडवियडविहडिय ।
टलटलियटोलोवलविच्छिन्नटंकदोत्तडविनिवडिय ॥ १ ॥
कंदरगयकेसरिविहियगलगज्जियरवभीम । पवियंभियचाउहिसिहिं पडिसइय निस्सीम ॥ २ ॥

अभिवेकः
मेरुचालनं.

॥ १२० ॥

तथा—चलिरमंदरभारसंभगसिरनमिरभुयगाहिवह दूरमुक्क दुद्धरु धरायलु, विलुलंतकुलसेलगणु तुट्टबंधु डोलिओ विसंडुलु।
 उस्सिखलभयभरविहुर उदयसुंढादंड अनिवारण दिसिवारणवि गमणि पयट्ट पयंड ॥ ४ ॥
 खुभियदारुणमच्छकच्छवयपुच्छच्छडताडणेण उच्छलंतकलोल—संकुलगयंगणविगयसिहमुक्कमेरवियरंतमहिजल।
 अइवेगप्पवणप्पहय हल्लियसयलसमुह। नज्जइ जगबोलण भणिय चाउदिसिहिं रउहु ॥ ५ ॥
 सूरससहरतारयाणंपि विवरंसुहपट्टियइं तक्खणेण सव्वइं विमाणइं, भयभीएण सुरगणेण अइजवेण उज्झियसगणइं।
 विमणंमणुसुरवहुनिवहु जाउ विसंडुलचेडु, मरणासंकिउ खयरजणु गिरिकंदरिहिं पइहु ॥ ६ ॥
 एवं वियंभमाणे तिहुयणसंखोहे पंचनमोकारसुमरणपरायणे चारणमुणिगणे विविहाउहनिवहमणुसरंते अंगरक्ख-
 सुरसमूहे पयंडकोवुइमरभीमो वडियनिडालभिउडिभासुरो करकलियकुलिसो सुराहिवो भणिउमाढत्तो—अहो सो
 एस संतिकम्मसमारंभेऽवि वेयालसमुल्लासो भोयणपढमकवलकवलणेऽवि मच्छिवासन्निवाओ पुत्तिमाचंदपढमुग्गमेवि
 दाढाकडप्पदुप्पिच्छो विडप्पागमो जं सयलमंगलालयस्स अणप्पमाहप्पबलणिहाणस्स तित्थेसरस्सवि जम्मणमहूसव-
 समए एरिसो विग्घो समुवट्ठिओ, केण पुण अकालकुवियकयंतसंगमूसुएण देवेण दाणवेण य जक्खेण रक्खसेण
 नियभुयसामत्थवित्थारदंसणट्ठयाए वा जिणमहिमाबलोयणमच्छरेण वा भुवणसंखोहदंसणकोऊहलेण वा कओ हवेज्जत्ति
 जायसंसओ ओहिज्जाणं पउंजइ। तओ दिव्वनाणमुणियजिणचलणचंपणुकंपियमेरुवइयरो तक्खणसंहरियकोवुग्गमो

श्रीगुणचंद
महावीरच०
४ प्रस्तावः

॥ १२१ ॥

निंदियनियकुवियप्पो स्वामिऊण बहुप्पयारं भगवंतं जिणेसरं पाणिपरिगहियकलसे तियसे भणिउमाढत्तो-
भो भो विबुहा!—

जह सिरिरिसहजिणिंदो ण्हविओ पुर्विं इहेव तियसेहिं । तह चरिमतित्थनाहंपि न्हवह भोत्तूण कुवियप्पं ॥ १ ॥

एगसरूववलच्चिय निम्भंतं जेण सबजिणनाहा । तणुगुरुलडुयत्तं पुण न कारणं वीरिउल्लासे ॥ २ ॥

एवं च सुरवइवयणाणंतरमेव समकालं निवडियं सयलकलसेहिंतो सारयससिमऊहजालं व गयणसुरसरिजलपडलं
व तुसारहारघवलं जिणोवरि खीरोयहिजलं, एवं च पवट्टे जिणाभिसेगे—

दुंदुहीपडहभंभाडुडुकाउलं, वेणुवीणारवुम्मिस्सहयमहलं । झलरीकरडकंसासरववंधुरं, धोरगंभीरभेरीनिनायुदुरं ॥ १ ॥

काहलारावसंबद्धखरमुहिसरं पूरियासंखसरुत्थरवनिम्भरं ।

पलयकाले व गज्जंतघणवंदयं, ताडियं सुरेहिं चाउघिहाउज्जयं ॥ २ ॥

हरिसभरनिम्भरुन्निन्नरोमंचया, केवि संथुणहिं जिणु तियस नच्चंतया ।

अवरि वरसुरहिं मंदारकुसुमुकरं, मुयहिं गंधवभसलावलीकब्बुरं ॥ ३ ॥

केवि फोडित्ति मल्लव तिवइं सुरा, सिंहनायं च मुंचंति हरिसुदुरा ।

कुणहिं गलगज्जियं अवरि हयहेसियं, केवि य किर रासयं दित्ति करणंचियं ॥ ४ ॥

मेरुचालन-
मभिषेकश्च.

॥ १२१ ॥

अन्नि हरिसेण विरइंति गलदहरं, केवि मुट्ठीहिं तार्डिति विस्संभरं ।

केइ कलसे य खीरोयजलपूरिए, तक्खणं निंति तियसाण इत्थंतिए ॥ ५ ॥ ॥

इय जहिं सुरसंघेण निहणियविग्घेण वट्ठिज्जइ सवायरेण ।

तहिं जिणवरमज्जणि भवभयतज्जणि किं वन्निज्जइ मारिसिण ? ॥ ६ ॥

जिणाभिसेगे य वट्ठमाणे सवे सुरिंदा छत्तचामरधूयकडुच्छयपुप्फगंधहत्था पुरओ पमोयपुलइयंगो आणंदवियसि-
यच्छा ठिया । अह अशुयसुरेसरे जिणं ण्हविऊण विरए पाणयाइणो देविंदा नियनियपरिवारपरियरिया महाविभ-
वेणं सोहम्माहिवइं मोत्तूण तीसंपि कमेण जिणं अभिसिंचंति । तयणंतरं च ईसाणिंदो भयवंतं उच्छंगे धरितो सिंहा-
सणे निसीयइ, सोहम्माहिवइंवि चउहिसिं तित्थयरस्स चत्तारि घवलवसहे संखदलुज्जले रमणिज्जसरीरे विउच्चइ,
तेसिं च अट्ठसिं गगेहिंतो अट्ठखीरोयसलिलधाराओ उट्ठं गयणंगणगामिणीओ पुणो अहोनिवडणेण एगीभूयाओ
काऊण जिणुत्तमंगे संठवेइ, अत्तेहि य बहुएहिं खीरोयकलससहस्सेहिं अभिसिंचइ, एवं कमेण निवत्तिए मज्जण मह-
सवे परमपमोयभरपुलइयंगो सोहम्मसुरनाहो सुकुमालगंधकासाईए जिणदेहं लूहिऊण गोसीसचंदणुम्मीसधुसिणेणं
अंगमालिपइ, सियसुरभिकुसुमेहिं पूयावित्थरं विरएइ, सवालंकारविभूसिवं च करेइ, पुरओ य ससिकलाधवलेहिं
अक्खेहिं दप्पणभदासणवद्दनाणकलसमच्छसिरिवच्छसत्थियनंदायत्तलक्खणे अट्ठमंगलके समालिहइ, बउलतिलयकण-

श्रीगुणचंद
महावीरच०
४ प्रस्तावः
॥ १२२ ॥

वीरकुंदमल्लियासोयचूयमंजरिपारियायपसुहं पंचवणकुसुमनियरमाजाणुमेतं सुयइ, नाणाविहमणिभत्तिविचित्तदंडेणं
वहरामयकडुच्छुएणं पवरगंधाभिरामं धूवमुक्खिवइ, पज्जलंतदीवियाचक्रवालमणहरं आरत्तियमंगलपईवं च समुत्तारेइ,
एवं च कयंमि सच्चकायधे हरिसुक्करिसनभिरसिरनिवडियकुसुमच्चियमहीयलं कोमलमुयमुणालभंदोलणमणिकंकणरवा-
उलं उब्भडकरणवेगरिखोलिरमुत्तावलिकलावयं तयणु सुरासुरेहिं सवायरेण जिणपुरओ पणच्चियं, नच्चिऊण भत्तिभर-
निम्भरा भयवंतं थोउं एवमारद्धा—

जय सुवणत्तयवंदिय ! लीलाचलणग्गघालियगिरिंद ! । भवक्खमज्झनिवडंतजंतुनित्थारणसमत्थ ॥ १ ॥
परमेसर सरणागयपरूढदढवज्जपंजर जिणिंद । वम्महकुरंगकेसरि मच्छरतमपसरदिवसयर ! ॥ २ ॥
सच्चं चिय सिद्धत्थो कहं न सामिय ! जहत्थनामत्थो ? । चिंतामणिसारिच्छो जस्स सुओ तं विसालच्छो ॥ ३ ॥
अच्चंतमविरइपरायणंपि अइपुन्नवंतमप्पाणं । मण्णेमो जिण ! जं तुज्झ मज्जणे एवमुवयरिया ॥ ४ ॥
भइं भारहस्सेत्तस्स नाह ! तं जत्थ पाविओ जम्मं । धरणीवि वंदणिज्जा जा वहिही तुज्झ कमकमलं ॥ ५ ॥
जइ तुह पयसेवाए जिणिंद ! फलमत्थि ता सया कालं । एवंविहपरममहं अम्हे पेच्छंतया होमो ॥ ६ ॥
इय चउविहदेवनिकायसामिणो जिणवरं धुणेऊण नियनियठाणेसु गया मोत्तुं सोहम्मसुरनाहं, गए य सट्ठाणं
देविंदे सोहम्माहिवई कयसव्वकायव्वो जिणिंदं करसंपुडेण गहिऊण अणेगदेवकोडाकोडिपरिवुडो गंतूण जिण-

देवकृतो
जन्मा-
भिषेकः.

॥ १२२ ॥

जम्मघरंमि पडिरूवं ओसोवणिं च अवणित्ता तिसलादेविसमीवे निसियवेइ, एगं च पवरं देवदूसजुयलं कुंडलजुयलं च ऊसीसगमूलंमि ठवेइ, एगं च पंचवन्नियरयणविच्छित्तिमणहरं जचकंचणविणिम्मियं लंबंतमुत्ताहलावचूलयं लंबूसयं भगवओ अभिरमणनिमित्तं अवलोयंमि ओलंबेइ, जं अवलोयंतो जिणो सुहेण चक्खुक्खेवं करेइ, तओ सको वेसमणं आणवेइ-जहा भो ! सिग्घमेव वत्तीसं हिरन्नकोडीओ वत्तीसं सुवन्नकोडीओ वत्तीसं नंदाइं वत्तीसं भदाइं अन्नाणि य विसिद्धवत्थूणि भगवओ जम्मणभवणे उवणभेहि, सोऽवि जंभगदेवेहिं सव्वं तद्धत्ति निव्वतेइ, पुणरविदेविंदो निय-
तियसेहितो सव्वत्थ एवं उग्घोसावेइ-भो भो भवणवइवाणमंतरजोइसियवेमाणिया देवा देवीओ य ! सुणंतु भवंतो-जो किर तित्थयरस्स तित्थयरजणणीए वा असिवमणिट्ठं काउं संपहारेही तस्स अवस्सं अज्जगमंजरिव्व उत्तिमंगं सहस्सहा तडित्ति फुट्ठिहित्ति, एवं च सव्वं काऊण विहिं भगवंतं पणमिऊण उप्पइओ नीलुप्पलसामलं गयणं पुरंदरो ॥

अह उग्गयंमि दिणयरे पगासीभूयासु सयलदिसासु वज्जिप्पसु गंभीरघोसेसु जयतूरेसु सुहपडिबुद्धा तिसला पेच्छइ सव्वालंकारविभूसियं पवरसुरहिपारियायमंजरीपरिमलमिलंतालिवलयसामलियसरीं सुरहिगोसीसचंदणरस-
कयंगरागं जिणेसरं, इओ य सिद्धत्थनरिंदो सहरिसपधाविण चेडीजणेण साहियतिडुयणच्छेरयरूवसुयजम्ममहूसवो चेडीजणरस अवणियदासत्तभावो आसत्तवेणिवंछियत्थसमत्थरयणरासिदाणजणियाणंदो भणइ, जह-भो पुरिसा !

श्रीगुणचंद
महावीरच०
४ प्रस्तावः

॥ १२३ ॥

गच्छह तुम्हे सव्वत्थ नयरे तियचउक्कचच्चेसु कयवरावणयणपुब्बयं वारिवरिसपसमियरयमणहरेसु कुंकुमपिंजरियधर-
णिलेसु कुणह पंचप्पयारपुप्फपुंजोवयारं, अगुरुतुरुक्कुंदुरुक्कधूवधूमंधयारियदिसिमुहाओ पइट्टह ठाणे ठाणे कणग-
धूवघडियाओ, पधरमणिमुत्ताजालरेहंतमज्झभागे नच्चंततरुणीचरणकिंकिणीकलरवाऊरियदिसिमुहे गायंतगायण-
जणे ऊसियविविहवेजयंतीसहस्सोवसोहिण समंतओ समुत्तंगथोरथंभावलीसुसिलिट्टलट्टाववद्धे मंचाइमंचे संचएह,
पडिभवणदुवारं च विसिट्टपइट्टाणगपइट्टिए सहस्सपत्तपउमपिहियाणणे कुसुममालुम्मालिए सरसचंदणपंकपंडुरि-
ओदरे विमलसलिलपुन्ने पुन्नकुंभे निवेसह, सयलपएसेसु य कहगतालायरनडपेच्छणयाइ पयट्टावेह, नयरदुवारेसु य
नवचंदणमालाउ बंधेह, जूयसहस्सं चक्कसहस्सं च उब्भवेह, उस्सुकं उक्करं अचाडभडपवेसं ववगयधरणिज्जं माणवु-
ट्टिजुत्तं विमुक्कचारगागारनिरुद्धावराहकारिनरनियरं पुरं च कारवेहत्ति, जं देवो आणवेइत्ति सविणयं पडिसुणि-
ऊण वयणं गया पुरिसा, सविसेसो य साहिओ नरिंदाएसो, तओ—

हरिसपणचिरतरुणीकरंगुलीगलियमुहियाजालं । जालुब्भडधयमहुसित्तसंतिहोमानलाउलियं ॥ १ ॥

आउलियचित्तमग्गणधणलाभनिमित्तविहियहलबोलं । हलबोलसवणधावियनरवइजणदिज्जमाणधणं ॥ २ ॥

धणवियरणसुण्णीकयनिहाणपक्खित्ततियसत्तवणिज्जं । तवणिज्जपुंजापिंजरचीणंसुयचिंधसयरम्मं ॥ ३ ॥

रम्ममहीयलविलिहियपसत्थसत्थियसहस्ससोहंतं । सोहंतकंतपुरवरनरजणकीरंतमंगलं ॥ ४ ॥

श्रीसिद्धा-
र्थकृतो-
जन्मोत्सवः

॥ १२३ ॥

मंगलकरणवाउलपुरोहियारद्धदेवयापूयं । पूयाबलिविक्खेवणपीणियनिस्सेसपक्खिगणं ॥ ५ ॥
 गणणाइक्कंतसमुच्छलंतमहिदूररूढनिहिनिवहं । वहबंधविरत्तपसंतलोयपारंभियविलासं ॥ ६ ॥
 लासुलासिरकुलथेरिनारिपारद्धचचरीगीयं । गीयवियक्खणगायणमुस्सरसरपूरियदियंतं ॥ ७ ॥
 इय कुंडग्गामपुरं सबाहिरम्भंतरं समत्तेण । तित्थाहिवजम्ममहूसवंमि जायं सुरपुरं व ॥ ८ ॥

एवं च पुरमहूसवे पयट्टे समाणे सिद्धत्थनरिंदो ण्हाओ कयालंकारपरिग्गहो नियंसियमहग्घपहाणवत्थो निसण्णो अ-
 त्थाणमंडवे, एत्थंतरे समागया मंतिसामंतसेट्ठिपमुहा विसिट्ठलोया, निवडिया चलणेसु, भणिउमाढत्ता य-देव ! विजएणं
 धणागमेणं रज्जवित्थारेणं सरीरारोगत्तणेणं वद्धाविज्जह तुब्भे, जेसिं तिहुयणेक्कचूडामणी नियकुलनहयलमियंको एसो
 पुत्तो पसूओत्ति जंपिऊण समप्पियाओ तेहिं पवरकरितुरयरयणरासीओ, राइणावि ते सम्माणिऊण पुष्फवत्थगंधालं-
 काराइदाणेण विसज्जिया नियनियट्ठाणेसु, खणंतरेसु य दंसणूसुओ पत्थावमुवलम्भ पत्थिवो उट्ठिओ अत्थाणाओ, गओ
 य मणिकुट्टिमलिहिज्जमाणसुरंगरंगावलीसत्थियं दुवारदेसनिवेसियलोहरक्खं उब्भवियमहंतमुसलजूसरं विविहरक्खा-
 परिक्खेवसस्सिरीयं जिणजम्मणभवणं, दिट्ठो य तत्थ रयणरासिच्च सरयदिणयरोच्च एगट्ठियसवत्तेयपुंजोच्च समुज्जोइय-
 मंदिरम्भंतरो जिणवरो, तं च दट्ठुण चिंतिउमाढत्तो-अहो पढमदिवसजायस्सवि अपुष्ठा सरीरकंती अनण्णसरिसरू-
 वसंपया अविभावणिज्जं लायण्णं निम्मेरसुंदरं अभग्गं सोहग्गं, ता सव्वहा पुण्णपगरिसागरं मम कुलं जत्थ पसूयमेवं-

श्रीगुणचंद
महावीरच०
४ प्रस्तावः
॥ १२४ ॥

विहं पुत्तरयणंति विभाविऊण भणिया तिसलादेवी—

पेच्छसु नियसुयपसरंतकंतिपम्भारविजियपहपडले । कज्जलसिहापदीवे परिगोर्वितोव अत्ताणं ॥ १ ॥

पुवं बहुसोवि मए दिट्ठमिमं मंदिरं विसालच्छि ! । किं तु पमोयमियाणिं किंपि असरिच्छमावहइ ॥ २ ॥

संचुण्णियचामीयरत्तुण्णयसरिसेण कंतिनिवहेण । एगसरूवा कीरंति उभयगिहवित्तभित्तीओ ॥ ३ ॥

इय एवमाइकहाहिं नरिंदो देवी य विगमिऊण भगवओ पढमदेवसियं ठितिवडियं करिंति, तइयदिवसे य तरुणतरणिताराहिवविवाइं दंसेंति, कमेण य जाए छट्ठवासरे रायकुलसंवड्हियाहिं अविणट्ठलट्ठपंचिंदियाहिं नीरोग-सरीराहिं जीवंतपाणनाहाहिं कुंकुमपंकालितवयणकमलाहिं कंठकंदलावलंबियसुरहिमालइमालाहिं कुलविलयाहिं अचं-तजायचित्तसंतोसाहिं जागरमहसवं पयट्टेइ, आगए य एकारसदिवसे जहाभणियविहाणेण सुइजायकम्ममवणेंति, बारसदिवसंमि नाणाविहवंजणसमेयं बहुप्पगारखंडखज्जपरिपुजं विविहपाणपरियरियं सुगंधगंधट्टोयणसूयसंपन्नं रसवइं निवत्तावेंति, तयणंतरं कारियण्हाणविलेवणालंकाराणं नायखत्तियाणं पणयजणपुरप्पहाणलोगाणं परमायेण भोयणं पणाभेंति, खणंतरेण य आयन्ताणं सूइभूयाणं वीसत्थाणं सुहासणगयाणं तत्थ गंधमल्लालंकारेहिं सम्माणियाणं तेसिं पुरओ सिद्धत्थनराहिवो एवं वयासी—भो भो पहाणलोया ! पुवंपि मम एस संकप्पो समुप्पज्जित्था जहा—जहि-वसं एस कुमारो देवीए गम्भं संकंतो तद्विसाओवि करितुरयकोसकोट्टागाररज्जेहिं सुहिसयणपरियणेहिं परमं

कुलमर्यादा
नामस्वा-
पना च.

॥ १२४ ॥

बुद्धिमहमुवागओ, अओ मए एयस्स वद्धमाणोत्ति नामधेयं कायवन्ति, तम्ह। इयाणिंपि तुम्ह समक्खं एयमेव नामं
 हवउत्ति, तेहिं भणियं-देव! जुत्तमेयं, गुणनिप्फन्ननामधेजे विज्जमाणंमि कीस न जहट्टियमभिहाणं कीरइत्ति?,
 एवं तेहिं जंपिए पइट्टियं जयगुरुणो वद्धमाणोत्ति नामं, जाओ परमप्पमोओ, पुरंदरेणावि अयलो भयभेरवोवसग्गेहिं
 खंतिख मो य इतिकाऊण वरं महावीरोत्ति नामधेयं से कयंति, इय निवत्तियाभिहाणो सुरसंक्रामियकामियपवर-
 रसाए निययंगुलीए पाणेण कयभोयणकायवो जयगुरु पंचहिं धावीहिं परियरिओ अंतेउरीज्जणेण सायरं चेव ला-
 लिज्जमाणो अम्मापियरेहिं बहुप्पयारं चरणचंकमणं काराविज्जमाणो चेडचडयरेणं पइक्खणमुल्लाविज्जमाणो सायरं
 देवदेवीविंदेण पज्जुवासिज्जमाणो निरंतरं गीएहिं गिज्जमाणो पाढेहिं पढिज्जमाणो चित्तेहिं उवल्लिहिज्जमाणो दंसणू-
 सुएहि लोएहिं अहमहमिगाए पलोएज्जमाणो गिरिकंदरगउच्च कप्पपायवो वट्ठिउमारद्धोत्ति कमेण य पडिपुन्न-
 सरीरावयवो ताविच्छगुच्छसच्छहपरुढसिणिद्धमुद्धरुहसिहंडो विसुद्धपबुद्धबुद्धिपगरिसागिट्टलट्टभासाविसेसविसारओ
 पडिपुन्नसुयसायरपारगामी ओहिन्नाणमुणियचक्खुगोयराइकंतवत्थुवित्थारो अतुच्छसुइनेवत्थधरो सयललोयलोयणाणं-
 दजणणं देसूणट्ठवरिसपज्जायं कुमारत्तणमणुपत्तो समाणो भयवं बालभावसुलहत्तणओ कीडारईए अणेगेहिं समव-
 एहिं मंतिसामंतसेट्ठिसेणावइसुएहिं खेइविहिवियक्खणेहिं समं पारद्धो रुक्खखेइएण अभिरमिउं, तत्थ य एसा
 ववत्था-जो रुक्खेसु सिग्घं आरुइइ उत्तरइ य सो सेसाइं डिंभाइं पट्ठीए आरुइइऊण वाहेइ, इओ य सोहम्मे

ग्रीगुणचंद
हावीरच०
? प्रस्तावः
। १२५ ॥

देवलोए सोहम्माए सभाए अणेगदेवकोडिपरिबुडस्स सहस्सनयणस्स पुराओ जायंतेसु तियसेहिं समं विविहसमुलावेसु
धीरत्तणगुणवन्नणपत्यावे भणियं पुरंदरेण-भो भो सुरा ! अपुवं किंपि भयवओ वद्धमाणसामिस्स बालत्तणमणुपत्तस्सवि
धीरत्तणं सरीरपरक्कमो य, जं न तीरइ केणाधि बलपगरिसकलिएण देवेण दाणवेण वा सयमेव पुरंदरेण वा भेसिउं,
परक्कमेण वा पराजिजिउंति । एवं च निसामिऊण एगो सुरो अच्चंतकिलिट्ठचित्तत्तणओ अतुच्छमिच्छत्तुच्छाइय-
विवेवत्तणओ य विंतिउमारद्धो, कहं ?—

जह तह जंपियरम्मं सच्छंदुहामचिट्ठियसणाहं । मुक्काववायसंकं धन्ना पावंति सामित्तं ॥ १ ॥

किं संभयिज्ज एयं जं बालंपिहु न खोभिउं सक्का । अविचित्तणिज्जमाहप्पसालिणो देवदणुवइणो ? ॥ २ ॥

अहवा हत्थट्ठियकंकणस्स किं दप्पणेण परिमिण्णं ? । गंतूण सयं चिय तस्स धीरिमं लहु परिक्खामि ॥ ३ ॥

एवं संकप्पिऊण जत्थ सामी अभिरमइ तत्थ आगंतूण तरुवरस्स हिड्डुओ खोमणत्थं एगं महापमाणसरीरं अंज-
णपुंजगवलगुलियापडलकसिणप्पभोलिसामलियवणनिगुंजं तंबचूडचूडाइरेगरत्तलोयणं विज्जुदंडच्चंचलललंतलोलजी-
हाजुयलं उच्छडकुडिलवट्टुलकक्खडफडाडोवकरणदच्छं जुगक्खयल्लुभियसमीरघोरघोसं अणाकलियपयंडरोसवेगं
तुरियगमणं संमुहमित्तं दिवमहाविसं सप्परूवं विउवइ, सामीवि तं तहारूवं लीलाए अबलोइऊण जुन्नरज्जुखंडं व
वामहत्येण उहं दूरे मिच्छुभइ, ताहे देवो विचित्तेइ-एसो एत्थ न ताव छलिओ । अह पुणोऽवि सामी त्तिदूसएण

भक्तिप्रशंसा
सुरसर्पपरा-
करणं.

॥ १२५ ॥

अभिरमह, सो य देवो धिट्टिममवलंबिऊण आगामियमवायमविभाऊण य बालयरूवं विउध्विऊण सामिणा सद्धि-
रमिउमारद्धो, अह जिणेण वियक्खणत्तणओ पराजिया सवेऽवि बालगा पट्टिए समारुद्धिऊण समादत्ता वाहिउं,
अह वाहिएसु सयलेसु तेसु समागओ सुरकुमारस्सवि वारओ, पणामिया तेण सहरिसं पट्टी, आरूढो य तत्थ वद्ध-
माणसामी, तओ सो देवो सामिभेसणद्धं तं पिसायरूवं विउध्वित्ता पवद्धिउमादत्तो, केरिसं पुण तस्स रूवं?—खरफ-
रसा सूरवालसन्निभासे केसा घडीसंठाणसंठियं उत्तिमंगं उट्टियाकभल्लखल्लयमज्झं निडालवद्धं कविलजडिललोमाओ
भसुहाओ, मरुकूवयगंभीरं पुरंतर्पिगलपभाजालं लोयणजुयलं, जमल्लुल्लिमहलं चिविडं च नासापुडं, रुंदगिरिकंदरा-
गारं कवोलमंडलं, घोडगपुच्छसच्छहाओ दाढियाओ, करहस्स व दूरपलंविं ओट्टजुयलं, कुंजरस्स व बाहिं निग्गया
कुडिलभीसणा दसणा, अनिलंदोलियपडायव चंचला निसियकरवालदीहा जीहा, सुक्खाणुसरिसा कंधरा, कोट्टिगा-
णुरूवाओ दोवि बाहाओ, सुप्पचप्पडं पाणिसंपुडं, सिलापुत्तगोवमाओ करंगुलीओ, पुराणसिप्पिपुडरुक्खा अंगुलीणं
नहा; पक्कनसाजालजडिलं पंसुवंतराले प्सुत्तघोरंतविसहरं उरट्टिमुंजरं, अल्लिजरागारं उयरं, मुट्टिगेज्झा ठाणट्ठाणभग्गा
कडी, वालुंकीफलवलंबिरा वसणा, करिवरंगप्परूढं मेढं, दीहवीभच्छाविवन्नरोमावलीपरिखित्तं तालतरुदीहरं जंघा-
जुगं, नीसाहपत्थरविच्छिन्ना चलणा, कुहालदारुणा चरणंगुलीणं नहा । अवि य—

विमरालविडंविक्कयमकंदरुग्गिरियजलणजालोहं । चलनतलपहयभूयलचालियपासावसिहरग्गं ॥ १ ॥

श्रीगुणचंद
महावीरच०
४ प्रस्तावः
॥ १२६ ॥

उद्वपसारियदीहतरभुयग्गलाखलियसूररहपसरं । परिमुक्कमंहंतदुदुहासपायडियदढदाढं ॥ २ ॥
कंठपलंबिरपयतलविलग्गबीभच्छसरडवणमालं । नउलकयकण्णपूरं जज्जोइयकयमहासत्थं ॥ ३ ॥
उक्कत्तियचित्तयचम्मनिवसणं रुहिरमंसलित्ततणुं । अइघोरजराजज्जरअयगरपरिवद्धसंधतलं ॥ ४ ॥
पइसमयमुल्ललंतं नच्चंतं कहकहंति पइसंतं । उक्कट्ठिं च करितं भीसणसहेण भासंतं ॥ ५ ॥
इय तस्स भीसणं जिणवरेण दिठ्ठं महापिसायस्स । पइखणविवहुमाणं रूवमसिमेहतमसामं ॥ ६ ॥
तओ मुणियकइयववियारेण जिणेण सच्चहा असंभंतेण सो पइओ हेलाए पट्टियट्ठंमि मुट्ठीए, करयलकुलिसज्जणि-
यसरीराभिधाओव विरसमारसंतो झडत्ति पत्तो मडहत्तणं, निरुवक्कमकायत्तणओ चेव न सयसिक्करमुवगओ, नवरं
निच्छियसुराहिबइववणो जायपच्छायावो नियदुच्चरियचुन्नियंगो सच्चायरं पणमिऊण जिणं पढिउमाढत्तो—
हा दुट्ठु दुट्ठु तइलोयनाह ! एयं मए सभायरियं । सच्चंपि न सहहियं सहस्सनयणस्स जं वयणं ॥ १ ॥
तस्सऽणुरूवं संपइ संपत्तोऽहं फलं इमं भीमं । अवगन्नियगुरुवयणाण अहव किर केत्तियं एयं ? ॥ २ ॥
संसारमहाभयमवि जो तं विह्वसि देव ! लीलाए । अम्हारिसे भयकरे तुह तस्स हवेज्ज का गणणा ? ॥ ३ ॥
तथा—चलणंगुलिचालियकणयसेल डोल्लियमहल्लमहिगोल । जस्स किर बाललालाइयंपि चित्तं चमकेइ ॥ १ ॥
तस्सविय तुज्झ तइलोकनाह ! जो विक्कमं न याणामि । सो नाममेत्तओ चिय विबुहोऽहं न उण किरियाए ॥ २ ॥

सुरपिशाच-
रूपं
मुष्टिघातः.

॥ १२६ ॥

२२ महा०

एवंविहस्स दुच्चिणयविलसियं स्वमसु एक्कवारं मे । पयईएऽवि हु जं पणयवच्छला हुंति सप्पुरिसा ॥ ३ ॥
 इय खामित्ता भुवणेक्कबंधयं पणमिऊण सो तियसो । गयणयलं उप्पइओ चलंतमणिकुंडलाभरणो ॥ ४ ॥
 भयवंपि खणं एकं कीलित्ता ताहिं ताहिं कीलाहिं । चेडसुहडंगरक्खेहिं परिचुडो नियगिहंमि गओ ॥ ५ ॥
 अह समहिगऽट्ठवच्छरपज्जाए जयगुरुंमि जायंमि । हरिसियमणो नरिंदो तिसलाए पुरो इमं भणइ ॥ ६ ॥
 देवि ! कुमारो संपइ गहणसमत्थो कलाकलावस्स । वट्टइ ता उवणिज्जउ लेहायरियस्स पढणत्थं ॥ ७ ॥
 इय भणिए देवीए जएक्कनाहो महाविभूर्इए । गहविओ पसत्थतित्थुत्थसलिलभरिएहिं कलसेहिं ॥ ८ ॥
 नासानीसासोज्झं चक्खुहरं हरिणलंछणच्छायं । परिहाविओ य पवरं सुकुमारं देवदूसजुयं ॥ ९ ॥
 मणिमउडकडयकुंडलतुच्चियपमोक्खेहिं भूसणेहिं च । सुरवरसमप्पिएहिं अलंकिओ तक्खणं चेव ॥ १० ॥
 सिद्धत्थनरिंदेणवि नीसेसकलाकलावकुसलमई । अज्झावगो महप्पा वाहरिओ निययभवणंमि ॥ ११ ॥
 एगं महप्पमाणं ठधियं सिंहासणं च तस्स कए । अन्नं च थेववित्थरमुवणीयं जयगुरुनिमित्तं ॥ १२ ॥
 अह जाव नोवणिज्जइ सामी अज्झावगस्स पढणत्थं । सक्कस्स ताव चलयं सिंघासणममलमणिरुहरं ॥ १३ ॥
 ता ओहिम्माणेणं मुणिठं जयनाहपढणवुत्तंतं । चित्तेइ अहह मोहो कह विलसइ जणणिजणगाणं ? ॥ १४ ॥
 जं सयलसत्थपरमत्थजाणगं जयगुरुंमि पढणत्थं । अज्झावगस्स संपइ समप्पिउं अभिलसंतित्ति ॥ १५ ॥

श्रीगुणचंद
महावीरच०
४ प्रस्तावः
॥ १२७ ॥

सको इय चिंतंतो आगंतूणं महप्पमाणंमि । सिंहासणंमि ठविउं नाहं परमाएँ भत्तीए ॥ १६ ॥
वंदिता जोडियपाणिसंपुडो सदसत्थपरमत्थं । आपुच्छिउं पवत्तो सामीऽविय वोत्तुमारद्धो ॥ १७ ॥
सोऽवि उवज्झाओ परमं विम्हयमुव्वहंतो तं कहितं एगग्गचित्तो निसामेइ, जणणिजणगाइणो य विम्हियमणा
जाया । अह सदसत्थपयत्थे कहिऊण ठिओ, ताहे सक्केण साहियं तेसिं—जह जाइसरणाणुगओ आगम्भवासाओऽवि
नाणत्तयपरिग्गहिओ एस भयवं, पाणिपइद्वियं लट्ठमणिं व सच्चं वत्थुं नियमईए मुणइ, ता किमेवं अणत्थओ संरंभो
कओ?, एवमायन्निऊण विम्हियमणा परं पमोयमुवगया जणणिजणगा, पुरंदरोऽवि जिणं नमिउं दिवं गओ, तेण पुण
उवज्झाएण जे केऽवि पयत्था भयवओ वागरेंतस्स सम्ममवधारिया तयणुसारेण सुसिलिट्ठं विरइयं इंदवागरणंति । भय-
वंपि निरुवसग्गं कमेण पत्तो तरुणत्तणं, तयणुभावेण य तस्स सुसिणिद्धसुहुमकसिणकुंचिरकेसपासेण विराइयं छत्ता-
गारमुत्तिमंगं, सवणमूलावलंबिणा नलिणेणं व नयणजुयलेणोवसोहियं वयणं, अच्चंतसस्सिरीएण रयणेणं व सिरिवच्छेण
पसाहियं कणयसेलसिलापिहुलं वच्छत्थलं, गंभीरदक्खिणावत्ताए सप्पुरिसचित्तविच्चीएव नाभीए अलंकियं झसाणु-
रूवमुयरं, हंसतणुरुहकोमलेहिं लोमेहिं करिकराणुरूवं मंडियं जंघाजुयलं, अंगुलीदलग्गविप्फुरंतनहावलीए चिंताम-
णिपरंपराएव सोहियं जयपडागामगरमच्छाइलक्खणलंछियं चरणकमलं ।

अन्नं च—भाविरमपायमासंकिऊण मन्ने जिणस्स पढमंपि । हिययाओ नीहरिउं ठियं व केसेसु कुडिलत्तं ॥ १ ॥

लेखशाला
यौवनं च.

॥ १२७ ॥

रागोविहु थेवुप्पन्नपणयभावोऽवि भाविभयभीओ । वाढं कुणइ व वासं करचरणतलाधरतलेसु ॥ २ ॥

एवं च भयवंतं तरुणत्तणमुवगयं रूवविणिज्जियदेवदाणविंदसंदोहं नाऊण सेसमहीवईहिं नियनियधूयापाणि-
ग्गहत्थं पेसिया वरगपुरिसा सिद्धत्थनरिंदसमीवे, विन्नत्तो य तेहिं राया, जहा-देव ! अम्हे वद्धमाणकुमाररूवाइरेगरं-
जियमणेहिं नरिंदेहिं अप्पणप्पणधूयावरणत्थं तुम्ह सगासे पेसिया ता साहेह किमिह पच्चुत्तरं?, रत्ता जंपियं-सम्म-
मालोचिऊण कहिस्सं, वच्चह ताव तुब्भे निययावासेसु, एवं भणिए अवक्कंता ते पुरिसा, नरिंदेणवि साहिओ एस
वइयरो तिसलादेवीए, एयं च आयन्निऊण हरिसभरनिब्भराए जंपियं तीए-देव ! तुम्ह पुत्तपसाएण पावियाइं
मए पावणिज्जाइं, अणुभूयाइं अणुभूयपुवसुहाइं, जइ पुण इण्हिं तस्स वीवाहमहूसवं पेच्छामि ता कयकिच्चा
होमि, रत्ता वुत्तं-जइ एवं ता देवि ! वच्चसु कुमारसमीवं, पन्नवेसु य तं विवाहनिमित्तं, देवीए भणियं-महाराय !
न जुज्जइ पढमं चिय तत्थ मह गंतुं, लज्जापहाणो हि कुमारजणो होइ, ता सिक्खविऊण पेसिज्जंतु तप्पणइणो, एवं
वुत्ते रत्ता पेसिया कुमारसमीवे पाणिग्गहणपडिवज्जावणत्थं पणइणो, तेहि य गंतूण सविणयं जयगुरुणो साहिओ
तदादेसो, तं सोच्चा भगवया भणियं-भो महाणुभाव ! किं न मुणह मम चित्तवित्तिं? नोवलक्खह विसयविरागं?
न जाणह गिहवासपरिहरणाभिलासं? जेणेवसुल्लवह पाणिग्गहणविसए, तेहिं भणियं-कुमार ! मुणेमो सच्चं, किंतु
अणुवत्तणिज्जं अम्मतायाण वयणं अलंघणिज्जा नियपणइणो, न खलु दुल्लहो पच्छिमकाले गिहपरिचायभावो, न यावि

श्रीगुणचंद
महावीरच०
४ प्रस्तावः
॥ १२८ ॥

पुण्णमणोरहा पडिक्कल्लिस्संति पुणो तुम्हाभिप्पेयं अम्मापिउणो, भगवया भणियं-पाणिग्गहणमंतरेणावि पुवं चिय
अब्भुक्कयं मए इमं-जं न जणणीजणगेषु जीवंतेसु सब्बविरइं पडिवज्जिस्सामि, ता जइ एवं ठिए मइ संतोसमुब-
हंति जणणिजणगा किमकल्लाणं हवेज्जा?, का वा पाणिग्गहस्स लट्ठया?, जेण पेच्छइ पयडच्चिय विवाहसमए कलस-
परंपराठवणमिसेण दंसिज्जइ उत्तरोत्तरदुहाण पावपबंधो, पज्जलंतजलणच्छलेण पयडिज्जइ महामोहवियंभणं, मयणय-
लव्विलसंतधूमपडलनिभेण कहिज्जइ अत्तणो लहुयत्तणं, चउमंडलगावत्तणववएसेण परुविज्जइ चउगइयं संसारभमणं,
घयमहुपमुहवत्थुहुणणकवडेण दाविज्जइ सयलगुणगणदहणं, तरुणीजणभणिज्जमाणभंगलछउमेणरियंउग्गिरियंभाविज्जइ
चाउहिसमजसो, कंठावलंभियकुसुममालामायाए परुविज्जइ समीववत्तिणी दुक्खदंदोली, चंदणरसंगरागमिसेण सूइज्जइ
तक्खणं चिय कम्ममलायलेवो, कन्नगापाणिग्गहणकइयवेण दाविज्जइ अट्ठकम्ममहामोल्लभंडकिणणत्थं हत्थसज्जंति ।

किं बहुणा?-जं जं विवाहसमए विहिं पलोएमि सुहुमबुद्धीए । सो सो चित्तिज्जंतो रोमुद्धोसं जणइ मज्झं ॥ १ ॥
ता सुयह मोहपसरं अणुजाणइ मं विणा विद्वाहेण । एवं चिय निवसंतं अम्मापिउनिबुद्धकएण ॥ २ ॥
एवं भणिए पडुणा तो ते जंपंति विणयपणपंग्ग । तुम्हारिसाण काउं एयं नो जुज्जइ कुमार! ॥ ३ ॥
पणइयणपत्त्यणाभंगभीरुणो जं सयावि सप्पुरिसा । नियकज्जपवित्तिपरंमुहा य पयईए जायंति ॥ ४ ॥
तहा-किं उस्सभजिणवरेण पाणिग्गहणाइ नो कयं पुब्बिं? । किं वा न चक्किळ्छी परिमुक्ता संतिपमुहेहिं? ॥ ५ ॥

विवाहाय
मित्र-
प्रार्थना.

॥ १२८ ॥

इय एवं जंपंतेसु तेसु कंचुइजणेण परियरिया । तिसलादेवी सयमेव आगया भगवओ मूले ॥ ६ ॥

अह सत्तट्ट पयाइं अणुगंतुं संमुहं जिणो तीसे । आसणदाणप्पमुहं पडिवत्ति कारवइ सवं ॥ ७ ॥

अण्णोण्णघडियकरसंपुडं च देविं पडुच्च भगवंतो । जंपइ अम्मो ! साहह आगमणं किंनिमित्तंति ॥ ८ ॥

देवीए जंपियं—पुत्त ! तुह दंसणाओऽवि किमन्नं निमित्तं ? जओ एत्तिएण वसइ जीवलोगो भरियं दिसावलयं सुहावहा रायलल्ली संतोसमावइइ गेहं निबुइं उवजणइ पणइजणो विगयंधयारं तिहुयणं, ता किमवरं वरं साहेमि निमित्तंति, एवमाइज्जिठण भगवया चित्तियं—अहो अणाइक्खणिज्जो कोऽवि जणणीजणस्सावच्चे सिणेहो, अतुल्लं किंपि चच्छल्लं, असरिसा कावि अवलोयणाभिरई, जं सया चक्खुगोयरगएवि मए अम्वा ईसिअहंसणेऽवि संपइ एवं संतप्पइत्ति विगप्पिऊण पुणो भणिया देवी—अम्मो ! तहावि साहेसु किंपि पओयणं ? तिसलाए भणियं—पुत्त ! जइ एवं ता पडिवज्जसु विचाहमहसवं, जओ एयनिमित्तं एसो पणइजणो अम्हेहिं तुज्झ पासे पेसिओ, तुह विवाहुकंठिओ खु नराहिवो नयरजणो य, ममावि एत्तियमेव संपयं अपत्तपुवं सुहं, पडिपुन्ना सुहाणुभावेण सेसमणोरइत्ति, भगवयावि आगच्छकालाओऽवि मम एस पइन्नाविसेसो—जं अम्मापिऊणं अप्पत्तियकारिणी पवज्जावि न कायवत्ति चित्तिऊण निरभिलासेणवि अब्भुवगयं तयाइट्ठं, परितुट्ठा य देवी समं परिजणेण, निवेइओ एस वइयरो नरिंदस्स ।

एत्थंतरे सिद्धत्थरायमुवट्ठिओ पडिहारो निवडिऊण चलणेसु विन्नविउमाढत्तो य—देव ! समरवीराभिहाणराइणो दूओ

श्रीगुणचंद
महावीरच०
४ प्रस्तावः
॥ १२९ ॥

द्वारदेसे तुम्ह दंसणूसुओ चिट्ठइ, तत्थ को आएसो?, राइणा भणियं—लहुं पवेसेहि, जं देवो आणवेइत्ति भणिकुण पवेसिओ पडिहारेण, पणमिओ य तेण राया, उवविट्ठो य दिन्नासणो, पत्थावे य पुट्ठो नरिंदेण, जहा—भइ! किं आग-मणकारणं?, दूएण भणियं—देव! निसामेसु, अत्थि नियसोभापराजियकुबेरपुरे वसंतपुरनयरे समरंगणपरितोसिय-सुरञ्छरासत्थो जहत्थाभिहाणो समरवीरो नाम राया, तस्स य नियपाणनिविसेसा पउमावईए पणइणीए कुञ्छि-संभूया जसोयानाम कन्नगा, सा य कहं जसोयत्ति नाममणुपत्तत्ति निसामेह कारणं, किर इमीए जम्मसमए देवो समरवीरो रयणीए सुहपसुत्तो पभायसमए सुमिणं पासइ—जहाऽहं अंगरक्खिगापरिक्खित्तगत्तेहिं विविहपहरणकरेहिं सुहडेहिं परिकरिएहिं तरलतुरंगमेहिं गुडियाहिं गयघडाहिं नाणाविहपहरणजोहजुत्तेहिं पहाणरहवरेहिं परिवेढिओ सयंपि मत्तकुंजराधिरूढो उज्जाणमइगओ, तत्थ य ठियस्स सहसच्चिय पाउब्भूओ हलबोलो, अंतरंतरा नच्चंति केऽवि सुहडा केऽवि पलायंति केऽवि य महीयले धूलीधूसरा रुलंति पडंति विजयचिंधाइं विहडंति जयतूराइं, एवं च असमंजसं दट्ठूण मए इओ तओ डोलंतं गहियं नियळत्तं हत्थेण, पत्तो एगो महाविजयद्धओ, सोऽवि संठ-विओ सारिओ य, एवंविहं च सुविणं पासित्ता पडिबुद्धो संभंतचित्तो पभायसमए सुमिणपाढगे सहावेत्ता तेसिं सुमिणं परिकहेइ, तेहि य सिट्ठं—देव! पंचहिं कारणेहिं सुमिणोवलंभो हवइ, तंजहा—अणुभूएण दिट्ठेण चिंतिएण पयइचियारेण देवयावसेण वा, तत्थ न मुणिज्जइ तुम्हाणं एएहिंतो केणावि कारणेण सुमिणोवलंभो जाओत्ति, राइणा

त्रिशलाग-
मनं यशो-
दाभिधान-
हेतुः।

॥ १२९ ॥

भणियं-एवमेयं, न सम्मं उवलम्भेमि कारणं, तेहिं वुत्तं-जइ एवं ता करेह सच्चं सुविणंगं, जहा दिट्ठदिट्ठिंए सवसा-
मग्गिं काऊण गच्छह उज्जाणं, को दोसो?, न सुणिज्जइ कोऽवि परमत्थो, एवंपि कीरमाणे कयावि गुणो होज्जा,
साभिप्पाओ य किंपि एस डोलंतच्छत्तधरणविजयचिंधलाभोत्ति वुत्ते राइणा पडिवज्जिऊण तेसिं वयणं ताडाविया
सन्नाहभेरी, तीए सहायन्नणेण तक्खणादेव कयसवसंनहो नरवइसमीवसुवगओ सामंतवग्गो परिचत्तसेसवावारो
पुरो ठिओ जोहसमूहो, पासमल्लीणा करितुरयाइणो, तओ चाउरंगवलकलिओ पहाणहत्थिकंधराधिरूढो नयरदूरव-
त्तिणं गओ नंदणुज्जाणं, तत्थ य रयणिदिट्ठसुमिणभीसणत्तणं चित्तंतस्स तक्खणफुरियवामनयणपिसुणियानिट्ठवड-
णस्स किंपि अरइविगारमणुसालीणस्स वज्झवित्तीए काणणमणुपेच्छंतस्स नरिंदस्स सच्चिय पुवदिणपेसियचारपुरिससू-
इयपत्थावो चिरपरूढवेरसाहणगाढामरिसो अमुणियतदिवसनरवइवइयरो जुज्झसज्जो पच्चंतसामंतो दुज्जोहणाभि-
हाणो पहुत्तो उज्जाणसमीवं, दिन्नो परिवेढो, जाओ हलबोलो, लक्खियतदागमणो य निग्गओ उज्जाणबाहिं नरिंदो,
दिट्ठो य पडिरिउणा संगामसज्जो राया, तओ किं वियाणियं ममागमणमणेणंति खुभियचित्तेणवि दुज्जोहणेण पारद्धं
रत्ता सह पहरिउं । अह-

निसियखग्गकप्पियपयंडं नरमुंडमंडियाभोगं । दट्ठोद्वबद्धमोगगरनिप्पिट्ठुकिट्ठरहनिवहं ॥ १ ॥

कुंतग्गभिन्नकुंजरकुंभत्थलगलियमोत्तियसमूहं । तक्कालमिलियवेयालकिलिकिलारावभयजणगं ॥ २ ॥

श्रीगुणचंद
महावीरच०
४ प्रस्तावः

॥ १३० ॥

निवडंतलत्तधयचिंधनिचयसंछन्नमेइणीचट्टं । उच्चट्टसहत्थिविहम्ममाणनियपवरपरिवारं ॥ ३ ॥
करितुरयघायनिस्सरियरुहिरपूरिज्जमाणमहिगत्तं । रणतूररयुन्नचिरकबंधपेच्छणयभीसणयं ॥ ४ ॥
इय घोरसमरवावारमेक्कहेलाए काउमचिरेण । सिरिसमरवीररणा वट्ठो सो नागपासेण ॥ ५ ॥
भणिओ य सुमर रे इट्ठदेवयं एस वट्ठसि जमस्स । संपइ पाहुणगो तं दुच्चरियरहंमि आरूढो ॥ ६ ॥
दुज्जोहणेण भणियं भो नरवर ! कीस बाहरसि एवं ? । पारंभे चिय समरस्स सुमरणिज्जं मए सरिवं ॥ ७ ॥
नियकुलकमाणुरूवं अणुचेट्ठसु संपयं विगयसंको । देहेण कयं देहोऽवि सहउ को एत्थ अणुतावो ? ॥ ८ ॥

एवं च आयन्निऊण पडिवन्नकरुणाभावेण समरवीररत्ना नीओ नीयमंदिरं, उच्छोडिया बंधा, काराविओ ण्हाणभो-
यणाइयं, समप्पियाइं समरगहियाणि करितुरयाइणि, तेणावि अंगीकया सेवावित्ती, तओ जाओ राइणो परमसं-
तोसो, पसरिओ चाउद्दिंसि जसोत्ति, भणियं च रत्ना--अहो मम इमीए कन्नगाए पसवकालेऽवि एरिसो जसो दिण्णो,
तम्हा होउ एयाए जसोयत्ति जहत्थभिहाणंति वुत्ते महया रिद्धिसमुदणं कयं एवमेव से नामं ।

अह सा चंदलेहव वट्ठंती पत्ता कमेण जोवणं, अन्नया पुट्ठो राइणा नेमिस्सिओ--को इमीए पाणिग्गाहो भविस्सइत्ति ?,
सेणावि साहियं--देव ! सिरिवच्छलंछियवच्छयलो सयलसुरासुरनमियकरकमलो अट्ठमहस्सलक्खणधरो पुरिसप्पवरो नि-
च्छियं एयाए पई होहिस्सि, एवं निसुणिए ठिओ बरिंदस्स हियए तुम्ह कुमारो, तओ आहओ मेघनाओ नाम सेणावई

समरवीर-
दुर्योधनयुद्धं

॥ १३० ॥

समप्पिया तस्स जसोयकन्नगा, दिज्जो सयंवरविवाहजोग्गो महंतो हयगयकणगाइविच्छडो, भणिओ य जहा-भइ !
 गच्छसु तुरियं, कारवेसु पाणिग्गहणमहिमंति, तओ नरवइवयणाणंतरमेव चलिओ अक्खलियपयाणगेहिं एसो, अहं
 पुण एयकज्जनिवेयणत्थमेव पढमं चिय तुम्ह पासे पेसिओत्ति, ता देव ! एयं तं आगमणकारणं । रत्ता भणियं-भइ !
 सम्मं कयं, अणुरुवमेयं, पयट्टिज्जउ अकालपरिहीणं वंछियत्थो, दूएण जंपियं-देव ! कहं न पयट्टिज्जइ जेण विवाह-
 लग्गंपि आसन्नं वट्ठइत्ति बुत्ते रत्ता सेसनरवइवरगपुरिसा सम्माणिकुण विसज्जिया नियनियट्ठाणेषु, अन्नदिवसे य
 समागया सा रायकन्नगा वट्ठाविओ नरिंदो दवाविओ तीसे निवासनिमित्तं समुत्तुंगसत्तभूमिगो पासाओ पेसिया
 रसवई काराविया अन्नावि तक्कालोचिया पडिवत्ती, पसत्थमुहुत्ते य कयपवरसिंगारो अणेगसामंतसुहडपरिवुडो आगओ
 मेहनाओ सेणावई, पणमिओ अणेण राया, पुच्छिओ य कुसलोदंतं, राइणाऽवि तस्स दवावियं आसणं तंबोलाइदाण-
 पुवयं च पुट्ठो समरवीरनरेसरसरीरकुसलवत्तं, सविणयं साहिया य तेण, अह विविहसंकहाहिं गमिऊण खणमेक्कं रत्ता
 अन्नभणुत्ताओ समाणो उट्ठिओ मेहनाओ, गओ य निययावासे, समारद्धो विवाहोवक्कमो, बंधाविया मंचा, जहोचियं
 विरइयाइं आसणाइं, निरूविया विविहकम्मेषु किंकरा, परिकप्पियं वेइगाविमाणं । तं च केरिसं ?-

भरगयमणिचच्चिकिय सुवण्णवरकलसविरयणारम्मं । अइनिम्मलरंभागन्नखंभउदूयविजयपडं ॥ १ ॥

परिमुक्ककुसुमपुंजोवयारपरिभभिरभमररवमुहरं । निम्मलमुत्ताहलभरियचारुमणिकोट्टिमचउक्कं ॥ २ ॥

श्रीगुणचंद
भहावीरच०
४ प्रस्तावः
॥ १३१ ॥

चउदिसिविमुक्कदप्पणपडिबिंबियकामिणीवयणकमलं । ठाणट्टाणनित्रिसियवरमणिपडिहणियसंतमसं ॥ ३ ॥
गरुडमणिपसरियकिरणपडलविच्छुरियमहियलाभोयं । नवगोमयरसलित्तं व रेहए वेइयाभवणं ॥ ४ ॥
एवं च निवत्तिऊणं तक्कालोचियकायवं मेहनाहेण कहावियं सिद्धत्थरत्तो, जहा-समीवमागयं वट्टइ पसत्थं हत्थ-
ग्गहणमुहुत्तं, ता कुमारं घेत्तूण सिग्घमागच्छहत्ति । राइणावि एवमात्तत्रिऊण भणिया तिसला-देवि ! सिग्घं करेहि
कुमारस्स पुंखगाई कायवं, आसन्नो वहइ समओत्ति, एवं सोच्चा देवीए परमायरेण विविहप्पयारेहिं मंगलसहपुरस्सरं
पुंखिऊण सव्वोसहीहिं ण्हविओ कुमारो, नियंसाविओ महामोहं धवलदुगुल्लजुयलं, काराविओ सवं कायवविहिं,
अविय-गोसीससुरभिचंदणविलेवणापंडुरो जिणो सहइ । सरयनिसियरजोण्हाए धवल्लिओ कंचणगिरिव ॥ १ ॥
कसिणघणकेसपासो रेहइ सो कुसुमगुच्छसंछन्नो । पप्फुरियतारताटीवसोहिओ गयणभागोव ॥ २ ॥
सट्टाणपिणद्धविचित्तरयणनवभूसणभहियसोहो । जंगमभावमुवगओ रोहणसेलोव पडिहाइ ॥ ३ ॥
साभावियावि सोहा न तीरए जिणवरस्स साहेउं । किं पुण विसेसमंडणमंडियदेहस्स तत्थ खणे ? ॥ ४ ॥
एवं च कयउचियकायवे कुमारो निवेइयं राइणो, तेणावि निउत्ता नियपुरिसा-अरे पयट्टेह नगरमहसवं मेलेह
नायखत्तियवग्गं समप्पेह कुमारस्स पसाहियसरीरं जयकुंजरं जेण गम्माइ विवाहट्टाणंमि, जं देवो आणवेइत्ति भणि-
ऊण गया पुरिसा, निवत्तिओ नरिंदाएसो, तओ धवलपसाहियकरिवारूढो पवणपणचंतधयवडुग्घायसुंदररहवरा-

मेघनाद-
सेनानी-
विवाहः।

॥ १३१ ॥

रूढरायलोयपरियरिओ मणहरनट्टोवयारकुसलनचंतावरोहसुंदरीवंदनिरुद्धरायमग्गो वज्जंतमंगलतूररवाऊरियसयलदि-
 सामुहो सिद्धत्थनराहिवेण जेट्टभाउगनंदिवद्धणजुवराएण य अणुगम्ममाणो सिरिवद्धमाणकुमारो सायरमवलोयण-
 विखत्तचित्तेण भवणमालातलसंठिएण पुरजणेण दंसिज्जंतो अंगुलिसहस्सेहिं पुज्जमाणो आसीससएहिं अग्घविज्ज-
 माणो अक्खयसम्मिस्सकुसुमवुट्ठिवरिसेहिं संपत्तो कमेण विवाहमंडवंति, अह मंडवदुवारेच्चिय पडिरुद्धो पडिहार-
 जणेण सामन्नलोओ, पविट्ठो पहाणलोएण समं अग्घिभतरंमि, विलयाजणेण ओमिलणपुव्वगं झत्ति विविहं पसाहिया
 सा जसोयवररायकन्नावि, तथाहि—

रमणफलंगंमि तीसे आवद्धा पंचरायमणिकंची । अइविच्छिन्ने गयणंगणंमि हरिधणुहलेहव ॥ १ ॥
 नयणेहिं कज्जलुम्मिस्सिरोहिं सइदीहरोहिं निद्धेहिं । पच्चक्खा सरयसरिव सहइ सा नीलनलिणेहिं ॥ २ ॥
 कंठतलंमि य तीसे लोलंतो नवसरो वरो हारो । वयणिंदुविब्भमागयतारावलिलीलमुव्वहइ ॥ ३ ॥
 तीसे जावयरसपंकपाडलं कोमलं चलणजुयलं । पल्लवजुयं व नज्जइ वम्महकंकिलसाहिस्स ॥ ४ ॥
 भालतलंमि य तीसे लिहिओ गोरोयणाए वरतिलओ । तह दससु अंगुलीसु आविद्धं मुहियाजालं ॥ ५ ॥
 इय सविसेसपसाहणपसरंतसरीरकंतिरमणिज्जं । मंजुमणिनेउरारवसवणागयहंसखलियगई ॥ ६ ॥
 मणिकुट्टिमपडिर्विचियमुहकमला मत्तकुंजरगईए । चलिया चेडीचकेण परिवुडा सा नरिंदसुया ॥ ७ ॥

श्रीगुणचंद
महावीरच०
४ प्रस्तावः

॥ १३२ ॥

पत्ता य तत्स्वणागयपुरोहियारद्धजलणकम्भमि । नववंदणमालामणहरंमि वरवेइगाभवणे ॥ ८ ॥
तत्तो पाणिगगहणं पारद्वं गीयमंगलसणाहं । सयलतइलोकदावियपरमाणंदं महिह्णीए ॥ ९ ॥
एत्थंतरे उभयपक्खेहि वि काराविओ जणाणमुवयारो दावियाइं मिगनाभिपमुहसुरहिगंधविलेवणाइं सरभसरुंत-
छप्पयपयनिवेसभजिराइं कुसुमदामाइं सुरहिगंधबंधुरा पडिवासा भूरिकप्पूरपारीपहाणाइं पूगीफलसणाहाइं नागवल्ली-
दलाइं देवंगचीणद्धचीणदोगुलपट्टपमुहाइं पवरवत्थाइं केयूरकुंडलकिरीडतुडियकडयाइणो आभरणविसेसा सिंधुतुरु-
कवल्लीयवज्जरकंबोजाइसुखेत्तजायाओ तुरयबंदुराओ मंदमहाइविसिद्धवंसप्पसूया महागयविसेसा, एत्थंतरे जलणे हुणि-
ज्जमाणंमि महुघयाइंहिं कन्नावराण वित्तं चउत्थमंडलगपरिभमणं, ताहे सेणावहणा आणंदुल्ललियबहलपुलएण कोडी-
वत्तीसं पवररूवस्स कणगस्स कुंडलकडिसुत्तयमणिकिरीडपमुहं तमाभरणं कच्चोलसिप्पिथालाइयं च कलहोयमयभंडं
अइदूरदेससंभूयचित्तचेलाइं भूरिभेयाइं कन्नाए पाणिविमोयणंमि दिन्नाइं कुमारस्स, सिद्धत्थनरिंदेणवि बहुगाए
कणगवत्थलंकारा परितोसमुवहंतेण वियरिया भुवणदुल्लंभा ।

एवं च सुरासुरनरपरितोसकारए वित्ते विवाहमहसवे कए भोयणाइसक्कारंमि सट्ठाणेसु पडिनियत्तंमि रायलोए
नियनयरमुवगयंमि मेहनायसेणावइंमि ससहरकरगोरपासायसिहरसंठियस्स उचियसमए दिव्विसयमणुभुंजमाणस्स
पुन्नपगरिसुप्पज्जंतर्चितियत्थस्स देवगणोवणिज्जमाणपवरवत्थगंधमल्लविलेवणालंकारस्स ववगयरोगायंकस्स कयाइ

श्रीवीरस्व
यशोदया
विवाहः.

॥ १३२ ॥

सेवागतुंवरुसमारद्धकलरवपंचमुग्गारसवणेण कयाइवि सायरपणच्चिरसुरवहूपेच्छणयावलोयणेण कयाइ गंभीरजण-
विवायनिन्नयकरणेण कयाइ जणणिजणगसमीयगमणेण भगवओ वोळित्ति वासरा ।

अह गएसु कित्तिएसुवि संवच्छरेसुवि आवन्नसत्ता जाया जसोया, कालक्रमेण य पसूया सुकुमारचरणकरयलं चारु-
रूवोवसोहंतसरीरावयवं तेयसिरिं व पच्चक्खं दारियं, कयं च समुचियसमए पियदंसणत्ति से नामं, सा य सायरमुव-
लालिज्जमाणा पवड्डिउमारद्धत्ति । अह भगवओवि वट्टमाणंभि अट्टावीसइमे वरिसे पालियनिकलंकपासजिणपणीय-
धम्मा अम्मापियरो कुससंथारयमारुहित्ता कयभत्तपच्चक्खाणा अपच्छिमसंलेहणाञ्जुसियसरीरा तइयभवे अवरवि-
देहंभि अवस्सपावियवनिबुइणो कालं काऊण अञ्चुयकप्पे देवत्तेण उववन्ना, ततो सोगाउरेण नंदिवद्धणपमुहेण
रायलोएण कओ तेसिं सरीरसक्कारो, कयतकालोचियकायवे य सट्टाणट्टियंमि तंमि अणिट्ठं दट्ठं अपारंतोव पत्थिओ
अत्थमणगिरिं दिणयरो, सउणिकोलाहलरवेण रोविउमारद्धव संझा, निस्सरंतभमररिंछोलिच्छलेण अंसुजालं व मुक्कं
कमलायरेहिं, सदुक्खमहिलाजणमणुसासिउं व पयट्ठा रयणी, विरहानलसंतत्तगतं रायलोयं निवविउकामोव
समुग्गओ ताराहिओ, अहापभायाए रयणीए समुग्गयंमि दिणयरे अचंतदुस्सहसोगावेगविवससरीरं पिव विरह-
विहुरंतैउरीपरिगयं नीसेससयणवग्गपरिउडं नंदिवद्धणजुवरायं पेच्छिऊण भणियं भगवया-भो परिचयह सोयं,
अणुचित्ह परमत्थं, निरत्थओ खु सोगो, जओ-अणियारियसच्छंदसंचरणदुल्लिओ पंचाणणोव कयंतो सुमिणगं व

श्रीगुणचंद
महावीरच०
४ प्रस्तावः
॥ १३३ ॥

खणदिट्टनट्टं संजोगविलसियं माइंदजालरमियं पिव मुहुत्तमेत्तसुंदरं पेम्मं कोदंडलट्टिच्च गुणाणुगयावि कुडिला कज्ज-
परिणई संझम्भगोच्च अचिरावत्थाणं धणं महाभुयंगा इव दुन्निवारा विविहरोगायंका, ता सब्हा नत्थि किंपि
एत्थ संसारे सोयणिज्जं पडिवंधट्टाणं वा पबलं, एकं चिय अणुसरह विवेयं परिचयह भोगपिसायं कुणह कायवं,
सब्बसाहारणो हि एस वइयरोत्ति । एयं ते निसामिऊण पयणुपेमाणुबंधा सिट्ठिलियसोयावेया जायत्ति ।

अन्नदिवसे य जोइससत्थपरमत्थवियक्खणनिमित्तिगोवइट्टपसत्थमुहुत्तंमि पहाणलोगेण अणेगपयारेहिं भणिओऽवि
जयगुरू जाव न पडिवज्जइ रज्जं ताव नंदिवद्धणो अभिसित्तो सिद्धत्थराइणो पए, पणमिओ नायस्सत्तियवग्गेणं
बहु मन्निओ नयरकारणिएहिं परियरिओ सामंतेहिं पडिवण्णो सेवगजणेणं पूइओ पच्चंतराईहिं, एवं जाओ
सो महाराओत्ति ।

अन्नया य तं सयणवग्गाणुगयं भयवं भणिउमाढत्तो-भो पडिपुन्ना मम संपयं पुव्वपडिवन्ना पइन्ना, कयं च सबं
करणिज्जं, ता सिट्ठिलेह नेहगंठिं, होइ धम्मसहाइणो, अणुमन्नेह मम सब्बविरइगहणत्थंति, अह वज्जासणिनिवडण्डु-
विसहं निसामिऊण वयणमेयं भणियं तेहिं-कुमारवर ! अज्जवि महारायसोगो तहट्टिओ चेव अम्हाणं नट्टसल्लं व
विहवइ हिययं, किं पुण अकाले चिय तुम्हेहिं सह विओगो खयक्खारावसेगोच्च दुस्सहो?, अहो मंदभगसिर-
सेहरा अम्हे जेसिं उत्तरोत्तरा निवडइ दुक्खदंदोलित्ति भणिऊण रोविउं पवत्ता, बहुप्पयारं च सासिया महुवव-

श्रीसिद्धार्थ-
त्रिशलो-
देवतम्.

॥ १३३ ॥

णेहिं भगवया, कहकहवि निरुद्धबाहूपवाहा य तकालचउग्गुणीभूयं संताववेगं निरुंभिऊण भणिउमाढत्ता—अहो परमे-
सर! करुणापरो हवसु अम्ह जीवियवे, परिहरसु संपयं सबविरइवंछं, एयंपि काऊण तुमए पाणिणो रक्खणिज्जा, ते
य जइ पढमंपि दुस्सहविओगकरवत्तभिज्जमाणहियया रक्खिज्जिस्संति ता किमजुत्तं होज्जा?, तुम्हेहिं रहिया नूणं
अवगयलोयणव्व अमुणियगम्मागम्मविभागा वइदेसिगा इव अणाहा खणमेत्तंपि न संधीरेमो अप्पाणंति, भगवया
भणियं—जइ एवं ता सम्ममालोचिऊण भणइ—केत्तियकालेण तुम्हे ममं दिक्खागहणत्थमणुमन्निस्सइ?, तेहिं
भणियं—संवच्छरदुगेणं अइगएणंति, भगवया जंपियं—एवं होउ, परं मम भोयणाइसु न तुम्हेहिं विसेसचिंता कायव्वा,
तेहिं भणियं—एवं करिस्सामो, तओ तद्दिणाओ आरब्भ परिचत्तसव्वसावज्जवावारो सीओदगपरिवज्जणपरायणो
फासुयाहारभोई दुक्करवंभचेरपरिपालणपरो परिमुक्कणहाणविलेवणपमुहसरीरसक्कारो फासुओदगेण कयहत्थपायपक्खा-
लणाइकायव्वो जिणिंदो ठिओ वरिसमेगं ॥ तर्हि च—

परिमुक्काभरणोऽविहु णहाणविलेवणविवज्जिओऽवि जिणो । जुगवुग्गयवारससूरतेयलच्छिं समुव्वइइ ॥ १ ॥

सयणोचरोहणेहेण धरियगिहसरिसवज्जवेसोऽवि । लक्खिज्जइ जयनाहो संजमरासिच्च पक्खो ॥ २ ॥

सा कावि गिहगयस्सवि जिणस्स मज्झत्थया पवित्थरिया । जा निग्गहियमणाणवि मुणीण चित्तं चमक्केइ ॥ ३ ॥

अह वच्छरपज्जंते तिलोयचूडामणी महावीरो । वारिसियमहादानं दाउं परिचिंतए जाव ॥ ४ ॥

श्रीगुणचंद
महावीरच०
४ प्रस्तावः
॥ १३४ ॥

सोहम्मदेवलोए सुहासणत्थस्स ताव सक्कस्स । रयणपहपसरपयडं झडत्ति सिंहासणं चलयं ॥ ६ ॥
तच्चलणे ओहीए सो नाउं नाहमाणसविकप्पं । अइरभसभरवियंभियपुलउप्पीलंघियसरीरो ॥ ६ ॥
सिंहासणाओ उट्टिय सत्तट्ट पयाइं संमुहं गंतुं । थोउं जएकनाहं चित्तेउभिमं समादत्तो ॥ ७ ॥
भयवं जिणवरवीरो आवरिसं दाणमीहए दाउं । तस्स य धणप्पयाणं जुज्झइ मह संपयं काउं ॥ ८ ॥
इय चित्तिऊण जक्खं वेसमणं आणवेइ वज्जहरो । निक्खमणदाणजोग्गं खिव कणगं । जणगिहंमिस्सि ॥ ९ ॥
इमं च सोच्चा धरणिवट्टुचुंविणा मत्थएण पडिच्छिऊण सुरिंदसासणं कयकिच्चमप्पाणं मन्नंतो वेसमणो तिरि-
यजंभगे देवे आणवेइ, तेऽवि तहत्ति विणएण पडिसुणित्ता जिणिंदमंदिरे तरुणतरणिसप्पगासं चामीयररासिं वरि-
संति । तओ भयवं पइदियहं तियचउक्कचचरचउम्मुइमहापहपहेसु अन्नेसु य तहाविहट्टाणेसु बहूणं सणाहाण य
अणाहाण य पंथियाण य करोडियाण य कप्पडियाण य वाहियाण य वइदेसियाण य रिणपीडियाण य दोगच्चसं-
तावियाण य अन्नेसिंपि धणाभिलासीण अणिवारियप्पसरं वरवरियाघोसणापुच्चयं कणगं सययं दवावेइ, तं च महया
पबंधेण दिज्जमाणं अट्टलक्खाहिगएगहिरन्नकोडीमेत्तं एगदिणेणं निट्ठविज्जइत्ति ।

अह मगहमसूरकलिंगवंगसोरट्ठपमुहदेसेसु । अच्छिन्नसुवन्नमहापयाणओ पसरिया किच्ची ॥ १ ॥
ताहे जंपंति जणा परोप्परं तेसु तेसु ठाणेसु । चल्लह लहु भयवंतं पेच्छामो तत्थ गंतूणं ॥ २ ॥

प्रतिज्ञा-
पूर्तिः वार्षि-
कदानम्.

॥ १३४ ॥

तवणिज्जपुंजलाभेण इह भवे विगयदुक्खमप्पाणं । कुणिमो परलोयंमि य तदंसणजणियपुत्तेण ॥ ३ ॥
 परभवपरूढखरदुक्खनिवहसंतत्तसवगत्ताणं । अन्नो नत्थि उवाओत्ति अम्ह एसो हवउ सरणं ॥ ४ ॥
 इय णेगेसुं मग्गणगणेषु इत्तेसु दूरदेसाओ । पूरियमणोरहेसुं अन्नेसु नियत्तमाणेषु ॥ ५ ॥
 कुंडग्गामंमि पुरे रुंदासुवि तासु तासु रत्थासु । निहयनिहलियउरो दुक्खेण जणो पत्तिभमइ ॥ ६ ॥
 जत्थ निहाणे दिट्ठिं पम्हलधवलं परिक्षिखइ वीरो । दट्ठइ तत्थ हिरन्नं करुणारसमच्छरेणं व ॥ ७ ॥
 अत्थिजणपरिवुडे जिणवरंमि गेहंगणे भमंतंमि । परिसकिरकप्पमहादुमव लक्खिज्जए पुहई ॥ ८ ॥
 दाणे य जायणंमि य दायगतकुयजणेण सबत्थ । सरिसच्चिय उल्लावा वियंभिया देहि देहित्ति ॥ ९ ॥
 एत्थ रयणुकर एसु ठवेह एत्थ य पवित्थरे वत्थे । पूरेह एत्थ तवणिज्जपुंजए मग्गणनिमित्तं ॥ १० ॥
 इय दाणनिउत्तजणस्स पइदिणं किंकरे भणंतस्स । पुणरुत्तो वावारो जाओ संवच्छरं जाव ॥ ११ ॥
 अखलियपसरं सिरिजिणवरेण दिंतेण दुत्थियाण धणं । सेसाणवि पयडिज्जइ सिवपुरपंथो धुवं एस ॥ १२ ॥
 सद्वावायनिबंधण धणेवि जो कुणइ मोहिओ मुच्छं । सो दुकरतवचरणे अत्ताणं कह व संठविही ? ॥ १३ ॥
 ता जिणवराणुमाणेण सबविरइं समीहमाणेण । अन्नेणवि एवं चिय पयट्ठियवं सइ धणंमि ॥ १४ ॥
 एवं च दाणे अणुदियहं पयट्ठमाणे नंदिवद्धणनरिंदो नियपुरिसे सद्वावेत्ता एवं आणवेइ-भो भद्दा ! एयस्स नय-

श्रीगुणचंद
महावीरच०
४ प्रस्तावः

॥ १३५ ॥

रस्स तेसु तेसु पएसेसु बहूओ महाणससालाओ काराविऊण विउलं असणपाणखाइमसाइमरूवं आहारं उवक्ख-
डेह, तयणंतरं च जे जहागच्छंति खुहाभिभूया तण्हापरिसुसियकंठा पासंडत्था मिहत्था वा अन्ने वा तहारूवा
तेसिं तहा आसत्थाणं सुहासणगयाणं हरिसुप्फुल्लोयणाणं तं चउविहंपि आहारं सत्तायरेण दवावेह, तहा ठाणे
ठाणे मुंचह मंदभद्दाइजाइणो करिणो चउद्धिसं संठवेह सूररहतुरयविब्भमे पवरतुरंगमे सवत्थ पयडह रहनिवहे
पएसे पएसे मेल्लह पवरपट्टणुग्गए वत्थसमुदए दंसेह गामागराइणो संनिवेसे, एएहिंतो जो जं समीहेइ तस्स तं
वियरहत्ति, जं देवो आणवेइत्ति भणिऊण निग्गया पुरिसा, समारद्धो सवत्थ नरिंदाएसाणुरूवो उवक्कमो । अह
अनिवारियवेरिए समगणियरायरोरे अमंदाणंदसंदोहजणणे भगवओ पयट्ठे संवच्छरियमहादाणे एत्तियं अत्थो
सवसंखाए गओ—

तिन्नेव य कोडिसया अट्ठासीयं च होंति कोडीओ । असियं च सयसहस्सा सवग्गेणं दविणसंखा ॥ १ ॥

इय मग्गणलोयं तप्पिऊण आवरिस कणगवरिसेण । पवज्जापडिवत्तिं कुणइ मणे जिणवरो वीरो ॥ २ ॥

अह बंभलोयकप्पे रिट्ठमि विमाणपत्थडे विउले । दिच्चविमाणोवगया एए देवा महासोक्खा ॥ ३ ॥

सारस्सयमाइच्चा वण्णी वरुणा य गहतोया य । तुसिया अवावाहा अग्गिच्चा चेव रिट्ठा य ॥ ४ ॥

तक्खणविचलियसीहासणा य ओहीएँ नायनियकिच्चा । नियनियपरियणसहिया झडत्ति जिणपासमल्लीणा ॥ ५ ॥

वार्षिकदा-
नम्.

॥ १३५ ॥

विणयपणमंतमत्थयगलंतमंदारसुरहिकुसुमभरा । तत्थाहिं गिराहिं जिणं थोउं एवं समारद्धा ॥ ६ ॥
 जयसि तुमं मयरद्धयसिंधुरखरनहरदारुणमइंद ! । चलणग्गचालियाचलसंखोभियसधरधरणियल ! ॥ ७ ॥
 नियकज्जपरंमुहभुवणरक्खणक्खणिय ! परमकारुणिय । नायकुलकमलवणसंडचंडमायंड ! तुज्झ नमो ॥ ८ ॥
 जह लोयालोयगयंपि नाह ! तं मुणसि वत्थुपरमत्थं । तह किं कयाइ जाणइ मंदमई मारिसो-लोओ ? ॥ ९ ॥
 अहवा हेलुल्लासियकरपसरनिरुद्धतिमिरनियरस्स । सूरस्स पुरो खज्जोयगाण का होइ देहपहा ? ॥ १० ॥
 तहवि य निययाहिगारं नाह ! कलिऊण नूणमम्हेहिं । सुमरणमेत्तनिमित्तेण तुह इमं सीसए किंपि (सामी) ॥ ११ ॥
 पव्वज्जं पडिवज्जसु भवरुयसंतत्तगत्तसत्ताणं । तित्थंकर ! तित्थमणत्थमंथणं लहु पयट्ठेसु ॥ १२ ॥
 अइमूढकुत्तिथियदुट्ठदेसणातिमिरनियरअंतरियं । पयट्ठेसु मोक्खमग्गं निरुवमनाणप्पईवेण ॥ १३ ॥
 अइभूरिविचित्ताइसयरयणकारुन्नवारिभरियाओ । वयणामयं पगिण्हउ लोओ तुह सायराउव ॥ १४ ॥
 निस्सामन्नं सामन्नभावमायन्निऊण सयलजणो । रोमंचकंचुइल्लो आकप्पं तुह कहं कहउ ॥ १५ ॥
 इय सविणयदेवगणोवइट्ठकायवदुगुणिउल्लासो । जाओ जएक्कचक्खू सविसेसं मोक्खसोक्खमई ॥ १६ ॥
 एवं च विन्नविऊण सट्ठाणं गएसु लोगंतियतियसेसु उट्ठिऊण भयवं सीहासणाओ पासवत्तिणा परियणेण अणु-
 गम्ममाणो गओ नंदिवद्धणपमुहाणं नायखत्तियाणं समीवे, तेऽवि जिणमितं दट्ठूण सत्तट्ठ पयाइं गया सम्मुहं, कया

श्रीगुणचंद
महावीरच०
४ प्रस्तावः

॥ १३६ ॥

उचियपडिवत्ती, दवावियं महप्पमाणं सिंहासणं, निसन्नो जिणो, अणुरूवासणेसु य जहक्कमं उवविट्ठा नंदिवद्धणाइणो । तओ ते भगवया अमयबिंदुसंदोहसुंदरीए सभावमहुराए अपुणरुत्ताए गंभीराए भारईए भणिया, जहा-भो देवाणु-प्पिया ! पडिपुत्तो तुम्हाणमवही, जाओ पत्थावो मम सबविरइपडिवत्तीए, ता सहारिसं अणुमन्नह इयार्णि, सुयह पेमाणुबंधं, निट्ठुरं कुणह विओगकायरं नियमणंति, ते य एवमायन्निउण गाढमण्णुपरिपूरिज्जमाणगलसरणिणो कह-कहवि निरुद्धसोगावेगा अणवरयनिससरंतनयणंसुबिंदुजालच्छलेण पणयप्पम्भारं व चिरं उग्गिरिऊण भणिउमाढत्ता-भयवं ! तुम्ह एवं भणंता वज्जमया धुवं अम्ह सबणा जं न संपत्ता बहिरत्तणं, बहरसारप्परमाणुविणिम्मियं हिययं जं न वच्चइ तडत्ति सयसिकरत्तणं, निहक्खिन्नत्तणपरममंदिरं व सरीरमिमं जमज्जवि न पवज्जइ रसायलगमणं, एवं ठिए य कहं पत्थुयत्थाणुमन्नणनिमित्तं पयट्ठउ बराइणी वाणी, जाओ-को होही विसमकज्जोयहिनिवडिराण अम्ह हत्थावलंबो ? कहं वा ससुरासुरनरनरिंदसंदोहवंदणिज्जपायपंकेरुहेण तुमए विरहियं भुवणत्तयपयंडं सोहिस्सइ नायखत्तियकुलं ? अहो महामंदभागिणो अम्हे जेसिं करयलाओऽवि अवक्कमइ रयणंति, एवमाईणि कलुणवयणाणि भासिऊण निरभिलासा चेव निवडिऊण चलणेसु भगवओ विन्नर्त्ति काउं पवत्ता—

जइवि जिणनाह ! तुम्हे पवज्जं काउमुज्जमह इर्णिह । तहविहु अम्ह सुहट्ठा पडिवज्जइ निक्खमणमहिमं ॥ १ ॥
तेसिं उवरोहेणं तओ जिणिंदो इमंपि पडिसुणइ । अब्भत्यणभंगपरंमुहाइं हिययाइं गरुयाणं ॥ २ ॥

गुरुणाम-
नुज्ञा,

॥ १३६ ॥

अह नंदिवद्धणनरिंदेण भणिया नियपुरिसा-अरे सिग्घं महरिहं भगवओ अणुरूवं अभिसेओवगरणं उवाह-
 रेह, जं देवो भणइत्ति सम्मं पडिसुणिऊण निग्गया पुरिसा, पउणीकया अट्ठोत्तरसहस्ससंखा अणेगे सुवन्नाइ-
 कलसा, उवाहरियाइं समत्थपसत्थत्तिथसमुत्थाइं सलिलाइं, उवणीयाओ परमोसहीओ, पणामिया गोसीसचंद-
 णाइविलेवणविसेसा, एत्थंतरे चलियासणा वत्तीसंपि पुरंदरा विमिह्यमणा ओहिणाणसामत्थमुणियपरमत्था
 तक्खणं महप्पमाणविमाणारूढा वियसियसयवत्तविसाल्लोयणा अहचंदणाणुलित्तगत्ता नियंसियसिलंधपुप्फसुह-
 फरिसपवरदूसरयणा कुंदसंखदलदगरयधवलदंतपंतिरेहंतवयणा अंजणपुंजघणमसिणरुयगरमणिज्जकेसपासा भद्दजो-
 घणे वट्टमाणा मऊहपडलपल्लवियचूडामणिपसाहियमत्थया अणेगरूवाभरणभूसियसरीरा सोमचारुरूवा छत्तचिंधाइ-
 विविहककुहधारिणो असंखदेवकोडिचडगरपरियरिया पडहसुइंगकाहलतिलिमहुडकाइतूररवभरियंबरा जिणिंदस्स
 अंतियं समागया, तिपयाहिणादाणपुवगं च पणमिऊण पराए भत्तीए पट्टणो पायपंकयं कयत्थमप्पाणं मन्नंता
 जिणचरणमुहाविन्नाससुंदरे निसन्ना भवणंगणे ।

अह अच्चुयामरिंदेण हरिसुलसंतदेहेण भणिया नियनियदेवा-भो सिग्घमेव निवत्तह जिणस्स महावीरस्स जोग्गं
 महंतं निक्खमणाभिसेयं, ते य एयमायज्जिऊण कयपणामा अणेगकणयाइकलसे खीरोयसलिलपडिपुत्ते असंखपुप्फप-
 डलाइं च अन्नं च तहप्पगारमभिसेयपाओग्गं पहाणवत्थुनिवहं अच्चुयसुराहिवस्स पणामेति, तओ अच्चुयतियसाहिंवो

श्रीगुणचंद
महावीरच०
४ प्रस्तावः
॥ १३७ ॥

सयलनियदेवपरिवरिओ तेहिं दिव्वेहिं कणयाइकुंभेहिं अट्टसहस्ससंखेहिं दिव्वोसहिसुगंधगंधुम्मिस्सेहिं मंदिरद्वियं
भयवंतं हरिसवियसियवयणो अभिसिंचइ, एवं कमेण सेसावि सुराहिवइणो चंदसूरपज्जंता ण्हवंति जयगुरुं, अह तेसु
मज्जणं काऊण सट्ठाणद्विएसु नंदिवद्धणो राया कयमुहकोसविन्नासो परेणं विणएणं अचंतमप्पमत्तचित्तो तेहिं पुव्वो-
वणीएहिं चामीयराइकलससहस्सेहिं गंधुदुरपवरतित्थजलभरिएहिं मज्जेइ जिणवरं, तहा वट्टमाणे य भगवओ मज्ज-
णमहसवे केइ सुरिंदा चालिंति मंदं मंदं चामीयरदंडुडामराओ चामराओ केवि धारिंति नियधवलिमाविजियसिय-
सयवत्ताइं आयवत्ताइं केवि संसुहमभिट्ठाविति पणट्ठसंपणं पवरदप्पणं केवि करयलेणुव्वहंति सुगंधखीरोयसलिलपुन्न-
पिहाणपउमगंधुकुडे कुडे केवि उप्पाडेति डज्जंतागुरुधणसारसुरहिधूवधूमंधयारलंछियं पंचवन्नरयणधूवकडुच्चुयं केवि
समुव्वहंति परिमलमिलंतालिसामलाओ दसद्वयन्नकुसुममालाओ, अन्ने देवा य देवीओ य भगवंतं अभिमुहद्वियाओ पज्जु-
वासिंति । अह निव्वत्तियम्मि मज्जणे नंदिवद्धणो राया दोचंपि उत्तरावक्कमणं सीहासणं विरयावेइ, तत्थद्वियं च भयवंतं
सेयापीयकलसेहिं ण्हवेइ, तयणंतरं च णं अलंकारियस्स पुव्वाभिमुहसीहासणसन्निसन्नस्स सामिणो सुरभिमुकुमालंगध-
कासाइल्लहियसरीरस्स गोसीससरसचंदणचच्चियंगस्स परिहियनिरुव्हयफलिदुज्जलदिव्वदेवदूसजुयलस्स निवद्धपंचराय-
रयणकडिसुत्तयस्स कणगसेलसिलाविच्छिन्नवच्छत्थलघोलंतविमलमुत्ताहलकलावस्स विचित्तमणिसंढमंडियकुंडलुज्जो-
वियगंडयलस्स रयणुकडकिरीडविभूसियसिरस्स पंचवन्नपुप्फमालालंकियस्स पाक्खित्तसुगंधवरवासस्स भगवओ वट्टमा-

दीक्षामि-
पेकः.

॥ १३७ ॥

णस्स वंदिऊण चलणजुयलं सुरासुरिंदा पुणो पुणो धरणियलनामिउत्तिमंगा आसीसासएहिं थुणिउं पवत्ता, कहं ?—
 विजयसु जएक्कबंधव ! ससुरासुरतिहुयणेणवि अजेयं । अचंतमहलं मोहमल्लमचिरेण लीलाए ॥ १ ॥
 मिच्छत्ततिमिरमुच्छिदिऊण सन्नाणसूरकिरणेहिं । पयडेसु मुत्तिमगं विमग्गलगाण भव्वाण ॥ २ ॥
 पालेसु समणधम्मं चिरकालं जाव निग्गयपयावो । अजियं जिणेसु मज्झे जियस्स निवससु तुमं नाह ! ॥ ३ ॥
 तुह अणवरयं गुणनिवहकित्तणारावओ विबुहलोगो । सवत्तो दिसिबलयं पकुणउ कोऊहलाउलियं ॥ ४ ॥
 तुज्झ जसो कुमुओयरगोरो भुवणत्तएवि हिंडंतो । सवत्तो उरगयचंदबिंबसोहं समुवहउ ॥ ५ ॥
 सिंहस्स व तुह अचंतविक्रमं पेच्छिऊण तरलच्छा । भीया कुत्तिथियमिगा एत्तो दूरे पलायंतु ॥ ६ ॥
 इय आसीवायपुरस्सरहिं थुणिउं गिराहिं भुवणगुरुं । नट्टविहिं च पयट्टिय विरयंमि सुरिंदविंदमि ॥ ७ ॥
 भावियजयगुरुविरहग्गिदूमिओ नंदिवद्धणो राया । वाहरिउं नियपुरिसे पयंपिउं एवमाढत्तो ॥ ८ ॥
 भो भो देवाणुपिया ! जगपडुणो निमित्तं विसिद्धवेइगापरिक्खत्तपरिसरं सरसचंदणुम्मिस्सधुसिणरसालिहिय-
 विविहसत्थियं थिरनिवेशियसपायपीढनानामणिमयसीहासणं रणंतकणयकिंकिणीमडुरनिनायमुहलियदियंतरं रंगंत-
 विविहचिंधसयसंपुन्नं पन्नासधणुहायामं पणुवीसधणुविच्छिन्नं छत्तीसधणुमुव्विद्धं चंदप्पभनामधेयं सीयं उवट्टवेहत्ति ।
 तओ ते सामिवयणं निसामिऊण पट्टिदियया तदत्ति सव्वं निवत्तंति ।

श्रीगुणचंद
महावीरच०
४ प्रस्तावः
॥ १३८ ॥

एतथंतरे तियसाहिबेण हरिसुलसंतहियएण । पवरमणिखंडमंडियमहंतखंभावलीकलिया ॥ १ ॥
पंचविहरयणकिरणोहविहियदिसिदिसिसुरिंदकोदंडा । चंदप्पभाए तुला कारचिया नियसुरेहिंतो ॥ २ ॥
भुवणच्छेरयभूया सिबिगा लंबंतमोत्तिओऊला । नवरं इमावि तं चिय पढमं सिबिगं अणुपविट्ठा ॥ ३ ॥ त्रिभिर्विशेष्कम् ॥
अह भयवं केसालंकारेण वत्थालंकारेण आभरणालंकारेण मल्लालंकारेणालंकिओ कयळट्टतवोकम्मो उट्टिऊण आस-
णाओ अणुप्पयाहिणीकुणंतो चंदप्पहं सीयमारुहिता पुवाभिमुहंमि सीहासणे निसीयइ, तओ भयवओ कुलमहरिया
णहाया सूइभूया गहियपवरनेवत्था हंसलक्खणं साडयं आदाय सामिस्स दाहिणे पासे भहासणंमि निसन्ना, एवं
अम्मघाईवि वामपासे संठिया, तहा सामिस्स पिट्ठओ एगा वरतरुणी विचित्तसिंगारागारभूयं महंतं विमल-
मुत्ताजाललंबंतावचूलयं पुंडरीयदंडं लुत्तं धरेमाणी ठिया, उभयपासेसु य दुवे वरविलासिणीओ घोयरुप्पपट्टधवलं
चामरजुयलं गहाय संठियाओ, उत्तरपुरत्थिमंमि य भागे एगा अच्चंतदरिसणिज्जा विलया निम्मलसलिलपडिपुन्नं
सुरकरिकरेहंतनालागारं रययभिंमारमुव्वहंती निसन्ना, एवं दाहिणपुरत्थिमेणं एगा वरसुंदरी विचित्तमणिकिरण-
जालं मुयंतं कणयदंडं तालवंटं करयलेण कलयंती दुरूढा, पिट्ठओ य भुवणनाहस्स भगवओ देविंदा हिमरययकुंदे-
दुप्पगासाइं वेरुलियमयदंडाइं अट्टसहस्सकंचणसलागाइं सव्वरयणामयाइं कुसुमदामदंतुराइं आयवत्ताइं धरंति,
उभयपासेसु चंदप्पहसीयाइ सोहम्माहिबो ईसाणो य अमयहिमफेणुपुंजसन्निगासेहिं चामरेहिं भयवंतं वीयंति ।

चन्द्रप्रभा-
शिबिका.

॥ १३८ ॥

एत्थंतरे नंदिवद्धणनरवइणो वयणेण पवररूवा निरुवहयंगा णहाया कयविलेवणा परिहियपवरवत्था सवालंकार-
मणहरसरीरा विसिट्ठवलसालिणो समवया पुरिसा समूससियरोमंचकंचुया कयसवकायवा नीसेसपुन्नपगरिसमप्पाणं
मन्नमाणा सहस्ससंखा झडत्ति आगंतूण तं सीयमुक्खिवंति, अह वच्चंतीए तीए सोहम्माहिबई सुराहिवो दाहिणिह-
मुवरिल्लवाहं गिण्हइ, ईसाणोऽवि देविंदो उत्तरिल्लवाहं, चमरवल्लिणो य असुरिंदा दाहिणुत्तरसिविगाहेट्ठिल्लवाहाओ
समुच्चहंति, अवसेसा भवणवइवाणमंतरजोइसवेमाणिया य जहारिहं सीयमुक्खिवंति । किं बहुणा ?—

पुविं उक्खित्ता माणुसेहिं साहट्ठरोमकूवेहिं । पच्छा वहंति सीयं असुरिंदसुरिंदनामिंदा ॥ १ ॥

गेहाओ नीहरंते जिणंमि चाउच्चिहेहिं देवेहिं । इंतहि य जंतहि य कहमिव उच्चासियं गयणं ? ॥ २ ॥

वणसंडोव कुसुमिओ पउमसरो वा जहा सरयकाले । सोहइ कुसुमभरेणं इय गयणयलं सुरगणेहिं ॥ ३ ॥

सिद्धत्थवणं व जहा असणवणं सणवणं असोगवणं । चूयवणं व कुसुमियं इय गयणयलं सुरगणेहिं ॥ ४ ॥

अयसिवणं व कुसुमियं कणियारवणं व चंपगवणं वा । तिलववणं व कुसुमियं इय गयणयलं सुरगणेहिं ॥ ५ ॥

वरपडहभेरिञ्जल्लरिदुंदुमिसंखाइतूरनिग्घोसो । धरणियले गयणयले पयट्ठिओ देवमणुएहिं ॥ ६ ॥

एवं च भुवणबंधवस्स वच्चमाणस्स तप्पढमयाए सव्वरयणविणिम्मविया पुरओ अहाणुपुच्चीए सोत्थियाइणो
अट्ठमंगलगा संपट्ठिया, तयणंतरं च पुन्नकलसर्भिगारा दिवा सच्छत्तपडागा गयणतलचुंबिणीओ पवणकंपमाणं-

श्रीगुणचंद
महावीरच०
४ प्रस्तावः
॥ १३९ ॥

चलाओ महावेजयंतियाओ संपट्टियाओ, तयणंतरं वेरुलियविमलदिप्पंतदंडं पलंबकोरिंटमालोवसोहियं चंदमंड-
लाणुरूवं समूसियं दिवमायवत्तं, पवरसिंहासणं च समणिरयणपायवीढं मणिमयपाउयाजोगसंपजुत्तं बहुकिंकरनरपरि-
ग्गहियं संपट्टियं, तयणंतरं च ललियपुलियलंघणजवणगईणं लोलंतलासगललामंवरभूसणाणं कणवमयमुहनिजोगजु-
त्ताणं उज्जलगथासगमंडियकडीणं तरुणपुरिसपरिक्खित्ताणं अट्टसयं जच्चतुरगाणं अहाणुपुवीए संपट्टियं, तयणंतरं
च सत्तंगपइट्टियाणं भइजाइसमुब्भवाणं सव्वलक्खणोववेयाणं कंचणकोसीपविट्ठकलहोयधवलदंताणं कंचणमणि-
तारगाभूसियाणं कुसलारोहसंपउत्ताणं अट्टसयं उत्तमकुंजराणं संपट्टियं, तयणंतरं च सळत्ताणं सज्झयाणं सघंटाणं
सपडागाणं सतोरणवराणं सनंदिघोसाणं हिमवंतुग्गयतिणिसदारुनिम्मियाणं सुसिलिट्ठचकमंडलधुराणं जोत्तियपव-
रतुरंगाणं रणज्झणंतकिंकिणीजालाणं बत्तीसतोणपरिमंडियाणं चावपमुहपहरणनिवहभरियाणं अट्टसयं रहाणं अहा-
णुपुविए संपट्टियं, तयणंतरं निविडपरियराणं करयलकलियविविहाउहाणं निययविकमोयहसियसेसभडाणं पुरिसा-
णमट्टसयं संपट्टियं, तयणंतरं च अपरिगणियसंखं हयाणीयं गयाणीयं रहाणीयं पायत्ताणीयं च पहावियं, तयणंतरं
च पंचवन्नकुडभीसहस्सकलिओ वइरमयवट्टलट्टजट्टिपइट्टिओ विचित्तलत्ताइच्छत्तपरिक्खित्तो रंतंभमरकुसुममाला-
मंडिओ अनिलंदोलिज्जमाणघंटियापडलमणहरारावपूरियनहविवरो जसपुंजोव मुत्तिमंतो मुत्तिमग्गोव पयडो नियगु-
रुयत्तणेण गयणं व परिमिणंतो सायरसुरविसरसंपरिग्गहिओ जोयणसहस्ससिओ महिंदज्झओ संपत्थिओ, तयणंतरं

निष्क्रमणो-
त्सवः.

॥ १३९ ॥

च अन्ने य बहवे दंडिणो मुंडिणो सिहंडिणो हासकरा खेडुकरा चाडुकरा गायंता य वायंता य नचंता य रमंता य
 हसंता य जयजयसहं पउंजमाणा मंगलसहस्साइं कुणमाणा गुणगणं शुणमाणा संपत्थिया, तयणंतरं उग्गा भोगा
 रायन्ना खत्तिया सेट्ठिणो सत्थवाहा पुरिसनियरपरियरिया केइ पायविहारेणं केइ रहगया केइ तुरगाधिरूढा केइ कुंज-
 रपट्टिसन्निसन्ना केइ जाणजंपाणाइगया सामिस्स पुरओ मग्गओ य संपट्ठिया, तयणंतरं अन्ने य बहवे देवा य
 देवीओ य सएहिं सएहिं विमाणेहिं सएहिं सएहिं चिंधेहिं सएहिं सएहिं परिवारेहिं समंतओ संपट्ठिया, नंदिवद्ध-
 णमहानरिंदोऽवि कयमज्जणो विहियसिंगारो गंधसिंधुरखंधगओ समूसियसियायवत्तो धुवंतधवलचामरो हयगयर-
 हओहसेणापरिकिन्नो पिट्ठओ भयवंतं अणुगंतुमारद्धो ।

एवं च नियनियट्ठाणगयसुरासुरनरनियराणुगम्ममाणो वद्धमाणो सत्तरयणिप्पमाणसरीरो समचउरंससंठाणसं-
 ठिओ वज्जरिसहनारायसंधयणो कमलुप्पलसुरहिनीसासो जल्लमलकलंकसेयरयदोसवज्जियतणू देहप्पभापभारभा-
 सुरियदिसिचक्कवालो भिंगनीलकज्जलभसलसामलपसत्थसुडुमनिबद्धनिउरंबनिचियकुंचियपयाहिणावत्तकेसो अद्धयं-
 दम्ममनिडालवट्ठो पमाणजुत्तसुंदरसवणो चावदंडकुडिलभमुहो धवलपत्तलवियसियपुंडरियनयणो गरुडाययउज्जुतुं-
 गनासो विपक्कविंवाफलसंनिभाधरोट्ठो संखगोखीरमुत्तामणिधवलसुसिलिट्ठसमदंतपंती पीणमंसलकवोलजुयलो सज-
 लघणत्थणियदुंदुभिनिग्घोसगंभीरसरो दाहिणावत्तरेहावलयालंकियसुप्पमाणकंठकंदलो वणमहिससीहसइलपडि-

श्रीगुणचंद
महावीरच०
४ प्रस्तावः
॥ १४० ॥

पुन्नवदृखंधो सुहुमलोमरेहंतमंसलपलंववाहुदंडो संजमलच्छिनिवाससुभगविसालवच्छतलो पवररोमराइरेहिरगंभी-
रनाहिसोहियमज्झभागो वट्टाणुपुवोवचियचारुजंधो सुसिलिद्वगूढगुंफो नगनगरमगरसागरचक्रंकुसमच्छाइलकखण-
लंछियचलणतलो परिचत्तपाणभोयणेसु पासायसिहरमारुढेसु चेळुक्खेवं करेंतेसु पुरजणेसु कुसुमनियरं मुंचमाणेसु
गयणद्वियतियसेसु सप्पणयपणचमाणेसु विज्जाहरीसु मंगलमुहलेसु वारविलयासत्थेसु दिज्जमाणेसु सव्वकामुयदा-
णेसु गोत्तमुक्कित्तमाणेसु देवचारणेसु कमेण संपत्तो नायसंडाभिहाणंसुववणंमि । तं च केरिसं ?—

पढमुम्मिलिरपलवसोहिलमहल्लपायवसमूहं । सवोउयकुसुमसमिद्धगंधवायंतमिउपवणं ॥ १ ॥

तरुणतरुसंडपत्तलसाहापडिरुद्धसूरकरपसरं । अच्चंतरम्मयागुणरंजियपरिभमियसुरखयरं ॥ २ ॥

दिसिमुहपवियंभियकुसुमपरिमलायद्विया भमरनियरा । उज्जाणंतरविहरणपरंमुहा जत्थ कीलंति ॥ ३ ॥

जं जिणमितं नाऊण पवणडोलंतपल्लवकरेहिं । चिरकालदिद्वपियमाणुसं व तं वाहरइ तुरियं ॥ ४ ॥

मयभरपरवससिहिकलरवेण जं सागयं व वागरइ । निवडंतकुसुमनियरुक्कणेण अगंधं दायेइ ॥ ५ ॥

इय निययचंगिमाविजियनंदणुज्जाणरम्मयगुणस्स । जयनाहचलणपूयस्स तस्स का वण्णणा होउ ? ॥ ६ ॥

एवंविहंमि तत्थ आगंतूण सिबियाओ ओयरिऊण सामी असोगवरपायवस्स मूले सयमेव अलंकारकुसुमनिवहं
ओमुयइ, सा य कुलमयहरिया हंसलक्खणेणं पवरसाडणं तं पेच्छमाणी छिन्नमुत्ताकलावगलंतमुत्ताहलविन्भमाइं

निष्क्रमणो-
त्सवः ।

॥ १४० ॥

अंसुयाइं विणिम्मुयमाणी सदुक्खं रोयमाणी मन्नुभरखलंतक्खराए गिराए भयवंतं भणिउं पवत्ता—

कासवगोत्तुम्भूओऽसि पुत्त ! सिद्धत्थपत्थिवसुओऽसि । नायकुलनहयलामलसारयरणीमयंकोऽसि ॥ १ ॥

वासिद्वसगोत्तुम्भवतिसलादेवीए कुच्छिजाओऽसि । खत्तिवजणतिलओऽसि य नवजोवणदिवदेहोऽसि ॥ २ ॥

गम्भावत्थाओच्चिय अइसुकुमालोऽसि सुंदरंगोऽसि । अप्पडिमरूवलायन्नकंतिपम्मारकलिओऽसि ॥ ३ ॥

तिहुयणविक्खायजसोऽसि सयलविन्नाणनीइनिउणोऽसि । ता कहमिममइदुकरतवकम्मं संपवज्जिहिसि ? ॥ ४ ॥

इह असिधारसरिच्छं महवयं वच्छ ! अणुचरेयवं । घोरोवसग्गवेयणनिवहाओ न भाइयवं च ॥ ५ ॥

सुदुंछतुच्छभोयणवित्ती निच्चं पि एत्थ कायवा । गामागराइसु तहा पडिवंधमई विमोत्तवा ॥ ६ ॥

इय वच्छ ! तुज्झ साहेमि केत्तियं मुणियसयलभावस्स । तह कहवि पयट्टेज्जसु जह सिवसोक्खं लहुं लहसि ॥ ७ ॥

एत्थंतरंमि नीसेससयणवग्गेण परिगओ राया । आणंदामंदगलंतनयणवाहप्पवाहेण ॥ ८ ॥

अभिवंदिऊण चरणे जिणिंदसिरिवद्धमाणसामिस्स । एगंतमवकंतो दुस्सहविरहग्गिसंतत्तो ॥ ९ ॥

कुलमयहरियाचयणं तहत्ति पडिसुणिय जिणवरो वीरो । सयमेव पंचमुट्ठियलोयं काउं समारद्धो ॥ १० ॥

ते य केसे सामिकरयलपलहत्थिए सुरिंदो नियदेवदूसंचलेण ईसिविणमियसरीरो सम्मं पडिच्छइ, कमेण य निवत्ति-
यंमि लोयकम्मे जिणं अणुन्नविऊण तं कुंतलकलायं मेहपडलं व सामलं दुज्जणहिययं व कुडिलं खीरोयसलिले पक्खिवइ,

श्रीगुणचंद
महावीरच०
४ प्रस्तावः
॥ १४१ ॥

दिवत्तरनिनायं मणुस्समंगलुगारहलबोलं च निवारेइ, अह मग्गसिरकिण्हदसमीए पच्छिमण्हसमए हत्थुत्तरनक्खत्ते वट्ट-
माणे सयमेव संवुद्धो भयवं नमोत्थु णं सिद्धाणंतिकट्टु करेमि सामाइयं सच्चं सावज्जं तिविहं तिविहेणं वोसिरामित्ति चारित्तं
पडिवज्जए, एत्थ य पत्थावे अंवरतलट्टिएण भूमितलगणय देवदेविविज्जाहरनरविसरेण विमुक्को भगवओ चाउद्दिसिंपि
झंकारमुहलभसलविलुप्पमाणो सुगंधियसयलजीवलोओ पिंगलियगयणमंडलो पवरवासचुत्तो, वहलधूमसिहाजालुच्छा-
इयदिसामुहो ठाणठाणेसु ठविओ डज्झंतागुरुकुरंगमयमीणुग्गारकप्पूरधूवघडियनिवहो, पहयाओ असंखसंखघोसु-
म्मिस्सभंभामुइंगमदलकाहलातिलिमहुडुक्कट्टकाओ, कओ य निब्भरभरियभुवणंतरालो जयजयारवोत्ति ॥

अह चत्तवसणभूसणमल्लस्स पुरंदरेण जयगुरुणो । वामंसतले नसियं अदूसियं देववरदूसं ॥ १ ॥

नीसामन्ने सामन्नगुरुभरे तह जिणेण उक्खित्ते । काउं साहिज्जंपिव मणपज्जवणाणमुप्पणं ॥ २ ॥

ओलंबियभुयपरिहो वाढं निकसियमोहमाहप्पो । मेरुव निप्पकंपो काउस्सग्गे ठिओ भयवं ॥ ३ ॥

चउविहदेवनिकाओ नयरज्जणो नरवई य नमिऊण । जयनाहं भत्तीए नियनियठाणे पडिनियत्तो ॥ ४ ॥

इय उत्तमगुणगणवद्धमाणसिरिवद्धमाणचरियंमि । सग्गापवग्गसंगमलच्छीण निवासभवणंमि ॥ ५ ॥

गब्भावयारजम्मणदिक्खाकल्लाणकहणपडिवट्टो । संपत्तो पज्जंतं चउत्थओ एस पत्थावो ॥ ६ ॥

इइ सिरिगुणचंदसूरिरइए सिरिमहावीरचरिए गब्भावयारजम्मदिक्खाकल्लाणगमओ चउत्थो पत्थावो

श्रीवीरस्य
दीक्षाक-
ल्याणकम्.

॥ १४१ ॥

भाविरमणत्यसत्थं पेहंताविहु सवुद्धिविहवेण । धीरा सहरिसमणिसं पत्थुयवत्थुं समत्थंति ॥ १ ॥

इति विभाविऊणं व भविस्सोवसग्गवग्गसंसग्गासंखुद्धमाणसो महावीरजिणवरो गंभीरिमाइगुणरयणागरो दूरज्झियनीसेसवसणोवि वासवोवरोहधरिएक्कचारुवसणो मग्गणगणपूरिआसोऽवि निव्वाणकरो मुक्कतुरयचारोवि दूर-
दमियदुट्ठिंदियासो सकलत्तोऽवि परिचत्तपरिग्गहो परिहरियकरिवरोवि मत्तकुंजरगमणो भयवं आपुच्छिऊण अहास-
न्निहियं नायवग्गं नायसंडवणाओ निग्गओ, कमेण य अतुरियं जुगमित्तनिहितचक्खुपसरो मुहुत्तावसेसंमि वासरो
कुम्मारगामं नाम संनिवेसं पाविओ, ठिओ य एगंते काउसग्गेणंति ।

इओ च सिद्धत्थरायवालवयस्सो कुंडगामपुरवत्थवो महाजूववसणविणासियासेसतहाविहदव्वनिचओ भोगोव-
भोगलालसो असंपज्जंतवंच्छियत्थो सोमो नाम वंभणो झीणविहवत्तणेण अचयंतो परिचियजणमज्झे निवसिऊण
गिहे भोचूण वंभणिं गओ वइरागराइसु दव्वोवज्जणनिमित्तं, तत्थ य अइनिविडत्तणओ अंतराइयकम्मस्स अच्चंतपव-
लत्तणओ असायवेयणिज्जस्स निप्फलत्तणओ पुरिसयारस्स अवस्सं भवियवयाए तहाविहभावस्स सुचिरं कालं परि-
भमियस्सवि तेसु तेसु ठाणेषु न तस्स काणकवड्डयमेत्तावि संपत्ती जाया, समइक्कंताणि य आसापिसायनडियस्स
वहूइं वच्छराइं, अण्णया य—

धवलबलायादीहरवयणो अह तरलियविज्जुलियनयणो । कलियसुररायचावो अंजणगिरिसिंगसारिच्छो ॥ १ ॥

श्रीगुणचंद
महावीरच०
५ प्रस्तावः
॥ १४२ ॥

परिमुक्कगज्जिघोरट्टहासहयविरहियहियवावारो । वरिसायालो वेयालदारुणो झत्ति संपत्तो ॥ २ ॥
तं च ददूण सो सुमरियनियकलत्तो तक्कालवियंभमाणनीलकंठरवसवणचउग्गुणीकयउकंठो दीहं नीससिऊण चलिओ
अविलंबियपयाणगेहिं सनयराभिमुहं, अइदूरत्तणेणं भग्गस्स दुच्चलत्तणओ सरीरस्स असमत्थत्तणेणं सिग्घगमणस्स
मासपंचमपज्जंते संपत्तो कुंडग्गामे नगरे, पविट्ठो नियगिहे, संभावियविट्ठत्तदवाए अच्चुट्ठिओ पणइणीए, दिण्णं
आसणं, पक्खालिया चरणा, पुच्छिओ सरीरकोसलं, वाहियं सरीरं, दंसिओ पणयभावो, भोयणकाले य उवट्ठा-
विया य कंठिगाइ हट्ठे विणिवट्ठिऊण विचित्ता रसवई, काराविओ भोयणं, तदुत्तरकालं ठिओ सयणिज्जे, वंभणीवि
पहिट्ठहियया समीवमागया तस्स, आरद्धा य पुच्छिउं, जहा—अज्जपुत्त! केसु केसु देसंतरेसु परिभमिओ एत्तियं
कालं? केत्तियं वा दविणजायमज्जियंति?, तेण भणियं—पिए! केत्तिए साहेमि देसे?, किं वा कहेमि दविण-
ज्जणं? तद्वाहि—

सिरिपच्चयवइरागरसमुहपरतीररोहणगिरीसु । रसकूविगासु विवरेसु भुयंगभीमेसु विविहेसु ॥ १ ॥
भमिओ एत्तियकालं दवपिवासाए णेगठाणेसु । विहिओ य खन्नवाओ धमिया य सुवण्णपाहाणा ॥ २ ॥
अंजणसिद्धिनिमित्तं दिवोसहिणो निरूविया बहुसो । विहिया नरिंदसेवा वियाणिया मंततंताई ॥ ३ ॥
असिचावकुंतचक्काइएसु सत्येसु जणपसिद्धेसु । पक्कओ परिस्समोविहु किं किं अहवा मए न कयं? ॥ ४ ॥

सोमवि-
प्रस्य प्रवा-
सावस्था,

॥ १४२ ॥

तहचिहु पिण ! न जाया भोयणमेत्तावि मज्झ सामग्गी । तुह दंसणतण्हाए नियत्तिओ केवलं इण्हि ॥ ५ ॥

इमं च आयणिण्णकण वज्जताडियव सुसियव सा माहणी कसिणवयणा कोवफुरंताहरा रत्तनयणा भणिउमाढत्ता-आ
पाविट्ट ! अवलक्खणसिरसेहर ! वाहणसरिच्छ ! निच्चग्गनिडाल ! जइ एवं ता कीस एत्तियं कालं कडुघोसेडीफलाइं
बुक्कमाणो ठिओऽसि !, किं निरास ! तत्थ वसंतेण तुमए इमावि वत्ता न निसामिया ? जहा पोक्खलावट्टगमेहोव
अणवरयकणगधारहिं सिद्धत्थनरिंदनंदणो संवच्छरं जाव वरवरियापुव्वगं वरिसिओत्ति, किन्न पेच्छसि पुरओ आज-
म्मदारिहियावि रहतुरयवाहणा परिहियदिवाभरणा कारियउत्तुंगभवणा नियपणइणीपरिगया जिणप्पसाएण विल-
संति ?, किं वा न दिट्ठा पडिपुण्णमणोरहा उवलद्धकणयरासिणो सगिहेसु पडिनियत्तंता देसंतरागयजणा ?, बंभ-
णेण भणियं-पिए ! दूरदेसंतरनिवासत्तणेण नो सुणियमेयं मए, किं करेमि विपरंमुहो हयविही दीहकालमणुभ-
वियवा विसमदसा, बंभणीए भणियं-अज्जवि लहुं गच्छसु तस्स सगासे, करुणापरो खु सो भयवं निच्छियं तुमए
मग्गिज्जमाणो किंपि दाविस्सइत्ति, एवं निसामिऊण धाविओ महावेगेण जिणाभिमुहो बंभणो, आपुच्छंतो पत्तो
कुमारगामं, दिट्ठो काउस्सग्गठिओ सुरवइनिहित्तसुगंधचुण्णपरिमलुम्मिलंतछप्पयछप्पणदेहो भयवं जिणवरो, तिपया-
हिणिकाऊण पणमिओ परमायरें, विण्णत्तो य जहा-देव ! निसामेसु मम वत्तं-

कंठब्भंतरपक्खलियजीहमफुडक्खराए वाणीए । को को न पत्थिओ नाह ! दाणविपरंमुहोवि जणो ? ॥ १ ॥

श्रीगुणचंद
महावीरच०
५ प्रस्तावः
॥ १४३ ॥

कथं न वसिओ पहधूलिधूसरो देव ! पहियगेहेसुं । हयउयरपूरणट्टा किं वा न कयं कुकम्ममवि ? ॥ २ ॥
दविणोवज्जणहेउं लहुं पविट्ठो कयंतवयणेवि । नेवत्थंपि नडेण व तं नत्थि मए न जं धरियं ॥ ३ ॥
इय दूरदेसविहरणपरिसमुप्पन्नविविहरोगस्स । विगओ एत्तियमेत्तो कालो मम मंदपुन्नस्स ॥ ४ ॥
संपइ पुण धरिणीए आगयमेत्तस्स साहियं एयं । जह संवच्छरसीमं दिन्नं तुमए महादाणं ॥ ५ ॥
केसिंपि नगरपट्टणगामागरपवरदवभंडारा । अन्नेसिं मयजलगंधवंधुरा उद्धुरा करिणो ॥ ६ ॥
अन्नेसिं पारसवच्चरउलवलहीयसंभवा तुरया । केसिंपि जच्चकंचणजडिया वरभूसणुग्घाया ॥ ७ ॥
इय संकप्पियभूरिप्पभेयदाणेण कप्पतरुणव । निम्महिया नाह ! तए तण्हा मेहेण व जणाणं ॥ ८ ॥
एकोच्चिय दुग्गयलोयतिलोयभूओ ठिओ अहं विहलो । पुवभवजणियदुविसहदुट्ठकम्माणुभावेणं ॥ ९ ॥
करुणारसवरिसणसित्तदुक्खसंतत्तसव्वभुवणवण ! । ता पसिय पणयवच्छल ! पूरेसु मणोरहं मज्झ ॥ १० ॥
तुज्झ पयकमलसेवावियंभियं सग्गमच्चपायाले । जं कीलंति जहिच्छं सुरवइनरनाहदणुवइणो ॥ ११ ॥
सिद्धत्थरायनंदण ! तुमएऽविहु जइ कहंपि चत्तोऽहं । पायालनिवडियस्स वि नत्थि धुवं ता मम परित्ता (धरित्ती) १२
एमाइ दीणयावसगलंतनयणंसुधोयवयणेणं । तह तेण विन्नविज्जइ जहु भिज्जइ वीयरगोऽवि ॥ १३ ॥
भगवयावि एवमायण्णिऊण समुच्छलियापरिकलियकारुत्तपुण्णचित्तेण भणियं—भो भो देवाणुप्पिय ! परिचत्ता-

सोम-
विज्ञप्तिः।

॥ १४३ ॥

सेससंगोऽहं संपयं, तुमं च अचंतदोगचभरविहुरियसरीरो, अओ जइवि असारिच्छमेयं तहावि गिण्हसु इमस्स देव-
दूसस्स अद्धंति, जं सामि ! आणवेइत्ति भणिऊण हरिसवसुग्गयबहलपुलओ वंभणो वत्थस्स अद्धं गहिऊण कयप्प-
णामो अणुचितंतो पुणो पुणो सामिस्स अपुबमु दारत्तणं गओ नियगेहं, दिट्ठो य वंभणीए, पुच्छिओ परमायरेणं,
साहिओ तेण देवदूसद्धलाभो, जाओ वंभणीए परमसंतोसो ।

अन्नदिवसे य तेणवि समप्पियं तं दूसद्धं दसिगाबंधणत्थं तुन्नागस्स, तेणवि तारिसमदिट्ठपुवं पेच्छिऊण
पुच्छिओ सो वंभणो-भइ ! तुमए कहिं लद्धमेयं ?, न जेण एरिसदूसाइं महीयले दीसंति, वंभणेण भणियं-मुद्ध !
भगवया दिण्णंति, तुण्णागेण भणियं-वीयंपि खंडमाणेहि, जेण उभयखंडमीलणेण तुण्णेमि एयं, पडिपुण्णं व दीणा-
रलक्खमुलं पावेइ, अद्धेण य तुज्झ ममंपि दवं भविस्सइत्ति, वंभणेण भणियं-कहं पुण दुइज्जयं वत्थद्धं लभि-
स्सामि ?, जिणसमायारवियक्खणेण भणियं तुन्नागेण-जया खाणुगाइफरिसेण सामिखंधेसाओ निवडइ
तया गिण्हज्जासि, एवं सोच्चा सो तलोभेण लग्गो भगवओ पिट्ठीए, जहा य तस्स तलाभो भविस्सइ
तहा पुरओ भणिस्सामि ।

अह कुम्मारगामवहिया पडिवन्नपडिमस्स पलंबियभुयस्स भगवओ महावीरस्स समीवे सयलदिणवाहपरिस्संते छुहा-
भिहए चरमाणे वसहे भलाविऊण एगो अचंतपावसंगयसरीरो विणयणयविण्णाणजा(ना)णविचज्जिओ गोवालो गावी-

श्रीगुणचंद
महावीरच०
५ प्रस्तावः

॥ १४४ ॥

दुहणनिमित्तं गओ गाममज्झे, तत्थ द्वियस्स वावारंतरवावडणेण लग्गा महती वेला, ते य वडल्लगा खणमेकं भगवओ समीवे चरिऊण खुहाभिहयसरीरा सणियं सणियं तिणभक्खणं कुणमाणा पविट्ठा अडविं, सो य गोवालो खणंतरेण आगओ भगवओ समीवे, वसहे अपेच्छंतो पुच्छिउमारद्धो—भो देवज्जया ! जे तुह मए भलाविया पुवं वसहा ते साहेसु कत्थ गयत्ति ?, सामीवि असुणितोव तुण्हको ठिओ, तेणावि नायं—नूणमेसो महाणुभावो न जाणइत्ति, तओ गिरिकंदरेसु य नईसु य निज्जरेसु य महातरुगहणेसु य गामंतरालेसु य अन्नेसु य विविहप्पएसेसु य गोसामि-यभयभीओ विमणदुम्मणो तं मग्गणं काउमारद्धो, ते य वसहा सुचिरं सच्छंदप्पयारेण उवसंतच्छुहावेयणा पुणोवि समागया तत्थेव पएसे, भयवंतं दट्ठूण रोमंथता य ठियत्ति, सो य गोवालो अणुवलद्धगोणपउत्तिविसेसो चउपहर-रयणिजागरपरिमिलाणनयणो रेणुभरधूसरियसरीरो खाणुकंटगाइपरिवहिओ सुचिरं परिभमिऊण वलिओ तेणेव पएसेण, दिट्ठा य ते सामिणो समीवे सुहनिसन्ना नियवसहा, अह रोसारुणियच्छो फरुसगिराए भयवंतं तज्जिउमा-दत्तो, कहं चिय ?—

देवज्ज ! दुज्जणो इव दावेसि पसंतवत्थनेवत्थं । अग्भिंतरओ पुण चित्तकुडिलया एरिसी तुज्झ ॥ १ ॥
जं गोविऊण हरणट्ठया तुमं मज्झ संतिए वसहे । नूणमियारिणिं गच्छंतओऽसि जइ मं न पेच्छंतो ॥ २ ॥
तावित्थ चंगिमा तुह वयस्स ! अरि भल्लिमा विवेयस्स ! गोमट्ठत्तणमण्णं किंपिय दक्खिन्नभावस्स ॥ ३ ॥

वस्त्रार्थदानं
गोपोपसर्गः

॥ १४४ ॥

मन्ने पलंवियभुओ निरुद्धनीसेसवज्झवाचारो । तं जणमुसणनिमित्तं उवायजालं विचित्तेसि ॥ ४ ॥

इय दुव्वयणेहिं तज्जिऊण सो दावणेण हणिउमणो गोवालो वेयालोव धाविओ भयवओऽभिमुहं, एत्थंतरे सोह-
म्मसभासीहासणनिसण्णो सहस्सनयणो सामिस्स सुहविहारोवलंभनिमित्तं ओहिं पउंजइ पेच्छइ य भयवंतं पडुव्व
वेगेण धावमाणं तं गोवयं, तओ तत्थट्ठिओऽवि तं थंभिऊण सक्को दिव्वाए देवगईए उइण्णो जिणसमीवे, तज्जि-
उमारद्धो य तं गोवालयं, जहा-रे दुरायार! पुरिसाहम! पसुनिविसेस! नूणं एयाण वसभाण चेव पुण्णेहिं न
भक्खेसि तूमं तिणाइं, जो एयं सिद्धत्थनरिंदनंदणं परिचत्तकरितुरयपाइक्कसंदणं संपयमेव गहियपव्वजं नियधम्मक-
ज्जसज्जं सममुणियतणमणिं वद्धमाणमहामुणिंपि न मुणेसित्ति, एवं निब्भन्धिऊण तं सक्को तिपयाहिणीकाऊण भय-
वंतं वंदेइ, सिरनमियकरकमलो य विन्नवेइ-भयवं! तुम्ह दुवालस वरिसाणि जाव समणमेत्तेणवि दुक्खजणगा इयर-
जणजीवियंतकरणखमा पवरसूराणवि लोमुद्धोसजणगा उग्गा उवसग्गवग्गा भविस्संति, ता कुणह पसायं, अणु-
मन्नह एत्तियं कालं मम, जेण समीवट्ठिओ वेयावच्चं भे करेमित्ति, एयं च आयन्निऊणुस्तारियकाउसग्गेण भणियं
भयवया, जहा-भो भो देविंद!

तुह असरिसभत्तिमहाभरस्स जुज्जइ इमं न संदेहो । किं तु न भूयं एयं नो भवइ न भावि कइयावि ॥ १ ॥
जं तित्थयरा तुम्हारिसस्स निस्साए पुव्वकयकम्मं । खवइंसु खविस्संति य खवेति वा निच्छियं सक्क! ॥ २ ॥

श्रीगुणचंद
महावीरच०
५ प्रस्तावः
॥ १४५ ॥

अह परसामत्येणवि जइ कम्मक्खउ घडेज्ज ता विहलो । सिरलोयवंभचेराइविविहतवचरणवावारो ॥ ३ ॥
अइसंकिलिट्टचित्तत्तणेण दढवद्धरसविवागाणं । सयमणुभवनं मोत्तुं कम्माण ण णिज्जरणमत्थि ॥ ४ ॥
एगोच्चिय सुहमसुहं एस जिओ सहइ कम्मवसवत्ती । अवयारुवयारकरा तस्सेव पभावओ हुंति ॥ ५ ॥
ता जे पुवं सिद्धा जे सिज्झिस्संति जे य सिज्झंति । ते नियवीरियकम्मक्खएण अन्नोऽत्थि नोवाओ ॥ ६ ॥
एवंविह विविहमहोवसग्गवग्गं वियाणिउं पुंवि । पडिवन्नोऽहं संजममेत्तो का तेसु मम गणणा ? ॥ ७ ॥
इय सुरनाहं विविहोवउत्तिजुत्तीहिं बोहिउं भयवं । काउस्सग्गंमि ठिओ नूणं मियभासिणो गरुया ॥ ८ ॥
एत्थ य पत्थावे भयवओ चेव जणणिभगिणीए पुत्तो कयतहाविहघोरवालतवविसेससामत्योवलद्ववंतरसुरभवो सि-
द्धत्थो नाम देवो समागओ तं पएसं, सो य भणिओ सुरिंदेण जहा-भो सिद्धत्थय ! एस भयवं तुह आसन्नसयणोत्ति
एगं कारणं, वीयं पुण समाएसो, ता सब्बहा पासट्ठिओ सामिस्स मारणंतियमुवसग्गं पडिक्खलेज्जासित्ति, सोऽवि
एयमायन्निऊण देविंदसंभासणजायपरमतोसो तहत्ति पडिसुणइ, पुरंदरोऽवि सट्ठाणं गओ । अह जायंमि पभायसमए
भयवं चलिओ तओ ठाणाओ, कमेण य पत्तो कोल्लागसंनिवेसे, तत्थ य बहुलो नाम माहणो परिवसइ, तस्स य
गिहे महुसवो समारद्धो, निप्फाइया रसवई, जेमेइ सयलजणो, एत्थंतरे भयवं सुणियभिक्षासमओ अतुरियं
असंभंतो छट्ठपारणगे पविट्ठो भिक्षानिमित्तं गाममज्जे, उच्चनीयगिहेसु य परिभमंतो संपत्तो बहुलस्स मंदिरं, दिट्ठो

गोपोसग्गे-
निवारणं
इन्द्र-
विज्ञप्तिः.

॥ १४५ ॥

य अणेण अप्पडिमरूवो भयवं भवणंगणगओ, तं च दट्ठूण चिंतिउमारद्धो—अहो इमस्स महामुणिणो सरीरलाव-
ण्णया अहो निरूवमरूवया अहो सयललक्खणपडिपुण्णया अहो पसंतायारत्तणं अहो सस्सिरीयत्तणं, निच्छियं न
होइ एसो सामन्नगुणो, ता धन्नोऽहं जस्स मम गिहसणुपत्तोत्ति परिभाविंतो उच्छलियवहलपुलयजालो मुत्ताहलालं-
किओव उट्ठिऊण परमायरेण धयमहुमिस्सं पायसं भगवओ पणामेइ, भयवंपि निच्छिइं चकंकुसलंछणलंछियं
पसारेइ करकमलं ।

अह पाणिसंपुडे वंभणेण खित्तंमि पायसे पवरे । गयणयले सुरनिवहा ओयरिउं भत्तिभरभरिया ॥ १ ॥
वायंति केवि जयदुंदुहीओ अन्ने सुयंति कुसुमाइं । चेलुक्खेवं केवि य करंति अन्ने थुणंति जिणं ॥ २ ॥
गंभीरगुरुगिराए अहो सुदानंति केइ घोसंति । अच्छिन्नकणयधाराहिं हरिसिया केइ वरिसंति ॥ ३ ॥
सेसोऽवि गामलोओ तहाविहं पेच्छिऊण अच्छरियं । विहियहिययो सहसा जिणस्तागासं समल्लीणो ॥ ४ ॥
किं बहुणा?—भयवं पायसलाभेण निवुओ माहणोऽवि कणगेण । विहियरसेण लोगो एवं जाओ महाणंदो ॥ ५ ॥
अह चम्मचक्खूहिं अपेहिज्जंतो पारिऊण भयवं अन्नत्थ विहरिओ । गामाणुगामेण परिभमंतस्स य सामिणो
पवज्जासमयसुरक्खित्तकुसुमवासचुन्नगंधवासियंमि सरीरे कयज्झंकाररवा निरंतरं परिमुक्कवणकुसुममयरंदा भमर-
नियरा पीडं उप्पायंति, चिरनिच्चूसेण य किंचि अपावमाणा रोसेण नहेहिं विंधंति मुहेहिं खाइंति, वसंतसमए

श्रीगुणचंद
महापीरच०
५ प्रस्तावः
॥ १४६ ॥

रोमकूवनिग्गयं सिणेहमापिबंति, सरीरमारूढा य समं विहरंति, गामतरुणायवि तेण गंधेण आयरसियचित्ता भणंति-भयवं! अमहंपि देहि इमं गंधजुत्तिं, सुरभो तुज्झ सरीरगंधो, तहा नवनीलुप्पलपलाससरिच्छमच्छिजुयलं सुरभिनीसाससुभगं मुहकमलं रूवसंपयं च दट्ठूण भयरद्वयसरपहारजज्जरियहिययाओ गामतरुणोओ गामाणुगामं परियट्ठमाणस्स भगवओ निवासट्ठाणं पुच्छंति, बहुप्पयारं उवसग्गेति यत्ति । एवं पवज्जादिणाओ आरब्भ चत्तारि मासा समहिया जाव सुरनिहित्तवासपच्चइया दुट्ठभमराइणो उवसग्गा जायत्ति ।

अन्नया तेलोकतिलओ सयलगुणनिलओ सामी परियडंतो गओ मोरागसंनिवेसे, तत्थ दूइज्जंता नाम तावसरूव-धारिणो पासंडिणो परिवसंति, तेसिं च अहिवई जलणसम्मो नाम, सो य मित्तो सिद्धत्थरण्णोत्ति पुव्वनेहेण सामिं दट्ठूण सागयंति भणिऊण संमुहमुवट्ठिओ, भयवयावि पुव्वपओगेण चेव वाहा पसारिया, तओ कुलवइणा ससंभमं आपुच्छिऊण पुव्ववत्तं भणिओ भयवं-कुमारवर! एत्थेव निवसह किंचिकालं, निप्पच्चवाओ एस आसमो, न य कोइ ज्ञाणविग्घकारी, वासारत्तस्सवि समुचिओत्ति, ता सबहा जइ संपयं न ठाउकामो तहावि वासासु इहावसेज्जासित्ति वुत्ते सामी तवयणं पडिसुणिय तत्थेव एगराई वोलेइ । तयणंतरं च—

पणट्ठपेमबंधणो असंखदुक्खनासणो । पसंतचित्तसुंदरो सथेज्जजित्तमंदरो ॥ १ ॥

बहुवसग्गसंगओ गओ व मंदगामिओ । मिओव सुन्नसेवओ व(पि)उव रक्खणुज्जुओ ॥ २ ॥

पारणं
तापसाश्रमे
गमनं.

॥ १४६ ॥

मडबखेडकब्बडे अणेगलोगसंकडे । सुरिंदविंदवंदिओ परिब्भमेइ सामिओ ॥ ३ ॥

एवं च हिंडमाणस्स जयगुरुणो पज्जंतमणुपत्तो गिम्हसमओ, उवागओ वासारत्तो, तओ थणियसहं कुणमाणेसु सजलजलहरेसु मंदं मंदं निवडंतीसु वारिधारासु नियनियगेहमणुवच्चंतेसु पहियजणेसु माणससरं सरंतेसु रायहंसेसु सामी पडिनियत्तिऊण समागओ तत्थेव मोरागसंनिवेसे, दिट्ठो कुलवई, समप्पिओ तेण पेसवस्समुव्वहंतेण संछन्नो मढो, वुत्थो तत्थ पलंबियभुओ काउस्सग्गेण भयवं, एवं वच्चंति वासरा ।

अह वट्टमाणंमि पढमपाउसारंभे निट्ठिएसु चिरं संचियवुसतणपलालपमुहचारिविसेसेसु अणुग्गमंतेसु अभिणवत-णाईसु कत्थवि किंपि भक्खणिज्जं अपावमाणाइं गोरूवाइं छुहापरिगयाइं आगंतूण तेसु तावसगिहेसु छायणतण-भक्खणत्थमल्लियंति, तावसावि निट्ठुरलट्ठिप्पहारेण ताणि कुट्टिऊण निट्ठारिडिंति, दुवारट्ठिया थ निच्चंपि सवायरेण रक्खंति नियउडवए, गोरूवाणि तोहिं ताडियाणि इओ तओ परिब्भमिऊण अविज्जमाणरक्खणं भगवओ मढं उव्वहंति, तावसावि नियगिहट्ठिया तं विलुप्पमाणं पेच्छिऊण भयवओ उवरि परिओसमुव्वहंति-अहो अहे निय-उडवए रक्खेमो, एस पुण समणो मणागंपि न रक्खेइ, ता किं करेमो?, कुलवइणा धरिओत्ति न किंपि पारिज्जइ पच्चक्खं फरुसमुल्लविउंति, एवं च पइदिणं जायमाणे परूढगाढमच्छराणुबंधा एगया गया ते कुलवइसगासे, सोवा-लंभं च भणिउमाढत्ता, जहा-सामि !

श्रीगुणचंद
महावीरच०
५ प्रस्तावः
॥ १४७ ॥

अम्ह गिहे तुम्हेहिं कोऽविहु मुक्को उ जो इमो समणो । सो अचंतं नियकज्जकरणपडिवद्धवावारो ॥ १ ॥
 एयंपि नो वियाणइ गोरुवेहिं जहागिहं एयं । पइदिणमुवहविज्जइ रक्खइ न खणंतरं एगं ॥ २ ॥
 किं आलस्सं अहवाऽणुकंपणं अहव होज्ज व उवेहा । निद्वक्खिण्णत्तं वा न याणिमो तस्सऽभिप्पायं ॥ ३ ॥
 अहवा मुणित्ति गोरुववारणं नो करेति स महप्पा । गुरुदेवपूयणपरा अम्हे समणा न किं होमो? ॥ ४ ॥
 हे कुलवइ ! जइ रुट्ठोसि अम्ह तं उडवयं हणिज्जंतं । एएणावि पओगेण वंछसे ता लहुं कहसु ॥ ५ ॥
 जेण विमुंचामो तस्स संकहं को मए सह विरोहो? । रुट्ठोवि तोसणिज्जो जो किर को तेण सह माणो? ॥ ६ ॥
 तुह चित्तवित्तिमवियाणिऊण णूणं मुहा कओ रोसो । तस्सोवरि अम्हेहिं का वा मूढाण होइ मई? ॥ ७ ॥
 इय ईसाभरसम्मिस्सकोवदरफुरियअहरमुल्लविउं । दूइज्जंतगमुणिणो कुलवइपासाउ निक्खंता ॥ ८ ॥
 ते य तहा गच्छमाणे दट्ठूण कुलवई सबायरेण वाहराविऊण भणिउमाढत्तो, जहा-भो महाणुभावा ! किमेवं
 परिकप्पह?, को मज्झ दोसो?, मए वयंससिद्धत्थरायपुत्तोत्ति कलिऊण एयस्स मुणिणो गउरवं कयं, किं मए एयं
 वियाणियं? जं एसो एवं नियगेहमुवेहिस्सइ, एवं ठिएवि तहा करिस्सं जहा न विणस्सइ तुम्ह आसमो, एत्तो
 मा वहिस्सह संतावं, मा चिंतिज्जह कुविगण्णजालं, तुम्हाणं अवरो को मम पिओत्ति?, एवमायन्निऊण जायसं-
 तोसा गया ते जहागयंति, कुलवईवि गओ जिणसगासे, दिट्ठो उडवओ निलुत्तपुंसपुडविडओव नाममेत्तावसेसो,

तापसो-
पालम्भः.

॥ १४७ ॥

तं च पेच्छिऊण चित्तिं कुलवइणा-अहो सम्ममुवइदुं तेहिं वरागेहिं, मए पुवं वियाणियं-मच्छरेण एए जंपंति,
इयाणिं पुण एयदंसणे जहावट्टियं नायंति, एवं संकप्पिऊण भयवंतं भणिउमाढत्तो—

चउरासमगुरुणो तं सुओऽसि सिद्धत्थभूवइस्स जओ । तइलोकपिहियकित्ती ता तं पइ किंपि जंपेमि ॥ १ ॥

तुज्झ पिउणावि एयं आसमपयमायरेण निचंपि । रक्खियमिणिंहु पुत्तय ! पालेयवं हवइ तुमए ॥ २ ॥

दुट्ठाण ताडणं चिय तुम्ह वयं तेण सुक्कपरिसंको । कीस न गोरूवाइं तणभक्खणओ निवारेसि ? ॥ ३ ॥

सउणीवि वच्छ ! नियनीडरक्खणं कुणइ सबजत्तेणं । भूभारधरणधीरो किं पुण तुम्हारिसो पुरिसो ? ॥ ४ ॥

अम्हारिसजइजणरक्खणट्ठया निच्छियं पयावइणा । तुम्हारिसा महायस ! निप्फाइज्जंति सप्पुरिसा ॥ ५ ॥

अन्नह गोरूवेहि व दुट्ठेहिं धम्मपच्चणीएहिं । उवहम्मंता अम्हे कं सरणं किर पवज्जंता ? ॥ ६ ॥

ता गिहनाहोव कुमार ! वससु तुह संतियं इमं सबं । पइं दिट्ठे पियमित्तं सिद्धत्थनिवं सरेमि अहं ॥ ७ ॥

इय संथवणोवालंभणयसिक्खवणगम्भवयणेहिं । भणिऊण जिणं सो तावसाहिबो पडिगओ सगिहं ॥ ८ ॥

अह तेसिं भयवं तो मुणिउं अप्पत्तियं महासत्तो । जयजीवहिएक्करओ चित्तेउमिमं समाढत्तो ॥ ९ ॥

मज्झ निमित्तेण इमे पारिविति अवोहिवीयमइभीमं । ता सबहा न जुत्तं एत्तोऽवत्थाणमिह काउं ॥ १० ॥

इय भुवणगुरू संचित्तिऊण जाएऽवि वरिसयालंमि । ठाणाओ तओ चलिओ परपीडावज्जिणो गरुया ॥ ११ ॥

श्रीगुणचंद
महावीरच०
५ प्रस्तावः
॥ १४८ ॥

एत्तो चिय अन्नेहिंवि परपीडावज्जणंमि जइयवं । जहसत्तीए एयं जम्हा सद्वम्मसारोत्ति ॥ १२ ॥
एयं चेव भगवया वेरग्गकारणमुवहंतेण तिवा पंच अभिग्गहा गहिया, तंजहा-अचियत्तकारए उरगहंमि न
वसियवं, निचं उस्सग्गं करेयवं, एगदुवयणवज्जं मोणेण ठाइयवं, पाणिपत्ते भोत्तवं, एगे किर सूरिणो एवं भणंति,
तं च किर कहं?—सपत्तो धम्मो पन्नवेयवोत्ति भगवया पढमपारणगे परपत्तंमि भुत्तं, तेण परं पाणिपत्तंमि जाव
छउमत्थोत्ति, गिहत्थो य न अब्भुट्टेयवोत्ति पंचमो, एवं च गहियपंचाभिग्गहो अद्धमासावसाणे तत्तो नीह-
रित्ता अट्टियग्गामंमि वच्चइ, तस्स पुण अट्टियगामस्स पढमं वद्धमाणनाममासि, तं च किर कहं ववगयंति?
निसामेह कारणं—

कोसंबीए नयरीए असंखदविणसंचओ धणो नाम सेट्ठी परिवसइ, तस्स अणेगोवजाइयसएहिं पसुओ धणदेवो
नाम पुत्तो, अचंतं पाणप्पिओ वीसासट्ठाणं च, सो य अन्नया अणेगकुवियप्पदुट्ठसत्तभीसणं समुल्लसंतमयणकुसुमसरं
रंगंततण्हामिगवण्हियापडलं दुव्वारपसरेंदियचोरभयावहं दुरुत्तारमूढयामहानिन्नगाविसमं अरन्नं व रउहं संपत्तो
तारुणं, तवसेण य वसइ वेसागिहेसु रमइ जूयं पइदियहं विह्वइ अत्थसंचयं, कुणइ विविहे विलासे, उवचरेइ दुल-
लियगोट्ठिं, पोसेइ नडनाडइज्जगायणपसुहं अनिवद्धं जुणं, नाऽवेक्खइ कुलमेरं न परिचितेइ सयणाववायंति, एवं
च वच्चंतेसु य वासरेसु स्त्रीणसु दवपडिपुण्णमहानिहाणसु, सुत्रीभूएसु कोट्टागारेसु चित्तियं धणसेट्ठिणा-अहो

वर्षाकाले
विहारः
अभिग्रहाः

॥ १४८ ॥

अज्जपज्जयाइपुरिसपरंपरागयंपि अपरिकलियसंखंपि खयं व पत्तमियाणिं मम धणं, ता न जुत्तं एत्तो पुत्तस्स उवेहणंति निच्छिऊण एगंते भणिओ धणदेवो—पुत्त ! तुम्हारिसाणं उवभोगाइनिमित्तमेव अत्थोवज्जणमम्हाणं, न एत्तो विसिट्ठं ठाणमत्थि, केवलं जराजज्जरियसरीरोऽहमियाणिं असमत्थो चंकमणमेत्तेऽवि अखमो समहिगभासियेवेवि अपरिहत्थो कलाकोसल्लेवि, ता वच्छ ! तुमए एस सवो कुडुंबभारो धम्मववहारोय अणुचितणिज्जो, सो य अत्थं विणा न तीरण मुहुत्तमवि सोढुं, अत्थोत्ति नाम पवरो पुरिसत्थो, तद्वाहि—

अत्थेण सुगुणमुणिजणखेत्तनिहित्तेण सुहफलोणमियं । निष्पाइज्जइ सद्धम्मसस्सयं विणु पयासेण ॥ १ ॥
 किं पुत्त ! तए न सुयं जिणाण दिन्नाउ जेहिं भिक्खाओ । पढमाउ ते य तम्मिबि केऽवि जणा सिवपयं पत्ता ॥ २ ॥
 केई तइयभवेणं सुरवरसोक्खाइं भुंजिउं धीरा । सट्ठाणनिहित्ततहविहत्थसामत्थओ सिद्धा ॥ ३ ॥
 अत्थेणं चिय कोमुइमयंकतुलाणणाउ तरुणीओ । आवद्धपाणिसंपुडमाणाए लहुं पयट्ठंति ॥ ४ ॥
 निंदियकुलुच्चभवोविहु सयलकलावज्जिओविहु धणेणं । पुरिसो गुरुव देवोव पुच्छणिज्जो हवइ लोए ॥ ५ ॥
 जे सूरुा समरसिरे जे माणेणं गिरिंदसारिच्छा । जे भवकव्वबंधेण जंति किर्त्ति परं भुवणे ॥ ६ ॥
 जे रूवमरट्ठेणं मयरद्धयमवि हसंति किर पुरिसा । अत्थट्ठाण जणाणं तेवि हु सेव पयज्जंति ॥ ७ ॥
 अच्छउ दूरे अन्नो नियगिहिणीऽविहु न जेण धणहीणं । आयरइ नरं पुत्तय ! सयलोऽविहु लज्जए तेण ॥ ८ ॥

श्रीगुणचंद
महावीरच०
५ प्रस्तावः

॥ १४९ ॥

चिरसंथुयावि चिर(सह)कीलियावि निच्चं कओवयारावि । गोहचकारगंपिव मित्तावि मुयंति धणरहियं ॥ ९ ॥
किं बहुणा दढदालिहदूमि(स)यं माणुसं विणासंतो । सवंकसो कयंतोवि पुत्त ! आलस्समुच्चहइ ॥ १० ॥
इय सच्चगुणाहाणं सधणत्तं तदियरं च दोगच्चं । नियवुद्धीए नाउं पुत्तय ! उच्चियं समायरसु ॥ ११ ॥
जइ ववसायं वंछसि काउं दविणज्जणत्थमिह भइ ! । ता एसो पत्थावो जावऽज्जवि अत्थि किंपि धणं ॥ १२ ॥
सच्च विणासे जाए अग्गिंपि समप्पिही न ते कोऽवि । किं पुण ववहारकए भंडोलं जीविमाजोग्गं ? ॥ १३ ॥
एवं निसुणिऊण भणियं धणदेवेण-ताय ! जइ एवं ता किं तुमए उवेहिओऽहमेत्तियं कालं ? किं मए
अवगणियं कयाइ तुम्ह वयणं ? दंसिया अणुचिया पडिवत्ती ? सुरुद्धताडणेणवि पासिओ विरूवो मुहरागो ?
जं विणस्समाणेऽवि घरमारे ण सिक्खविओऽम्हि, अहवा अलं पुव्वगयवइयरसोयणेण, पसीयह मे, देह
आएसं, दुट्ठमहिलंव आकरिसेमि दूरगयंपि लळिं, नंदह तुम्हे वहुं कालं केत्तिमेत्तमेयंति, सेट्ठिणा भणियं-
पुत्त ! किं न मुणेमि तुह कलाकोसलं, न जाणामि साभावियं भुयवलं ?, न लक्खेमि अंगीकयभरधुरधव-
लत्तणं, न बुज्झामि महिट्ठं चित्तावट्ठं, अओच्चिय मए एत्तियदिणाइं न किंपि भणिओऽसि, विसमदसावडि-
यस्सवि पुत्त ! किमसज्झं तुह परक्कमस्स ?, ता इयाणिंपि कुणसु समुज्जमं पूरेसु पणइजणमणोरहे दलेसु दुज्जणदुट्ठ-
चित्तियं अब्भुद्धरेसु विहलियं जणं पयडेसु मयंकनिम्मलं नियकुलंति, धणदेवेण भणियं-ताय ! किं पुणरुत्तवयणवित्थ-

धनदत्तं
प्रति पितृ-
शिक्षा.

॥ १४९ ॥

रेणं ?, पगुणीकरेसु सपडि सत्थं सव्व(मग्ग)संवाहगं च, इय भणिए सेट्ठिणा नाऊण से निच्छयं वाहराविया नियपुरिसा, भणिया य-अरे ! करेह संबलगाइसमेयं समग्गं मग्गसंवाहगं, संजत्तेह विविहमहामोलभंडपडिपुण्णं संगंडसमूहं उवणेह बलिहं लट्ठखंधगोणगणं पव्वत्तेह कम्मकरजणं वाहरह पहरणत्थं गोहसत्थंति, जं सामी आणवेइत्ति पडिसु-
 णिऊण गया पुरिसा, अकालविलंबं समायरियं सव्वं, निवेइयं च सेट्ठिणो, सो य धणदेवो ण्हाओ कयविलेवणो केस-
 वद्धसियकुसुमो परिहियपंडुरवत्थो पणयदेवगुरुचरणो आपुच्छियजणणिजणगसयणवग्गो गणिमधरिममेयपारिच्छे-
 ज्जपडिपुन्नपंचसयसगडीसत्थसमेओ सुमुहुत्ते पट्ठिओ दूरदेसंतरं, ताहे पेच्छंतो अपुवापुवसंनिवेसे किणंतो अन्नोन्न-
 भंडाई, आपुच्छंतो देसंतरसमायारं, विण्णासंतो विचित्तभासाविसेसे, देंतो दीणदुत्थियाण दाणं अइगओ दीहम-
 द्दाणं, कमेण रणज्झणिरवसहकंठपलंबन्तघंटियारावनिरुद्धावरसहंवावारो अणेगसहाइजणपयट्ठियगंतियागणो पडुत्तो
 वद्धमाणगगामसमीवं, तस्स य अन्तरावि समनिनुन्नयगंभीरखड्डविसमप्पवेसा आनाभिमेत्तसुहुमवेलुगापडहत्थविसा-
 लपुलिणा महल्लचिक्खल्लाणुविद्धतुच्छसलिला वेगवई नाम नई, तहिं च पविट्ठाओ सगडीओ, ताओ पुण उभयपा-
 सावलंबिणा जणेण सुसमणेणेव धरियपवणेण (धरियवयणेण) सारहिणा निगिण्हंतेण वसहनिवहं कोदालाइणा पगु-
 णिज्जंतेण चक्रमग्गेण कहकहवि कट्टेण पावियाओ अद्धमग्गं, अह विसमत्तणओ नदीए दूरपहखीणसामत्थत्तणओ
 वसभाणं अइभारियत्तणओ सगडीणं बाढमायासिया सारहिणो अविगणियकसखं(वं)धाइघाया निवडिया महीयले

श्रीगुणचंद्र
महावीरच०
५ प्रस्तावः

॥ १५० ॥

बलीवहा, बाढमुच्चिगो धणदेवो, वाडलीहूओ परियणो, तत्थ य सत्थे एगो वसभो सयलगोमंडलप्पहाणो सप्पुरिसो
इव लीलाए चिय समुद्धरियमहाभारो विसमप्पएसनित्थारणसमत्थो य अत्थि, सो य तहाविहविसमनिबडिण
सुमरिओ धणदेवेण पप्फुक्कारपुवयं च सक्कारिऊण जोत्तिओ सो सगडीए, तक्खणं अखेवेण य गओ सो निक्कवडसा-
मत्थेण गहिऊण लीलाए भारियंपि तं नईए परकूलं, जहा सा एगा, एवं पंचसयाणिवि सगडीणं निच्चाहियाणि
तेण विसमप्पएसउत्ति । अविय—

एगत्तो सो वसहो अन्नत्तो सयलगोणसंघाओ । उत्तारइ सगडीओ सच्भावस्सत्थि किमसज्झं ! ॥ १ ॥

अइदुद्धरभरपरिकट्टणेण तुट्ठं तडत्ति से हिययं । वयणुग्गीरियरुहिरो धसत्ति धरणीयले पडिओ ॥ २ ॥

तं च तारिसमवत्थंतरं पत्तमवलोइऊण धणदेवो परिमुक्कसेसकायघो सोयभरमुवहंतो वाहरावेइ विज्जे, कारवेइ
चिगिच्छं, सयमेव समीवट्ठिओ बंधवं व मित्तं व पडिजागरेइ, अन्नदिवसे य भणिओ सो परियरेण जहा—सत्थवाह ! किमे-
गगोणनिमित्तं उवेहिज्जंति नियकज्जाइं ? किं न सुणह तुब्भे सीयंति वणियपुत्ता ? विणस्संति कियाणगाइं ? धोलंति
बहवे वासरा, समीवमणुसरइ वासारत्तोत्ति, धणदेवेण भणियं—एवमेयं, किं तु न सक्केमि एयं वरामं परममित्तं व
सच्भावसारं मोत्तुं, परियरेण भणियं—तुब्भे जाणह जमेत्थोचियंति, तओ तप्परिहारकायरमणेणवि धणदेवेण सहा-
विया वद्धमाणगगामप्पहाणा पुरिसा, सुहासणत्था तंकोलाइदाणेण सम्माणिऊण सप्पणयं वसहस्स समक्खं

शकटपञ्च-
शत्युचारः.

॥ १५० ॥

भणियं जहा—एसो मम पवरवसभो एरिसदुद्धत्थाममवत्थंतरं पत्तो ता तुम्हेहिं एयस्स इमिणा रुवगसएण ओसह-
 चरणाइचिंताए संमं वट्ठियव्वं, एसो तुम्ह नासगो इव समप्पिओ मए, न सव्वहा अन्नहा कायव्वंति निरूविऊण सो
 मयहत्तरजणे मोयाविऊण वसहस्स पुरओ वहुं चारिं पाणियं च ससिणेहं खामिऊण य तं जहाभिमयं गओ धणदे-
 वसत्थवाहो। सो य वसभो गाढवेयणाभिभूओ जेद्धमासदिणयरनिट्ठुरकरोलिकरालिओत्ति गिम्हुण्हत्तत्तमहियलडज्झमा-
 णदेहो विरसमारसंतो दिणं गमेइ, तं पि से तिणाइयं अवरगोरूवेहिं भक्खिज्जइ, सोऽवि चारिवारिरहियत्तणेण गाढ-
 वाहिपीडियत्तणेण य सदीणं दिसाओ अवलोएमाणो तणसलिलहत्थे तं पएसं वोलंते जणे दट्ठूण चित्तेइ—नूणं मम
 निमित्तं एए इममुवाहरंतित्ति, लोगोऽवि तं अइक्कमित्ता नियनियकज्जेसु पयट्ठइ, एवं च सो वसभो पइदिणं तहा-
 दंसणविहलियासो, चम्मट्ठिपंजरावसेसो एवं सो परिकप्पेइ—अहो महापाविट्ठो वज्जगंठिनिट्ठुरमाणसो निरिघणो
 चंडालविसेसो असच्चसंधो कलिकालकलिलकलुसिओ एस गामजणो जेण मम एवं दुहियस्स अच्छउ दूरे करुणाए
 तण्णपूलगाइदाणं जं तइया धणदेवसत्थवाहेण मम समक्खं जवसाइ जीवणमप्पियं तं पि गसिऊण ठिओत्ति। एवं
 च पइदिणं पओसमुव्वहंतो अकामतण्हाए अकामद्धुहाए अकामतिव्वेयणाए आउलीकयसरीरो महानगरदाहमज्झ-
 पडिओ इव देहदाहाभिभूओ मरिऊण तंमि चेव गामे अग्गुज्जाणे सूलपाणिनामो वाणमंतरो समुप्पन्नो, तहिं च उव-
 वण्णो समाणो तहाविहं देवरिद्धिं पेच्छिऊण विमरिसिउमारद्धो—अहो मए पुव्वभवे किं दाणं दिन्नं? किं वा तवं

श्रीगुणचंद
महावीरच०
५ प्रस्तावः
॥ १५१ ॥

तवियं? कस्स वा उवयारे ठियं? को वा धम्मो सम्ममाराहिओ? कथं वा सुतित्थे सरीरच्चाओ कओत्ति?, इह विमंसिऊण पउत्तो ओही, दिट्ठं च तं तहाविगरालरूवं बलीवद्दसरीरं, ताहे समुच्छलिओ से महाकोवानलो वियं-भिओ अविवेओ समुल्लसिओ अकज्जकरणपरिणामो, तयणंतरं पेच्छंतु दुरायारा नियपावपायवस्स फलंति विभाविं-तेणं तेण विउव्विया सयलगामवासिजणाण मारी, तप्पभावेण य अणवरयं भरिउमारद्धा उत्तिममज्झिमज्झन्ना बहवे जणा, जायंति य पइदिणं अकंदियरवा । कहं चिय?—

हा नाह! पाणवल्लह! कथं गओ मज्झ देसु उल्लावं । हा हा कयंत! निक्खि! कह सहसा ववसिओ एवं? ॥१॥
हा वच्छ! किमुच्छंगेऽवि तं गओ अइगओ सि पंचत्तं । मम मंदभाइणीए अहो किलेसो मुहा जाओ ॥ २ ॥
हा जणणि! तहा कट्ठेण पालिउं मं निलक्खणमियाणिं । कह निरवराहएच्चिय न देसि तं मज्झ पडिवयणं? ॥३॥
हा भाय! बंधुवच्छल! हा हा तं भइणि! निक्खवडपेम्मे । एकपए चिय चलियाइं कीस मुत्तूण मं दुहियं? ॥४॥
हा वच्छे! बहुदविणवएण परिणाविया पयत्तेण । तहविडु इमं अवत्थं संपत्ता हा हयासोऽग्घि ॥ ५ ॥
हा जक्खवंभहरिसरबुद्धजिणखंदरुइपमुहसुरा । तह पूइयावि संपइ किमुवेक्खह तो कुणह रक्खं ॥ ६ ॥
इय अणवरयं तियचचरेसु लोयस्स रोयमाणस्स । परिमुक्कावरकज्जस्स जंति दुक्खेण दिवसाइं ॥ ७ ॥
एवं च जुगंतसमएव रोगेहि य छिइपवेसेहि य पियजणविरहदुक्खेहि य हिययसंघट्टेहि य मरमाणंमि अणेगलोगे

शूलपाणि
वृत्तं.

॥ १५१ ॥

सुत्रीभवन्तेसु पवरमंदिरेसु युच्छिज्जमाणेसु य अइगरुयकुलेसु मडयकोडिसंकुलासु गामरत्थासु भयभीओ अवसेसो जणो जीवियरक्खणनिमित्तं लिहावेइ रक्खावलयं पाणिपल्लवेसु बंधेइ दिवोसहीओ कुणइ महागहपूयं समायरइ पियरपिंडप्पयाणं परावत्तेइ विविहमन्ते समीयट्ठियं धरइ दिवमणिगणं पयट्ठावेइ होमविहिं आपुच्छइ जाणयजोइ-सिए समारंभइ गिहदेवयाणं ण्हवणवल्लिपूयामहूसवं, अन्नं पि जं कोइ समाइसइ तं सवं तहट्ठियं निवत्तेइ, तहवि ओइण्णमहाजरोव पढमल्लुहाभिभूयपंचाण्णोव निकाइयकम्मनिवहोव न मणागंपि सो सूलपाणिवंतरो उवसमं गच्छइत्ति । अह गामजणो अणिवत्तगं दट्ठण मारिं धणकणगसमिद्धां गोमहिसितुरगाइपरिकिन्नाइं गिहाइं मोत्तूण जीवियट्ठयाइं नियनियकुडुंवाइं घेत्तूण अन्नन्नगामेसु गओ, तत्थवि गयं महावेरिओव उवइवइ सो तग्गामवासिलोयं, एगवा य तेसिं चिंता जाया—न नज्जइ तत्थ अहेहिं देवो वा दाणवो वा खेत्तवालो वा जक्खो वा रक्खसो वा विराहिओ होज्जा, तम्हा तहिं चेव गंतूण पसाएमोत्ति संपधारिऊण समागया तत्थेव गामे, उवट्ठाविया वल्लिकुसुम-धूवाइसामग्गी, तयणंतरं ण्हाया पंडुरवत्थकयउत्तरासंगा लंबंतविमुक्ककेसा सबसमुदाएणं तियचउक्कचचरेसु पडिसडियभूयगिहेसु रुद्धसंदावसहेसु उज्जाणेसु य बलिं च कुसुमपयरं च मुंचमाणा उट्ठमुहा जोडियकरंजलिणो एवं जंपितं पउत्ता—

भो अंतरिक्खनिलया देवासुरजक्खरक्खकिंपुरिसा । दिवाइसयसमेया निसुणह विन्नत्तियं एयं ॥ १ ॥

श्रीगुणचंद
महावीरच०
५ प्रस्तावः
॥ १५२ ॥

इस्सरियमएणं वा अन्नाणेणं व अविणएणं वा । जं अवरद्धं तुम्हं तं सवं खमह अम्हाणं ॥ २ ॥
पणएसु सदुच्चरिओहखामणाउज्जएसु सत्तेसु । जं तुम्हारिस देवा खमंति गरुयावराहंपि ॥ ३ ॥
कोवस्स फलं दिट्ठं पेच्छामो संपयं पसायस्स । इति भणिए सो देवो गयणठिओ वुत्तुमारद्धो ॥ ४ ॥
रे रे विणट्ठसीला ! धट्ठा निप्पिट्ठसिट्ठजणचिट्ठा । लोहमहागहनडिआ एत्तो मे खामणं कुणह ॥ ५ ॥
तइया न सरह पावा वसहस्स लुहाइणा किलंतस्स । तणजलसमप्पणेणवि अणुकंपा जं न विहियत्ति ॥ ६ ॥
नियसयणवग्गमरणे जाए संतावमुग्गमुव्वहह । वसहे तहा मयंमिवि न थेवमेत्तोऽवि मे सोगो ॥ ७ ॥
अलमहुणा भणिएणं वच्चह दूरेवि नत्थि मे मोक्खो । खलविसवेल्लिं आमूलओवि छिंदेमि दुहहेउं ॥ ८ ॥
इय तवयणमायन्निऊण भयवसकंपंतसरीरा धूवकडुच्छुयहतथा सुरभिपुष्पपुंजोवयारं कुणमाणा जय जीव नंदाइ-
कोमलवयणेहिं थुणंता अट्ठंगं निवडिया महीए, भणिउमाढत्ता य-देव ! सच्चमेव अवरद्धमम्हेहिं, नत्थि तुम्ह एत्था-
वराहो, तहावि पसीयह इयारिणि, आइसह इमस्स दोसस्स निग्घायणनिमित्तं पायच्छित्तं, 'अइकंतत्तसुमरणं विह-
लं चिय विणट्ठकज्जंमि' किं बहुणा ?, खित्तं नियसिरं तुह चरणपुरओ, कुणसु जं किंपि कीरइ सरणागयाणंति भणि-
ऊण अग्घदाणपुरस्सरं पुणो पडिया चरणेसु, एवं च निसामिऊण सूलपाणिवंतरो मणागं उवसंतचित्तो भणइ-जइ
एवं ता एयाणि माणुसट्ठियाणि एगत्य पुंजीकाऊण उवरि पवरं कणंतकिंकिणीधयवडाडोवमणहरं देवहरयं विर-

मूर्तिकारा-
पणं.

॥ १५२ ॥

एह, अचमंतरे वलीवहाणुगयं जक्खपडिमं पइद्वेह, निचं वलिकुसुमचणियं पयट्टेह, एवं कुणमाणानं तुम्हाणं जीवियं देमि, न अन्नहत्ति, तओ जं देवो आणवेहत्ति तं तहत्ति विणएण सासणं सिरेण पडिच्छिऊण तेहिं गामस्स अदूरदेसे जहोवइद्वं तहेव कारवियं तस्स मंदिरं, इंदसम्मामिहाणो य निरुविओ तत्थ देवचओ, आयरेण तिसंशं कीरइ पेच्छणयंति । एवं च अणेगमाणुसट्ठिनिचयपूरियत्तणेण इंतजंतेहिं पहिएहिं अन्नगामजणपुच्छिज्जमाणेहिं तस्स अट्ठिगामोत्ति नामं कयं, पसिद्धिं च सबत्थ संपत्तं । एएण कारणेण अट्ठियग्गामं जायंति । तत्थ पुणवाणमंतरघरे जे तडियकप्पडियाइणो भग्गपरिस्समपीडिया परिवसंति रयणीए ते सूलपाणी पुट्ठीए आरुहिऊण चिरं ताव वाहेइ जाव न सक्केति पयमवि दाउं, पच्छा किलिकिलारावं कुणमाणो केइ तिंदूसगं व गयणे उल्लालिऊण अहो निवडंतेसु तिकख-खग्गेण छिंदइ केइ चरणेसु गहिऊण वत्थं व सिलायलंमि पच्छाडेइ केइ घटं व दुवारतोरणे पलंबेइ केइ खंडाखंडिं काऊण बलिं व सबदिसासु पक्खिवइ, एवंविहजायणाहिं पहियजणं विणासेइ, तच्चएण य गामलोगो दिवसे अ-च्छिऊण वियाले सगिहेसु वच्चइ, इंदसम्मदेवचगोऽवि धूवं पईवं पूयं च से काऊण दिवसओ चेव निक्खमइत्ति ।

एवं वचंतेसु वासरेसु भयवं महावीरसामी तावसासमाओ समागओ समाणो तं वंतरसुरं बोहिउकामो देवचगं भणइ—अहो एत्थ जक्खगिहे अम्हे निवसामो?, तेण भणियं—गामो जाणइ, तओ भगवया तत्थेव मिलिओ सयलो गाम जणो अवत्थाणनिमित्तेणमापुच्छिओ, लोणेणवि अचंतसोमसस्सिरीयरूवं भयवंतं दट्ठूण भणियं—देवज्जग ! न सक्का

श्रीगुणचंद
महावीरच०
५ प्रस्तावः
॥ १५३ ॥

एत्थ वसिउं, एहि गाममज्जे, गिणहाहि जहाभिरुइयं अम्ह गिहेसु वसहिं, भयवंपि अणिच्छमाणो भणइ-इत्थेव अणुजाणह, लोगेण भणियं-जइ एवं ता ठाहत्ति, ताहे गंतूण एगंमि कोणे पडिमं ठिओ सामी, सो य इंदसम्मो पच्छिमसेलसिहरं संपत्ते दिवसयरमंडले धूववेलं निम्मविऊण कप्पडियाइतडियवग्गं निस्सारित्ता भयवंतंपि भणइ-देवज्जगा ! तुब्भेवि नीहरह, मा इमिणा जक्खेण मारिज्जिहिह, सामीवि असुणमाणोव तुसिणीए य गमेइ, पुणो पुणो इय भणंते य देवच्चगे सो वंतरसुरो चिंतेइ-अहो कोऽवि एस देवच्चएणं गामजणेण य भणिज्जमाणोवि न गओ एत्तो ठाणाओ, ता पेच्छिही जमज्ज करिस्सामि, बहूणं दिवसाणं दिट्ठियाखेलणगमुवागयंति । एत्थंतरे अत्थमिओ दिणयरो समागया संज्ञा, सट्ठाणं गओ देवच्चगो, काउस्सग्गे ठिओ भुवणबंधवो ।

ताहे काउस्सग्गे ठियस्स सो भेसणट्ठया गुरुणो । जुगविगमधोरघणघोसविब्भमं भेसियजणोहं ॥ १ ॥

अट्ठट्ठहासमसमं चाउदिसिपसरियं महाभीमं । उच्छलियवहलपडिसदनायविप्फारियं कुणइ ॥ २ ॥

गामलोओऽवि तं सहं सोऊण भयसंभंतो परोप्परं भणइ-अहो एसो देवज्जगो महाणुभावो जक्खेण मारिज्जइत्ति, तत्थ य उप्पलो नाम परिच्चायगो पासजिणतित्थपुव्वपडिवन्नसामन्नो भोमुप्पायसुमिणंतलिक्खअंगसरलक्खणवंजणरूव-अट्ठंगमहानिमित्तसत्थपरमत्थवियाणगो लोगाओ एरिसो तारिसो देवज्जगो जक्खेण मारिज्जिहित्ति निसुणिऊण मा तित्थंकरो महावीरो पडिवन्नदिक्खो होज्जत्ति संकियमणो वंतरगिहे य तब्भएण गंतुमचाइंतो अट्ठिइं काउमारद्धो ।

भगवदा-
गमनं.

॥ १५३ ॥

सो य सूलपाणी जाहे अट्टट्टहाससहेण भयवं न भीओ ताहे पिसायरूवं विउवइ, तं च केरिसं?—

अइकविलथूललंवरिकेसोहच्छन्नगयणयलमज्झं । अविपक्कसुक्कतुंवयसरिच्छवीभच्छवयणिल्लं ॥ १ ॥

दिसिक्कुंजरंकुसागारदूरनिकसियकलुसदसणगं । चिविडग्गघोरघोणानिलकंपियकविलमुहलोमं ॥ २ ॥

लंवरिबलिचम्मोणद्धमडहवच्छत्थलट्टिसंधायं । पिट्ठावलग्गल्लिंजरकप्परसभजरढजठरतलं ॥ ३ ॥

तालतरुजुयलदीहरनिम्मंसणहारुनद्धजंघजुयं । ठाणट्ठाणोलंविपलंवतंडवियफणसप्पं ॥ ४ ॥

अइवेगमुक्ककमभरथरहरियससेलमेइणीवट्ठं । कक्खंतारालनिग्गहियमडयपिसायासणाभिरयं ॥ ५ ॥

अइकुडिलकत्तिउक्कत्तियंगिनिस्सरियरुहिरपाणपरं । उब्भवियपयंडभुयं पावसमूहं व पच्चक्खं ॥ ६ ॥

इय एवंविहरूवं पिसायमवि पासिऊण जयनाहो । मसगं व अवगणिंतो धम्मज्झाणं विचित्तेइ ॥ ७ ॥

ताहे स सूलपाणी उवउत्तो पेहए जिणवरिंदं । मेरुव निप्पकंपं निब्भयचित्तं पवरसत्तं ॥ ८ ॥

तयणंतरं च पुणरवि भेसणकज्जेण सो महापावो । निसियग्गकुंतभीसणउग्गविसुग्गाढदाढालं ॥ ९ ॥

अविकलियरोसवसनिस्सरंतविसमिस्सजलणजालोहं । पप्फुरियफारफुक्कारवायभजंततरुनियरं ॥ १० ॥

वियट्ठुब्भडचडुलफणाकडप्पपडिरुद्धदिसिमुहाभोगं । सिरिरियणकिरणसंचयदावियगुरुवणदवासंकं ॥ ११ ॥

कलिकालपढममित्तं व तिबदुरिओहभूरिरासिं व । जमपासंपि व सक्खा महिमहिलावेणिदंडं व ॥ १२ ॥

श्रीगुणचंद
महावीरच०
५ प्रस्तावः
॥ १५४ ॥

सत्पं विउच्चइ महं तो सो सामिं निण्ण देहेण । आगंतूणावेढइ वाढं थंभं व रज्जूए ॥ १३ ॥ पंचहिं कुलयं ।
पुच्छच्छडाए ताडइ सच्छंदं दसइ तिक्खदसणेहिं । कंठस्स पीडणेणं कुणइ निरुस्सासयं सहसा ॥ १४ ॥
अह अट्टहासभीसणपिसायनागोवसग्गकरणेवि । अविचलचित्तं मुणिऊण जयगुरुं गाढकुवियमणो ॥ १५ ॥
सो सच्चं सच्चरिं जाव अच्चंतरउहं दुरहियासं सत्तविहं वेयणं भगवओ करेइ, तंजहा—सीसवेयणं सवणवेयणं नयणवेयणं
दसणवेयणं नहवेयणं नासावेयणं पिट्ठिवंसवेयणं, एयाणं वेयणाणं एकेकावि समत्था पागयनरस्स जीवियं ववक्कमिउं, किं
पुण सत्त एयाओ एगकालपाउब्भूयाओ अणाइक्खणिज्जरूवाओत्ति?, भयवं पुण ताओ सम्ममहियासेइ, सो य वाणमंतरो
जाहे न पारेइ भयवंतं भेसिउं वा खोभिउं वा ताहे बाढपरिस्सममुवगओ अहो निप्फलो मम वावारोत्ति कयचित्तसं-
तावो धीरिमारंजियहियओ य भयवंतं पायवडिओ सच्चायरेण भणइ—भयवं! खमह मम अवरहं, अयाणमाणेण तुम्ह
सामत्थं सुचिरं मए अवरद्धंति, एत्थंतरे नियकज्जकरणवावडचित्तो तक्खणसुमरियसुरवइजिणभलावणावयणो सो सि-
द्धत्थदेवो दट्ठूण भयवओ तिब्बोवसग्गं धाविओ वेगेणं, पत्तो तं पएसं, भणिउमारद्धो य—अरे रे सूलपाणिवंतराहमा!
अच्चंतदुट्ठलक्खणा दोगच्चमच्चुपत्थगा विसुद्धबुद्धिवज्जिया न जाणसि खलियारंतो इमं सिद्धत्थरायपुत्तं भयवंतं चरि-
मतित्थयरंति?, जइ रे दुरायार! एयं वइयरं सक्को कहवि जाणंतो ता को जाणइ तं किंपि पारितोत्ति?, सो य एव-
मायन्निऊण वाढं भयभीओ चउग्गुणं पुणो पुणो जिणं खामेइ, सिद्धत्थो य तस्स धम्मदेसणं काउमाढत्तो जहा-

शूलपाण्यु-
पसर्गाः.

॥ १५४ ॥

वीयरगो देवबुद्धीए गहियवो, साहुणो य गुरुबुद्धीए परिभाविषवा, तत्तथसद्दहणं कायवं, सवपाणीणं पीडा परि-
 वज्जियवा, पुव्वदुच्चरियाइं भुज्जो भुज्जो गरहणिज्जाइं, जओ एक्कसिं कयाणंपि तिच्चपओसेण पाचाणं कोडाकोडाइरूवो
 दुहविवागो हवइत्ति, सूलपाणीवि एवमायन्निऊण अणेगलोगक्खयसुमरणउप्पन्नातुच्छपच्छायावो जायसंमत्तो अचंत-
 भवविरत्तचित्तो असेसदोसपसमणट्ठा तिहुयणपहुणो पुरओ गीयनट्टमहिमं काउं पयत्तो, गामवासिलोगोऽवि गीया-
 इसहं सोच्चा चित्तेइ-अहो तं देवज्जयं जक्खो मारित्ता इयाणिं परितुट्ठो सच्छंदमेवं कीलइत्ति, भयवंपि चत्तारि रयणि-
 जामे देसूणे परित्ताविओ समाणो पभायकाले सुहुत्तमेत्तं निहापमायमुवगओ संतो इमाइं दस महासुमिणाइं पस्सइ,
 कहं १, जहा किर मए तालपिसाओ उहं बहमाणो निहओ १ पंडुरो(सउणो)चित्तकोइलगो य दुवे पज्जुवासमाणा
 दिट्ठा २-३ सुरहिकुसुमगंधुदुरं दामदुगं ४ गोवग्गो य पज्जुवासणापरो ५ पउमसरो विहुद्धपंकओ अवलोइओ ६
 कल्लोलमालाउलो सायरो समुत्तिण्णो भुयाहिं ७ पइण्णरस्सिमंडलं चक्खुगोयरमुवमयं दिणयरविंव ८ नियंतेहिं
 भाणुसुत्तरगिरी परिवेदिओ ९ मंदरसिहरं चारुटोत्ति १०, एवं एए दस सुमिणे पासित्ता पडिबुद्धो सामी । एत्थंतरे
 समुग्गओ सूरु, समागओ धूवकुसुमक्खयहत्यो सयलगामजणो उप्पलनेमिच्चिगो य, ते य दिवगंधत्तुण्णपुप्फवासेहिं
 समच्चियं अक्खयसरीरं सार्मि पेच्छिऊण उक्कुट्टिसीहनायं करेमाणा चरणेषु पडिया, परोप्परं भणिउमेवं पवत्ता
 य-अहो देवज्जगेणं जक्खो उवसामिओ, तेणेसा पूया कयत्ति, उप्पलोवि परियाणिऊण भयवंतं पडिट्ठो, वंदिऊण

श्रीगुणचंद
महावीरच०
५ प्रस्तावः
॥ १५५ ॥

चलणजुयलंतिण निसन्नो, अह भगवओ काउस्सग्गावसाणंमि पुणरवि नमंसिऊण अट्ठंगनिमित्तसामत्थओ मुणियसु-
मिणाइवइयरो भणिउमारद्धो-सामि! तुभेहिं अंतिमराईए दस सुमिणा दिट्ठा, तेसिं इमं फलं-जो किर तालपि-
साओ महादेहो निहओ तमचिरेण मोहणियकम्मं उम्मूलेहिसि, जो य सियसउणो तं सुक्कज्झाणं श्रियाइहिसि, जो
विचित्तो कोइल्लो तं दुवालसंगं पण्णवेहिसि, गोवग्गेण य जं तुमं परियरिओ तं ते चउव्विहसमणसमणीपमुहो चउ-
विहो संघो भविस्सइत्ति, पउमसरा य चउव्विहो य देवनिकाओ तुमं पज्जुवासेही, जं च सायरमुत्तिण्णो तं संसारमुत्त-
रिहिसि, जो य सूरुओ अवलोइओ तमचिरेण केवलनाणं उप्पज्झिही, जं च उदराउ निस्सरिऊण अन्तेहिं माणुसुत्तरगिरी
वेढिओ तं ते निम्मलजसकित्तिपयावा सयलतिहुयणे अनिवारियपसरा परिभमिस्संति, जं च मंदरसिरमारुद्धो तं
सीहासणत्थो सदेवमणुयासुराए परिसाए धम्मं पन्नविहिसि, जं च दामदुगं तस्स फलं न याणामि, सामिणा
भणियं-हे उप्पल! जं तुमं न याणेसि तमहं कहेमि, जं इमं दामदुगं तमहं दुविहं सागारमनागारियं धम्मं पन्नवेहा-
मिति, एवं निसामिऊण हरिसुल्लसियपुल्लयजालो उप्पलो नमंसिऊण जयगुरुं जहागयं पडिनियत्तोत्ति। भयवंपि धम्म-
ज्झाणपरायणो कालं गमेइ।

अह अद्धमासखमणेहिं जयगुरुवि गमिऊण चउमासं। विविहाभिग्गहनिरओ अट्ठियगामाओ निक्खंतो ॥ १ ॥
ताहे स सुलपाणी जक्खो अणुगच्छिऊण भयवंतं। पयकमलनिलीणसिरो भत्तीए भणिउमाढत्तो ॥ २ ॥

भगव-
त्स्वमा।

॥ १५५ ॥

नाह ! तुह तिष्ठउवसग्गकरणओ नत्थि मम समो पावो । जं एत्थ तुमं वुच्छो तेण कयत्थोऽचि नेवत्थि ॥ ३ ॥
 जाणामि सामि ! मम बोहणट्टया तं समोसट्ठो एत्थ । न हु सूणासालाए कोवि निवासं जओ कुणइ ॥ ४ ॥
 बहुजीवविणासणजणियपावपडलेण पीडिओ संतो । नो पेच्छंतो दुक्खं किमहं जइ तं न इंतोऽसि ? ॥ ५ ॥
 ता तुमए चिय भवकूवयाओ हत्थावलंबदाणेण । उत्तारियम्हि जयगुरु ! नियसोक्खपरंमुहमणेण ॥ ६ ॥
 इय सूलपाणिजक्खो संथविउं जिणवरं पयत्तेणं । दुस्सहविओगभल्लीए सल्लिओ पडिनियत्तोत्ति ॥ ७ ॥
 पच्चज्जागहणाओ पढमं संवच्छरं जहावित्तं । सिद्धं जइकगुरुणो इण्हि बीयं निसामेह ॥ ८ ॥

अह थुणिऊण वलियंमि जक्खे भयवं गामाणुगामं विहरमाणो गओ मोरागसन्निवेशे, तत्थ य बाहिरुज्जाणे थीप-
 सुपंडगाइदोसरहिण एएसे ठिओ पडिमाए, तर्हि च गामे अच्छंदगा नाम पासंडत्था परिवसंति, तेसिं च एगो
 अच्छंदगो लोगाणं मंततंतभूइकरणेहिं जीवइ, सो य सिद्धत्थवंतरो भयवंतंमि पडिमापडिवन्नंमि कलहकेलिपियत्त-
 नेण विणोयमपावमाणो नाहस्स पूयमपेच्छमाणो य अधिइं करेइ, अन्नदिक्खे य सो भयवओ सरीरे संकंतो तेणं-
 तेणं वोलितं एगं गामगोहं सहित्ता कीलानिमित्तं एवं जंपइ-भो भइ ! तुमं कंगुकूरं सोवीरेण सह अज्ज पजिमिओ,
 संपयं च वसहरक्खणट्टया चलिओ, इंतेण य मग्गे सुयंगमो दिट्ठो, सुमिणगंमि परुत्तो य ता रे संभवइ सबमेयं ?,
 गामगोहेण भणियं-भयवं ! अवितहमेयंति भणिण सिद्धत्थेण अन्नंमि से बहुं समाइडं, सो परितुट्ठो परमच्छेरयंति

श्रीगुणचंद
महावीरच०
५ प्रस्तावः
॥ १५६ ॥

मण्णमाणो गंतूण गाममज्झे नियसयणवग्गस्स पुरओ एवं परिकहेइ, अह कोऽवि देवज्जओ गामवाहिं ठिओ तीया-
णागयवट्टमाणइं जाणइ, पूरिया मम तेण वहवे पचया, एवं च आयन्निऊण गाढकोऊहलाउलिज्जमाणमाणसो
गामजणो कुसुमक्खयहत्थो गओ भयवओ समीवं, संभासिओ तेण जिणतणुसंकंतेण सिद्धत्थेण, जहा भो तुब्भे मम
अइसयपेच्छणत्थं एत्थ संपत्ता, गामजणेण भणियं-सामि! एवंति। तदणंतरं—

जं पुव्वकालवित्तं जं च सुयं जं च दिट्ठमित्तेहिं । जं भासियं परोप्परमह जं रयणीए अणुभूयं ॥ १ ॥

जं इट्ठाणिट्ठविओगजोगसुहदुक्खलाभलोभाइ । अज्जवि भविस्सविसयं तंपि हु सो साहए तेसिं ॥ २ ॥

ते य तहाविहं कोउगं दट्ठूण सवायरेण वंदंति पूयंति महिमं च करंति, एवं च पइदिणं इंतजंतेसु गामिल्लएसु
पवित्थरिओ सिद्धत्थस्स परमो आणंदो । अन्नया य लोगो भणइ-भयवं!, एत्थं अन्नोवि अच्छंदओ नाम जाणओ
परिषइ, सिद्धत्थो भणइ-सो वराओ न किंचि जाणइ, ताहे लोगो गंतूण तस्स पुरओ साहेइ, जहा देवज्जगो
भणइ-तुमं न किंपि जाणसि, सो य तं सोचा अहंकारमुवहंतो अप्पाणं ठाविउकामो भणइ-एह तुम्ह समक्खं अव-
णेमि जेण तस्स परित्राणाभिमाणं, दुक्करं खलु अम्हारिसस्स पुरओ अत्तणो पयासणं, सुकरा तुम्हारिसस्स पुरओ
गामिल्लयाण मज्झे विविहसमुल्लावत्ति, एवं च नियवियक्खणत्तं पयडंतो ईसामहल्लसल्लखिलियहिययो सकोउहलेण
लोणेण परियरिओ गओ सो तत्थ जत्थ जणसमूहोवासिज्जमाणपायपंकओ भयवं काउस्सगे चिट्ठइत्ति। तयणंतरं च

अच्छन्द-
कवृत्तं.

॥ १५६ ॥

करंगुलीहिं उभयपज्जंतेसु तणयं घेत्तूण भयवओ संसुहं ठिओ पुच्छिउमारद्धो-भो देवज्जय ! इमं तणं किं छिज्जिही नवत्ति ?, तस्स एस अभिप्पाओ-जइ किर देवजो भणिही-छिज्जिही तो न छिंदिस्सं, अह अन्नहा तो छिंदि-स्सामि । एवं च विगप्पमाणंमि तंमि सिद्धत्थेण भणियं-न छिज्जिही, सो एवं सोच्चा सगारद्धो छिंदिउं ।

एत्थंतरेमि सक्को सुहासणत्थो इमं विचिंतेइ । गामागरेसु भयवं ! कह विहरइ संपयं वीरो ? ॥ १ ॥

दिघोवओगविभवेण वइयरं तं तओ मुणइ सच्चं । पेच्छइ य तं पुरत्थं तणभंगसमुज्जयं समणं ॥ २ ॥

अहह महापावो कह जिणंपि मिच्छं समीहए काउं ? । इय चिंतिऊण मेलइ महल धारुक्कडं कुलिसं ॥ ३ ॥

तं मणसमाणवेगं आगंतुं करजुगंगुलीवल्लयं । छिंदेइ तस्स सहसा अछिज्जमाणंमि तंमि तिणे ॥ ४ ॥

अह सो अच्छंदगो कुलिसघायनिवडियासु दससुवि करंगुलीसु जायवेलक्खभावो सयलगामजणेण धिक्कारिज्ज-माणो गओ तप्पएसाओ, ताहे सिद्धत्थो तस्सोवरि वाढं पओसमावन्नो तं गामजणं भणइ-अरे रे दुरायारो महा-चोरो एसो, लोएण वुत्तं-भयवं ! कस्स एएण चोरियं ?, सिद्धत्थेण भणियं-निसामेह, अत्थि एत्थ वीरघोसो नाम कम्ममारओ, सोऽविय निसामिऊण नियनामं लोयमज्झयाराओ आगंतूण निवडिओ चलणेसु, भणिउं पवत्तो य-भयवं ! तुम्हेहिं जो समुक्कित्तिओ सो अहं, साहेह किं कीरउत्ति, सिद्धत्थेण भणियं-भइ ! तुह अमुगंमि काले दस-पलियं वट्ठगं नट्टपुवं ?, तेण भणियं-आमं, सिद्धत्थेण वुत्तं-तं एएण पासंडियाहमेण हरियं, वीरघोसेण भणियं-कत्थ

श्रीगुणचंद
महावीरच०
५ प्रस्तावः
॥ १५७ ॥

तं पुण पाविस्सं?, सिद्धत्थेण भणियं-एयस्स चेव पुरोहडे महिसिंदुनामस्स पायवस्स पुरत्थिमेणं हत्थमेत्तं गंतूण भूमिनिहित्तं उक्खणिऊण गिण्हसुत्ति वुत्ते सो कम्मरओ लोमेण समं गओ जहोवइट्ठपएसे, आगरिसिऊण गहियं वट्ठयं, हलवोलं कुणंतो य जणो पडिनियत्तो जिणस्स अंतिए । तयणंतरं च पुणो सिद्धत्थेण भणियं-अन्नंपि सुणेह, अत्थि किमिह इंदसम्मो नाम गाहावई?, जणेण भणियं-अत्थि, एत्थंतरे सो इंदसम्मो निययनाममुक्कित्तिज्जमाणं सोऊण सयमेव उवट्ठिओ भणइ-आणवेह सो अहंति, सिद्धत्थेण भणियं-अत्थि भद्! तुज्झ पुव्वाकाले ऊरणगो पणट्ठो?, तेण भणियं-अत्थि, सिद्धत्थेण भणियं-अरे एएण अच्छंदएण सो हणिऊण खाइओ, अट्ठियाणि से उकु-रुडियाए बदरीए दाहिणे पासे उज्झियाणि अज्जवि चिट्ठंति, जइ कोऊहलं ता अज्जवि गंतूण पेच्छहत्ति वुत्ते वेगेण धाविया तदभिमुहं, अट्ठियाणि पलोइयाणि, कलकलं करंता आगया जिणसगासे, पुणरवि सिद्धत्थेण भणियं-एयं दुइज्जं दुच्चरियं, अन्नंपि तइज्जं अत्थि, परं नाहं कहिस्सं, ते य एयमायन्निऊण गाढं निव्वंधं काऊण पुच्छिउ-मारद्धा, कहं?—

देव! पसीय महापहु पुणोवि अण्णं न पसिणइस्सामो । अद्धोवइट्ठमेक्कं एयं अम्हं निवेणसु ॥ १ ॥

जह जह न साहइ सुरो तह तह पुच्छंति आउला धणियं । सच्चं जायं एयं जमद्धकहियं हरइ हिययं ॥ २ ॥

एवं निव्वंधपरेसु तेसु सिद्धत्थेण भणियं-अरे मा तरलायह, अम्ह अभासणिज्जमेयं, जइ अवस्सं सोयवं ता

अच्छन्दक-
पापण्डि-
वृत्तम्.

॥ १५७ ॥

गंतूणं पुच्छह एयस्स चेव भज्जं, सा तुम्ह साहिस्सइत्ति, एयमायन्निऊण पधाविया तग्गिहाभिमुहं, इओ य-सा अच्छं-
दयस्स भज्जा तदिवसं तेण पिट्ठिया, वाढं पओसमावन्ना चित्तेइ-सोहणं जायं जं तस्स अंगुलीओ छिन्नाओ जणेण
धिकारिओ य, तहा इयाणिं जइ गामो एइ ता सव्वं दुस्सीलयं पयडेमिच्छि विगप्पंतीए संपत्तो गेहंगणे गामजणो,
पुच्छिउं पवत्तो य, सा भणइ-मा इमस्स कम्मचंडालस्स नामंपि गिण्हह, जओ एस नियमगिणीए सहोयराए
सद्धिं विसए अणुभुंजइ, ममं निच्छइत्ति, एवमायणिऊण ते उक्किट्ठीसिहनायं कुणंता नियनियगिहेसु गया पण्णवेत्ति-
जहा एरिसो तारिसो सो महापावोत्ति, एवं सो अच्छंदओ जणेण अवमाणिज्जमाणो कयवंभणहचो इव अपेच्छिज्ज-
माणो लुक्खभिवक्खाकवलंपि अपावमाणो एगया गंतूण जिणनाहं सकरुणं जोडिय करसंपुडं च भणिउमाढत्तो—

देवज्जय ! वज्जेसुं निवासमिह तं महाणुभावोऽसि । ठाणंतरेवि तुज्झं पूयामहिमं जणो काही ॥ १ ॥

अन्नत्थ गओऽहं पुण कित्तिमकणगं व नेव अग्घामि । सदरीए च्चिय गोमाउयस्स सूरत्तणं सहई ॥ २ ॥

तुह पुरओ जो विहिओ दुव्विणओ देव ! मूढहियएणं । सो मं दढकुवियकयंतदंडघाओव दुक्खवइ ॥ ३ ॥

एवं भणमाणे अच्छंदगे अचियत्तोग्गहोत्तिकलिऊण सव्वस्सापत्ति(पीति)परिहारपरायणो भयवं नीहरिऊण मोराग-
सन्निवेसाओ उत्तरवाचालाभिमुहं पत्थिओ, अह मग्गे वच्चमाणस्स दक्खिणवाचालसन्निवेसं समइकंतस्स उत्तरवाचा-
लसंनिवेसं च अपावमाणस्स अंतरा सुवण्णकूलाभिहाणाए महानईए पुलिणं वोर्लितस्स भगवओ महावीरस्स खंधाव-

श्रीगुणचंद
महावीरच०
५ प्रस्तावः
॥ १५८ ॥

लंवि वत्थखंडं कंहंपि पवणकंपि ज्ञमाणं कंटए विलगिऊण निवडियं, सामीवि थेवं भूमिभागं गंतूण अत्थंडिले पडियं
होज्जत्ति मणागमेत्तं वलियकंधरो तमबलोइऊण जहाभिमयं गंतुं पवत्तो । सो य पिउवयंसो पुवभणियवंभणो चिर-
कालेण तं निवडियं वत्थखंडं पहिद्वचित्तो गिणिहऊण भयवंतं च वंदित्ता कुंडग्गामनयरमुवगंतूण पुवभणियतुन्ना-
गस्स समप्पेइ । तुन्नागोऽवि अइनिउणं तुन्निऊण एगरूवं विरएइ । तओ सो वंभणो देवदूसं आदाय गओ नंदिवद्वण-
नराहिवस्स समीवे, पणामियं तं वत्थं, राइणावि कोऊहलमुव्वहंतेण सुचिरं पलोइऊण भणियं—भइ ! एवंविहं पवर-
वत्थं कत्थ तए पावियं ?, वंभणेण भणियं—देव ! महई एयस्स कहा, राइणावि भणियं—वीसत्थो सम्मं साहसु, तओ
जह दालिदोवहओ सुचिरं देसंतरेसु भमिऊण । नियमंदिरमणुपत्तो गिहिणीए तज्जिओ पुव्वं ॥ १ ॥
जह जिणनाहो करुणक्खरेहिं गंतूण भूरि विन्नविओ । अणुकंपाए तेणं जह दिन्नं देवदूसद्वं ॥ २ ॥
जह तुन्नाएण पुणो दूइजवत्थद्वलाभकज्जेण । जयगुरुणोच्चिय पासे सिक्खविउं पेसिओ सहसा ॥ ३ ॥
जह संवच्छरमेगं पुट्टिमि ठिओ पुरागराईसु । सिस्सो इव परिभमिओ जयपहुणो विहरमाणस्स ॥ ४ ॥
जह वा सुवण्णकूलानईए कंटग्गलग्गवत्थद्वं । चइऊण गए नाहे तयं च गहिऊण चलिओ य ॥ ५ ॥
जह तुन्नागेण तयं दुखंडसंसीवणेण मेलवियं । तह सयलं नरवइणो निवेइयं तेण सविसेसं ॥ ६ ॥
एवं च निसामिऊण तुट्ठो नंदिवद्वणनरिंदो दीणारलक्खमेगं वत्थस्स मुल्लं दाविऊण सबहुमाणं सक्कारिऊण

नृपसंसदि
विप्रोक्तं
भगवद्भूतम्.

॥ १५८ ॥

भणइ-अहो भइ ! कहं भयवं विहरइत्ति, वंभणेण भणियं-देव ! सुणेह, सो जएकनाहो कयाइ फुट्टहासजणियसं-
तासेसु भूयभवणेसु गोदुहियाए दुद्धरं नियमविसेसमालंविऊण नासग्गसंगिचक्खुविकखेवो मंदरोव थिमिओ झाणं
झियाइ, कयाइ करालवेयालमालाउलासु पयंडपडियनरमुंडमंडलीसु सुसाणभूमीसु वीरासणं संठिओ निरुद्धउ-
स्साससमीरपसरो सूरविंविनिहियनयणो मज्झंदिणंमि आयावेइ, कयाइ गुरुभारकंतनरोव ईसिअवणयकाएण पलं-
वियभुयदंडो गामवहिया काउस्सग्गेण चिट्ठइ, कयाइ निकारणकुवियपिसायविहियतिवोवसग्गं सोक्खपरंपरं पिव
सम्ममहियासेइ, कयाइ छट्ठममद्धमासाइतवविसेससुसियसरीरो पंतकुलपरिभमणलदुंछतुच्छासाराहार गहेण
पाणवित्तिं निवत्तेइ ।

कइयावि हीणरूवेहिं दुट्ठसीलेहिं कीडमेत्तेहिं । पागयनरेहिं विहियं विसइह सो तिबभुवसग्गं ॥ १ ॥

सा आवयावि मण्णे निसुणिज्जइ जा जएकदेवस्स । दइयव दुन्निवारा नेव समीवं समल्लियइ ॥ २ ॥

एवं किर तस्स महायसस्स उत्थरइ दुत्थिमा भीमा । कइयावि तियसनिवहा पूयामहिमं पकुवन्ति ॥ ३ ॥

इय नरवर ! तच्चरियं न मारिसो किंपि साहिउं तरइ । तारिसजणचरियाइं मुणंति जइ तारिसा चेव ॥ ४ ॥

एवं निसामिऊण राया सपरिसाजणो दीहरमुक्कनिस्सासो अच्छिन्ननिवडंतवाहापवाहाउलवयणकमलो सोगं
काउमारद्धो । वंभणोऽवि गओ सगिहं । समप्पियं तुन्नागस्स मोलऽद्धं, सेसदवेण विविहं विलसंतो कालं वो लेइत्ति ।

श्रीगुणचंद
महावीरच०
५ प्रस्तावः
॥ १५९ ॥

इओ य-वद्धमाणसामी उत्तरवाचालसन्निवेशे गंतुकामो कुडिलपहपरिहारेण उज्जुयमग्गाणुलग्गकणगखलाभि-
हाणासममज्जेण पट्ठिओ संतो निवारिओ गोवालेहिं, जहा-भयवं! एत्थ आसमे दिट्ठीविसो सप्पो अभिह्वेइ ता
मा एएण पहेण वच्चह, सामीवि जाणइ, जहा-सो भविओ संबुज्झिहिति निवारिज्जमाणोऽवि गोवेहिं परकज्जकरणर-
सियत्तणेण गओ कणगखलं नाम आसमपयं, जं च केरिसं?—

कप्पूरतमाललवंगतिणिससाहारपमुहतुरुन्नं । अइमुत्तयवासंतियकयलीहरनिवहरमणिज्जं ॥ १ ॥

तावसजणनिम्मियहोमहुयवहुच्छलियधूममलिणाओ । तेहोला इव रेहंति जत्थ साहीण साहाओ ॥ २ ॥

पवणपकंपियपलवकरेहिं जं वारइव जिणमितं । दिट्ठीविससप्पभयं कहइ व सउणाण सहेणं ॥ ३ ॥

एवंविहंमि तत्थ आसमपए आगंतूण ठिओ जक्खभवणमंडवियाए सामी काउस्सग्गेण चंडकोसियसप्पं पडि-
बोहणत्थंति । को पुण एस सप्पो पुव्वभवे आसित्ति?, निसामेह—

अत्थि अणेगधणधण्णकणगसमिद्धजणपरिच्छन्नो अदिट्ठपरचक्कोवद्दवो समुदोव बहुवाणिओववेओ महासरोव वि-
चित्तचित्तपत्तपउमाहिट्ठिओ रासिसमुदओव मेसविसमिहुणकन्नासमेओ गयणाभोगोव सुरसोमगुरुहुलोगाहिट्ठिओ
कोसिज्जो नाम सन्निवेशो । तत्थ असेसदेसभासाविसेसवियक्खणो नाणविन्नाणकोऊहलविहिविहण्णू छंदलक्खणजो-
इससत्थपरमत्थकुसलो छक्कम्मकरणनिरयचित्तो गोभदो णाम माहणो परिवसइ,

कनकखले
गमनं.

॥ १५९ ॥

नियबुद्धिविणयविविहोवयारओ जेण सयलगामजणो । विहिओ पहिद्वहियओ एगं लच्छि विमोत्तूणं ॥ १ ॥

अहवा न सो कोऽवि गुणो जो तस्स न विज्जए दियवरस्स । तं नत्थि किंतु जं भुंजिएहिं दिवसं स बोलेइ ॥ २ ॥

एवं च धणविरहेवि सो अविचलचित्तत्तणेण मणागंपि दीणत्तमदंसितो नियनियपरिग्गहत्तणेण चेव संतोसमुब-
हंतो चिंतेइ-अहो महाणुभावा ! इमे धणिणो जे इमीए सिरीए परिग्गहिया पीडिजंति दाइएहिं विलुप्पिज्जंति
नराहिवेहिं अभिभविज्जंति तक्करनियरेहिं मग्गिज्जंति मग्गणगणेहिं अणुहवंति विविहावयाओ, पयमेत्तंपि न परि-
ममंति सच्छंदयाए, तुच्छऽपत्थभोइणोवि अभिलसिज्जंति वाहीए, अहं पुण एत्तो एगस्सवि अणत्थस्स न गोयरमु-
वगओत्ति, एवं तस्स परिभावंतस्स वचंति वासरा । अन्नया य सो सिवभद्दाभिहाणाए निययपणइणीए भणिओ,
जहा-अज्जउत्त ! आवन्नसत्ता वहामि अहमियाणिं, पसवसमए विसेसेण मह ओसहाइणा कज्जं भविस्सइ, तो कीस
तुमं न किंपि पुरिसयारमवलंबेसि ? न वा दवोवज्जणोवायं विगप्पेसि ?, न हि अणागयत्थचिंतापरंमुहा सलहि-
ज्जंति पुरिसत्ति, सो एवमायन्निऊण तक्खणविमुमरियपुबविवेओ जलहिब मेहोदएणं कुवियप्पकल्लोलमालाउलो परि-
भाविउमारद्धो-किं एत्तो ववसायं करेमि ? कं वा जणं अणुसरामि ? को वा इमस्स कज्जस्स होज्ज साहेज्जदायगो ?
कत्थ व गयस्स एयं सिज्जेज्ज ? को इमस्स हेउत्ति, इय किंकायवयवाउलत्तजलहिंमि सो बुडो, ताहे सिवभद्दाए
भणिओ सो-कीस वाउलो होसि ?, केत्तियमेत्तं एयं तुह विमलकलाकलावस्स ?, जइ कमविहु धणवंतं गंतुं मग्गेसि

श्रीगुणचंद
महावीरच०
५ प्रस्तावः
॥ १६० ॥

सोऽवि ध्रुवमेयं कज्जं पसाहइस्सइ, दुलहो तुम्हारिसो अतिही, गोभदेण भणियं-पिए! साहेसु परपत्थणं मोत्तूण
अन्नमुवायं, पत्थणा हि नाम नरस्स जणेइ मरणसमयनिच्चिमेसत्तणं, तहाहि-जायणापयट्टस्स सन्निवायाभिभूयच्च
पक्खलइ वाणी विगलंति विच्छायछायाओ अच्छीओ विगयसोहं हवइ वयणकमलं कंपंति अंगाइं पयट्टंति दीह-
दीहा उस्सासा संखुब्भइ हिययंति । अविय—

तावच्चिय कुमुयभयंकनिम्मला विप्फुरंति गुणनिवहा । जाव परपत्थणाकलुसपंकलेवं न पावेंति ॥ १ ॥

तावच्चिय पूइज्जइ गुरुत्तवुद्धीए परमभत्तीए । जावऽत्थित्तं सत्तुत्तणं व पयडेइ न पुरिसो ॥ २ ॥

तावच्चिय सुहिसयणत्तणाइं दंसंति निच्छियं लोया । देहिति दुट्ठमक्खरजुयलं जा नेव जंपेइ ॥ ३ ॥

देहिति जंपिरेणं माणविमुक्केण विणयहीणेणं । धम्मत्थवज्जिएण य जाएणवि को गुणो तेण ? ॥ ४ ॥

ता अन्नमुवायंतरमहुणा मम दुक्करंपि किंपि पिए ! । साहेसु पत्थणंपिहु मरमाणोवि हु न काहामि ॥ ५ ॥

इय सा तन्निच्छियमुवलब्भ खणमेगं चित्तिऊण भणिउमारद्धा-अज्जउत्त ! जइ एवं ता अत्थि अन्नो उवाओ,
परं बहुसरीरायासंसज्जो अचिरकालसाहणिज्जो य, जइ भणह ता निवेएमि, गोभदेण भणियं-पिए! को दोसो?, निवे-
एहि, तीए भणियं-सुणेसु, अत्थि पुव्वदेसे असंखदेवउलमालालंकिया वाणारसी नाम नयरी, तीसे समीवे फुरंतफा-
रभंगुरतरंगाविद्धविमुद्धसलिला हंसचक्रवायमिहुणोवसोहिया अणवरयवहंतमहासलिलप्पवाहपूरियरयणागरा गंगा नाम

अर्थार्जनाय
गोभद्रस्य
प्रवासः।

॥ १६० ॥

महानई, तीसे तडंमि बहवे दूरदेसंतरागथराईसरसेट्टिसेणावइदंडनाहप्पमुहा जणा केइ परलोगत्थिणो केइ कित्तिजसत्थिणो केइ अणत्थपडिघायत्थिणो केइ पियरत्तप्पणत्थिणो अणवरयं काराविति महाहोमं पाडित्ति पिंडं दिति सुवन्नदाणं सक्कारित्ति उद्धूलियचलणे माहणेत्ति, अओ अज्जउत्त ! जइ तुमंपि तत्थ वच्चसि ता उवत्थाण-मेत्तेण पत्थणाविरहेऽवि पावेसि कणगदक्खिणं, थेवमेत्तकालेण य पडिनियत्तिहिसि, इमं निसामिऊण भणियं गोभदे-ण-पिए ! मुद्धाऽसि तुमं, सवणरमणीया खलु दूरदेसवत्ता, सिवभहाए भणियं-अज्जउत्त ! तहावि भवणनिविट्ठस्स का तुज्झ कज्जनिप्फत्ती ?, गोभदेण भणियं-किमजुत्तं ?, एवंपि होउ, कुणसु संबलं जेण वच्चामि, तओ तीए कयं से नि-मित्तं पाहेज्जं, अन्नदिवसे संबलगहत्थो पयट्ठो सो वाणारसीसंमुहो, कमेण वच्चंतेण दिट्ठो निट्ठुरसरीरसंठाणो नियंसि-यवत्थजुयलो निराभरणोवि अहिगं सरीरप्पभाए उवसोहंतो वज्झागारेणवि लक्खिज्जमाणातिसओ पवरपाउगाधिरूढो रतिविरहिओ वम्महोव पच्चक्खो सलीलं असंभंतो पहे वच्चंतो एगो सिद्धपुरिसो, तं च संभमभरियाहिं अच्छीहिं जाव पेच्छइ ताव संभासिओ अणेण-भो गोभद ! समागओऽसि ?, किं संपयं तुमं वाणारसिं गंतुमिच्छसित्ति वुत्ते सवि-म्हयं गोभदो चित्तिउमारद्धो-अहो कहं अदिट्ठं असुयं मं पच्चभिजाणइ ?, कह वा मम गिहिणीए य एगंतजायं इमं गमणवइयरं उवलक्खेइ ?, सवहा न एस सामन्नो इवइत्ति, तहा जो एत्तियं मुणइ सो अन्नंपि मुणिस्सइ, ता देवयं व उवचरेमि एयं, जइ पुण एत्तोच्चिय निप्फत्ती होज्जत्ति विभावितो जोडिय करसंपुडं तं भणिउमाढत्तो-अज्ज !

श्रीगुणचंद
महावीरच०
५ प्रस्तावः

॥ १६१ ॥

एवमेयं, सम्मं तुम्हेहिं वियाणियं, तेण भणियं-भइ! एहि समं चिय, जेण तहिं वचामो, पडिवन्नं गोभदेण, गंतुं पयट्ठा, खणंतरे जाए भोयणसमए गोभदेण भणियं-अज्ज! पविसह गांभमज्जे, कोरमि भोयणोवक्कमं, अइकालो वट्ठइत्ति, विज्जासिद्धेण भणियं-सोम! किमत्थ पविट्ठेहिं कायव्वं?, एहि अज्जवि जाममेत्तो वासरो कोमला सूरकि-रणा थेवमग्गं अइक्कंता य, गोभदेण भणियं-जं तुम्हे वियाणह, तओ पुणो पयट्ठा गंतुं, मज्झंदिणसमए य संपत्ता बहलतरुसंडसंछण्णं उज्जाणं, दिट्ठा य तत्थ अच्छसलिलपडिहत्था कमलकेरवकल्हारपरागपिंजरहंसोवसोहियतीर-देसा एगा महासरसी, पविट्ठा तत्थ, कयं मज्जणं, विहिया मुहसुद्धी, पयट्ठो य गोभदो देवयाणुसरणं काउं, इय-रोऽवि ठिओ समाहीए ।

एत्थंतरंमि बहुभक्खभोयणा रसवई गुणसमिद्धा । बहुवंजणपडिपुण्णा मंतपभावेण अवयरिया ॥ १ ॥

कच्चोलयालदवीसिप्पिसणाहो उवक्खरो सव्वो । सुविणीयपरियणेणप्पिओच्च पुरओ ठिओ तस्स ॥ २ ॥

एरिसं च परमम्भुयभूयं वइयरमवल्लोइऊण विम्भिओ गोभदो, भणिओ य विज्जासिद्धेण-गोभइ! पगुणो भव, कुणसु भोयणंति, जमज्जो आणवेइत्ति पडिवज्जिऊण तच्चयणं उवविट्ठो सो भोयणकरणत्थं, विज्जासिद्धोऽवि परिवे-सिउमारद्धो, कमेण य निव्वत्तियंभोयणंमि गोभदे सयमुवविट्ठो विज्जासिद्धो, गोभदेणचि कओ से परिवेसणाइवा-वारो । एवं च निव्वत्तियंमि भोयणे विज्जासिद्धविमुक्केक्कहुंकाराणंतरमेव अहंसणमुवगया थालाइसमेया रसवई, खण-

विद्यासिद्ध
संसर्गः
भोजनं
शय्यादि च

॥ १६१ ॥

मेत्तं च वीसमिऊण माहवीलयाहरे निरुव्विग्गहियया विविहकहाओ कहेमाणा संपट्टिया गंतुं, गच्छंताण य जाए रयणिसमए गोभहेण भणियं—अज्ज ! कलयंठकंठसच्छहा समुच्छलइ तिमिररिछोली न लक्खिज्जंति संपयं निष्णुण्णया महिमग्गा निहावसविसंठुलाइं घुम्मंति लोयणाइं पयत्तसंचालियावि न चलंति चलणा, ता गच्छह गामे, कुणह वीसामंति, विज्जासिद्धेण भणियं—सोम ! सिग्घगईए एहि मुहुत्तमेत्तं, किं गामपवे-सणकज्जं, गोभहेण भणियं—एवं हवउत्ति । ताहे जाममेत्तं अट्ठाणमइलंघिऊण ठिया एगत्थ पएसे । तयणंतरं च विज्जासिद्धो आवद्धपउमासणो निरुद्धसमीरप्पयारो ज्ञाणं काउमारद्धो, अह—

कणगकलसकलियं रणंतमणिकिंकिणीनिवहरम्मं । सुसिलिट्टलट्टथिरथोरथंभसोहंतवरसालं ॥ १ ॥

सुविभत्तचित्तेरेहंतवेइगावलयलीढपेरंतं । बज्झपएसनिवेशियमहल्लपलंकसोहिलं ॥ २ ॥

गयणाओ अहापवरं विमाणमेगं समोयरेऊणं । विज्जासिद्धस्स पुरो लहुं निविट्ठं धरणिवट्ठे ॥ ३ ॥

अह तत्तो नीहरिऊण दिप्पंतमणिमउडलंकियसिरा विमलकुंडलकंतिविच्छुरियगंडयला पवरमुत्तासरिविराइय-सिरोहरा हारलयाच्छाइयथणकलसा पंचरायमणिकंकणमंडियकोमलबाहुलया रोमावलीसणाहमुट्ठिगेज्झमज्झभाग-देसा रसणादामसंगयनियंवफलया नियंसियपंचवन्नदिबद्धसा झंकारमणहरमणिनेउराणुगयचलणा हरियंदणरसवि-च्छुरियसरीरा अप्पडिमरूवा एगाए समाणरूवजोवणाइगुणालंकियाए विलयाए अणुगम्ममाणा समागया विला-

श्रीगुणचंद
महावीरच०
५ प्रस्तावः
॥ १६२ ॥

सिणी, जोडियकरसंपुडा य विज्ञासिद्धं भणिउमारद्धा, जहा-भो महायस ! उवसंहरेसु संपयं मंतसुमरणं अलंकरेसु विमाणमेयंति निसामिऊण उट्ठिओ विज्ञासिद्धो, पविट्ठो विमाणम्भंतरे निसन्नो सेज्जाए, उवणीयाणि य तस्स तंबोलवीडगाणि, ताहे वाहरिओ विज्ञासिद्धेण गोभदो, तंबोलदाणपुवगं च विसज्जिओ निहाकरणाय, दूरे ठाऊण य तदीयमाहप्पविम्हियमणो पसुत्तो एसो, विज्ञासिद्धोवि तार्हि रमणीहिं समं विविहसंकहाहिं गमिऊण खणमेकं जेट्ठाए अणुचरिं जुवइं भणइ-भदे ! तुमं इमस्स गोभदस्स माहणस्स भज्जाभावदंसणेण अत्ताणं पवित्तं करेसु, तीए वुत्तं-एवं करेमि, अह जायंमि विजणे विज्ञासिद्धो पारद्धो इयरीए समं भोगे उवभुंजिउं, सावि तदुवरोहेण गया गोभदसमीवे, पवोहिऊण सिद्धो विज्ञासिद्धाएसो, तेण य कुसलमइत्तणेण नाऊण कज्जपरमत्थं भणिया सा, जहा-मयच्छि ! भगिणी तुमं मे होसि, ता अलं एत्थ पत्थुयत्थवित्थरेणं, जहाभिप्पेयं समायरसु, अकज्जपविच्चीएवि जओ न एयस्स हयजीवियस्स कोऽवि समुप्पज्जइ गुणो, अचिय—

अइघोरमारुयाहयनलिणीदललगसलिललवचवलं । जीयं सुपालियंपिहु न चिरावत्थाणमणुहवइ ॥ १ ॥
चिविहोवभोगविसयाणुकूलयालालियंपि बहुकालं । परिसडियविट्ठफलमिव विगलइ गत्तंपि अचिरेण ॥ २ ॥
सुवन्ति य नरएसुं धम्मविरुद्धत्थकरणसत्ताणं । सत्ताणं तिक्खदुक्खाइं तेण कुणिमो कहमकज्जं ? ३ ॥
सकलत्तसंगईविहु उउकालाओ परेण पडिसिद्धा । किं पुण पररमणीज्जणविसयपसंगो समयसत्थे ॥ ४ ॥

युवतियु-
ग्मागमः
गोभद्रस्य
शीलं.

॥ १६२ ॥

नियजीवस्सवि उम्मग्गमिणो जइ करेमि न निरोहं । ता कह अन्ने अणयारचारिणो नणु निरुंभिस्सं ? ॥ ५ ॥

इय गोभदेण तहा कहंपि संभासिया सवेरग्गं । नियभायनिच्चिसेसो जइ जाओ तीए पडिबंधो ॥ ६ ॥

खणमेत्तं च विगमिऊण भणियं तीए—अहो महाणुभाव ! सुंदरो तुहाभिप्पाओ, एयं चिय सप्पुरिसलक्खणं, एयं चिय धम्मसच्चस्सं, एत्तो सयलकल्लाणोवलंभो, इमाओ असेसदुस्सज्झविज्जासिद्धीओ हवन्ति, एयं खु सुरासुरा-
णवि दुरणुचरं, एयाणुगओ य नरो न रोगसोगदुक्खेहिं बाहिज्जइ, ता पत्तं तुमए जम्मजीवियफलं जस्सेरिसो
दुक्करपरित्थीसेवापरिहरणपरिणामो, एयं च कुणमाणेण तए अहंपि निओइया सव्वकामुयसिद्धिलाभेणन्ति, गोभदेण
भणियं—कहं चिय मए निओइया सव्वकामुयसिद्धीए?, तीए भणियं—महायस ! भायनिच्चिसेसोत्तिकाऊण साहि-
ज्जइ तुज्झ एस वइयरो, निसामेहि, गोभदेण भणियं—एसो निसामेभि, तीए कहियं—

अत्थि सयलतइलोयविकखायं अणेगअच्चभुयभूयाइसयजणियजणविम्वयं आगरो विज्जारयणाणं कुलभवणं तं-
तप्पओगाणं ठाणं खुइसिद्धीणं जालंधरं नाम पुरवरं, जत्थ—

आगट्ठिवसीकरणप्पओगअहिस्सकरणकुसलाओ । नहगमणदूरदंसणपमोक्खलद्धीसमिद्धाओ ॥ १ ॥

हुंकारमेत्तपडिभिन्नसत्तुसंदोहत्तुट्ठहिययाओ । निरुवमरूवनिरक्खियवंमहमहिलाभिमाणाओ ॥ २ ॥

अट्ठप्पयारअणिमाइसिद्धिसंबंधसस्तिरीयाओ । निक्खसन्ति जोगिणीओ देवाणवि वंदणिज्जाओ ॥ ३ ॥

श्रीगुणचंद
महावीरच०
५ प्रस्तावः
॥ १६३ ॥

इयरजणा दुच्चिणयं जं नो दंसंति तं किमच्छरियं ? । तासिं महाबलाणं संकइ कुविओ कयंतोऽवि ॥ ४ ॥
 सुरखयरजक्खरक्खसमडप्परप्फंसणावि नूण जरा । निच्चावट्टियजोव्वणगुणाण जासिं न संकमइ ॥ ५ ॥
 चिरदूरकालवोलीणभूवईणं समग्गचरियाई । अज्जवि जाओ पयडंति सेललिहियप्पसत्थिव ॥ ६ ॥
 इय तारिसपयडपभावजोगिणीचक्कवालकलियस्स । नयरस्स तस्स भण केण वन्नणा तीरण काउं ? ॥ ७ ॥
 तत्थ य अहं चंदलेहाभिहाणा जोगिणी परिवसामि, एसावि विज्जासिद्धसमीववत्तिणी मम जेढ्हा भइणी पसा-
 हियपवरविज्जा अबंतदरिसणिज्जा जोगिणीपीढस्स चउत्थट्ठाणपूयणिज्जा चंदकंतानामा, गोभदेण भणियं-भइणि !
 को एस विज्जासिद्धो ?, किं नामो ?, कहां वा एरिसमाहप्पो ?, किं वा एस तुह जेढ्हाभइणीए एयं उवचरइत्ति, कहेसु
 बाढं कोऊहलाऊलं मे हिययं, चंदलेहाए भणियं-कहेमि, एसो हि कामरूपाभिहाणजोगिणीपरिवेढियस्स डमरसी-
 हस्स पुत्तो ईसाणचंदो नाम, एण य पुरा अणेगप्पयाराओ साहिऊण विज्जाओ अखलियपसरं सयलकामियसिद्धिं
 समीहमाणेण कच्चाइणीए भगवईए पुरओ कओ अट्ठोत्तरविल्ललक्खेण होमो, तित्थियमित्तेणवि जाव न परितुट्ठा
 भगवई ताव आकट्ठिऊण खग्गधेणुं समारद्धो नियकंधरं छिंदिउं,
 नियजीवियनिरवेक्खो, कंठद्धं जा न छिंदए एसो । ताव सहसत्ति कत्तोवि आगया देवि रुद्धाणी ॥ १ ॥
 अहह महाकट्ठमिमं कीस तुमं पुत्त ! ववसिओ भीमं ? । इय जंपिरीए तीए कराओ छुरिया लहुं हरिया ॥ २ ॥

चंद्रलेखा-
वृत्तम्.

॥ १६३ ॥

ताहे इमेण भणियं देवि ! पसीयसु ममेत्ति एणावि । पडिवज्जसु सिरकमलेण पूयणं होउ सीसेण ॥ ३ ॥
 देवीए तओ भणियं पुत्तय ! तुह साहसेण तुट्ठमिह । वरसु वरं एत्ताहे पज्जत्तं देहपीडाए ॥ ४ ॥
 तओ एएण भणियं—सामिणि ! जइ सच्चं चिय तुट्ठासि ता जं तुमए पुत्तत्ति अहं वागरिओ एसो चिय मम वरो,
 एत्तो य पुत्तबुद्धीए मम पेच्छेज्जासित्ति भणियावसाणे दाऊण सबसमीहियत्थकरं रक्खावलयं पडिवज्जिऊण तवयणं
 अहंसणमुचगया कच्चायणी, एसोऽवि पावियतिलोयरज्जं पिव अत्ताणं मन्नमाणो रक्खावलयमुव्वहंतो सगच्चं अक्खलि-
 यगमणो सच्चत्थ वियंभिउमाढत्तो । अविय—

न गणइ नरवइवग्गं नय भीमभएवि उव्वहइ कंपं । सच्छंदलीलगमणो जमंपि उव्वहसइ सबलेणं ॥ १ ॥
 अंतेउरेसु निवसइ उवमुंजइ कुलगंयावि विलयाओ । आगरिसइ दूरगयंपि वत्थु वरमन्तसत्तीए ॥ २ ॥
 जप्पभिइं चिय कच्चाइणीए एयस्स वाहुमूलंमि । बद्धं रक्खावलयं तत्तो चिय चित्तियं लहइ ॥ ३ ॥
 अह अन्नया कयाई हिंडंतो एस महियलं सयलं । संपत्तो जालंधरपुरंमि रामाभिरामंमि ॥ ४ ॥
 दिट्ठा य जोगिणीजणमज्झगया विहियपवरसिंगारा । अह तत्थ चंदकंता एसा मम जेट्ठिया भयणी ॥ ५ ॥
 ताहे हठेण वररुवजोव्वणाइसयरंजिओ एसो । कुणइ पसंगमिमीए सद्धिं सद्धम्मनिरवेक्खो ॥ ६ ॥
 ठाऊण कइवय दिणे सच्छंदं विविहदिक्कीलार्हि । अणवट्ठियमणपसरो अमुणिजंतो विणिक्खंतो ॥ ७ ॥

श्रीगुणचंद
महावीरच०
५ प्रस्तावः
॥ १६४ ॥

तयणंतरं च कथयि एत्तियकालं परिभमिय इमिणा । दिवविमाणारूढा अहयं एसावि मह भइणी ॥ ८ ॥
आगिट्टिसत्तिणा आणीयाओ संपइ पयंडदंडेण । सिरिपव्वयगमणट्ठा गेहाओ नीहरंतीओ ॥ ९ ॥
एत्तोऽणंतरमेवं जमेस वागरइ तं करेमोत्ति । वुज्झइ खंधेण हडी सच्चं चोरस्स बलियस्स ॥ १० ॥
एयमायन्निकुण गोभइेण चित्तियं-अहो रक्खसाणंपि भेक्खसा अत्थि, जमेवंविहजोगिणीजणोवि एवं आणानि-
हेसंमि वट्ठाविज्जइ, अओ चिय भणिज्जइ-बहुरयणा वसुंधरा भगवई, एत्तोच्चिय वरगुणगणनिहिणोऽवि न गव्वमुच्च-
हंति सप्पुरिसा, चंदलेहाए भणियं-अहो महायस ! एयं किर साहियवं, जइ एस विज्जासिद्धो एत्थ पत्थावे मम
भइणीचंदकंताए न बंभचेरभंगं करंतो ता इमीए सयंपभा नाम महाविज्जा साहिया हुंता, मम पुण तुमए सील-
खंडणं अकुणमाणेण तस्साहणविही अज्जवि पडिपुत्तो चेव वट्ठइ, सत्तरत्तमेत्तेण य चित्तियत्थसंपत्ती भविस्सइ, ता
भो महाणुभाव ! जं पुरा पुच्छियं तुमए जहा कहां मए जोइया सव्वकामुयलाभसिद्धीयत्ति तत्थ एस परमत्थो, गोभ-
इेण भणियं-सुयणु ! किमत्थ भणियवं ?

पीडंतु गहा विहडंतु संपया पडउ दुक्खदंदोली । सयणावि होंतु विमुहा तहवि न मुंचामि सच्चरियं ॥ १ ॥
नियजीवस्स खलस्सव जहिच्छचारेण दिन्नपसरस्स । दुक्खेण मामि ! सम्मग्गठावणं जइजणो कुणइ ॥ २ ॥
चंदलेहाए भणियं-एवमेयं, किं वन्निज्जइ तुमह निम्मलगुणाणं जस्स एरिसं जिइंदियत्तणं ? एयंविहो अज्जककरण-

विद्यासिद्ध-
वृत्तं.

॥ १६४ ॥

नियमो एरिसं पावभीरुत्तणं एवंरूवा य वयणपइद्वा, सब्हा धन्नाऽहं कयलक्खणाऽहं जं मए तुमं सप्पुरिससिरसेहरभूओ
 दिट्ठोसित्ति, गोभदेण भणियं—केत्तियमित्तोऽहं, अज्जवि महीयले दीसंति ते महापुरिसा जेसिं चरणेरणुमेत्तस्सवि न सारि-
 स्समुवहंति अम्हारिसा । तओ चंदलेहा सप्पणयं सीसे अंजलिं काऊण भणिउमारद्धा—अज्ज ! तुह असरिससच्चरियभत्ति-
 परवसत्तणेण किंपि विन्नविउमिच्छइ मम मणो, गोभदेण भणियं—भदे ! कीस एवं संखोहमुवहसि ?, निविसंकं भणसु
 जहाभिप्पेयं, चंदलेहाए भणियं—जइ एवं ता कयाइ परिभमणपरिवाडीए कायवो अम्ह गेहागमणेण अणुग्गहो, गोभ-
 देण भणियं—किमणुचियं ?, नहि तुह गेहमागच्छंतस्स मम किंचि लहुयत्तणं, पत्थावंमि जहोचियं आयरिस्सामि, न
 अन्नहा तुमए संभावणिज्जं, चंदलेहाए भणियं—महाभाग ! बाढं अणुग्गहियम्हि, न एवमन्नहा कायवति, एवं च जाय-
 तक्खणपेमाणुवंधवंधुराहिं विविहसंकहाहिं सन्भावसारहिं विमुमरियसेसवाचाराणं ससहरजोण्हावसोवलक्खियपरो-
 प्पररूवाणं तेसिं झडत्ति जाया पच्छिमरयणी, उम्मीलिओ पुरंदरदिसिमुहे जवाकुसुमगुंजद्धकुसुंभरसकिंसुयसुयमुहप-
 उमरायसरिसवन्नो कुंकुमबहलरागोवसित्तोव सूरसारही, पविरलीभूयं गयणंगणे तारगावलयं, वियंभिओ पच्चूससिसिर-
 मारुओ पलहत्थिओ पच्छिमजलहिम्मि रस्सिरज्जुजडिओ ससिपुण्णकलसो सलिलाकट्ठणत्थं व पच्छिमदिसिरमणीए,
 एत्थंतरे विज्जासिद्धेणं भणियं—भो भो गोभद ! बडुप्पभाया रयणी पगुणो भवसु जेण गम्मइ, गोभदेण भणियं—एस
 पगुणीहूओऽम्हि, चंदलेहाऽवि तं आपुच्छिऊण गया चंदकंताए समीवं, विज्जासिद्धोऽवि ताओ सविमाणाओ वी-

श्रीगुणचंद
महावीरच०
५ प्रस्तावः

॥ १६५ ॥

सज्जिऊण गंतुं संपयट्ठो, गोभदोऽवि पुणो पुणोऽणुचिंततो निसावुत्तंतं लग्गो से अणुमग्गओ, तओ आपुच्छिओ विज्जासिद्धेण-भद! निसिंमि मए तुह समीवे पेसिया एगा तरुणी, तीए कया कावि पडिवत्ती?, गोभद्रेण भणियं-अज्ज! बाढं कया, किं चिरं जीविउकामो कोइ तुह सासणमइकमइ?, केवलं अहं वाणारसीतित्थदंसणत्थं अबं-भकयनियमो आसि, एवमायण्णिऊण भणियं विज्जासिद्धेण-भद! ममावि चरणेहिं तत्थ गंतवन्ति अत्थि एस नियमो, न बंभचरपडिवत्तिरूयो, एवं ठिए विसेसेण मए तुह निमित्तं एस उवक्कमो कओ, जइ पुण तुहाभिप्पायं मुणितो ता अहंपि बंभचेरं करितो, एवं च कए तित्थदंसणं सफलं हवइ, गोभद्रेण भणियं-अज्ज! एवमेयं, को तुम्हाहिं-तोवि अन्नो एरिसविवेयभायणंति?, अह पुव्वक्कमेण भोयणं कुणमाणा विदेसियमढेसु रयणिं अइवाहिंता पत्ता कमेण वाणारसिं, पक्खालियमुहकरचरणा य गया सुरमंदिरेसु, दिट्ठा य खंदमुगुंदरुहपमुहा देवया, कया तेसिं पूया, एवं च अण्णणसुरमंदिरावलोयणेण जाए वेयालसमए विज्जासिद्धेण भणिओ गोभदो-भद! संपयमणुसरेमो सुरसरिपरिसरं, करेमो तत्थ ण्हाणेण पूयपावं अत्ताणं, गोभद्रेण भणियं-एह जामो, गया दोवि गंगातीरे, एत्थंतरे अविभाविय-आचयावडणेण अविचित्तियवत्थुपरमत्थेणं विज्जासिद्धेण अइरभसवसेण ओत्तारिऊण तं दिच्चरक्खावलयं समप्पियं गो-भदस्स, भणिओ य सम्मं रक्खेज्जासि जाव अहं इह भागीरहीवारिमज्जे सुहुत्तमेत्तं पाणायामं करेमि, एवंति पडिवज्जिय गहिय रक्खावलयं ठिओ गोभदो, इयरोऽवि पविट्ठो वारिमज्जे, अह सुहुत्तमेत्ते गए गोभदो विज्जासिद्धमपेच्छमाणो

वाणारसी-
गमनं.

॥ १६५ ॥

संभंतनयणो इओ तओ सयलं अवलोइउं पयत्तो, जाव तहेव सवओ पलोयमाणस्स पच्छिमदिसिमवलंबियं भाणु-
 बिंबं, विष्फुरिया बालप्पवालपाडला किरणा वाउलीहयाइं रहंगमिहुणाइं, तओ गोभहेण निवेइया गंगातारगाण
 वत्ता, जहा—भो भहा ! अच्चंतरूवो वरपुरिसो एत्थ तित्थंमि पविट्ठो, सो य संपयं दुत्तरउत्तुंगतरंगपरंपरापच्छाइओ
 वा भगराइदुट्टसत्तनिकंतिओ वा विसमपंकनिमग्गो वा भवेज्जत्ति न जाणिज्जइ परमत्थो, ता लहुं तविरहतरलियं
 मम जीवियं अणुकंपमाणा पविसह नईमज्झे निरुवह तं महाभागं, मा अपत्थावे चिय अत्थमउ तारिसवरपुरिस-
 दिणयरो, मा आजम्मं पाउच्चभवउ सुरतरंगिणीए एरिस महाकलंकोत्ति भणियावसाणे करुणापरवसीकयहियया
 पहाविया सवओ तारगा, समारद्धं च अमरसरियावारिप्पवाहावगाहणं, अह सवायरेण दीहप्पसारियभुयाहिं आलो-
 डिऊण जलं तेसु तेसु ठाणेषु आमूलाओ कत्थवि तं अलभमाणा पडिनियत्ता तारगा, निवेइया तदसंपत्तिवत्ता
 गोभइस्स, सो य गाढमुग्गराभिहओव दुस्सहसोगावेगविहलंघलसरीरो विचित्तिउमारद्धो—

कह जणनयणाणंदो समुग्गओ सरयपुण्णिमाइंदो । कह दाढुग्गाढमुहेण कवल्लिओ सो विडप्पेण ? ॥ १ ॥

कह भूमंडलमंडणकप्पो कप्पहुमंकुरो जाओ । कह वा मूलाओ चिय समुक्खओ वणवराहेण ? ॥ २ ॥

कह एस भुवणतिलओ विज्जासिद्धो अकारणसिणिद्धो । मइ मित्तत्तमुवगओ कह वा अहंसणं पत्तो ? ॥ ३ ॥

मम मंदभग्गयाए मण्णे तस्सेरिसी दसा जाया । जत्थऽल्लियइ कवोडो सच्चं सा सुसइ तरुसाहा ॥ ४ ॥

श्रीगुणचंद
महावीरच०
५ प्रस्तावः

॥ १६६ ॥

किल मे मणोरहो एस आसि जं चिंतियत्थसंपत्ती । एत्तो होही सयला सा पुण विहलीकया विहिणा ॥ ५ ॥
ता किं अज्जवि एरिस कलंकपंकंकियं नियसरीरं । विसपायवं व जणदुक्खकारयं परिवहिस्सामि ? ॥ ६ ॥
एवं च संचिंतिऊण मुक्ककंठं रोइउमारद्धो—हा परमच्छेरयरयणरयणायर ! हा निक्कारणकरुणरससायर ! हा परम-
विज्जाहरीविलाससुभग ! हा असमसाहसपरितोसियकचाइणीदिणवर ! कत्थ सहसच्चिय अइगओसि ?, देहि मे
पडिवयणं मंदउण्णस्स, किं तुम्हारिसाणवि निवडंति एरिसीओ आवयाओ ? हा पावकयंत ! किमेक्कपएच्चिय पणट्ट-
पुरिसरयणं धरणिं काउमुज्जुओ सि, एवं परिदेविऊण तविरहदुयवहपसमणत्थं गंगाजले निवडिउकामो आवद्धनिवि-
डनियंसणो संजमियकेसपासो जोडियकरकमलो भागीरहिं विण्णविउमारद्धो—देवि ! सुरसरि एस परमबंधवो
तुमए चिय अवहरिओ अओ तमणुसरिउकामो अहंपि संपयं पडेमि तुह सलिले, जओ अग्गिदह्वाण अग्गिच्चिय
ओसहंति वुड्ढवाओ, इइ भणिऊण जावज्जवि न मुयइ उत्तुंगदोत्तडीओ अत्ताणं ताव गहिओ सो समीववत्तिणा
नत्थियवाइजणेण, पुच्छिओ य—अरे मुद्ध ! कीस तुमं इह निवडसित्ति ?, निवेइओ अणेण गामनिगमाओ आरब्भ
सयलवुत्तंतो जाव तहंसणं अभिकंखमाणो इह निवडामित्ति, तेहिं भणियं—मूढ ! केण तुह निवेइयमेयं जमिह निवड-
णेण पियसंपओगो वाहिविगमो पावनासो वा हवेज्जत्ति, एसा हि असेसदेसंतरावगाढकोढसुद्धियसच्चंगनरनिवहावगा-
हणदुगुंळणिज्जसलिला अणेगमडयट्टिसंधायणभक्खणपरा महारक्खसिच्च कहां मणवंचियत्थं पूरेज्जा ?, अहो महामोहो

विद्या-
सिद्धस्य
अदृश्यता.

॥ १६६ ॥

अहो गङ्गरियापवाहो, सच्चं चिय पढंति इमं वियक्खणा—

कर्णविषेण हि दरघः किं किं न करोति बालिशो लोकः १, । क्षपणकतामपि धत्ते छिवति सुरां नरकपालेन ॥ १ ॥

अह एत्थ निमग्गा पावंति समीहियत्थं ता रे किं कयमिमेहिं मच्छकच्छवाईहिं आजम्मपि सलिलावगाढे-
हिंति, किं बडुणा १, मुयसु विसायं, परिचयसु मरणाभिलासं, कुणसु नियकरणिज्जं, न एवंविहजणो कयंतवयणपवि-
ट्ठोवि विवज्जइ, अह विणिवाओऽवि होज्ज ता विवण्णजीयं सरीरगं सलिलोवरि सयमेव ठाएज्जा, अओ अलं वाउ-
लत्तणेणं, होउ परिदेविणंति । एत्थंतरे गुलुगुलियं गंधहत्यिणा वज्जियं मंगलतूरं पढियं बंदिणा रसियं सारसमि-
हुणेण, तओ तेहिं भणिओ-भो भइ ! एरिसनिमित्तेहिं अज्जवि सुइज्जइ से जीवियं, गोभदेण भणियं-तुम्ह वयणसा-
मत्थेण एवं हवउ, इय सो तेहिं मरणाओ वावत्तियचित्तो दो तिन्नि दिणाइं तत्थेव निवसिओ, अन्नदियहे य
चित्तियमणेण, जहा-न जुत्तं एत्थावत्थाणं, जओ—

वाणारसीवि वाणारसिघ किंतइ सरीरमहिगं मे । मंदाइणीवि मं दाइणिघ दूमेइ पयदियहं ॥ १ ॥

ता गच्छामि जालंधरं, पेच्छामि चंदलेहाए भणियं पणयंति विभाविरुण तमभिमुहं गंतुं पयट्ठो, गच्छंतेण य
संपत्ते मज्झणहसमए विज्जासिद्धभोयणाइललियं सुमरणमाणेण अंसुजलाविललोयणजुयलेण चित्तियमणेण—

तारिसजणदुस्सहविरहजलणजालातविज्जमाणंपि । अज्जवि न लज्जसि वज्जघडिय ! निल्लज्ज हयहियय ! ॥ १ ॥

श्रीगुणचंद
महावीरच०
५ प्रस्तावः
॥ १६७ ॥

तथा—तं चिय महप्पभावं रक्खावलं इमो य सो समओ । तेणेकेणेव विणा सुन्नं सवं दिसापडलं ॥ २ ॥
अहवा रक्खावलएवि होज्ज निप्पुन्नयस्स किं मज्झ ? । चिंतामणिलाभेऽविहु सीयइ विमुहो विही जस्स ॥ ३ ॥
आधारवसेण धुवं गुणोदया न उण जहा तहा होंति । सलिलंपि सिप्पिसंपुडपडियं मुत्ताहलं होइ ॥ ४ ॥
इय एवं भावितो तमेक्कचित्तेण सो निराणंदो । जालंधरमणुपत्तो कमेण अविलंबियगईए ॥ ५ ॥
तच्चासिजणं च पुच्छितो पविट्ठो चंदकंताए गिहे, सुन्नप्पायं च तं दट्ठूण भणिया दुवारट्ठिया गेहरक्खिया,
जहा—भइ ! किमेत्थ कोऽवि न दीसइ, तीएवि बहिरत्तणेण वयणमसुणमाणीए दंसिया नियसवणा, तेणावि बहिरित्ति
नाऊण जंपियं महया सहेण, एत्थंतरे समीवगिहट्ठिएण ईसाणचंदविज्जासिद्धेण सुणिओ सो सहो, पच्चभिन्नाओ य,
तओ भणिओ सो-गोभइ ! इओ इओ एहि, इहाहं निवसामि, गोभदोऽवि ससंभमं वयणमेयं निसामिऊण कइं विज्जा-
सिद्धो इव मं वाहरइत्ति जायसंको जाव कित्तियंपि भूभागमइक्कमइ ताव समक्खं चिय दिट्ठो अणेगनाडीनिविडज-
डियसरीरो चरणपसारणंपि काउमसमत्थो ईसाणचंदो विज्जासिद्धो, तं च दट्ठूण चित्तिमणेण—

किं किंपि कूडमेयं विभीसिया वा मइब्भमो किं वा । दिट्ठीए मोहणं वा होज्जा छलणप्पगारो वा ? ॥ १ ॥
अहवा पीढमिमं जोगिणीण सवंपि संभवइ एत्थ । नूणं सकम्मपवणप्पणामिओ जामि निहणमहं ॥ २ ॥
सुरसरियातीरे जइ तइया काऊण धम्मकिच्चाइं । परलोयं साहितोऽमि ता धुवं लट्ठयं होंतं ॥ ३ ॥

गोभद्रस्य
जालन्धरे
गमनं

॥ १६७ ॥

इय जाव मरणभयकंपमाणदेहो स चिंतइ ससोगो । तुरियं ताव पुणोऽविहु विज्जासिद्धेण वाहरिओ ॥ ४ ॥

गोभइ ! भइ किं कुणसि विब्भमं नत्थि तुज्झ भयमेत्थ । पुव्वोवणीयमहुणा रक्खावल्लयं समप्पेसु ॥ ५ ॥

इय भणिए गोभइो वीसत्थो अइगओ समीवंमि । पेच्छइ विज्जासिद्धं विविहपयारेहिं अवरुद्धं ॥ ६ ॥

अह सो तं दट्ठुणं वाहाऊल्लोयणो भणइ एवं । हा अज्ज ! तुज्झवि कहं दुत्थावत्था समोत्थरइ ? ॥ ७ ॥

विज्जासिद्धेण भणियं-गोभइ ! अलं विसाएण, लहुं बंधेहिं मम बाहुमूले रक्खावल्लयं, जमज्जो आणवेइत्ति भणि-
ऊण बद्धमणेण, एत्थंतरे तडयडत्ति विहडियाइं नियलाइं, जाओ पगुणसरीरो, पुच्छिओ गोभहेण-अज्ज ! को एस
वुत्तंतो ? , कहिं नईनिमज्जणं ? कहिं एत्थ आगमणं ? , कहं वा एस निरोहो ? , बाढं कोऊहलाउलं मम हिययं,
साहेसु परमत्थं, विज्जासिद्धेण भणियं-साहेमि, जं तइया तरलत्तणेणवि सुमरियजुत्ताजुत्तवियारो दिव्वमाहप्पमप्पि-
ऊण तुह रक्खावल्लयं पविट्ठोऽमिह गंगाजले तस्स फलमेयं, गोभहेण भणियं-कहं ? , सो भणइ-जाव किर तत्थ
मुहुत्तमेत्तं पाणायामं काऊण ठिओ ताव सहसच्चिय अच्चंतं सरीरविवलत्तणं लंभिऊण तुम्हारिसेहिं अपेच्छिज्जमाणो
उक्खित्तो अहं एयगिहसामिणीए पुव्वेराणुबंधमुव्वहंतीए चंदलेहाभिहाणाए जोगिणीए, उव्वणीओ एत्थ ट्ठाणे, दढं
निजंतिओ निगडाईहिं, गोभहेण भणियं-अज्ज ! केण पुण कारणेण इमीए सद्धिं वेराणुबंधो ? , विज्जासिद्धेण भणियं-जं
तइया विमाणमारुहिय समागयाए जेट्ठभइणीए चंदकंताभिहाणाए मए बला परिभोगो कओत्ति, गोभहेण भणियं-

श्रीगुणचंद
महावीरच०
५ प्रस्तावः
॥ १६८ ॥

कहं पुण चितियमेत्तसमत्थवत्थुलाभेऽवि संपयं तुह एरिसं अचित्तिणिज्जं विसममावडियं?, विज्जासिद्धेण भणियं-देवया-
दिन्नरक्खावल्लयविरहो एत्थ कारणं, परं भद! तुमए नित्थारिओऽहं इमाओ आवयाओ, साहु साहु तुह वियक्खणत्त-
णस्स, एरिसमवत्थंतरनिवडियस्स न तहा जाया मह देहपीडा जहा तुह अहंसणेणं, मन्ने इह भवे चिय पसन्ना भा-
गिरही देवी जीए तुमं अणुवचरियपरूढपणओ मित्तो पणामिओ, ता बाढं पसन्नं मे मणो, वरेसु जहा पियंति भणिए
गोभदेण भणियं-अज्ज! देवो वऽण्णो जाणइ कोवि अणुवचरियपरूढपणओ कस्सवि मित्तो पणामिओ, विज्जासिद्धेण
भणियं-अलं इमीए संकहाए, वरेहि जहिच्छियं वरं, गोभदेण भणियं-महापसाओ, पत्थावे वरिस्सामि, एत्थंतरे डम-
डमिरडमरुयनिनायभरियभुयणंतराला वराभरणकिरणविच्छुरियनहंगणा दिव्विमाणारूढा पविट्ठा चंदलेहा य चंद-
कंता य, तओ गोभदेण भणियं-विज्जासिद्ध! कहमिणिंह तुमं एयासु वट्टिस्ससि?, विज्जासिद्धेण भणियं-जहा सत्तुसु
वट्टिज्जइ, गोभदेण भणियं-अज्ज! माभेवं जंपसु, जओ विसवल्लि वट्ठंती वेरपरंपरा न कोमलमावहइ, विज्जासिद्धेण
भणियं-ता किं कीरइ?, विवक्खाभिभवेणेव अत्तणो अवत्थाणंति, नहि निसासंतमसमखंडिज्जण पभवइ मायंडमंडलं,
नेव य पंकत्तणमपावेऊण धूलिपडलं चिरावत्थाणं बंधेइ सलिलं, गोभदेण भणियं-अत्थि चिय एस ववहारो, परं मम
वयणोवरोहेण ताव उदासीणेण होयवं तुमए, विज्जासिद्धेण भणियं-जं तुमं जाणासि, एवं बुत्ते जणेण अमुणिज्जंतो
तत्तो सो नीहरिऊण पट्ठिओ तंमंदिराभिमुहं, इंतो य दिट्ठो चंदलेहाए, रयणियरप्पगासदिट्ठरूपाणुमाणेण य

विद्या-
सिद्धस्य
स्वास्थ्यं
मेलश्च.

॥ १६८ ॥

जायपच्चभिन्नाणाए तीए गाढमालिंगिऊण सुहासणत्थो हरिसुलसियलोयणाए पुच्छिओ-अज्ज ! कत्तो कहं वा समा-
 गओऽसिन्ति ?, तेणावि से साहिओ सामन्नेण वुत्तंतो, चंदलेहाए भणियं-सुद्धु कयं तुमए जमेत्थ पत्थावे समाग-
 ओऽसि, जओ अह पडिपुन्ना इयाणिं सब्बे मणोरहा, गोभहेण भणियं-कहं चिय ?, तीए भणियं-जं तइया तुमए
 मम वंभचेरखंडणा रक्खिया तेण सत्तरत्तपज्जंते सम्ममाराहिज्जमाणा सिद्धा भगवई सयंपभाभिहाणा विज्जा, सो य
 दुट्ठविज्जासिद्धो ईसाणचंदो सब्बकामुयरक्खावलयविहूणो जणहुकन्नाजलमज्झगओ झसोव विवसो पाविओ, गोभ-
 हेण भणियं-कहमियाणिं सो संठविओ ?, तीए भणियं-जहा दुट्ठकरिवरो, तेण भणियं-किमित्थं पुण तहा धरि-
 ज्जइ ?, तीए भणियं-कसिणचउद्दीए चंडिगाए बलिविहाणत्थं, गोभहेण भणियं-जइ एवं ता दंसेसु तं थेवदिणपरि-
 चियत्तणेण तेण समं मे किंपि वत्तवमत्थि, तीए भणियं-को दोसो ?, एहि जेण दंसेमि, तओ पट्ठियाइं गंतुं, जाव
 य केत्तियमेत्तमंतरमुवगया चंदलेहा ताव दिट्ठो विज्जासिद्धो बाहुबद्धरक्खावलओ वियलियनियलबंधणो महाकोव-
 फुरंताहरो पायडियनिडालभिउडिभासुरोत्ति, तं च दट्ठण चित्तियमेयाए-अहो कहं रक्खावलयलाभो इमस्स रक्ख-
 सस्स ?, कहं वा नियडण्ळेओ संपत्तो ?, अहो अवित्तकियं केरिसमावडिधंति ?, जायभयावि आगारसंवरणं काऊण तेण
 समेया समीवमुवगया एयस्स, तेणवि इंतिं दट्ठण ईसि पच्छाइयकोवविरागेण संभासिया, जहा भदे ! उवविस,
 तओ आसणनिसन्नाए चंदलेहाए पुणो कइयवेण उट्ठमवलोइऊण भणियमणेण-अहो कहं पुवपरिचिओ गोभहो

श्रीगुणचंद
महावीरच०
५ प्रस्तावः

॥ १६९ ॥

दीसइ?, इओ एहि भइ!, किं तुमंपि अहमिव एयाए छलणगोयरमुवगओत्ति जेण वाणारसीविमुकोवि एत्थ पेच्छि-
ज्जसि?, गोभदेण चित्तिंयं-अहो गाढो अमरिसो, ता तहा करेमि जहा अवरोप्परं पणयभावो हवइ एसिं, अणु-
चिया हिओवेहा विसिद्धपुरिसाणंति, इइ संचित्तिऊण आबद्धकरंजली सो भणिउमाढत्तो—

हे भइणि चंदलेहे! हे विज्जासिद्ध! गुणगणसमिद्ध। जइविहु कुसलत्तणओ तुम्हाण न किंपि वत्तवं ॥ १ ॥
तहविहु असरिसपेमप्पबंधसंबंधतरलियमणोऽहं। दियभावभूरिजंपिरसभावओ किंपि साहेमि ॥ २ ॥
जो तुम्ह परोप्परमेस रोसलेसो कहंपि संभूओ। सो मोत्तवो होइत्ति परमवेरिव दुहदायी ॥ ३ ॥
जेणानलुव पढमं नियठाणं दहइ एस वडुंतो। ता अवगासोऽवि कहं दायवो होइ एयस्स? ॥ ४ ॥
अह वेरिसु दोसकरणत्तणेण कोवो समुलसइ तुम्ह। कोवेच्चिय किं कोवं न कुणह दुक्खेकहेउंमि? ॥ ५ ॥
न चलइ गरुयाण मणो अवराहपए अईव गरुएवि। जह जलहरेण खुब्भुइ गिरिसरिया तह न नइनाहो ॥ ६ ॥
तथा-अवयारे अवयारो जं कीरइ एस नीयववहारो। उवयारकारगच्चिय गरुया अवयारिणि जणेऽवि ॥ ७ ॥
इहरा विसेसलंभो उत्तमनीयाण कह णु जाएजा!। न हि एगरुववत्थुंमि होइ विविहाभिहाणाइं ॥ ८ ॥
अलमेत्तो भणिणं तुम्हं जइ मम गिरंमि पडिबंधो। जइ उत्तमगुणमग्गेण विहरिउं विज्जए विच्छा ॥ ९ ॥
जइ ससहरजोणहासत्थहं च किंत्तिं सया समभिलसह। पुवाणुसयं मोत्तुं परोप्परं कुणह ता पणयं ॥ १० ॥ जुम्मं।

विद्या-
सिद्धादीनां
परस्परं
मेलकः.

॥ १६९ ॥

अण्णं च-हे विज्जासिद्ध ! पओसमुवहंतो कहं न लज्जिहिसि ? । इत्थीसु तिहुयणंमिवि अवज्झसम्भावसिद्धासु ॥ ११ ॥
 इतिहासपुराणपमोक्खसत्थविविक्खायमवि इमं तुज्झ । पम्हुट्टंकीस ? महाणुभाव ! कुसलावि मुज्झंति ? ॥ १२ ॥
 आयन्निऊण एवं विज्जासिद्धेण जायलज्जेण । भणियं आएसं मे देहि लहुं जमिह कायवं ॥ १३ ॥
 उप्पहपवन्नमारिसज्जणबोहणकारणेण निम्मविया । वेयत्थमहानिहिणो तुम्भे नूणं पयावइणा ॥ १४ ॥
 एवं सोऊण गोभदेण भणियं-साहु साहु विज्जासिद्ध ! को अन्नो एवं वियाणेइ वोत्तुं ? अहवा-को सिसिरइ नि-
 सिनाहमंडलं ? , को वा चित्तेइ सिहिसिहंडाई ? । देहसहसमुग्गओ चेव विणओ तुम्हारिसज्जणाणं ॥ १ ॥ उट्ठेसु
 संपयं कुणसु चंदलेहाए पणामं, चंदलेहे ! तुमंपि विमुक्कमच्छरं परिचत्तपुच्चाणुसयं नियसु इमं सयणनिविसेसं,
 विहेसु इमेण समं पणयभावं, इय भणियावसाणे निवडिओ चंदलेहाए चलणेसु विज्जासिद्धो, भणिउमारद्धो
 य-सुयणु ! तारुन्नमएण वा विज्जावलावलेवेण वा अविवेयसुलभदुष्णिणएण वा मए जमवरद्धं तं तुमए मरिसियव्वंति,
 चंदलेहाए भणियं-विज्जासिद्ध ! अलं खामणेणं, सबहा मंदभागिणी अहं जा येवमेत्तावराहेवि एवंविहमणत्थं
 काउं ववसिया ।

एत्थंतरंमि कइवयचेडीचक्केण परिखुडा झत्ति । विम्हयनिम्भरहियया समागया चंदकंतावि ॥ १ ॥
 ताहे गोभदेणं विज्जासिद्धो पयंपिओ एवं । जीए कए वइरमिमं तहि(तुह)ट्टिया सा इमा सुयणु ॥ २ ॥

भीगुणचंद
महावीरच०
५ प्रस्तावः

॥ १७० ॥

ता परिमुक्कामरिसं सविसेसं कुणसु खामणमिमीए । रोसावेसो थेवोऽवि होइ अग्गिच्च दुहहेऊ ॥ ३ ॥
इय भणिए भइणीसिद्धसंधिसंधणतुट्टहिययाए । तीए विज्जासिद्धेण खामणा सायरं विहिया ॥ ४ ॥
एवं च पणट्टकोवाणुबंधाणं एगजणणीजणियाणं व जायदढपेमाणं तेसिं परोप्परं जंपिराणं महाणसिणीए आगं-
तूण विन्नत्ता चंदकंता-देवि ! कुणह पसायं, एह गेहम्मि, निष्फन्ना रसवई, मज्झंदिणमणुपत्तो य भयवं भुवणचक्खु-
दिणयरोत्ति, एवं च निसामिऊण चंदकंताए भणियं-हे चंदलेहे ! भोयणत्थमुवनिमंतेसु पाहुणगे अइकालो वट्टइत्ति,
तओ चंदलेहाए उट्टविओ विज्जासिद्धो गोभदो य, गया भोयणमंडवं, कयं समगं चिय विविहविच्छित्तिप्पहाणं
भोयणं, तदुत्तरं च दवावियाइं कप्पूरधूलिधूसरपूगीफलदलसणाहाइं तंबोलबीडयाइं, एत्थंतरे विज्जासिद्धेण सिरंमि
करकमलं कट्टु भणिओ गोभदो, जहा-पुवपडिवन्नं गिणहसु वरं, नियत्तिउकामोऽहमियाणिं, गोभदेण भणियं—
जइ सच्चं चिय तुट्टो वियरेसु तुमं वरं महाभाग ! । ता तं एयाहिं समं (पे)म्मं सययं वहेज्जासि ॥ १ ॥
एवं कयंमि तुमए विहियं चिय मज्झ चित्तियमसेसं । परचित्ततोसदाणाओ दाणमन्नंपि किं अत्थि ? ॥ २ ॥
किर सिविवलिहरिचंदप्पमोक्खविस्संभराहिवा पुवं । नियजीवियदाणेणवि अकरंसे जणाणमुवयारं ॥ ३ ॥
खणनस्सरस्स दुहनिवहभाइणो जीवियस्स फलमेयं । जं उवयारो कीरइ दुहसंतत्ताण सत्ताणं ॥ ४ ॥
विज्जासिद्धेण तओ भणियं भो कीस वाहरसि एयं ? । तुम्हारिसाणवि पुरो किमन्नहा हुंति उल्लावा ? ॥ ५ ॥

परस्परं
क्षामणं
प्रीतिश्च ।

॥ १७० ॥

निदाधुम्भिरनयणावि सज्जणा जं वयंति किर वयणं । नियजीवियवणवि तं तह अहियं समत्थंति ॥ ६ ॥

मिच्छाकारिं मिच्छा व भासिणं मं धुवं सुणेऊण । कच्चाइणीवि देवी लज्जइ किं पुण परो लोगो ? ॥ ७ ॥

ता-गोभद ! परिचयसुं एत्थ मम संतियं अविस्सासं । अन्नं मग्गेसु वरं मा कीरउ मे पणयभंगो ॥ ८ ॥

एयमायन्निऊण गोभदेण भणियं-जइ एवं ता परिहरेसु परमहिलापसंगं, एसो हि कारणं वेरपरंपराए कुलभ-
वणं अणत्थसत्थाणं वत्तणी नरयनगरस्स वंधवो दुव्विणयस्स ठाणं परिभवस्स आगरो अकित्तीए मसिकुच्चओ निय-
कुलस्स निलओ पावपडलस्स मूलंकसो गुणकलावस्स जणगो उत्तरोत्तराधम्मपरिणईए, एत्तोच्चिय भुयणपयडावि
वेरिभुयदंडकंडचंडिमखंडणेकसुंडावि असेसविज्जाइसयसालिणोऽवि पाविया लंकाहिवइपभिइणो विणासं, एत्तो चिय
अविगणियतणनिव्विसेसनियजीवियवा अमुणियजुत्ताजुत्तकायवा तिवखदुक्खलक्खंपि अभिकंखंति पाणिणोत्ति, ता
मूसगोव मज्जारस्स घयकुंभोव हुयवहस्स पयंगोव पईवस्स सारंगो इव पंचाणणस्स सुहाभिलासी दूरमवक्कमइ कुसलो
परदारस्सत्ति निसामिऊण समुप्पण्णगाढपच्छायावो वेरग्गमग्गाणुलग्गचित्तो विज्जासिद्धो भणिउमाढत्तो-गोभद !
साहु समुवइट्ठं साहु समुवइट्ठं समुद्धरिओऽहं तुमए अपारपावपारावाराओ, होउ संपयं सदारपरिभोगं मोत्तूणाऽऽमर-
णंतं निवित्ती मम सेसमहिलापसंगस्सत्ति, गोभदेण भणियं-अज्ज ! जाओ इयाणिं मम वंछियत्थलाभो, एत्तो सुम-
रिज्जासि मं सुहिसयणाइकहंतरेसुत्ति । एवं वुत्ते विज्जासिद्धो जोडियपाणिपल्लवो पणामं काऊण सबेसिं सिणेहवस-

श्रीगुणचंद
महावीरच०
५ प्रस्तावः

॥ १७१ ॥

संदंतवाहफुरंतनयणो सायरमवलोइज्जमाणो चंदकंतापमुहेहिं अइंसणमुवगभोत्ति । चक्खुपहमइकंतेऽवि तंमि खणं
विरहवेयणासुन्नत्तणमणुभविऊण भणियं गोभदेण-अहो से वयणविन्नासो अहो पावपरिहारो अहो भीरुत्तणं अहो
विणीयया अहो सुगुणज्जणसमुज्जमो अहो असरिसदक्खिणत्तणंति, चंदलेहाए भणियं-तुहाणुभाचो खलु एसो,
न हि नरिंदसामत्थमंतरेण भुयगफणाफलगमइकमिउमभिसक्कइ साल्लो, न तिव्खंकुसकरारोहणं विणा पहे पयट्ठइ
मत्तदोघट्ठोत्ति, एवं च विविहसंकहाहिं ठाऊण कइवय दिणे अन्नदियहे य भणियं गोभदेण, जहा-वहुइं दिणाइं
मम गिहनिग्गयस्स ता अणुजाणह मं गमणत्थं, न जाणिज्जइ कहंपि तुम्ह भाउज्जाया संपयमावण्णसत्ता निवसइत्ति,
एवमायण्णिऊण चंदलेहाए पुणोवि कइवय वासराणि धरिऊण अन्नसमए य पभूयरयणदाणपुच्चगं सम्भाणिऊण
विसज्जिओ गोभदो सट्ठाणं पत्तो कहाणगविसेसेणं निययगामं ।

अह जाव पिययमादंसणूसुओ निययगेहाभिमुहं वच्चइ ताव दूराओ चिय दिट्ठं भग्गदुवारदेसं रेणुपडलसंछन्नं
दीपसुत्तसाणघुरघुरियघोरघोसभीसणं अणेगकोलबिलाउलं सुसाणं व भयावहं ते गिहं, तारिसं च दट्ठूण खुभिय-
हियएण पुच्छिया सहेज्जिया, तीएवि चिरकालागयं दट्ठूण तं जायपणयाए आहुओ सगिहे, दावियं आसणं, कयं
चरणसोयणं, भणियं च-गोभद ! करेसु ताव भोयणंति, तेणावि तहाविहगेहदंसणजायसरीरदाहेण आपुट्ठा पुणोवि
एसा सघरवुत्तंतं, तीएऽवि अणिट्ठं भोयणावसाणे सीसइत्ति लोयवायं परिभाविंतीए भणियं-पियहरं गया तुह

प्रतिज्ञा.
विद्यासिद्ध

॥ १७१ ॥

घरिणी, सेसं पुणो कहिस्सामि विहेसु ताव भोयणं, तओ आउलहिययएणावि तदणुवित्तीए कयमणेणाहारग्गहणं, तयणंतरं आयंतस्स सुहासणगयस्स निवेइयमणाए—गोभइ ! तुह गयस्स कइययदिवसावसाणे विओगदुक्खेण वा तहाविहवाहिवसेण वा परिकिसियसरीराए सिवभद्दाए अयंडेच्चिय समुप्पन्ना गाढं सूलवेयणा, आउलियं सरीरं, ओसहेहिवि न जाओ विसेसो, गया य मुहुत्तमेत्तेण पंचत्तंति, एयं च सो आयन्निऊण विओगवज्जज्जरियहियओ खणंतरमुच्छिओ इव विगमिऊण मुक्कपोक्कारकरुणसहं रोइउं पवत्तो, समासासिओ पासवत्तिणा जणेण, कयाइं मय-लोइयकिच्चाइं, कालेण य जाओ अप्पसोगो । अन्नया य भणिओ लोगेहिं, जहा—गोभइ ! कीरउ कलत्तसंगहो, विसु-च्चउ सोगो, एसच्चिय गई संसारविलसियाणं, तेण भणियं—भो दूरमसरिसमेयं, तहाहि—

पढमं दधोवज्जनकएण देसंतरं गओऽहमहो । चिरकालकिलेसवसा तल्लाभे नियगिहं पत्तो ॥ १ ॥

किर मुंजिस्सामि अहं इणिंह नियपणइणीए परियरिओ । पंचविहविसयसोक्खं निरवेक्खो सेसकज्जेसु ॥ २ ॥

भवियघयावसेणं अक्काले चिय दिवं गया सावि । एवं डियंमि अन्ना परिणिज्जइ केण कज्जेण ? ॥ ३ ॥

जह सा मरणं पत्ता अहुणुवूढावि तह जइ मरेज्जा । ता होज्ज निप्फलच्चिय पुणोऽवि सव्वेऽवि आरंभा ॥ ४ ॥

नियजीवियस्सवि कहं विस्सासो बुज्झए सयन्नेण ? । आगयगयाइं जं किर कुणइ व मुहमारुयमिसेण ॥ ५ ॥

संघडणविहडणापडुपरक्कमे निक्खिवे कयंतंमि । सच्छंदं वियरंते कथं व जाएज्ज धिरबुद्धी ? ॥ ६ ॥

श्रीगुणचंद
महावीरच०
५ प्रस्तावः
॥ १७२ ॥

दइयाधणपरियणसंगमेसु जइ सरिसवोवमं सोक्खं । पाविज्ज विप्पओगे नियमा मेरूवमं दुक्खं ॥ ७ ॥
इय पज्जत्तं मह घरणिविसयतण्हाए बहुकिलेसाए । एत्तियमेत्तंमि वए विसयासा हीलणाठाणं ॥ ८ ॥
एवं तन्निच्छयं मुणिऊण तुसिणीए ठिओ जणो, सो य धम्मकज्जेसु उज्जओ जाओ, अन्नदियहे समोसरिओ
तत्थ पंचसयमुणिपरिवुडो छत्तीसगुणरयणरयणायरो नीसेसपाणिगणरक्खणपरो सुगहियनामो धम्मघोससूरी, गया
तस्स वंदणत्थं बहवे जणा, गोभदोऽवि भवविरत्तमणो जाणिऊण तदागमणं पत्तो सूरिसमीवे, पहिट्ठचित्तो य पण-
मिऊण से पायपंकयं गुरुणा दिन्नासीसो उवविट्ठो भूमिवट्ठे, सूरिणावि पारद्धा धम्मदेसणा, जहा—

जीववहालियवज्जणमदत्तधणगहणमेहुणनिवित्ती । जो य परिग्गहचाओ एयं धम्मस्स सबस्सं ॥ १ ॥
जीववहे आसत्ता सत्ता अट्ठप्पयारमवि कम्मं । बंधंति जंति नरए पावंति य तिकखदुक्खाइं ॥ २ ॥
तत्तो उवट्ठित्ता तिरिक्खजोणीसु लक्खमेयासु । उववज्जंति वराया नियदुच्चरिण बहुकालं ॥ ३ ॥
जे उ नियजीवियसमं सम्मं रक्खंति सबपाणिगणं । ते सयललोयलोयणससहरतुल्ला हवंति जणा ॥ ४ ॥
दीहाऊउववेया वररूवा दिवदेवसोक्खाइं । अणुभुंजिऊण नूणं कमेण मोक्खंमि वचंति ॥ ५ ॥
भूयत्थनिण्हयकरं पाणिविणासेक्ककारणं घोरं । जं वयणं तं सबंपि वज्जणिज्जं सुबुद्धीहिं ॥ ६ ॥
इह लोए चिय जीहानिकंतणं निंदणं च लोयाओ । पावंति वित्तहभासणपरायणा परभवे व दुहं ॥ ७ ॥

गोभद्रस्य
प्रियामरणं
वैराग्यं.

॥ १७२ ॥

एत्तो विरत्तचित्ता कुडिलत्तणवज्जिया मियाभासी । जे ते अवजसपंकेण नेव छिप्पंति कइयावि ॥ ८ ॥
 पडिबुद्धकमलपरिमलसममुहनिस्साससुरहियदियंता । पुइज्जंति जणेण य आएज्जगिरा य जायंति ॥ ९ ॥
 जो परधणं विलुं पइ सो झंपइ सुगइगिहकवाडाइं । निविडाइं कम्मनिगडाइं कुणइ तुच्छेहियसुहत्थं ॥ १० ॥
 एत्तो चिय दोगच्चं पइजम्मं उवचिणेइ मूढप्पा । सुयदइयाधिरहुब्भवदुहं च पावेइ दुविसहं ॥ ११ ॥
 जे पुण संतोसपरा तणंपि गिण्हंति नेव य अदिन्नं । ते देवाणवि पुज्जा हवंति किं पुण मणुस्साणं ? ॥ १२ ॥
 वहुंति धणविलासा निवडंति न आवयाउ कइयावि । पुज्जंति य निव्विग्घं मणोरहा तेसि नीसेसा ॥ १३ ॥
 जे अणिगिहियप्पाणो इहभवसुहलेसमेत्तपडिवद्धा । दासव कामलुद्धा मुद्धा जुवईण वट्टंति ॥ १४ ॥
 नरवइसेवणसंगामकरणपमुहाइं विविहवसणाइं । मेहुणसन्नाभिरया असइं पि लहंति ते पुरिसा ॥ १५ ॥
 कामविवरंमुहा पुण नरसुरजणपूयणिज्जकमकमला । देहुब्भवमविणस्सरपरमाणंदं सह चरंति ॥ १६ ॥
 पडिपुण्णबंभपालणपवित्तगत्ताण पुरिससीहाण । सुमरणमेत्तेणं चिय विज्जा मंता य सिज्जंति ॥ १७ ॥
 जे न परिग्गहविरइं कुणंति पावेसु संपयट्टंति । बंधंति कोसियारोच्च अप्पयं ते सकिरियाए ॥ १८ ॥
 पइदियहलाभवसवहुमाणगुरुलोभदूमियसरीरा । सवत्थ ममत्तपरिग्गहेण सुचिरं किलिस्संति ॥ १९ ॥
 अपरिग्गहा उण नरा ससरीरेऽविहु ममत्तपडिबंधं । न कुणंति वत्थपत्ताइएसु सेसेसु का गणणा ? ॥ २० ॥

श्रीगुणचंद
महावीरच०
५ प्रस्तावः
॥ १७३ ॥

एतो चिय तिद्वयरोवसग्गवग्गेऽवि ते ण ज्ञाणाओ । मंदरगिरिच्च विचलंति मोक्खसोक्खं च साहंति ॥ २१ ॥
इय भो देवाणुपिया ! अविरयविरयाण दोसगुणसहियं । कहियं तुम्हाण मए सुद्धं सद्धम्मसच्चस्सं ॥ २२ ॥
चिंतामणिच्च दुलहं संसारमहोयहिंमि भमिराणं । जीवाण नूणमेयं सकम्मगुरुभारपिहियाणं ॥ २३ ॥
एयंमि उ संपत्ते तं न जए जं न पावियं होइ । ता एयंमि पयत्तो कायवो कुसलबुद्धीहिं ॥ २४ ॥
एयं च निरइयारं न साहुदिक्खं विणा घडइ जम्हा । पडिवज्जह पवज्जं तम्हा दुहसेलवज्जसमं ॥ २५ ॥
एवं च गुरुणा उवइट्ठे सद्धम्ममग्गे पडिबुद्धा बहवे पाणिणो पलीणा मिच्छत्तवासणा जाओ केसिंचि सच्चविरइ-
परिणामो अन्नेसिं समुप्पन्ना देसविरइबुद्धित्ति, एत्थंतरे संसारासारयं परिभावेतो तक्कलतिद्ववेरग्गसमुग्गयपवज्जाप-
रिणामो गोभदो गुरुसमीवं गंतूणं विन्नविउमारज्जो-भयवं ! अमयं व परिणयं मम तुम्ह वयणं समुल्लसिओ विवेओ
तुट्ठा गेहवासणा, ता तुम्हेहिं निज्जामगेहिं पवज्जाजाणवत्तमारुहिऊण भवोदहिं लंघिउमिच्छामि, गुरुणा भणियं-
भइ ! जुत्तमेयं तुम्हारिसाणं, तओ सूरिं पणमिऊण गओ गेहे, रयणविक्रओवलद्धदवेण दिन्नं दीणाणाहाईणं महा-
दाणं, अह पसत्थे तिहिमुट्ठत्ते सूरिसमीवे गहिया पवज्जा, जाओ महातवस्सी, पालेइ निरयारं समणधम्मं अहि-
यासेइ सम्मं परीसहे पउंजइ बालगिलाणाईणं विणयं भावेइ भावणाजालं पढेइ समयसत्थं परिचितेइ तच्चावत्थं
कुणइ अपुवापुवतवचरणं, एवं च विसुज्झमाणस्स तस्स वोलंति वासरा, अन्नया य गुरुमापुच्छित्ता समारद्धां तेण

धर्मघोष-
देशना
गोभद्र-
दीक्षा च,

॥ १७३ ॥

मासकखमणाइं,परिसुसियं च से सरीरं, तहावि वालाईण कज्जेसु अणिगूहियसामत्थो सवत्थ पयट्ठइत्ति । अन्नसमए य सो खमगो गओ खुड्डगेण समं वासियभत्तस्स, तेण य पहे गच्छमाणेण जुगमेत्तनिहित्तचक्खुपसरेणवि कहवि दिव्वजो-गवसा चंपिया चलणेसु मंडुक्किया, विवन्ना य सा, पट्ठिट्ठिण य भणिओ सो खुड्डएण—जहा खमग ! तुमए एसा विरा-हिया, ता सम्मं निरूवेहि, सोऽवि एवमायत्तिऊण ईसिसमुप्पन्नोसावेसो असूयाए इयरजणचरणचंपणपणट्ठजीवाओ मंडुक्कलियाओ दंसितो भणइ—अरे दुट्ठसिक्ख ! इमावि मए मारिया ? इमावि मए मारिया ? इमावि मए मारियत्ति, खुड्डगेण नायं—होउ ताव, बियाले सयमेव गुरुपुरओ आलोइस्सइत्ति, एवं च पत्थुयकज्जं काऊण पडिनियत्ता दोवि निययासमं, कमेण य जाओ संज्ञासमओ, आरद्धं आवस्सयं, गुरुपुरओ य खमयरिसी आलोइत्ता देवसियं उवविट्ठो, नवरं मा विस्सुमरियं होहिति चिंतयंतेण खुड्डएण कहिओ मंडुक्कियावइयो खमगस्स, एत्थंतरे निट्ठुरविगिट्ठतवचरण-संतत्तत्तणेणं सरीरस्स माहणजम्मसुलभत्तणेणं तहाविहतिवकोवुब्भवस्स पणट्ठो से विवेओ, समुद्धाइओ महया वेगेणं खुड्डगताडणनिमित्तं, अंतरा य आगच्छमाणो निट्ठुरयंभसिरावडणघाइयमम्मपएसो तहाविहकलुसाभिप्पाय-विराहियसायन्नो कालं काऊण उववन्नो जोइसियदेवेसु, कोहदूसियस्स एवंविहा विडंबणा, जेण—

लुट्ठुमाइदुकरविगिट्ठतवभेयसेवणुब्भूयं । गुरुवालसिक्खगेलणपंडियविणओवणीयंपि ॥ १ ॥

दसविहजइजणकिरियापरिपालणपोसियंपि सुहपुत्रं । खणमेत्तेणवि तेणं तणं व कोहग्गिणा दहं ॥ २ ॥ जुम्मं ।

श्रीगुणचंद
महावीरच०
५ प्रस्तावः
॥ १७४ ॥

एत्तोच्चिय पसमविवज्जियाण सच्चा निरत्थिया किरिया । उक्किट्ठतवोऽविहु होइ केवलं भुक्खमारो सो ॥ ३ ॥
जह पवयाण मेरु नईण गंगा मियाण पंचमुहो । पक्खीण जहा गरुडो सेसाही सयलभुयगाण ॥ ४ ॥
जह साहूण जिणिंदो मणीण चिंतामणी तहा पसमो । सारो समत्थधम्मस्स तेण एत्थेव जइयवं ॥ ५ ॥ जुम्मं ।
अलं पसंगेणं । सो खमगजिओ जोइसदेवेसु अहाउयं पालिऊण चुओ समाणो कणगखले आसमपए पंचतावस-
सयाहिवइस्स कुलवइणो गिहिणीए उववन्नो दारगत्तणेणं, जाओ य उच्चियसमए, कयं से कोसिओत्ति नामं, सो य
सभावेणं चंडरोसो, थेवावराहेऽवि सेसतावसकुमारे कुट्टेति, ते य तेण ताडिज्जमाणा नियनियपिऊणं साहेंति, तेहि
य केण कुट्टियत्ति पुच्छिज्जमाणा निवेइंति कोसिएणं, तत्थ अन्नेऽवि तावसकुमारगा कोसियाभिहाणा अत्थि अओ
न मुणिज्जइ केणावित्ति तव्विसेसोवलंभनिमित्तं तप्पभिइं ठावियं चंडकोसिओत्ति नामं, तद्दिणाओ आरब्भ पावियं
च पसिद्धिं, एवं सो चंडकोसिओ जाओत्ति । अन्नया य कुलवइं पंचत्तमुवगओ, पच्छा सो सेसतावसेहिं कुलवइपए
निवेसिओ समाणो तत्थ वणसंडे अच्चंतं अज्झोववण्णो, अणवरयं अपुव्वापुव्वपायवसेयणपालणपरो कालं गमेइ, सेस-
तावसे य पुप्फफलाइं तद्दिं गेण्हंते पयत्तेण निवारेइ, ते य तत्थ कुसुममेत्तंपि अपावमाणा गुरुम्मि व गुरुपुत्तगंमि
पवट्टियव्वंति सुमरिऊण तव्वयणमविकूलंता दिसोदिसिं गया, जोऽवि गोवालगाई तत्थ फलाइनिमित्तमेइ तंपि
हंतूण सो निद्धाडेइ, जाया य समीवगाग्रनगरेसु पसिद्धी जहा चंडकोसिओ उववणं अवलोइउंपि न देइ । अन्नया य

मण्डकी-
विराधना
ज्योतिष्क-
ता तापसः

॥ १७४ ॥

सो निसियधारं परसुं चेत्तूण वइकरणनिमित्तं कंठिगाणयणाय गओ दूरवणसंडे, इओ य आसमपयासन्नं सेयविया-
 पुरिवत्थवेहिं रायपुत्तेहिं फलगहणनिवारणाकुविएहिं सुणिधतग्गमणवुत्तंतेहिं पुवामरिसेण आगंतूण ओक्खया तरु-
 पोयगा छिंदिया सरलतरुणतरुवरा पाडियाइं फलाइं हयमहिओ कओ से उडवओ भग्गा कलसगा फोडिया कम-
 डलू खंडिया दक्खामंडवा पणासियाइं कयलीहराइं, अन्नं पि जहासत्तीए उवहविउमारद्धत्ति, एत्थंतरे दिट्ठतहाविहा-
 समभंगवइयरेहिं गोवालगेहिं गंतूण सिट्ठं चंडकोसियस्स, जहा—तुह उववणं कुमारेहिं हणिज्जइत्ति, सो एवमायन्नि-
 ऊण कोवेण जलणोव धगधगन्तो परसुमुग्गीरिऊण धाविओ पवणवेगेण तदभिमुहं, दिट्ठो य एंतो कुमारेहिं, ते य
 मुणी अवज्झोत्ति चिंतिऊण पलाणा नियनवराभिमुहं, चंडकोसिओऽपि तयणुमग्गलग्गो वाहरइ—

रे खत्तियाहमा ! मज्झ उववणं छिंदिऊणवि परोक्खं । इण्हि नियजणणीए किं पुण उयरंमि पविसिहिह ? ॥ १ ॥

मा वेगेण पलायह वट्ठइ सवडंसुहा खणं एकं । तालफलाणिव सीसे जेण कुहाडेण पाडेमि ॥ २ ॥

एमाइ असब्भे गालिगब्भवयणे समुल्लवेंतो सो । तह कहवि कोववसवियल्लोयणो धाविओ तुरियं ॥ ३ ॥

जह खाणुखलणनिवडणअट्ठट्ठियपरसुच्छिन्नसीसस्स । अवमाणदंसणाउव तस्स लहु अइगयं जीयं ॥ ४ ॥

अह अट्ठज्झाणगओ मरिउं सो तम्मि चेव वणसंडे । मुञ्छावसेण जाओ भीमो दिट्ठीविसो सप्पो ॥ ५ ॥

ते य तावसा तम्मरणवइयर निसामिऊण समागया तंमि वणसंडे ठाउमारद्धा य, अन्नया य पुवसिणेहाणुबन्धस-

श्रीगुणचंद्र
महावीरच०
५ प्रस्तावः
॥ १७५ ॥

मुष्पन्नवणरक्खणपरिणामेण इओ तओ परिब्भमंतेण दिट्ठा ते दिट्ठीविससप्पेण, तओ सरोससूरविंबावलोयणुगि-
रियजलणजालाकलावेण निहट्ठा अभिसुइट्ठिया अणेण, अदट्ठंगा य पलाणा दिसोदिसिं, एवं च तिसंशं सो वणसंडं
तिपयाहिणीकाऊण जं सउणगमवि पासइ तंपि दहेइ, अन्नेऽवि तम्मग्गेण बोलेमाणे तडियकप्पडियपमुहे पंथिगे
विह्वेइ, अह तन्भएण अवहो जा जाओ सो मग्गो, एसा चंडकोसियसप्पस्स उप्पत्ती ।

अह तेण सप्पेण उववणंतरे परिब्भमंतेण दिट्ठो जक्खमंडवियाए पडिमं ठिओ वट्ठमाणजिणवरो, तं च दट्ठण
समुच्छलियकोवानलो अहो मम सामत्थं एस न मुणइत्ति विगप्पिऊण तरणिमंडलावलोयणवउगुणीभूयविणिस्सरंत-
विसुम्मिस्सदुस्सहसिहिसिहाभासुरच्छिविच्छोहो निह्विउकामो भयवन्तं पेच्छिउमारद्धो—

अह जयगुरुणो देहे दिट्ठी दिट्ठीविसस्स पडिफलिया । पिऊससीयले साऽणुभावओ झत्ति विज्झाया ॥ १ ॥

असमत्था निह्विउं जाया जिणनाहलोममित्तंपि । ताहे पडिहयसत्ती तंडवियपयंडफणभित्ती ॥ २ ॥

गरलकणुकरसम्मिस्सगरुयपम्मुक्कफारफुंकारो । वेगेणं डसिउमणो पहाविओ जिणवराभिमुहं ॥ ३ ॥

तओ तिव्वविसुब्भडाहिं दाढाहिं जिणं डसिऊण पच्छाहुत्तं अवक्कमेइ, मा उग्गविसविहयजीवियवो ममोवरि
एस निवडिहित्ति, भयवन्तं च तहट्ठियं चेव दट्ठण पुणो पुणो तिन्नि वारे जाव डसित्ता अमरिसेणं पलोयंतो अच्छइ,
तहावत्थाणे य जिणसोमविंबावलोयणोवसंतदुट्ठदिट्ठिविसविगारो सो करुणाए भणिओ भयवया—उवसम भो

सापसमरणं
चण्डकौ-
शिकसप-
दंशः

॥ १७५ ॥

चंडकोसिया!, उवसम महाणुभाव!, किन्न सरसि सयं चिय अणुभूयं तं वइयरं? ।

पुवभवे जं समणो कोवविराहियसमग्गसामन्नो । कुच्छियजोइसदेवत्तलच्छिमणुपाविओ मरिउं ॥ १ ॥

तत्तो इह वणसंडे तावसपुत्तो य जं तुमं जाओ । तत्तोऽविय तिच्चविसो इण्हि सप्पत्तणं पत्तो ॥ २ ॥

ता भइ! एत्तोऽवि मुंच कोवं, एसो हि विग्घभूओ परमसुहसंपयाणं पडिखलणमल्लो कल्लाणवल्लीणं महापडिवक्खो पवरविवेयस्स जलणो कुसलाणुट्ठाणवणसंडस्स जणओ दुग्गदुग्गइपडणस्सत्ति, सवहा अलमेत्तो कोवाणुबंधेणंति, इमं च सोच्चा भुयगस्स पुवाणुभूयसरणवसेण ईहावूहमग्गणगवेसणं करेमाणस्स जायं जाइसरणं, दिट्ठं च पुवाणु-
ट्ठियं तवचरणं सामण्णपरिपालणं तच्चिराहणोवलद्धजोइसियसुरजम्मं च, अह उम्मीलियविवेओ समुल्लसियधम्मपरि-
णामो जायपावदुगुंछो आयाहिणपयाहिणापुव्वगं परमभत्तीए भयवंतं भुवणगुरुं वंदिऊण अणसणं पडिवज्जइ, भय-
वंपि मुणइ जहा एस पडिबुद्धो कयाणसणो य, तहावि तअणुकंपाए तत्थेव काउस्सग्गओ परिवालेइत्ति, चंडको-
सिओऽवि मा कहवि रोसवसेण नयणग्गिणा पाणविणासो होज्जत्ति परिभाविऊण विलनिहित्तुंडो पवडियसेससरीरो
परमवेरग्गावडियमई चित्तेइ—

कह गुणरयणोयहिणा गुरुणा सह संगमो पुरा जाओ? । कह पव्वजारयणं अपत्तपुव्वं मए पत्तं? ॥ १ ॥

कह वा पीऊसंपिव असेसदोसग्गिविज्झवणदक्खं? । सम्ममहीयं सुत्तं विचित्तनयभंगदुव्विगमं? ॥ २ ॥

श्रीगुणचंद
महावीरच०
५ प्रस्तावः
॥ १७६ ॥

कह वा मासकखमणाइ दुकरं तह चिरं तवो चरियं ? । कह दुदुरं पि चरियं अकलंकं वंभचेरं पि ? ॥ ३ ॥
खणमेतत्तिवकोवप्पभावओ कह इमं समग्गं पि । विफलत्तणमणुपत्तं ? हा मुद्धो मंदभागोऽहं ॥ ४ ॥
इण्हिं तु पयइभीसणभुयंगभावं गओ हयासोऽहं । मुणिधम्मस्स अजोग्गो कमुवायं संपवज्जामि ? ॥ ५ ॥
हा पाव जीव ! तइया जह सिरलोयाइ विविहदुक्खाइं । सहियाइं तहा खुइगवयणं पि य कीस नो सहियं ? ॥ ६ ॥
किं मूढ ! नियसिरंभी एवं पज्जालिओ तए जलणो ? । सुहकामिणा हणिज्जइ अप्पा किं अप्पणो चेव ? ॥ ७ ॥
इय उत्तरोत्तरपवहुमाणवेरग्गमग्गमणुलग्गो । सप्पो झंपियदप्पो संलीणंगो मओव ठिओ ॥ ८ ॥

अह भयवंतं समीवमुवगयं पेच्छिऊण गोवालादयो तरुवरतिरोहियसरीरा तहा निचलस्सवि भुयंगमस्स उवरिं
अविस्ससेमाणा चेयणापरिक्खणनिमित्तं पाहाणखंडे खिवंति, तेहिं ताडिज्जमाणोऽवि जाव न मणागं पि विचलइ
एसो ताव समीवमागच्छन्ति, कट्टेण य घट्टेति, तहावि अप्फंदमाणे तंमि सेसलोयस्स साहेति, जहा—दिट्ठीवि-
ससप्पो देवज्जएणं उवसामिओ, न संपयं डहइत्ति, ताहे लोगो आगंतुं सार्मि वंदित्ता तं पि वंदइ महिमं च करेइ,
अन्नाओवि गोउलियविलयाओ घग्गमहियाविकिण्णत्थं तेणंतेण वच्चमाणीओ तं सप्पं तुप्पेण मक्खंति, घयगंधेण य
(अहि)सरंततिक्खतुंडपिवीलिगापडलखज्जमाणदेहुप्पणत्तिववेयणं सम्ममहियासमाणो अद्वमासियाए संलेहणाए
कालं काऊण सहस्सारे देवलोए देवो अट्टारससागरोवमो उववण्णोत्ति ।

सर्पस्य बो-
धोऽनशनं
देवत्वं च.

॥ १७६ ॥

जय भुवनेकनिसायर ! सायरसुररायनमियकमकमल ! । मलविरहिय ! हियकारय ! रयतमभरहरणदिवसयर ! ॥ १ ॥
करुणारसनिघावियभवगिम्हुत्तत्तत्ततरुनिवह ! । जिणनाह ! तुमं पुवज्जिएहिं पुण्णेहिं दिट्ठोऽसि ॥ २ ॥
तं चिय दिणं पसत्थं सोच्चिय समओ समत्थसुहहेऊ । जत्थ भुवनेकबन्धव ! तुह सुहकमलं पलोएमो ॥ ३ ॥

श्रीगुणचंद
महावीरच०
५ प्रस्तावः
॥ १७७ ॥

अइनिस्सारस्सवि जीवियस्स पत्तं मए फलं अज्ज । जं तुम्ह चरणफरिसणपवित्तिं उत्तमंगं मे ॥ ४ ॥
इय जिणनाहं थोउं बहुप्पयारं पराएँ भत्तीए । राया पुरजणसहिओ जहागयं पडिनियत्तोत्ति ॥ ५ ॥
भयवंपि सुरहिपुरनयराभिसुहं वच्चइ, तत्थ य अंतरा पएसिनरवइसमीवमागच्छमाणा पंचहिं रहेहिं निज्जगा
रायाणो भयवंतं ददूण पूयं सकारं सवायरेण कुणंति, सामीऽवि नियप्पभावप्पवोहियसत्तसंघाओ बहुविहउग्गतव-
विसेसपणस्समाणासेसनिविडकम्मंसो विसुद्धसीलसुरभिसरीरो सुरभिपुरं अइकमिऊण संपत्तो जलहिपवाहाणुकारि-
वारिपसरं सयलसरियापवरं गंगामहानइ, अविय—

पवणुच्छालियजलकणसेयवससिणिद्धतीरतरुसंडं । अन्नोन्नप्फिडणविफुट्टोलकल्लोलरवमुहठं ॥ १ ॥

पप्फुरियफारडिंडीरपिंडपंडुरियतारतीरंतं । जिणदंसणतोसवसा तक्खणविहियद्वहासं च ॥ २ ॥

वणकुंजरकुलमज्जणविदलियसिप्पिउडमोत्तियसमिद्धं । वियरंतहंससारसरहंगरवमणहरदियंतं ॥ ३ ॥

मज्जिरविलयाजणथोरयणहराघायभंगुरतरंगं । रंगंतमच्छकच्छवमयरोरगभीसणावत्तं ॥ ४ ॥

इय एरिसं सुरसरिं सरणागयवच्छलो जिणो जाव पेच्छइ कमलदलच्छो परतीरगमाभिलासेण ताव सुसिलिद्धनिदुर-
विसिट्ठतरुकट्टफलगनिम्मविया परतीरगमणत्थं नाविण्ण पगुणीकया नावा, तर्हि च समारूढो परतीरगामी
जणो, भयवंपि आरुहिऊणं ठिओ तीसे एगदेसे, एवं च निलीणंमि जणे पवाहिया नावा, ऊसिओ सियवडा

प्रदेशिकृतो
महिमा.

॥ १७७ ॥

चालियाई अवलगाई पयट्टा महावेगेण गंतुं नावा, एत्थंतरे तडट्टिएण वासियं कोसिएण, तं च निसामिऊण भणियं
 खेमिलाभिहाणनेमित्तिएणं—अहो इमो महासउणो इमं वाहरइ, जहा—तुम्हे इह मारणंतियं आवइं पाउणिस्सह,
 केवलमेयस्स महारिस्सिस्स पभावेण अक्खयसरीरा नित्थरिस्सहत्ति, एवं निसुणिऊण विम्बिया नावाजणा जाव
 अवरोप्परं विविहं संलवंति ताव पत्ता अगाहसलिलमज्झयारदेसं नावा,

एत्थावसरंमि जिणं नावारूढं पलोइउं पावो । संभरियपुच्चवेरो नागसुदाढो विचिंतेइ ॥ १ ॥
 एसो सो जेण पुरा तिविहुचक्कित्तणमुवगएणं । गिरिकंदरमल्लीणो सीहत्ते वट्टमाणोऽहं ॥ २ ॥
 सच्छंदाविविहकीलाविणोयलीलाविलासदुल्ललिओ । परिजुन्नपडोच्च दुहा विफालिओ पाणिणा घेत्तुं ॥ ३ ॥
 एयस्स किमवरद्धं तइया बिजणे वणे वसंतेणं ? । जेण तहा निहओऽहं अनिमित्तियसत्तुणा इमिष्णा ? ॥ ४ ॥
 ता मज्झ पुन्नपगरिसवसेण जायं समीहियं अज्ज । जं एस वेरिओ चक्खुगोयरं सयमिहावडिओ ॥ ५ ॥
 जीयस्स एत्तियं चिय पसंसणिज्जं जए सुपुरिसाणं । उवयारे उवयारो जं किज्जइ वेरिए वेरं ॥ ६ ॥
 आसन्नमुवयवंपि इ मरणं मम चित्तनिवुइं जणइ । जं पुव्ववरसाहणमुवट्ठियं एत्थ पत्थावे ॥ ७ ॥
 इव असरिसनिचामरिसपगरिसायंवअच्छिविच्छोहो । सो चित्तिउं सुदाढो वेगेण जिणंतियं पत्तो ॥ ८ ॥
 अह अंतलिक्खमुवागएण किलकिलारावं कुणमाणेणं तेण अरे रे कत्थ वच्चिहत्ति भणिऊण विउच्चिओ संवत्तगम-

श्रीगुणचंद
महावीरच०
५ प्रस्तावः

॥ १७८ ॥

हापवणो, तेण पहणिज्जमाणे उम्मूलिया तरुणो टलटलिया कुलसेला थरहरियं धरणिवट्टं दूरमुच्छलियं गंगासलिलं
विसंठुला डोलिया नावा भग्गो तडत्ति कूययखंभो जज्जरिओ सियवडो वामूढो कन्नधारो मरणभयभीओ इट्ठदेव-
ए सुमरिउं लग्गो नावाज्जणो, अवि य—

संचलियमच्छकच्छवजलकरिकरघायज्जरतरंगे । तारापहमोगाढे सलिलुप्पीले महापबले ॥ १ ॥

पव्वयमहोल्लकलोलपेल्लणुवेल्लिरी सफरिगव्व । बोलेउं आढत्ता ताहे नावा सुदाढेण ॥ २ ॥

एत्थंतरे कंबलसंबलाभिहाणा दो नागकुमारदेवा तक्खणचलियासणा परमत्थजाणणट्ठा जाव ओहिं पउंजंति ताव
पासंति भयवंतं नावारूढं सुदाढेण जले बोलिउमाढत्तंति, तं च पासित्ता अलाहि सेसकज्जेहिं, सामिं ताव मोया-
वेमोत्ति चिंतिऊण वेगेण समागया तंपएसं, आवडिओ य एगो नागकुमारो सुदाढेण सह जुज्झिउं, वीएणवि वियड-
पाणिसंपुडेणुप्पाडिऊण नावा नइपरिसरंमि पमुक्का ।

अह सो सुदाढनागो महिद्धिओ जइवि तहवि स्त्रीणबलो । आसन्नमरणनिम्भररणणमुच्छायउच्छाहो ॥ १ ॥

अप्पट्ठिण्हिवि तथा कंबलसंबलभिहाणदेवेहिं । अहिणवदेवत्तणदिव्वसत्तिणा निज्जिओ झत्ति ॥ २ ॥

उद्वियदाढे नागेव्व निविसे निम्मिण सुदाढंमि । नागकुमारा ताहे वंदित्तु जिणं विणयपणया ॥ ३ ॥

मुंचंति पुप्फपयरं सुरहिं गंधोदयं च वरिसंति । गायंति भत्तिभरनिस्सरंतरोमंचकंचुइया ॥ ४ ॥

सुदंष्ट्रदेवो-
पसर्गः.

॥ १७८ ॥

एवं च अवलोइऊण जायपरमविम्हओ नावाजणो चित्तेइ-अहो कोइ एस महापुरिसो माणुसवेसोवि अमाणु-
साणुरुवप्पभावो, जओ एयप्पभावाओ अम्हे समुत्तिन्ना आवयामहन्नवाओ, ता जुज्जइ एस महप्पा पणमिउंति
विभाविऊण निवडिओ तिहुयणगुरुणो चरणकमलंमि, कंबलसंबलावि जिणं पणमिऊण गया जहागयं ।

अह के पुण कंबलसंबला पुवभवे हुंतत्ति सुणेह मूलुप्पत्तिं-अत्थि सयलमहियलविकखाया समुत्तुंगपसत्थसुपास-
त्तिथयरथूभसोहिया मडुरा नाम नयरी, तत्थ य अहिगयजीवाजीववियारो नियसुद्धबुद्धिपगरिसोवलद्धपुन्नपावो
आसवसंवरपमोक्खतत्तवियारवियक्खणो पंचाणुवयाइसावगधम्मपरिपालणबद्धलक्खो जिणिंदसमयाणुरागरंजिय-
हियओ आगरो पसमाइगुणरयणाणं निवासट्ठाणं गंभीरिमाए संकेयभूमी करुणाए वल्लहो धम्मियजणाणं बहुमओ
नरवइस्स सबत्थ पावियसाहुवाओ जिणदासो नाम सावओ, साहुदासी नामेण से भारिया, ताणि य दोन्निवि अचंत-
धम्मकरणलालसाइं अणवरयगुरुवएसपालणपरायणाइं फासुयएसणिएहिं असणपाणखाइमसाइमेहिं सुणिजणं
पडिलाभेमाणाइं कालं वोळंति । अन्नं च—

संसारावत्तविचिन्तणत्थ(प्प)भीयाइं जइवि अच्चत्थं । जइवि य गिहवाससमुत्थदोसपरिसंकिमणाइं ॥ १ ॥

तहविहु गिहंमि अन्नोन्नगाढपेमाणुबंधभावेणं । समणं पवज्जिउकामाइंवि ताइं निवसंति ॥ २ ॥

तेहि य अन्नया सुगुरुपायमूले सुणिऊण तिरियाइअसंजयपाणिपरिग्गहतिवपावोवलेवासमंजस्सं गहियं गोमहि-

श्रीगुणचंद
महावीरच०
५ प्रस्तावः
॥ १७९ ॥

सिचउप्पयाण पच्चक्खाणं, अन्ने य अंगी कया वहवे अभिग्गहविसेसा, अह धेणूणमभावे साहुदासी साविगा दिवसे दिवसे गोरसं आभीरिहत्थाओ गिण्हइ, अन्नदियहे य तीए आभीरी भणिया, जहा-भदे! तुमं पइदियहं मम घरे महियं घेतूण आगच्छेज्जाहि, अहं जेतियं तुमं आणेसि तेत्तियं गिणिहस्सामि, अन्नत्थ मा वच्चिहिसि, पडिवन्नं च इमं तीए, एवं च पइदिणदंसणेणं निक्कवडकयविक्रयकरणेण य समुप्पन्नो तासिं परोप्परं सिणेहाणुबंधो, अंतरंतरा य साविगा से गंधपुडिगाइदाणेण उववारं करेइ, इयरीवि सविसेसं दुद्धं दहिं पणामेइ, अन्नया य आभीरीए कन्नगा-विवाहो पारद्धो, तओ सा जिणदासं साहुदासिं च सपणयं भणिउमारद्धा—

जइवि न आसणदाणेऽवि तुम्ह सामत्यमत्थि मे किंपि । तहवि सिणेहवसेणं किमवि अहं विन्नविउकामा ॥ १ ॥

किर गुरुमणोरहेहिं सुहिसयणविसिद्धगोट्टिकज्जेण । अम्हारिसेण जायइ सुचिरेण महसवारंभो ॥ २ ॥

तुम्हारिसाण पुण पुव्वजम्मसुविटत्तपुन्नविभवाणं । पइदियहमूसवच्चिय लीलाए संपयट्ठंति ॥ ३ ॥

एयं च उल्लवंती सा भणिया सेट्ठिणा—भदे! फुडक्खरेहिं भणसु जमिह पओयणं?, तीए भणियं—अम्ह घरे विवाहो पारद्धो, अओ तुम्हेहिं तत्थ भोयणं कायच्चं, सेट्ठिणा भणियं—को दोसो?, कीरइ, केवलं बहुगेहवावारवा-वडत्तणेणं न पारेमो मुहुत्तमेत्तपि गिहं परिचइउं, अओ न कायवो तुमए चित्तसंतावो न वोढवो अब्भत्यणाभंग-समुब्भवो अवमाणो न गणियच्चं निहक्खिन्नत्तणं न मोत्तवो मणागंपि पुव्वपणओ, न हि निक्कवडसिणेहाणुबंधो सम-

मथुरायां
जिनदासः
साधुदासी
च.

॥ १७९ ॥

वेस्वइ वज्जोवयारं, ता गच्छ नियगेहे कुणसु समीहियपओयणंति पन्नविऊण समप्पियाइं धूयणवसणाइं पणामि-
 याइं तदुचियाइं वत्थाभरणाइं दिन्नाइं कुंकुमाइविलेवणाइंति, सावि ताणि गहिऊण परमहरिसमुवहंती गया
 सगिहं, कओ विवाहो, मिलिया सुहिसयणवंधवा, जाया महई सोहा, पसंसियाइं ताइं इयरजणेणं, जहा-सुंदरो
 विवाहमहूसवो एएहिं कओत्ति, ताणि य पसंसं निसामिऊण चिन्तेंति-अहो परमोवयारकारी महाणुभावो सेट्ठी
 जेण अम्ह विवाहे पवरोवगरणदाणेणं एवं सोभा निवत्तिया, ता कहमेयस्स पच्चुवयारे वट्टिस्सामोत्ति संपेहिऊण
 उवचियसरीरे अतुच्छपुच्छोवसोहिण सुप्पमाणकुडिलचारुसिंगे सरयससहरकिरणसरिसवण्णे समाणदेहपरिमंडले
 अचंतसुंदरगोरे कंबलसंवलाभिहाणे तिवारिसिए गोवग्मपहाणे जुवाणवसहपोयगे गहिऊण गयाइं ताइं सेट्ठिभवणे,
 पणामिया य ते सेट्ठिणो, चउप्पयपरिग्गहकयपच्चरुखाणेण निवारिया ते सेट्ठिणा, तहावि अमुणियपरमत्थाणि भव-
 णंगणे ते वंधिऊण गयाइं ताइं नियगेहे, तेण सावएण चिंतियं-अहो संकडमेवमावडियं, जओ-जइ मुचंति एए
 वराया ता लोगो हलाइसु याहेइ तहाविहहीणसमायारो वा कोइ विह्वेइ, अह एत्थेव धरिज्जंति ता निरुवयारि-
 त्तणेण दुरणुपालणिज्जा हवंतित्ति खणं विगप्पिऊण जिणवरवयणायन्नणसमुप्पन्नकरुणापूरपूरियहियएणं संगोविया
 सेट्ठिणा, पइदिणं दावेइ किणिऊण य तेसिं फासुगचारिं, पणामेइ वत्थगलियं सलिलं, एवं पइदिणं उदंते वट्टइ,
 सो य सावगो अट्टमिचाउइसीसु आहारपोसहं सरीरसक्कारपोसहं वंभचेरपोसहं अवावारपोसहं च पडिपुत्रं काऊण

श्रीगुणचंद
महावीरच०
५ प्रस्तावः

॥ १८० ॥

सामाड्यपडिवन्नो समणसमो अइयारपंकपरिक्खणपरो धम्मसत्थपोत्थयं वाएइ, नियपरियणो य पंजलिउडो चित्त-
लिहिओव निसामेइ, तेऽवि कंबलसंबला अहाभइयाए तहाविहमोहणिज्जकम्मलाघवेण य धिरीकयसवणउडा
अवक्खित्तचित्ता सन्नित्तणेण सुणियजुत्ताजुत्ता सम्मं सुणंति, जायभवभवभया य जइवसं सावगो उववासं कुणइ
तइवसं तेऽवि चारिं पाणियं च परिचयंति, पुणो पुणो दिज्जमाणंपि न गिण्हंतित्ति ।

अह तेसु तिरियजोणीसमुभवेसुवि तवं करंतेसु । सगुणत्ति पक्खवायं वहमाणो चित्तए सेट्ठी ॥ १ ॥

एत्तियकालं अणुकंपणट्ठया दिन्नमेसिमसणाई । साहम्मिगबुद्धीए एत्तो सबं करिस्सामि ॥ २ ॥

साहम्मियवच्छलं जेण जिणिंदेहिं भुवणपणएहिं । सम्मत्तसुद्धिहेउं निदिट्ठं धम्मियजणस्स ॥ ३ ॥

अप्पुवो कोइ धुवं अहो पभावो जिणिंदवयणस्स । जं निसुणिऊण तिरियावि जंति वेरग्गमग्गंमि ॥ ४ ॥

इय चित्तिऊण सविसेसमायरं तेसिं दंसए सेट्ठी । भवेसु पक्खवायं वहंति जं वीयरागाऽवि ॥ ५ ॥

एवं च उचियकायवपरायणस्स सम्मसुवसंतचित्तस्स सरंति वासरा, अन्नया य तीए नयरीए भंडीरजक्खस्स
जणेण जत्ता पत्थुया, तत्थ य विविहतुरगाइवाहणाधिरुढो निग्गंतूण सयलपुरलोओ तस्स पुरओ वाहं करेइ ।

इओ य-जिणदाससेट्ठिणो पियमित्तो अचंतकोऊहलिओ जक्खजत्ताए वाहियालिं काउमणो सेट्ठिं अणापुच्छि-
ऊण पणयभावेण कंबलसंबले गंतीए जोत्तिऊण गओ जक्खपुरओ, वाहिया महतीवेलं, ते य अचंतदरिसणिज्जायारत्तणेण

आभीरा-
पितौ कम्ब-
लशम्बल
वृषौ.

॥ १८० ॥

अन्नपणयिणा जणेण वाहिज्जमाणा आरावेहनिस्सरंतरुहिरधारापरिगया कोमलदेहा अदिट्ठतहाविहवेयणा तुट्ट-
हियया नित्थामा जाया, तहाविहे य ते सेट्ठीगेहे बंधिता मित्तो पडिगओ, सेट्ठीवि भोयणसमए जाव जवसाइ
घेत्तूणं एइ ताव पेच्छइ एए कंपंतदेहे निस्सहगलंतनयणे वणमुहनीहरंतसोणिए दोवि गोणए, एवंविहे य दट्ठूण रुट्ठो
पुच्छइ—अहो केण दुरायारेण इमे वराया इमं अवत्थमुवणीया?, निवेइयं च से जहावित्तं परियणेणं, तदायन्नणेण
य समुप्पन्नो महंतो चित्तसंतावो, कंबलसंबलावि दट्ठघायज्जरियसरीरा अणसणं काउमणा सायरं पुरओ उवणी-
यंपि चारिपाणियं न गेण्हंति, जाव य पुणो पुणो गवत्ताइयं दिज्जमाणं नेच्छंति ताव सेट्ठिणा मुणिऊण तदभिप्पायं
दिन्नमेतेसिं भत्तपच्चक्खाणं, पडिवन्नं च साभिलासं एएहिं,

ताहे कारुत्तेणं विमुक्कनीसेसगेहवावारो । सुसिणिद्धबंधवाण व तेसिं पासे ठिओ सेट्ठी ॥ १ ॥

भणइ जहा रोसमहो मणागमेत्तंपि मा वहेज्जाइ । जं निहएण तेणं दुत्थावत्थं इमं नीया ॥ २ ॥

संसारपवत्ताणं जंतूणं जेण कित्तियं एयं? । न हु नामेगंतमुहो जणंमि जाओ जणो कोई ॥ ३ ॥

दट्ठवज्जपंजरोदरगयंपि सेलाइदुग्गलीणंपि । पुक्कयमसुभकम्मं जीवं संकमइ कुबियं व ॥ ४ ॥

विहवइ तयणु विवसं सुवहुं अइविरसमारसंतं च । कूडपडियं व चडयं नहुप्पयारं तडफडंतं ॥ ५ ॥

ता भो महाणुभावा! सम्मं अहियासणं विमोत्तूण । अन्नो निज्जरणविही न विज्जए पुक्कपावस्स ॥ ६ ॥

श्रीगुणचंद
महावीरच०
५ प्रस्तावः
॥ १८१ ॥

उवचियपुत्रा तुभे सफलत्तणमुवगयं च भे जीयं । जं दुक्खविमोक्खस्वमा पत्ता जिणधम्मसामग्गी ॥ ७ ॥
इय एवमाइवयणेहि पसमसारेहिं अमयसरिसेहिं । संठविया सुहमग्गे ते वसहा सेट्ठिणा सम्मं ॥ ८ ॥
एवं च विसुज्झमाणज्झवसाणा सरीरवेयणं सहमाणा सेट्ठिभणिज्जमाणं पंचनमोकारं पडियच्छमाणा कालं काऊण
नागकुमारेसु देवेषु उववण्णा, ते इमे कंबलसंबलत्ति ॥

इओ य-भयवं महावीरो नावुत्तिन्नो संतो जलतीरंमि इरियावहियं पडिक्कमिय सुरसरियापरिसरे ईसिजलोलसु-
हुमवालुगोवरि मंदं मंदं पयाइं निसिंतो थूणागसंनिवेसे गंतुं पयत्तो, नवरि सामिणो पडिफलंतचक्ककमलकुलिसं-
कुसकलसपासायपमुहपहाणलक्खणं कियं पयपंतिं नइपुलिणे पलोइऊण पूसो नाम सामुदलक्खणवियक्खणो
चित्तिउमारद्धो-अहो आजम्मकालाओऽवि अदिट्ठपुवा अचंतमच्छरियभूया कस्सइ महाणुभावस्स लक्खंडमहिमंड-
लोवभोगिणो चक्किणोव पवरलंछणा पयपद्धई एत्थ दीसइ, जइ पुण कहंपि कोइ अपत्तरज्जो वा देसदंसणकोऊहली
वा तहाविहविसमदसावडिओ वा चक्कवट्ठी एवं भमेज्जा, पेच्छामि तं महापुरिसं, जइ पुण एयावत्थंमि इमंमि
सेविज्जमाणंमि मम समीहियत्थसिद्धी जाएज्जत्ति परिभाविऊण तुरियगइए जाव कइवयपयंतरमुवगओ ताव दिट्ठो
अणेण थूणागसन्निवेसस्स बहिया बहलपलवालं कियकंकेलितरुणो हेट्ठओ पडिमासंठिओ जिणो, दट्ठण य परमे-
सरस्स सिरिवच्छलंछियं वच्छयलं दाहिणावत्तगंभीरं नाभिमंडलं बालप्पवालपाडलं व करकमलं चित्तियमणेणं-न

कंबलशम्ब-
लयोर्देवत्वं
पुण्यसमा-
धानं च.

॥ १८१ ॥

केवलं एयस्स चरणजुयले लक्खणं, सरीरं पि नियनियविभागाणुरुवलक्खणाणुगयं उवलक्खिज्जइ, ता कंह एवं-
विहा समत्थपसत्थलक्खणसंपया?, कंह परिजुन्नवत्थमेत्तं पि से न संपज्जइ? कंह वा समग्गभरहरज्जसिरिसूयण-
परा तारिसा सामुद्दसत्थवयणविन्नासा?, कंह असंपज्जंतलुक्खभिक्खाहारकिसमेयस्स सरीरं?, अहो दूरं पच्चक्खेण
विरुद्धं लक्खणसत्थं ।

चिरकालं सेसकलाकलावमवि उज्झिऊण जत्तेणं । सामुद्दसत्थमेयं अवभिचारंति पढिओऽहं ॥ १ ॥
इण्हि तु एत्थ समणे निव्वसणे चक्खुगोयरं पत्ते । लक्खणसत्थमसेसं नूणं दूरं विसंवइयं ॥ २ ॥
हा हा धिरत्थु मज्झं परिस्समो जेण हरिणपोयव । माइणिण्यासमेणं लक्खणसत्थेण नडिओऽहं ॥ ३ ॥
मुट्ठीहिं हयं गयणं नवणीयत्थं विरोलियं सलिलं । अघडंतत्थनिबद्धं जं एयं अहिगयं सत्थं ॥ ४ ॥
केलिप्पिण मन्ने संघडियमिमं पयारणपरेण । धुत्तकयं पिव कवं कालेणं होइ सिद्धंतो ॥ ५ ॥
अलमेत्तो एएणं पलालकप्पेण दुट्ठसत्थेणं । इय तक्किऊण पूसो परमविसायं गओ सहसा ॥ ६ ॥
एत्थंतरंमि सक्को सुहासणत्थो पउंजए ओहिं । कह भयवं भवमहणो विहरइ परमेसरो वीरो?, ॥ ७ ॥
थूणागसन्निवेसे पेच्छइ पडिमट्ठियं जिणवरिंदं । नेमित्थियं च पूसं दूसंतं अत्तणो सत्थं ॥ ८ ॥
तो सिग्घं वियडकिरीडकोडिमणिकिरणविच्छुरियगयणो तियसेसो जिणकमकमलवंदणत्थं लहुं एइ, जहा-

श्रीगुणचंद
महावीरच०
५ प्रस्तावः

॥ १८२ ॥

भणियविहिणा य नमंसिऊण सामिं महुवयणेणं पूसं भणइ-भइ ! किमेवं दूसेसि लक्खणसत्थं, नहु मिच्छा-
भासिणो महाणुभावा सत्थयारा, किं तुमए न सुओ एस ससुरासुरखयरनरनरेसरसिरपणयचलणो सिद्धत्थनरिंदन-
दणो तिहुयणविकखायकित्ती धम्मवरचाउरंतचक्कवट्ठी खलमहिलंव रायलच्छि छड्डिऊण एवं विहरइ । अत्रं च—

एसो सो जस्सेसरियकोडिलेसंपि न घडइ समग्गो । पायालसग्गनरखेत्तजायलोगो सुतुंगोऽवि ॥ १ ॥
एसो चिय भवभयभीमकूवमज्जंतसत्तउद्धरणो । वट्ठंतुम्भडकलिकालदलणदक्खो इमो चेव ॥ २ ॥
एसो चिय सिवमंदिरकवाडपुडविहडणेकतल्लिच्छो । संजमलच्छिनिवेसियविसालवच्छत्थलो एस ॥ ३ ॥
एसो चिय करुणाजलनिवाधियमच्छरगितत्तजणो । अप्पडिमनाणदंसणपमोक्खगुणगणनिही एस ॥ ४ ॥
पच्चाइऊण एवं पूसं तिविहेण वयणनिवहेण । पणमियजिणवरचरणो सहस्सनयणो गओ सग्गं ॥ ५ ॥
इय घोरपरीसहवेरिसमरविट्ठंसणेक्कवीरस्स । वीरस्स भुवणपडुणो चरियंमि सुहोहभरियंमि ॥ ६ ॥
सुरसूलपाणिकोसियमहादिपडिबोहणत्थसंबद्धो । पंचमओ पत्थावो समत्थिओ वित्थरेणेसो ॥ ७ ॥

इइ सिरिगुणचंदसरिरइए महावीरचरिए सुलपाणिचंडकोसिअपबोहणो नाम पंचमो पत्थावो ।

इन्द्रागमनं
प्रस्तावोप-
संहारश्च.

॥ १८२ ॥

अथ षष्ठः प्रस्तावः

पुवज्जियावज्जविणासणत्थं, एगागिणा वीरजिणेसरेण । तित्तिक्खिया जे उवसग्गवग्गा, निदंसिया ते सयला कमेण ॥ १ ॥

एत्तो य गोसालयदुव्विणेयजुत्तस्स तस्सेव महापहुस्स । होहिंति जे ते उ निदंसइस्सं, एगग्गचित्ता निसुणेह तुम्भे ॥ २ ॥

अह पुव्वोवइद्वथूणागसन्निवेसाओ निक्खमिऊण गामाणुगामेण परिभमंतो ठाणे ठाणे सुरविसरेण पुइज्जमाणो अभणमाणोवि नियमाहप्पेण पाणिगणं पडिबोहिंतो पत्तो काणणुज्जाणदीहियारमणिज्जं रायगिहं नयरं, तस्स य अदूरदेसे समुत्तुंगपासायसहस्ससमद्धासिओ नालंदो नाम संनिवेसो, तत्थ धणकणगसमिद्धो अज्जुणो नाम तंतुवाओ परिवसइ, तस्स य अणेमे कम्मकरा विसालसालासु संठिया विसिद्धपट्टदूसाइं वुणंति, भय-
वंपि वासारत्तं काउकामो अज्जुणं अणुजाणाविऊण एगंतभूयाए तसपाणविरहियाए सुन्नसालाए मासखमणं पढम-
मुवसंपज्जित्ता विहरइ । इओ य गोसालो नाम मंखलिमंखस्स पुत्तो वित्तफलगोवजीवी एगागी परिभमंतो तत्थेव
सालाए ठिओ जत्थ भयवं पलंबियमुओ चिट्ठइत्ति । जहिं च एयस्स उप्पत्ती तं पच्छा भण्णिही, पढमं ताव जस्स
सगासाओ मंखलीमंखो जाओ तहा कहिज्जइ ।

उत्तरावइविसए अत्थि सिलिंधो नाम संनिवेसो, तत्थ केसवो नाम गामरक्खगो, तस्स पाणप्पियाए विणीयाए

श्रीगुणचंद
महावीरच०
६ प्रस्तावः

॥ १८३ ॥

सिवाभिहाणाए भारियाए कुच्छिसि संभूओ मंखो नाम पुत्तो, सो य कमेण जोवणमुवगओ, अन्नया सो पिउणा सह सरोवरं गओ, जलमज्जनं च काऊण तडे निवन्नो पेच्छइ चक्कायमिहुणं अन्नोन्ननिभरपेमाणुरागरंजियहियं विविहकीलाविसेसे कुणमाणं, कहां चिय?—

चंचपुडछिन्ननवनलिणिनाललवसंविभागफुडपणयं । सूरत्थमणासंकाकयनिविडपरोप्परसिलेसं ॥ १ ॥

जलपडिर्विवियनियरूवपेक्खणुप्पन्नविरहपरिसंकं । अन्नोन्नविहियनिकवडचाडुवक्खित्तमणपसरं ॥ २ ॥

एरिसं च तं नाऊणं मंदं मंदं परिसप्पिणा कयंतेणेव अमुणियागमणेण पारद्विण आयन्नंतमाकट्टिऊण खित्तो तदभिमुहो सिलीमुहो, अह दिवसंजोगेण लग्गो चक्कायस्स, मम्मिओ य सो तेण घाएणं, जावऽज्जवि न वावज्जइ ताव तं तहाविहं पेच्छिऊण खणं रुणुड्डुणिऊण य सकरुणं विवन्ना चक्काई, इयरोऽवि मुहुत्तमेत्तं जीविऊण पंचत्त-मुवगओत्ति । एवं च तवइयरमवलोइऊण मंखो मुच्छानिमीलियच्छो निवडिओ वरणिमंडले, दिट्ठो य केसवेण अहो किमेवमतक्कियमावडियंति विस्सियमणेण, समासासिओ सिसिरोवयारेहिं, खणंतरेण उवलद्धचेयणो पुच्छिओ य— पुत्त ! किं समीरखोभो ? उय पवलपित्तदोसो ? अहवा नित्थामत्तणं ? अन्नो वा कोइ हेऊ ? जेणेवं निस्सहंगो चिरं मो-हमुवगओऽसि ?, साहेसु परमत्थं, तेणावि पिउवयणमायन्निकुण विमुक्कदीडुस्सासेण भणियं—ताय ! एवंविहं चक्काय-मिहुणं नियच्छिऊण मए पुवजाई सरिया, किर अहं पुवभवे माणससरोवरे एवं चिय चक्कायमिहुणत्तणेण वट्ठंतो पुलि-

मंखोत्पत्तिः

॥ १८३ ॥

दमुकमग्गणाभिहओ तक्खणविरहंफुट्टहिययाए चक्कवाईए अणुगओ मओऽम्हि, मरिऊण संपयं तुह पुत्तत्तणेण उववन्नो,
इण्हि च चिरपणइणीए तीसे चक्कवाईए विरहं सोढुं न पारेमि, केसवेण भणियं-वच्छ ! अलं समइकंतदुक्खसुमरणेणं,
एसो चिय सहावो एयस्स दढकयंतस्स जं न सहइ दढुं चिरकालं पियसंपओगसुहियं कमवि जणं, अवि य—

देवाविय नियपणइणीविरहुंभवदुक्खदहणसंतत्ता । मत्तव मुच्छिया इव कहकहवि गमेति नियजीयं ॥ १ ॥

तुम्हारिसाण पुत्तय ! केत्तियमेत्तं इयं अओ दुक्खं । जेसिं चम्पोणद्धं देहं सच्चावयासज्जं ॥ २ ॥

ता विरम पुव्वभवसुमरणाउ वट्टेसु वट्टमाणेणं । तीयाणागयचित्तणवसेण सीयइ सरीरंपि ॥ ३ ॥

तेणं चिय संसारो नूणमसारो इमो दढं जाओ । जं जम्ममरणजररोगसोगपमुहाइं दुक्खाइं ॥ ४ ॥

इय पन्नविउं विविहप्पयारहेऊहिं केसवेणं सो । नीओ कहमवि गेहे विरहमहावेयणाभिहओ ॥ ५ ॥

तत्थ गओऽवि सो पमुक्कपाणभोयणो सुन्नमणो धरणिनिसियलोयणो महाजोगिच्च निरुद्धवावारंतरपरिचित्तणो
तणंपि व नियजीवियंपि गणेमाणो अच्छइ, एयावत्थं च तं पासिऊण जायचित्तपरितावेण सयणवग्गेण मा छलणा-
विगारो कोऽवि होज्जत्ति संकियमणेण सच्चायरेण वाहराविया तंतमंतवाइणो, दंसिओ तेसिं, कया य उवयारा, न
जाओ मणागंपि विसेसो, अन्नया य देसंतराओ आगओ एगो थेरपुरिसो, ठिओ एयस्स चेव गिहे, दिट्ठो अणेण मंखो,
पुट्ठो य पासवत्ती केसवो, जहा-भइ ! किं कारणं जं एसो जुवावि रोगाइणा निरुवहओवि ससल्लो इव लक्खिज्जइ ?

श्रीगुणचंद
महावीरच०
६ प्रस्तावः

॥ १८४ ॥

केसवेणवि साहिओ दोसुब्भवो, तेण भणियं—कयं किंपि तुमए एवंविहदोसस्स पडिविहाणं?, केसवेण भणियं—दंसिओ एसो पवरमंततंताइजाणगाणं, थेरेण जंपियं—निरत्थओ सबोवकमो, पेमगहस्स किं करिंति ते वरागा?, तहाहि—

उग्गविससप्पसंभूयवेयणोवसमकरणदक्खावि । पंचाणणदुट्ठकरिंदरक्खसीथंभणपरावि ॥ १ ॥

भूयसमुत्थोवहवविणासकुसलावि परमविज्जावि । पेमपरवसहिययं पगुणं काउं न पारिंति ॥ २ ॥

केसवेण भणियं—किं पुण एत्तो कायवं?, तेण भणियं—जइ मं पुच्छसि ता जावज्जवि दसमिदसं न पावइ एस ताव आलिहावेसु चित्तफलहगे पुववइयरं, जहा—पुल्लिदेण चक्कवाओ सरेण पहओ, जहा तंमि जीवंते चेव तप्पणइणी मयत्ति, एवं च काराविऊण चित्तफलगहत्थं एयं परिच्चमावेसु गामनगराइसु, मा एवं कए कहवि विहिव-सेण पुवभच्चभज्जावि पावियमहिलाभावा फलगलिहियचक्कवायमिहुणवइयरावलोयणजायजाईसरणा इमिणा सद्धिं संघडेज्जा, सुव्वंति य पुराणागमेसु एरिसुत्तंता, एवं च कए एसोऽवि आसाभुयग्गलाखलियजीओ कइवय-दिणाणि जीवेज्जा, एवमायन्निऊण केसवेण साहु साहु तुह बुद्धीए, को जाणइ परिणयमइणो पुरिसे मोच्छण एवं-विहविसमत्थनिन्नयं? ति अभिणंदिऊण तवयणं निवेइयं मंखस्स, तेणावि भणियं—ताय! किमजुत्तं?, सिग्घमुवट्ठ-वेह चित्तफलं, एसो चेव हवउ कुवियप्पकलोलमालाउलस्स चित्तस्सुवक्खेवो, तओ केसवेण सुणिऊण तदभिप्पायं आलिहावियं जहायद्धियचक्कवायमिहुणरूवाणुगयं चित्तफलं, समप्पियं च मंखस्स, दिन्नं संबलं, तयणंतरं च सो

चित्रपट्ट-
कार्पणं.

॥ १८४ ॥

चित्तफलगतहृत्यो सहाइणा एगेण अणुगम्भमाणो नयरपुरखेडकब्बडमडंबपमुहेसु सन्निवेशेसु आसापिसायनडिओ
निबिस्सामं परिब्भमइ ।

दंसेइ पइगिहं चिय समूसियं तं च तियचउकेसु । चउमुहमहापहेसु य पवासभादेउलेसुं पि ॥ १ ॥

ताहे रहंगमिहुणं तहासरूयं निरुविऊण जणो । कोऊहलेण पुच्छइ साहेइ य सो जहावित्तं ॥ २ ॥

अणवरयंपि सवित्थरमसमत्थो नियकहं च सो कहिउं । संखेवत्थनिबद्धं साहइ दुवईए नियवत्तं ॥ ३ ॥

जहा-माणससरोवरंमि अवरोप्परपोढपेमाणुरंजियं, नयणनिमेसमेत्तविरहदूमिज्जंतदेहयं । लुद्धयमुक्कनिसियसर-
विहुरियमह पंचत्तमुवगयं, संपइ संपओगमभिवच्छइ एयं चकमिहुणयं ॥ ४ ॥ इमं च निसामिऊण केई पइसंति
केई अवहीरंति केइ अणुकंपंति, सोऽवि अविलक्खचित्तो सकज्जपसाहणेकनिरओ परियडंतो चंपं नयरिं गओ, तत्थ
य निट्ठियं पुवाणियं संबलं, तओ अन्नं जीवणोवायमपेच्छंतो तं चेव चित्तफलं पासंडं ओट्ठिऊण गायणाइं गाय-
माणो भिक्खं भमिउं पवत्तो, अविय—

अइतिकखल्लुहाभिहयस्स पिययमाजोगऊमुयमणस्स । एकाविय से किरिया उभयत्थपसाहिया जाया ॥ १ ॥

इओ य-तत्थेव पुरे वत्थघो मंखली नाम गिहवई, सुभदा य से भज्जा, सो य अपरिहृत्यो वाणिज्जकलासु अकु-
सलो नरिंदसेवाए असमत्थो करिसणसमए अलसो कट्टकिरियाए अवियक्खणो वावारंतरेसु, केवलं भोयणमेत्त-
पडिबद्धो कइं सुहेण निच्चाहो होज्जत्ति अणवरयं उवायंतरं विचित्तंतो पेच्छइ मंखं चित्तपट्टपयडणपडियकणभिक्षा-

श्रीगुणचंद
महावीरच०
६ प्रस्तावः

॥ १८५ ॥

वित्तीए पइदिणं सुहेण निव्वहंतं, तं च दट्ठुण चित्तिमणेण-अहो एयस्स इमा अणुवरोहिणी वित्ती अचोरहरणिज्जं भंडोलं निचंदुहा कामधेणू असलिला सस्सनिप्फत्ती अपरिकिलेसो महानिही, ता जीविओऽस्मि चिरकालाओ जं पाविओ एस परमोवाओत्ति विगप्पिऊण गओ मंखस्स समीवं, पडिवन्ना तस्स सेवा, सिक्खियाइं गायणाइं, अह तंमि पुव्वभवभज्जाविरहवज्जज्जरियहिययंमि पंचत्तमुवगए मुणियत्तत्तं व अप्पाणं मन्नंतो महया वित्थरेण चित्तफल-गमवरमालिहाविऊण समागओ निययमंदिरं, भणिया नियगेहिणी-पिए ! पाडेसु संपयं छुहासिरे वज्जासणिं पगुणा भवाहि य विहारजत्ताए, तीए वुत्तं एसा पगुणाऽहं, वच्चसु जत्थ भे रोयइ, तओ चित्तफलं धेत्तुं तीए समेओ नीहरिओ सो नयरीओ, तवित्तीए परिब्भमिउमारद्धो य देसंतरेसु, तवासिलोगोऽवि पुव्वदिट्ठनाएण तमागयं पेच्छिऊण मंखो आगओत्ति वाहरइ, एवं मंखली मंखोवइट्ठपासंडसंबद्धेण मंखो जाओत्ति । अन्नया य सो परिब्भ-मंतो पत्तो सरवणसन्निवेसे, ठिओ गोवहुलमाहणस्स गोसालाए, तत्थ निवसमाणस्स पसूया सुभहा, जाओ से दारगो, कयं उचियसमए गुणनिप्फन्नं गोसालोत्ति नामं, संबद्धिओ कमेणं, अइकंतो बालत्तणं, सो य दुट्ठसीलो सभावेणं, कुणइ विविहाणत्थे सभावेण, न वट्ठइ आणानिहेसे, सिक्खविज्जमाणो पवहइ पओसं । अवि य-

सम्माणदाणपगुणीकओवि उज्जुत्तणं खणं धरइ । सुणपुच्छंपिव पच्छा कुडिलत्तं झत्ति दंसेइ ॥ १ ॥

अत्थक्कजंपिरं मम्मवेहगं कूडकवडपडिवद्धं । वेयालं पिव तं पेच्छिऊण को को न संकेइ ? ॥ २ ॥

मंखलिनो
मंखत्वं
गोशालो-
त्पत्तिश्च.

॥ १८५ ॥

पाव ! नवमासमेत्तं गन्धे वृद्धोवि पालिओवि बहं । सयवारंपि य भणिओ वट्टसि नो वयणमेत्तेऽवि ॥ ३ ॥
 इय जणणीए एसो वुत्तो पच्चुत्तरं इमं भणइ । अम्मो ! ममोदरे विससु जेण दुगुणं तुमं धरिमो ॥ ४ ॥
 जत्थ दिवसंमि कलहं पिउणावि समं पउंजइ न एसो । भोयणरुईवि पावस्स तस्स जायइ न तत्थ फुडं ॥ ५ ॥
 नीसेसदोसनिवहेण निम्मिओ निच्चियं पयावइणा । जं तारिसो न दीसइ अन्नो सव्वंमिवि जयंमि ॥ ६ ॥
 तह कहवि तेण नियदुट्ठिमाइ लोगो परंमुहो विहिओ । जह दुस्सीलजणाणं सो पढमनिदंसणं पत्तो ॥ ७ ॥
 इय विसतरुव दिट्ठीविसोव पढमुग्गमेवि वट्टंतो । दंसणमेत्तेणं चिय भयावहो सो जणे जाओ ॥ ८ ॥
 अन्नया य सो पिउणा समं वाढं कलहिऊण तारिसयं चिय चित्तफलं आलिहावेत्ता एकलो भमंतो उवागओ
 तत्थेव सालाए जत्थ भयवं ठिओत्ति । एसा गोसालगस्स उप्पत्ती ॥

अह सामी पढमं मासक्खमणं काऊण पारणगदिणे पविट्ठो भिक्खट्ठा, गोयरचरियाए, पत्तो विजयाभिहाणस्स
 सेट्ठिस्स मंदिरं, दिट्ठो य तेण भयवं, तओ परमहरिसवसविसप्पमाणसमुच्चरोमंचमुवहंतेण पाराविओ भूरिभक्खवं-
 जणसनिद्धाए भोयणविहीए, पाउब्भूयाणि नहयले गंभीरभेरीभंकारुम्मिस्सचउविहत्तूरसणाहाइं सिंदूरपूरारुणचा-
 मीयरधारापज्जवसाणाइं पंच दिवाइं, वियंमिओ तियचउक्कचचरपहेसु विविहो साहुवाओ, निसामिओ गोसालेण
 एस वुत्तंतो, तओ चिंतियमणेण—अहो न सामन्नमाहप्पो एस देवज्जो, ता परिचइऊण चित्तपट्ठिगापासंडं पडिव-

श्रीगुणचंद
महावीरच०
६ प्रस्तावः

॥ १८६ ॥

जामि एयस्स सीसत्तणं, न कयाह निप्फला हवइ रयणायरसेवा, एवं विगप्पमाणस्स भयवं पारिऊण पत्तो तमेव तंतुवायसालं, ठिओ काउस्सग्गेणं, गोसालोऽवि सामिणो अट्ठंगं निवडिऊण चलणेसु विन्नवेइ—

एरिसमाहणं तुह देवज्जय ! नो मए पुरा नायं । कुसलोऽवि मुणइ नग्घं अहवा थवियाण रयणाणं ॥ १ ॥

नियजणगच्चाओऽविहु वंलियसुहअत्थसाहगो जाओ । अणुकूले वा दइवे अनओऽवि नयत्तणमुवेइ ॥ २ ॥

हवउ बहुजंपिएणं पडिवज्जिस्सामि तुम्ह सीसत्तं । अब्भुवगमेसु सामिय ! पत्तो एक्को तुमं सरणं ॥ ३ ॥

सामीवि इमं सुणितावि विहिपडिसेहे अकुणमाणो तुसिणिको ठिओ, इयरोऽवि निययाभिप्पाएण पडिवन्न-
सिस्सभावो भिक्खाए पाणवित्तिं काऊण भगवओ समीवं न मुयइ, अह वीयमासखमणपारणए आणंदनामस्स
गिहवइस्स घरे गोयरचरियाए पविट्ठो भयवं, पडिलाभिओ य खज्जगविहीए, तइए य मासखमणपारणए सुनंदस्स
मंदिरे सच्चकामगुणिएणंति । एत्तो चउत्थमासखमणमुवसंपजित्ताणं विहरइ, गोसालोऽवि बहुदिवससेवासंभाविय-
पणयभावो कत्तियपुत्तिमादिवसे संपत्ते पुच्छइ—भयवं ! एरिसियंमि वारिसियमहूसवे किमहमज्ज भत्तं लभिस्सामि ?,
एत्थंतरे जिणवरतणुसंलीणेण भणियं सिद्धत्थवंतरेण—भइ ! अज्ज तुमं पाविहिसि अंबिलेण समं कोइवकूरं, कूड-
रूवगं च दक्खिणाएत्ति, सो एवं निसामिऊण सूरुगमाए आरब्भ सच्चायरेण उच्चावएसु गिहेसु परिभमिउमा-
रद्धो, जत्थ जत्थ वच्चइ तत्थ तत्थ आरनालकलवियं कोइवकूरमेव लब्भइ, अह जायंमि अवरणइसमए खुदा-

गोशाल-
कस्य
प्रज्ज्या.

॥ १८६ ॥

पिवासाभिहओ जाहे अन्नं किंपि न पावेइ ताहे एगेण कम्मारेण गेहे णेऊण जेमाविओ अंबिलोल्लियं कोइवकूरं, उवणीओ य से भोयणावसाणे रूवगो, गहिओ य तेण, नवरं वीहीए दंसिओ, कूडगो य जाओ, तओ सो 'जेण जहा भवियवं, न तं हवइ अन्नह'त्ति नियइवायं गिणहइ, भयवंपि तंमि चिय कत्तियपुणिणमादिणे निक्खमिऊण नालं-
दाओ गओ कोल्लागसन्निवेसं, तत्थ य बडुलो नाम माहणो तदिणं दियवरे परमायरेणं भुंजावेइ, तस्स य गिहे चउत्थमासखमणपारणगं काउकामो सामी पविट्ठो भिक्खं, दिट्ठो अणेण, तओ परमन्नेण घयमहुसणाहेण पडिला-
भिओ, वियंभियाइं पंच दिवाइं । इओ य—

कूडगरूययहत्यो लज्जाए मंदमंदसंचरणो । जाए वियालसमए गोसालो एइ सालाए ॥ १ ॥

जिणनाहमपेच्छंतो संभंतो पुच्छई समीवगयं । लोयं जिणप्पउत्तिं पुणरुत्तं सबजत्तेणं ॥ २ ॥

जाव न कोइ निवेयइ सवाहिरब्भंतरं समंतेणं । नालंदं तावेसो हिंडइ साभिं निहालंतो ॥ ३ ॥

न य कत्थवि उवलद्धो तग्गमणविही तओ स चिंतेइ । पडिक्कलो मज्झ विही पुणोवि विहिउऽमिह एगागी ॥ ४ ॥

एवं च सुचिरं परिञ्चुरिऊण परिचत्तचित्तफलपमुहोवगरणो विमुक्कनियंसणो सउत्तरोट्ठं सिरं खउराविऊण नीह-
रिओ तंतुवायसालाओ, तुरियं वच्चंतो य पत्तो कोल्लागे, तत्थ य बहिया जणो अणमणं एवं जंपेइ-अहो धणणो
कयउण्णो उवलद्धजम्मजीवियफलो माहणो जस्स घरंमि तहाविहमहासुणिदाणवसेण निवडिया कणगबुट्ठी, तिय-

श्रीगुणचंद
महावीरच०
६ प्रस्तावः

॥ १८७ ॥

सेहिं उग्युट्टं अहो दाणं, जाओ जयंमि निम्मलो साहुवाओ, गोसालोऽवि एयमट्टं जणंतियाओ सोचा हट्टुट्टो
एवं विचिंतेइ-जारिसं महामुणिं एए वयंति तारिसप्पभावो सोच्चिय मम धम्मायरिओ महावीरो, जेण न खलु अत्थि
अन्नस्स कस्सइ तहारूवस्स समणस्स वा माहणस्स वा एवंविहा इट्ठीसकारपरक्कमत्ति निच्छिऊण कोल्लागसंनि-
वेसंमि स बाहिरब्भंतरं सुनिउणदिट्ठीए जाव पलोएइ ताव दिट्ठो भयवं काउस्सग्गमुवगओ, तं च पेच्छिऊण हरिस-
वसूससियरोमकूवो वियसियवयणो पावियच्चित्तरयणं व अप्पाणं मन्नंतो तिव्वुत्तो आयाहिणपयाहिणं काऊण
निवडिओ भयवओ चरणेसु, भालतले घडियपाणिसंपुडो य एवं भणिउं पवत्तो—

असरिसगुणगणरयणायरो तुमं तिहुयणस्स पुज्जो य । विहलियजणसाहारो य जेण ता विण्णवेमि इमं ॥ १ ॥

पुवं वत्थाइपरिग्गहेण जोग्गो न आसि दिक्खाए । संपइ पुण परिचत्तंमि तंमि जाओ अहं जोगो ॥ २ ॥

ता तेलोकदिवायर ! पडिवज्जसु जेण संपइ भवामि । तुह सिस्सो जा जीवं एत्तो तं चेव धम्मगुरु ॥ ३ ॥

तुह थेवमेत्तचिरहेवि नाह ! हिययं कंहंपि फुट्टंतं । पुणरुत्तसंगमसमीहणेण कट्टेण संधरियं ॥ ४ ॥

जाणामि वीयरगे कीरंतो नेव निव्वहइ नेहो । पेमगहिलं सचित्तं किंतु न पारेमि पडिखलित्तं ॥ ५ ॥

अन्नं च-अच्छउ दूरे सेसं वियसियनवनलिणमणहरच्छीए । जं पेच्छसि तं तेणवि मुणेवि अम्भुवगओऽहंति ॥ ६ ॥

इय सविणयं सपणयं भणमाणे तंमि तिहुयणेक्कपहू । उज्झियपेमवियारोवि तस्स वयणं पडिस्सुणइ ॥ ७ ॥

कोल्लाके
गोशालक-
मीलनं.

॥ १८७ ॥

जाणंताविहु अइदुट्टसीलयं भाविरं अणत्थं च । गरुया पणएसु तहावि हुंति न परंमुहा कहवि ॥ ८ ॥
 एवं च सामी तेण पडिवण्णसिस्सभावेण समेओ सुवन्नखले सन्निवेसे वच्चइ, तस्संतरे गोवाले बहुखीरं गहाय
 महतीए थालीए अखंडफुडिएहिं नवएहिं सालितंदुलेहिं पायसमुवक्खडेंते पेच्छिऊण गोसालो भणइ-भयवं ! दढं
 छुहाभिभूओऽम्हि, ता एह एत्थ पायसं परिभुंजामो, अह सिद्धत्थेण चिरकाललद्धावगासेण भणियं-भइ ! मा
 तम्मसु, एसा थाली अद्धसिद्धा चेव चिहडीहि, ताहे सो नियदुट्टसीलयाए तं वयणं वितहं काउमणो गंतूण ते गोवे
 भणइ-अरे एस देवज्जगो तीयाणागयजाणओ एवं कहेइ, जहा-एस पायसथाली अद्धसिद्धा चेव विवज्जिही, ता
 पयत्तेण संठवेह, एवं च निसामिऊण ते भयभीया वंसदलेहिं तं पिढरं गाढं वेढिऊण रंधिउमारद्धा, अह पउरतं-
 दुलपक्खेवविहसिया निमेसमेत्तेण फुट्टा थाली, पच्छा गोवेहिं जं जहा पावियं तीसे पायसालिद्धं कप्परं तं तहा
 घेत्तूण परिभुत्तं, गोसालोऽवि कंदुकविरालोव पेच्छमाणो विलक्खो चेव ठिओ सुट्टयरं च नियइवायं पडिवन्नो,
 अह सामी बंभणगामं गओ, तत्थ य गामे दोन्नि पाडगा, तेसु दो भायरो नंदउवणंदनामाणो सामित्तं कुणंति,
 भुवणगुरुवि छट्टपारणगंमि पविट्ठो नंदपाडयंमि, दिट्ठो नंदेण, पडिलाभिओ दहिमिस्सेण वासियकूरेण, गोसा-
 लोऽवि गओ इयरपाडयं, उच्चुंगपासायमवलोइऊण पविट्ठो उवनंदस्स मंदिरे, भणिया उवनंदेण कम्मयरी, जहा-
 देहि एयस्स भिक्खंति, उवणीओ अणाए वासियकूरो गोसालयस्स, सो य तं अणिच्छंतो उवणंदं एवं निब्भच्छेइ-

श्रीगुणचंद
महावीरच०
६ प्रस्तावः
॥ १८८ ॥

गामुक्कोडं गिण्हह नरनाहस्स व न देह किंपि करं । विविहे कुणह विलासे अक्खलियं पावमायरह ॥ १ ॥
अम्हारिसाण सुणिपुंगवाण गेहंगणमुवगयाणं । वासियभत्तं दारितया कहं नेव लज्जेह ? ॥ २ ॥
एवं च आयन्निऊण रुट्ठेण उवणंदेण भणिया दासी-भदे ! एयस्स चेव समणस्स सीसंमि पक्खिवसु भत्तमेयंति,
खित्तं च तीए, तओ गोसालो वाढमुबूढाभिमाणो दट्ठोढुभिउडिभासुरो अन्नं किंपि तस्स अणत्थं काउमसमत्थी
गेहदुवारे ठाऊण भणइ-जइ मम धम्मायरियस्स अत्थि तवो वा तेओ वा ता एयस्स मणुयाहमस्स भवणं डज्झ-
उत्ति, अह अहासन्निहिहिं वाणमंतरेहिं भगवओ पक्खवायमुव्वहंतेहिं विउव्विओ दुयवहो, दट्ठं से मंदिरं ।
तयणंतरं च भयवं चंपानयरिं गओ, तत्थ य तइयं वासारत्तं ठाइ, दोमासिएण य स्वमणेण तवोकम्ममुवसंपज्जइ,
विविहाणि य उक्कुडुयासणार्हणि करेइ, चरिमदुमासियपज्जवसाणे य वाहिं पारेत्ता गोसालेण समेओ कालायं नाम
सन्निवेसं वच्चइ, तहिं च एगंतभूए तसपाणरहिए सुन्नागारे निसासमयंमि पडिमं पडिवज्जइ, गोसालोऽवि चवल-
त्तणेण निरोहमसहमाणो गेहदुवारदेसे निलुक्को अच्छइ, एत्थंतरे सीहो नाम गामाहिवपुत्तो विज्जुमईनामाए दासीए
समेओ भोगत्थी तं चेव सुन्नचरं पविट्ठो, तेण यं महया सहेण भन्नइ-अहो जइ कोइ एत्थ समणो वा बंभणो वा
पहिओ वा वसिओ ता सो साहेउ जेण अम्हे अन्नत्थ वच्चामो, इमं च सुणिऊण सामी ताव पडिमापडिवन्नत्तणेण
तुण्हिक्को जावेइ, इयरो पुण कवडेण न देइ पडिवयणं, ताणि य अणुवल्लपडिवयणाणि निस्संकं सुरयविणोएण

सुवर्णखल-
मार्गः उप-
नन्दगृह-
दाहः का-
लाकगमः.

॥ १८८ ॥

खणं अच्छित्ता नीहरिउमारद्धानि, एत्थंतरे दुवारदेसंतरद्विएण गोसालेण गच्छंती छित्ता विज्जुमई, तओ तीए भणियं-अज्जउत्त ! अहं पुट्ठा केणावि, एयं च निसामिऊण सीहेण वलित्ता गहिओ बाहाए गोसालगो, भणिओ य-अरे कइयवेण अम्हे अणायारमायरमाणाणि पाससि, पुच्छिओऽवि न साहेसि जहा अहमिह निवसामित्ति निब्भ-च्छिऊण जहिच्छं पिट्ठिओ लट्ठीए, गओ य सट्ठाणं, तओ-गोसालो भणइ जिणं-तुम्ह समक्खंपि एकओ अहयं । एवं निट्ठुरचाएहिं कुट्ठिओ कारणेण विणा ॥ १ ॥ न मणागंपि हु तुम्हे निवारणं कुणह तस्स पावस्स । मम घाय-णुज्जुयस्सवि जुज्जइ गरुयाण किमुवेहा ? ॥ २ ॥

अह जिणतणुमलीणो सिद्धत्थो वागरेइ गोसालं । रे दुट्ठसील ! जइ तं सच्चं चिय सुहसमायारो ॥ ३ ॥
 ता किं अनिमित्तं चिय तं महिलं छिवसि पाव ! गच्छंति । जह अम्हे संलीणा तह ठासि न गेहमज्झगओ ॥ ४ ॥
 तुह पक्खं कुणमाणा अम्हेवि तुमं व नणु हणिज्जामो । दुट्ठोवट्ठंभपरा होंति सदोसा अदोसावि ॥ ५ ॥
 एत्थंतरंमि सामी निक्खमिउं पत्तकालगामंमि । पुबविहाणेणं चिय सुन्नघरे संठिओ पडिमं ॥ ६ ॥
 अह तत्थवि रयणीए गामउडसुओ उ खंदओ नाम । नियमज्जालज्जाए एइ समेओ सदासीए ॥ ७ ॥
 दंतलियानामाए ताहे पुबं व पुच्छइ इमोऽवि । गोसालोऽवि निलुको भएण गेहेक्कदेसंमि ॥ ८ ॥
 विजणंति मन्नमाणो तत्तो तीए समं जहिच्छाए । उवभुंजिऊण भोगे सो निस्सरिउं समारद्धो ॥ ९ ॥

श्रीगुणचंद
महावीरच०
६ प्रस्तावः
॥ १८९ ॥

तेसिं मिहो कहुल्लावसवणसंवड्डमाणपरितोसो । कहकहकहत्ति पहसइ गोसालो अह पिसाओव ॥ १० ॥
सोचा पहसियसइं खंदो कोवेण जट्टिमुट्ठीहिं । हणिऊण तं विमुंचइ ताहे सो एइ जिणमूले ॥ ११ ॥
भणइ य सोवालंभं नायगधम्मो किमेस संभवइ? । पेच्छंताणवि तुम्हं जं एवमहं हणिज्जामि ॥ १२ ॥
रक्खाकएण तुब्भे ओलग्गिज्जइ सया पयत्तेणं । जइ पुण सावि न विज्जइ निरत्थिया ता धुवं सेवा ॥ १३ ॥
अज्जवि सहोसाणवि पडुणो नियसेवगाण परिताणं । सच्चायेरेण कुब्बंति किं पुणो नीइनिरयाणं? ॥ १४ ॥
सिद्धत्थेणं भणियं केत्तियमित्तो इमो विणिग्घाओ? । अज्जवि मुहस्स दोसेण नत्थि तं जं न पाविहिसि ॥ १५ ॥
तओ सामी कुमारसंनिवेशं गओ, तत्थ य चंपगरमणिज्जाभिहाणे उज्जाणे पलंबियभुओ ठिओ काउस्सग्गेण, तहिं
च सन्निवेशे अपरिमियधणधन्नसमिद्धो अच्चंतसुरापाणप्पिओ कुवणयनाम कुंभकारो परिवसइ, तस्स आवणंमि पास-
जिणसिस्सा ससमयपरसमयत्थपरिन्नाणनिउणा भवोयहिनिवडंतपाणिगणसमुद्धरणसमत्था छत्तीसगुणरयणनिहिणो
जहोवइट्ठपगिट्ठजइकिरियापरूवणापरायणा अणेगदेसंतरागयविणेयभमरलिहिज्जमाणसुयमयरंदा मुणिचंदा नाम
सूरिणो निवसंति, ते य वाढं बुद्धभावमुवगया एवं विचितंति—

सवण्णुजिणपणीओ धम्मो सबत्थ वित्थरं नीओ । मिच्छत्तवसपसुत्ता सत्ता पडिबोहिया बहुसो ॥ १ ॥
सुत्तत्थेहिं सिस्सा संपइ निप्फाइया जहासत्तिं । परिवाल्लिओ चिरं तह सवाल्लुव्हाउलो गच्छो ॥ २ ॥

पत्रालक
गमः कुमा-
रसंनिवेशे-
मुनिचन्द्राः

॥ १८९ ॥

ता एत्तो जुत्तं मे विसेसपरिकम्मणं सरीरस्स । काउं जहसत्तीए सवत्थवि उज्जमेयवं ॥ ३ ॥
 इय चिंतिऊण सपए निवेसिओ तेण वद्धणो नाम । सिस्सो पडिस्सुवगुणो विहिया से तह गणाणुन्ना ॥ ४ ॥
 भणिओ य वच्छ ! गच्छो जहा मए पालिओ पयत्तेण । तुमएवि तहा एसो पालेयवो सयाकालं ॥ ५ ॥
 सिद्धंतदेसणावि य अविगणियपरिस्समेण कायवा । सिस्साणं एवं चिय रिणमोक्खो कम्मविगमो य ॥ ६ ॥
 एत्तोऽवि भद् ! भद् नूणं भुवणत्तएवि नो अत्थि । तो सुहसीलो होउं मुहाए मा हारिसिं एयं ॥ ७ ॥
 भो मुणिणो ! तुम्हेहिं पयट्ठियवं इमस्स वक्कमि । निब्भच्छिहिवि बहुं कमकमलं नेव मोत्तवं ॥ ८ ॥
 जं किंपि मए पुवं तुम्हे सम्मं गुणेषु नो ठविया । अपए वा सिक्खविया तं सवं मरिसणिज्जं मे ॥ ९ ॥
 इय मुणिचंदमुणिंदा तक्कालोचियविहिं विहेऊण । पारंभंति सुधीरा दुक्करजिणकप्पपरिकम्मं ॥

अन्नया य ते महाणुभावा भावियदुवालसविहभावणा पंचणहं तुलणाणं तवसत्तसुत्तएगत्तवलसरूवाणं मज्झया-
 राओ वीयाए सत्ततुलणाए अप्पाणं भावेमाणा विहरंति । इओ य-गोसालो मज्झंदिणसमए भगवंतं भणइ-एहि
 पत्थावो वट्ठइ, पविसामो गाममज्जे भिक्खानिमित्तं, सिद्धत्थेण भणियं-पज्जत्तं अम्ह अट्टणेणं, तओ गोसालो
 पविट्ठो भोयणत्थं गामे, दिट्ठा य अणेण इओ तओ परिभमंतेण ते पासनाहसिस्सा विचित्तपडपाउरणा पत्तपमुहो-
 वगरणकलिया यत्ति, ते य पेच्छिऊण गोसालेण पुच्छिया-के तुम्हे?, तेहिं भणियं-समणा निग्गंथा, सढकमढवि-

श्रीगुणचंद
महावीरच०
६ प्रस्तावः

॥ १९० ॥

णिम्मियमहामेहवारिधारोवसग्गावलोयणाउलफणिरायफणाफलगविरइयातुच्छत्तस्स पासनाहस्स सिस्सा, इति सोच्चा सो सिरं धुणंतो भणइ-अहो अहो निग्गंथा दुक्करकारया तुम्हे जे एत्तियमेत्तंपि गंथमुव्वहंता अत्तणो निग्गंथत्तणं ठावेह, अहो पच्चक्खमुसावाइत्तणं अहो निन्निमित्तमत्तुकोसो तुम्हाणं, सब्बहा निग्गंथाणं मज्झे न केवि तुम्हे, मम धम्मायरिओ चेव दूरुज्झियवत्थाइपरिग्गहो दुक्करतवचरणनिरिओ महप्पा जहत्थनिग्गंथो भन्नइ, तेहि य जिणनाहं अयाणमाणेहिं उल्लुंठयाए भासंतं पेच्छिऊण भणियं-भइ! जारिसओ तुमं तं मन्ने धम्मायरिओऽवि तारिसो चेव, जओ-जाणिज्जइ पुत्तविसरिसचेट्ठाए जणणीए सीलसंपया, कंतिगुणेणवि मुणिज्जइ रयणस्स आगरस्स सुद्धी, ता अलं वन्नणाएत्ति वुत्ते रुट्ठो गोसालो भणइ-जइ मम धम्मगुरुणो तवो वा तेओ वा अत्थि ता एएसिं धम्मायरियदूसगाणं पडिस्सओ डज्झउत्ति, तो तेहिं भणियं-न अम्हे तुम्ह वयणेणं डज्झामो, तो विलक्खो सो गंतूण सामिं भणइ-भयवं! अज्ज मए सारंभा सपरिग्गहा निग्गंथा दिट्ठा एवमाइ जाव पडिस्सओ न दट्ठोत्ति किमिह कारणं?, सिद्धत्थेण भणियं-ते पासावच्चेज्जा थेरा साहुणो, न तेसिं पडिस्सओ तुह वयणेण डज्झइत्ति। एत्थं-तरे जाया रयणी, कज्जलभसलसामलाइं पसरियाइं दिसिमुहेसु तिमिरपडलाइं, इओ य ते मुणिचंदसूरिणो चउकंमि तद्दिणे रयणीए एगाणिणो उस्सग्गेण ठिया, सोऽवि कूवणयकुंभकारो सेणिभत्तंमि निब्भरमइरापाणपरच्चसो विसंडुलघुलंतचलणो सभवणाभिमुहमइंतो पेच्छइ बाहिंमि काउस्सग्गपडिवन्ने ते सूरिणो, तओ चोरो एसोत्ति जायकुवि-

मुनिचन्द्रा-
चार्यशिष्यै-
रुत्थापः.

॥ १९० ॥

यप्पेण तेण निविडकरसंपुडेण पीडियं तेसिं गलयं, निरुद्धो उरसासपसरो, तहवि अविचलियचित्ता सुभज्झाणे वट्ठंता तक्खणमेव कम्मलाघवयाए समुप्पन्नोहिनाणा कालं काऊण देवलयं गया, तेसिं च अहासन्निहियसुरेहिं कुसुमवरि-सपुव्वयं कया महिमा। इओ य गोसालो ते देवे विज्जुपुंजभासुरसरीरे उप्पयंते निवयंते य साहुनिवाससमीवे पेच्छिऊण सामिस्स साहेइ-भयवं ! तेसिं तुम्ह पडिणीयाण पडिस्सओ डज्झइ, सिद्धत्थो भणइ-भइ ! मा एवमासंकेहि, तेसिं आयरिया देवलोगमुवगया, अओ देवा महिमं करेंति, ताहे सो कोऊहलेण गओ तं पएसं, देवावि पूयं काऊण सट्ठाणं पडिनियत्ता, अह तत्थ गंधोदकं पुप्फवासं च दट्ठूण दुगुणजायहरिसो पडिस्सए गंतूण सज्झायझाणविणयकरणपरिस्संते निब्भरं पसुत्ते तेसिं सिस्से उट्ठविऊण वागरेइ-अरे दुट्ठसिस्सा ! तुम्हे मुंडियसिरा चेव हिंडह, जहिच्छं भिक्खं परिभुंजिऊण सबं रत्तिं सुयह, एत्तियंपि न मुणह-जहा सूरिणो महाणुभावा पंचत्तमुवगया, अहो तुम्हं गुरूसु पडिवंधो, एवमाइ कलकलं करेंतंमि उट्ठिया साहुणो, णवरं तच्चयणासंकिया सहसा गया ते सूरिसमीवे जाव पेच्छंति कालगयमायरियं, तओ सुचिरं अट्ठिइं काउमारद्धा । कहं ?-

तह पालियावि तह पाढियावि तह गुणगणेषु ठवियावि । तह सिक्खवियावि दढं हा हा अकयन्नुया अम्हे ॥ १ ॥
 किं दुक्करतवचरणेण अम्ह किं वावि कुसलबोहेणं । किं चिर गुरूकुलसंवाससेवणाएवि विहलाए ॥ २ ॥
 जं असरिससंजमरयणरोहणं नियगुरुं पि कालगयं । पच्चक्खधम्मरासिंपि नेव मुणिमो पमाएणं ॥ ३ ॥

श्रीगुणचंद
महावीरच०
६ प्रस्तावः
॥ १९१ ॥

इय ते नियदुच्चरियं पुणो पुणो चेव जंपिरे समणे । गोसालो निब्भच्छिय बहुसो सामिं समल्लीणो ॥ ४ ॥
तओ सामी चोरागसन्निवेशं गओ, तत्थ य तद्विसं परचक्कभयमुवट्ठियं, तब्भएण य खंडरक्खा तियचउक्कसुन्न-
मढसभादेउलकाणणुज्जाणेषु अन्नेसु य तहाविहठाणेषु अपुवपुरिसं चारियसंकाए निभालेमाणा पेच्छंति भयवंतं
एगंमि वणनिगुंजे फासुगविजणरूवे गोसालएण परिवुडं काउस्सग्गेण संठियंति, तं च पिच्छिऊण 'भीओ भयाइं
पासइ' त्ति जायसंका चिंतिउमारद्धा-अहो एरिसंमि एगंतदेसे एएसिं अवत्थाणं न कोसल्लमावहइ, तहाहि-जइ
इमे निहोसा ता किं पयडे चिय नो गाममज्जे वुत्था?, अओ निच्छयं चारोवलंभत्थं परचक्कसंतिया केइ आगयत्ति
निच्छिऊण पुट्ठो तेहिं सामी गोसालगो य, अहो के तुब्भे? किं निमित्तं वा एत्थावत्थाणंतिवुत्ते भयवं मोणेण
चिट्ठइ, गोसालोऽवि तयणुविच्चीए तहेव जावेइ, जाव य पुणो पुणो वागरिज्जमाणाऽवि न देंति पच्चुत्तरं ताव निब्भंतं
चारगा एएत्ति कलिऊण तेहिं नीया कूवतडे, पारद्धा य वरत्ताए बंधिऊण तत्थ पक्खिविउं, नवरं पढमं गोसालं पक्खि-
वंति, पच्छा तं उत्तारिऊण भयवंतं बोलिंति, एवं च उब्बोलणनिबोलणे कुणमाणाण सोमाजयंतीनामाओ पासजिणत्ति-
त्थपडिवन्नसामन्नपुप्पन्नपरीसहपराइयाओ जीविगानिमित्तधरियपरिवायगनेवत्थाओ पुवभणियस्स उप्पलनेमित्तियस्स
भगिणीओ निसुणियएवंविहवइयराउ मा भयवं चरिमत्तिथयरो गहियदिकखो एस होज्जत्ति जायसंसयाउ जाव
तत्थ पएसे आगच्छंति ताव पेच्छंति भयवंतं तहा वाहिज्जमाणंति, तओ ताहिं भणियं-अरे रे दुरायारा! नूणं विण-

आचार्य-
स्यावधिः
कालश्च
चोराके
सोमाज-
यन्त्यौ

॥ १९१ ॥

स्सिउकामा तुब्भे जे इमस्स सिद्धत्थनरवइसुयस्स सुरविसरपणयचलणस्स एवं उवसग्गं करेह, एयं च निसामि-
ऊण भयभीएहिं सवहुमाणं खामिऊण मुक्को खंडरक्खेहिं जयगुरु, तं च ताओ वंदिऊण भावसारं गयाओ सट्ठा-
णंमि । सामीवि तत्थेव कइवय दिणाइं परिपालिऊण गोसालेण समेओ नीसेसनयरमंडलमंडणाए पिट्टिचंपापुरीए
गंतूण चउत्थं वासारत्तं उवसंपज्जइ, वीरासणलगंडासणाइनिसेज्जाहिं निरंतरं जावेइ चाउम्मासियं च महाखमणं
करेइ, तस्स पज्जंतदिणंमि य अन्नत्थपारणयं काऊण कयंगलसन्निवेसंमि वच्चइ, तत्थ य दरिद्धेरा नाम पासंडत्था
सारंभा समहिला सपरिग्गहा सपुत्तनत्तुगाइसयणा परिवसंति, तेसिं च गेहपाडगस्स मज्झे सकुलक्कमागयदेवया-
समद्धासियब्भंतरं विउलपट्टसालपरिक्खेवमणहरं समुत्तुंगसिहरोवसोहिअं देवउलमत्थि, तस्स एगंतकोणे समा-
गंतूण सामी ठिओ पडिमाए, तद्विवसं च मंदमंदनिवडंतजलत्तुसारवायं निरारियंतसिसिरमारुयं निवडइ महंतं
सीयं, तेसिं च पासंडत्थाणं तंमि दिणे जाओ महुसवो, तम्मि दिणे देवउले मिलिऊण सडिंभा सदारा भत्तीए गायंति
यं नच्चंति य, तेऽवि तहारूवे दट्ठूण अविगणियभाविभओ गोसालो सोवहासं भणिउमाढत्तो—

जत्थ गिहिणीसु पेमं ज्ञाणज्झयणेहिं सह महावेरं । सुरयपवंचपरूवणपरायणाइं च सत्थाइं ॥ १ ॥

जीवदयानामंपिवि न मुणिज्जइ जत्थ नूण सुभिणेऽवि । निच्चरमइरापाणंमि निच्चसो उज्जमो जत्थ ॥ २ ॥

गाइज्जइ नच्चिज्जइ सविलासं नियकुडुंबसहिएहिं । को होज्ज नाम एसोऽवि कोऽवि पासंडपरमत्थो ? ॥ ३ ॥

श्रीगुणचंद
महावीरच०
६ प्रस्तावः

॥ १९२ ॥

ते एवं फरसक्खरं तं जंपमाणं पेच्छिऊण समुप्पन्नरोसा भणंति-अरे बाहिं निच्छुभह एयं दुट्ठमुहं, न कज्जमेएण इहट्ठिएणं, एवं कहिए कंठे घेत्तूण इयरोहिं निस्सारिओ देवउलस्स बाहिंमि गोसालो, तहिं च हिमतुसारसंवलि-यानिलेण अम्भाहओ समाणो निविडबाहुवल्लरीसंछाइयवच्छत्थलो कंपंतकाओ दंतवीणावायणं कुणमाणो समुद्ध-सियरोमकूवो अच्छिउं पवत्तो, तारिसं च तं दट्ठूण जायाणुकंपेहिं अइनीओ सो अन्नेहिं देवउलमज्जे, खणमेत्तं च जायसीयावगमो नियदुट्ठसीलयं पडिक्खलिउमपारयंतो पुणोऽवि वागरेइ-‘जत्थ गिहिणीसु पेम’मिच्चाइ, तओ पुणोऽवि नीणिओ पवेसिओ य जाय तिन्नि वारे, चउत्थवाराए भवणमज्झपविट्ठो गोसालो भणइ—

दूरे अच्छउ नियमयविगप्पियं जं न लब्भए वोत्तुं । सच्चभूयंपि न पावेमि भासिउं किं करेमि अहं ? ॥ १ ॥

नमिमो तिसंझमेयं ठाणं न जहिं सदुच्चरीयस्स । रुसिज्जइ थेवंपिहु जइ पर फुडवाइणो चेव ॥ २ ॥

एवं च निसामिऊण परिणयबुद्धीहिं भणिया-एस इमस्स देवज्जगस्स कोऽवि पीडियावाहगो वा छत्तधारगो वा पडिचारगो वा होही, ता किं अरे एएण ?, तुण्हिक्का अच्छइ, नियनियकजाइं करेइ, जइ सोढुं न तरेइ ता सच्चतूराइं वाएह, जहा से सदो न सुणिज्जइ, तहेव विहियं तेहिं, अह जायंमि पभायसमए समुग्गए दिणयरे पच्चक्खी-भूयंमि जीवनियरे तओ ठाणाओ पडिमं उवसंहरिऊण सामी सावत्थिं नयरिं गओ, ठिओ तीसे बाहिं पडिमाए, इओ य भोयणसमए गोसालो पुच्छइ-भयवं ! तुब्भे भिक्खट्ठं अईयह ?, सिद्धत्थो भणइ-अज्ज अम्ह उववासो, सो पुच्छइ-

कृतांगले
दरिद्रस्थ-
विराः.

॥ १९२ ॥

भयवं ! अज्ज किमाहारं भुंजिस्सामि ?, सिद्धत्थो भणइ-अज्ज तुमए माणुसमंसं खाइयवं, सो भणइ-अज्ज मए तं भोत्तवं जत्थ इयरमंसंभवोऽवि नत्थि, किंगं पुण माणुसभंसस्स ?, एवं निच्छयं काऊण सबत्थ हिंडिउमारद्धो ।

इओ य-त्तत्थेय नयरीए पियदत्तो नाम गाहावई, तस्स सिरिभद्दा नाम भारिया, सा य मरंतवियायणी, पुत्तभंड-जीवणनिमित्तं उवयरेइ मंतवाइणो पुच्छेइ संवच्छरिए सविसेसं पूएइ देवयाओ तहवि न जाओ कोइ विसेसो, तंमि य समए वेलासासे वट्टमाणे देसंतरागयं पसिद्धं सिवदत्तनामधेयं नेमित्तियं पुच्छइ-कह मम पया जीविस्सइत्ति ?, तेण भणियं-जइ जायमेत्तं मयल्लयं बालं ससोणियमंसं पीसिऊण दुद्धपक्खेवपुव्वयं पायसविहाणेण रंधिऊण घयम-हूहिं सुसंभियं काऊण सुत्तवस्सिणो उद्धलियचरणस्स सबहुमाणं भोयणत्थं पणामसि ताघे पया धिरा होइत्ति, केवलं तंमि कयभोयणे सट्टाणमुवगए गेहस्स अन्नओमुहं दारं करेज्जासि, मा सो कहंपि भुणित्ता भोयणसरूवं गेहं दहेज्जत्ति, पडिवन्नं च सयलं तीए, तम्मि य दिणे पसूया सा मएल्लयदारयं, तओ जहाभणियविहाणेण पायसं काऊण दुवारदेसे ठिया अतिहिं निहालेइ ।

एत्थंतरे गोसालो अणेगमंदिरपरिचागं कुणमाणो समागओ तं पएसं, दिट्ठो अणाए, सायरं उवणिमंतिओ य समाणो पविट्ठो तंमि गेहे, दिन्नमासणमिमीए, उवविट्ठो एसो, ठावियं से पुरओ भायणं, परिवेसियं च घयमहुस-णाहं पुव्वसंसिद्धं पायसभत्तं, कहं एत्थ मंससंभवोत्ति सबुद्धीए निच्छिऊण संतोसमुवहंतेण भुत्तमणेणं, भुंजिऊण

श्रीगुणचंद
महावीरच०
६ प्रस्तावः

॥ १९३ ॥

गओ भगवओ मूलं, ईसिं विहसियं काऊण भणिउं पवत्तो-भयवं ! तुमए चिरं नेमित्तिगत्तणं कयं, नवरि अज्ज विह-
डियं, सिद्धत्थेण भणियं-भइ ! मा ऊसुगो होसु, अवितहम्मह वयणं, जइ पुण न सहहेसि ता उव्वमेसु जेण
पच्चक्खं हवइ, तओ अंगुलिं गलए दाऊण वमियमणेण, दिट्ठा कुवियंमि पायसे मंसकेसाइसुहुमावयवा, तहंसणे य
रुद्धो सो तं धरं मग्गिउमारद्धो तं पुण तेहिं धरं तच्चभएण चेव अन्नओमुहं कयं, सो य तंमि पएसे पुणो पुणो
हिंढमाणो जाव न लहइ ताव भणइ-जइ मम धम्मगुरुणो तवतेयप्पभावो अत्थि ता उज्झउ इमो पएसो, जिण-
माहप्पमवित्तहं कुणमाणेहिं अहासन्निहियवाणमंतरेहिं निद्वहो सबो सो पएसो, भयवंपि कइवय दिणाइं विगमि-
ऊण गंतुं पयट्ठो, संपत्तो हलहुयाभिहाणंमि गामे ।

तस्स बहिया अणेगसाहप्पसाहाभिरामो बहलपत्तपडलपडिखलियतरणिमंडलपभापसरो महाखंधो हलिहगो नाम
तरुवरो, तस्स हेट्ठओ ठिओ भयवं काउस्सग्गेणं, इओ य सावत्थि नयरिं गंतुकामो रयणिंमि आवासिओ तत्थेव
सत्थो, सो य सीयपीडिओ संतो पज्जालिऊण जलणं सुचिरं तप्पिऊण य पभायसमए उट्ठित्ता गओ, जलणोऽवि
जणेण अविज्झविओ निद्वहंतो कमेण पत्तो जिणंतियं, गोसालेण भणियं-भयवं ! नासह एस हुयवहो एइ,

इय निसुणिएऽवि सामी अविचलचित्तो तहेव जावेइ । अह पसरिण सहसा पयकमलं झामियं सिहिणा ॥ १ ॥
गोसीसचंदणंपिव तुसारवरिसं व सिसिरसलिलं व । परिभावंतो तिवं सिहिदाहं सहइ जिणनाहो ॥ २ ॥

गोशाल-
कस्य मांस-
भक्षणं
हरिद्रे
पाददाहः.

॥ १९३ ॥

गोसालोऽवि तहाविहमसमंजसमिक्खिऊण भयभीओ । अइदूरमवकंतो नियजीवियरक्खणट्टाए ॥ ३ ॥

अह उवसंतंमि जलणंमि सामी मंगलाभिहाणे गामे गओ, तहिं च वासुदेवमंदिरे टिओ पडिमाए, गोसालोवि
निलुको एगत्थ पएसे, केवलं केलिकलहाइविणोयाभावेण बाढं दुक्खमणुहवंतो फालचुकोव मकडो दिसीओ अवलो-
एइ, एत्थंतरे कीलानिमित्तमागयाइं तं पएसं गामचेडरूवाइं, तओ ताइं पेच्छिऊण उवलद्धरणनिहाणं व पच्चुजी-
वियं व मण्णमाणो विडंबियवयणकंदरो दूरं निलालियलोलजीहो पसारियवीभच्छच्छिजुयलो धाविओ वेगेण भय-
जणणनिमित्तं तेसिमभिमुहं ॥

अह तं भीसणरूवं दट्ठूणमतक्कियं समुहमितं । गामाभिमुहं भयओ चेडाइं लहु पधावंति ॥ १ ॥

धावंताणं ताणं पक्खलणवसेण केसिमवि जंघा । भज्जइ अत्तेसिं पुण फुट्टइ सीसं टलइ चलणो ॥ २ ॥

इयरेसिं पुण वियलंति देहनद्धाइं भूसणाइंपि । केसिं चिय वत्थाइं निवडंति तदा भयवसेण ॥ ३ ॥

अह तारिसमसमंजसमम्मापियरो पलोइऊणेसिं । रोसेण दोसमूलं गोसालं संपवज्जंति ॥ ४ ॥

रे पाव पिसाय किममहं चेडरूवाइं तमिह भाएसि । इय तज्जिऊण तेहिं कुट्टिज्जइ सो दढं विवसो ॥ ५ ॥

ताहे तं हम्मंतं दट्ठुं वारिंति गामजणबुद्धा । देवज्जगस्स एसो खु नूणं सिस्सो अओ मुयहा ॥ ६ ॥

कहमावे तेहि विमुको गोसालो वागेरइ जिणनाहं । किं मइ हणिज्जमाणे तुम्हाणं जुज्जइ उवेहा ? ॥ ७ ॥

श्रीगुणचंद
महावीरच०
६ प्रस्तावः
॥ १९४ ॥

एत्तियदिणाइं समसोक्खदोक्खसहणेवि नेव पडिबंधो । किं उप्पन्नो तुम्हं? अहो सिलानिद्धुरं हिययं ॥ ८ ॥
सिद्धत्थेणं भणियं-किं रूससि निन्निमित्तमम्हाणं? । अप्पाणमप्पणच्चिय दोसकरं भो निरुंभेसु ॥ ९ ॥
अह उस्सगं पाराविऊण सामी तओऽवि निक्खमिउं । आवत्तनामगामे बलदेवगिहे ठिओ पडिमं ॥ १० ॥
तत्थवि कलहिकरुई गोसालो दारिएक्कवयणेण । पुवाणत्थं विसमरिऊण डिंभाइं भेसेइ ॥ ११ ॥
रुयमाणाइं ताइं गंतुं मायापिऊण साहिति । तेहि पुणोवि हणिज्जइ गोसालो पुवनाएणं ॥ १२ ॥
गामपहाणजणेणं भणियं किं हम्मए मुहा एसो? । एयमनिवारयंतस्स होइ दोसो गुरुस्स इमो ॥ १३ ॥
इय कहिए झत्ति जएक्कचक्खुणो सम्मुहं च ते लोया । उग्गीरियदढदंडा उवट्ठिया ताडणट्ठाए ॥ १४ ॥
एत्थंतरंमि जिणपक्खवाइणा वंतरेण सा पडिमा । लोआण भेसणत्थं नंगलहत्था समुट्ठविया ॥ १५ ॥
ताहे अदिट्ठपुवं पडिमाचलणं पलोइउं झत्ति । भयभीया ते सामिं भूरिपयारेहिं खामिति ॥ १६ ॥
खामिऊण विमुक्को जयगुरु चोरायसन्निवेसं गओ, तत्थ पच्छन्नपएसे पडिमं पडिवन्नो, गोसालोऽवि खुहाए
परिकिलंतो पुच्छइ-भयवं! अज्ज चरियवं न वा?, सिद्धत्थो वागरेइ-अंतरं अम्हं, तओ गोसालो पविट्ठो गाममज्जे
तहिं च गोट्ठीभोयणकएण बहुभक्खभोयणजायं उवक्खडिज्जइ, सो य अत्थिरत्तणेणं केवलं देसकालो भविस्सइत्ति
जाणणट्ठा निहुओ होऊण पुणो पुणो तयभिसुहमवलोयइ, तत्थ य गामे तदियहं महंतं चोरभयं, ताहे गामवासिणो

मंगलावर्त्त-
ग्रामयोः
गोशाल-
कीयं डिभ-
भापनं

॥ १९४ ॥

जणा जाणंति-एस पुणो पुणो पलोएइ, मन्ने चारो चारिओ वा हवेज्जा, ता जइ पुण कहंपि एत्तो पुव्वमोसोवलद्धी जाइज्जत्ति विगप्पिऊण गहिओ तेहिं निस्सट्ठं हणिउमारद्धो, य, पुच्छिज्जमाणो जाव न किंपि जंपेइ ताव मुक्को कुट्टिऊण, तओ सो विलक्खो चित्तेइ-अच्छउ दूरे भोयणसंपत्ती, सरीरस्सवि जं न चुक्को तमच्छरियं वट्ठइ, अहो निकारणदुज्जणाण मील्लो, अहवा किमेएण ?, जइ अत्थि मम पडुणो पभावो ता डज्झउ एएसिं पावाणं मंडवोत्ति भणिए निद्वहो जिणाणुरागिणा वाणमंतरेण, जिणिंदो पहाविओ कलंबुयाभिहाणसन्निवेसाभिमुहं, तत्थ य दो पच्चन्तिया भायरो मेहो कालहत्थी य, सामित्तं कुणंति य, तम्मि पत्थावे कालहत्थी भडचडयरपरियरिओ करयलकलियविविहपहरणो चोराणुमग्गल्लगो जाव केत्तियंपि भूभागं गच्छइ ताव पेच्छइ ससुहमित्तं जिणं गोसालयं च, ते य दट्ठण भणइ-के तुब्भे ?, सामी तुसिणीए जावेइ, गोसालोऽवि केलिपियत्तणेण मोणमवलंबिऊण ठिओ, तओ सो रुद्धो निस्सट्ठं हणिऊण भयवंतं गोसालगं च बंधिऊण महल्लगस्स भाउणो मेहस्स पेसेइ, सो य भयवंतं तहारूवं दट्ठण ससुट्ठिओ बंधणावणयणपुव्वयं पूएइ स्वामेइ थ, तेण किर सामी कुंडग्गामे नयरे सिद्धत्थनरवइणो समीवमुवगएण दिट्ठो आसि, अह तेण मुक्को समानो भयवं ओहीए इमं आभोएइ-अज्जवि वहुं कम्मं निज्जरियव्वं, तं च सहायविरहेण निज्जरित्तं न सक्किज्जइ, ता अत्थारियादिट्ठंतो एत्थ जुत्तो, सो य एवं—

जह फलभरविणमंतग्गसंस्ससभारपूरियं छेत्तं । दट्ठण तस्स सामी सिग्घं गहणं समीहंतो ॥ १ ॥

श्रीगुणचंद
महावीरच०
६ प्रस्तावः

॥ १९५ ॥

एगागि चिय लुणितं अपारयंतो परंपि बहुलोगं । समुचियमुल्लपयाणेण सस्सलुणणे पयट्टेइ ॥ २ ॥
तह मज्झवि चिरभवसंभवस्स कम्मस्स निज्जरणिमित्तं । जुज्जइ अणज्जजणसंगएसु देसेसु विहरेउं ॥ ३ ॥
जं तत्थ अणज्जजणो निक्कारणकोवसंगओ धणियं । उवसग्गणेण काही साहेज्जं कम्मनिज्जरणे ॥ ४ ॥
इय चिंतिऊण नाहो लाढाविसए मिलेच्छजणकिन्ने । गोसालेण समेओ अह निज्जाओ विजियमोहो ॥ ५ ॥
अह तत्थ गयं नाहं हेरियनुद्धीए केइ पाविट्ठा । निट्ठुरमुट्ठिपहारेहिं विहवंति निरणुकंपा ॥ ६ ॥
अन्ने असम्भवयणेहिं तज्जणं हीलणं च कुवंति । अइचंडतुंडसाणेहि पेसणेणं व्हंति परे ॥ ७ ॥
वंतरसुरऽसुरवइजक्खरक्खसपमुहंमि देवसंघाए । बहुमाणपरेऽवि जिणो एगागी सहइ उवसग्गे ॥ ८ ॥
धम्मायरिओ एसोत्ति मज्झ हिययंमि निहियपडिबंधो । पट्ठि ठिउ गोसालोऽवि सामिणो दुक्खमणुहवइ ॥ ९ ॥
अह तत्थ भूरितरकम्मनिज्जरं पाविऊण जिणनाहो । आरियखेत्ताभिमुहं आगच्छइ पुन्नवंछोव ॥ १० ॥
आरियखेत्ताभिमुहंमि तस्स भयवओ पुन्नकलसाभिहाणगामसन्निहिंमि वट्ठमाणस्स दोन्नि चोरा लाढाविसयमुस-
णट्ठा नीहरंता अवसउणोत्तिकाऊण जमजीहासन्निहं खग्गं उग्गिरिऊण धाविया संमुहं, एत्थंतरे पुरंदरो कहिं
जिणो वसइत्ति जाणणट्ठं जाव ओहिं पउंजेइ ताव पेच्छइ थेवेणासंपत्ते आयड्ढियकरवाले चोरे वहनिमित्तं
जिणस्स उवट्ठिए, अह जायतिवकोवावेगेण तेण तहट्ठिएणेव समुत्तुंगगिरिसिहरदलणदुल्लिएण निहया कुल्लिसेणं,

चौराके
गोशालः
कालमेघ-
मीलनं
अअनार्येषु
विहारः.

॥ १९५ ॥

सामीवि गामाणुगामं विहरमाणो गओ भद्विलनयरिं, तत्थ य वासारत्तो पंचमो समुवागओ, तो भयवं विचित्तास-
णाइं कुणमाणो चाउम्मासियं खनणमुवसंपज्जइ, कमेण समइकंते वासारत्ते बाहिं पारित्ता विहरमाणो पत्तो कय-
लिसमागमे गामे, तत्थ य तद्विसमत्थारियाभत्तं जहिच्छं भोयणं पहियकप्पडियार्इण विपणामिज्जइ, गोसालोऽवि तं
दट्ठूण पविट्ठो, सामिं भणइ-एह एत्थ जामो, सिद्धत्थो भणइ-अज्ज अंतरं अम्हाणं, एवं निसामिय गओ गोसालो
अत्थारियाभत्तट्ठाणे, उवविट्ठो भोयणत्थं, परिचेसिउमारद्धं जणेण, सो य बहुयासित्तणेण न पावइ कहिंपि तित्तिं,
ततो गामजणेण महलं भायणं दहिकलवियकूरस्स भरिऊण समप्पियं एयस्स, सोऽवि समग्गमवि तं भोत्तुमपारयंतो
भणइ-एत्तियं न नित्थरिही, तओ पाव ! दुक्कालकवल्लिओव नियभोयणमाणंपि न याणसित्ति भणिऊण रोसेण
खित्तं तं भायणं से मत्थयंमि जणेण, पच्छा उयरं परामुसंतो गओ सो जहागयं ।

पुणोवि जंबूसंडं गाममुवागयस्स जयपहुणो तहेव सो अत्थारियाभत्तमल्लीणो खीरं कूरं च जेमिओ तहेव पज्जंते
जणेण धरिसिओ य, अह सामी अहाणुपुवीए विहरमाणो तंवायनामसन्निवेसं गओ, तस्स बहिया ठिओ पडिमाए,
तत्थ य गामे बहुस्सुया बहुपरिवारा पासजिणसंताणवत्तिणो नंदिसेणा नाम थेरा गच्छचित्तं मोत्तूण मुणिचंद-
सूरिणोव जिणकप्पपरिकम्मं करंति, गोसालो य पविट्ठो गाममज्जे, ते समणे सवत्थकंवलोवगरणे दट्ठूण पुब-
साहुणं पिव खिसं काऊण सामिस्स सयासमेइ, ते य नंदिसेणा थेरा तीए चेव रयणीए चउक्के काउस्सग्गेण निच्चला

श्रीगुणचंद
महावीरच०
६ प्रस्तावः

॥ १९६ ॥

संठिया, पच्छा आरक्खियपुत्तेण इओ तओ परिभमंतेण चोरोत्ति कलिऊण महल्लभल्लएण आहया, त्वेलं चिय समुप्पण्णोहिनाणा मरिउं दिवमुवगया, अहासन्निहियदेवनिवहेहि य तेसिं महिमं कीरमाणिं पासित्ता तं पएसं गओ गोसालो, दिट्ठा य कालगया थेरा, तओ सुहपसुत्ता पडिस्सए गंतूण पडिवोहिया तेसिं सिस्सा, निब्भच्छिऊण साहिओ थेरमरणवइयरो, गओ य सट्ठाणं, जयगुरुवि कुवियसन्निवेसमेइ, तत्थवि चारियत्तिकाऊण गहिओ दंडवासिएहिं, बंधणताडणपमुहकयत्थणाहिं पीडिउमारद्धो य ।

अह जिणनाहे तेहिं वहिज्जमाणे अणे समुल्लावो । जाओ जह देवज्जो अप्पडिमो रूवलच्छीए ॥ १ ॥

कह चारिओत्ति गहिओ किं सोऽवि करेज्ज एरिसं कम्मं । अहवा विचित्तरूवा कम्मगई किं न संभवइ ? ॥ २ ॥

तहविहु इमं सुणिज्जइ जत्थागिति तत्थ निवसइ गुणोहो । ता नूण मूढयाए एए एयं कयत्थंति ॥ ३ ॥

भोगोवभोगहेउं साहूवि विरूवमत्थमायरइ । जो वत्थंपि न वंछइ स चारियत्तं कहं काही ? ॥ ४ ॥

इय लोयपवायं निसुणिऊण विजया तहा पगम्भा य । पासजिणसिस्सिणीओ तक्कालविमुक्कदिक्खाओ ॥ ५ ॥

निवाहत्थं परिवाइयाए वेसं समुवहंतीओ । मा वीरजिणो होहिति संसएणाउलमणाउ ॥ ६ ॥

गच्छंति तहिं दट्ठूण जिणवरं आयरें वंदंति । पच्छाऽऽरक्खिगपुरिसे तज्जंति सुनिट्ठुरगिराए ॥ ७ ॥

रे रे किं न हयासा ! सिद्धत्थनरिंदनंदणं एयं । धम्मवरचक्कवट्ठिं मुंचह ? सिग्घं च खामेह ॥ ८ ॥

वधोद्यत-
चौरघातः
जंबूखंडे
नन्दिषेणाः
कूपिकासं-
निवेशे ग्रहः

॥ १९६ ॥

जइ रे वइयरमेयं सुणइ सुरिंदो कहंपि ता नूणं । तुम्हे सरज्जरट्टे किणासगेहंमि पेसेइ ॥ ९ ॥
 इय भणिए भयभीया भयवंतं ते णमंति विणयनया । खामेंति सदुचरियं निडालतलघडियकरकमला ॥ १० ॥
 अह तेहिं परिमुक्को भयवं वेसालिनयरिमणुसरिउं । चलिओ गच्छंतस्स य जाया विच्चे दुवे मग्गा ॥ ११ ॥
 अह लाढाइसु देसेसु विविहतिवोवसग्गवग्गेणं । पडिभग्गो गोसालो सामिं विन्नविउमाढत्तो ॥ १२ ॥
 एकं पेच्छंतोऽविहु हणिज्जमाणं ममं न रक्खेसि । अन्नं तुहोवसग्गेण एइ मज्झंपि उवसग्गो ॥ १३ ॥
 अवरं पढमं लोगो मं चेव हणइ पच्छओ तुम्हे । भोयणवित्तीवि महाकिलेसओ पइदिणं होइ ॥ १४ ॥
 माणावमाणसमचित्तवित्तिणो सुणणसेवणपरस्स । नायगधम्मोऽवि न तुज्झ कोऽवि पेच्छिज्जइ समीवे ॥ १५ ॥
 जेण-जो सेवगंमि सुहिए नो सुहिओ दुक्खिए य नो दुहिओ । सोक्खाभिकंखिणा नणु सेविज्जइ सोऽवि किं सामी? ॥ १६ ॥
 तम्हा अज्जवि चिरजीवियत्थिणो सोक्खकंखिरमणस्स । एत्तो तुह सेवाए देवज्जय ! मज्झ पज्जत्तं ॥ १७ ॥
 इय कहिए सिद्धत्थो वागरइ करेसु जं तुहावडइ । अम्हाण एरिसच्चिय ववहरणा किमिह तुह भणिमो ? ॥ १८ ॥
 एवं जाए परोप्परुल्लावे सामी वेसालीमग्गेण लग्गो, इयरोऽवि भगवओ निव्वट्टिऊण रायगिहमग्गेण पट्टिओ,
 अंतरा य करिहरिहरिणविरुयवग्घपमुहसत्तसंकुले गयणतलावलंबिदीहरतरुभीसणे निवडिओ महारण्णे, तत्थ य
 चोरवइणा एगंमि महातरुसिहरे पहियजणावलोयणनिमित्तं आरोहिओ नियपुरिसो, तेण य दिट्ठो सो सच्छं-

श्रीगुणचंद
महावीरच०
६ प्रस्तावः

॥ १९७ ॥

दलीलाए आगच्छमाणो, दट्टूण य साहियं चोरवइणो, जहा-एगो नग्गसमणो एइ, तेण भणियं-न हरियच्चमत्थित्ति एस न भाइ, अन्नहा कहं एत्थ अमाणुसाए अडवीए पविसेज्जा?, अहवा एस कोइ दुरायारो अम्हाणं एवंविह-रुवपडिवण्णो मण्णे परिभवं उप्पाएइ, ता एउ अक्खलियगईए जेण अवणेमो से दुवियं, एवं च जंपंताणं समीवमागओ गोसालो, तओ तेहिं दूराओ चिय साहिलासं-एहि माउलग! सागयं तुहत्ति भणिकुण गहिओ करेण, उड्ढाविओ पट्ठिं, मरणभयविदुरेण य उड्ढिया अणेणं, तओ चोराहिवइणा पंचसयचोरसमेएण आरुहिकुण जहकमं वाहिओ सुचिरवेलं, छुहातण्हापरिस्समभिहओ जया कट्टगयजीओ जाओ ताहे मोत्तूण जहाभिमयं गया तक्करा, गोसालोऽवि बाढं सुट्ठियसरीरो भोग्गरपहारजज्जरिउव कुलिसताडिउव विगयचेयणो तरुसंडळायाए सुहुत्तमेत्तं विगमिकुण सिसिरमारुएण उवलद्धचेयणो सोगं करेउमारद्धो, कहं?—

हा दुट्ठु दुट्ठु विहियं हियत्थिणा नट्टबुद्धिणा उ मए । जं सो सामी मुक्को अर्चितमाहप्पपडिहत्थो ॥ १ ॥

निदोसंमिवि नाहे कुवियप्पेहिं मए हयासेण । जा किर कया अवण्णा सा संपइ निवडिया सीसे ॥ २ ॥

तस्स पभावेण पुरा अणेगठाणेसु दुट्ठसीलोऽवि । निवूढोऽहं संपइ तविरहे नत्थि मे जीयं ॥ ३ ॥

अहवा-सहसच्चिय सम्ममर्चितिकुण कीरंति जाइं कज्जाइं । अप्पत्थभोयणं पिय ताइं विरामे दुहावेंति ॥ ४ ॥

मण्णे इभिणच्चिय कहयवेण मं छलिउमिच्छइ कयंतो । कहमन्नहा कुबुद्धी हवेज्ज एयारिसी मज्झ ॥ ५ ॥

गोशालस्य
पृथग्भवनं
चौरोप-
सर्गश्च.

॥ १९७ ॥

ता किं एत्तो सरणं सरेमि ? किं वा गइं पवज्जामि ? । कस्स व पुरओ दुक्खं निवेइउं होमि निच्चित्तो ? ॥ ६ ॥

अहवा कयं विगप्पेहिं नत्थि मम तिहुयणेऽवि साहारो । तं चेव धम्मसूरिं मोत्तुं ता तं निहालेमि ॥ ७ ॥

इय निच्छिऊण कहमवि संसारं पिव सुभीसणमरणं । लंघित्ता गामाइसु हिंडइ सामिं निरुर्वित्तो ॥ ८ ॥

इओ य-भयवं महावीरो अहाणुपुवीए परियडंतो पत्तो विसालसालवलयपरिवेढियाए मयणुम्मत्तरामाभिरामाए वेसालीए नयरीए, तत्थ य बहूणं कम्माराणं साहारणाए सालाए अहासन्निहियजणं अणुजाणावित्ता ठिओ पडि-
माए, अन्नया य एगो कम्मारगो रोगपीडिओ संतो छट्ठमि मासे पगुणसरीरो जाओ समाणो पसत्थे तिहिसुहुत्ते मंगलतूरपुरस्सरं चंदणुकिन्नदेहो हरहासकासकुसुमपंडुरदुकूलनिवसणो सिरे निसियदोवक्खयसरिसवो सयणजणेण अणुगम्ममाणो तमेव कम्मारसालमागओ, पेच्छइ पुरट्ठियं उद्धट्ठाणं पडिवन्नं विगयवत्थं जिणवरं, तं च दट्ठण वियं-
भियपलयकोवानलो पढमं चिय अमंगलरूवो नग्गओ दिट्ठो, ता अमंगलं एयस्स चेव उवणेमिति चिंतिऊण लोह-
घणं घेतुं धाविओ सामिवहणत्थं, एत्थंतरे सुराहिवइणा कहं नाहो विहरइत्ति जाणणनिमित्तं पउत्तो ओही, दिट्ठो एयरूवो वइयरो, तओ नयणनिमेसमेत्तेण आगओ चलंतमणिकुंडलो आखंडलो तं पएसं, नियसत्तीए य निवाडिओ घायगस्स चेव सिरंमि सो घणो, तग्घायाभिहओ य पत्तो पंचत्तमेसो, तओ हरी तिपवाहिणादाणपुव्वयं पणमि-
ऊण जयगुरुं भणिउमाढत्तो—

श्रीगुणचंद
महावीरच०
६ प्रस्तावः
॥ १९८ ॥

निरुवमकलाणकलावकारणं लोयलोयणाणंदं । तं पेच्छिऊण सामिय ! कहमिव पाया पउस्संति ? ॥ १ ॥
तिकरणसुद्धीएविहु जणरक्खं जो समीहए काउं । तस्स तुहोवरि दुट्ठा कह वा बुद्धी पयट्टेजा ? ॥ २ ॥
किं अमयंपिव विसनिव्विसेसबुद्धीए कोऽवि बोहेजा । अहवा विमूढहिययाण होइ एसेव नूण मई ॥ ३ ॥
धुवमम्हाणं देवत्तदिव्वमाहप्पसंपया विहला । जा तुम्हावइविणिवारणेण नो होइ सकयत्था ॥ ४ ॥
निच्छउ सा पट्टभत्तीवि कह व लक्खिज्जए सयण्णेहिं । जाव न निच्चं पासट्ठिएहिं सेविज्जसे तंसि ॥ ५ ॥
इय सुरनाहो सुचिरं उवसग्गकरं जणं सभत्तिं च । दूसित्ता सुदुहत्तो नमिउं अइंसणं पत्तो ॥ ६ ॥
सामीवि विहरमाणो गामांगरसन्निवेसमागओ, तम्मि य विभेलगो नाम जक्खो, सो य पुवभवफासियसम्मत्त-
वसेण समुप्पण्णपरमपमोओ भयवओ पडिमापवणस्स अहिणवपारियायमंजरीपरिमलुम्मिलंतफुलंधयधुसराहिं
हरियंदणरसुम्मिस्सघुसिणघणसारविलेवणेण य पूयं परमायरेणं निव्वत्तेइ, अह पुण को एस विभेलगजक्खो पुवभवे
आसि ?, भण्णइ—

मगहाविसए सिरिपुरे नयरे महासेणो नाम नरवई, तस्स सिरी नाम भज्जा, तीसे य असेसविन्नाणकलाकलाव-
कुसलो सुरसेणो नाम पुत्तो, सो य संपत्तजोवणोऽवि न खिइ चक्खुं पवररूवासुवि रमणीसु, बहुं भणिज्जमा-
णोऽवि न पडिवज्जइ पाणिग्गहणं, किं तु मुणिवरोव संहरियवियारो चित्तपत्तच्छेयाइविणोदेहिं कालं बोलेइ, रायावि

वैशाल्यां
कर्मकारोप-
सर्गः विभे-
लकपूर्व-
भवः

॥ १९८ ॥

एरिसं तं पेच्छिऊणमच्चंतमाउलमाणसो अणेगेसिं मंततंताइजाणगाणं एयवइयरं परिकहेइ, ते य करेंति विविहे उवाए,
न य जायइ कहिंपि कुमारस्स भावपरावत्ती ।

अह अवरवासरंमी बाहिं नगरस्स करिवारूढो । सह परियणेण राया नीहरिओ रायवाडीए ॥ १ ॥

विविहपएसेसु खणं परिभमिउं वाहिउं च करितुरगे । पच्छाहुत्तं इंतो पेच्छइ नयरीजणं सयलं ॥ २ ॥

रहतुरगजाणसिविगापयप्पयारेण सिग्घवेगेण । कयसुंदरनेवत्थं वच्चंतं काणणाभिमुहं ॥ ३ ॥

तं पेच्छिऊण रण्णा पयंपियं रे किमेस पउरजणो । परिमुक्कावरकज्जो वच्चइ एगेण मग्गेण ? ॥ ४ ॥

नो अज्ज जेण कस्सवि महुसवो देवयाविसेसस्स । नडपेच्छणयाईयं कोउगमवि दीसइ न किंपि ॥ ५ ॥

अह परियणेण भणियं तुम्हे नो मुणह देव ! किं एयं । जं एत्थ समोसरिओ सूरी सूरप्पहो नाम ? ॥ ६ ॥

जो तीयाणागयवत्थुविसयसंदेहतिमिरहरणेणं । पुहईए पत्तकित्ती जहत्थनामेण परमप्पा ॥ ७ ॥

जस्स पयपउमधूलीफासेणविवि विहरोगकलियावि । जायंति तक्खणं चिय मयरद्वयसन्निभा पुरिसा ॥ ८ ॥

जस्सेस दंसणेणवि समत्थतित्थोहपूयसलिलं व । विद्धंसियपावरयं पाणिगणो गणइ अप्पाणं ॥ ९ ॥

जे पिउणोऽवि पणामं कुबंति न दुवहेण गवेण । जस्संहिनक्खकिरणा ताणवि सिरसेहरीभूया ॥ १० ॥

सुरिस्स तस्स पयवंदणत्थमेसो पुरीजणो जाइ । तुम्हंपि देव ! जुत्तं पयपंकयदंसणमिमस्स ॥ ११ ॥

श्रीगुणचंद
महावीरच०
६ प्रस्तावः
॥ १९९ ॥

एवं सोचा विम्हवियमाणसो तक्खणेण नरनाहो । उज्जाणस्माभिमुहं वच्चइ कोऊहलाउलिओ ॥ १२ ॥
ता दूराओच्चिय करिवराउ ओयरिय परमभत्तीए । वंदित्ता मुणिनाहं निसीयए धरणिवट्ठंमि ॥ १३ ॥
सूरीवि जोग्गयं से पलोइउं दिव्वनाणनयणेण । गंभीराएँ गिराए एवं भणिउं समाढत्तो ॥ १४ ॥
भो नरवर ! संसारे पढमं चिय दुल्लहो मणुयलंभो । तत्थवि य निरुवयरिया कुलरूवारोग्गसामग्गी ॥ १५ ॥
तीएवि पवरकरितुरयजोहरहनिवहभूरिमंडारं । भयवसनमंतसामंतमंडलं नरवइत्तंपि ॥ १६ ॥
तत्थवि सत्थत्थवियक्खणेहिं अच्चंतभवविरत्तेहिं । कुसलेहिं समं गोद्वी दुलंभा थेवमेत्तंपि ॥ १७ ॥
एयं च तए सयलं संपत्तं पुन्नपगरिसवसेणं । ता एत्तो सविसेसं पाणवहाईण वेरमणे ॥ १८ ॥
नयसेवणंमि सुगुणज्जणंमि करुणाय दुत्थियजणाणं । धम्मत्थविरुद्धविवज्जणे य परलोयचिंताए ॥ १९ ॥
भंगुरभवभावविभावणंमि वेसइयसुहविरागंमि । तुम्हारिसेण नरवर ! पयट्ठियच्चं मणो निच्चं ॥ २० ॥
इय गुरुणा उवइट्ठे नरनाहो पुरजणो य हिट्ठमणो । सच्चं तहत्ति पडिसुणिय पट्ठिओ नियगिहाभिमुहं ॥ २१ ॥
नवरं भूमीनाहो गंतुं थोवंतरं पडिनियत्तो । पुव्वभणियस्स पुत्तस्स वइयरं पुच्छिउं सहसा ॥ २२ ॥
ता एगंते ठाउं वंदिय सूरिं पयंपए एवं । भयवं ! अगोयरं नत्थि किंपि तुह नाणपसरस्स ॥ २३ ॥
ता कहसु मज्झ पुत्तो भणिज्जमाणोवि विविहहेऊहिं । किं कारणं न वंछइ सोउं परिणयणनामंपि ? ॥ २४ ॥

बीमेलक-
पूर्वमवाः
छरसेन-
चरित्रं.

॥ १९९ ॥

किं भवमएण अहवा भूयपिसायाइल्लणदोसेण । धाउवियज्जासेण व कूरग्गहपीडणेणं वा ? ॥ २५ ॥
 गुरुणा भणियं नरवर ! मा संकसु कारणाइं एयाइं । दढपुव्वभवावज्जियमेगं कम्मं विमोत्तूण ॥ २६ ॥
 संजोगविओगुप्पायपलयसुहदुक्खपमुहकिरियासु । सच्चावत्थासुं पिय पभवइ कम्मं चिय जणस्स ॥ २७ ॥
 रणणा भणियं भयवं ! किं पुण एएण पुव्वजम्मंमि । पकयं कम्मं ? साहह महंतमिह कोउगं मज्झ ॥ २८ ॥

सूरिणा पयंपियं-महाराय ! एस तुज्झ पुत्तो पुव्वभवे संखपुरंमि नयरे रुवलायन्नसोहग्गाइगुणसंगओ चारुदत्तो नाम
 वणियसुओ आसि, तेणवि एगया निक्कारणकुवियाए भज्जाए दुव्वयणेहिं तज्जिएण सरोसं पयंपियं-आ पावे ! तहा काहं
 जहा सदुक्खं जीवसि, तीए वुत्तं-जं तुह पिउणो पडिहाइ तं करेज्जासि, तओ सो एगेण नम्मसच्चिवेण सद्धिं कन्नगंतर-
 परिणयणत्थं पयट्ठो गंतुं दक्खिणदिसाए, अविलं वियपयाणएहिं वचंतो पवररामारयणनिहाणभूयाए पत्तो कंची-
 पुरीए, तहिं च पविसमाणेण दिट्ठाइं परोप्परं कीलंताइं डिंभाइं, तेसिं च एगेण डिंभेण सुरहिमालइमाला अन्नस्स
 डिंभस्स कंठे पक्खिविउमारद्धा अन्नस्स निवडिया, तं च दट्ठूण चित्तिं चारुदत्तेण-अहो सोहणो सउणो, परं दूर-
 वगमो, जओ एसा कुसुममाला अन्नत्थ पक्खिविउमारद्धा अन्नत्थ निवडिया, अहवा किमणेण ?, चित्तियत्थसं-
 पत्तीए सयं चेव होही एयावगमोत्ति विभायिऊण पविट्ठो सयणवग्गगेहंमि, कओ तेण ण्हाणविलेवणभोवणप्पया-
 णप्पमुहो से य वावारो, ठिओ यं कइवय वासराइं, पत्थावे य सयणवग्गस्स सिट्ठमणेण निययप्पओयणं, पडि-

श्रीगुणचंद
महावीरच०
६ प्रस्तावः
॥ २०० ॥

सिद्धो य बहुप्पयारं तेण एसो । इओ य तत्थेव पुरे गंगदत्तसेट्ठिणो कन्नगा अप्पडिमरुवजोवणाइगुणकलावकलिया
कणगवईसहीजणपरिवुडा उज्जाणंमि कुसुमावचयं कुणंती सिरिदत्ताभिहाणं वणियजुवाणमवलोइऊण मयणुम्मु-
कसरविसरपहारजज्जरियसरीरा कहकहवि पडिनियत्तिऊण सगेहे निसट्ठं निवडिया सुहसेज्जाए, वाउलत्तं च से मुणि-
ऊण मेलिओ गेहजणो, पुट्ठा सरीरवत्ता, अलद्धपडिवयणेण य तेण कओ तक्कालोचिओ विही, सो य जुयाणो तहं-
सणमेत्तेणवि हरियहियओ तक्कालवियंभमाणमयणजलणजालाकलावकवलियसरीरो कहिंपि रइं अपावमाणो तमेव
कुवलयदलदीहरच्छि चिंतंतो अच्छिउं पवत्तो, नवरं पुच्छिओ एसो एगाए पवाइगाए-वच्छ ! किमेवं सुन्नचक्खुक्खेवो
लक्खिज्जसित्ति, तेण भणियं-भयवइ ! किं कहेमि ?, अवलाएवि हुंतीए विसट्ठकंदोदुदीहरच्छीए । हरियहिययस्स वट्ठइ
विहलं चिय मज्झ पुरिसत्तं ॥ १ ॥ एत्तियमेत्तेणं चिय न ठिया सा छणमयंकविंभमुही । अवहरिउमिच्छइ धुयं संपइ मह
जीवियधंपि ॥ २ ॥ ता एव ठिए भयवइ ! तमुवायं किंपि लहु विचिंतेसु । पसमियमणपरितावो जेणेस जणो सुहं वसइ ॥ ३ ॥
पवाइगाए जंपियं-पुत्त ! फुडक्खरं साहेसु, तओ तेण कहिओ कणगवईदंसणवुत्तंतो, तीए भणियं-पुत्त ! वीसत्थो
होहि, तहा करेमि जहा तीए सह निरंतरं संपओगसुहमणुहवसि, तेण वुत्तं-जइ परं तुह पसाएणंति, भणियावसाणे
गया सा गंगदत्तसिट्ठिणो गिहे, दिट्ठा य सदुक्खेण परियणेण संवाहिज्जमाणसरीरा कणगवई, भणियं चऽणाए—
भो ! किं कारणं सरीरे विहुयत्तणमिमीए ?, परियणेण भणियं-भयवइ ! न मुणेमो, तीए वुत्तं-जइ एवं ता अवसरह,

धूरसेन-
चारुदत्त-
कनकवती-
भवः।

॥ २०० ॥

खणमेकं कुणह विजणं, न होइ सामन्नो एस दोसो, उवेहिजंतो जीवियंपि हरेज्जा, एवमायन्निऊण दिन्नं से परि-
 यणेण आसणं, विजणं च कयं, तओ तीए सुचिरं अइवियडाइं पल्लविऊण महया चित्तरेण कओ मुद्दाविन्नासो,
 पारद्वं मंतसुमरणं, कुसुमकखयखेवेण य पूइयं जोगिणीचकं, मुको हुंकारो, अचंतसमीवे य ठाऊण महामंतोव सिद्धो
 तस्स वणियस्स वुत्तंतो, कणगवईवि झत्ति तं निसामिऊण पच्चुज्जीवियव हरिसभरमुवहंती भणिउं पवत्ता-भयवइ !
 एत्तो तुमं चेव पमाणं, तो तहा कहंपि कुणसु जह निरंतरो तेण सह संजोगो जायइ, तीए वुत्तं-एवं करेमि, अह
 दिन्नतंबोला उट्ठिया एसा, सिद्धो य एस वइयरो तस्स जुवाणस्स, तेणावि पवरवत्थाईहिं उवचरिया एसा, अवर-
 वासेर य तेसिं सिद्धमेयाए, जहा-अज्ज रयणीए जामदुगंमि अइकंतंमि सोहणो मुहुत्तो ता तुम्हेहिवि भगवओ कुसु-
 माउहस्स भवणे गंतवं, विवाहो कायवोत्ति, पडिवन्नं च तेहिं । इओ थ सो चारुदत्तो सयणजणेण दारपरिग्गहाओ
 पडिसिद्धो समाणो असिद्धकज्जोत्ति सोगमुवहंतो तेण सहाइणा समं नीहरिऊण रयणीए सयणघराओ पसुत्तो तंमि
 चेव कुसुमाउहमंदिरंमि, खणं च समागयनिहो पडिबुद्धो समाणो जाव कुसुममालानिमित्तनिष्फलत्तणपमुहं पुव्व-
 इयरं विचितंतो अच्छइ ताव गिहजणेण अवियाणिज्जंती अविमुणियरयणिविभागा अपत्तेऽवि मज्झरत्ते परिणयणाणु-
 रूवोवगरणहत्थाए पच्चाइगाए अणुगया मंदमंदमुक्कचलणा समागया कणगवई, विरइया कुसुमाउहस्स पूया, पच्चा-
 इगाएवि भवणम्भंतरं करेण परामुसंतीए पत्तो चारुदत्तो, पुव्वभणियवणियसंक्रियाए सवणमूले ठाऊण भणिओ-अहो

श्रीगुणचंद
महावीरच०
६ प्रस्तावः

॥ २०१ ॥

किमेवं विलंबेसि?, अवक्रमइ एस पसत्थहत्थलग्गमुहुत्तो, एयं च सोच्चा चारुदत्तेण चिंतियं—मन्ने एसा वराई पुवदिन्नसंकेयपुरिसवुद्धीए मं समुल्लवइ, ता जावऽज्जवि सो न आगच्छइ ताव करेमि कुसुममालासउणं जहत्थयंति चिंतिऊण झडत्ति उट्ठिओ एसो, नीओ तीए कुसुमाउहस्स पुरओ, पाडिओ तच्चरणेसु, गहाविओ कणगवईए सभावपाडलं पाणिपल्लवं, कओ संखेवेण सेसोऽवि तक्कालोचियविही, इय वित्ते विवाहे पणमिऊण कणगवईए विसज्जिया सट्ठाणं पवाइगा, भणिओ य चारुत्तो—अज्जउत्त! उत्तमाणं एसो नो सम्मओ ववहारो, ता कइवय वासराइं जुज्जइ अन्नत्थ निवसिउं, पडिवन्नं चारुदत्तेण, निहरियाइं कुसुमाउहस्स मंदिराओ, नवरं चारुदत्तेण मयण-पायपडणकइययेण पडिनियत्तिऊण तं नम्मसचिवं निम्भरपसुत्तं पवोहिऊण सिट्ठो परिणयणवुत्तंतो, तेण भणियं—चारुदत्त! जइ एवं ता वच्चसु अलक्खियसरूवो चिय तीए सह तुमं, अहं पुण खणंतरं एत्थेव पडिवालिऊण आगमिस्सामि, एवं भणिए चारुदत्तो तच्चयणं पडिवज्जिय तीए समं सभयं नयरहुत्तं गंतुं पवत्तो। इओ य समइकंते रयणीए जामदुगे पत्थावं मुणिऊण सो वणियजुवाणो विवाहसामग्गिं घेत्तूण समागओ तंमि कुसुमाउहमंदिरे, मंदगिराए भणिउं पवत्तो य—भो कणगवइ! एहि संपयं आगओऽहं वट्ठामित्ति, सो य नम्मसचियो केलीकिलत्तणेण इत्थी-भासाए निहुयं पडिवयणं दाऊण ठिओ तदभिमुहो, तेणावि रभसभरवक्खित्तचित्तत्तणेण अविभाविऊण परमत्थं खित्ता से कंठमि कुसुममाला, कंकणबंधपुरस्सरं च कओ पाणिग्गहो, एत्थंतरे य कहकहत्ति पइसंतेण भणियं तेण—भो

धरसेन-
चारुदत्त-
कनकवती-
भवः।

॥ २०१ ॥

भो महाणुभाव ! किं अत्थि एस ववहारो तुह नयरीए जं पुरिसो पुरिसेण परिणिज्जइ, सब्बहा असुयमदिट्ठं च चो-
ज्जमिणंति जंपिऊण पलाणो वेगेणं, इयरोऽवि विलक्खमाणो एवं परिभाविउमाढत्तो—

हे हियय ! हयास तुमं एवंविहवंचणाएँ जोग्गंसि । जं कूडकवडभरियासु पावग ! रमणीसु पत्तियसि ॥ १ ॥

किं एत्तियं पि न मुणसि जं एयाओ विचित्तसीलाओ । नियकुसलयाए सहसा सुरगुरुमवि विप्पयारेंति ॥ २ ॥

तथा—एगेण समं पणयप्पहाणवयणेहिं बहुप्पयंपंति । साणंदचक्खुविक्खेवमेत्तओ अक्खिवंति परं ॥ ३ ॥

अन्नेण समं कीलंति निब्भरं हरियहिययमविरामं । अवरस्स य संकेयं लीलाए चिय पयच्छंति ॥ ४ ॥

इय मूढ ! हियय ! मा तम्म निप्फलं मुणिय वत्थुपरमत्थं । अभिरमसु जहादिट्ठेसु संपयं निययकज्जेसु ॥ ५ ॥

एवं अत्ताणं संठविऊणागओ जहागयं । सो य नम्मसच्चिवो समुग्गच्छंतंमि तरणिमंडले मिलिओ चारुदत्तस्स,
तेणावि से वाहुंमि कंकणं बद्धमवलोइऊण जंपियं—अरे णवपरिणीओव लक्खिज्जसि, ता दंसेहि निययभज्जं, ईसिं
पहसिऊण भणियं तेण—पियमित्त ! तुह पसाएण अहं सयं चिय भज्जा वट्ठामि, चारुदत्तेण कहियं—कहं चिय ?, तओ
तेण सिट्ठो सबो पुव्वुत्तंतो, इमं च सोच्चा मुणियजहट्ठियवइयरा परिचत्तलज्जं हसिउं पवत्ता कणगवई, दिट्ठरूवाइ-
सया य अणुरत्ता चारुदत्तंमि ।

अह परोप्पररूढगाढपेम्माणि ताणि पत्ताणि संखपुरं, पविट्ठाणि य निययगिहं, सुहसागरावगाढाणि य वोलेति

श्रीगुणचंद
महावीरच०
६ प्रस्तावः

॥ २०२ ॥

कालं, सा य पुबभज्जा असमंजसाइं पलवंती निद्धाडाविया कणगवईए, तप्पच्चइयं च वद्धं भोगंतराइयं कम्ममणाए । काल-
क्केमेण य मरिऊण उववन्ना सा तिरिएसु, चारुदत्तोऽवि तप्परिणयणोवट्ठियवणियविसंवायणपरिणामज्जियनिविडभोगं-
तरायपाहिज्जो कालं काऊण पत्तो तिरियत्तणं । एवं च सुचिरं तीए विप्पउत्तो संसारं परियट्ठिऊण सुचरियसुहकम्म-
वसेण भो महाराय! तुह मंदिरंमि जाओ पुत्तत्तणेणं, सावसेसभोगंतरायकम्मवसओ य पुबभवभज्जमपेच्छंतो न वंछइ
अन्नं परिणेउं, एवं सूरिणा कहिए सूरसेणकुमारवुत्तंते राया विम्हियमणो गओ नयरिं । सूरीवि अन्नत्थ विहरिओ ।

सा य कणगवई चिरभवभमणेण जायकम्मलाघवा कुसुमत्थलनयरे जियसत्तुरन्नो उववन्ना धूयत्तणेणं, उचिय-
समए कयं रयणावलित्ति नामं, सा य संपन्नजोवणावि तेण पुबभवपियपरूढपणयवसेण सुरूवंपि रायसुयनिवहमण-
भिलसंती कालं वोलेइ । अन्नया य तं सूरसेणकुमारं रामापरंमुहं सोचा नियधूयं च पुरिसपउसिणिं मुणिऊण चित्तियं
रन्ना-जइ पुण एयाणं परोप्परं विहिणा संजोगो काउं वंछिओ वट्ठइ ता दंसावेमि एयाण परोप्परं पडिरूवाइं, एवंपि
कयाइ समीहियसिद्धी जाएज्जत्ति विभाविऊण लिहाविया रयणावलीरूवाणुगा चित्तपट्टिया, समप्पिया य दूतस्स,
भणिओ य एसो-अरे वच्चसु तुमं महासेणरण्णो समीवे, कहेसु य जहा-अहं जियसत्तुरण्णा तुह सुयस्स निय-
धूयादाणत्थं पेसिओऽम्हिति, पत्थावे य चित्तवट्ठियं दंसिऊण कुमारपडिरूवं च गहाय एज्जाहित्ति, गओ य एसो,
दिट्ठो राया, पत्थावे य कहियं पओयणं, राइणावि भणियं-भो मुणियं मए एयं, केवलं दूरट्ठियाए रायसुयाए रूव-

सूरसेन-
रत्नावली
जन्मादि.

॥ २०२ ॥

मपेच्छमाणो कहमिहट्टिओ कुमारो तीए पणयमुवहेज्जा ?, सा वा अविण्णायकुमारसरूवा सहसच्चिय परिणाविया पच्छा कहं न संतप्पेज्जा ?, ता न जुत्तमेयं । जेण—

मुनिरूविऊण कीरंति जाइं कज्जाइं निउणबुद्धीए । दिवाओ विहडियाणिवि न ताइं लोए हसिज्जंति ॥ १ ॥

एवं भणिए रत्ता तेण उवणीया चित्तफलहिगा, राइणावि समप्पाविया सा कुमारस्स, सो य पुव्वभवपेम्मवसेण तदवलोयणे समुप्पण्हरिसो चिरलद्धावसरकुसुमसररोसनिस्सट्ठाकुंठदुस्सहविसिहकीलिओव निच्चलसरीरो परिचत्त-वावारंतरो थुलमुत्ताहलविन्भमसेयविंदुजालभासुरियभालवट्ठो जाओत्ति, तं च तहाविहं दट्ठूण मुणियमणोगयभा-वेण पासट्ठियजणेण सिट्ठं नरनाहस्स, समुप्पण्हो से परिओसो, कहियं चऽणेण दूयस्स—अरे जाओ तीसे उवरि कुमारस्स पडिबंघो, नवरं रायमुया एयंमि केरिसित्ति मुणियवमियाणिं । जओ—

एगंमि नेहनिन्भरमणंमि अन्नंमि नेहरहियंमि । थीपुरिसाणं भोगा विडंबणामेत्तया होंति ॥ १ ॥

अणुवक्खरियं अकुडिलं परोप्परं छिड्डपेच्छणविमुक्कं । उभओ चिय जं तुलं पेम्मं सलहिज्जइ जयंमि ॥ २ ॥

दूएण भणियं—देव ! सच्चमेयं, ता समप्पेह मम कुमारस्स पडिरूवयं रायमुयाए उवदंसणत्थं, राइणा कहियं—जुत्तमेयं, तओ चित्तफलो आलिहाविऊण कुमाररूवं गओ दूओ, पत्तो कालकमेण जियसत्तुनरिंदसमीवं, पण-मियपायवीढो उवविट्ठो सन्निहियधरणिवट्ठे, पुट्ठो राइणा, जहावुत्तं सिट्ठं च अणेण, तदवसाणे य आकट्ठिऊण दंसिया

श्रीगुणचंद
महावीरच०
६ प्रस्तावः
॥ २०३ ॥

चित्तपट्टिगा, अवलोइया य सायरं रत्ना, चिरं निवन्निऊण पेसिया रयणावलीए, सावि तेण पुवभवपरूढपेम्मवसेण
तं पलोइऊण मयणभल्लिसल्लियहियया समुच्छलियसेयविंदुपिसुणियवियारावि कुमारीजणोचियं लज्जं पमोत्तुमपार-
यंती नियगविगारगोवणत्थं आवद्धकवडभित्तिभीसणं वयणं काऊण भणिउमारद्धा-अहो केणोवणीया एसा चित्त-
पट्टिगा?, चेडीहिं भणियं-सामिणि! ताएण, (तीए भणियं-किमट्ठं?, चेडीहिं) भणियं-तुम्ह दंसणनिमित्तं, तीए
भणियं-किं ममं दंसियाए?, काऽहमेत्थ?, गुरुजणायत्तो कण्णगालोगो हवइ, सच्छंदचारित्तणं तु परमं कुलदूसणं,
ता अलमेयाए इति भणिऊण पविट्ठा भवणभंतरे, निसण्णा सुहसेज्जाए, तग्गया य चिरकाललद्धावसरेणं व सवंगं
गहिया रणरणणं, धाईएव अणुसरिया उकंठाए, चित्तालिहियकुमारावलोयणविरामपरिकोविणं व बाढमालीढा
परितावेण, तओ तत्थट्ठाउमपारयंती कइवयपहाणचेडीपरिवुडा गया पमयवणं, तहिं च अणवरयवहंतजलजंतगंभीरघो-
सघणविन्भमुन्भंतपहिट्ठनीलकंठमणहरारावाडंबरेसु सुरहिमालइकमलपरिमलसुंदरदियंतरेसु वुच्छा खणमेकं कयली-
याहरेसु, भणिया य चेडीओ-हलाओ! वाहरेह सरसनलिणनालाइं विरएह सेज्जं, वाढं दुस्सहा अज्ज मज्झंदिणदिणयरते-
यलच्छी, जं भट्टिदारिया आणवेइत्ति भणिऊण समासणसरसीओ आणीयाइं नलिणीनालाइं कया सेज्जा निवन्ना रयणा-
वली, समारद्धो अन्नेहिं विमलयरसघणसारपमुहेहिं वत्थूहिं सिसिरोवयारो, न य मणागंपि जाया से संतावहाणी। अवि य-
जह जह कीरइ तीसे सीयलवत्थूहिं तणुपडीयारो। तह तह मयणहुयासो हवइ हयासो सहस्सगुणो ॥ १ ॥

विरहा-
वस्था.

॥ २०३ ॥

किं च—उच्चत्तइ परियत्तइ दीहं नीससइ जंपइ न किंपि । थोयजलमज्झलीणा मीणव नरेसरस्स सुया ॥ २ ॥

एवंविहं च उट्ठितं देहदाहं पलोइऊण पुच्छिया चेडीहिं—सामिणि ! किं कारणं जमेवं अज्ज बाढं बाउलसरीरा उवलक्खिजसि ?, किमपत्थभोयणवियारो उयाहु पित्तदोसो अन्नं वा कारणंतरं ?, सव्वहा कहेउ भगवती, जेण सा-हिज्जइ वेज्जस्स, कीरइ समुचियभेसहाइसामग्गी, अणुवेहणिज्जा खलु रोगा सत्तुणो य, रयणावलीए भणियं—न मुणेमि किंपि संपइ विसेसकारणं, चेडीहिं भणियं—सामिणि ! जप्पभिइं तुमए सा चित्तपट्टिगा पलोइया तवेलंचिय जाओ कित्तियओवि सरीरस्स अन्नहा भावो इइ अहे वित्तेगो, निच्छियं पुण सरीरधारणं तुमं जाणेसि । तओ लक्खिय-मेयाहिंति विगप्पिऊण भणियमणाए—हला ! तुब्भे जाणह, तओ ताहिं चित्तियं—जाव अज्जवि विरहेण न बाढं वाहिज्जइ इमा ताव निवेएमो रत्तो, जेण विसमा कज्जगई निट्ठुरा सरा कुसुमाउहस्स सिरीसकुसुमकोमला सरीर-सिरी इमीए, न जाणिज्जइ किंपि हवइत्ति निच्छिऊण कहाविओ एस वइयरो राइणो, तेणावि आहूया रयणावली, सपणयं भणिया य—पुत्ति ! सूरसेणकुमारेण तुमं परिणाविउमहे वंछामो, जुत्तमेयं ?, तीए भणियं—ताओ जाणइ, तओ लक्खिऊण तदभिप्पायं राइणा भणिया नियपहाणपुरिसा—अरे गच्छइ महासेणनरवइणो सयासे, आणेह सूरसेणकुमारं, जेण विवाहो लहुं कीरइ, जं देवो आणवेइत्ति भणिऊण निग्गया पहाणपुरिसा, गंतुमारद्धा, कमेण य पत्ता सिरिपुरं, दिट्ठो राया, निवेइयं पओयणं, नरिंदेणवि पवरमंतिसामंतचाउरंगसेणाणुगओ रयणावलीविवाहनि-

श्रीगुणचंद
महावीरच०
६ प्रस्तावः

॥ २०४ ॥

मित्तं पेसिओ सूरसेणकुमारो, अविलंबियपयाणगेहिं पत्तो सिरिथलनयरसमीवं, निवेइयं जियसत्तुनरिंदस्स कुमारागमणं,
परितुट्ठो एसो, दावियं पियनिवेयगाण पारिओसियं, समाइट्ठा य अणेण नियपुरिसा-अरे मोयावेह बंधणबद्धं जणं
दवावेह अविसेसेण महादाणं सोहावेह रायमग्गे कारावेह हट्ठसोहाओ पयट्ठेह महूसवं सज्जेह मंगलतूरं वायावेह
हरिसुकरिसकारए जमलसंखे, ढोवेह करणुगं जेण निगच्छामो कुमाराभिमुहं, संपाडियं इमं रायसासणं पुरिसेहिं,
निग्गओ राया, दिट्ठो यऽणेण लच्छीसमागमसमूसुओ चेव महुमहणो कुमारो सुरसेणो, दूराच्चिय पणमिओ कुमारेणं,
गाढमालिंकिऊण अभिनंदिओ राइणा, पवेसिओ महाविभूर्इए पुरं, दिट्ठो उच्चियठाणे जन्नावासओ, अन्नंपि संपा-
डियं तक्कालोच्चियं कायधं, कमेण समागओ विवाहदिवसो, तओ कयमज्जणो गहियसुंदराभरणो पवरचारुवारणाधिरूढो
संखकाहलागम्भगंभीरतूरनिग्घोसपूरियदिसामंडलो गहियकणयदंडधयवडुग्घायनरनिवहाणुगओ मंगलपहाणगायं-
तगायणसणाहपेच्छणयसंकुलो पइन्नवरवासधूलिधूसरियमणहरुत्तालनचंतवेसविलओ कुमारो सुरसेणोवि विवाहमं-
डवमागओ, कयं से सासुयाए उच्चियकरणिज्जं, पेसिओ कोउयहरयं, दिट्ठा अणेण पसाहिया विविहवन्नएहिं विभू-
सियंगमंगा पवररयणालंकारेहिं नियंसिया निम्मलखोमजुयलयंति चच्चिया हरिचंदणेणं पडिनद्धा सुरहिसियकुसुमदा-
मेहिं, तं च दट्ठूण पुवभवदढपेम्मदोसेण सहसा वियंमिओ कुमारस्स अणोरपारो पेमपसरो, चित्तिं चऽणेण-अहो नि-
रुवमा रुवसंपया अहो अखंडियपसरं सरीरलावण्णं, असारोवि संसारे एरिसाइं कण्णगारयणाइं दीसंतित्ति पमोयमुव-

द्वयो-
विवाहः.

॥ २०४ ॥

हंतो काराविओ पुंखणगाइकिं, सविसेसं, च पूइया देवगुरुणो, पारदो परमविभूइए हत्थगहो, जाओ राइणो परि-
तोसो, सम्माणिया सामंता, कयत्थीकया तकुयजणा, अभिनंदिया नायरया, भमियाइं चत्तारिवि मंडलाइं, वित्तो
विवाहमहसवो, अनन्नसरिसं च रयणावलीए सह विसयसुहमणुहवंतस्स समइकंता कहवि वासरा । अन्नदियहे य
नरवइमापुच्छिऊण तीए समेओ निययनयराभिमुहं गंतुं पयट्ठो कुमारो, वच्चंतस्स य अंतरा समागओ वसंतसमओ ।
सो य पुण केरिसो?—उद्दामरामाजणमणवियंभंतपंचवाणो महुपरहुयरववित्तासियपहियहियओ कुसुममयरंदबिंदु-
पाणपरवससिलीमुहसंकारमुहरो पप्फुलसहयारेणुधूलीभूसरियसयलदिसामंडलो कुरवयकुसुमामोयहरियमहुपरिय-
गणो सेवणसुहपपुरिहम्मंतपामरो जणचच्चरीतूरमहुरनिग्वोसो तरुसंडमंडवाबद्धहिंडोलयाउलो वीयरगोव अइमुत्त-
याणुगओ लच्छीनाहोव छप्परिंछोलिसामलच्छाओ माणससरोव पाडलापसूयसुंदरो तरुणीजणोव ससिणिद्धलोद्ध-
तिलयपसाहिओ सुमुणिगणुव असोगाणुगओ, अवि य—

गिम्हुणहतावियाइं पल्लपंकुलियंगमंगाइं । गिरिकूडा इव नज्जंति जत्थ वणमहिसजुहाइं ॥ १ ॥

कुडयसिलिंधसिरीसाइविविहतरुकुसुमगंधरमणिज्जो । उज्जइ गंधियहट्ठो व जत्थ वरकाणणाभोगो ॥ २ ॥

रेहंति कुसुमसंचयसमोत्थया जत्थ किंसुयसमूहा । तत्कालपहियपप्फुट्टहिययरुहिरोवलित्तव ॥ ३ ॥

जत्थ य परइयकलरवगीयनिनायं रणंतअलितूरं । पवणेरियतरुपल्लवबाहुलयं नचइव वणं ॥ ४ ॥

श्रीगुणचंद
महावीरच०
६ प्रस्तावः
॥ २०५ ॥

जन्मि य पियंति तरुणा दइयासुहकमललद्धसुहवासं । मइरं मयरद्धयजीवणेकपरमोसहिरसं व ॥ ५ ॥
वेइल्लमउलदसणा कुवलयनयणा मरालरवसदा । उग्गायइव जहियं उउलच्छी कमलवयणेण ॥ ६ ॥
सुमरियपणइणिवग्गं पहियसमूहं विलुत्तचेयन्नं । वउलाण कुणइ गंधो विसपुष्पाणं व पसरंतो ॥ ७ ॥
जन्मि य उच्चा तरुणो वियसियसियकुसुमगुच्छसंछन्नो । तारानियराउलगयणदेसलच्छि विडंबंति ॥ ८ ॥
एवं गुणाभिरामे य पत्ते वसंतसमए सो सूरसेणकुमारो तक्कालदेसंतरागयवणियजणोवणीयपवरतुरंगमाभिरूढो
विसेसुज्जलनेवत्थेण परिगओ जणेण पयट्ठो काणणसिरिं पेच्छिउं, गच्छंतस्स य विवसीभूओ तुरंगमो विवरीयसिक्ख-
त्तेण य जहा जहा वेगपडिखलणत्थं रज्जुमायड्ढइ कुमारो तहा तहा अपत्थसेवाए उइन्नरोगोव वेगेण सो गंतुमा-
रद्धो, दूरपरिसुक्कपरियणो य दुक्कयकम्मुणव निवाडिओ कुमारो एगागी महाडवीए घोडएण, परिस्समकिलंतो य
मओ एसो, कुमारोवि तणहाभिभूयो इओ तओ सलिलमन्नेसिउं पवत्तो, अइगंभीरयाए अडवीए कर्हिचि तमपाव-
माणो निसन्नो सिसिरतरुच्छायाए, चिंतिउमारद्धो य-अहो कुडिला कज्जपरिणई अहो सच्छंदाभिरई दुल्लिओ दइवो,
जं सवहा अपरिचिंतियंपि कज्जं एवमुवदंसेइ, अहवा किमणेण?, सत्तधणो चेव सप्पुरिसजणो द्दोहिति, एवं च
विगप्पमाणो जाव खणंतरं विगमेइ ताव समागओ एगो पुलिंदगो गहियकोदंडो करकलियवाणो तं पएसं, सपणयं
पुच्छिओ य अणेणं, जहा-भइ! को एसप्पएसो? कत्थ वा सलिललाभोत्ति?, तेण भाणेयं-कायंबरीए महाडवीए

सूरसेना-
पहारः.

॥ २०५ ॥

मज्झदेसो एस, सलिलं पुण एत्तो वणसंडाओ केत्तिएणवि भूभागेणं वट्ठइ, केवलं दुट्ठसत्ताउलत्तणेणं न सुहगेज्झं, भो
महाणुभाव ! जइ पिवासिओ ता एहि जेण सयमेव दंसेमि, एवमायन्निऊण पडिवन्नं कुमारेणं, पयट्ठो य तयभिमुहं,
तओ पुलिंदगेण चडावियचावगुणारोवियारोवेण देसिज्जमाणमग्गो पत्तो सरोवरं, कयं जलावगाहणं, अवणीया
तण्हा, अहो णिकारणोवयारी एसोत्ति चिंतिऊण कुमारेण दिन्नं से नामंकियं मुद्दारयणं, परिहियं च अणेण अंगु-
लीए, नीओ य तेण नियगुहाए, काराविओ कयलीफलाइणा पाणचित्तिं, अह परिणयंमि वासरे कुमारेण भणिओ
पुलिंदगो-अहो बाढं कोऊहलं मे बहुअच्छरियनिलयभूया य एसा संभाविज्जइ महाडवी, अहो दंसेसु किंपि अच्छ-
रियनिलयभूयं इमीए पएसंतरं, पुलिंदगेण भणियं-जइ एवं ता एहि दंसेमि, तओ गया एगं वणगहणंतरं, तं च
केरिसं?-एगत्थ रत्तचंदणालिहियमंडलगं निहित्तरत्तकणवीरकुसुमदामदंतुरं अन्नत्थ मंतवाइजणहुणिज्जमाणगुग्गुलु-
लिकागंधुदुयाभिरामं एगत्थ मिलियधाउवाइनिवहधमिज्जंतधाउपाहाणं अन्नत्थ विविहोसहीरससाहिज्जमाणभूइयं
एगत्थ पउमासणनिविट्ठजोगिजणपारद्धमणपरिकम्मणं, एवंविहं च तं दट्ठूण जायपरमविस्सहएण पुच्छिओ सो कुमा-
रेण-भइ ! किं नाम एयस्स पएसस्स ?, तेण भणियं-सिद्धिखेतंति, कुमारेण चिंतियं-अहो नामेणवि मुणिज्जइ एयस्स
महिमासारो, ता निच्छियं तं नत्थि अच्छरियं जमिह न होही, अहो एयं सट्ठाणे पेसिऊण असंभंतो पलोएमि
निहुयदिट्ठीएत्ति विगप्पिऊण भणिओ अणेण पुलिंदो, जहा-भइ ! गच्छसु तुमं गुहाए, अहंपि खणमेकं परिभमिऊण

श्रीगुणचंद
महावीरच०
६ प्रस्तावः
॥ २०६ ॥

विगयकोऊहलो पडिनियत्तिस्सामि, तेण भणियं-अज्ज ! न जुज्जइ निसाए एत्थ निमेसंपि वसिउं, जओ इह पाउम्भ-
वंति पिसाया मिलंति वेयालवंदाइं समुच्छलंति घोरफेकारसहा जायंति छिहपवेसा, अओ अलमतेथावत्थाणणे, कुमा-
रेण भणियं-जइ एवं ता तुमं इहेव निलुको पडिवाडेसु खणंतरं जाव अहं संखेवेण पेक्खिउमागच्छामि, तेण भणियं-जं
भे रोयइत्ति, परं सिग्घं एज्जाहि जेण समइकंता जाममेत्ता रयणी, एवंति पडिव जिऊण कुमारो अइगओ वणमहणम्भं-
तरं, पज्जलंतदिबोसहीपहापसारेण य इओ तओ पलोयंतो पत्तो दूरविभागं, अह एगत्थ माहवीलयाहरे जालाउलं
पज्जलंतं जलणकुंडं पेच्छिऊण सकारणमेयंति जायबुद्धी पहाविओ वेगेण तयभिमुहं, जाव केत्तियंपि भूभागं वच्चइ
ताव निसुणइ साहगविहिवुकमंतसाहगं पडुच्च सकोवं चेडयसुरं समुलवंतं, कहं तं?—

रे मुद्ध ! मरिउकामोऽसि नूण जं मंतसाहणं कुणसि । अविगप्पिऊण पुवं सबुद्धिविभवस्स माहप्पं ॥ १ ॥
किं कोऽवि तए दिट्ठो निसुओ वा साहगो महियलंमि । जो साहणंमि चुक्को मुक्को हि मए जमेणं व ॥ २ ॥
जह इयरदेवमंताण सुमरणं कुणसि तं जहिच्छाए । तह मज्झवि कुणमाणो न भवसि तं निच्छियं एत्तो ॥ ३ ॥
कयमणपरिकम्मेहिं मुणिनाहेहिवि दुसाहणिज्जोऽहं । पायडियकूडकवडो न चेडओ किं सुओ तुमए ? ॥ ४ ॥

इमं च भणिज्जमाणं कुमारेण निसुणिऊण चित्तियं-नूणं फोइ महानुभावो साहणविहिपरिभट्ठो एस चेडएण
निम्भच्छिऊण हणिज्जइ [लग्गो], ता जुत्तं मम एयपरित्ताणंति विगप्पिऊण दाहिणकरेण नीलमणिच्छायं छुरियं

कनकचूड-
मोक्षः.

॥ २०६ ॥

धरेंतो धाविओ तम्मग्गेण, दिट्ठो यऽणेण तवेलं चिय भो भो सुरासुरा परितायह परितायहत्ति भणमाणो
 चलणेसु घेत्तूण चेडगेण उप्पाडिओ सिलायले पच्छाडणनिमित्तं विज्जासाहगो, तओ देवेसु सत्थं न कमइत्ति चिं-
 तिऊण मुक्कपहरणो निवडिओ कुमारो चेडयसुरस्स चलणेसु, विण्णविउमादत्तो-देव! पसीयह पसीयह, परिचयह
 कोवं, मम जीविण रक्खह एयं, को तुम्ह इमिणा सह कोवो?, न हि सुकुद्धोऽवि पंचाणणो पहरह गोमाउयंमि,
 किं तुम्हेवि अहमजणोचियं कम्मं काउमरिहह?, इमं च सोच्चा ईसिं जायपसमो चेडगो समुल्लविउमारद्धो-भो
 कुमार! अविलंघणिज्जोऽसि तुमं, तहावि निसुणेसु एयावराहं, इमिणा हि मम मंताराहणपरेणावि न संमं वट्टिज्जइ,
 कुमारेण भणियं-महावराहकारीवि ममं जीवियमोलेण मोत्तवो, मा कुणसु विहलं देवदंसणप्पवायं, चेडगेण भणियं-
 सुयणु! किं तुमए निरवराहेण विणासिएण?, एसो चेव विणासणिज्जो आसि, परं तुह महाणुभावयाहयहियएण
 पसाउत्तिकाऊण एस परिचत्तोत्ति भणिऊण अक्खयसरीरं चेव मंतसाहगं मोत्तूण अइंसणमुवग ओ चेडओ, सोऽवि
 मरणभयागयमुच्छाभिभूयचेयण्णो अहसन्निहियमंतसाहणत्योवणीयहरिचंदणरसेण समासासिओ कुमारेण, सुहुत्त-
 मेत्तेण य उवलद्धचेयणो पञ्चजीवियं व अप्पाणं परिकर्णितो मंदमंदमवलोइउं पयत्तो, खणंतरे य समुल्लविओ कुमा-
 रेण-भइ! निब्भओ निरुव्विग्गो अच्छसु, दूरमवकंतो तुह कयंतो, कहेसु परमत्थं, को तुमं? किं नामधेओ? कुओ
 वा आगओ? किमियं सुहपसुत्तकेसरिकंदूयणं व विणासपज्जवसाणं मंतसाहणं समारद्धं? कहां वा विहडियं?, जीव-

श्रीगुणचंद
महावीरच०
६ प्रस्तावः
॥ २०७ ॥

दाइत्ति पेमसुवहंतेण भणियमणेण—

सुंदर ! विजाहरो कणयचूडयनामोऽहं गयणवल्लहपुराओ चेडगसाहणं काउमिहागहो म्हि, मंतं च परायत्तयंतस्स मे कहवि भवियव्यावसेण सुप्पणिहियस्सवि विसंखुलियमेक्कमक्खरं, एत्तियमेत्तावराहसंभवेऽवि परिकुविण्ण उप्पाडिओ सिलायले निवाडणत्थमणेणं, तक्कालं भयविहुरेण य न सरियाणि तणुरक्खामंतक्खराणि, तयणंतरं च न सुणेमि किंपि जायं, एत्तियमेत्तं ईसिं जाणामि जं तुमए भणियं-मम जीवियमोह्णेणऽवि मोत्तवो एसत्ति, कुमारेण भणियं-भइ ! के अम्हे ?, नियसुकियदुक्कियाणि चेव सबत्थ सुहदुक्खेसु पभवन्ति जीवाण, कणयचूडेण भणियं-को सहहेज्ज अदिसमाणरूवाइं सुकयदुक्कयाइं । तुमए सजीयदाणेण रक्खमाणेण मह जीयं ॥ १ ॥

कहमिव बहुरयणा नो वसुंधरा ? जत्थ तुम्ह सारिच्छा । परहियकरणेक्कपरा अज्जवि दीसन्ति सप्पुरिसा ॥ २ ॥

जाय चिय नीसेसावि मज्झ नूणं समीहिया सिद्धी । दुल्लंभदंसणो दिट्ठिगोयरं जं गओ तंसि ॥ ३ ॥

अन्नं च-तुह सच्चरिएणवि नामगोत्तमुक्कित्तियं जइवि भुवणे । तहवि सविसेसजाणणकएण तम्मइ महं हिययं ॥ ४ ॥

तओ कुमारेण सुणिऊण तदभिप्पायं साहिओ दुट्ठतुरगावहरणपज्जवसाणो सबो नियवइयो, विजाहरेण भणियं-कुमार ! किमिह मे जीवियप्पयाणत्थमेव तुम्ह आगमणं ?, किं वा कारणंपि आसि ?, कुमारेण भणियं-कोऊहलेण, न पुण अन्नं कारणंतरं, विजाहरेण भणियं-जइ एवं ता कुणह ममाणुग्गहन्ति एह वेयहपवयं, पेच्छइ तत्थ अणे-

उपकार-
कीर्त्तनं.

॥ २०७ ॥

गच्छरियाइं, अणुगिण्हह नियदंसणदाणेण मम कुडुंवयंति, अचंतकोऊहलावलोयणसयण्हेण पडिवन्नं च कुमारेण । तयणंतरं सो कुमारं घेत्तूण उप्पइओ तिमिरूपीलसामलं गयणयलं, निमेसमेत्तेण पत्तो वेयह्मगिरिं, पविट्ठो सभवणं, कया कुमारस्स महई भोयणाइपडिवत्ती ॥ सो य पुलिंदगो तत्थ जाममेत्तं पडिवालिऊण जाव कुमारो नागओ ताव वणनिगुंजेसु सुचिरं पलोइऊण दुहत्तो सगुहाए गओ ॥ कुमारोऽवि कणगचूडेण समेओ वेयह्मगिरिपरिसरेसु सुरहिपारियायतरुमंजरीगंधुदुरेसु विसमगिरितडनिवडंतनिज्झरझंकारमणहरेसु सविलासकिन्नरभिडुणसंगीयसहसुंदरेसु निकुंजदेसोवसोहिएसु विहरिउमारद्धो, अह परिभमंतेण कोऊहलवियसियच्छिणा कुमारेण दिट्ठो एगत्थ सिलायले एक्कचलणावट्ठंभनियमियसयलंगभारो उट्ठसमुक्खित्तोभयभुयाजुयलो ज्ञाणवसनिसियनिचलपयंडमायंडमंडलुम्मुहलोयणप्पसरो निप्पकंपत्तणतुलियकुलाचलो पडिमासंठिओ एगो चारणसमणो, तं च दट्ठूण अंतो वियंभियउद्दामहरिसवसपयट्ठंतपुलयपडलेण कुमारेण भणियो कणगचूडो-भइ! एहि एयस्स महामुणिस्स वंदणेण पक्खलियकलिमलं अत्ताणं करेमोत्ति, विज्जाहरेण संलत्तं-एवं होउ, तओ गया मुणिसमीवे, पणमिओ सविणयं, मुणिणावि जोग्गयं नाऊण पारियं काउस्सगं, उवविट्ठो समुचियट्ठाणे, अज्जवि मूलगुणट्ठाणवत्तिणो एए इति परिभाविऊण भणिया साहुणा-भो महाणुभावा! एयस्स निस्सारसंसारस्स सारमेत्तियं जं वीयरगेहिं करुणापरियरियंतकरणेहिं देसिओ सबजत्तेण कीरइ धम्मो, तस्स पुण मूलं अहिंसा, सा य मज्जमंसनिसिभत्तपरिहारेण जहुत्ता संभवइ, तत्थ

श्रीगुणचंद
महावीरच०
६ प्रस्तावः
॥ २०८ ॥

मज्जं ताव विसिद्धजणपेयवज्झं, अमेज्झरसंपि व परिहरणिज्झं दूरओ, न मणसावि तप्पिवासा कायवा, एयं हि पिज्जमाणं निट्ठावेइ दविणं अवणेइ विसिद्धत्तणं जणेइ उम्मायं संपाडेइ विहलत्तणं दावेइ कज्जहाणिं पयडेइ अत्त-
मम्माणि लज्जावेइ मित्ताइं कलुसेइ बुद्धिपसरं विनडेइ कुलजाइओ भंजावेइ निम्मलं सीलं उप्पाएइ वेरपंपराओ
भंसेइ धम्मकम्माओ संजोएइ अकुलीणजणमेत्तीए अभिगमावेइ अगम्माणि भक्खावेइ अभक्खाणि उवहसा-
वेइ गुरुजणं मइलावेइ सयणवगं बोलावेइ अबोलणिज्जाणि, तहा इमं हि मज्जपाणं मूलं असुइत्तणस्स अवगासो
वेरियाणं पडिबोहो कोहाईणं संकेयट्ठाणं पराभवानं अट्ठाणीमंडवो अणत्थाणं । अविय-

पच्चक्खंपि य दावेइ कलुसभावं जमेत्थ जंतूणं । मज्जस्स तस्स का होज्ज चंगिमा पावमूलस्स ? ॥ १ ॥

वरमुग्गतालपुडभक्खणेण अत्ता विणासमुवणीओ । मा मज्जपाणवत्थाए थेवमित्तंपि संठविओ ॥ २ ॥

एत्तो चिय लोइयसाहुणोऽवि मइरं मुयंति दूरेण । वेयपुराणेसुंपिवि निसिद्धमेअं जओ भणियं ॥ ३ ॥

गौडी पैट्टी तथा माध्वी, विज्ञेया त्रिविधा सुरा । यथैवैका तथा सर्वा, न पातव्या द्विजोत्तमैः ॥ ४ ॥

नारीपुरुषयोर्हन्ता, कन्यादूषकमद्यपौ । एते पातकिनस्तूक्ताः, पञ्चमस्तैः सहाचरन् ॥ ५ ॥

तथा-सुरां पीत्वा तु यो मोहादग्निवर्णो सुरां पिबेत् । तथा सकाये निर्दग्धे, मुच्यते किल्बिषात्ततः ॥ ६ ॥

यस्य कायगतं ब्रह्म, मद्येन प्लाव्यते सकृत् । तस्य व्यपैति ब्राह्मण्यं, शुद्धत्वं च निवच्छति ॥ ७ ॥

वैताल्ये ग-
मनं चार-
णश्रमणो-
पदेशः.

॥ २०८ ॥

इय भो देवाणुपिया ! मज्जं पाउं न जुज्झइ कयावि । सग्गापवग्गसंगमसुहत्थिणो सव्वालं पि ॥ ८ ॥

जहा य किर विसिद्धाणं मज्जमपेज्जं एवं मंसमवि अभक्खणिज्जं । एयं हि—

अवचओ सुहज्झाणस्स पयरिसो अट्टरुहाणं उवसंहारो संपाइमसत्ताणं उप्पत्तिपयं किमियाणं आयंतियजीवा-
(ववा)ओ सच्चावत्थासु हेऊ विसेसरसगिद्धीए कारणं पारद्विकम्मस्स निमित्तं महारोगायंकाणं वीभच्छं पेच्छगच्छीणं
पउणपयवी दुग्गईए जलंजलिदाणं सुहाणुबंधसुहाणुभावस्स, ता को नाम सयन्नो एवंविहदोसनिहाणमिणं मणसावि
समभिलसेज्जा ?, अवि य—

धम्मे सलाहणिज्जं परपीडावज्जणं पयत्तेणं । तं पुण मंसासीणं न घडइ गयणारविंदव ॥ १ ॥

मंसमसारयस्स सरीरयस्स परिपोसणत्थिणो मणुया । भुंजंति परभवेसुं तिक्खदुक्खाइं अगणिता ॥ २ ॥

को नाम किर सयन्नो मोहोत्तियतुच्छसोक्खकज्जेण । अस्संखभवपरंपरदुहरिंछोलिं पवट्टेजा ॥ ३ ॥

लोइयसत्थेवि इमं बहुप्पयारेण भणिइनिवहेण । पयडं चिय पडिसिद्धं अविद्धं जेण भणियमिणं ॥ ४ ॥

हिंसाप्रवर्धकं मांसं, अधर्मस्य च वर्धनम् । दुःखस्योत्पादकं मांसं, तस्मान्मांसं न भक्षयेत् ॥ ५ ॥

स्वमांसं पर मांसेन, यो वर्धयितुमिच्छति । उद्विग्नं लभते वासं, यत्र तत्रोपजायते ॥ ६ ॥

दीक्षितो ब्रह्मचारी वा, यो हि मांसं प्रभक्षयेत् । व्यक्तं स नरकं गच्छेदधर्मः पापपौरुषः ॥ ७ ॥

श्रीगुणचंद
महावीरच०
६ प्रस्तावः
॥ २०९ ॥

आकाशगामिनो विप्राः, पतिता मांसभक्षणात् । विप्राणां पतनं दृष्ट्वा, तस्मान्मांसं न भक्षयेत् ॥ ८ ॥
शुक्रशोणितसंभूतं, यो मांसं खादते नरः । जलेन कुरुते शौचं, हसंते तं हि देवताः ॥ ९ ॥
श्रूयन्ते यानि तीर्थानि, त्रिषु लोकेषु भारत ! । तेषु प्राप्नोति स स्नानं, यो मांसं नैव भक्षयेत् ॥ १० ॥
नाग्निना न च सूर्येण, न जलेनापि मानव ! । मांसस्य भक्षणे शुद्धिः, एष धर्मो युधिष्ठिर ! ॥ ११ ॥
किं लिङ्गवेषग्रहणैः ? किं शिरस्तुंडमुण्डनैः ? । यदि खादन्ति मासानि, सर्वमेव निरर्थकम् ॥ १२ ॥
यथा वनगजः स्नातो, निर्मले सलिलार्णवे । रजसा गुण्डते गात्रं, तद्वन्मांसस्य भक्षणम् ॥ १३ ॥
प्रभासं पुष्करं गङ्गा, कुरुक्षेत्रं सरस्वती । देविका चन्द्रभागा च, सिन्धुश्चैव महानदी ॥ १४ ॥
मलया यमुना चैव, नैमिषं च गया तथा । सरयू कौशिकं चैव, लौहित्यं च महानदम् ॥ १५ ॥
एतैस्तीर्थैर्महर्द्धिक्यैः, कुर्याच्चैवामिषेचनम् । अभक्षणं च मांसस्य, न च तुल्यं युधिष्ठिर ! ॥ १६ ॥
यो दद्यात्काञ्चनं मेरुं, कृत्स्नां चैव वसुन्धराम् । अभक्षणं च मांसस्य, न च तुल्यं युधिष्ठिर ! ॥ १७ ॥
हिरण्यदानं गोदानं भूमिदानं तथैव च अभ० ॥ १८ ॥ कपिलानां सहस्रं तु मासे मांसं गवां ददे । अभ० ॥ १९ ॥
इय लोइयसत्येसुवि परिहरणिज्जत्तणेण निद्धिं । मंसं महाविसंपिव किं पुण लोउत्तरे समए ? ॥ २० ॥
जह मज्जमंसविरई बहुदोसत्तेण होइ कायवा । तह रयणिभोयणंपिवि परिहरणिज्जं सयन्नेहि ॥ २१ ॥

मद्यमांस-
निशाभो-
जनदोषाः,

॥ २०९ ॥

जइविहु फासुगमन्नं कुंथूपणगा तहावि दुप्पस्सा । पच्चक्खनाणिणोवि हु राईभत्तं परिहरंति ॥ २२ ॥
 जइविहु पीवीलिगाई दीसंति पईवजोइउज्जोए । तहवि खलु अणाइन्नं मूलवयविराहणा जेण ॥ २३ ॥
 इय भो देवाणुपिया ! संसारतरुस्स रुंदकंदसमं । मज्जं मंसं निसिभोयणं च नाउं परिच्चयह ॥ २४ ॥
 किं वा मूढा अच्छह नो पेच्छह छिड्डपाणिपुडपडियं । सलिलंपिव विगलंतं पइसमयं चेव नियजीयं ॥ २५ ॥
 केत्तियमेत्तं एयं ? अज्जवि संसारचारगविरत्ता । रज्जंपि विवज्जित्ता पच्चज्जं संपवज्जंति ॥ २६ ॥

एवं च मुणिणा! कहिए कणगचूडो समुट्टिऊण परमं भवविरागमुवहंतो निवडिओ मुणिचलणेसु, भणिउमाढत्तो य-
 भयवं! जाव कुमारं संठावेमि ताव तुम्ह समीवे पच्चज्जापडिवत्तीए करेमि सफलं नियजीवियं, मुणिणा भणियं—एसो
 चिय परिच्छेओ भवपासस्स, अओ जुज्जइ तुम्हारिसाण काउमेयं । एत्थंतरे कुमारोऽवि जायसंवेगो पणामं काऊण
 भणइ—भयवं! ममंपि मज्जमंसनिसिभत्ताणं आमरणंतं देह पच्चक्खाणं, साहुणावि नाऊण जोग्गयं दिन्नं से पच्च-
 क्खाणं, तओ गुरुं वंदिऊण गया सगिहं, पवराभरणाइदाणेण सम्मानिऊण भणिओ कुमारो कणयचूडेण, जहा-
 कुमार! भवविरत्तोऽम्हि, संपयं दिक्खागहणेण विगयपावं अत्ताणं करिस्सामि, अओ तुमं साहेसु जं मए कायवं,
 कुमारेण भणियं—किमहं साहेमि?, दुप्परिहारो तुमं, केवलं चिरकालविसुको गुरुजणो मम दंसणूसुओ कहंपि वट्ट-

श्रीगुणचंद्र
महावीरच०
६ प्रस्तावः

॥ २१० ॥

इत्ति बाढं परितप्पइ मणो, कणयचूडेण भणियं—जइ एवं ता वच्चाओ तत्थ, पडिवन्नं कुमारेण, तओ विमाणमारु-
हिऊण दोवि गंतुं पयट्ठा ।

इओ य तं सेन्नं दुट्ठतुग्गावहरियं कुमारं सुचिरं अरन्ने पलोइऊण कहवि अपत्तवत्तं निराणंदं निरुच्छाहं गयं
सिरिपुरं नयरं, निवेइया नरवइस्स कुमारवत्ता, तओ राया अवहरियसवस्सो इव संतावमुवहंतो परिचत्तणमो-
यणो चाउरंगिणीए सेणाए अणुगम्ममाणो अंतोउरेण दुस्सहदुक्खकंतहिययाए रयणावलीए य समेओ निग्गओ
नयराओ कुमारन्नेसणनिमित्तं, पत्तो य कमेण तं चेव कायंबरीए मज्झदेसं, पेसिया कुमारावलोयणत्थं सवत्थ
पुरिसा, समारद्धा य निरुविउं, अन्नया इओ तओ परिममंतेहिं दिट्ठो सो पुल्लिंदगो, पलोइयं च से अंगुलीए कुमा-
रनामंकियं सुहारयणं, तं च दट्ठूण जइ पुण अणेण विणासिओ होज्ज कुमारोत्ति कुविकप्पकलुसियहियएहिं उव-
णीओ सो नराहिवस्स, तेणावि अणाउलहियएण पुच्छिओ एसो—अहो मुद्ध! मह अवितहं साहेसु कत्तो एस मुहा-
रयणलाभो? कत्थ वा कुमारोत्ति भणिए सो पुल्लिंदगो अदिट्ठपुवं हरिकरिरहभडुब्भडं रायलंछि पेच्छिऊण जाय-
संखोभो अइविअडं खलंतक्खरं कुमारवत्तं कहिउमारद्धो, तओ राइणा भणियं—अरे अवरोप्परविरोहिणा वयणसं-
दम्भेण मुणिज्जइ जहा कुमारो अणेण विणासिओत्ति, कहमन्नहा सुहारयणलाभो हवेजा?, न हि जीवंतस्स भुय-
गाहिवस्स फणारयणं केणा वि धेत्तुं पारिज्जइ?, एवं ठिएवि पंचरत्तं जाव सुसंगोवियं करेह एयं, ण मुणिज्जइ कोउवि

वैराग्यं
कुमारा-
न्वेष्टना च

॥ २१० ॥

परमत्थो, गंभीराइं विहिविलसियाइंति भणिए पुरिसेहिं निगडिओ पुलिंदो, राया हि संदेहदोलाहिरूढो अंसुजल-
पुन्नलोयणो मज्झुभरं रोविउं पवत्तो, अह पसरिया कुमारपंचत्तगमणवत्ता खंधावारे, दूमिया सामंता, विच्छायत्तं
पत्तो पायकजणो, विमणदुम्मणीभूया मंतिणो, हाहारवगम्भं रोविउमारद्धमंतेउरं, चिरं अकंदिऊण सोगभरभारियंगी
निस्सट्ठं निवडिया धरणिवट्ठे रयणावली, समासासिया कहकहवि चेडीचक्कवालेण, एत्थंतरे जाया रयणी, अंजण-
गिरिविम्भमाइं वियंभियाइं तिमिरपडलाइं, एवं च कमेण पत्ते मज्झरत्तसमए रयणावलीए भणिया निययधावी-
अम्मो ! किं एत्तिएवि गए धरियव्वं नियजीवियं मए सहिअवा हीणजणप्फेसणा दट्ठवाइं पियगेहे सामलाइं सयणाण
वयणाइं सुणियवाइं अकारणकुवियखलदुवयणाइं, ता सावियासि तं मए नियजीविण, मा अन्नहा काहिसि, होसु
संपपं सहायणी, पज्जत्तं पेमुब्भवसुहेण जस्स एरिसा गई ॥ अविय—

किंपागतुरुस्स फलं उवभुंजंतं जणेइ पज्जंते । दुक्खं पियजोगो पुण पढमारंभेऽपि विदवइ ॥ १ ॥

करिकन्नविज्जुसुरचावचावलेणं विणिम्भियं मत्ते । पियजणसंगमसोक्खं नूणं विहिणा हयासेण ॥ २ ॥

तेणेव पंडिया परिहरंति पेम्मं अहिं बिलगयं व । जाणंति जेण पियविप्पओगविसवेगमाहप्पं ॥ ३ ॥

अंबधाईए भणियं—पुत्ति ! कस्स कज्जस्स ममं सहायणीं पत्थेसि ?, तीए भणियं—अम्मो ! दुस्सहविरहदुयासण-
परितावियस्स नियजीवियस्स परिचागकएणं, धावीए भणियं—वच्छे ! मा ऊसुगा होसु, अज्जवि न सुणिज्जइ

श्रीगुणचंद
महावीरच०
६ प्रस्तावः

॥ २११ ॥

कोऽवि निच्छओ, पच्छावि सुलभो चेव मरणाभिलासो, तओ रयणावलीए सुणिऊण तीसे निसेहपरं वयणं कयं मोणं, खणंतरेण य दिट्ठिं से वंचिऊण परियणेण अमुणिज्जमाणा निग्गया आवासाओ, पविट्ठा दूरदेसपरिसंठियंमि वणनिगुंजे, जोडियपाणिसंपुडा य भणिउं पवत्ता—

भो काणणदेवीओ ! वयणं मे सुणह मंदपुत्राए । को अन्नो इह ठाणे ? साहिज्जइ जस्स नियकज्जं ॥ १ ॥

एसाऽहं दुहहेउं विरूवलक्खणवएण निम्मविया । परिणयणुत्तरकालंपि जीए जाओ इमो विरहो ॥ २ ॥

एत्तो तुज्झ समक्खं अत्ताणं तरुवरंमि लंबित्ता । मोएमि अजसकालुस्सकलुसिएणं किमेएण ! ॥ ३ ॥

सिरिपुररायतणुन्भव ! तुमंपि दूरट्ठिओऽवि लक्खिज्जा । जह तीए वराईए मम विरहे उज्झिओ अप्पा ॥ ४ ॥

इय भणिऊण संजमिओ केसपासो निविडमापीडिया नियंसणगंठी उत्तरिल्लवत्थेण रइओ तरुसाहाए पासओ आवद्धो नियकंधराए, सुक्को अप्पा, एत्थंतरे सेज्जाए तमपेच्छमाणी अणुमग्गेण धाविया अंबधाई, पत्ता कम्मधम्म-संजोएण तं पएसं, चंदजोणहाए य लंबमाणा दिट्ठा रयणावली, तओ हाहारवं कुणमाणी तक्कालिययं पडियारं काउमस-मत्था लग्गा वाहरिउं—भो भो सुरविंतरखयरा ! परित्तायह परित्तायह, इमंमि इत्थीरवणंमि देह पाणभिव्खं, छिन्नह पासगं, मा अंगीकरेह उवेहाजणियं पावपंकंति । इओ य कणगचूडो सुरसेणकुमारो य पत्ता तं पएसं, सुणिया एसा उग्घोसणा, तओ गयणाओ ओयरिऊण छिन्नो से पासओ संवाहियं अंगं, पुच्छिया य अणेहिं-सुयणु ! को

रत्तावली-
पाशबन्धः.

॥ २११ ॥

एरिसदुरज्झवसायस्स कारणं जाओ?, रयणावलीए चिरं निस्ससिऊण भणियं—दुक्कियकम्माइं, कुमारेण भणियं—त-
 हावि विसेसेण साहेसु, जइ एवं ता सुरसेणकुमारस्स महासेणतणयस्स विरहोत्ति, तओ पच्चभिन्नाया कुमारेण,
 भणिया य—जइ एवं ता पज्जत्तं एत्तो दुरज्झवसाणेणंति वुत्ते जायपच्चभिन्नाणा लज्जावसनिमिलंतलोयणा तुण्हिका
 ठिया रयणावली, मुणियपरमत्थाए ‘सागयं सागयं चिरागयकुमारस्स’त्ति जंपियं धावीए, निवेइओ नरिंदस्सागमण-
 वुत्तंतो य । एत्थंतरे विन्नत्तं विज्जाहरेण—कुमार! पडिपुन्नमणोरहा तुम्हे, ता अणुजाणह ममं सट्ठाणगमणाय संपयं,
 अह तव्विओगकायरमणेण कहकहवि विसज्जिओ सो कुमारेण, गयमेत्तेण य तेण पडिवज्जा भावसारं चारणमुणिस-
 मीवे पच्चज्जा । कुमारोऽवि रयणावलीए समेओ गओ खंधावारं, मिलिओ राइणो, सिट्ठो नियवुत्तंतो, जायं वद्धावणयं,
 मुक्को सम्माणिऊण सो पुलिंदगो, पडिनियत्तो य राया सनयराभिमुहं, पत्तो य कालकमेणं, समप्पिओ कुमारस्स
 सुंदरो पासाओ, तत्थ ठिओ य गमेइ वासरे विविहकीलार्हि । अन्नया य सो पंचत्तमुवागओ महसेणराया, कयाइं
 कुमारेण मयगकिच्चाइं, पडिवण्णं च रज्जं, परिवालेइ रायनीतीए पुहइं । अन्नया य सो कणयचूडो सुमुणियमुणिधम्मो
 अहिगयसुत्तत्थो विहरमाणो समागओ बाहिरुज्जाणे, विन्नायतदागमणो वंदणत्थमागओ सुरसेणनरिंदो, वंदिओ
 अणेण परमभत्तीए, दिन्नासीसो य निविट्ठो गुरुपायमूले, कहिओ साहुणा जिणप्पणीयधम्मो, पडिवुद्धा बहवे
 पाणिणो, धम्मकहावसाणे य मुणिणा पुच्छिओ राया-सम्मं निवहंति चिरगहिया मज्जमंसनिसिभोयणवेरमणरूवा

श्रीगुणचंद
महावीरच०
६ प्रस्तावः
॥ २१२ ॥

अभिगहत्ति, रायणा भणियं-वाढं निवहंति, तओ पुणो समणेण भणिओ राया, जहा-पडिवज्जसु असेसदोसरहियं
जिणनाहं देवबुद्धीए, अंगीकरेसु सम्मत्तं, परिचयसु कुवासणासमुत्थं मिच्छत्तं, एत्तियमेत्तेणचि कएण परमत्थेण कयं
चिय परभवहियं, रायणा भणियं-एवमेवं, पडिवन्नो मए एत्तो जिणधम्मो, जाया तुम्हाणुभावेण मम मिच्छत्तचा-
यबुद्धी, सब्हा कयत्थोकओ तुम्हेहिंति अभिनंदिऊण य गओ जहागयं, मुणीवि कप्पसमत्तीए विहरिओ अन्नत्थ ।
अन्नया राया तहाविहसमुप्पन्नसरीरवेयणो अविसुद्धज्जवसाणवसदूसियसम्मत्तो कालं काऊण उववन्नो जक्खत्तणेण ।
एसा विभेलगजक्खस्स मूलुप्पत्ती ॥

अह महावीरजिणवरो तस्स विभेलगजक्खस्स उज्जाणाओ निक्खमित्ता सालिसीसयनामस्स गामस्स बाहिरु-
ज्जाणे संठिओ पडिमाए, तम्मि य समए माहमासो वट्ठइ, तत्थ कडपूयणा नाम वाणमंतरी, सा य सामिस्स तिवि-
ट्ठुभवे वट्ठमाणस्स विजयवई नाम अंतैउरिया आसि, तया य न सम्मं पडियरियत्ति परं पओसमुवहंती मया समाणी
संसारपरिभमणवससमासाइयमाणुसत्ता बालतवाधारेण पावियवंतरीभवा पडिमोवगयस्स जिणस्स पुब्वेरेण तेयम-
सहमाणा तावसीरुवं विउवइ, तओ वकलनियंसणा लंबंतगुरुजडाभारहिमसीयलसलिलेण सबं सरीरं उल्लिऊण
सामिस्स उवरिं ठिया, अंगाणि धुणिउं पयत्ता, तयणंतंरं च—

हिमकणनिवहुम्मिस्सा अइसिसिरसमीरणेण परिगहिया । लग्गंति जिणंगे सलिलविंदुणो वाणनिवहव ॥ १ ॥

कटपूतनो-
पसर्गः.

॥ २१२ ॥

पइसमयं विहडियजडकडप्पवक्कलगलंतजलकणिया । अंतो विसंति तणुणो जयगुरुणो दुस्सहा धणियं ॥ २ ॥

पयईए चिय माहुब्भवस्स सीयस्स दुस्सहं रूवं । किं पुण परोट्टुदुच्चेट्टवंतरीसत्तिपग्गहियं ॥ ३ ॥

पागयनरस्स तारिससीउब्भववेयणाविणिहयस्स । फुट्टइ देहं निरुवक्कमाउयत्ता ण उण पहुणो ॥ ४ ॥

इय चउजामं रयणिं जिणस्स सीओवसग्गसहिरस्स । सविसेसं संलग्गं धम्मज्झाणं भवुम्महणं ॥ ५ ॥

तओ तदहियासणेण जायंमि विसेसकम्मक्खए वियंभियं ओहिनाणं, सब्बं च लोगं पासिउमारद्धो, पुब्बं पुण गम्भसंभवाओ आरब्भ सुरभवकालमित्तो ओही आसि, एक्कारस य अंगाणि सुयसंपयं होत्था, अह कडपूयणा निप्प-
कंपं भयवंतं वियाणिऊण रयणिविरामंमि पराजिया समाणा उवसंता कयपच्छावाया य भत्तीए पूयं काऊण गया
सट्ठाणं । सामीवि तत्तो निक्खमित्ता भदियं नाम नयरिं छट्ठं वासावासं काउमुवागओ, गोसालगोऽवि मिलिओ छट्ठ-
मासाओ, सामिं दट्ठूण जायहरिसो नमिऊण पायपंकयं पमोयमुवगओ समाणो पुव्वपवाहेण पज्जुवासिउं पवत्तो,
सामीवि तत्थ विचित्ताभिग्गहसणाहं चाउम्मासखमणं काऊण वासारत्तपज्जंते बाहिं पारेत्ता गोसालेण समेओ
मगहाविसए अट्ठ मासे उउबद्धे निरुवसग्गं विहरइ ।

सत्तमं च वासारत्तं काउकामो आलहियं नाम नयरिं एइ । तत्थवि चाउम्मासखमणाणंतरं बाहिं पारेत्ता कंडा-
गनामसन्निवेसमुवागच्छइ, तहिं च उत्तुंगसिहरस्स महुमहणभवणस्स समुचिए एगदेसे ठिओ काउस्सग्गेण सामी,

श्रीगुणचंद
महावीरच०
६ प्रस्तावः

॥ २१३ ॥

गोसालोऽवि जीयरक्खं व जिणनाहमाहप्पमुब्हंतो चिरकालं संलीणयापीडिओ अविगणियपडिभओ दूरपरिचत्तल-
ज्जावलोवो भंडोव महमहपडिमासुहे अहिट्ठाणं दाऊण ठिओ । एत्थंतरे पुप्फपडलगहत्यो धूवकडुच्छुयसमेओ
समागओ देवच्चगो, दूराउ चिय तहट्ठियं दट्ठूण गोसालयं सविम्हयं चित्तियमणेण—

बोलिणो बहुकालो देवमिगं मज्झ पूयमाणस्स । न य दिट्ठो कोइ मए कुणमाणो एरिसं भत्तिं ॥ १ ॥
ता किं होज्ज पिसाओ कोऽवि इमो अहव गहपरिग्गहिओ । धाउविवज्जासवसेण किं नु एवं ठिओ कोऽवि ? ॥ २ ॥
इय भावेंतो जाहे भवणच्चंतरेमुवेइ ताहे सो । समणोत्ति नग्गभावेण लक्खिओ तेण छेएण ॥ ३ ॥
परिचित्तियं चऽणेणं जइ दंडमहं इमस्स काहामि । तो जाणिस्सइ लोगो जह दुट्ठो धम्मिओ एस ॥ ४ ॥
तम्हा गामस्स परिकहेमि सोऽविय सयंपि दट्ठूण । एयस्सुचियं काही किं मम इमिणा अणत्थेण ? ॥ ५ ॥
इय चित्तिऊण सिट्ठं जणस्स तेणावि तत्थ गंतूण । तह चेव ठिओ दिट्ठो गोसालो वासुदेवपुरो ॥ ६ ॥
कुविएण जट्टिसुट्ठीहिं कुट्ठिओ गहिलओत्ति काऊण । मुक्को चिरेण कहवि हु जणेण सो जजरसरीरो ॥ ७ ॥
मुक्कंमि तंमि सामी मट्ठणनामंमि सन्निवेसंमि । गंतुं बलदेवगिहे फासुयदेसे ठिओ पडिमं ॥ ८ ॥
दुस्सिक्खियत्तणेणं गोसालो पुण सुगुंदपडिमाए । लिंगं दाऊण मुहे अपमत्तो अच्छइ सुणिव ॥ ९ ॥
तत्थवि पुव्वपवाहेण गामलोगेण जायकोवेणं । सुचिरं निस्सट्ठं ताडिऊण तो तंमि परिचत्ते ॥ १० ॥

गोशालक-
चेष्टा.

॥ २१३ ॥

पडु सालगाभिहाणे गामे तत्तो विणिकखमेऊणं । सालिवणंमि जिणिंदो धम्मज्झाणं समारुहइ ॥ ११ ॥
 सालज्जानामेणं वंतरदेवी अकारणं कुविया । कुणइ विविहोवसग्गे तत्थेव ठियस्स जयगुरूणो ॥ १२ ॥
 सयमेव परिस्संता जाहे उवसग्गणेण सा पावा । ताहे पूयं काउं जहागयं पडिनियत्तत्ति ॥ १३ ॥
 उवसग्गकारगच्चिय परिस्सममुवहंति चोज्जमिणं । कीरंति जस्स सो पुण कत्थवि नो गणइ जयनाहो ॥ १४ ॥
 अह भुवणतिलयभूए सुविभत्तचउक्कचच्चरावसहे । लोहग्गलंमि नयरे सामी पत्तो विहरमाणो ॥ १५ ॥
 तत्थ य राया दरियारिसूरनिहलणदंतिरासिसिहो । जियसत्तू नामेणं भुवणपसिद्धो समिद्धो य ॥ १६ ॥
 तइया तस्स विरोहो जाओ पंचंतराइणा सद्धिं । ताहे अपुव्वपुरिसो पेहिज्जइ चारपुरिसेहिं ॥ १७ ॥
 दिट्ठो य तेहिं सामिय पुट्ठोऽवि न देइ जाव पडिवयणं । रिउहेरिउत्ति कलिकुण ताव गहिओ विमूढेहिं ॥ १८ ॥
 अत्थाणमंडवत्थस्स राइणो तक्खणं समुवणीओ । अह पुव्वविणिदिट्ठो उप्पलगो पेच्छिउं सामीं ॥ १९ ॥
 हरिसुक्करिससमुट्ठियरोमंचो वंदिकुण भत्तीए । भणइ नरिंदं एसो न होइ भो चारिओ किं तु ॥ २० ॥
 सो एस जेण तइया आवरिसं कणगवारिधारहिं । निव्ववियमत्थि जायगकुटुंबमिच्छाइरित्ताहिं ॥ २१ ॥
 सिरिधम्मचक्कवट्ठी सिद्धत्थमहानरिंदिकुलकेऊ । पव्वज्जं पडिवन्नो सयमेव जिणो महावीरो ॥ २२ ॥
 किं वा सुखयरनरिंदविंदवंदिज्जमाणवरणस्स । एयस्स पुरा तुमए निसामिया नेव कित्तीवि? ॥ २३ ॥

श्रीगुणचंद
महावीरच०
६ प्रस्तावः
॥ २१४ ॥

जइ मम वकं नो सद्देह ता उयह निउणदिट्ठीए । एयस्स चक्कगयकुलिसकलसकमलंकिए पाणी ॥ २४ ॥
इय लद्धनिच्छएणं जियसत्तुनराहिवेण सविसेसं । सकारिऊण मुक्को गोसालेणं सह जिणिंदो ॥ २५ ॥
तओ पुरिमतालंमि नयरे गओ भयवं, ठिओ काउस्सग्गेणं, तत्थ य नयरे धणउच्च समिद्धिसंगओ तोणीरुव
मग्गणगणसाहारो मुणिच्च उभयलोगहियपवित्तिपरो पयइसरलो पयइपियंवओ पयइदक्खिन्नो निम्मलगुणहरिण-
वग्गुरासमो वग्गुरो नाम सेट्ठी, निरुवचरियपेमभायणं भद्दा नाम से भारिया, सा य वंझा, बहूण देवयाणं उवाइय-
सयाणि विविहोसहसयपाणाणि य पुत्तयनिमित्तेण काऊण परिस्संतत्ति । अन्नया सेट्ठिणा सह सिन्निगासमारूढा
सयणजणेण परियरिया विविहभक्खभोयणसमिद्धरसवइसणाहसूयारसमेया महया विच्छेदुणं निग्गया उज्जाणजत्ताए,
पत्ता नाणाविहविहगकुलकलरवमणहरं विचित्तरुवरसुरहिकुसुमपरिमलसुंदरं सगडमुहाभिहाणं उज्जाणं, तहिं च
सुचिरं सरोवरे जलकीलं काऊण पुप्फावचयं कुणमाणो वग्गुरो भद्दा य पेच्छंति जुणं खडहडियसिहरदेसं विह-
डियनिविडसिलासंचयं विणट्ठनट्ठलट्ठयंभसालानियेसं देवकुलं, तं च पेच्छिऊण पविट्ठाइं कोऊहलेण अन्नंतरे,
दिट्ठा य तत्थ सरयससिमुत्तिच्च अच्चंतपसंतसरीरा निराभरणावि भुवणमहग्गयणभूसियच्च सस्सिरीया चिंतामणिच्च
दंसणमेत्तमुणिज्जंतपरममाहप्पाइसया फलिणीदलसामलच्छाया सिरिमल्लिजिणनाहपडिमा, तं च दट्ठूण वियंभिओ
तेसिं भावाइसओ, जाओ य एस अभिप्पाओ—जहा नूणं इमीए पडिमाए जारिसा कलाणुगया रुवलच्छी तारि-

वग्गुर-
श्रेष्ठित्तं.

॥ २१४ ॥

सीए ण हवइ एसा सामन्ना, ता फलियवमियाणिं अम्ह मणोरहपायवेणंति चिंतिऊण एवं थोउमारद्धाई--
 अज्जं विहडियनिविडदुहनिगड पविहाडिय [अज्ज परपवरसुगइ] मंदिरदुवाराई ।
 अज्जं चिय करकमलि लीण, सुहाई संसारसाराई ॥ १ ॥
 अज्जं चिय तिहुयणसिरीहिं, अम्हि पलोइय नाह ! । जं तुह लोयणपहि गयउ, नासियदोसपवाह ॥ २ ॥
 अहह अम्हेहिं तिक्खदुक्खोहसिहितत्तगत्तिहिं, कह नाह ! तुम्ह पयमंडवंतरि ।
 नहनिवहनिम्मलरयणकिरणजालसंछाइयंवरि ॥ ३ ॥
 संपइ लडु निवासु फुडुमरुपहिएहिं व देव ! । जं तुह दिट्ठं सुहकमलु, खालियकम्मवलेव ॥ ४ ॥
 एवं च भत्तिसाराहिं सुसिलिट्ठाहिं मणाणंददायिणीहिं गिराहिं हरिसुप्फुल्लोयणाहिं थोऊण पुणो पुणो नि-
 डालतडताडियधरणिवट्ठाई भणिउमादत्ताई--देव ! जइ एत्तो अम्ह दारगो वा दारिगा वा तुम्ह पसाएण होज्जा
 ता इमं तुह भवणं कणयकलसकलियसिहरं थूरथंभाभिरामविसालसालापरिक्खित्तं कविसीसयसओवसोहियं पवर-
 पागारसंपरिग्गहियं सुसिलिट्ठविजयासुंदरगोयराणुगयं कारवेमो, सयावि तुम्ह भत्तिपरायणाणि य
 होमो, अणवरयं पूयामहिमं च विरएमोत्ति भणिऊण उज्जाणकीलं काऊण गयाणि सगिहं । अह तेसिं भत्तिपगरि-
 सागरिसियहिययाए अहासन्निहियवाणमंतरीए देवयाए अणुभावेण आहूओ भदाए सेट्ठिणीए गम्भो, समुप्पन्नो

श्रीगुणचंद
महावीरच०
६ प्रस्तावः

॥ २१५ ॥

सेट्टिस्स पच्चओ, तओ तद्धिणाओ आरब्भ समारंभियं जिणमंदिरे कम्मंतरं, कओ अकालखेवेण जिन्नुदारो, तिसंझं च सुरहिपंचवन्नकुसुमेहिं निम्मवेइ पूयं, पयट्ठावेइ वरविलासिणीनट्टविहिं, वायावेइ मंजुगुंजंतसुरयसणाहं चउच्चिहा-उज्जं, एवं च कुणमाणस्स वच्चंति वासरा ।

अन्नया य जिणवंदनवडियाए अणिययविहारेण परियडमाणा समागया सूरसेणा नाम सूरिणो, ठिया य सूरि-समुचियपएसे, सुत्तपोरिसीपज्जंते य गया मल्लिजिणाययणं, वंदिया देवा, उवविट्ठा उचियट्ठाणे, काउमारद्धा य भवसत्ताण धम्मदेसणा । एत्थंतरे पूयासामग्गिसणाहो समागओ वग्गुरसेट्ठी, जिणपूयं वंदणं च काऊण अल्लीणो सूरिसयासे, पणमियं चऽणेण से पायपंकयं, दिन्नासीसो य आसीणो महीयले, गुरुणावि तज्जोग्गयाणुसारेण पारद्धा धम्मदेसणा । कहं चिय?—

जिणनाहभुवणकरणं तप्पडिमापूयणं तिसंझं च । दाणंमि य पडिबंधो तिन्निवि पुत्तेहिं लब्भंति ॥ १ ॥

नीसेससोकखतरुवीयमूलमुद्दामदुग्गइकवाडं । कारित्ति मंदिरं जिणवरस्स धन्ना सविभवेणं ॥ २ ॥

तुहिणगिरिसिंगसिंगारहारि जे निम्मवन्ति जिणभवणं । ते कह न लीलाएच्चिय चित्तियमत्थं पसाहिति? ॥ ३ ॥

सामन्नेणवि जिणगेहकारणे को मिणिज्ज पुन्नभरं? । को पुण तम्मिं विहिणा जिन्नंमि समुद्धरिज्जंते ॥ ४ ॥

ता भो महायस! तए नियमा सम्मं समायरियमेयं । सभुयज्जियदवेणं जिन्नुदारो जमेसकओ ॥ ५ ॥

वग्गुर-
श्रेष्ठिवृत्तं.

॥ २१५ ॥

एयंमि अकीरंते तित्थुच्छेओ जिणे अभत्ती य । साहूणमणागमणं भवाणमवोहिलाभो य ॥ ६ ॥
 काराविए इमंमी भवजलनिहितरणजाणवत्तंमि । अब्बंतसंतकंता कारेअवा जिणप्पडिमा ॥ ७ ॥
 तीसे तिसंझमपमत्तमाणसेहिं परेण जत्तेणं । पूया य विरइयवा सा पुण अट्ठपयारेवं ॥ ८ ॥
 वासकुसुमक्खणं धूवपईवेहिं वारिपत्तेहिं । फलभोयणभेएहि य जणनयणाणंदजणगेहिं ॥ ९ ॥
 इय अट्ठविहा पूया कीरंती भत्तीए जिणिंदानं । तं नत्थि नूण कल्लाणमेत्थ जं नो पणामेइ ॥ १० ॥
 तथाहि—हरियंदणघणसारुम्भवेहिं गंधेहिं सुरहिगंधेहिं । सव्वण्णुसिरे निहिएहिं होंति भवा सुरहिदेहा ॥ ११ ॥
 नवमालइकमलकयंबमल्लियापसुहकुसुमदामाहिं । विरयंता जिणपूय धरंति भवा सिवसुहं च ॥ १२ ॥
 नहरुइजलपडिहत्थे जिणपयलेत्ते जमक्खया खित्ता । पसवंति दिवसुहसस्ससंपयं तं किमच्छरियं ॥ १३ ॥
 घणसारागुरुधूवो जयगुरुपुरओ जणेण डज्झंतो । उच्छलियधूमपडलच्छलेण अवणेइ पावं च ॥ १४ ॥
 जे दीवं देंति जिणिंदमंदिरे सुंदराय भत्तीए । ते तिहुयणभुवणम्भंतरेक्कदीवत्तणमुबिंति ॥ १५ ॥
 तिहुअणपडुणो पुरओ ठवेंति जं वारिपुन्नपत्ताइं । तं नूणं पुच्चजियदुहाण सलिलं पयच्छंति ॥ १६ ॥
 परिपागवससमुग्गयविसिट्ठगंधेहिं तरुवरफलेहिं । जिणपूयं कुणमाणा लहंति मणवंछियफलाइं ॥ १७ ॥
 बहुभक्खवंजणाउलओयणचरुपागपसुहवत्थूहिं । धन्ना विरइंति बलिं सुहनिहिउक्खणणहेउत्ति ॥ १८ ॥

श्रीगुणचंद
महावीरच०
६ प्रस्तावः
॥ २१६ ॥

अहवा किमितिणं ? जं किंचिवि अत्थि वत्थु सुपसत्थं । तित्थेसराण तं तं विणिओगे निति कयपुत्ता ॥ १९ ॥
 दाणमवि सुगइसंगमनियाणमनियाणमेव दिज्जंतं । पुत्ताणुबंधिरूवं कल्लाणपरंपरं जणइ ॥ २० ॥
 तं पुण तिविहं भणियं अभयपयाणं च नाणदाणं च । धम्मपवत्ताणं पुण तइयमुवट्ठंभदाणं च ॥ २१ ॥
 तत्थाभयप्पयाणं लोइयलोगुत्तरेसुवि पसिद्धं । सद्धावत्थासुंषिवि अनिसिद्धं सिद्धिरसियाणं ॥ २२ ॥
 करिसणमिव कणरहियं नरनाहंपिव विवेयपरिहीणं । एयविउत्तं धम्मं न कयाइ बुद्धा पसंसंति ॥ २३ ॥
 जं पुण नाणपयाणं दीवोच्च पयासयं तमत्थाणं । भवजलहिपडियजंतूण तारणे दढतरंडसमं ॥ २४ ॥
 उम्मग्गपयट्ठाणं व विसमभिच्छत्तभीमरत्नंमि । सम्मग्गदेसयं सिवपुरीए वरसत्थवाहोच्च ॥ २५ ॥
 तइयं पुण भेसहवत्थपत्तकंबलगपमुहदवेहिं । साहूण धम्मनिरयाण होइ उवट्ठंभकरणेण ॥ २६ ॥
 जं ते महाणुभावा कह दूरविमुक्कसवसावज्जा । सक्कंति तवं काउं आहारार्हण विरहंमि ? ॥ २७ ॥
 एत्तियमेत्तेणं चिय गिहिणो लंघंति गुरुभवसमुहं । उवयोरे जं असणाइएहिं वट्ठंति साहूणं ॥ २८ ॥
 घणसत्थाहिवसेयंसमूलदेवाइणो य जयपयडा । दिट्ठंता निदिट्ठा इत्थं सिद्धंतसुपसिद्धा ॥ २९ ॥
 इय भो देवाणुपिया ! तिन्नि पयत्था मए तुह पसत्था । परिकहिया एएसिं पढमो तुमए सयं विहिओ ॥ ३० ॥
 अन्ने पुण सावगधम्मकुसलबुद्धीहिं जंति काउं जे । सद्धाणनाणसारं ता गिहिधम्मं पवज्जेसु ॥ ३१ ॥

वग्गुर-
श्रेष्ठवृत्तं.

॥ २१६ ॥

इय गुरुणा निदंसिए वत्थुपरमत्थे जायपवरविवेगो पणमिऊण गुरुणो पयपंकयं सेट्ठी वागरिउं पवत्तो-भयवं !
 सुहु वोहिओऽहं तुम्हेहिं, उवदंसेह मे सावगधम्मं, सिक्खवेह जुत्ताजुत्तं, तओ सूरिणा भेयप्पभेयसाहासहस्ससं-
 कुलो सुहफलोहकलिओ कहिओ वित्थरेण गिहिधम्मकप्पहुमो, पडिवन्नो य भावसारमणेण । तप्पभिहं च अट्ठप्प-
 यारजिणपूयारओ मुणिदाणसमुज्जयचित्तो सावगत्तं पालेइ । पसूए पुत्ते सविसेसं धम्मपरिवत्तो जाओत्ति ।

अन्नया सो पंडुरपरिहियपडो कुसुमाइसमग्गसामग्गीसणाहो सयलपरियणसमेओ पयट्ठो मल्लिजिणपडिमापूय-
 णत्थं, इओ य तवेलं भयवंतं महावीरं नगरस्स सगडमुहुज्जाणस्स य अंतरा पडिमं पडिवन्नं ओहीए आभोइत्ता ईसाण-
 सुरनाहो अणेगसुरकोडिपरिमुडो पंचरायरयणविणिम्मियविमाणारूढो आगंतूण तिकखुत्तो आयाहिणपयाहिणपुरस्सरं
 सहरिसं वंदिऊण अन्नोन्नघडियपाणिसंपुडो भयवओ चरियं गायमाणो साभिणो वयणंमि दिन्नदिट्ठी पज्जुवासमाणो
 चिट्ठइ, वग्गुरसेट्ठीवि भयवंतमइकमित्ता चलिओ मल्लिजिणाययणाभिमुहं, तं च वचंतं ईसाणिंदो पासित्ता भणइ-
 भो वग्गुर ! दूरयरदेवा सच्चोवाया हवंति(त्ति) सच्चो कओ तुमए लोयप्पवाओ, जं पच्चक्खं तित्थगरं मोत्तूण पडिमं
 अचिउं वचसि, किं न मुणसि जं एस विसमभवावत्तनिवडंतमुवणत्तयसमुद्धरणवीरो सिरिमहावीरो सयमेव इह चिट्ठ-
 इत्ति ? , तओ सेट्ठी एवं निसामिऊण जायअतुच्छपच्छायावो मिच्छामिदुक्कडंति भणिऊण तिपयाहिणादाणपुवं जिणं
 वंदइ महिमं च करेइ, सुचिरं च पज्जुवासिऊण जहागयं पडिनियत्ते सुरिंदे मल्लिजिणभुवणंमि वचइ ।

श्रीगुणचंद
महावीरच०
६ प्रस्तावः
॥ २१७ ॥

जयगुरुवि तत्तो निक्खमित्ता पट्टिओ तुन्नागसन्निवेसाभिमुहं तस्स य अंतरा तक्कालपरिणियाणि वहुवराणि स-
पडिजुत्तमिति, ताणि पुण दोण्णिवि टप्परकन्नपुडाणि मज्जराणुरूवनयणाणि अइलंबमोट्टपोट्टाणि दीहरकंधराणि
कसिणकुसंठाणसरीराणि अहरसीमासमइकंतदीहरदंताणि, गोसालो पेच्छिऊण जायपरितोसो सहासं भणइ-अहो
भमिओऽहि पउरजणवएसु नियधम्मगुरुपसाएण, एत्तियकालं परियडंतेण एरिसो संजोगो न कत्थवि पलोइओ ।
ता नूणं—

तत्तिलो विहिराया जणेऽइदूरेवि जो जहिं वसइ । जं जस्स होइ सरिसं तं तस्स दुइज्जयं देइ ॥ १ ॥

एवं च पुणो पुणो पुरा ठाऊण समुल्लवितो जाव न कहंपि विरमइ ताव तेहिं बाढं पिट्टिऊण बद्धो पक्खित्तो
य वंसीकुडंगे, तत्थ य उत्ताणो निवडिओ अच्छइ, महया सहेण य वाहरइ, जहा-सामि ! कीस मं उवेक्खइ ?,
एसोऽहं एत्थ वंसकुडंगे निवडिओ वट्टामि, सब्बहा मोअह इमाओ वसणाओत्ति पुणो पुणो उल्लवंतं तं सो सि-
द्धत्थो पडिभणइ-भइ ! सयं कडं सयं चेव भुंजाहि, किं मुहा परितप्पसि ?, सामीवि अदूरदेसं गंतूण करुणाए चिर-
समसुहदुक्खसहणपक्खवाएण तं पडिवालिउमारद्धो, एत्थंतरे तेहिं नायं, जहा-एस कोइ दुट्ठसीलो एयस्स देवज्ज-
गस्स पीढियावाहगो उत्तधारगो वा होही, तेण एस एयं पडिवालेमाणो निच्चलो अच्छइ, ता न जुत्तं एयस्स
घरणंति चिंतिऊण मुक्को गोसालो, मिलिए य तंमि गंतुं पवत्तो जयगुरु । कमेण य पत्तो गोभूमिमि, तत्थ य

भगवतो
वगुरकृता
पूजा दन्तु-
रहासेन
गर्ताक्षेपः
गोशालस्य.

॥ २१७ ॥

सुलभचरणपाणियत्तणेण भावीओ चरंति, तेण सा गोभूमी बुच्चइ । तत्थ य कलहपियत्तणेण गोसालो गोवालए भणइ-अरे मिलिच्छा ! जुगुच्छणिज्जरूवा ! एस मग्गो कहिं वच्चइ ?, गोवेहिं भणियं-अरे पासंडिया ! कीस अम्हे निक्कारणं अक्कोसेसि ?, सो भणइ-दासीपुत्ता ! पसुयपुत्ता ! जइ न मरिसिहिह ता सुद्धअरं अक्कोसिस्सामि, किं अलियमेयं ?, मिच्छजाइया एरिसगा चेव तुम्हे, किं जहट्टियंपि न भणिस्सामि ?, को मे तुम्ह पडिभओत्ति, तओ तेहिं समुप्पन्नगाढकोवेहिं मिलित्ता पणिहमुट्टिलेइहिं विद्वित्ता बद्धो वंसीगहणे य पक्खित्तो, तत्थवि पुव्वनाएण करुणाए पहियजणेण विमोइयंमि गोसाले तिहुअणगुरू रायगिहे नयरे अट्टमवासारत्तं काउमुवसंपज्जइ, विचित्ताभि-ग्गहसणाहं च चाउम्मासखमणं आरंभेइ । तस्स पज्जंते बहिया आहारग्गहणं कुणइ ।

तओ अणिज्जरियं अज्जवि बहं कम्मं अच्छइत्ति चिंतिऊण पुणोऽवि सामी अत्थारियादिट्ठंतं परिभाविंत्तो कम्मनिज्जरणनिमित्तं अचंतपावजणसंगएसु लाढावज्जभूमिसुद्धभूमिनामेसु मिलिच्छदेसेसु गोसालेण समेओ विहरिओ । तत्थ य ते अणारिया कयाइ असुणियधम्मकखरा निरणुकंपा लोहियपाणिणो परमाहम्मियासुरसरूवा भयवंतं विहरमाणं पासित्ता हीलंति निंदंति तहाविहप्पयारेहिं विद्वित्ति, साणादओ य दुट्ठसत्ते सामिस्स अभिमुहं सुयंति । अवि य-

जह पविरेयणतणुतयतच्छणखारोवलेवपामोक्खं । किच्छविगिच्छं विज्जं कुणंतमभिणंदए रोगी ॥ १ ॥

तह जयनाहोवि समग्गमुग्गउवसग्गकारयं लोयं । उवयारिवंधुबुद्धीए बंधुरं पेहइ पहिट्ठो ॥ २ ॥

श्रीगुणचंद
महावीरच०
६ प्रस्तावः
॥ २१८ ॥

जेण दरंगुट्टविकिट्ठमेरुविस्संडुलं धरावट्ठं । हलहलियसत्तकुलसेलसायरं विरइयं सिसुणा ॥ ३ ॥
 सोवि कह अतुलवलसारविकमो निक्खिणेण कम्मेण । कीडप्पायकयावयमहह सहाविज्जइ जिणिंदो ? ॥ ४ ॥ जुम्मं ।
 किंच-जो हरिणा सिद्धत्थो आवयविणिवारणट्ठया मुक्को । गोसालगपच्चुत्तरवेलाए वियंभई सोवि ॥ ५ ॥
 अन्नं च-जइ किर तिलोयरंगे अतुलमल्लोऽवि जिणवरो वीरो । एवंविहावयाओ विसहइ सुपसंतचित्तेण ॥ ६ ॥
 ता कीस थेवमित्तावयारकरुणज्जएऽवि लोयंमि । मुणियजहट्ठियभावा वहंति रोसं महामुणिणो ? ॥ ७ ॥ जुम्मं ।
 अहवा चुन्निज्जइ थेवघायमेत्तेवि सकरालेइ । निट्ठुरकालायसघडियदुघणघाएहिं नवि वइरं ॥ ८ ॥
 अह तिहुयणेकनाहो अणज्जभूमीसु तासु हिंडंतो । पत्ते वासारत्ते नवमेऽनवमासयविहाणे ॥ ९ ॥
 वसहिं च अलभमाणो सुन्नागारेसु रुक्खमूलेसु । धम्मज्झाणाभिरओ वरिसायालं अइकमइ ॥ १० ॥ जुम्मं ।
 वित्ते य तम्मि सामी सिद्धत्थपुरमागओ, तत्तोऽवि कुम्मारगामं संपट्ठिओ, तस्स य अंतरा तिलछित्तसमीवेण
 वोलेमाणो पुच्छिओ गोसालगेण सामी-एस तिलत्थंभो किं निप्फज्जिही नवत्ति?, तओ तहाभवियवयावसेण
 सयमेव भणियं जिणेण-भइ ! निप्फज्जिही, परं सत्तवि पुप्फजीवा उहाएत्ता एयस्स चेव तिलत्थंवस्स एगाए तिल-
 संगलिगाए सत्त तिला समुवज्जिस्संति, एयं च असइहमाणेण अणज्जेण तेण अवक्कमित्ता मूलावणद्धभूमिलेहुसणाहो
 समुप्पाडिओ सो तिलत्थंभो, एगंते उज्झिओ य, एत्थंतरे अहासंनिहियदेवेहिं भयवओ वयणमवितहं कुणमाणेहिं

गोशालकृतो
गोपालक्षेपः
भगवतोऽ-
नार्यदेशे
गमनं.

॥ २१८ ॥

विउधिया घणावली, जायं सलिलवरिसं, समासासिओ तिलयंबओ, तेण पएसेण वेगेण आगच्छमाणीए गावीए सुरेण चंपिय मूलविभागो पविट्टो जलसेयसुकुमारे धरणिवट्टे, जाओ दढपइट्ठाणो, कमेण परूढाईं मूलाईं, उम्मीलियाईं कंदलाईं, पयट्टो फुल्लिउंति । भयवं पुण कुम्मारगामनगरं संपत्तो, तस्स बाहिं सुरमंडलस्सुवरिं निहियदिट्ठी उट्ठी-कयभुयपरिहो दीहरजडाकडप्पो पयइविणीओ पयइपसमपरो पयइदयादक्खिण्णाणुगओ समारद्धसद्धम्मज्झाणविहाणो वेसियायणो नाम लोइयतवस्सी मज्झंदिणसमयंसि आयावेइ । तस्स य उप्पत्ती भन्नइ—

मगहाविसए धणधन्नसमिद्धलोभ्यकलिए गोन्वरगामे आभीरलोयाणं अहिवई गोसंखीनाम कुहुंविओ, बंधुमई नाम से भज्जा, सा य अवियाउरी, ताणि य परोप्परं दढसिणेहाणुरायाणि विसयसुहमणुहवंताणि कालं वोलेति, इओ य तस्स गामस्स अदूरे खेडयं नाम संनिवेशो, तत्थ य अविगप्पिया सन्नद्धवद्धकवया पउरपहरणसणाहा मिलेच्छाण धाडी पडिया, तीए य सो गामो निवाडियारक्खिगजणो लुंदिघणधन्नकंसदूसो विणिहयपहरणहत्यसुहडसत्यो कओ, तओ बंदिग्गहेण लोगं गहिऊण पट्टिया सट्ठाणं, एगा य गामइत्थिया तवेले पसूया पइंमि मारिए करक-लियवालया सुरूवत्तिकाऊण चालिया चोरोहिं, सा य चेडवावडकरत्तणेण न पारेइ सिग्गवईए समागतुं, तओ तेहिं सरोसं भणिया—भदे ! परिचयसु सुयं जइ चिरजीवियत्थिणी, इमं च सुणिऊण अइगरुययाए मरणभयस्स परिचत्तो तीए सुओ तरुच्छामाए, गया य चोरोहिं समं, सो य गोसंखिओ गोरुवाइं घेतूण पहायसमए समागओ तं पएसं,

श्रीगुणचंद
महावीरच०
६ प्रस्तावः

॥ २१९ ॥

दिट्ठो य सो रुक्खच्छायाए पडिपुन्नसवंगोवंगो सस्सिसरीओ अक्खयसरीरो बालओ, गहिओ य तेणं, पणामिओ नियमज्जाए, भणिया य एसा-पिए ! एस तुह अपुत्ताए पुत्तो होही, सम्मं रक्खिज्जाहि, गोसे य पगासियं जहा मम महिला गूढगम्भा आसि, सा य संपयं पसूया, दारगो से जाओ, एयस्स चेव अत्थस्स निच्छयनिमित्तं छगलकं वा-वाइत्ता लोहियगंधो कओ, सा य सूइयनेवत्थेण ठाविया, वद्धावणयं च विहियं, सम्माणिओ सयणवग्गो, पसारिया लोयम्मि वत्ता, निवत्तियाइं छट्ठीजागरणचंदसूरदंसणियमुहाइं किचाइं, समुचियसमए ठवियं वेसियायणोत्ति नामं, कालकमेण य पत्तो जुवणं, सावि से जणणी चंपाए नयरीए नेऊण चोरोहिं विक्रयनिमित्तं ओड्डिया रायमग्गे, सुरू-वत्तिकाऊण गहिया थेरीए वेसाए, सिक्खाविया गणियाण वेज्जं । अविय—

सुरविलयन्महियविसिट्ठरूवसोहग्गपवरलायन्ना । सुरयप्पवंचकुसला वियक्खणा गेयनट्टेसु ॥ १ ॥

उवयारभणियपरिचत्तबोहसमयाणुरूवचेट्ठासु । पत्तट्ठा सा जाया लद्धपसिद्धी य नयरीए ॥ २ ॥

दंसणमेत्तेणं चिय जणस्स पुवं जणेइ विक्खेवं । किं पुण उन्मडसिंगारसारनेवत्थरूइरा सा ? ॥ ३ ॥

इओ य सो वेसियायणो अत्थोवज्जणनिमित्तं करेइ विविहवाणिज्जाइं, अन्नया य घयस्स सगडिं भरिऊण वयं-सएहिं समेओ गओ चंपानयरिं, तम्मि य समए समारद्धो पुरे महुसवो, पवराभरणरूइरदेहा नियंसियपहाणपट्ठणु-ग्गयचीरंसुयाइवत्था जहिच्छं तियचउकचच्चरेसु रामाजणेण परिगया विलसंति नायरा, ते य दट्ठूण चित्तियमणेण-

तिलस्तम्बः
वैश्यायना-
धिकारः.

॥ २१९ ॥

अहो एए एवं विलसंति, अहंपि न कीस रमेमि?, ममावि अत्थि केत्तियमेत्तावि अत्थसंपया, किं वा इमीएरक्खि-
याए?, धम्मट्ठाणदाणभोगोवभोगफलं हि पसंसिज्जइ धणं । जेण भणियं—

दानं भोगो नाशस्तिस्सो गतयो भवन्ति वित्तस्य । यो न ददाति न भुङ्के तस्य तृतीया गतिर्भवति ॥ १ ॥

दैवात्कथमपि जाते सति विभवे यस्य नैव भोगेच्छा । दाने च न प्रवृत्तिः स भवति धनपालको मूर्खः ॥ २ ॥

इति परिभाविऊण कओ अणेण सिंगारो, परिहियाइं पहाणवत्थाइं, गओ पेच्छणगे, दिट्ठा य वेसाजणमज्झ-
गया सच्चिय पुव्वमाया, जाओ तीए उवरिमणुरागो, वियंभिओ से पंचबाणोऽवि सहस्संबाणोव मयरद्धओ, सम-
प्पियं तंबोलदाणपुव्वगं से गहणगं, रयणिसमए घणसारुम्मिस्सचंदणरसविलित्तगतो केसपासविणिम्मियकुसुमदामो
गहियतंबोलवीडओ पयट्ठो तीसे गिहाभिमुहं, एत्थंतरे तत्स कुलदेवया चिंतेइ—अहो अमुणमाणो परमत्थं अकज्जमा-
यरिउं लग्गो एस वरागो, ता संबोहेमिच्छि विभाविऊण अंतरा सवच्छगाविरुवं विउव्वित्ता ठिया, वेसियायणस्सवि
सिग्घं गच्छमाणस्स लित्तो अमेज्झेण चलणो, जाया से आसंका जहा असुइत्ति, तओ अन्नं विसोहगं किंपि अपाव-
माणेण तेण तीसे चेव गावीए सन्निहंमि निविट्ठस्स वच्छस्स पट्टीए पारद्धं चलणलूहणं,

तयणंतरं स वच्छो माणुसभासाए पडिभणइ गाविं । अम्मो! पेच्छसु एयं विगयासंकं ममंगंमि ॥ १ ॥

मिज्झविलित्तं चलणं लूहन्तं चत्तधम्मववहारं । किं कोइ कुणइ कइयावि सुरहिसुए एरिसं हीलं? ॥२॥ जुम्मं ।

श्रीगुणचंद
महावीरच०
६ प्रस्तावः

॥ २२० ॥

गावी वागरइ तओ पुत्तय ! मा वहसु अद्धिइं किंपि । अहधम्मववहारा बाहिरो वट्टए एसो ॥ ३ ॥
वच्छेण भणियमम्मे ! कहमेवं ? , पुत्त ! कित्तियं कहिमो ? । नियजणणीएवि समं जो वासं वंछइ अणज्जो ॥ ४ ॥
ता वच्छ ! सहसु सवं तं धन्नो एत्तिएण जं मुक्को । उज्झियनियमज्जाया किमकज्जं जं न कुवंति ? ॥ ५ ॥
तावच्चिय तत्तरुइं तावच्चिय धम्मकम्मपडिबंघो । लोयाववायभीरुत्तणं च तावेव विप्फुरइ ॥ ६ ॥
तावज्जवि न विणस्सइ लज्जा जणणी गुणाण सयलणं । अह साविकहवि नट्ठा ता नट्ठा कुसलचेट्ठावि ॥ ७ ॥ जुम्मं ।
इय सुरहिं साभिप्पायवयणसंदोहमुल्लवेमाणिं वच्छस्स पुरो दट्ठुं सो सहसा संकिओ हियए, चित्तिउमारद्धो य-
अहो पडमं ताव इमंपि महअच्छरियं जं तिरिच्छजोणिया होऊण माणुसियाए भासाए संलवइ, तत्थवि नियमाया-
भिगमलक्खणं दूसणं मे दसेइ, कहमेवं संभवइ ? , कत्थमम माया ? कत्थ अहं ? कहं संवासो ? , सवं अच्चंतमघडंत-
मेयं, अहवा होयवमेत्थ कारणेणं, चित्तरूवाइं विहिणो विलसियाइं, संभवइ सवं, अओ पुच्छिस्सामि तं चेव
वेसाविलयं उट्ठाणवडियंतिभाविऊण गओ तीसे घरं, अब्भुट्ठिओ अणाए दावियं आसणं पक्खालिया चरणा ठियाइं
खणंतरं अवरोप्परुल्लावेण, अह पत्थावसुवल्लभ पुच्छिया सा अणेण-भदे ! साहेसु कत्थ तुम्ह उप्पत्ती ? , तीए
सहासं भणियं-जत्थ एत्तियजणस्स, तेण भणियं-अलाहि परिहासेण, अहं सकज्जं पुच्छामि, तीए भणियं-मुद्धो-
ऽसि तुमं, जेण-

मातुः संग-
मः गोव-
त्सोल्लापः.

॥ २२० ॥

नरह नरिंदह रिसिकुलह वरकामिणिकमलार्हि । अतुग्गमणु न पुच्छियइ कओ कुसलत्तणु ताह ? ॥ १ ॥

पंकात्तामरसं शशाङ्कमुदधेरिन्दीवरं गोमयात्, काष्ठादभिरहेः फणादपि मणिर्गोपिततो रोचना ।

कौशेयं कृमितः सुवर्णमुपलाद्वापि गोलोमतः, प्राकाश्यं स्वगुणोदयेन गुणिनो गच्छन्ति किं जन्मना ? ॥ २ ॥

अओ किं तुह एणंति भणिऊण हावभावरूवं महिलाविब्भमं दंसिउमारद्धा, ताहे तेण भणियं-अन्नंपि एत्तिंयं मोलं दलयिस्सामि साहेहि मे सन्भावं, अइगरुयसवइसावियाऽसि तं, मा अलियमुल्लविस्ससित्ति भणिए जहा-
वित्तं मूलाओ आरब्भ सव्वं सिट्ठमेयाए, तहावित्तंतनिसामणेण य जाया से आसंका, जइ पुण एयाए जो तरुच्छा-
याए छड्डिओ सो अहं चेव होजा, एवं च सुरहिवयणंपि घडेजा, इमं च परिभाविऊण दुगुणमत्थपयाणं काऊण
पडिनियत्तो जाव तत्थप्पएसे सव्वच्छं सुरभिं निज्झाएइ ताव न किंपि पेच्छइ, तओ नायमणेणं-नूणं अहं केणइ
देवयाविसेसेण इयवइयरेण अकज्जमायरंतो नियत्तिओऽमि । अहं सगर्हिं घेचूण गओ नियगामं, उचियपत्थावे
अम्मापियरो उट्ठाणपारियावणियं अत्तणो पुच्छिउमारद्धो, ताणि य कहेंति-पुत्त ! अहं कुच्छिसंभूओऽसि तुमं,
मा अन्नहा विकप्पेसु, को परडिंभरूवाइं परिवालेइ ?, तओ सो गाढनिब्बंधेण ताव अणसिओ ठिओ जाव से तेहिं
कहियं, जाओ तस्सं जणणिसि निच्छओ, गयो य चंपानयरिं, साहिओ तीसे गणियाए वुत्तंतो, जहाऽहं
सो तुह पुत्तो जो तरुमूले उज्झिओत्ति । तओ सा एवमायन्निऊण सुमरियपुव्ववइयस विरहदुक्खेण अकज्जपवित्ति-

श्रीगुणचंद
महावीरच०
६ प्रस्तावः

॥ २२१ ॥

पारंभसमुलवियसवियारवयणविलिएण बाढमन्माहया समाणा उत्तरिजेण वयणकमलमवगुंठिऊण दीहरुम्मुकपो-
कारं रोइऊण विलविउं पवत्ता । कहं चिय ?—

हा पाव दइव निग्घिण निलजाणज्ज ! मुक्कमज्जाय ! । किं अन्नो तुह नाही विडंबणाडंबरपवंचे ? ॥ १ ॥
जं कुलविलयामलिणत्तकारिणा उभयलोगदुट्टेण । वेसाभावे विणिम्मियऽम्हि सुकुलप्पसूयावि ॥ २ ॥
तत्थवि न ठिओ तं एत्तिएण घडिअम्हि नियसुएणावि । हा हा गरुयमकज्जं सत्थेसुवि सुम्मइ न एवं ॥ ३ ॥
जइ पुवं चिय पावेहिं तेहिं चोरेहिं विणिहया हुंता । ता किं असच्चमविगोवणिज्जमिममज्ज पेच्छेज्जा ? ॥ ४ ॥
किं कूवयपक्खेवेण अहव उलंबणेण साहेमि । सासनिरोहेण वा लहुं समुज्झामि अत्ताणं ॥ ५ ॥
एवं चिय मेरुगिरिंदविन्भमाओ इमाओ दुक्खाओ । पावाए मज्झ नूणं होही संपइ परित्ताणं ॥ ६ ॥
इय दुस्सहदुहकरवत्तगाढफालिज्जमाणहियया सा । अइसुचिरं विलवित्ता निमीलियच्छी गया मुच्छं ॥ ७ ॥

तारिसं च दट्ठूण वेसियायणेण सित्ता सीयलसलिलेण वीजिया दुगुलंचलेण संवाहिया पासवत्तिणा चेडीजणेण,
कह कहवि लद्धचेयणा संभासिया अणेण—अम्मो ! कीस तावसंभारमुवहसि ?, को एत्थ तुज्झावराहो ?, एसो
च्चिय सच्छंदाणिबद्धघडणविहडणरसिगो दइवो एत्थावरज्झइ जो विविहसंधिहाणगनेवत्थेहिं नडं व विवसं माणुसं
विनडेइ, अच्चंतविरुद्धमवि वत्थुं कारवेइ, अगम्मेणवि सह संगमं संपाडेइ, ता उज्झसु संतावं पडिवज्जसु धीरत्तणं

वैश्यायन-
मातुर्वैश्या-
तो मोक्षः.

॥ २२१ ॥

होसु निवडियसहा, तीए भणियं—पुत्त ! वाढं असहणिज्जमगोवणिज्जं च इममावडियं, इमं च संभरंती वज्जगंठिनि-
 दुरहिययत्तणेण चेव जीवामि, न पुण अन्नं किंपि दुज्जम्मजायाए मज्झ जीवियकारणं, संपयं पुण वच्छ ! वंछामि
 अतुच्छवच्छसाहासमुलंबणाइणा सकुलकलंकभूयं जीवियं परिचइउं, अओ अणुमन्नेसु मं, तुमं चेव इयाणिं पुच्छणिज्जो,
 तेण भणियं—अम्मो ! अलं दूरज्झवसाएण, इओ मए वेसाहत्थाओ मोइया समाणी तवनियमेहिं अत्ताणं अत्ताणं
 साहेज्जासि, अपत्तकालजीवियववरोवणं हि दूसियं समयसत्येसुत्ति संठविऊण बहुदवदाणपुव्वगं मोइया सा वेसासया-
 साओ, नीया सग्गामे दावियं जीवणं ठाविया धम्ममग्गंमि, अन्नया इममेव वेरग्गमुव्वहंतो सो चित्तिउं पवत्तो, जहा—

तिव्वाववायजलवाहदुलंघणिज्जं, दोगच्चमशुमयरज्झसभीममज्झं ।

संसारसायरमिमं परियाणइत्ता, सत्ता सुहेण निवसंति कहां व गेहे ? ॥ १ ॥

जे इत्तियंपि न मुणंति किमज्झ होही, सोक्खं व दुक्खमुचियं व तहेयरं वा ।

संसेवणिज्जमिममन्नयरं च मोहमाहप्पझंपियपहाणविवेयनेत्ता ॥ २ ॥ जुम्मं ।

किंच—कालंमि तंमि बहुला जइ नो कहेज्जा, संभोगदुव्विलसियं जणणीगयं मे ।

ता तारिसं दढमकज्जमहं करेत्ता, तिव्वानलेणवि लभिज्ज न नूण सुद्धिं ॥ ३ ॥

एवंविहाण विविहाण विडंबणाणं, भोगाभिलासमहमेकमयेमि मूलं ।

श्रीगुणचंद
महावीरच०
६ प्रस्तावः

॥ २२२ ॥

ता होउ संपइ हमेण दुगुंछिणं, सवोवहाविरहियं पकरेमि धम्मं ॥ ४ ॥

इति निच्छिऊण बहुप्पयारेहिं गोसंखियं जणणिं च पडिबज्जाविऊण पाणामाए पच्चज्जाए पच्चइओ एसो, करेइ विविहे तवोविसेसे, अब्भसेइ निययधम्मसत्थाइं, रक्खेइ पाणिणो, पज्जुवासेइ गुरुणो, लद्धट्ठो य जाओ निययध-
म्ममग्गंमि । अन्नवा सो विहरंतो कुम्मारगामवाहिं ठिओ आयावेइ, एसा वेसियायणस्स उप्पत्ती ॥

तस्स य जडाजूडाओ दिणद्धदिणमणिकिरणपरितत्ता निवडंति धरणीअले जूयानियरा, सो य जीवाणुकंपयाए निवडियमेत्ताओ करेण गिणिहऊण खिवइ जडामउडे, इओ य तेणंतेणं भगवया समं गच्छंतो गोसालो तं दट्ठूण अणत्थसीलयाए ओसरित्ता महया सहेण वागरेइ-भो भो किं भवं सुणी मुणिओ उयाहु जूयासेज्जायरो?, इत्थी पुरिसो वा?, न मुणिज्जसि सम्मं, अहो ते गंभीररूवत्तणं, एवं च भणिए खमासीलयाए जावं वेसियायणो न किंपि जंपेइ ताव दुष्णिणयरसिगत्तणेण तिन्नि वाराओ पुणो पुणो पुच्छिओ गोसालगेण ।

अह तस्स पसमसीलत्तणुणोऽविहु दुट्ठवयणमहियस्स । अइघट्ठचंदणस्सव वियंभिओ तिष्ठकोहग्गी ॥ १ ॥

तो तेणुब्भडजालाकलावपसरप्परुद्धगयणयला । गोसालगदहणत्थं तेउल्लेसा विणिस्सिट्ठा ॥ २ ॥

एत्थंतरे जिणेणं तीसे विज्झवणपच्चला हत्ति । गोसालगरक्खक्खु सीयल्लेसा पडिविमुक्का ॥ ३ ॥

वेसियायनस्य
प्रव्रज्या
गोशाल-
हास्यं तेजो-
निवारणं.

॥ २२२ ॥

अह तीएँ तेउलेसा वाहिरओ वेढिया समंतेण । सिग्घं चिय विज्झाया हिमबुट्टीएव जलणकणा ॥ ४ ॥
 ताहे तिलोकपहुणो अण्णणुरूवं वियाणिउं रिद्धिं । सो खामिउं पवत्तो इमाहि वग्गूहिं विणयणओ ॥ ५ ॥
 भयवं ! न नायमेवं जह सिस्सो तुम्ह एस दुस्सीलो । इण्हिं चिय मुणियमिमं ता इण्हिं खमह अवराहं ॥ ६ ॥

इमं च जंपमाणं वेसियायणं दट्ठण गोसालगेण भणियं-भयवं ! किमेस जूयासेजायरो उम्मत्तोव पलवइ ?, भय-
 वया भणियं-भइ ! जया तुमए मम पासाओ ओसरित्ता एसो एवं भणिओ, जहा-किं तुमं मुणिमुणिओ इचाइं,
 तथा पढमवेलाए सहित्ता ठिओ, पुणो पुणो तुमए भणिओ समाणो तुज्झ दहणट्ठयाए उग्गं महापमाणं सलिला-
 इसिसिरवत्थुणावि अप्पडिहयसामत्थं तेउलेसं निसिरइ, सा य जावज्जवि तुह देहदेसं ईसि न पावइ ताव मए तप्प-
 डिघायनिमित्तमंतरा ताराहिवहिमसिसिरा सीयलेसा पक्खित्ता, तप्पभावेण य तुह सरीरं तहट्ठियं दट्ठण उवसंह-
 यकोववियारो ममं पडुच्च एवं भणिउं पवत्तो-भयवं ! न मुणिओ तुज्झ एस सिस्सो, ता मरसियवो मम दुविण-
 उत्ति । इमं च आयन्निऊण गोसालगो भयसंभंतो भयवंतं भत्तीए पणमिऊण भणइ-कहं नं भंते ! तेउलेसालद्धी
 हवेज्जा ?, भयवया वुत्तं-जे णं गोसालया ! छट्ठंछट्ठेणं निरंतरेणं तवोकम्मेणं आयावेइ, पारणगदिवसे य सनहाए
 लुक्खकुम्मासमुट्ठीए एगेण य सलिलचुलुगेणं जावेइ जाव लम्मासा, तस्स विउला तेउलेसा संपज्जइत्ति । इमं च
 तद्विहाणं सम्ममवधारियं गोसालगेणं ।

श्रीगुणचंद
महावीरच०
६ प्रस्तावः
॥ २२३ ॥

अन्नया य सामी कुमारगामनयराओ सिद्धत्थपुरंमि संपट्टिओ, संपत्तो य पुच्चभणियतिलथंवपएसं, तओ पुच्छिओ गोसालगेण भयवं—सो तिलथंवो मन्ने न निप्फन्नो होजा?, भगवया भणियं—भइ! मा एवं उल्लेखेसु, निप्फन्नो चेव सो अमुगप्पएसे वट्टइत्ति वुत्ते गोसालो भयवओ वयणमसहहंतो गंतूण तस्स एगंते निहितस्स तिल-
थंवस्स तिलसंगलियं हत्थेण फोडित्ता तिले पत्तेयं गणमाणो भणइ—नूणं सच्चजीवा एवं परियट्टिऊण भुज्जो भुज्जो
तत्थेव नियसरीरगे उववज्जंतित्ति पाहं पउट्टपरिहारं नियइवायं च सम्ममयलंवेइ । अन्नया य सो तेउलेसासाहणत्थं
भयवंतं विमुत्तूण गओ सावत्थिं नयरिं, ठिओ कुंभकारसालाए, कयं छम्मासियमुग्गं तवकम्मं, सिद्धा तेउलेसा,
विन्नासिया कूयतडट्टियाए दासीए सरीरदहणेणं, तओ जायनिच्छओ पमुइयमाणसो अणवरयकोऊहलावलोयणस-
यण्हो गामागराईसु परिभमिउमारद्धो ।

अह अन्नया कयाई अट्ठंगनिमित्तसत्थपत्तट्ठा । पासजिणनाहसिस्सा सिद्धिलियसद्धम्मवावारा ॥ १ ॥
कोऊहलेण गामागरेसु उस्सिखलं परिभमंता । गोसालगस्स मिलिया जाओ य परोप्परुल्लावो ॥ २ ॥
सिट्ठं च तेहिं गोसालगस्स सनिमित्तसत्थलवमेत्तं । तेणावि सो वियंभइ जणस्स तीयाति सार्हितो ॥ ३ ॥
पयइइ चिय उड्डमरसीलयं तस्स को तरइ कहिउं ? । पाउच्चूयाइसयस्स किं पुणो पावनिरयस्स ? ॥ ४ ॥
भयवंपि तेण रहिओ हरिणंको इव विडप्पपम्मुको । अब्भहियसस्सिरीओ विहरइ वसुहं विगयमोहो ॥ ५ ॥

गोशालते-
जोलेइया

॥ २२३ ॥

इय निरुवमसंजमभूरिभारधरणेकधीरधवलस्स । वीरस्स भुवणगुरुणो चरिए तइलोकवित्थरिए ॥ ६ ॥
 बहुऽणत्थसत्थसालयगोसालयदुव्विण्यपडिबद्धो । वित्थरओ पत्थावो समत्थिओ छट्ठओ एस ॥ ७ ॥ जुम्मं ।
 इति गोसालदुव्विण्यपडिबद्धो छट्ठो पत्थावो सम्मत्तो ॥
 ॥ इति षष्ठः प्रस्तावः ॥

अथ सप्तमः प्रस्तावः

गोसालएण सहियस्स सामिणो संसिया उ उवसग्गा । एगागिणो उ एत्तो जह जाया ते तह कहेमि ॥ १ ॥
 अह पलयपयंडानलाणुरुवधम्मज्झाणनिज्झोसियासुहमलोवलेवो दाहोत्तिण्णजच्चकंचणच्छाएण पभापसरेण समु-
 ग्गमंतदिणयरनियराउलं दिसियक्कवालं कुणंतो सो महावीरजिणवरो कमेण विहरमाणो वेसालिं नयरिं संपत्तो,
 तत्थ य अहिगयजिणभणियजीवाजीवाइनवपयत्थो विविहाभिग्गहग्गहणनिग्गहियाविरइभावो भवभयारद्धसुविसु-
 द्धाणुवयाइसावगधम्मो सिद्धत्थनरवइवालमित्तो संखो नाम गणराया, सो य भयवंतं पच्चभिजाणिऊण पराए
 भत्तीए महया रिद्धिसमुदएण सक्कारेइ, अह कइवयदिणावसाने सामी वाणियगामे पट्ठिओ, तस्स य अंतरा रंगं-
 तभंगुरतरंगा महाजलुप्पीलपूरियपुलिणा महिलाहियं व दुग्गेज्झमज्झा रणभूमिच्च कच्छवयमयरहिया गंडईया नाम

श्रीगुणचंद
महावीरच०
७ प्रस्तावः
॥ २२४ ॥

महानई, तं च सामी नावाए समुत्तिन्नो समाणो वेलुयापुलिणंसि मुल्लनिमित्तं धरिओ नाविगेहिं, एत्थ य पत्थावे दिणद्धसमओ वट्टइ, खरं तावन्ति वेलुयं सूरस्स करपहकरा, तीए य संतप्पइ कमलकोमलं चलणतलं जिणस्स । इओ य तस्सेव संखस्स गणराइणो भाइणिज्जो चित्तो नाम द्वयकज्जेण पच्चंतराइणो समीवे गंतूण नावाकडएण पडिनियत्तो पेच्छइ य तहट्ठियं सामिं, तओ ते दुव्वयेणेहिं बहु तज्जित्ता मोयावेइ, महिमं च से करेइ । अह—

सुसमाहियमणपसरो संरक्खंतो चराचरं लोयं । विविहपडिमाविसेसे पइदियहं चेव फासंतो ॥ १ ॥
कत्थइ निंदिज्जंतो उस्सिखलखलज्जेण कुविणं । कत्थइ थुणिज्जमाणो नमंतसामंततियसेहिं ॥ २ ॥
कत्थइ पागयजीवियविणासखमतिक्खआवयकंतो । कत्थइ अणुकूलज्जोहविहियपूयामहामहिमो ॥ ३ ॥
उभयत्थवि धम्मतुलं व चित्तवित्तिं समं चिय धरंतो । विविहाउ भावणाओ भावितो भमइ वसुहाए ॥ ४ ॥

तस्स य भगवओ अणेगतवोविहाणनिरयस्स न मणागंपि कंपिज्जइ मणो पढमुम्मिल्लमाणसारसहयारमंजरी-
पुंजपरिमलमिलंतभमिरभमरभमरोलिरोलरमणीएण पल्लविल्लकंकल्लिसरलसल्लईपमुहदुमसंडेण कन्नाडचेडीनिडाल-
विलुलंतोलयवल्लरीचलणलंपडदाहिणानिलाडंवरिल्लेण पवरनेवत्थकुंगनिज्जिज्जंतचच्चरीरवुहीरिउहाममयरद्धएण महु-
समएण १ न य पयंडमायंडमंडलुल्लसियपवलकिरणजालकरालियभुवणंतरालेण तणहभिभूयवप्पीहगनिवहघोरसर-
संछाइयावरसदंतरेण खरसमीरसमुदुयदुहफरिससकरुकरुवक्कमणदुग्गमेण निदाहकालेण २ न य घोरघोसघणाधण-

शंखराजेन
नाविकात्
श्रीवीरस्य
मोचनं.

॥ २२४ ॥

गयघडाडोवडरियपथियसत्थेण विप्फुरंतविज्जुपुंजुप्पिच्छपउत्थकामिणीहिययदारिणा पहिद्वनीलकंठकोलाहलिल्लेण पाउसकालेण ३ न य विसद्वकंदोद्वकमलकलहारपरागधूसरियरायहंसेण परिपकसस्ससंपयाभिरामधरणीमंडलेण गइंद-
दाणगंधसरिच्छातुच्छसत्तच्छयपुप्फगुच्छुच्छलंतामोयवासियदियंतरालेण सरयकालेण ४ न य फुल्लंतफलिणीमंजरीपुंज-
पिंजरियवणविभागेण पहिद्वपामरारद्ववणमलणुत्तालकंकेल्लिकलकललक्खिज्जमाणगामसंनिविसेण हेमंतागमेण ५ न य
हिमतुसारसंमिलियसिसिरसमीरपकंपंतपहियमुक्कसिक्कारकेउणा ठाणठाणपज्जालियगिगट्टियपासपासुत्तपावासुयनिवहेण
परिफुट्टकुसुमद्वहासहसिरुज्जाणाभोगेण सिसिरसमएणंति ६ ।

इय धम्मज्झाणनिवेशगाढवक्खित्तचित्तपसरस्स । छप्पिवि उउणो पढुणो भीयव कुणंति न वियारं ॥ १ ॥

एवं च विहरमाणो वाणियगामं नगरमुवागओ, ठिओ य तस्स बहियाविभागे काउसग्गेणं । तत्थ य नयरे
आणंदो नाम सावओ, सो य छट्ठंछट्ठेणं निरंतरेणं तवोविसेसेण आयावेइ, तस्स य तवप्पभावेणं ओहिज्जाणं
समुप्पन्नं, तयणुभावेण य सो पडिमापडिवन्नं जयगुरुं दद्वूण अच्चंतभत्तिभरनिब्भरंगो गओ सामिसमीवं, जहा-
विहिं वंदित्ता भणिउमाढत्तो य-भयवं ! चिरमहियासिया दुस्सहपरीसहा तुमए, अहो तुम्ह वज्जसारसरीरत्तणं अहो
निप्पकंपत्तणं, पत्तं च इमस्स किलेसस्स तुम्हेहिं फलं, जओ कइयवरिसेहिं केवलणाणमुप्पज्जिहित्ति भणिऊण गओ
सगिहं । सामीवि तत्तो निक्खमित्ता सावत्थीनयरीए विचित्ततवकम्मसणाहं दसमवासारत्तं अइवाहिऊण नयरीय

श्रीगुणचंद
महावीरच०
७ प्रस्तावः
॥ २२५ ॥

बाहिंमि कयपारणगो साणुलद्धियनामंमि य गामे वच्चइ । तत्थ य भइं पडिमं ठाइ, तहिं च अणसिओ पढमं पुच्चा-
भिमुहो एगपोगगलणिसियदिट्ठी दिवसमसेसमच्छिऊण रयणिंमि दाहिणाभिमुहो ठाइ, तओ अवरेण दिवसं उत्तरेण
रत्तिं, एवं लद्धुतवोकम्मेण इमं भइपडिमं सम्ममणुपालिऊण सामी अपारिउं चेव महाभइं ठाइ, तीए य पुच्चाए दिसाए
अहोरत्तं, एवं चउसुवि दिसासु चत्तारि अहोरत्ताइं, पलंबियभुयपरिहो उस्सग्गेण ठाऊण दसमेण इमं समत्थेइ ।
पुणो अकयपारणगो सवओभइं पडिमसुवसंपज्जइ, एईएवि पुच्चाइयासु तमापज्जवसाणासु दससुवि दिसासु उस्सग्गेण
अच्छइ, नवरं उट्ठुदिसाए जाइं उट्ठुलोइयाणि दवाणि ताणि शायइ, अहोदिसाएवि हिट्ठिल्लानित्ति । एवं एयं वावीस-
इमेण पज्जंतमुवाणेइ । समत्थियासु य इमासु तिसुवि पडिमासु ददं परिसंतो भयवं, जाए य पारणगसमए पविट्ठो
आणंदगाहावइस्स गेहे, तवेलं च बहुलियाभिहाणाए दासीए भंडयाणि खणीकरंतीए दिट्ठो जयगुरू, अह तप्प-
एसं संपत्तस्स तइलोकदिवायरस्स वासियभत्तं पणामियमणाए, सामिणाऽवि असंभंतेण जोग्गंति कलिऊण पसा-
रियं सभावसोणिमासुभगं पाणिसंपुडं, परमसद्धाविसेसमुच्चइंतीए दिन्नमेयाए, एत्थंतरे दुकरतवचरणपज्जवसाणजाय-
जिणपारणयपहिट्ठुहयहियएहिं सुरासुरकिन्नरनिवहेहिं पूरियभंवरतलं, मुक्का य पंचरायकुसुमसमूहसणाहा अद्धतेरस-
कोडिमेत्ता कणयवुट्ठी, ताडियाइं चउविहत्तूराइं, जाओ य जणाण परितोसो, सा य बहुलिया दासी ण्हाविया
नरवइल्लत्तच्छायाए, अवणीयं से दासित्तणं ।

ऋतुपट्टेना-
नभिभवः
भद्रादिप्र-
तिमाः॥

॥ २२५ ॥

इय एत्थेव भवंमिवि विसिद्धभत्तीएँ पत्तदाणेणं । पाविज्जइ धणरिद्धी समुद्धरा किं पुणऽणभवे? ॥ १ ॥
 एत्तोच्चिय रुंदोविहु भवन्नवो गोपयं व लीलाए । दुक्करतवविरहेणवि लंघिज्जइ पुन्नवंतेहिं ॥ २ ॥
 लब्भइ तिलोयलच्छी लब्भइ सबंपि कामियं सोक्खं । एकं चिय नवि लब्भइ सुपत्तदाणं जयपहाणं ॥ ३ ॥
 नाणंपि तवोवि हवेज्ज निप्फलं कहवि दिव्वजोएणं । दिन्नं सुपत्तदाणं वभिचरइ न नूण कइयावि ॥ ४ ॥
 इय जाणिऊण कल्लाणकोसकलणेक्कपच्चले दाणे । न करेज्जा नणु जत्तं को अत्तसुहं समीहंतो? ॥ ५ ॥

अह जयगुरु तत्थ पारिएण वहिया विहरिउमारद्धो । अन्नया य गामाणुगामेण गओ बहुमेच्छजणसंकुलाए
 दढभूमीए, तत्थ य पेढालाभिहाणस्स गामस्स वहिया पेढालुज्जाणे पोलासचेइए अट्टमेणं तवोकम्मेणं अपाणएणं
 ईसिं ओणयकाओ अचित्तलुक्खणपोगलनिवेशियानिमेसनयणो गुत्तसव्विंदियगामो सुप्पनिहियगत्तो अहोपलंबिय-
 भुयदंडो सुसिलिट्ठसंठवियनिच्चलचलणो दुरणुचरं कायरनरुद्धोसकरं एगराइयं महापडिममारभेइ । एत्थंतरे
 सोहम्माए सभाए नाणामणिरयणभासुरकिरणपज्जलंतमहंतसिंहासणमुहासीणो अणेगपुरसुरंगणाकोडाकोडिसंबुडो
 किरीडाइवराभरणपहाविच्छुरियदेहो पुरंदरो तथा पडिमापडिवन्नं जयनाहमोहिए पलोइऊण तक्खणविमुक्का-
 सणो अचंतभत्तिभरनिम्भरंगो पुणरुत्तनिडालताडियमहीवट्ठो पणमिऊण आणंदसंदोइसंदिरीए सम्भूयत्थगुणगणु-
 न्भासणसमत्थाए परमपक्खवायसुंदराए गिराए सुचिरं संथुणिऊण य निस्सामन्नं सामिणो असामन्नगुणपम्भारं हि-

श्रीगुणचंद
महावीरच०
७ प्रस्तावः

॥ २२६ ॥

ययंमि धरिउमपारयंतोव थुणिउं पवत्तो-ओ मो तियसा ! एस भगवं महावीरो पंचसमिओ तिगुत्तो अकोहो अमाणो अमाओ अलोभो अणासवो अममो अकिंचणो संखोव निरंगणो जच्चकंचणं व जायरूवो जीवोव अप्पडिहयगमणो गयणंपिव निरालंबणो समीरणोव अप्पडिवद्धो सायरसलिलं व सुद्धहियओ पुक्खरपत्तं व निरुवलेवो कुम्मुव सुगुत्तिदिओ खग्गविसाणं व एगो विहगोव विप्पमुक्को भारुंडपक्खिव अप्पमत्तो मंदरो इव निप्पकंपो सागरो इव गंभीरो चंदो इव सोमलेसो दिवायरोव दित्ततेओ कुंजरो इव सौंडिरो पंचाणणोव दुद्धरिसो वसभोव जायथामो वसुंधरव सवफासविसहो घयमहुसित्तो हुयासणोव तेयसा जलंतोत्ति, तहा एयस्स भगवओ न कत्थइ पडिवंधो समुप्पज्जइ, सो य चउविहो, तंजहा-दवओ खेत्तओ कालओ भावओ य, तत्थ दवओ माया मे पिया मे भाया मे सुहिसयणसंगंथसंथुया मे सचित्ताचित्तमीसाणि य दवाणि मे, एवं न ममीकारो जाएज्जा, खेत्तओ य-गामे वा नगरे वा रत्ते वा खेत्ते वा खले वा घरे वा अन्नत्थ वा तहप्पगारे पडिवंधो न हविज्जा, कालओ य-समए वा आवलियाए वा आणपाणए वा खणे वा मुहुत्ते वा दिवसाइए वा न ममत्तं जाएज्जा, भावओ य-कोहे वा माणे वा मायाए वा लोभे वा पेज्जे वा दोसे वा कलहे वा अब्भक्खाणे वा पेसुत्ते वा परपरिवाए वा अरइ-रइए वा मायामोसे वा मिच्छादंसणसल्ले वा न ममत्तं उप्पज्जेज्जत्ति । तहा एसो भगवं वासारत्तवज्जं अट्ठगिम्हहे-मंतियमासेसु गामे एगराइए नगरे पंचराइए ववगयहाससोगभओ निरहंकरो निग्गंथो वासीचंदणकप्पो समत-

पेढालग्रामे
श्रीवीरका-
योत्सर्गः.

॥ २२६ ॥

णमणिलेहुकंचणो समसुहदुक्खो इहलोयपरलोयअप्पडिवद्धो जीवियमरणेसु निरवकंखी पुवज्जियकम्मसंघनिग्घाय-
णट्ठाए अब्भुट्ठिओ विहरइ । किं च—

एयं महाणुभावं नियधीरिमतुलियतिहुयणजणोहं । नो धम्मज्झाणाओ खमंति संखोहिउं केई ॥ १ ॥
देविंदा तियसा वा जक्खा रक्खा व खयरवग्गा वा । भूया महोरगा वा अणप्पमाहप्पजुत्तावि ॥ २ ॥
अवि चालिज्जइ मेरू पल्हत्थिज्जइ महीवि पायाले । ससिसूरविमाणाणिवि वलिगा केणवि दलिज्जंति ॥ ३ ॥
अवि सोसिज्जंति महण्णवावि बहुमीणमगरभीमावि । न य भगवं चालिज्जइ ज्ञाणाओ तिहुयणेणावि ॥ ४ ॥
इय सोच्चा जायपयंडकोवदट्ठोड्ढभीमभिउडिमुहो । दोसाण संगमो इव संगमओ नाम गिच्चाणो ॥ ५ ॥
सुरवइसमाणविभवो तक्कालविमुक्कलज्जमज्जाओ । ववगयविवेयभावो सया अभवो भणइ सक्कं ॥ ६ ॥
सामि ! किमेवं भण्णह निग्गुणमवि समणयं सुरसहाए । अहवा सच्छंदाविय सोहंति पट्ठूण उल्लावा ॥ ७ ॥
सच्चं चिय सुविसुद्धा जइ होज्ज इमस्स कावि चंगिमया । गिहपालणं विमोचुं ता किं पासंड मंडेज्जा ? ॥ ८ ॥
गिहवासाओवि न धम्मकम्ममन्नं वयंति किर कुसला । कीवत्तणेण चत्ते य तंमि किं संसणिज्जमिह ? ॥ ९ ॥
वागरियं जं च तए ज्ञाणाओ एस सुरवरोहिंपि । नो तीरइ चालेउं तंपि न वोचुं खमं तुज्झ ॥ १० ॥
जे लीलाए चिय पाणिपल्लवे संठवंति भूवीढं । गुरुसिहरभरकंतं गोलं व तुलंति मेरुंपि ॥ ११ ॥

श्रीगुणचंद
महावीरच०
७ प्रस्तावः

॥ २२७ ॥

वायामेत्तेणवि तिहुयणंपि कुविया खिवंति जमवयणे । निवडियगुणाण सुराण ताण को वहउ समसीसिं ? ॥ १२ ॥
जइ सहहेसि एयं ता अच्छउ खोभिएण किं इमिणा ? । अह नो ता पेच्छ जहा भग्गपइणं नियत्तेमि ॥ १३ ॥
इय भणिए पुरंदरो विचिंतेइ-अहो महापावपडलविलुत्तविवेओ सबहा एस, अओ जइ एत्थ पत्थावे निवा-
रिज्जइ ता निच्छियं इमं परिकप्पेज्जा-सुरवइसामत्थेण एस भगवं तवोकम्ममविचलचित्तो कुणइ, न उण सत्ति-
एत्ति परिभाविऊण ठिओ मोणेणं । संगमयसुरोऽवि अतुच्छमच्छरमुवहंतो निवारिज्जमाणोऽवि नियपहाणपरियणेण
केत्तियमेत्तो एस ? अज्जेव खोभेमि इमंति पइणं काऊण नीहरिओ अत्थाणीमंडवाओ, गओ भगवओ समीवं, तओ
दंसणवसुप्पन्नगाढकोवेण विउविओ पलयकालोव पवलो धूलिनिवहो, तेण य चलणजुयलाओ आरब्भ जाव अ-
च्छीणि सवणा य ताव पच्छाइओ, सामी जाओ निरुत्सासो, नवरि तिलतुसतिभागमेत्तंपि न चलिओ ज्ञाणाओ,
अचलियचित्तं च नाऊण कओ अणेण कुलिसकटिणचंडतुंडभीमो पिवीलियासमूहो, सो य लद्धावयासो दुज्जणोव
जिणं विहविउं पवत्तो, किंतु निब्भग्गजणमणोरहोव जाओ निप्फलो, तओ दुन्निवारे सूइतिक्खमुहे उहंसे पेसेइ,
तेहिवि अखोभिज्जमाणे भुयणबंधवे घइलाओ चंडमुहमंडलाओ निवत्तेइ, ताहिवि खज्जमाणसरीरे निप्पकंपे जयनाहे
निम्मिया पिंगलसरीररुइणो अतुच्छपुच्छविसालिद्धकटिणकंटया विच्छुया, तेषुवि जहासत्तिकयप्पहारपडिहयसामत्थेसु
पसरंतमच्छरेणं विउविया दाढाकडप्पकराला नउला, तेहिंपि अभिभवियं भयवओ सरीरं, न उण ईसिंपि सत्तं,

शक्रप्रशंसा
संगम-
प्रतिज्ञा.

॥ २२७ ॥

अह सविसेसवियंभियकोवप्पसरेण तेण तियसेण । मुक्का फुरंतफणरयणभासुरा दुस्सहा भुयगा ॥ १ ॥
 चंदणतरुणोच्च तणू जिणस्स आवेढियं दढं तेहिं । अइतिकखदीहदंतग्गदसणतंडवियतुंडेहिं ॥ २ ॥
 न मणागंपि विचलियं तिलोयनाहं पलोइउं तियसो । ताहे मूसगनिवहं निवत्तइ दिवसत्तीए ॥ ३ ॥
 पुणरवि पयंडदोघट्टघट्टयं तक्खणं पयट्टेइ । उल्लालियमुंडादंडभीसणं सेलतुंगतणुं ॥ ४ ॥
 तेणवि विविहकयत्थणविसेससंपीडिएवि देहंमि । धम्मज्झाणाउ जिणो न चालिओ वालमेत्तंपि ॥ ५ ॥
 एवं चिय करणीहिवि पिसायनिवहेहिं एवमेव जिणो । खोभेउं पारद्धो तेणं सुरकुलकलंकेणं ॥ ६ ॥
 अचलंतंमि जिणिंदे करालदंतग्गविसिहभीममुहो । सज्जिज्जइ सहूलो तेण लहुं जिणवरस्सुवरिं ॥ ७ ॥
 अइतिकखनक्खदाढाहिं पीडिउं सोवि जयगुरुं वाढं । विज्झाओ झत्ति पउससमयदुग्गयपईवोच्च ॥ ८ ॥
 इय खलियारणनिवहे पागयजणजीवियंतकरणखमे । पकएवि जिणं दट्टुं सुनिच्चलं दूमिओ देवो ॥ ९ ॥
 तओ जहावट्टियरूवं सिद्धत्थरायं तिसलादेविं च विउच्चइ, ताणि य कलुणाइं विलवंति, भणंति य-पुत्त ! किं
 तए दुक्करमिममारद्धं?, उज्झाहि पव्वज्जं आगंतूण परिपालेह अम्हे, तुह विरहे वच्छ ! असरणाणि अत्ताणाणि य
 जायाणित्ति, एएणवि जा न सक्को खोभिउं ताव खंधावारं विउच्चइ, सो य पेरंतेसु आवासिओ जिणस्स, तत्थ
 सूयारो पत्थरे अलभमाणो जिणचलणोवरि पिढरं ठविऊण हेट्ठा वज्जानलजालणेण रंधिउं पयत्तो, अह तक्कालसवि-

श्रीगुणचंद
महावीरच०
७ प्रस्तावः

॥ २२८ ॥

सेससमुच्छलियधम्मज्झाणजलुप्पीलकलोलविज्झाविण्व निष्फलत्तणं पाविण्व तंमि पक्कणं निम्मवेइ, सो य अणेगाइं
सउणिपंजरगाणि जयगुरुणो सवणे भुयदंडेसु खंधतलंमि जंघाजुयले य ओलंवेइ, तेहिंतो य नीहरिऊण पक्खिणो
नहसिहाहिं तिकखग्गचंचुप्पहारेहि य विहवंति जिणसरीरं, तहावि अखुभिण्व जयनाहे पइसमयवट्ठंतकोवेणं उप्पा-
इओ जुगखयसमएव सकरुकरकलुसो खरानिलो, तेणावि समहियं सामिस्स पज्जालिओ कम्मतणगहणम्मि झा-
णानलो, न उण चित्तसंखोभोत्ति, पच्छा कलंकलियावायं विरएइ, तेणवि चक्काविद्धोव सलिलावत्तनिवडिओव भा-
मिओ जिणो देहमेत्तेण, न उण चित्तासएणं ।

इय एवंविहतिवोवसग्गकरणेऽवि निच्चलं नाहं । आभोगिऊण चित्तइ संगमओ जायगुरुकोवो ॥ १ ॥

वज्जसरीरो एसो खलीकओऽविहु बहुप्पयारेहिं । नो तीरइ खोभेउं किं काउं जुज्जइ इयाणिं ? ॥ २ ॥

जइ एयमुज्झिऊणं सुरालयं जामि भग्गसपइन्नो । ता सुरवइपमुहेहिं आजीवमहं हसिज्जामि ॥ ३ ॥

किंच-निययस्सवि हिययस्सा नत्थि एवं कयंमि परितोसो । पारद्ववत्थुनिवाहणंमि पुरिसाण पुरिसवयं ॥ ४ ॥

अहवा होउ विगोवण निहणं एयं नएमि कूडमुणिं । एयस्स विणासंमी झाणंपि विणस्सिही नूणं ॥ ५ ॥

एवंपि य निवाहियगरुयपइण्णाभरो भविस्सामि । सुरवइपमुहाणमहं अहीलणिज्जो य तियसाणं ॥ ६ ॥

इय निच्छिऊण पज्जलियजलणजालाकलावसंचलियं । विज्जुलयाउलयसमयमेहचंदं व दुप्पेच्छं ॥ ७ ॥

संगमकृता
उपसर्गः।

॥ २२८ ॥

कालायसभारसहस्सकोडिघडणुभडं महाचक्रं । जंबुद्वीपसमुगयवयणपिहाणं व घेत्तूण ॥ ८ ॥
 उप्पइओ संगमओ दूरं गयणं गणं गुणविमुक्को । थालकरो तइलोकं भोत्तुं खुहिओ कयंतोव ॥ ९ ॥
 तो तं सुमेरुचुन्नणपंयडमाहप्पपायडं चक्रं । मुक्कं सबससत्तीए तेण जयबंधुणो उवरिं ॥ १० ॥
 तेणावि जिणिंदतणू तडत्ति संताडिया गुरुभरेणं । आकरनहं निमग्गा महीए दढवज्जसंकुव ॥ ११ ॥
 तत्थवि लज्जीवहियं झायंतं जिणवरं मुणेऊणं । वेलक्खमुवगओ सो चिंतइ तियसाहमो एवं ॥ १२ ॥
 ललक्कचक्कपहओवि नेव पंचत्तमेइ जो एस । सो सत्थस्साविसओ ता संपइ किं करेमि अहं ? ॥ १३ ॥
 एवंविहोवसग्गा दिट्ठावि हरंति जीयमियराणं । किं पुण सरीरगोयरमुवागया दुस्सहा नूणं ? ॥ १४ ॥

इइ विगप्पिऊण एगूणवीसइभोवसरगपज्जंते जइ पुण अणुकूलयाए खोभिज्जइत्ति जायविम्भमेण संगमएण
 विणिम्मियं नाणामणिकिरणच्चिचइयं पवरं विमाणं, तंमि समारूढो दिव्वाभरणपहाविच्छुरियसरीरो नियंसिय-
 विमलदुगुलो दिव्वं सामाणियदेविहिं दंसेमाणो मडुरेहिं वयणेहिं भयवंतं भणिउं पवत्तो—भो महारिसि ! तुट्ठोमि
 तुह सत्तेण तवेण खमाए बलेण पारद्ववत्थुनिव्वहणेणं जीवियनिरवेक्खत्तणेणं पाणिगणरक्खणुज्जयमणेण य, ता अलाहि
 एत्तो तवकिलेसाणुभावणेणं, जइ भणसि ता पवरसुररमणीजणाभिरामं अणवरयपयट्ठविसट्ठनट्ठं विचित्तसत्तिजुत्ता-
 मरकीरमाणच्छुरियं इमिणच्चिय सरीरेण तुमं नएमि तियसालयं, अहवा उत्तरोत्तरभयपरंपरापरूढजराइदोस-

श्रीगुणचंद
महावीरच०
७ प्रस्तावः

॥ २२९ ॥

मिहहरदियं एंगतियसुहसणाहं पणामेमि सिद्धिमिवासं, अहवा इहेव धरामंडले मंडलाहिवसहस्ससविणयाणुस-
रिज्जमाणसासणं पउरकरितुरवरहजोदकोससंभिवमेगच्छत्तं संपाडेमि नरिंदत्तणं, वरेसु एएहिं किंपि जं भे रोचइ,
उज्जसु संखोहं परिबयसु कुवियप्पंति भणिएवि जाव भयवं पलंबियभुओ एगग्गचित्तो धम्मज्झाणपडिवन्नो न
किंचि जंपइ ताव संगमएण अलद्धपडिववणेण वित्तियं, जहा-दुविलंघं मयरद्वयरायसासणं, महामुणीणवि कुणइ
वित्तसंखोहं, ता तस्स सबस्सभूयाओ पेसेमि दिव्वकामिणीओ, जइ पुण ताहिं हीरिज्जा एयस्स भणंति कलिकुण
कओ समकालं सवेसिं उऊण समवाओ, तप्पभाविण य फुल्लिया सहयारा पल्लविया कंकिलिणो जायं दुहिणं
पयट्ठो मलयमारुओ उच्छलिओ परहयारावो मउरिया नीवा पणच्चिया वरहिणो विर्यंभिओ य कमलपरिमलो
जायाहं कासकुसुमपंडुराहं दिसिसुहाहं, मुक्का भगवओ परंतेसु दसद्ववन्ना कुसुमवट्ठी, तयणंतरं च विसज्जि-
याओ विविहसरमंडलपहाणगेयकुसलाओ करणप्पवंचमणहरनट्टविहिवियक्खणाओ वीणावेणुप्पमुहाउज्जसंजुयाओ
पवरालंकारधारिणीओ तियसविलासिणीओ, संपत्ताओ य जयगुरुसमीवं, सविलासं विर्यंभिउं पवत्ताओ य,
कहं चिय ?—

उब्भट्टसिंजारसनादेहलायन्नजलपवाहेण । सरियच्च वणाभोगं लीलाए पूरयंतीओ ॥ १ ॥

पम्हलविसालदीहरतरलच्छिच्छोहचक्कवालेणं । दित्तिदिसिविसिट्टकंदोट्टपयरसकं कुणंतीओ ॥ २ ॥

चक्रमाचन
अनुकूलो-
पसर्गः.

॥ २२९ ॥

काओवि कुणंति नमंतसीसनिवडंतकुसुमदामाओ । जिणसंगमसोऽखुकंखिरीउ वाढं पयावणइं ॥ ३ ॥
 काओऽविहु गलियंसुयसंजमणमिसेण पायडिंति पुरो । जयगुरुणो पीवरकणयकलसपरिरेहिणं सिद्धिणं ॥ ४ ॥
 मिच्छच्चिय कारुणियत्तणं तुमं उव्वहेसि हे सुहय ! । मयणसरजज्जरंगं पि जं न रक्खेसि जुवइजणं ॥ ५ ॥
 मुंच कढिणत्तणं देहि नाह ! पड्वियणमम्ह दुहियाणं । पेम्मपरायत्तमणं सप्पुरिसा नावहीरंति ॥ ६ ॥
 तुह दंसणमेत्तेणवि दसमदसं पाविउव एस जणो । एत्तोऽवि मा उवेइसु एवं तज्जंति काओऽवि ॥ ७ ॥
 इय सचिलासं सुरकामिणीहिं पायडियवहुवियाराहिं । न मणागं पि विचलियं चित्तं ज्ञाणाओ जगगुरुणो ॥ ८ ॥
 अह उग्गयंमि सुरे अखुभियहियं पलोइउं नाहं । संगमओ हयसत्ती चित्तिउमेवं समाढत्तो ॥ ९ ॥
 अणुकूलवसग्गेहिवि न चलइ एसो मुणी महासत्तो । ता किं एत्तो मोत्तुं एयं वच्चामि सुरलोए ॥ १० ॥
 अहया न जुजइ इमं काउं मे दीहरेण कालेण । उवसग्गियस्स जइ पुण इमस्स चित्तं पकंपेज्जा ॥ ११ ॥
 इय कलुसासयगोयरगएण तइलोकवंधुणो धणियं । उवसग्गं गामेविहु विहरं परिचत्तभत्तस्स ॥ १२ ॥
 वालुयपंथ सुभूमे सुळेत्त मलयंमि हत्थिसीसंमि । ओसलिमोसलितोसलिपमुहेसुं संनिवेसेसुं ॥ १३ ॥
 ते केवि तेण तियसाहमेण विहरंतयस्स उवसग्गा । विहिया अइदुविसहा जे कहिउं पि हु न तीरंति ॥ १४ ॥
 एएणं चिय ते कारणेण चरिए न एत्थ वित्थरिया । सिद्धंताओ कुसलेहिं किंतु सयमेव नायवा ॥ १५ ॥

श्रीगुणचंद
महावीरच०
७ प्रस्तावः

॥ २३० ॥

एवं तदुवसग्गवग्गावि अविचलचित्तो गामाईणं बहिया बहुकालं गमिऊण सामी छम्मासियं पारणयं काउकामो समागओ वयगामे गोउलंमि, तत्थ य तद्दिवसं ऊसवविसेसो, सवत्थ पायसं उवक्खडिज्जइ, तिहुयणेकनाहोऽवि अणवरयमुवसग्गवग्गं कुणमाणस्स संगमयामरस्स जाया छम्मासा नेव उवसग्गेइ संपयं, जइ पुण परिस्संतो सट्ठाणं गओ होज्जा, इय विगप्पिऊण पविट्ठो भिक्खानिमित्तं, संगमएणवि तत्थ पत्थावे जहिं जहिं गिहे भयवं वच्चइ तहिं तहिं समारंभिया अणेसणा, सामिणाऽवि पउत्तो ओही, मुणिओ य एसो, तयणंतरमद्धहिं डिओ चेव नियत्तिऊण ठिओ पडिमाए, संगमएणावि आभोइओ भयवं,—किं भग्गपरिणामो नवत्ति?, जाव पेच्छइ ताव छज्जीअ-हियमेव परिचित्तियंतं जिणवरं, ताहे संखुद्धो चित्तेइ—ओ छहिं मासेहिं भूरिप्पयारोवसग्गेहिं अणवरयं कीरमाणे-हिवि न चलिओ सो दीहेणावि कालेण न सक्को चालिउं, निरत्थओ मज्झ उवक्कमो, दीहकालं चुक्कोऽहिं सुर-विलासाणं, अहो नियसामत्थमचित्तिऊण कहं मए अप्पा विनडिओ? । इय बहुप्पयारोहिं नियचित्ठियं इत्थिऊण निवडिओ भगवओ चलणेसु, भणिउमादत्तो य—भयवं! भग्गपइत्तोऽहं, तुब्भे पुण समत्तपइत्ता, अवितहं भणियं महाणुभावेण सभागएण सुरवइणा, केवलं दुहु कयं मए जं न तइया सहइयं ।

अलमेत्तो भणिएणं खमेसु मे पुवदुक्कडं कम्मं । उवसंतोऽहं संपइ तुह उवसग्गं न काहामि ॥ १ ॥
ता वच्चसु निस्संकं गामागरपमुहविविहठानेसु । पविससु भिक्खनिमित्तं किलिस्ससे किं छुहाभिहओ? ॥ २ ॥

अप्सरउप-
सर्गः ब्रज-
ग्रामेऽप्य-
शुद्धिः ।

॥ २३० ॥

एतथंतरंमि भणियं जिणेण संगमय ! मुंच मम तत्ति । पत्थावे बिय अम्हे सकज्जकिरियासु वट्टेमो ॥ ३ ॥

इय सोउं जिणनाहं पणमिय परमायरेण संगमओ । अइपावभरकंतोवि पट्टिओ सुरपुराभिमुहं ॥ ४ ॥

इओ य-सोहम्मे देवलोए तंकाळं सवे देवा देवीओ य उव्विगा निराणंदा निरुच्छाहा अच्छंति, सक्कोऽविय, मुक्कविलेवणालंकारो समुज्झयपेच्छणयाइविलासो परिचितेइ—अहो एत्तियमेत्तस्स भगवओ अणत्थसत्थस्स अहं मूलकारणं जाओ, जओ मम पसंसाकुविण्ण इमिणा सुराहमेण इमं महापावं ववसियंति, एतथंतरे सयलतइलोयजी-वरासिविणासजणियपावपंकविलित्तोव नीसेसावजसपंसुपडलविलुत्तगत्तोव अकल्लाणावलीकलिओव पणट्ठपुवकंति-पब्भारो पडिभग्गपइन्नाविसेसुम्मिलंतलज्जाभरसंकुचियलोयणो संपत्तो सोहम्मसभाए संगमयाहमो । तं च दइण पुरंदरो ठिओ परंमुहो, भणिउमारद्धो य—

भो भो सुरा ! निसामह मम वयणं एस संगमयदेवो । चंडालो इव तुम्हं दइं पि न जुज्झइ कयावि ॥ १ ॥

एएण पावमइणा चिरमवरद्धं निराणुकंपेण । जं अम्ह पूयणिज्जो कयत्थिओ तिहुयणेक्कपहू ॥ २ ॥

जइ ताव इमस्स नत्थि पडिब्भयं भीमगुरुभवार्हितो । ता किं ममवि न भीओ ववसंतो दढमकज्जमिमं ? ॥ ३ ॥

जह जयगुरुणा निच्चलसामाइयगुरुभरो समुक्खित्तो । तह किं मएवि जं एस मज्झ संकंपि नो कुणइ ? ॥ ४ ॥

एएण जिणिंदऽवमाणणेण जणिओ पयंडपावभरो । तुम्हे पुण इत्थ ठिया पाविहिइ इमस्स संगेण ॥ ५ ॥

श्रीगुणचंद
महावीरच०
७ प्रस्तावः
॥ २३१ ॥

किमहमिमं निग्गहिउं सको नेवोवसग्गकालंमि ? । किंतु मुणिस्सइ एसो हरिस्स निस्साएँ तवइ जिणो ॥ ६ ॥
पज्जत्तं एत्तो जंपिएण निव्विसयमाणवेह इमं । वरि सुन्न चिय साला मा भरिया चोरवग्गेण ॥ ७ ॥
इय सुरनाहेण सरोसभासिणा चलणकोडिणा विवसो । निच्छूढो संगमओ एगागी सुरपुरीहिंतो ॥ ८ ॥
एवंविहं च माणमलणं पेच्छिऊण चित्तिं संगमएण-अहो एयाइं ताइं असमिक्खियकयाइं पायडीहवंति संपह
दुविलसियाइं, इय झूरिऊण सो जाणएण विमाणेण पट्टिओ मंदिराभिमुहं, तओ अकोसिज्जमाणो सुरविलयाहिं
हीलिज्जमाणो नियपरिवारेण पेह्लिज्जमाणो सक्कसुहडेहिं उवेहिज्जमाणो सामाणियदेवेहिं नीहरिऊण सुरपुरीओ
ठिओ मंदरचूलियाए, तस्स य सागरोवमं सेसमाउयंति । इओ य-से अग्गमहिसीहिं विन्नविओ पुरंदरो-जइ सामि !
तुम्ह आपसो हवइ ता जम्हे पियमणुसरामो, तओ विसज्जियाओ य इवेण, सेसो पुण परिवारो पडिसिद्धोत्ति ।
इओ य-भयवं वद्धमाणसामी जायंमि निरुवसग्गे तत्थेव गामे वीयदिषसे पबिट्ठो गोयरचरियाए, हिंउंतो य
समागओ वच्छवालथेरीगिहे, तओ तीए भत्तिभरनिस्सरंतपयडपुलयपडलाए वासियपायसभत्तेण पडिलाभिओ
छमासस्स निरसणो भयवं । एत्थंतरे चिरकालजायजिणपारणगदंसणपरितुट्ठेहिं अहासन्निहियसुरनिवहेहिं पइयाइं
तूराइं मुक्का कणगबुट्ठी परिखित्तो कुसुमनियरो वरिसियं गंधोदयं अहो दाणमहो दाणंति उग्घोसणा कया, तत्थेव
ताव जाया अदरिहा थेरी । अह सामी निव्वियसरीरो गओ आलभियाभिहाणं नयरिं, तत्थवि पडिमापडिवन्नस्स

संगमकस्य-
निर्विषय-
तादेशः।

॥ २३१ ॥

भसिनिम्भरो हरीनाम विज्जुकुमारिंदो तिपयाहिणापुव्वं निवडिऊण चलणेसु संथवं काउं पवत्तो । कहं?—

जय निज्जियदुज्जयकुसुमवाण !, अविणस्सरपावियमुहनिहाण ! ।

उवसग्गवेरसमरेक्कधीर !, तुह सच्चं नाउँ जिणिंद बीर ! ॥ १ ॥

संसारजलहिनियडंतसत्त !, पइं एक्किं रक्खियवहुदुहत्त ।

तुह सुमरणमित्तेवि पावरासि, नासइ तिमिरं पिय रविपयासि ॥ २ ॥

तुह दंसणमेत्तेऽपि जे न बुद्ध, ते तिव्वखदुक्खलक्खेहिं रुद्ध ।

तुह चलणकमलमुहंकिणस्स, भद्दाइं होंति धरणीयलस्स ॥ ३ ॥

स कयत्थ जाय हरिहरिणपमुह, भुवणेसर ! ते तेरिच्छनिवह ।

गिरिकंदरपडिमासंपवन्नु, तुहं दिट्ठु जेहिं जिण ! कणववन्नु ॥ ४ ॥

तावच्चिय घोरभवाडवीए, निवडंति जीवा दुहसंकडाए । जावऽज्जवि तुम्ह पयारविंद—सेवं कुणंति नो जिणवरिंद ! ॥ ५ ॥

हिमयंतपमुहकुलपवएसु, स्त्रीरोयहिवेइरसायलेसु । गायंति किंतिं तुह भुवणनाह !, किन्नरसमूह दइयासणाह ॥ ६ ॥

तुह एकह कह वित्थारु पत्त, नीसेसकहंतर जणिहिं चत्त । उइयंमि अहव रविमंडलंमि, खज्जोय न सोहइं नहयलंमि ॥ ७ ॥

इय विज्जुकुमारिंदो थोउं कहिउं च केवलुप्पत्ती । पच्चासन्नं पच्छा नियभवणं अइगओ नमिउं ॥ ८ ॥

श्रीगुणचंद
महावीरच०
७ प्रस्तावः

॥ २३२ ॥

सामीवि सेयवियानयरिमुवगओ, तत्थवि हरिस्सहो नाम भवणाहिबई देवो एइ वंदइ य पियं च पुच्छइ, जहा-
भयवं ! नित्थिन्ना बह्वसग्गा, थेवमियाणिं सोढवं, केवलनाणं च लहुं उप्पज्झिहिति भणिऊण जहागयं पडिनियत्तो ।
तिहुयणपह्वि तत्तो विहरिऊण सावत्थीए नयरीए परिसरे पलंबियभुयदंडो ठिओ काउस्सग्गेणं, तम्मि य दिणे
लोगो सिंगारियसरीरो गहियसुरहिकुसुमदामो विविहविलेवणभरियकचोलयसणाहो खंदपडिमाए पूयणत्थं भयवंतं
अइक्कमिऊण गंतुं पयट्ठो । सा य खंदपडिमा तवेलं णहविया विलित्ता य जावऽज्जवि न समारोविज्जइ रहवरे ताव
कहं महावीरो विहरइत्ति परिन्नाणनिमित्तं पउत्तो ओही सुराहिचेण, दिट्ठो सो पुरजणो भयवंतं मोत्तूण खंदप-
डिमाए पूयामहिमं कुणमाणो, तयणंतरं ओयरिओ सुरलोयाओ, अणुपविट्ठो य खंदपडिमं, ताहे पुंरंदराहिट्ठिया
चलिया भयवओऽभिमुहं खंदपडिमा, तं च सयमेव चलंतिं दट्ठूण तुठ्ठो लोगो-अहो देवो ! सयमेव रहं आरुइत्ति,
खंदपडिमावि रहं मोत्तूण गया भगवओ समीवं, तिपयाहिणदाणपुच्चयं च पडिया पाएसु, भूमितलनिविट्ठा य
पज्जुवासिउमारद्धा, लोगोऽवि तहाविहमच्छरियं पेच्छिऊण विम्हिया चिंतंति-अहो वंदियवंदणिज्जो एस कोइ
महप्पा निप्पडिमप्पभावसंगओ य ता सव्वहा न जुत्तमायरियमग्गेहिं जं इममइक्कमिऊण गयत्ति अत्ताणं निंदंतेहिं
सामिणो कया सत्तायरेण महिमा, अह जाए पत्थावे जयगुरू तओ पएसओ निक्खमिऊण गओ कोसंबिं नयरिं,
तत्थ य उस्सग्गमुवगयस्स जयगुरूणो जोइसचक्काहिवइणो सूरससहरा सविमाणा वंदणत्थं ओयरिया वसुंधरापीढं,

विद्युत्कुमा-
रेन्द्रस्तुतिः
स्कन्दप्रति-
माकृता
उपासना.

॥ २३२ ॥

गाढविम्हयक्खित्तनरनियरपलोइज्जमाणा य तिपयाहिणापुवयं पणमिऊण तइलोक्केकल्लमल्लं जयबंधवं, निसन्ना जहो-
इयट्ठाणेषु, पुच्छिया सुहविहारवत्ता, खणमेकं च ते जिणरूवदंसणसुहमणुहविऊण जहागयं पडिनियत्ता ।

अह जयनाहो गामाणुगामयं विहरिऊण भूवीढं । वाणारसीए पत्तो तत्थ य महिओ सुरिंदेण ॥ १ ॥
पुणरवि रायगिहंमि य कुरंतमणिरयणमंडियसिरेण । ईसाणतियसवइणा थुयमहिओ पुच्छिओ य पियं ॥ २ ॥
महिलानथरीएवि हु पत्थिवजणमेण परमभत्तीए । धरणिंदेण य नागाहिवेण हिट्ठेण पणिवइओ ॥ ३ ॥
गामागराइसु चिरं विहरिय पत्तंमि वरिसयालंमि । एक्कारसमे सामी बेसालीए पुरीए गओ ॥ ४ ॥
तसपाणवीयरहिण थोपसुपंडगविमज्जिए ठाणे । चाउम्मासियखमणं पडिवज्जित्ता ठिओ पडिमं ॥ ५ ॥
भूयाणंदो य तहिं भुयगवई भगवओ भवभएण । भत्तिभरनिच्चरंगो पूयामहिमं पयट्टेइ ॥ ६ ॥
अह तत्थेव पुरीए सावगधम्मंमि बद्धपडिवंधो । दक्खिन्नदयापसमाइपवरगुणरयणरयणनिही ॥ ७ ॥
नामेण जुन्नसेट्ठी सुसावगो वसइ विस्तुयजसोहो । अन्नो मिच्छादिट्ठी अहिणवसेट्ठित्ति नामेण ॥ ८ ॥
एगम्मि वासरंभी कज्जवसा नयरि बाहि नीहरिओ । सो जुन्नसेट्ठी सहो परमवियहो गुणहो य ॥ ९ ॥
पेच्छइ कंचणसच्छहसरीरकरपसरभरियनहविवरं । नीसेसलक्खणधरं उस्सग्गठियं महावीरं ॥ १० ॥
तं पेच्छिऊण निच्छउमजायसवण्णुनिच्छओ सहसा । हरिसुच्छलंतरोमंचकुओ वंदिउं सार्मि ॥ ११ ॥

श्रीगुणचंद
महावीरच०
७ प्रस्तावः
॥ २३३ ॥

सो चिंतितं पवत्तो भिक्खाकालेऽवि नीइ जन्न पइ । पडिमोवगओ चिट्ठइ तं अज्जुववासिओ मन्ने ॥ १२ ॥
जइ कलंमि य कल्लाणवल्लिकंदो करिज्ज पारणयं । एसो भयवं मह मंदिरंमि ता सुंदरं होइ ॥ १३ ॥
इय चिंतंतो पइवासरंमि सो पज्जुवासए सारिंमि । ता जाव चउम्मासक्खमणं पज्जंतमणुपत्तं ॥ १४ ॥
तो वीयवासरे आगयंमि मुणिऊण पारणगसमयं । सारिंमि निमंतइत्ता तुरियं गेहं गओ सेट्ठी ॥ १५ ॥
पगुणीकयाइं तेण य सनिमित्तं पुव्वाकालसिद्धाइं । फासुयएसणियाइं भत्तीए पवरभोज्जाइं ॥ १६ ॥
एयाइं अज्ज जयवंधवस्स दाहामऽहंति कयबुद्धी । अणिमिसवियसियनयणो जयगुरुमग्गं पलोयंतो ॥ १७ ॥
धन्नो कयपुन्नोऽहं सुलद्धनरजम्मजीवियफलो य । होहामि अज्ज नूणं तिहुअणपहुणो पयाणेण ॥ १८ ॥
चिरभवपरंपरज्जियनिविडासुहकम्मनिगडजडिअस्स । संपज्जइ जइ परमज्जमेव मोक्खो धुवं मज्झ ॥ १९ ॥
इय चिंतंतो सुविसुज्झमाणलेसो स जायए जाव । ताव पविट्ठो सामिय अहिणवसेट्ठिस्स गेहंमि ॥ २० ॥
अचंतविभववित्थरदप्पगघेण सेट्ठिणा तेण । भणिया दासी भदे ! समणं दाउं विसज्जेहि ॥ २१ ॥
तीएविहु तवयणाणुरोहओ चट्ठएण कुम्मासा । उवणीया दाणत्थं पहुणावि पसारिओ पाणी ॥ २२ ॥
खित्ता य तीए तयणंतरं च देवेहिं दुंदुही पइया । परिमुक्का वसुहारा चेलुक्खेवो कओ झत्ति ॥ २३ ॥
धुट्ठं च अहोदाणं महया सहेण पंचवन्नाणं । बुद्धी विहिया कुसुमाण सुरहिगंधुदुराणं च ॥ २४ ॥

जीर्णश्रेष्ठि-
भावना
नवश्रेष्ठिगृहे
पारणं.

॥ २३३ ॥

मिलिओ य नयरलोगो रायाविय विम्हिओ गिहं पत्तो । वित्तंतमिमं पुट्टो य तेहिं सेट्टी पहिट्टेहिं ॥ २५ ॥
 तेणावि कवडसीलत्तणेण काउं बहुं फडाडोवं । सिट्ठं जहा महप्पा एसो परमन्नपाणेहिं ॥ २६ ॥
 सयमेव मए पाराविओत्ति अश्वंतभत्तिजुत्तेण । एत्तो श्विय तियसेहिं घुट्टमहो दाणमेयंति ॥ २७ ॥
 सोच्चा एवं लोको रायाविय गाढहरिसपडिहत्थो । तग्गुणगहणं काउं जहागयं पडिनियत्तोत्ति ॥ २८ ॥
 सो पुण पुराणसेट्टी अश्वंतविसुज्झमाणसुहभावो । दुंदुहिसहं सोच्चा झडत्ति सोगाउलसरीरो ॥ २९ ॥
 पडिचित्तिउं पवत्तो हाहाऽहं मंदभग्गजणजणगो । जणिओ विहिणा नूणं जस्स घरं लंघिउं नाहो ॥ ३० ॥
 अन्नत्थ पारिओ अज्ज सायरं उवनिमंतिओऽवि मए । अहवा निप्पुन्नाणं न घरे चिंतामणी एइ ॥ ३१ ॥ जुम्मं ।
 अह भयवं पारित्ता गामागरसुंदरं धरावीढं । विहरइ हरियतमभरो सूरु इव भवकमलाण ॥ ३२ ॥
 अज्जंमि य पत्थावे समोसढो तत्थ पासजिणसिस्सो । सूरु केवलनाणप्पईवपायडियपरमत्थो ॥ ३३ ॥
 नाउं समोसढं तं नयरिजणो नरवई य हिट्टमणो । वंदणवडिवाए लहुं समागओ तस्स पासंमि ॥ ३४ ॥
 वंदित्ता भत्तीए उचियट्ठाणंमि सन्निसन्नो य । सुचिरं धम्मं सोउं पुच्छिउमेवं समाढत्तो ॥ ३५ ॥
 भयवं ! एत्थ पुरीए अणेगजणसंकुलाए को घन्नो ? । लहुईकयसंसारो य ? कहसु अइकोउगं मज्झ ॥ ३६ ॥
 तो केवलिणा भणियं अइघन्नो एत्थ जुज्जसेट्ठित्ति । रत्ता वुत्तं किं नणु सामी पाराविओ तेण ? ॥ ३७ ॥

श्रीगुणचंद
महावीरच०
७ प्रस्तावः
॥ २३४ ॥

किं वा अद्धत्तेरससुवन्नकोडिप्पमाणवसुहारा । तम्मंदिरंमि पडिया ? अइधन्नो जेण सो जाओ ॥ ३८ ॥
तो केवल्लिणा भणियं भावेणं तेण तिहुयणेक्कपड्ड । पाराविओ चिय तहा दाणत्थं कयपयत्तेण ॥ ३९ ॥
वसुहाराविहु परमत्थओ परं तस्स मंदिरे पडिया । जं सग्गमोक्खसोक्खाण भायणं सो इहं जाओ ॥ ४० ॥
किंच-जइ खणमेत्तं नो दुंदुहीएँ सहं तथा सुणितो सो । खवगस्सेणिं आरुहिय केवलं ता लहु लहंतो ॥ ४१ ॥
पत्तपहाणत्तणओ कणगं मोत्तूण तेण उ न अन्नं । भाववियलत्तणेण फलमहिणवसेट्ठिणा लद्धं ॥ ४२ ॥
इय भो देवाणुपिया ! चरणं दाणं च देवपूया य । कासकुसुमं व विहलं सवं चिय भावपरिहीणं ॥ ४३ ॥
एवं केवल्लिणा पन्नत्ते जहागयं गओ सभाजणोत्ति । अलं वित्थरेणं, पत्थुयं भन्नइ-सो महावीरजिणो कमेण
विहरमाणो गओ सुसुमारपुरं, तत्थ य असोगसंडंमि उज्जाणे असोगपावयस्स हेट्ठओ पुढविसिलापट्टए कयअट्टम-
भत्तस्स एगराइयं पडिमं पडिवन्नस्स एगपुग्गलनिवेसियानिमेसनयणस्स ईसिपग्गभारगयदेहस्स भयवओ चमरो
नाम असुरिंदो पुरंदरभयविहुरो संखमीणुप्पलोवसोहियं महागउव कमजुयलसरोवरतरुमल्लीणो, अह को एस च-
मरो ? कहं पुरंदरार्हितो भयं ? को वा पुवभवे आसित्ति ? , निसामेह
अत्थि गइंदकुलकवल्लिज्जंतमहल्लसलईपलवो नियसिहरतुंगिमाखलियरविरहपयारो पवरकाणणाभोगभूसियदिसि-
निवहो विज्झो नाम गिरिवरो, तस्स पायमूले विभेलो नाम संन्निवेसो, तंमि य दयादक्खिन्नसवसोयाइगुणोववेओ

केवल्या-
गमः देशना
जीर्णश्रे-
ष्ठिनो
धन्यत्वं.

॥ २३४ ॥

अपरिमियदवसंचओ पूरणो नाम गाहावई परिवसइ, सो य सम्मओ सयणवग्गस्स वल्लहो नरिंदस्स चक्खुभूओ पयइवग्गस्स हिययनिवित्तेसो धम्मियलोयस्स उभयलोयाविरुद्धेणं ववहारेणं कालं बोलेइ । अत्रया य पच्छिमयणी-समयंमि सुहसिजागयस्स निदाविगमुम्मिहमाणनयणनलिणस्स जाया से चिंता, जहा—

पुव्वभवे नूण मए दाणं दिन्नं तवं च आयरियं । तस्स पभावेणेसा मणवंछियकज्जनिप्फत्ती ॥ १ ॥

तहाहि—नरवइसम्माणेणं धणेण धन्नेण कोसविभवेण । पुत्ताइपरियणेण य पइदियहमहं पवहामि ॥ २ ॥

पडिक्कूलोवि हु लोगो दंसणमेत्तेऽवि होइ अणुकूलो । अनिवारियपसराविहु निवडंति न आवया मज्झ ॥ ३ ॥

ता जावऽज्जवि पुव्वज्जियस्स कम्मस्स कुसलरूवस्स । विज्जइ थेवोऽवि लवो जावऽज्जवि उज्जमो अत्थि ॥ ४ ॥

जाव जणे सम्माणो जाव य रोगादओ न दूमिंति । जाव न विहडइ सरयन्मविन्ममा निच्छियं लच्छी ॥ ५ ॥

जाव न जज्जरइ जरा जाव न जायइ पिण्ण सह विरहो । आणानिदेसम्मि य जावज्जवि वट्टइ कुडुंबं ॥ ६ ॥

ताव पुणोवि हु धम्मं परभवसुहसाहगं उवचिणेमि । नहु कारणविरहेणं कज्जं उप्पज्जति कयावि ॥ ७ ॥

धम्मपभावो एसो जं किर साहारणेऽवि मणुयत्ते । एगे करेति रज्जं अन्ने ते चेव सेवन्ति ॥ ८ ॥

तम्हा सूरम्मि समुग्गयंमि भुंजाविउं सयणवग्गं । ठविउं च गिहे पुत्तं तावसदिक्खं पवज्जामि ॥ ९ ॥

इय चित्तियंतस्स उग्गओ दिवायरो, तओ निमंतिओ सयणवग्गो काराविओ परमविच्छेदं भोयणं संमाणो

श्रीगुणचंद
महावीरच०
७ प्रस्तावः
॥ २३५ ॥

तंबोलाइदाणेण, जोडियकरसंपुडेण भणियमणेण-भो भो सयणा ! निसुणह मह वयणं, एसोऽहं विरत्तो विसयाणं
पडिनियत्तो गेहवावाराणं पणट्टसिणेहो पियपणइणीपुत्तमित्तपमुहपरियणे, अओ अणुमन्नेह मं दार्णि दाणामाए पवज्जाए
पज्जज्जमणुगिण्हिउं, चिरं एत्थ वुत्थेण य मए जन्न भे सम्मं वट्ठियं तमियाणिं खमणिज्जं, जहा य ममोवरि पुवं पक्ख-
वायमुव्वहंता एवं मम पुत्तस्स संपयं वहेज्जह, इइ सप्पणयं भणिऊण ठविओ नियपए पुत्तो, समप्पिओ से गेहपरियरो,
साहियाइं निहाणाइं भलाविओ सयणजणो, अन्नंपि कयं तक्कालोचियं कायव्वं। अह सोहणतिहिमुहुत्ते विसंय गेहवासं
परिचइऊण चउप्पुडं दारुमयं भायणं गहाय दाणामाए पवज्जाए पवइओ पूरणो। तं चेव दिवसमारब्भ लुट्ठंलुट्ठेणं अणि-
क्खित्तणं तवोविसेसेणं आयावणाभूमीगओ अत्ताणं सोसेइ। पारणगदिवसे य तं चउप्पुडं भायणं गहाय उच्चावएसु
गेहेसु मज्झंदिणसमए भिक्खं परिभमिक्खा जं पढमपुडए पडइ तं पहियाणं अणाहाणं च देइ, जं दोचे तं कागसुणम-
पमुहाणं, जं च तच्चे तं मच्छमगराईणं जलचरजीवाणं पणामेइ, जं च चउत्थपुडए पडइ तं अप्पणा अरत्तदुट्ठो आहारेइ।

एवंविहदुकरतवविहाणनिरयस्स निचमवि तस्स । न तहा पावविणासो जायइ सन्नाणहीणस्स ॥ १ ॥

जह थेवतवेऽवि जिणिंदमग्गमणुलग्गयस्स साहुस्स । कालायसंपि अहवा रसाणुविट्ठं हवइ हेमं ॥ २ ॥

अह तेण दुरणुचरेण वालतवेण अब्भाहओ सो पूरणो लुक्खो अट्ठिचम्ममेत्तगत्तो चित्तेइ-खीणोऽहमियाणिं, ता-
जावऽज्जवि अत्थि किंपि पुरिसकारपरक्कमविसेसो ताव सयमेव तहाविहभूविभागे गंतूण अणसणं करेमिक्खि विभा-

पूरणस्य
प्रव्रज्या।

॥ २३५ ॥

विऊण चउप्पुडयपमुहउवगरणमेगंते परिचइऊण विभेलगसन्निसेसस्स ईसाणदिसिविभागे गंतूण भत्तं पच्चक्खाइ ॥
 एत्थंतरे चमरचंचा रायहाणी अणिंदा यावि होत्था, सोऽवि पूरणो बालतवस्सी बहुपडिपुन्नाइं दुवालस वासाइं
 परियायं पाउणिच्चा मासियाए संलेहणाए अप्पाणं श्रोसिऊणं मओ समाणो तीए चमरचंचाए रायहाणीए चमरिंद-
 त्ताए उववन्नो, तयणंतरं पंचविहाए पज्जत्तीए पज्जत्तिभावं गओ समाणो विविहमणिरवणनियरकिरणविच्छुरियाइं विग-
 सियसरसकुसुमपयरपरिरेहिराइं सविलासधावंतसुरकामिणीललियकरवलुत्तालचालियचामराइं नियभवणंतराइं इओ
 तओ आमोएमाणो वीससाए जाव उहं पलोयइ ताव पेच्छइ सोहम्मदेवलोए सयलदेवरिद्धिसंभारसुंदरिले महमहंतघ-
 णसारसंवलयिकालागरुवहलधूमपडलिल्ले दुवारदेसनिवेसियवियसियसहसपत्तपिहाणपुन्नकलसे निम्मलमणिभित्तिजो-
 णहापणासियसंतमसे रणिरकणयकिंकिणीजालाउलउप्पंतधयवडाडोए ठाणट्ठाणपलंवंतमुक्कमुत्ताहलकलावे विवि-
 हमणिरयणविणिम्मवियवरवेइयावेदियपेरंतविभागे सोहम्मवडिंसयविमाणे सोहम्माए सभाए सकंसि सीहासणंसि
 निसन्नं चउरासीए सामाणियसहस्सेहिं अन्नाहि य अणेगाहिं देवकोडाकोडीहिं पंजलिउडाहिं पज्जुवासिज्जमाणं
 पहयपडुपडहमुखपमुहत्तूरनिनायसंवलयितंतीतलतालाणुगयसंगीयपमोयभरनचमाणविलासिणीपलोयणपरं असंभा-
 वणिज्जसुहसंभारमणुभवमाणं सयमेव वज्जपाणिं पुरंदरं, तं च दट्ठूण सामरिसं चितियमणेणं—अहो को एस अप-
 त्थियपत्थओ दुरंतपन्तलक्खणो लज्जामज्जायपरिवज्जिओ सुरकुलकलंकभूओ अपत्तकाले चिय कालवयणं पविसिउ-

श्रीगुणचंद
महावीरच०
७ प्रस्तावः
॥ २३६ ॥

कामो? जो ममावि असुरराइणो सीसोवरि वट्टमाणो दिवाइं भोगाइं भुंजमाणो अणाउलं विलसइत्ति, एवं संपे-
हित्ता सामाणियपरिसोववन्नए देवे संसयसएसु आपुच्छणोचिए सदावित्ता भणिउं पवत्तो-भो भो देवाणुपिया !
को एस दुरप्पा मम सिरोवरि वट्टइत्ति?, ते य सिरसावत्तं करयलपरिग्गहियं मत्थए अंजलिं कट्टु विजएणं वट्टा-
विऊण य सविणयं जंपिउमारद्धा-भो भो देवाणुपिया! एस सुरिंदो सोहम्माहिबई महप्पा महाजुई अपरिभविय-
सासणो सयमेव विहरइ । तओ तच्चयणसवणानंतरसमुप्पन्नामरिसवियंभंतभिउडिविकरालवयणो भणिउं पवत्तो—
भो भो बुहा ! किमेवं अहिट्ठपरक्कमा मम पुरोवि । कइवयसुरपरियरियं एयं तुम्हे पसंसेह ? ॥ १ ॥
जइ उच्चट्टाणठिओ किमेत्तिएणवि गुरुत्तणमिमस्स ? । न हु वरइ तरुसिरत्थो कवोडओ नीलकंठसिरिं ॥ २ ॥
अहवा तोलिज्जंते तुलाए वत्थुंमि जं हवइ सारं । तं हेट्ठच्चिय ठायइ इयरं पुण वट्टई उवरिं ॥ ३ ॥
एत्तो य लहू एसो अरिट्ठवसएण पाविओ सग्गं । जह कोइ लहइ रज्जं मायंगकुलप्पसूओऽवि ॥ ४ ॥
भो भो सुचिरं इमिणा सूरविहीणे रणेव सुरलोए । काउरिसेण व सुरसुंदरीहिं सद्धिं सुहं वुत्थं ॥ ५ ॥
संपइ पुण अवणिज्जइ इमस्स चिररूढदप्पमाहप्पं । दुट्ठा उवेहियत्ता न हुंति रोगव कुसलाणं ॥ ६ ॥
तत्थ-जो ववसायं न कुणइ सकमागयसामिभावपरितुट्ठो । स सिरीएवि हु मुच्चइ सो काउरिसोत्ति कलिऊणं ॥ ७ ॥
इय होउ अज्ज सुरलोयसामिणो माणदलणमलिणत्तं । सहसच्चिय कीरंतं पयडं बलसालिणावि मए ॥ ८ ॥

चमरेन्द्र-
तयोत्पत्तिः
सौधमेन्द्रं
प्रति कोपः।

॥ २३६ ॥

एवं च चमरासुरदस्स अपरिभावियनियभुयबलमाहप्पदप्पजंपियं परिभाविऊण पयंपियं सामाणियसुरेहिं-देव ! एसो हि परभवोवज्जियविसिट्ठपुत्तपगरिससमासाइयपवरलोयरायलच्छिविच्छडो पुरंदरो, तुमं पुण उज्जमववसायबलाइ-गुणगणपरिगओऽवि भवणवासीण अम्हारिसाणं सामी, ता नाह ! उयसु मच्छरं, उवभुंजेसु तुमं सकमावज्जियं सामित्तणं, एसो पुण सुरपुरसंपयं, निरत्थओ एत्थ परोप्परं विरोहो, किं कज्जं संसयतुलावलंबिएण नियमाहप्पेणं ?, निउण-बुद्धीए परिचित्तउ सामी । अपरिभावियकयाणं कज्जाणं उवभुज्जंतविसतरुफलाणं व पज्जंतविरसत्तणं, नहु एकसिंपिमाणखंडणासमुब्भूओ अवजसपंसू सुकयसहस्सवारिधारावरिसणेणवि पसमिउं तीरइ, ता सामी ! सयमेव मुणइ जमेत्थ जुत्तं, को अम्ह तुमाहितो विवेयभावो ? ॥

इमं च निसामिऊण गरुयामरिसवसविसप्पंतभिउडिभीमभालयलो चमरासुरिंदो समुल्लविउमारद्धो-भो भो सामाणिया ! सुरा निरत्थयं समुव्वह परिणायपरिणयविवेयचिरहियं थविरत्तणं, जेण एवंविहसपहुपराभवपिसुण-वयणनिवहसुल्लवंताण दूरभवक्कंतं तुम्ह गरुयत्तणं, गुणा हु गोरवमुवजणित्ति, एत्तो वियलहुओऽवि परिणायणं गुणा-हियत्तेण गुरुव घेप्पइ जणेणं, कहमण्णहा अणुमेत्तोऽवि सुचित्तसुंदरयामहग्घाविओ सिरम्मि निहिप्पइ सरिसवो ?, अहवा किमेएण ?, अदिट्ठमहपरक्कमणं तुम्हाणं को दोसो ?, ता साहेह किं हेलाकरयलतालणुदुप्पयंतनिवडंतेहिं गंदुएहिं व कीलेमि कुलाचलेहिं उयाहु गयणं गणविसप्पमाणकलोलपेल्लणुल्लूरियतारयविमाणमालं निरुंभेमि पवल-पवणपक्खुभियजलहिजलवेलं ?, अहवा पयंडभुयदंडचंडिमावसपरियत्तियं एगत्तीकोरेमि भुवणत्तयं, इइ बहुप्पयारा-

श्रीगुणचंद
महावीरच०
७ प्रस्तावः
॥ २३७ ॥

मरिसभरचित्तवयणाडं वराऊरियभवनभंत रुच्छलंत पडिसद्वयच्छलेण अणुमन्निउव निग्गओ सक्केण सह जुज्झिअं
सो भयभीयाए सामाणियसभाए, अह ईसिजायविवेगेण पुणो चित्तियं चमरेण-एए मम सामाणियसभावत्तिणो
असुरा वाढं भायंति पुरंदरस्स, ता सम्मं न सुणिज्जइ कज्जगई, जइ पुण तत्तो हवेज्ज गंजणा अंओ तदभिहम्ममा-
णेण को मए सरणं पवज्जणिज्जोत्ति परिभाविऊण पउत्तो ओही, दिट्ठो य भयवं महावीरो सुसुमारपुरपरिसरतरुसंडे
पडिमापडिवन्नो, तं च दट्ठण समुट्ठिओ सयणिज्जाओ, नियंसियं देवदूसं, गओ नाणाविहवयरमयपहरणपडिहत्थाए
चोप्पालगनामाए पहरणसालाए, कयंतभुयदंडविब्भमं गहियं महप्पमाणं परिहरयणं, तयणंतरं साहिलासं नयणंजलीहिं
एज्जमाणो असुरतरुणीहिं किंकायवयावामूढेहिं निरिक्खिज्जमाणो अंगरक्खेहिं दुव्विणीओत्ति उवेहिज्जमाणो
सामाणियासुरेहिं किंपि भविस्सइ इह इति संसइज्जमाणो भुवणवइवग्गेण निग्गओ चंमरचंचारायहाणीओ, वेगेण
य गच्छंतो संपत्तो भयवओ महावीरस्स समीवं, तिपयाहिणीकाऊण वंदिओ परमभत्तीए, पवत्तो विन्नवेउं, जहा-
नाइ ! तुह पायपंकयाणुभावेण दुल्लहावि पुज्जंति मणोरहा, अओ इच्छामि तुह निस्साए पुरंदरं हयपरक्कमं परिमुक्कप-
हुत्तणाभिरामभियानिं काउंति भणिऊण अवकंतो उत्तरपुरच्छिमंमि दिसिविभागे, समारद्धो वेउवियसमुग्घाओ,
विउवियं वेगं महंतं घोरायारं जोयणलक्खप्पमाणमेत्तं सरीरं । तं च केरिसं ?-

उत्तुंगघोरसीसग्गभायधोलंतकुंतलकलावं । अंजणगिरिसिहरं पिव नवमेहसमूहपरियरियं ॥ १ ॥

सामानिक-
देवोपदेशः
गमनाय
वैक्रियं.

॥ २३७ ॥

अङ्घोरवयणकंदरफुरंतदाढाकडप्पदुष्पेच्छं । वयणुच्छलंतपञ्जलियजलणजालाकलाविलं ॥ २ ॥

दिसिचक्रमुक्कउम्भडभुयदंडकंततारयाचक्रं । उरपंजरुंदत्तणपच्छाड्यसूरकरपसरं ॥ ३ ॥

गंभीरनाभिमंडलपसुत्तफणिमुक्कफारफुकारं । उद्दामदीहजंघाभरभज्जिरचलणतलदेसं ॥ ४ ॥

कवल्लिउमणं व ससुरासुरं पि तेलोक्कमेक्कहेलाए । भीमाणवि भयजणं गयणयले पसरियं झत्ति ॥ ५ ॥

एवंविहेण य सरीरेण पहाविओ तुरियतुरियं सुराहिवइसंमुहं, तओ वेगवसवियम्भमाणमुहसमीरपवलत्तणपल्हत्थि-
यसवडंमुहावडंतसुरविमाणो लीलासमुल्लासियचलणकोडिताडियसमुत्तंगसेलटालियगंडपाहाणपहयभूमिवट्टो अंजणपुं-
जमेहसंदोहकलयंठभमरनियरसरिसेण देहपहापसरेण लवणजलहिवेलाजलुप्पीलेणेव पूरयंतो गयणंतं सरीरगस्यत्तणेण
भरित्तो व तिरियलोयं अणवरयगलगज्जिरवकरणेण फोडयंतो व वंभंडभंडोदरं कत्थइ जलवुट्ठिं सुयमाणो कत्थइ रेणुक्करं
किरंतो कत्थइ तिमिरनियरं निसिरंतो कत्थइ विज्जुपुंजमुग्गिरंतो वाणमंतरदेवे भएण छिन्नधन्नं व कंषयंतो जोइसिय-
तियसे वित्तासित्तो फलिहरयणमंवरतले वियट्टमाणो निमेसमेत्तेण विलंघियसूरसत्तिनक्खत्तमंडलो पत्तो सुरपुरं ।

अह तारिसविगरालरूवावलोयणेण विम्भिधा सुरसमूहा, हा किमेयंति समुल्लवंतीउ भयवसविसंडुलगलियनीवी-
बंधणाओ(जाया)धंभियध विहाविया सुहडसत्था जीवियनिरवेक्खावि संखुद्धा अंगरक्खा बालव विचलत्तणमुवगया
लोयपाला, किंकायधयाविमूढा जाया सामाणियदेवा, अखंतं चमकिशा तायत्तीसा विसरसमारसंतो य नट्टो एरावणो,

श्रीगुणचंद
महावीरच०
७ प्रस्तावः
॥ २३८ ॥

चमरिंदो पुण एगं चरणं पउमवरवेइयाए अवरं च सुहम्माए सभाए ठविऊण फलिहरयणेणं महया संरंभेण तिवसुतो
इंदकीलं ताडिऊण सरोसं एवं भणिउं पउत्तो--भो भो तियसाहम ! कहिं सो सगिहसच्छंदलीलाविलासलालसो
असमिक्खिवत्थुसमत्थणवियक्खणो नियसोंडीरिमावगन्नियसेसमुहडलोगो अदिट्ठकुसलमेत्तसंभावियसमग्गवेरिव-
ग्गविजओ पुरंदरो ? कहिं वा अलियवियट्ठिमावगणियजुत्ताजुत्तसमायारो सकज्जपसाहणामेत्तपयासियसामिसेवा-
पराओ ताओ चउरासीइं सामाणियसाहस्सीओ ? कत्थ वा निप्फलकलियविविहपयंडपहरणाडंवरओ चतारि ताओ
चउरासीओ आयरक्खदेवसाहस्सीओ ? कहिं वा उत्तुंगगिरिसिहरदलणदुल्लियं तभियणिं कुलिसं ? कत्थ वा ताओ
अप्पडिमरूवलायन्नमणहराओ अणेगाओ अच्छरकोडीओ ? अरेरे मा कज्जविणासंमि भणिस्सह जहा चमरचंचा-
राइणा अमुणियपयप्पयारेण ललेण विणिहया अम्हे, एसोऽहं संपयं तुब्भे अणाहे जरतरुं निम्मूलमुम्मूलेमि सक-
रालेहुं व फलिहरयणेण चूरेमि, किं बहुणा ? जुगवमेव सरणविरहिए कीणासवयणकुहरे पक्खिवामि, कुणह जमिह
कायवं सरेह सरणिजं मग्गह सजीवियसंरक्खणोवायं, अहवा दूरुत्तामियउत्तिमंगादंसियसंभावसारा समप्पह
सुरलोयसिरिं, किं निरत्थयमुवहह पुरंदरपक्खवायं ? पयडोच्चिय एस ववहारो-जं चिरकालपरिपालियावि कुलंगणा
कालंतरेऽवि नूणमणुसरइ पाणनाहं । अन्नं च—

अववइणव पुरंदर ! सह विरहे जं तए इमा भुत्ता । विणयपणयस्स तं पुण तुह सवमहं खमिस्सामि ॥ १ ॥

शकेन्द्रा-
दीनां
तिरस्कारः.

॥ २३८ ॥

सुमिणेवि अदिट्ठभया नियनियभवणोदरेसु य निलुक्का । विलसंतु सुरसमूहा मम पयपणइप्पसाएण ॥ २ ॥

अणुरुवपइसमागमपमोयभरनिस्सरंतपुलइल्ला । सुरपुरलच्छी वच्छत्थलंमि कीलउ जहिच्छं मे ॥ ३ ॥

अहवा किमिच्छिणं ?-मम बाहुपंजरंतरमल्लीणं तिहुअणंपि नीसेसं । आचंदकालियं वसउ मुक्कपरचक्कभयसंकं ॥ ४ ॥

इय ताव कुण पणामं सुरिंद ! नो जाव उत्तिमंगंमि । मोडियमउडकडप्पं निवडइ निविडं फलिहरयणं ॥ ५ ॥

असमिक्खियनियभुयविक्रमो तुमं जुज्झिउं मए सद्धिं । रंभातिलुत्तमाईण कीस वेद्वमुवणेसि ? ॥ ६ ॥

पढमं चिय कीरंते नयंमि नो दिंति दूसणं कुसला । कहविहु कज्जविणासे पच्छायावोऽवि नो होइ ॥ ७ ॥

एवं च असमंजसपलाविणं चमरमसुरिंदं निसामिऊण हेलए तिक्ककोवभरउक्कुट्ठभिउडिभंगुरियभुमयभीसणपलो-
यणेण भणियं पुरंदरेण—रे रे दुरायारसिरसेहर दूरपरिमुक्कमेर चमरासुराहम दुट्ठचिट्ठिमामित्तवित्तासियतियससत्थ !
पत्थेसि नूणमियाणिमपत्थणिज्जं ?, कहमन्नहा तुहेहागमणविसओ संभविज्जा ?, ता रे वारणोव ससरीरसंभवेण दसणा-
इणा सुरहिच्च केसकलावेण सारंगोव कत्थूरिगाए चंदणतरुव सोरब्भेण भुयंगमोव फणारयणेण एस तुमं नियदप्पेण
पणामिज्जसि विणासगोअरंति भणिऊण सिंहासणगएणं चिय सुरिंदेण सुमरियं वज्जं, तं च सुमरणाणंतरमेव उक्का-
सहस्साइं विणिम्मुयंतं जालाकलावं निसिरंतं जलणकणकोडीओ विक्खिरमाणं फुलिंगमालासहस्सोहिं चक्खुवि-
क्खेवमुप्पाएमाणं असेसइयवहनिवहनिम्मियं व सयलसूरकरनियरविरइयं व समंगतेयलच्छिविच्छइसंपिंडणुप्पाइयं

श्रीगुणचंद
महावीरच०
७ प्रस्तावः
॥ २३९ ॥

व ठियं करयले पुरंदरस्स, मुक्कं च तेण, तं च तहाविहमदिट्ठपुब्बं वेगेणागच्छमाणं पेच्छिऊण संभग्गसमरमच्छरुच्छाहो
सुमरियसामाणियासुरसिक्खावयणो वयणविणिस्सरंतदीहनिस्सासो पुत्तेहिं जइ परं पावेमि रसायलंति कयसंकप्पो
संभमुप्पिच्छतरलतारयच्छिच्छोहसंवलिचनहंगणाभोगो कहिंपि अत्ताणं गोविउमपारयंतो भयवसपकंपमाणपाणिंसं-
पुडपडियं फलिहरयणंपि अविगणंतो अविमुणियतक्कालोचियकायवो अलाहि सेसोवाएहिं, परं तिहुयणपडुणो पाय-
पंकयमियाणिं सरणंति सुमरिऊण उड्डुचरणो अहोसिरो वेगगमणसमुप्पन्नपरिस्समनिस्सरंतकक्खासेयसलिलोव उ-
क्किट्ठाए चवलाए [दीहाईए] गईए जिणाभिमुहं पलाइउं यवत्तो, अवि—

निहलियदप्पविभवत्तणेण जायं न केवलं तस्स । लहुवत्तं देहेणवि वेगेण पलायमाणस्स ॥ १ ॥

एसो सो किं वच्चइ जेण तहा जंपियं हरिसमक्खं । पहसिजंतो इय दिन्नहत्थतालेहिं तियसेहिं ॥ २ ॥

तह कहवि देहपब्भारभरियभुवणोदरोऽवि चमरिंदो । तवेलं लहु जाओ जह न मुणिज्जइ पयंगोव ॥ ३ ॥

तं च कुलिसं सुरयइपयत्तपक्खित्तं जलणजालाफलावाउलियदिसामंडलं कवलयंतं व एक्केहेलाए सयलमाखंडल-
पडिवक्खं जावऽज्जवि येवमेत्तेण न पावइ सिरमंडलं ताव भयगग्गरसरो-भयवं ! तुममियाणिं सरणंति जंपमाणो
पविट्ठो जयगुरुणो उस्सग्गट्ठियस्स चरणकमलंतरे चमरो एत्थंतरे सहस्सनयणस्स जाओ चित्तसंकप्पो-अहो न खलु
दणुवइणो अप्पणो सामत्थेण सोहम्मकप्पं जाव संभवइ आगमणं, केवलं भगवंतं तित्थयरं अरिहंतचेइयं वा भावि-

चमरेन्द्रे
वज्रमोचनं.

॥ २३९ ॥

अप्यं सुसमणं वा निस्साए काऊण इहागओ हविज्जा, ता बाढं अजुत्तं परभवदुहावहं एवमावडिहिसिचिंतिकुण
पउत्तो ओही, दिट्ठो य भयवओ पायपंकयमणुसरमाणो कुंथुव सुहुमदेहो चमरासुरिंदो, तं च दट्ठण सहसच्चिय
जायचित्तचमकारो हाहा इओ मिह मंदभग्गोत्ति वाहरमाणो अच्चंतसिग्घाए गईए वज्जमग्गेण पहाविओ पुरंदरो,
जाव य जिणुत्तमंगंमि चउरंगुलमपत्तं जायं वज्जं ताव तक्खणमेव पडिसंहरियमणेण, नवरं अहसिग्घममणवसेण
करयलसमीरणेण तरलिया जयगुरुणो कुंचिरा अग्गकेसा, तओ पुणो पुणो सदुच्चरियं निंदमाणेण तिपयाहिणी-
काऊण वंदिओ सामी परमभत्तीए, खामिउमारद्धो य—

देव! पसीयह न मए वियाणियं तुम्ह चरणनिस्साए । जं एसो चमारिंदो समागओ मं पराभविउं ॥ १ ॥

इण्हि चिय विन्नायं करयलपल्हत्थियंमि कुलिसंमि । ता पणयवच्छल ! लहुं अवराहमिमं खमसु मज्झ ॥ २ ॥

न पुणोवि भुवणबंधव ! संसारपरंपरापरमवीयं । एवंविहं अकिच्चं कइयावि अहं करिस्सामि ॥ ३ ॥

इति सविणयं खामिऊण जयगुरुं सको उत्तरपुरच्छिमदिसिविभांगंमि ठाऊण वामेण चरणेण तिक्खुत्तो भूमि-
तलमवदालिऊण दणुनाहं मण्णुं पवत्तो—भो भो असुराहिव ! सुंदरं तुमए कयं जमसेसजयजंतुसंरक्खणेकदिविस्व-
यस्स पडुणो पयपंकयंतरे तिरोहिओऽसि, एवं च कुणमाणेण तए दट्ठमावज्जियं मम हिययं, अवणीओ पुववेरा-
णुबंधो, जणिओ आमरणंतं अब्बिचरियपणयभावो, ता विहरसु जहिच्छाए, भगवओ पहावेण नत्थि तुह ममा-

श्रीगुणचंद
महावीरच०
७ प्रस्तावः

॥ २४० ॥

हिंतो भयंति आसासिऊण जहागयं पडिनिचत्तो तियसाहिबो ।

चमरोऽवि हरिसुकरिसवियसंतवयणकमलो भगवओ पायकप्पपायवप्पभावपरिगहिओ निरुवसगं नीहरिऊण
जहाविहिं भयवंतं पणमिऊण थुणिउमाढत्तो—

सयलजयजीवबंधव ! झाणानलदड्ढकम्मवणगहण ! । तिबपरीसहसहणेकधीर ! जय जय महावीर ! ॥ १ ॥

सिद्धिवहुबद्धपडिबंध ! बुद्धसद्धम्मबंधुरनिहाण ! । चामीयरसरिससरीरकंतिविञ्छुरियदिसिनिवह ! ॥ २ ॥

नाह ! तुह पायछायालीणं नो भवभयंपि अकमइ । किं पुण सहावभंगुरगिरिदलणुहंतुरं कुलिसं ? ॥ ३ ॥

जत्थ तुह नाह ! सरणं उवेइ ससुरासुरंपि तइलोकं । पायतले तत्थ ठियस्स कह णु वयणिज्जया मज्झ ? ॥ ४ ॥

पत्तच्चिय सुरपुरसंपयावि परमत्थओ मए देव ! । अब्भुदयमूलवीयं जं पत्तं तुम्ह पयकमलं ॥ ५ ॥

लब्भंति सामि ! जइ मग्गियाइं निरवग्गहाइं भत्तीए । पइजम्मं चिय ता तुम्ह चलणवासं लभेज्जमहं ॥ ६ ॥

इय चमरिंदो सन्भावसारवयणेहिं संथुणिय वीरं । नित्थरियगरुयहरिभयमहन्नवो अइगओ सपुरिं ॥ ७ ॥

जयगुरुवि पभायसमए एगराइयं महापडिमं पडिसंहरिऊण निक्खंतो सुंसुमारपुराओ, कमेण य पत्तो भोगपुरं नयरं,
तत्थ य महिंदो नाम खत्तिओ अकारणसमुप्पन्नतिबकोवाणुबंधो भयवंतं दट्ठण खज्जूरितरुलट्टिसुग्गीरिऊण धाविओ
वेगेण हणणनिमित्तं, एत्थंतरे चिरदंसणपाउब्भूयभत्तिपब्भारो समागओ तं पएसं सणंकुमारसुराहिबो, दिट्ठो य

वीरशरणं
चमरमुक्तिः
चमरकृता
वीरस्तुतिः.

॥ २४० ॥

सो तद्वाविह्वेगेण जिणाभिमुहं इतो, तओ तं निवारिऊण सुरिंदेण पणमिओ जयगुरू, पुच्छिया परीसहपराजय-
पहाणसरीरवत्ता, गओ य जद्वाभिमयं ।-भयवंपि वद्धमाणो पलीणमाणो सुरिंदकयमाणो । तत्तो विनिक्खमित्ता
नंदिग्गामं समणुपत्तो ॥१॥ नंदीनामेण तहिं पिउमित्तेणं थुओ य महिओ य । तत्तो य नीहरित्ता समागओ मिंढय-
ग्गामं ॥२॥ तत्थ य गोवो कोवेण धाविओ वालरज्जुयं घेत्तुं । जयगुरूणो हणणत्थं, सो य निसिद्धो सुरिंदेण ॥३॥

अह भयवं गामाणुगामगमणेण पत्तो निरंतरधवलहरमालालंकियं सुविभत्ततियचउक्कचचरेहिरं कोसंविपुरिं,
तत्थ य भूपालणगुणनाडीनिविडनिबद्धविपक्खरायलच्छिकरेणुगो सयाणिओ नाम नराहिवो, तस्स य चेडगमहा-
नरिंददुहिया अहिगयधम्मपरमत्था तित्थयरपायपंकयपूयणपरायणा मिगावई नाम भारिया, मुणियनिसेसरायं-
तरचारो सुहुमबुद्धिविभवपरिवालियरज्जभारो सुगुत्तो य अमच्चो, तस्स य सयावि जिणधम्माणुरागसंभिन्नसत्तसरी-
रधाऊ नंदा नाम भज्जा, सा य सावियत्ति काऊण मिगावईए देवीए सद्धिं वयंसियाभावं दंसेइ, अन्नो य सयलदरिसणभि-
प्पायपरूवणानिरओ नरिंदसम्मओ तच्चावाई नाम धम्मपाढओ, तद्वा तत्थेव नयरीए विवणिजणचक्खुभूओ धणावहो
नाम सेट्ठी, मूला य से भारिया, एयाणि नियनियकुसलाणुट्ठाणसंगयाणि वसंति, तत्थ य भयवया पोसवहुल-
पाडिवए एवंविहो दुरणुचरो अभिग्गहो पडिवन्नो, जहा-जइ कालायसनियलवद्धचलणा अवणीयसिरोरुहा सोय-
भरावरुद्धकंठगग्गरगिरं रुयमाणी रायकन्नगावि होऊण परगिहे पेसत्तणं पवन्ना तिन्नि दिणाइं अणसिया घरभंतर-

श्रीगुणचंद
महावीरच०
७ प्रस्तावः
॥ २४१ ॥

निहितेकचलणा बीयचलणलंघियघरदुवारदेसा पडिनियत्तेसु सयलभिक्षायरेसु सुप्पेण कुम्मासे पणामेइ ता परमहं पारेमिति कयनिच्छओ पुरजणेण अणुवलक्खिज्जमाणाभिग्गहविसेसो वावीसपरीसहसहणट्ठाए असंपज्जंत-जहिट्ठियभोगोऽवि पइदिवसं उच्चावएसु मंदिरेसु पयत्तो परिभमिउं जयगुरू । पुरजणोऽवि भयवंतं अगहियभिक्षं अणुदिणं गेहंगणाओ चेव नियत्तमाणं पेच्छिऊण अचंतसोगसंभारतरलियमाणसो किंकायवयावामूढो चित्ति-उमारद्धो, कहं?—

किं दुहनिबंधणेणं धणेण ? किं तेण मणुयभावेण ? । भोगोवभोगलीलाए ताए किं वा दुहफलाए ? ॥ १ ॥

जइ एवंविहमुणिपुंगवस्स गेहंगणं उवगयस्स । पाणन्नपयाणेणवि उवयारे नेव वट्टामो ॥ २ ॥ जुम्मं ॥

कह वा कम्मजलाउलमणेगदुहमयरभीसणावत्तं । संसारसायरमिमं दाणेण विणा तरिस्सामो ? ॥ ३ ॥

अहवा धन्नाण गिहे पविसइ एवंविहं सुमुणिरयणं । भिक्षापरिग्गहेण य अइधन्नाणं जणइ हरिसं ॥ ४ ॥

जइ एकं चिय वेलं कहमवि पडिलाभिओ हवइ एसो । ता पाणिपल्लवे संवसंति सुरमोक्खसोक्खाइं ॥ ५ ॥

इय जह जह जिणनाहो भूरिपयारेहिं दिज्जमाणंपि । भिक्षं नो अभिकंखइ तह तह खिज्जइ पुरीलोगो ॥ ६ ॥

एवं च चत्तारि मासे कोसंबीए हिंडमाणो भयवं अन्नया पविट्ठो सुगुत्तमंतिणो भवणं, दूराओ चिय दिट्ठो सुनं-दाए, पच्चभिन्नाओ य जहा सो एस भयवं महावीरसामित्ति, तओ अणाइक्खणिज्जं पमोयपन्भारसुवहंती उट्ठिया

कौशाम्ब्यां
श्रीवीरा-
भिग्रहः
राश्यादि
शोकः.

॥ २४१ ॥

झडत्ति आसणाओ, नीणिआ परमायरेण भिक्खा, भयवंपि निग्गओ गेहाओ, सुनंदावि अद्धिइं काउमारद्धा, ताहे दासीहिं भणियं—सामिणि ! एस देवज्जओ न मुणिज्जइ केणइ कारणेणं दिणे दिणे अगहियभिक्खो तक्खणे पडि-
नियत्तइ, एवं भणिए तीए नायं, जहा-नूणं कोइ अभिग्गहविसेसो, तेण तंमि असंपज्जमाणे अकयकज्जो चेव निज्जाइ जिणिंदो, इमं च से चिंतयंतीए जाओ बाढं चित्तसंतावो पम्हुट्ठा गेहवाचारा विमुमरिओ सरीरसिंगारो पल्हत्थियं
करकिसलए गंडयलं, एत्थंतरे समागओ सुगुत्तामच्चो, पलोइया य एसा तेण, तओ पुच्छिया, जहा-कमलमुहि !
कीस निक्कारणं रणरणयमुवहंतिव लक्खिज्जसि ?, न ताव सुमरेमि मणागंपि अत्तणो अवराहं, मइ अविणयपरि-
हारपरायणे परयणोऽवि न संभाविज्जइ तुह पडिकूलकारित्ति, तीए भणियं—पाणनाह ! अलमलियसंभावणाहिं,
नत्थि थेवमेत्तोऽवि कस्सइ अवराहो, केवलं जस्सप्पभावेण लीलाए लंघिज्जइ दुग्गमोवि भवन्नवो मणोरहागोयरंपि
पाविज्जइ अपुणागमं सिवपयं अइदूरुल्लसिओऽवि विहविज्जइ अकल्लाणकोसो तस्स भयवओ भुवणनाहस्स वद्धमा-
णसामिणो बहूइं वासराइं अणसियस्स, न मुणिज्जइ कोइ अभिग्गहविसेसो अणेण गहिओत्ति, अओ किं तुम्ह
बुद्धीविभवेण ? किं वा अमच्चत्तणेणं ? जइ एवं अभिग्गहं न जाणहत्ति, अमच्चेण भणियं—पिए ! परिचयसु संतावं,
कल्ले तहा करेमि जहा एस अभिग्गहो मुणिज्जइ, इय एयाए कहाए वट्टमाणीए विजया नाम पडिहारी मिगावईए
देवीए संतिआ, सा केणइ कारणेण आगया, तमुल्लावं सोऊण मिगावईए सवं परिकहेइ, इमं च सोचा मिगावईवि

श्रीगुणचंद
महावीरच०
७ प्रस्तावः
॥ २४२ ॥

महादुक्खेण अभिभूया, सोगाउरा जाया, राया य तं पएसमणुपत्तो पुच्छइ-देवी ! किं विमणदुम्मणा लक्खिज्जसि ?, तीए भणियं-देव ! किं परिकहेमि ?, तुम्हे दुग्गदुग्गइगमणमूलेण इमिणा रज्जभरेण पच्छाइयविवेया एत्तियंपि न मुणह, जहा कत्थ सामी विहरइ ?, कंहं वा भिक्खं परिभनइत्ति, वहुं निब्भच्छिऊण साहिओ अभिग्गहवइयरो, राइणा भणियं-देवि ! वीसत्था होहि, कळे सब्बपयारेहिं जाणामि परमत्थंति भणिऊण उवविट्ठो अत्थाणमंडवंमि, वाहराविओ सुगुत्तामच्चो, समागओ एसो, तओ पणमिऊण राइणो पायपीढं उवविट्ठो जहोचियासणे, भणिओ राइणा-अहो अमच्च ! किं जुत्तमेयं तुज्झ जं भयवंतं इह विहरमाणंपि न जाणसि ?, अहो ते पमत्तया अहो ते सद्धम्मपरंमुहया, अज्ज किर सामिस्स चउत्थो मासो निरसणस्स अविन्नायाभिग्गहविसेसस्स वट्ठइत्ति, सुगुत्तेण भणियं-देव ! अवरावरकज्जंतराऊरियघरवासवासंगित्तणेण न किंपि मुणियं, इयारिं पुण जं देवो आणवेइ तं संपा-डेमिस्ति भणिए रत्ता सदाविओ तच्चावाई धम्मसत्थपाढगो, पुच्छिओ य एसो-जहा भइ ! तुह धम्मसत्थेसु सब्बपासंडाणं आयारा निरुविज्जंति, ता साहेहि को भगवया अभिग्गहविसेसो पडिवत्तोत्ति ?, तुमंपि अमच्च ! बुद्धि-वलिओ, अओ वीमंसेसु को एत्थ उवाओ ?, खणंतरं च वीमंसिऊण तेहिं भणियं-देव ! वहवे दव्वखेत्तकालभावमे-यभिन्ना अभिग्गहविसेसा सत्त पिंडेसणाओ सत्त य पाणेसणाओ हवंति, अओ न नज्जइ कोऽपि अभिप्पाओत्ति । तओ रत्ता सब्बत्थ नयरीए काराविया उग्घोसणा, जहा-भयवओ भिक्खं भमंतस्स अणेगप्पगारेहिं भिक्खा नीणि-

अमात्या-
दिचिन्ता
अभिग्रहो-
द्घोषणा.

॥ २४२ ॥

यवत्ति, इमं च निसामिऊण परलोयसुहकंखिणा विचित्तनेवत्थधारिणा अप्पमत्तचित्तेण नयरजणेण पइण्णामंदरस्स गोयरचरियं पविट्ठस्स भयवओ पइदिणं पणामिज्जइ अणेगप्पयारेहिं भिक्खा, न य धिप्पइ सामिणा, एवं च कहिं पि असंपज्जमाणजहासमीहियपिंडविसुद्धीवि अमिलाणसरीरलायन्नो अदीणमणो य ठिओ तीए चेव पुरीए भयवं । एयं ताव एवं ।

इओ य-सयाणियस्स रत्तो चारपुरिसेहिं आगंतूण कहियं जहा-देव ! तुम्ह पुव्वेरी दहिवाहणो राया संपयं योवपरिवारो पमत्तो य वट्ठइ, अओ जइ पंचरत्तमेत्तेण देवो तत्थ वच्चइ ता निच्छियं समीहियत्थसिद्धी जायइत्ति-पभणिण राइणा दयाविया सन्नाहभेरी, संवूढा सुहडा संखुद्धा सामंता, चलिओ राया महासामग्गीए, आरूढो य नावासु, तओ अणुकूलयाए पवणस्स दक्खत्तणेणं कन्नधारजणस्स एगरयणिमेत्तेण अर्चितियागमणो संपत्तो चंपा-पुरीं, असंखुद्धा चेव वेढिया एसा, दहिवाहणोऽवि सामग्गिं विणा जुज्झिउमपारयंतो किमेत्थ पत्थावे कायवन्ति वाउलमणो भणिओ मंतिजणेण-सामि ! कीस मुज्झइ, सब्बहा एत्थावसरे पलायणमेव जुत्तं ।

यतः—त्यजेदेकं कुलस्यार्थं, ग्रामस्यार्थं कुलं त्यजेत् । ग्रामं जनपदस्यार्थं, आत्मार्थं पृथिवीं त्यजेत् ॥ १ ॥

प्रस्तावसदृशं वाक्यं, सद्भावसदृशं प्रियम् । आत्मशक्तिसमं कोपं, यो जानाति स पण्डितः ॥ २ ॥

विक्रमावर्जिताः सद्यः, संपद्यन्ते पुनः श्रियः । जीवितव्यमवक्रान्तं, तेन देहेन दुर्लभम् ॥ ३ ॥

श्रीगुणचंद
महावीरच०
७ प्रस्तावः
॥ २४३ ॥

सर्वेषामेव वस्तूनां, जीवितव्यमनुत्तमम् । तदर्थं राज्यलक्ष्म्याद्यास्तच्चेत् नष्टं वृथा परम् ॥ ४ ॥
एवं तेहिं भणिओ सरीरमेत्तेण पलाणो दहिवाहणो, सयाणियरन्नावि घोसावियं नियखंधावारे, जहा-भो भो ! दंड-
नाहसुहडपमुहा चमूचरा ! गेणहेज्जह जहिच्छाए एत्थ नयरीए जं जस्स रोयइ, मा ममारहितो मणागंपि संकेज्जहत्ति,
एवं जग्गहे घुट्टे पयट्ठो रायलोगो भग्गो पागारो विहाडियाइं गोपुरकवाडाइं लुंदिउमारद्धं असेसंपि नयरं, तहाविहे
य असमंजसे वट्ठमाणे दहिवाहणस्स रत्तो अग्गमहिसी धारिणी नाम देवी वसुमईए दुहियाए समं इओ तओ पलाय-
माणी पत्ता एगेण सेवगपुरिसेण, रायावि संपाइयसमीहियपओयणो पडिनियत्तो नियनयरिहुत्तं, सो य सेवगो
धारिणीदेवीए रूवेण लायन्नेण सोहग्गेण य अवहरियहियओ पहे वच्चंतो जणाणं पुरो भणइ-एसा मम पत्ती होदी,
एयं च कन्नगं विक्किणिस्संति, एयं च से उल्लावं सुणिऊण भयभीया धारिणी चित्तिउं पवत्ता—

कह ससहरकरधवले कुलंमि नीसेसमुवणपयडंमि । जाया मह उप्पत्ती चेडयनरनाहगेहंमि ? ॥ १ ॥
कह वा नमंतसामंतमउलिलीढग्गपायवीढेण । दहिवाहणेण रत्ता ठवियाऽहं पणइणिफयंमि ? ॥ २ ॥
कह वा जिणिंदयणारविंदसंभूयसमयसवणुत्था । मम सययं वसइ मणे अकज्जविवरंमुहा बुद्धी ? ॥ ३ ॥
कह एस हीणसत्तोवि मुक्कमेरं ममं समुद्दिस्स । चागरइ जहा महिलं अहमेयं किल करिस्सामि ? ॥ ४ ॥
ता पावजीव ! अज्जवि अस्सुयपुवं इमंपि सुणिऊण । किं निहरेसि न निलज्ज ! गंजणं सहसि सीलस्स ॥ ५ ॥
हरहासहंसधवलं सीलं मयलंति नो सुकुलजाया । करिकन्नतालचंचलजीवियकजेण कइयावि ॥ ६ ॥

चम्पाभंगो
धारणी-
मरणं चन्द-
नाविक्रयः.

॥ २४३ ॥

कह वाविहु मम दुहिया एसा उच्छंगसंगसंभूया । परहतथगया धरिही नियजीयं विरहसंतत्ता ? ॥ ७ ॥

इय एवंविहसंकप्पकप्पणुप्पन्नतिवदुक्खाए । निब्भच्छियं व जीयं नीहरियं से उरो भेतुं ॥ ८ ॥

तीसे य अपत्तकालमरणं अवलोइऊण चित्तियं तेण सेवगपुरिसेण, अहो दुट्ठं मए भणियं—महिला होहिति, एसा हि महाणुभावा कस्सइ पुरिसोत्तमस्स भज्जा संभाविज्जइ, अओ चिय मम दुव्वयणायन्नणेण संखुहियहियया मया, ता किमित्थ अइकंतत्थसोयणेण?, एयं कन्नगं इयारिणं न किंपि भणिस्सामि, मा एसावि मरिहिति । ताहे महुरवय-
णेहिं अणुअत्तमाणा आणीया कोसंबीं नयरिं, विक्कयनिमित्तं च उड्डिया रायमग्गे, अह धम्मकम्मसंजोएण तप्पएस-
जाइणा दिट्ठा सा धणावहसेट्ठिणा, चित्तियं चऽणेण-अहो एरिसाए आगिईए न होइ एसा सामन्नजणदुहिया, जओ
अणलंकियावि जलहिवेलव वइइ किंपि अपुवं लावन्नं, किससरीरावि मयलंछणलेहव पायडइ कंतिपडलं, ता
जुज्जइ एसा मम बहुदव्वदाणेण गिण्हित्तए, मा हीणजणहतथगया पाविही वराई अणत्थपरंपरं, एयसंगोवणेण य
जइ पुण इमीए सयणवग्गेण ममं समागमो होज्जत्ति कलिऊण जेत्तियं सो मोलं भणइ तत्तियं दाऊण गहिया,
नीया सगिहे, पुच्छिया य-पुत्ति! कस्स तं धूया? को वा सयणवग्गो?, तओ उत्तमरायकुलपसूयत्तणेण सयं नियव-
इयरं कहिउमपारयंती ठिया एसा मोणेणं, पच्छा सेट्ठिणा धूयत्ति पडिवन्ना, समप्पिया मूलाभिहाणाए सेट्ठिणीए,
संलत्ता य एसा-जहा पिए! धूया इमा तुह मए दिन्ना, ता गोरवेण संरक्खेज्जासि, एवं च जहा निययघरे तहा

श्रीगुणचंद
महावीरच०
७ प्रस्तावः
॥ २४४ ॥

सा तत्थ सुहेण संवसइ, ताए य सो सेट्ठी सपरियणो लोगो य सीलेण विणएण वयणकोसलेण य वाढं रंजिय-
हियओ समानो चंदणसिसिरसहावत्तणओ पुवाभिहाणमयणेऊण चंदणत्ति वीयं नामं ठवेइ, एवं सा चंदणत्ति परि-
यणेण वाहरिज्जंती बद्धिउमारद्धा, गच्छंतेसु य दिणेषु विंयंभियो से ईसि जुवणारंभो, तवसेण य समुल्लसियो
सविसेसं लायन्नपगरिसो, विजियकुवलयविन्भमं वित्थरियं नयणजुयलं, अलिकुलकज्जलकसिणो दीहत्तणं पत्तो केस-
पासो । अविय—

रुवपरिवज्जिओऽविहु जुवणसमयंमि हवइ सस्सिरीओ । किं पुण सभावओ चिय सुकुमारा सा नरिंदसुया ? ॥ १ ॥
तीसे य पइदिणं बद्धमाणिं रुवसंपयं पलोयंती मूला सेट्ठिणी वाढं मच्छरमावहइ, परिचिंतेइ य, जहा—को एयं
सहहिज्जा जन्न इमं सेट्ठी परिणेऊण घरसामिणी करेज्जा?, ता सबहा मम विणासाय होअवमेयाए, अओ जइ
किंचि छिदं पावेमि ता एयं ववरोएमि । अन्नया य सो धणावहसेट्ठी गिम्हुण्हकिलंतदेहो विवणिपहाओ आगओ
नियमंदिरं, तम्मि य पत्थावे परियणाओ नत्थि कोऽवि जो चलणपक्खालणं करेइ, ताहे अइविणीयत्तणेण चंदणा
समुट्ठिया पाणियं गहाय पायसोहणत्थं, निवारिज्जमाणावि सेट्ठिणा जणगोत्ति कलिऊण पयट्ठा घोविउं, अह नीस-
हत्तणओ कुमारभावस्स सिट्ठिलियबंधणो होऊण निवडिओ भूमियले दीहो से कुंतलकलावो, मा चिक्खले पडि-
हित्ति करकलियलीलालट्ठीए समुक्खित्तो निवियारमणेण सेट्ठिणा, बद्धो य । एत्थंतरे अणवरयछिहपेच्छणपराए

धनावहेन
ग्रहणं चन्द-
नानाम
मूलाया
अमर्षः.

॥ २४४ ॥

ओलोयणंतरगयाए दिट्ठमिमं पावाए अणत्थमूलाए मूलाए, ताहे ईसाभरवित्थरंतदढकोयपाडलच्छीए इत्थीसभावओ चिय अचंतं तुच्छहिययाए चित्तियमेयाए इमं-जं पुर्विं तक्कियं मए आसि तमियाणिं पयडत्तणमणुभवइ विगप्प-परिहीणं, कहमन्नहा जणगत्तं वायाभेत्तेण जंपिऊण पुरा सेट्ठी इमीए दइओव केसपासंपि संजमइ, ता जावज्जवि लज्जं समुज्झिऊणं न पणइणिपयंमि ठवेइ सेट्ठी एयं ताव उवायं करेमि अहं, इय सुविसुद्धंपि जणं विवरीयं नियमईए कलिऊण मूला मूलाउ चिय उद्धरिउं चंदणं महइ । अह पक्खालियवलणे खणं कयवीसामे बाहिं नीहरियंमि धणावहे ईसावसुप्पन्नमच्छराए सेट्ठिभज्जाए वाहराविऊण ण्हावियं मुंडावियं चंदणाए सीसं, बहुं ताडिऊण लोहसंकलाए चरणे निगडिऊण य पक्खित्ता एसा दूरयरमंदिरंमि, दिन्नं निविडकवाडसंपुडं, भणिओ य परियणो-जो सेट्ठिणो इमं वइयरं साहिस्सइ तस्सवि एस चेव दंडो मए कायवो, अओ वाढमापुच्छमाणेऽवि सेट्ठिमि न कहे-यवमेयंति पुणो पुणो पन्नविऊण गया सगिहं । विमालसमए य समागओ धणावहो, कहिं चंदणत्ति पुच्छिओ परियणो?, मूलाभएण न सिद्धं केणावि, तेण नायं-पासायतले कीलंती भविस्सइ, एवं रयणीएवि पुच्छिया, तत्थवि तेण नायं-जहा पसुत्तत्ति, नवरं बीयदिवसेऽवि न दिट्ठा, तइयदिणे य अचंतमाउलचित्तस्स आपुच्छमाणस्सवि पुणो पुणो जाव न कोइ साहेइ ताव जाया से आसंका-मा केणइ विणिहया होज्जत्ति, समुप्पन्नगाढकोवो भणिउं पवत्तो-अरे रे साहेइ अवितहं तीसे पउत्तिं, अहवा भे सहत्थेण मारइस्सं, जओ एरिससुपउत्तडंभाडंवरण न मुणिज्जइ तुम्ह

श्रीगुणचंद
महावीरच०
७ प्रस्तावः
॥ २४५ ॥

कुसलत्तणंति भणिए चिंतियमेक्काए थेरदासीए, जहा जीवियहि बहुकालं सयमेव, पच्चासन्नमियाणिं मरणं, एत्तो-
ऽवि किं करिस्सइ मे मूला?, ता साहेमि चंदणं, जीवउ मम जीविएणवि सा वराई, परजीवरक्खणं हि महापुत्रं
बुच्चइ समयसत्थेसुत्ति चिंतिऊण सिट्ठो सेट्ठिणो परमत्थो । दंसियं च तं गिहं जत्थ सा अवरुद्धा अच्छइत्ति, तओ
गंतूण उग्घाडियं तं गिहं सेट्ठिणा, पलोइया य सिरोऽवणीयकेसपभारा जुहाकिलामियसरीरा मत्तमायंगचलणमलिय-
कमलमालव विमिलाणदेहच्छवी चंदणा, तं च दट्ठूण गलंतवाहप्पवाहाउल्लोयणो-पुत्ति! वीसत्था होहिति समा-
सासिऊण गओ महाणससालाए, निरुवियाइं भोयणभंडाईं, कूराइयं च विसिट्ठं भोयणमपेच्छमाणेण कुम्मासे बिय
सुप्पकोणे घेत्तूण समप्पिया चंदणाए, भणिया य-पुत्ति! जाव अहं तुह नियलभंजणनिमित्तं आणेमि लोहयारं ताव
भुंजसु तुमं एयंति भणिऊण गओ सेट्ठी, सावि सुप्पप्पणामिए दट्ठूण कुम्मासे करिणिव जूहपभट्टा नियकुलं संम-
रिऊण सोइउं पवत्ता । कहं?—

जइ ताव दइव ! तुमए नरवइगेहे अहं विणिम्मविया । ता कीस एरिसावयमहणवे दुत्तरे खित्ता ? ॥ १ ॥
सा रायसिरी सो जणणिजणगसम्भावनिम्भरो नेहो । कह सवंपि पणट्ठं गंधवपुरव वेगेण ? ॥ २ ॥
खणमुलसंति उहं खणेण निवडंति हेट्ठओ सहसा । खरपवणुदुयधयवडसमाइं ही विहिविलसियाइं ॥ ३ ॥
इय दुवइसोगभरावरुद्धकंठक्खलंतवयणा सा । निवडंतसलिलवाहप्पवाहधोयाणणा बाला ॥ ४ ॥

चन्दनाया
निरोधः श्रे-
ष्ठिज्ञानं कु-
ल्माषदानं
शोकः.

॥ २४५ ॥

तण्हालुहाकिलामियकवोलमह पाणिपल्लवे ठविउं । वयणं खणंतरं रोविऊण दीहं च नीससिउं ॥ ५ ॥

ते सुप्पकोणनिसिए कुम्मासे सुणिमणं व निजेहे । गिण्हइ भोयणहेउं किमभवखं छुहकिलंताणं ? ॥ ६ ॥

अह चित्तियमेयाए जइ एज्ज इमंमि कोइ पत्थावे । अत्तिही ता से दाउं जुज्जइ मह भोयणं काउं ॥ ७ ॥

इति परिभाविऊण पलोइयं दुवाराभिमुहं, एत्थंतरे चुन्नियचामीयररेणुसुंदरेण कायकंतिपडलेण पूरयंतोव गयण-
यलंगणं उवसंतकंतदिट्ठिप्पहापीऊसवरिसेण निव्वंतोव दुहसंतत्तपाणिगणं नगनगरसिरिवच्छमच्छसोवत्थियलंछिएण
चलणजुयलेण विचित्तचित्तंकियं व कुणमाणो महीयलं सुहकम्मनिचओव पच्चक्खो अहाणुपुष्पीए विहरमाणो
समागओ तं पएसं भयवं महावीरजिणवरो, तयणंतरं अप्पडिमरूवं भयवंतं ददूण अबंतमसारं कुम्मासभोयणं च
निरिक्खिऊण दूरमजुत्तमेयं इमस्स महामुणिस्सत्ति विभावमाणीए सोगभरगग्गरगिराए गलंतबाहप्पवाहाउल्लो-
यणाए भणियमणाए-भयवं ! जइवि अणुचियमेयं तहावि मम अधन्नाए अणुरगहट्ठं गिण्हइ कुम्मासभोयणंति,
भयवयावि धीरहियएण निरुविऊण समग्गाभिग्गहविसुद्धिं पसारियं पाणिपत्तं, तीएवि निविडनिगडजडियं कह-
कहवि दुवारस्स बाहिरुहेसंमि काऊण चलणमेक्कमवरं च भवणच्चंतंरंमि सुप्पेण पणामिया कुम्मासा, अह जयगुरुग-
रुयाभिग्गहपूरणपरितुट्ठा गयणयलमवयरिया चउच्चिहा देवनिवहा पहया हुंदुही पडिया य पारियायमंजरीसणाहा
भणिरभमरोलिसंवलिया कुसुमवुट्ठी वरिसियं गंधोदयं निवडिया अद्धत्तेरसकोडिमेत्ता सुवण्णरासी मंदंदोलियविलया

श्रीगुणचंद
महावीरच०
७ प्रस्तावः
॥ २४६ ॥

य वल्लरीकला पवाइओ सुरभिसमीरणो वियंभिओ भवणभंतरे जयजयारवो । अविय—
दिसिदिसिमिलंतहरिसियनायरजणजणियवहलहलवोलं । नचंततरुणिसत्थं वज्जंताउज्जसंघायं ॥ १ ॥
पइखणपहिट्टसुरगणतिवइप्फोडणनिनायभरियनहं । मंगलमुहलसुरंगणसमूहसंसोभियदियंतं ॥ २ ॥
इय जयपहुपारणगे न केवलं हरिसियं तमेव पुरं । सविसेसरंजियमणा जाया पायालसग्गावि ॥ ३ ॥
एवंविहे य परमपमोयसंभारे समुप्पन्ने मुणियजयगुरुपारणगवुत्तंतो समागओ करेणुगाखंधाधिरूढो पहाणपुरजणा-
णुगओ अंतैउरसमेओ सयाणियनरनाहो, अमच्चोऽवि भज्जासहिओ संपत्तो सेट्ठिमंदिरं, पेंखोलिरतारहाररेहंतवि-
च्छिन्नवच्छत्थलो माणिकमउडदिप्पंतउत्तिमंगो कडयतुडियथंभियबाहुपरिहो पुरंदरो य, तीसे य चंदणाए देवयाणु-
भावेण पुवंपिव नीहरिओ पवरचिहुरभारो नियलाणिवि जच्चकंचणमयाणि नेउराणि जायाणि, अन्नेहि य हारद्धहारक-
डिसुत्तयकडयकुंडलतिलयपमुहरयणाभरणेहिं अलंकियमसेसं सरीरं । एत्थंतरे संपुलो नाम दहिवाहणरत्तो कंचुइज्जो
सयाणियरत्ता पुवं बंधिऊण जो आणिओ आसि सो तक्खणं चिय वसुमइं ददूण जायपच्चभिन्नाणो सुमरियपुव्वसुच-
रिओ तीसे पाएसु निवडिऊण सुक्कपोक्कारं रोविउमारद्धो, महुवरयणेहिं आसासिऊण कोऊहलेण पुच्छिओ राइणा-
भद्द! केण कारणेण एयाए पायपंकए निवडिऊण सहसच्चिय अचंतसोगनिम्भरं परुत्तोऽसि?, तेण जंपियं—देव! चंपा-
पुरीपरमेसरदहिवाहणरायग्गमहिसीए धारिणीदेवीए असेससीमंतिणीतिलयभूया धूया एसा, कहं तारिसविभवसमुदयं

श्रीवीरपा-
रणं राजा-
गमः निग-
डादीनां
नूपुरादि.

॥ २४६ ॥

पाविऊण इयाणिं नियजणणिजणगरहिया परगिहे वसइत्ति एएग कारणेणं, राइणा भणियं-भइ! मा सोएसु असोयणिज्जा हि एसा जीए तिहुयणेकदिवायरो भवगत्तपडंतजणलग्गणेकखंभो भयवं सहत्थेण पडिलाभिओ । मिगावईए भणियं-जइ एसा धारिणीदुहिया ता मम भगिणीधूया हवइत्ति । एत्थ पत्थावे थुवमाणो सुरवइपमुहेहिं सामी पंचदिणोणलम्मासतवपज्जंतकयपारणगो नीहरिओ धणावहमंदिराओ, अह अञ्चुकडयाए लोभस्स अववाय-निरवेक्खत्तणओ पडुभावस्स सयाणियराया तं सुवण्णवुट्ठिं गहिउमारद्धो, तओ पुरंदरेण मुणिऊण से चित्तवित्तिं भणियं-भो भो महाराय! न एत्थ सामिकोडुंवियभावो, किंतु जस्स कस्सइ सहत्थेण एसा कन्नगा इमं वियरइ तस्सेव हवइ, एवं च भणिए पुच्छिया रत्ता चंदणा-पुत्ति! कस्सेयं दिज्जइ?, तीए भणियं-किमिह पुच्छणिज्जं?, एयस्स चेव निक्कारणवच्छलस्स जीवियदाइणो मम पिउणो धणावहसेट्ठिणो पणामहत्ति, ताहे सेट्ठिणा संगोविया वसुहारा, पुणोऽवि सक्केण भणिओ राया-एसा चरिमसरीरा भोगोवभोगपिवासापरंसुही महाणुभावा भयवओ वद्धमाणस्स समुप्पन्नकेवलालोयस्स पढमा अज्जाणं संजमुज्जोगपवित्तिणी सिस्सिणी भविस्सइ, अओ सम्मं रक्खेज्जासि इति भणिऊण अहंसणमुवगओ तियसाहिवो । राइणावि कन्नंतउरे सबहुमाणं संगोविया चंदणा । तयणंतरं च असारयं संसारस्स तरलतरंगभंगुरत्तणं संजोगस्स कुसग्गयजललवचंचलत्तणं जीवियवस्स पज्जंतविरसत्तणं विसयपडिवंधस्स परिभावयंती सा गमेइ कालं, इमे य मणोरहे करेइ, जहा-

श्रीगुणचंद
महावीरच०
७ प्रस्तावः

॥ २४७ ॥

भगवइ पुरंदरदिसे । जणिहिंसि तं वासरं तुमं कइया ? । जत्य सहत्येण जिणो उत्तारेही भवाओ ममं ॥ १ ॥
कइया ससुरासुरजीवलोयमज्झट्टियस्स जयगुरूणो । वयणामयं पिबिस्सामि सवणपुडण्हिं अविरामं ॥ २ ॥
कइया निस्सेयससोकखमूलहेऊ खणो भविस्सइ सो । देहंमिवि निरवेक्ख्वा निस्संगा जत्य विहरिस्सं ॥ ३ ॥
कइया उग्गमउप्पायणेसणादोसलेसपरिहीणं । पिंडं अन्नेसंती भमिहं उच्चावयगिहेसु ॥ ४ ॥
इय पवरमणोरहकप्पणार्हिं तीसे दिणाइं वोळित्ति । भावेण सबविरइं फासंतीए ससत्तीए ॥ ५ ॥
मूलावि सेट्ठिणी मुणियवित्तंतेण बहुप्पयारेहिं निंदिया नयरीजणेण ।

जयगुरूवि पुरागराइसु परिभमंतो गओ सुमंगलाभिहाणगामे, तत्थ सणंकुमारसुरिंदो भत्तीए तिपयाहिणी-
काऊण भगवंतं वंदइ पियं च पुच्छइ, अह खणमेकं पज्जुवासिऊण सट्ठाणे पडिनियत्ते सुरिंदे सामी सुछेत्तसंनिवेसंमि
वच्चइ । तत्तोवि भार्हिंदकप्पाहिवइणा हरिसुक्करिसेणं वंदिओ समाणो विनिक्खमिऊण पालयं नाम गामं पट्ठिओ,
तहिं च धाहिलो नाम वाणिओ देसजत्ताए पयट्ठो सार्मिं संमुहमितं दइण अमंगलंतिकाऊण रोसवसायंविस्संछो
नीलपहापडलपलवियगयणमंडलं करवालमायट्ठिऊणं एयस्स चैव समणगस्स मत्थए अवसउणं निवाडेमिस्ति पहाविओ
वहत्यं वेगेण, एत्थंतरे सुमरियसुरिंदाएसेण पुवभणियसिद्धत्थवंतरेण छिन्नमेयस्स सहत्येण सीसं, तंमि य विणिहए
अहासुहं विहरमाणो जयगुरू पत्तो चंपानयरीए, ठिओ साइदिन्नमाहणस्स अग्गिहोत्तवसहीए एगदेसंमि, जाओ य

धनावहाय
वसुधारा-
धनदानं
चन्दना-
मनोरथाः
धाहिल-
वधश्च,

॥ २४७ ॥

दुवालसमो वासारत्तो, अह चाउम्मासखमणपडिवन्नस्स सामिणो माणिभद्वपुन्नभद्वनामाणो वाणमंतरसुरिंदो भत्ति-
भरमुव्वहंता रयणीए समागंतूण चत्तारिवि मासे जाव पूयं करंति, ते य ददूण विम्हियमणो साइदत्तमाहणो विर्वि-
तेइ-किं एस देवज्जगो जाणइ किंपि? जं देवा एयमणवरयं पूयंति पज्जुवासिंति य, तओ परिकखानिमित्तं
जंपियमणेण—

भयवं! एत्थ सरीरे करसिरपमुहंगसंगए अप्पा । को भण्णइत्ति? तत्तो भवोत्ति जिणेण से कहियं ॥ १ ॥

जो अहमेवं मन्नइ, केरिसओ सो? अईव सुहुमोत्ति । सुहुमंपि किं भणिज्जइ?, इंदियगेज्झं न जं होइ ॥ २ ॥

एत्तो चिय सद्धानिलगंधाईया, लहंति न कयाइ । अत्तववएसमेए, जं गेज्झा गाहगो अप्पा ॥ ३ ॥

इय एवमाइपसिणप्पवंचपरमत्थवित्थरे कहिए । विप्पो उवसंतमणो जयगुरुणो कुणइ बहुमाणं ॥ ४ ॥

अह पज्जंतमुव्वगए वासारत्ते जिणेसरो वीरो । कम्ममहिमहणसीरो जंभियगामंमि संपत्तो ॥ ५ ॥

तत्थ सुरिंदो वंदित्तु सायरं दंसिऊण नट्टविहिं । कइवयवासरमज्झे नाणुप्पत्तिं परिकहेइ ॥ ६ ॥

तत्तो मिंदियगामे पुव्वुवयारं सरित्तु चमरिंदो । नमिऊण चलणजुयलं जहागयं पडिनियत्तोत्ति ॥ ७ ॥

इय अणवरयसुरविसरथुणिज्जमाणचरणो दुस्सहपरीसहमद्वोयहिदरतीरपत्तो आणुपुवीए परिब्भममाणो संपत्तो
उम्मासिगामं, ठिओ य तस्स बाहिभागंमि असेससत्तोवरोहरदियंमि पलंबियमुओ काउस्सग्गेणं । एत्थंतरे तिवि-

For Private and Personal Use Only

पमिलाणलायन्नत्तणेण सुणिज्जइ ससल्लं, इमं च निसुणिऊण असमजिणपक्खवायकलिएण ससंभमं भणियं सिद्ध-
त्थेण—भो विज्ज! जइ एवं ता निउणं निरुवेहि, कहिं ससल्लो एस जयगुरू?, एवं वुत्ते वेज्जेण अइसुप्पणिहिएण
सणियं सणियं पलोयमाणेण जिणतणुं दिट्ठं कन्नविवरंतरनिहितं काससल्लियाजुयलं, दंसियं च सिद्धवणिणो, तं च
तारिसमवलोइऊण जंपियं सिद्धत्थेण—अहो कस्सइ पावकारिणो अच्चंतनिकरुणं विलसियं, जं एवंविहं कम्ममायरं-
तेण न गणिओ दोग्गइनिवडणतिकखासंखदुक्खागमो न पेहियं आकालियमजसं न चित्तियं धम्मविरुद्धं, अहवा
किमेएण दुट्ठचेट्ठियविकत्थणेण?, भो वेज्ज! साहेसु को संपयं उवाओ जेण एयं सल्लमवणिज्जइ? । अन्नं च—

सल्लेण जएकपहुस्स कन्नविवरंतरं उवगएण । अणवरयं मह हिययं भिज्जइ एत्तो महाभाग! ॥ १ ॥
अल्लियं उल्लवइ जणो जस्स वणो वेयणा हवइ तस्स । जं सामिणा ससल्लेण दुक्खिओऽहं दढं जाओ ॥ २ ॥
परमत्थेण इमो चिय जीयं माया पिया य सयणो य । नाहो सरणं ताणं ता एत्तो किं परं परमं? ॥ ३ ॥
इय एयस्स निमित्ते धणं च धन्नं च दच्चनिचयं च । मम जीवियंपि चइऊण कुणसु भो सल्लउद्धरणं ॥ ४ ॥
उद्धरिए एयंमि तु तुमए भवभीमकूवगाहितो । उद्धरिओ परमत्थेण विज्ज! निस्संसयं अप्पा ॥ ५ ॥
नीसेसगुणनिहाणे इमंमि उवजुंजिऊण नियविज्जं । आसंसारं सुंदर! आसीसाभायणं होसु ॥ ६ ॥
इयरंमिवि उवयारो कीरंतो जणइ निम्मलं कित्तिं । किं पुण तइलोकदिवायरंमि सिरिवीयरगंमि ? ॥ ७ ॥

श्रीगुणचंद
महावीरच०
७ प्रस्तावः
॥ २४९ ॥

इय सम्भावुम्भडवयणसवणपरिवद्धमाणपरितोसो । सामिचिकिच्छाकरणंमि उज्जुओ भणइ सो विज्जो ॥ ८ ॥
सिद्धत्य ! अलमेत्य पत्थणाए, तहा करेमि जहा लहुं अवहरामि भयवओ सलं, केवलं निप्पडिकम्मो एस नाभिलसइ चिगिच्छं न बहु मन्नइ सरीरसकारं नाभिनंदइ ओसहाइविहाणं, एवं च ठिए कहं कायवो सलसमुद्धरणोवक्कमो?, सिद्धत्येण भणियं-पज्जत्तं वाउलत्तणेणं, जहा तुमं भणिहिमि तहा करिस्सामित्ति अन्नोऽन्नं जंपिराणं निग्गओ भुवणगुरु, ठिओ बाहिरुज्जाणे, सिद्धत्येणावि नियपुरिसेहिंतो सवत्यवि अन्नेसाविओ सामी, दिट्ठो य गामबाहिरुज्जाणे, तओ विज्जेण समेओ तदुवदिट्ठदिट्ठोसहसामग्गिसणाहो तत्येव गओ सिद्धत्यो, तयणंतरं च वेज्जेण तेहदोणीए निवेसाविओ सामी, पच्छा कयकरणेहिं चउव्विहविस्सामणावियक्खणेहिं पुरिसेहिं महाविओ, तओ सिद्धि-लीभूपसु संधिवंधणेसु बाढं निजंतिऊण संडासएण अइच्छेययाए लहुमाकहिउमारदो कन्नेहिंतो सरुहिरं सलजुयलं, अह नीहरिज्जमाणे सल्ले सा कावि वेयणा जाया । जीए मंदरधीरोऽवि कंपिओ झत्ति जयनाहो ॥१॥ मुक्को य घोरघणघोसविम्भमो जिणवरेण आरावो । कुलिसाहय(सुर)गिरिसिगदलणजाओव्व अइभीमो ॥२॥ जिणमाहप्पेण परं तडत्ति फुट्ठा समंतओ न मही । अन्नह चलणंगुलिचालियाचले केत्तियं एयं?, ॥३॥

एवमुप्पाडियंमि सल्ले संरोहणोसहीरसनिसेगपक्खेण पग्गुणीकयंमि सवणजुयले सविणयं वंदिऊण य जयनाहं वेज्जवणिणो परमसंतोसमुद्धंता सग्गापवग्गसोक्खसिरिं भमरिं करकमलनिळीणं मन्नंता गया सगिहं । परमोवगा-

सिद्धार्थ-
खरकाभ्यां
शल्य-
कर्षणं.

॥ २४९ ॥

रिति पूइओ वत्थकणगाइदाणेण विज्जो सिद्धत्थेण । एवं ते दोन्निऽवि आसयविसुद्धीए तिष्ठमवि वेयणं भयवओ उदीरयंता सुरलोयलच्छिभायणं जाया । गोवालो पुण अइसंकिलिद्वयाए सत्तमनस्यपुढविं दुहनिवहभायणं पत्ते । तं च उज्जाणं महाभेरवंति पसिद्धिं गयं, देवउलं च तत्थ लोणेण कयं ।

एवंविहावयाणं हवंति जयभायणं जिणिंदावि । ता थोवायंकेऽविहु कीस जणो वहइ संतावं ? ॥ १ ॥

जइ एकासिं पि कयदुक्कयस्स एवंविहो दुहविवागो । ता असमंजसकिञ्चेसुं पइदिणं कह जणो रमइ ? ॥ २ ॥

अतुलियबलकलिणवि जिणेण तिष्ठावयं सहंतेण । सहणे श्रिय कम्मविणिज्जरत्ति पडिवज्जइ जणेण ॥ ३ ॥

एवं च भगवओ वद्धमाणसामिस्स परीसहाणं जहन्नगाणं मज्जे उवरि कडपूयणासीयं मज्झिमगाणं न काल-चकं उक्कोसगाणं य इमं चेव सल्लुद्धरणंति । एवं गोवालेण मूलओ आरद्धा उवसग्गा गोवालेण चेव निष्ठियत्ति । एवं त्थ उवसग्गाणं संकलणा भणिया ।

इयमणिं सयलं पि तवोधिहाणं जं जहा भगवया समायरियं तं तहा संकलिऊण भणिज्जइ—

नव किर चाउम्मासे छकिर दोमासीए उवासी य । बारस य मासियाइं वावत्तरि अद्धमासाइं ॥ १ ॥

एगं किर छम्मासं दो किर तेमासिए उवासी य । अद्दाइज्जा य दुवे दो चेव दिवहमासाइं ॥ २ ॥

भइं च महाभइं पडिमं तत्तो य सवओभइं । दो चत्तारि दसेव य दिवसे ठासीय अणुबद्धं ॥ ३ ॥

श्रीगुणचंद
महावीरच०
७ प्रस्तावः

॥ २५० ॥

गोयरमभिग्गहजुयं खवणं छम्मासियं च कासी य । पंचदिवसेहिं ऊणं कोसंबीए वरपुरीए ॥ ४ ॥
दस दो य किर महप्पा ठाइ सुणी एगराइयं पडिमं । अट्टमभत्तेण जई एकेकं चरिमराइयं ॥ ५ ॥
दो चेव य छट्ठसए अउणातीसे उवासिया भयवं । न कयाइ निचभत्तं चउत्थभत्तं च से आसि ॥ ६ ॥
बारस वरिसे अहिए छट्ठं भत्तं जहन्नयं आसि । सच्चं च तवोकम्मं अपाणियं आसि वीरस्स ॥ ७ ॥
तिन्नि सए दिवसाणं अउणापण्णे उ पारणाकालो । उक्कुडुयनिसज्जाणं ठियपडिमाणं सए बहुए ॥ ८ ॥
इय एत्तियमेत्तं पच्चजादिणाउ आरब्भ सच्चग्गेण छउमत्थकालियाए भगवया तवचरणमायरियंति ॥ संपयं पारद्धं
भणिज्जइ—अह मज्झिमपावासन्निवेसाओ दुस्सहपरीसहनिसासंतमसं हणिऊण जिणदिवायरो समुम्मिलंतसमहि-
गाभिरामदेहप्पहापडलपयासियदिसामुहो नीहरिऊण अणिययविहारेण विहरंतो संपत्तो समुत्तुंगपायारपरिचुंविंयंवर
नाणाविहवणसंडमंडियदियंतरं जंभियगामं नाम नयरं, तस्स य बहिया विभागे वीयावत्तचेइयस्स अदूरे अणे-
यतरुवरसुरहिकुसुमामोयमत्तमहुयरञ्जंकारमणहरपरिसराए उजुयालियानईए तीरंमि उत्तरिछे कूले सामागामिहाण-
गाहावइस्स छेत्तंमि समुम्मिलियपढमपलवपसाहियस्स सुपुरिसस्स व सउणगणसेवियस्स सुरपुरस्स व सुमणसाभि-
रामस्स महानरिंदस्स पत्तनियरपरियारियस्स व सालमहापायवस्स हिट्ठओ द्वियस्स भुवणबंधवस्स छट्ठेणं भत्तेणं
अपाणएणं आयावेमाणस्स गोदोदियासणं निसन्नस्स अणुत्तरेहिं नाणदंसणचरित्तेहिं अणुत्तरेहिं आलयविहारमहवज्ज-

वीरतपः
केवलं च.

॥ २५० ॥

वेहिं अणुत्तरेहिं लाघवखंतिगुत्तिमुत्तिसच्चसुचरिणहिं अप्पाणं भावेमाणस्स सङ्खळम्माससमहिगेसु दुवालससंवच्छरेसु
 समइकंतेसु चइसाहसुद्धदसमीए सुवयाभिहाणंमि दिणंमि विजए मुहुत्ते हत्थुत्तरानक्खत्तंमि चंदेण जोगसुवागयंमि
 सुक्कज्झाणानलनिद्वुधणघायकम्मिधणस्स पुहत्तवियकं सवियारमेगत्तवियकमवियारं च झाइऊण उवरयस्स सुहम-
 किरियानिवट्ठिं वोच्छिन्नकिरियमप्पडिवाइं च सुक्कज्झाणचरिमभेयदुगमसंपत्तस्स अणंतमणुत्तरं निवाघायं निरावरणं
 पडिपुत्रं सयललोयालोयपयासयं केवलवरणाणदंसणं समुप्पन्नंति ॥

तयणंतरं च दुक्करतवचरणफलंमि केवलालोए । जाए सूरें पिव पयडिज्जइ तिहुअणं पडुणा ॥ १ ॥
 अह बत्तीस सुरिंदा तक्खणचलियासणा लहुं पत्ता । विरयंति समोसरणं पायारतिएण परियरियं ॥ २ ॥
 सुविभत्तचारुगोउरपोक्खरिणीपवलधयवडाइन्नं । सिंहासणं च मणिकणयनियरनिम्मवियहरिचावं ॥ ३ ॥
 ताहे तिलोयनाहो थुवंतो देवनरनरिंदेहिं । सिंहासणे निसीयइ तित्थपणामं पकाऊण ॥ ४ ॥
 जइविहु एरिसनाणेण जिणवरो मुणइ जोगयारदियं । कप्पोत्ति तहवि साहइ खणमेत्तं धम्मपरमत्थं ॥ ५ ॥
 इय निरुक्कमविक्रमनिरक्कियभंतरारिविसरस्स । वीरस्स भुवणपडुणो चरिए सूरें व विप्फुरिए ॥ ६ ॥
 संगमयाइपरीसहसहणज्जियणाणलाभसंबद्धो । संखेवेण समत्तो सत्तमओ एत्थ पत्थावो ॥ ७ ॥

इइ सिरिमहावीरचरिए परीसहसहणकेवलुवज्जणो सत्तमो पत्थावो ॥

श्रीगुणचंद
महावीरच०
८ प्रस्तावः
॥ २५१ ॥

अथाष्टमः प्रस्तावः

एवं केवललाभो भणिओ भुवणिकभाणुणो एत्तो । एकारसवि गणहरा जह से जाया तहा सुणसु ॥ १ ॥
अह निम्महियनीसेसमोहमहिमो सो महावीरजिणवरो तहाविहोवयारविरहियं परिसं नाऊण परोवयारकर-
णिकतल्लिच्छो छिन्नपेम्मबंधणोऽवि धम्मदेसणाईहिं तित्थयरनामगोयं कम्मं वेइज्जइत्ति परिभाविंत्तो असंखेज्जाहिं
देवकोडीहिं परिवुडो सुरविरइएसु नवसु कणयकमलेसु नवणीयसुहफरिसेसु चलणजुयलं निवेसमाणो दिसामुहवि-
सारिणा देवजणुज्जोएण पडिहयंधयारे निसासमएवि दिवसेव समुवलक्खिज्जमाणपयडपयत्थसत्थो तित्थनाहो
दुवालसजोयणंतरियाए मज्झिमानयरीए गंतुं पवत्तो, तओ जाव सामी न पावइ मज्झिमापुरीं ताव तीसे अदूरदेसे
संठियंमि महासेणवणंमि उज्जाणे देवेहिं समोसरणविरयणा काउमारद्धा, कहं विय?—

आजोयणपरिमंडलभूभागं विगयकयवरुग्घायं । हरियंदणसुरहिरसच्छइहिं पडिहणियरयनियरं ॥ १ ॥
पंचविहरयणनिधिवरविरइयातुच्छपीढियाबंधं । हरिसुलसंतरोमंचकंचुया निम्मविंत्ति सुरा ॥ २ ॥
वेमाणियदेवेहिवि विरइज्जइ पंचरायरयणमओ । सालो विसालगोउरकविसीसयसुंदरो ज्झत्ति ॥ ३ ॥
तत्तो बाहिं पसरंतकिरणपम्मारभरियनहविवरो । जोइसिएहिं ठविज्जइ सुवण्णपागारपरिवेढो ॥ ४ ॥
तयणंतरं च दगरयधवलपहाहसियसारयमयंको । भुवणवईहिं कीरइ निम्मलकलहोयपागारो ॥ ५ ॥

मध्यमा-
पापायां स-
मवसरणं,

॥ २५१ ॥

पधरमणिरयणरुहरं वंतरदेवेहिं सालमज्झंमि । सिंहासणं ठविज्जइ सपावपीढं सुरमणिज्जं ॥ ६ ॥
 तस्सोवरिं विउवइ सक्को उम्मिल्लपल्लवसिरिलं । जिणदेहाउ दुवालसगुणियं कंकेल्लिपवरतरं ॥ ७ ॥
 ईसाणसुरिंदो निम्मवेइ लंबंतमोत्तियसरीयं । छणमयलंछणधवलं फलिहदंडं च छत्ततिगं ॥ ८ ॥
 देहामुहठियविंटा रुंटंतुहाममहुयरसणाहा । आजणु कुसुमवुट्ठी निवडइ गयणाओ वरगंधा ॥ ९ ॥
 सधरयणामयाइं विचित्तरइयसकचावाइं । रेहंति तोरणाइं नववंदणमालकलियाइं ॥ १० ॥
 मंदरमहियमहोयहिरवगंभीराइं तियसनिवहेण । दिसि दिसि पइयाइं चउविहाइं तूराइं दिवाइं ॥ ११ ॥
 पवणुदुयखीरोयहिमहल्ललोलविग्गमेहिं नहं । छाइज्जइ धयनिवहेहिं वेजयंतीसएहिं च ॥ १२ ॥
 मयरंदुहामसहस्सपत्तकीलंतहंसमिहुणाओ । पडिगोउरं वराओ पोक्खरिणीओ य कीरंति ॥ १३ ॥
 मिच्छत्तसत्तुविक्षोभदक्खमक्खंडभाणुविंवसमं । जंतुण य कमलोवरि ठाविज्जइ धम्मवरचकं ॥ १४ ॥
 देवच्छंदयपमुहं अन्नंपि जमेत्थ होइ कायधं । वंतरसुरेहिं कीरइ पडिदुहियएहिं तं सधं ॥ १५ ॥
 इय नियनियअहिगाराणुरूवओ विरइयंमि ओसरणे । जिणरविभीयध निसा निज्जट्ठा तक्खणं चेव ॥ १६ ॥
 एत्थंतरे सायरसुरखयरनमंसिज्जमाणो माणाइरित्तगुणरयणावासो वासवनिदंसिज्जमाणमग्गो मग्गाणुल्लगमव-
 जणजणियपरितोसो तोसरोसपरिवज्जियगत्तो गत्तसमभवपडंतजणसमुद्धरणपरो परमकरुणरसनिधवियजयजणदुहज-

श्रीगुणचंद
महावीरच०
८ प्रस्तावः
॥ २५२ ॥

लणो दुरियगिरिदलणो जयगुरुपुवदुवारेण पविट्टो समोसरणभूमिं, तओ सीहासणं पयाहिणीकाऊण ममावि पूयणिज्जं
तित्थंति दंसंतो कयक्खिओऽवि नमो तित्थस्सत्ति भणन्तो निसण्णो पुव्वाभिमुहो सीहासणे, तयणंतरं च सेसतिदिसि
सिंहासणेसु सुरेहिं रइयाइं जिणपडिरूवाइं, ताणिऽवि भगवओ माहप्पेण तयणुरूवाइं चेव सोहिउं पवत्ताइं, अह
एगरूवोऽवि सयलजंतुसंताणनित्थारणत्थं व चउरूवधरो जाओ जयगुरु, तयणंतरं च सयलतरणिमंडलसारपरमा-
णुनियरविणिम्मियं व सरीरपरिक्खेवमणहरं समुग्गयं भामंडलं, ठिया य भगवओ उभयपासेसु पंचवण्णरयणविणि-
म्मियदंडुम्भडाओ तुसारगोखीरधाराओव गोराओ चामराओ करकमलेण कलिऊण दाहिणुत्तरभयणवइणो चमरव-
लिनामाणो असुराहिवा, अह—

गायंति केऽवि नच्चंति केऽवि फोडिंति केऽवि तिवइंपि । पकरेंति संधवं केऽवि भयवओ भत्तिए तियसा ॥ १ ॥
मेलंति सुरहिमंदारकुसुममयरंदविंदुसंवलियं । जिणपय पुरओ केऽविहु पंचविहं जलरूहसमूहं ॥ २ ॥
भवणवइवाणमंतरजोइसवेमाणिएहिं देवेहिं । पूरिज्जइ नहविवरं विमाणमालासहस्सेहिं ॥ ३ ॥
पंचप्पयारमणिअणघडियसुंदरविमाणपडिहत्थं । उव्वहइ गयणविवरं पप्फुल्लियकमलसंडसिरिं ॥ ४ ॥
हरिहरिणसप्पसिहिनउलससगमज्जारमूसगाईया । अन्नोऽन्नमुक्खेरा ओसरणमहिं समल्लीणा ॥ ५ ॥
बहुपुवभवपरंपरसमुवज्जियकम्मसत्तुभीयाणं । ओसरणं सरणंपिव रेहइ नीसेससत्ताणं ॥ ६ ॥

समवसर-
गरचना.

॥ २५२ ॥

एतथंतरे तिपयाहिणीकाऊण नमंतसिरिमउडमाणिककिरणविच्छुरियपायपीठा सुरासुरिंदा पणमिऊण जिणं निय-
नियठाणेषु निसन्ना, अह सहस्सनयणेण निसिद्धंमि कोलाहले निम्मलदसणमऊहजालपक्खालियाए इव निम्मलाए
एगाएवि अणेगजणसंसयवुच्छेयसमत्थाए सुरनरसवरतिरियसाहारणाए सजलजलहरनिग्घोसगंभीराए आजोअणमि-
त्तखेत्तपडिप्फलणपच्चलाए अमयवुट्ठीए इव निववियअसेसभवसत्तसंतावाए वाणीए पवत्तो जिणनाहो धम्मदेसणं
काउं । कहं?—

जह पाणवहाइसमुत्थपावनिवहेण भारिया जीवा । अयगोलगव भवसायरंमि मज्जंति वेगेण ॥ १ ॥
जह नाणदंसणचरित्तसेवणाहिं लहुं विसुज्झंति । पावंति य सोक्खपरंपराउ सग्गापवग्गेसु ॥ २ ॥
जह मिच्छत्तच्छाइयविवेयनयणा सुणंति न कयावि । नीसेसदोसरहियं देवं सुगुरुं च धम्मपरं (यं) ॥ ३ ॥
जह गिहकज्जासत्ता अघितत्ता कामभोगसोक्खेहिं । मणुअत्तं लहुंपि हु मुद्धा थोवेण हारंति ॥ ४ ॥
जह तप्पमायपरयाए भूरिसो ताणसरणपरिहीणा । पावंति दहणभेयणपमुहाइं दुहाइं नरएसु ॥ ५ ॥
जह पंचमहवयकवयगूढदेहा दलंति लीलाए । अग्भिंतरारिवग्गं अजेयममरासुरेहिंपि ॥ ६ ॥
जह सत्तुमित्तमणिलेट्ठुसोक्खदुक्खेसु तुल्लचित्ताण । अमराहितोऽवि सुहं पाउभूएइ बहुययरं ॥ ७ ॥
तह जयगुरुणा नरतिरियदेवजणसंकुलाए परिसाए । हरिसभरनिम्भराए धम्मो सिट्ठो जयवरिट्ठो ॥ ८ ॥

श्रीगुणचंद
महावीरच०
८ प्रस्तावः
॥ २५३ ॥

अह पत्थरटंकुकीरियच्च दढवज्जलेवघडियच्च । जिणवयणामयपाणेण सा सहा निच्चला जाया ॥ ९ ॥
किंच-अनिमेसच्छीहिं मुहं जिणस्स पेच्छंतया विरायंति । देवत्तलच्छिवरिअच्च तक्खणं तिरियनरनिवहा ॥ १० ॥
इओ य-तीसे नयरीए अच्चंतधणकणसमिद्धो लक्कम्मकरणपरो नियदरिसणपरुवियधम्मनिच्चलचित्तो सोमिलिज्जो
नाम माहणो, तेण सग्गत्थिणा समारद्धो नयरीए बाहिंमि जन्नो, समाहूया दूरदिसाहिंतो बहुसिस्ससयपरिवारा असे-
सविज्जाठाणपारगा चउबेयसुत्तत्थविसारया नियनियपन्नावलेवोवहसियसुरगुरुणो इंदभूइपमुहा एकारस अज्झावगा,
मीलियाइं घयमहुजवपमुहाइं जागोवगरणाइं, पगुणीकयाओ दक्खिणानिमित्तं पवरपट्टणुग्गयचेलकणगाइरासीओ,
भत्तीए कोउगेण उवरोहेण य समागओ बहुजणवओ, समारद्धो हुयवहे अणवरयमंतुच्चारपुव्वयं जन्नोयगरणपक्खेवो ।
एत्थंतरे गयणयलमइवयंताइं सुरवहूसणाहाइं देवविंदाइं अवलोइऊण परितुट्ठो पेच्छगजणो, जंपेइ य-सुहु लट्ठं जट्ठं
जन्निएहिं, जं सयमेव विग्गहवंतो तियसा परितुट्ठा इहइं अवयरंतित्ति, अह चंडालनिलयं व जन्नवाडयं परिह-
रिऊण समोसरणसंमुहं गंतुं पयट्ठेसु तेसु वियंभिओ लोयप्पवाओ, जहा-सवन्नू तीयाणागयवत्थुजाणगो लोगुत्तरि-
स्सरियरूवसामत्थजसाइगुणावासो एत्थ समोसट्ठो, तस्स पूयणत्थं एस नयरजणो विमाणारूढा तियसा य गच्छंतित्ति,
अह सवन्नूत्ति गिरं सोउं उप्पन्नगाढपरिकोवो । नियलोयाणं पुरओ इंदभूई इमं भणइ ॥ १ ॥
मोत्तूण ममं लोगा तस्स समीवंमि कीस वच्चंति ? । किं कोऽवि ममावि पुरो सवन्नू अत्थि एत्थ जए ? ॥ २ ॥

जिनसा
देशना
देवागो
गगधरा-
णामीध्वो.

॥ २५३ ॥

१ गच्छंतु व मुखजणा देवा कहऽणेण विम्हयं नीया ? । पूयंति संशुणंति य जेणं सवण्णुवुद्धीए ॥ ३ ॥
 अहवा जारिसओ सो सवण्णू तारिसा सुरा तेऽवि । अणुसरिसो संजोगो गामनडाणं व मुख्खाणं ॥ ४ ॥
 किं वा इमिणा बहुजंपिएण ? अज्जवि असिद्धकज्जंमि । सयमेव तत्थ गंतूण हेउजुत्तीहिं तं समजं ॥ ५ ॥
 काउं हयप्पयावं पुरओ देवाण दाणवाणं च । नासेमि अहमसेसं खणेण सवण्णुवायं से ॥ ६ ॥ जुम्भं ।
 इय साहंकारं जंपिऊण पंचहिं सएहिं सिस्साणं । परियरिओ सो पत्तो जयगुरुणो पायमूलंमि ॥ ७ ॥
 तयणु-ससहरकासकुसुमोहहिमपंडुरलुत्तितियनिहयतरणिकरनियरपसरह, पमिलंतसायरनरखयरसुरिंदसंदोहवंदह ।
 पेच्छिवि जयनाहह महिम इंदभूइ मणंमि, किं एयंति चमक्खियओ तक्खणि ओसरणंमि ॥ ८ ॥
 एत्थंतरंमि भुवणेकभाणुणा जिणवरेण संलत्तो । भो इंदभूइ ! गोयम सागयमिइ महुरवाणीए ॥ ९ ॥
 ताहे चित्तियमिमिणा नामंपिडु मे वियाणए एसो । भुवणेऽवि पायडजसं अहवा को मं न याणेइ ? ॥ १० ॥
 जइ हिययगोयरं मे संसय मण्णेज्ज अहव छिंदेज्जा । ता होज्ज विम्हओ मे इय चिंतंतो पुणो भणिओ ॥ ११ ॥
 किं मण्णे अत्थि जीओ उयाहु नत्थित्ति संसओ तुज्झ । सुंदर ! परिचयसु इमं संदेहं माणपडिसिद्धं ॥ १२ ॥
 अत्थि जिओ निब्भंतं इमेहिं सो लक्खणेहिं मुणियवो । चित्तंचेयणसण्णाविण्णाणाईहिं पयडेहिं ॥ १३ ॥
 जइ पुण न होज्ज जीवो अवट्ठिओ सुकयदुक्कयाहारो । ता जागदाणनाणोवहाणपमुहं सुहा सवं ॥ १४ ॥

श्रीगुणचंद
महावीरच०
८ प्रस्तावः

॥ २५४ ॥

इय जयगुरुणो वयणं सोउं परिभाविउं च मइपुवं । मिच्छत्तेण समं चिय उज्झइ तं संसयं झत्ति ॥ १५ ॥
अह ववगयकुविगप्पो दप्पं सप्पं व उज्झइ उं दूरे । संसारविरत्तमणो निवडइ चलणेसु जगगुरुणो ॥ १६ ॥
भणइ य भयवं ! नियदिक्खदाणओ मज्झइणुग्गहं कुणसु । इय वुत्ते नियहत्येण दिक्खिओ एस जयगुरुणा ॥ १६ ॥ १ ॥
तं पवइयं सोउं अग्गिभूईवि चिंतई एव । वच्चांमि तमाणेमी पराजिणेऊण सव्वण्णुं ॥ १७ ॥
मण्णे छलाइणच्चिय छलिओ माइंदजालिएणं व । समणेण तेण तम्हा उवेक्खणिज्जो न सो होइ ॥ १८ ॥
संसयमेगंपि ममं जइ पुण छिंदेज्ज होमि ता सिस्सो । तस्सत्ति जंपमाणो सोवि गओ जिणवरसमीवं ॥ १९ ॥
हे अग्गिभूइ ! कम्मं अत्थी नत्थित्ति संसओ तुज्झ । बाढमजुत्तो एसो विज्जइ जं कम्ममिह पयडं ॥ २० ॥
कहमण्णहा समेऽवि हु करसिरपमुहंगदेहसंबंधे । एक्के भवंति सुहिणो अण्णे पुण दुक्खिया निच्चं ॥ २१ ॥
धारियधवलायवत्ता विलासिणीविहुयचामरा एगे । भडचडगरपरियरिया वच्चंति करेणुगारूढा ॥ २२ ॥
अण्णेऽणुवाहण चिय पए पए भयवसेण कंपंता । एगागिणो वरागा कहकहवि पंहंमि गच्छंति ॥ २३ ॥
एगे लीलाए चिय पूरंति मणोरहे बहुजणाणं । नियउयरंपिऽवि अन्ने भरंति भिक्खाए भमणेण ॥ २४ ॥
ससहरमुहीहिं विंवाहरीहिं पप्फुल्लकुवलयच्छीहिं । एगे विलसंति विलासिणीहिं सद्धिं सभवणेसु ॥ २५ ॥
मक्कडमुहीहिं मिरियत्थणीहिं अइलंबमोदुपोद्दाहिं । पच्चक्खरक्खसीहिं व अन्ने गिहिणीहिं सह ठंति ॥ २६ ॥

श्रीमतो
गातमस्य
अग्निभूतेश्च
प्रतिबोधः

॥ २५४ ॥

तुल्यमिव संबंधे समेऽवि कालादयमि एगस्स । संपज्जइ बहुलाभो मूलंपि पणस्सइ परस्स ॥ २७ ॥
 इय एवंविहकज्जाण कारणं कम्ममेव नायवं । निकारणां जायंति जेण न विचित्तकज्जाइ ॥ २८ ॥
 एवं वुत्ते निच्छिन्नसंसओ पंचसिस्ससयसहिओ । भवघेरग्गमुवगओ पडिचज्जइ सोऽवि पवज्जं ॥ २९ ॥ २ ॥
 अह वाउभूइनामो सहोयरो तेसिमेव लहुययरो । पम्मुकमच्छरो भत्तिनिम्भरुम्भिन्नरोमंचो ॥ ३० ॥
 कह तेऽवि तेण विजियत्ति विम्हयं परममुवहंतो य । एइ जिणसन्निगासं संसयवोच्छेयमिच्छंतो ॥ ३१ ॥
 अह सो जएकगुरुणा पयंपिओ भइ ! कीस वहसि तुमं । तज्जीवं तस्सरीरंति संसयं जुत्तिपडिसिद्धं ? ॥ ३२ ॥
 जेण सरीरजियाणं एगंतेगत्तकप्पणे जीवो । नो होज्ज देहनासे घडभंगे तस्सरूवं व ॥ ३३ ॥
 देहे य विज्जमाणे जीएण विवज्जिएवि जाएज्जा । चित्ताईया धम्मा न य ते तच्चिरहओ दिट्ठा ॥ ३४ ॥
 तम्हा भिन्नाभिन्नो विन्नाणघणो सरीरओ जीवो । अन्नोच्चिय सुणियवो एवं भणियंमि पडिबुद्धो ॥ ३५ ॥
 पंचहिं सिस्ससएहिं सहिओ सोऽवि हु जिणस्स पासंमि । निच्छिन्नपेमबंधो मुंचइ घरवासवासंगं ॥ ३६ ॥ ३ ॥
 अह इमे तिन्निवि गहियपवज्जे निसामिऊण दुरुम्मुकमच्छरो गच्छामि संसयं च पुच्छामि न सामन्नरूवो सो भय-
 वंति बहुमाणमुवहंतो वियत्तो नाम अज्झावगो गओ जिणसमीवं, वागरिओ य भयवया, जहा-भइ ! वियत्त ! तुह पंच-
 भूयसत्ताविसओ संसओ, सो य न जुत्तो, जओ पच्चक्खदिस्समाणा(भू)जलणजलानिलाइणो भूया कहं अवलविउं

श्रीगुणचंद
महावीरच०
८ प्रस्तावः

॥ २५५ ॥

तीरंति?, जं च वेए भणियं-‘सुविणोवमा सवे भावा’ इचाइ, तंपि खणविलाससीलयं सवभावाणं पडुच्च, न उण सवहा भूयाभावसाहगतणेणंति बुत्ते वियत्तो संसाराणुबंधेण समं चइऊण कुविगप्पं पंचहिं छत्तसएहिं अणुगम्ममाणो पवन्नो संजमुज्जोयं ४॥ तंमि य पवज्जं पवन्ने सुहम्मो नाम अज्झावगो विरुद्धवेयपयनिबंधणं संसयं पुच्छिउकामो संपत्तो जिणंतियं, सो य भयवंतं सिंहासणगयं पुच्चपच्चयसिंगाधिरूढं दिवायरं व पलोइऊण परमं पमोयपञ्चारमणु- भवंतो संलत्तो जिणेण-अहो सुहम्म! तुमं इमं संसयं वहसि-जो इह भवे पुरिसो पसू वा सो परभवेऽवि पुरिसत्तं पसुत्तं वा लहइ, इमं च न जुत्तं, जओ जो इह जम्मे सभावेण मद्दवज्जवाइगुणजुओ मणूसो सो मणुयाउयं कम्मं बंधिऊण भवंतरे पुरिसत्तणं पाउणइ, पसूऽवि मायाइदोसजुत्तो पुणोऽवि पसुत्तणं पडिवज्जइ, न उण निच्छएण, जेण कम्मसवपेक्खा जीयाण गईरागइत्ति, न य कारणाणुरूवं कज्जंति सवत्थ वित्थारिउं पारीयइ, विलक्खणरूवाओ सिंगाइकारणाओऽवि सराईणमुप्पत्तिदंसणाओ, एवं च निसामिऊण वोच्छिन्नसंसओ पंचसयविणेयपरिवुडो सुहम्मो भयवओ सिस्सो जाओत्ति ५॥ अह तंमि पवइए मंडियनामो अज्झावगो पुच्चकमेण पत्तो समोसरणं, वागरिओ य भगवया-हंत बंधमोक्खविसयं संदेहं तुमं कुणसि, नणु न जुत्तमेयं, जओ बंधमोक्खा सुपसिद्धा चेव । कहं?—

मिच्छत्तपमायकसायदुट्ठजोगाइकारणेहिं दहं । जीवस्स कम्मबंधो जायइ अइभीसणो तत्तो ॥ १ ॥

अणुहवइ रज्जनहुव सवया नरयतिरियठाणेसु । किच्चिसदेवनरेसु य दुक्खाइं परमत्तिकखाइं ॥ २ ॥

तृतीयचतु-
र्थपंचमग-
णधराणां.

॥ २५५ ॥

मोक्षो पुन निम्मलनाणचरणसद्धानपरमहेऊहिं । कम्माण जो वियोगो सो नेओ सिवसुहृफलओ ॥ ३ ॥

नणु कहमणाइनियकम्मजोगओ तेसि होज उ पिहुत्तं । भणइ जह जलणेणं कंचणउवलाण अन्नोऽन्नं ॥ ४ ॥

एवं जियकम्माणवि विसिट्ठनाणाइकारणेहिंतो । होइ विवेगो तत्तो मोक्षो सिद्धो सयं चेव ॥ ५ ॥

एवं च पलीणंमि संसयतमंमि नमिऊण जयगुरुणो चलणुप्पलं अद्दुट्ठसिस्ससयपरिवारो मंडिओ अणगारमग्गम-
णुलगोत्ति ६ ॥ अह मोरिओऽवि अप्पडिममाहृप्पं सामिं नाऊण समागओ समोसरणं, अणिओ य भगवया-भइ!
तुमं देवाभावविसयं संदेहमुव्वहसि, तं च इयाणिं परिचयसु, जओ पच्चक्खदिस्समाणंमि अत्थंमि किं अणुमाणखे-
डणहिं?, एए देवा विमलमणिकुंडलपहापडलपलवियगंडलेहा नियंसियदिब्बंसुया सरीरकंतिसमुज्जोइयदिसिनिवहा
महासोक्खा अपरिभूयसासणा मुणिणोव नभोगमणा इह चेव संपयं वट्ठंति, अओ अणुचिया एयाण विसए अभा-
वकप्पणा, जं च सेसकालं न दीसंति तत्थ लोयगंधस्स अच्चंतमसुभत्तणओ पेच्छयणावलोयणाइसु य निच्चमक्खि-
त्तचित्तत्तणेण न कहंपि आगंतुमुच्छंति, जिणमज्जणाइसु पुणो भत्तिभरायट्ठिया आगच्छंति य। एवं मुणिए वत्थुत्तत्ते
मोरिएण अद्दुट्ठसिस्ससयपरियररण अन्भुवगया भावसारं जिणपव्वज्जत्ति ७ ॥ अह अकंपिओऽवि कोऊहलाउलिय-
चित्तो संसयमवणेउकामो संपत्तो भयवओ समीवं, सागयभणणपुव्वयं च संभासिओ जयगुरुणा-अहो अकंपिय! तुमं
एवं मत्तेसि, जहा-देवा चंदसूरतारयपमुहा ताव पच्चक्खदंसणेण नज्जंति, नारया पुण सुमिणेऽवि अदिस्समाणा नूणं न

श्रीगुणचंद
महावीरच०
८ प्रस्तावः

॥ २५६ ॥

संतित्ति, अणुचियं इमं, जओ ते नारया कम्मपरतंतत्तणेण इहागंतुमसमत्था, तुम्हारिसावि तत्थ गंतूणमक्खमा, ता कहमुवलंभो जाएज्जा?, खाइगनाणोववेयाणं पुण वीयरगाण पच्चक्खा चेव, न य खाइगनाणोववेया असेसपयत्थसत्थ-वेइणो न संतित्ति वोत्तघं, मए चिय वभिचारसभंवाओत्ति, एवं छिन्नंमि संसए तिहिं खंडियसएहिं समं अकंपिओ अणगारियं पडिवन्नोत्ति ८ ॥

एत्थावसरंमि अयलभाया नाम अज्झावगो मुणियजिणमाहप्पो मणोगयवियप्पनिब्भंजणत्थं गओ जयगुरुसमीवं, भणिओ य सामिणा, जहा-भो अयल! पुन्नपावाइं अत्थि नत्थित्ति संसयं तुममुवहसि, अजुत्तिसंगयं चेवं, सुहा-सुहफलजणगत्तणेण पुवभणियकम्मपक्खनाएण चेव पुन्नपावाणवि पसाहणाउत्ति भणिए जायजहावट्ठियविवेओ तिहिं खंडियसएहिं समेओ चारगंव भववासं उज्झिऊण समणो जाओत्ति ९॥ तयणंतरं च तं पवइयं सोऊण जिणं-तियं पाउब्भूओ मेअज्जो नाम अज्झावगो, सोऽवि संलत्तो तिहुयणेक्कचक्खुणा महावीरेण, जहा-सुंदर! तुमंपि इमं विगप्पेसि-भूयसमुदायधम्मत्तणेण चेयणारूवस्स जीवस्स कहं भवंतरगमणं घडेज्जा?, भूयववगमे चेयणारूवजीवस्सवि विगमाउत्ति, नणु अघडमाणमेयं, पुढवाईण भूयाण एगत्थ मीलणेऽवि चेयणाणुवलंभाओ, तम्हा तवइरित्ता चेव चेयणा जीवधम्मरूवा अब्भुवगंतवा, तदब्भुवगमे य जीवस्स निरुवचरिओ परभवगमो सिद्धो चेव, जाइसरणाईहिं परभवसाहणाओ य, एवं कहिए निच्छिन्नसंसओ मेयज्जो तिसयसिस्सपरियरिओ भयवओ समीवे पवइओ १० ॥

षष्ठादीनां
दशमा-
न्तानां.

॥ २५६ ॥

अह दससुवि तेषु पव्वज्जं पडिवन्नेसु पभासो सकोऊहलं तिहिं सएहिं खंडियाणं परिवुडो दूरमुक्कपंडिचाभिमाणो
 पंजलिउडो भुवणच्छेरयकारयविचित्तातिसयसमेयं सामिं ददूण हरिसुप्फुल्लोयणो संसयं पुच्छिउकामोऽवि संखो-
 भेण वोत्तुमपारयंतो भणिओ पारगएण-अहो पहास ! निव्वाणमत्थि नत्थित्ति संदेहदोलमालंबेसि तुमं, नणु उज्झ-
 सु सव्वहा एयं, जओ अइसयनाणिपच्चक्खत्तणेण सयलकम्मकलंकपमुक्कजीवावत्थाणट्ठाणं निव्वाणं चउग्गइयसंसा-
 रावासविलक्खणरूवं निरुवचरियं अत्थि, सुद्धपयकि(वच्च)त्तणाओ जीवोव, तं च बुहेहिं सइहियवं, जं पुण
 अविज्जमाणं तं सुद्धपयवच्चंपि न होइ, जहा आगासकुसुमंति भणिए पणट्टसंसओ जयगुरुं पणमिऊण सपरिवारो
 पभासोऽवि समणो जाओत्ति ११ ॥ एवं च—

वोच्छिन्नपेम्मवंचना पणट्टकम्मसंधणा, विसिट्ठजाइसंभवा पसिट्ठगोत्तउब्भवा ।

पहाणरूवसालिणो विसुद्धकित्तिधारिणो, अचिन्तसत्तिसंजुया असेससत्थपारया ॥ १ ॥

पयंडकामखंडणा पहीणदोसभंडणा, सुरासुरिंदवंदिया समग्गलद्धिनंदिया ।

जिणिंदधम्मसंगया विमुक्कसव्वसंगया, गुणावलीहिं सोहिया न कामिणीहिं मोहिया ॥ २ ॥

इय इंदभूइपमुहा मुणिणो एकारसावि तवेलं । दिसिदंतिणोव रेहंति सिस्सकरिकलहपरियरिया ॥ ३ ॥

किं वा वन्निज्जइ तेसि जेसि सयमेव भुवणनाहस्स । कप्पतरुक्सिलयसमो हत्थो सीसंमि संठाइ ॥ ४ ॥

श्रीगुणचंद
महावीरच०
८ प्रस्तावः
॥ २५७ ॥

इओ य-जा पुव्वभणिया दहिवाहणरायसुया चंदणाभिहाणा कन्नगा पढमसिस्सिणी भयवओ भविस्सइत्ति सक्केण संगोवाविया आसि सा तक्कालं सयाणियरायमंदिरे निवसंती गयणंगणे अणवरयं सुरविमाणाइं इंताइं गच्छंताणि य पलोइऊण निच्छियजिणकेवलनाणसमुप्पाया पव्वजागहणुकंखिरी अहासन्निहियदेवयाए करयलेण कलिऊण समो-सरणमुवणीया समाणी परमं पमोयसंभारमुवहंती तिपयाहिणादाणपुव्वगं वंदिऊण जिणमुवट्टिया पव्वजागहणत्थं ।

एत्थंतरे अन्नाओवि राईसरतलवरसेट्टिसेणावइमंतिसामंतकन्नगाओ जिणवइवयणायन्नज्जायभववेरग्गाओ सव्ववि-रइगहणत्थं तदंतियं पाउब्भूयाओ । तओ भगवया चंदणं पुरओ काऊण सहत्थेण दिक्खियाओ, पव्वजासमुज्जम-ऽसमत्था य बहवे जणा ठाविया सावयधम्मे, एवं एत्थ समोसरणे जाओ भगवओ चउविहो संघो ॥ जायंमि य गुणरयणरयणागरंमि संघे भगवया इंदभूइपमुहाणं पहासपज्जवसाणाणं एकारसण्हंमि तेसिं सयलभुवणगयत्थसत्थ-संगहधम्मयाइं 'उप्पन्नेइ वा विगएइ वा धुवेइ व'त्ति कहियाइं तिन्नि पयाइं, तेहि य पुव्वभवब्भत्थसमत्थपरमत्थ-सत्थवित्थारवियक्खणत्तणेण तक्कालुप्पन्नपन्नाइसयमुवहंतेहिं तयणुसारेण विरइयाइं दुवालस अंगाइं, तथा विरयमा-णाणं च सत्तण्हं गणहराणं जायाओ विभिन्नाओ वायणाओ, मेअज्जपभासाणं अयलभाइअकंपियाण य परोप्परं समाओ चेव, एवं च निवत्तिए सुत्तविरयणे इंदभूइपमुहाणं गणहरपयंमि ठावणनिमित्तमुवट्टिए सयमेव भुवणवंधवे अवसरंति कलिऊण पवरगंधवंधुरवासुम्मिस्सच्चुण्णभरियं रयणत्थालं गहिऊण सुरनियरपरियरिओ सुरिंदो पाउ-

प्रभासस्व-
बोधः स-
र्वेषां दीक्षा
चन्दनवा-
लादीनां च.

॥ २५७ ॥

चमूओ जिणंतियं, ताहे मामी सीहासणाओ उट्टिता पडिपुणं मुट्ठिं चुण्णाणं गिण्हइ, तयणंतरं गोयमसामिप्पमुहा
 एकारसवि गणहरा ईसिओणया परिवाडीए ठायंति, निरुद्धेहिं तियसेहिं तूरवे जयगुरु गुणेहिं पज्जेहि य मए
 तुह तित्थमणुणायंति भणमाणो पढमं चिय सहत्थेण गोयमसामिणो सीसदेसंमि चुण्णाणि पक्खिवइ, एवं चिय
 जहकमेण सेसगणहराणंपि, देवावि गयणयलमोगाढा आणंदवियसियच्छा गंधंधीकयमुद्धकुलंधुयमुहुलंबियमुहुलं
 पुप्फवासं चुण्णवासं च निसिरंति, गणं पुण चिरजीवित्तिकलिऊण सुहम्मसामी पंचमगजहरं धुरे ठवेत्ताभयवं अणुजाणइ।
 चंदणंपि अज्जाणं संजमुज्जोगघडणत्थं ठावेइ पवत्तिणीपए। एवं एकारसहिं गणहरेहिं अणेगेहिं साहूहिं साहुणीहि
 य परियरिओ जंबुदीवोच्च दीवंतरेहिं सुमेरुव कुलाचलेहिं ससिव तारानिवहेहिं सामी सोहिउं पवत्तो। अवि य—
 एगागिणोवि भुवणेकबंधुणो को मिणेज्ज माहप्पं?। किं पुण गोयमपमुहेहिं गणहरेहिं परिगयस्स ॥ १ ॥

अह कइवय दिवसाइं भवसत्तजणं पडिवोहिऊण तत्तो निक्खंतो जयगुरु। तो आगासगएणं लंबंतमोत्तियजाल-
 विराइएणं छत्तेणं आगासगयाइं कुसुयमयंकमऊहमणहराहिं चामराहिं गयणयलावलंबिणा समणिपायपीढेण सीहा-
 सणेणं रणज्झणिरकिंकिणीकुलकलकलमुहलेण अणेगकुडुभियाभिरामेण पुरोगामिणा माहिंदज्झएण य विरायंतो
 सायरं अणुगच्छंतीसु सुरासुरकोडीसु अणुकूलंतेसु वायंतंतेसु सुरहिसमीरणेसु भत्तीएव नमंतंतेसु मग्गतखुरेसु मुणिय-
 वियारेसु खलेसु व हेट्ठओमुहं ठायंतंतेसु कंदगेसु मणोरमेसु सब्बेसु उउसु निययमाहप्पेण तिलोयरज्जसिरिं एगत्य मि-

श्रीगुणचंद
महावीरच०
८ प्रस्तावः
॥ २५८ ॥

लियमुवदंसयंतो दुब्भिकखमारिडमराहं उवसामितो ठाणठाणेषु समोसरणमहिमं पडिच्छमाणो परप्पवाए सुत्तीकुण-
माणो निव्वाणमगं पयासयंतो विरइप्पयाणेण भवसत्तजणमणुगिण्हंतो पुरगामखेडकच्चडाइसु विहरमाणो कमेण
संपत्तो पुव्वभणियं माहणकुंडग्गामं नयरं ।

तहिं च नयरादूरवत्तिमि नाणाविहतलयासंकुलंमि बहुसालयनामंमि चेइयंमि विरइयं परमविच्छित्तिसणाहं
सुरेहिं समोसरणं, रयणपागारभंतरे पइट्ठियं पुव्वाभिमुहं समणिपायपीढं सीहासणं, निसन्नो तत्थ जएक्कचूडामणी
महावीरो, पायपीढपचासन्ने य निलीणो भयवं गोयमसामी, नियनियठाणेषु निविट्ठो देवनरतिरियनिवहो ।
एत्थंतरे वित्थरिया माहणकुंडग्गामे नयरे पसिद्धी, जहा-बहुसालगचेइयंमि भयवं महावीरो समोसढोत्ति, एयं
च निसामिऊण पुव्वभणिओ उसभदत्तमाहणो परमपमोयभरनिभरभरियमाणसो देवाणंदं माहणीं भणिउमाढत्तो,
जहा-तइलोकतिलयभूओ भूयत्थकहापरूवणसमत्थो । सुंदरि ! सिरिवीरजिणो सयमेव समोसढो बार्हि ॥ १ ॥

निरुवमकल्लाणकलावकारणं तस्स दंसणंपि पिण् ! । किं पुण अभिगमवंदणपयसेवापमुहपडिवत्ती ? ॥ २ ॥

ता वच्चामो तहंसणेण कुणिमो सजीवियं सफलं । तीए वुत्तं पिययम ! किमजुत्तं ? एह वच्चामो ॥ ३ ॥

सा किर जद्विसंचिय गम्भाओ अवहडो जएक्कगुरू । तत्तो चिय अचत्थं समुवहित्था महासोगं ॥ ४ ॥

अह तदब्भुवगमं नाऊण उसभदत्तेण आहुया कोडुंबियपुरिसा, भणिया य-भो ! सिग्घमेव वररयणमयकिंकिणी-

गणधर-
पदवी सूत्र-
रचना ब्रा-
ह्मणकुण्डे
गमनं.

॥ २५८ ॥

जालमंडियमज्झभागेहिं कंचणनत्थापग्गहिण्हिं नीलुप्पलविरइयसेहरेहिं उल्लिहियसिंगेहिं लट्ठपुट्टसरीरेहिं पवरगो-
णज्जुवाणएहिं संगयं संजत्तेह संदणं जेण गंतूण वंदामो जयगुरुं, जं सामी आणवेइत्ति भणिऊण निग्गया कुडुंबिया
पुरिसा, पग्गुणीकओ रहवरो, समुवणीओ उसहदत्तस्स, तओ देवाणंदाए समेओ तमारुहिऊण पुरिसपरिवारपरिय-
रिओ पयट्ठो जिणाभिमुहं, पत्तो कमेण बहुसालयसमीवं, लत्ताइच्छत्तपमुहाइसयदंसणेण य रहाओ पच्चोरुहिऊण
पंचविहेणं अभिगमेणं पविट्ठो समोसरणे, तिपयाहिणादाणपुव्वयं च पणमिऊण जिणं पहिट्ठमणो निविट्ठो भूमिपट्ठे ।
देवाणंदाऽवि भगवंतं पणमिऊण सविणयं उसहदत्तं माहणं पुरओ काऊण उद्धट्ठाणट्ठिया चेव सुस्सूसमाणी
भालतलारोवियपाणिसंपुडा पज्जुवासिउमारद्धा, नवरं जंसमयं चेव तीसे भयवं चक्खुगोयरमुवगओ तंसमयं चिय
वियसियचयणकमला हरिसुप्फुल्लोयणसंदमाणाणंदसलिला जलहरधारापहयकयंबकुसुमंपिव समूससियरोमकूवा
यणमुहनिस्सरंतस्तीरधारा य जायत्ति, तं च तहाविहं पेच्छिऊण समुप्पन्नसंसओ गोयमसामी जयगुरुं पणमिऊण
पुच्छिउं पवत्तो-भयवं! किं कारणं देवाणंदा अणिमिसाए दिट्ठीए तुम्ह वयणं पेहमाणा नियसुयदंसणाणुरूवा
पेमपच्चभारगच्चभयमवत्थं पत्तत्ति?, भगवया भणियं-भो गोयम! देवाणंदा ममं जणणी, अहण्णं देवाणंदाए कुच्छिसं-
भवो पुत्तो, जओ सुरभवचवणाओ आरब्भ बायासी दिणाइं इमीए गच्चंभि वुत्थो, अओ चिय पुव्वसिणेहाणुरागेण
एसा अमुणियपरमत्थावि एवंविहं संभममावन्ना ।

श्रीगुणचंद्र
महावीरच०
८ प्रस्तावः
॥ २५९ ॥

इय सोऊण जिणिंदस्स भासियं उच्छलंतरोमंचा । देवाणंदाए समं झडत्ति जाओ उसभदत्तो ॥ १ ॥
परिसाजणोऽवि सवो विम्हयमचंतमुवगओ सहसा । अस्सुयपुवे सुणिए को वा नो विम्हयं वहइ ? ॥ २ ॥
तओ उसभदत्तो देवाणंदा य समुप्पन्नगाढयरहरिसपगरिसाई पुणोऽवि निवडियाई जयगुरुणो चलणेसु, भयव-
यावि 'दुप्पडियारा अम्मापियरो'त्ति सेसलोयस्स उवदंसणत्थं च पारद्धा देसणा । कहं चिय ?
भो भो देवाणुपिया ! अणाइरूवंमि एत्थ संसारे । को किर कस्स न जाओ मायापिइपुत्तभावेहिं ? ॥ १ ॥
कस्सवि न वा विओगे अणवरयगलंतनयणसलिलेण । पइसमयमुक्कपोकं हाहारवगब्भिनं रुत्तं ? ॥ २ ॥
चोइसरज्जुपमाणे लोगे नो कत्थ वावि वुत्थमहो ? । अणवरयमावयाणं काण व नो भायणं जाओ ? ॥ ३ ॥
कस्स व आणानिदेसवत्तिणा दासनिच्चिसेसेण । नो वट्ठियं दुहट्ठेण पाणिलोएण एएण ? ॥ ४ ॥
एवंविहदुहनिवहेक्ककारणे कह भवे महाभीमे । खणमेत्तंपि विजायइ निवासबुद्धी सुबुद्धीणं ? ॥ ५ ॥
एत्तो चिय सासयसोक्खकंखिणो लक्खिउं भवसरूवं । तणमिव रज्जाइ समुज्झिऊण पवज्जमल्लीणा ॥ ६ ॥
ता जाव पुन्नपच्चभारयावणिज्जा इमा हु सामग्गी । तुब्भेवि ताव गिण्हह निस्सेयससाहगं धम्मं ॥ ७ ॥
इय जगगुरुणा कहिए तेसिं आणंदसंदिरच्छीणं । केवलमणुभवगम्भो कोइ पमोओ समुप्पन्नो ॥ ८ ॥
तओ उसभदत्तो देवाणंदाए समेओ हट्ठुत्तो उट्ठिऊण सामिं तिकखुत्तो वंदिऊण करयलकमलकोससेहरं सिरं

देवानन्दा-
श्रुतभदत्त-
धर्मश्रवणं.

॥ २५९ ॥

दूरं उन्नामिऊण भणिउं पवत्तो-भयवं! अवितहमेयं जं तुब्भे वयह, ता अणुगिण्हह अम्हे सदिक्खापयाणेणं, विर-
त्तमिणिंहे गेहवासाओ माणसं, भगवया भणियं-जुत्तमेयं भवारिसाणंपि, तओ कयकिच्चमप्पाणं मन्नंताइं उत्तर-
पुरत्थिमदिसिसमुज्झियभूसणकुसुमदामाइं निवत्तियपंचमुट्ठियलोयकम्माइं ताइं तिपयाहिणादाणपुरस्सरं परमेसरं
यंदित्ता भणिउं पवत्ताइं-भयवं! जरामरणरोगसोगविप्पओगजलणजालाकलावकवलियाओ अम्हे एत्तो भवजरकुडी-
राओ नित्थारेसु सहत्थेण तुमं, तुह पयसरणमल्लीणो खु एसो जणो, इय भणिए भुवणगुरूणा सयमेव तेसिं दिन्ना
दिक्खा, कहिओ साहुसमायारो परूविओ आवस्सयविही, एवं तक्कालोचियं सव्वं विहिं देसिऊण भयवं अज्जचंद-
णाए पवत्तिणीए देवाणंदं सिस्सिणित्ताए पणामेइ, उसभदत्तं च थेराणं समप्पेइ, अह ताइं निक्कलंकसमणधम्मपरि-
पालणवद्धलक्खाइं अपुच्चापुवत्तवचरणपरायणाइं अहिण्णकारसअंगाइं पज्जंतसमयसमाराहियसंलेहणाइं निवाणमहा-
मंदिरारोहहेऊभूयं निस्सेणिंपिव खवगसेणिं आरुहिऊण पत्ताइं दोन्निवि सिवपयंमि ।

भयवंपि वद्धमाणो परिअरिओ गोयमाइसमणेहिं । हिययाहिंतोवि तमं अवाणितो भवसत्ताणं ॥ १ ॥

गामागरनगराइसु विहरंतो सिवपयं पयासितो । खत्तियकुंडग्गामे नयरम्मि कमेण संपत्तो ॥ २ ॥

तत्थ य सुरेहिं रइयं चीतरुक्खयारगोयरसणाहं । ऊसियसियधयनिवहं जणसुहकरणं समोसरणं ॥ ३ ॥

वत्तीसंपि सुरिंदा जिणसुहकमलावलोयणसतण्हा । विविहविमाणारूढा ओअरिया सुरपुरीहिंतो ॥ ४ ॥

श्रीगुणचंद
महावीरच०
८ प्रस्तावः
॥ २६० ॥

अह पुबुद्वारेणं पविसित्ता सुरगणेण शुवंतो । सिंहासणे निसन्नो पुवाभिमुहो जिणवरिंदो ॥ ५ ॥
एकारसवि गणहरा केवलमणपज्जवोहिनाणी य । चउदसदसपुव्वीविउविइट्ठीपत्ता य मुणिवसभा ॥ ६ ॥
उद्धट्ठिया उ वेमाणियाण देवीओ तहय समणीओ । ठायंति जिणं नमिउं दाहिणपुवंमि दिसिभाए ॥ ७ ॥
अह दाहिणदारेणं पविसित्ता विणयपणयदेहाओ । भवणवइवाणमंतरजोइसदेवाण देवीओ ॥ ८ ॥
काउं पयाहिणं भुवणबंधुणो धम्मसवणलोभेण । निसियंति पहिट्ठाओ दाहिणपच्चत्थिमविभागे ॥ ९ ॥
तत्तो पच्छिमदारेण पविसिउं पवरभूसणसणाहा । भवणवइवाणमंतरजोइसिया हरिसपणयसिरा ॥ १० ॥
विहिणा जिणं नमंसिय गणहरकेवलपमोक्खमुणिणो य । निविसंति जिणाभिमुहा उत्तरपच्चत्थिमदिसाए ॥ ११ ॥
उत्तरदिसिदारेणं तत्तो पविसित्तु दिव्वरूवधरा । वेमाणियसुरवग्गा नरा य नारीजणा य तहा ॥ १२ ॥
पम्मुक्कपरोप्परवेरमच्छरा धम्मसवणतल्लिच्छा । उत्तरपुरत्थिमंमि य ठायंति दिसाविभागंमि ॥ १३ ॥
न कुणंति हासखेड्डाइं नेव चक्खुं खिवंति अन्नत्थ । चित्तलिहियव सव्वे जिणिंदवयणं पलोयंति ॥ १४ ॥
तयणंतरं च बीए पायारब्भंतरे तिरियवग्गो । हयमहिससीहपमुहो उज्झियवेरो सुहं वसइ ॥ १५ ॥ कहां चिय?—
दिणयरकरसंतत्तं भुयंगमं छाये सिंहंडेहिं । तंडविएहिं सिंहंडी करुणाए विमुक्ककुविगण्णे ॥ १६ ॥
कंडूयइ दसणकोडीए कुंजरो केसरिस्स मुहभागं । धावारइ सीही हरिणसावयं दढ्छुहाभिहयं ॥ १७ ॥

क्षत्रियकुंडे
समव-
सरणं,

॥ २६० ॥

मज्जारोऽवि हु ससिरंमि मूसगं ठवइ गाढपणएण । वणसेरिहोऽवि तुरयं रसणाए दढं परामुसइ ॥ १८ ॥

इय जत्थ निव्विधेयावि पाणिणो तत्थ तियसनरनिवहा । उज्झंति मच्छरं जं परोप्परं तं किमच्छरियं ? ॥ १९ ॥

तइए पायारब्भंतरंमि देवाण विविहरूवाइं । विजयपडायापयडाइं संनिसीयंति जाणाइं ॥ २० ॥

एत्थंतरंमि भुवणेकभाणुणा कलियसयलभावेण । वयणकिरणेहिं मिच्छत्ततिमिरमवहरिउमारद्धं ॥ २१ ॥

इओ य पुव्वमेव जिणविहारनिवेयणवावारियपुरिसेहिं सामिसमागमेण वद्धाविओ नंदिवद्धणनराहियो, हरिसभर-
निस्सरंतरोमंचेण य तेण दवावियं तेसिं चिंतियाइरित्तं पारिओसियं, भणिओ य संनिहियकिंकरवग्गो-अरे! सिग्घं
संजत्तेह जयकुंजरं पगुणीकरेह तुरंगघट्टाइं पयट्टावेह नयरसोहं उब्भवेह सव्वविजयचिंधाइं आइक्खह आघोसणा-
पुव्वयं नयरीजणस्स जहा सिग्घं पाउब्भवह कयमज्जणविलेवणा नियविभवाणुरूवजाणजंपाणारूढा नरिंदसमीवं
जेण वंदिज्जइ महावीरोत्ति भणिए जं देवो आणवेइत्ति पडिवज्जिऊण संपाडियं नरिंदसासणं, समुवणीओ जयकुं-
जरो, समारूढो य नरिंदो, पुरजणेण परियरिओ पयट्टो भयवओ अभिमुहं, तओ छत्ताइच्छत्ते पेच्छिऊण पमुक्कराय-
चिंधो परेणं विणएणं जयगुरुं विन्नवेउं पवत्तो । कहं ?—

गयणंगणं व ससहरविवज्जियं नाह ! एत्तियं कालं । नयरमिमं तुह विरहे पणट्टसोभं दढं जायं ॥ १ ॥

अहमवि तुम्हऽणुवित्तीए नूण चत्तो न रायलच्छीए । अन्नह तुमए रहियस्स नाह ! का जोग्गया मज्झ ! ॥ २ ॥

श्रीगुणचंद
महावीरच०
८ प्रस्तावः
॥ २६१ ॥

तुह सच्चरियाणं कित्तणेण पइदियहमेव पुणरुत्तं । साहारो मह जाओ जीयस्सवि निस्सरंतस्स ॥ ३ ॥
ता अज्जं चिय सुदिणं अज्जं चिय वंछियाइं जायाइं । चिरकालाओवि जएकनाह ! जमिहागओ तंसि ॥ ४ ॥
इय सञ्भावुञ्जपेम्मगञ्जवयणाइं जंपिउं राया । सट्ठाणंमि निविट्ठो ठविउं दिट्ठिं जिणमुहंमि ॥ ५ ॥
इओ य तत्थेव नयरे भयवओ भाइणिज्जो रूवलायणणसाली जमाली नाम कुमारो परिवसइ, सो य वद्धमाणंमि
पव्वज्जं पडियन्ने नंदिवद्धणनरिंदेण भगवओ पुत्तिं पियदंसणाभिहाणं परिणाविओ समानो केलाससेलसिहरसमुत्तुंग-
धवलहरमारूढो वज्जंतेहिं चउव्विहाउज्जेहिं वरतरुणीसंपउत्तेहिं वत्तीसइवद्धेहिं नाडएहिं उवगिज्जमाणो उवन-
चिज्जमाणो य पाउसवासारत्तसरयहेमंतवसंतगिम्हपज्जवसाणे लुचेव उउणो जहाविभवेणं माणयंतो पंचविहे पवरे
माणुस्सए कामभोगे पच्चणुञ्भवमाणो सिंगाडगतियचउक्कवचरेसु जिणगमणसवणहल्लफलियं परिचत्तवावारंतरं हल-
बोलाउलियदियंतरं जणसमूहं एगमग्गाणुलग्गं अवलोइऊण सविम्हयं नियपरियणमापुच्छइ—अरे किमज्ज एत्थ
नयरे इंदमहो वा खंदमहो वा मुगुंदमहो वा नागमहो वा जक्खमहो वा चेइयमहो वा ? जं एस पुरजणो एवमे-
गाभिमुहो गच्छइ, परियणेण भणियं—कुमार ! नो अज्ज इंदखंदाईणं ऊसवविसेसो, किंतु भयवं महावीरो तुम्ह
माउलगो समणसंघपरिवुडो ब्राहिं समोसढो, तस्स वंदणवडियाए एस जणो वच्चइ, एवं च निसामिऊण हरिस-
वससमूससियरोमकूवो कयमज्जणविलेवणालंकारपरिग्गहो सकोरिंटमल्लदामेणं लुत्तेणं धरिज्जमाणेणं नाणाविहपहरण-

नन्दिवर्धन-
कृतास्तुतिः
जमालेरा-
गमनं च.

॥ २६१ ॥

करपुरिसपरिखित्तो पवररहनिसन्नो गओ समोसरणं, दूराओ चिय ओयरिओ रहाओ, परमायरेण वंदिओ जिणो,
तओ अणिमिसाए दिट्ठीए सामिमुहमवलोयमाणो पज्जुवासिउमारद्धो । भगवयावि पयट्ठाविया धम्मदेसणा ।
कहं चिय ?—

करयलपरिगलियजलं व गलइ पइसमयमेव जीयमिमं । वाहिजरायंकाविय देहं दूमंति निच्चं पि ॥ १ ॥
अइवहुकिलेससमुवज्जियावि विज्जुव चंचला लच्छी । पियपुत्तसयणजोगोऽवि भंगुरो जलतरंगोव ॥ २ ॥
विसयपिवासा पिसाइयव दुन्निग्गहा तह कहं पि । वामोहइ जह थेवं पि नेव संभवइ वेरगं ॥ ३ ॥
अवरावरगिहवावारविरयणावाउलो सयावि जणो । कीणासमुहं वच्चइ अणुवज्जियधम्मपाहिज्जो ॥ ४ ॥
एसो चिय मुद्धजणस्स विब्भमो सबहाऽविय अजुत्तो । जं पज्जंते धम्मं भोत्तुं भोगे चरिस्सामो ॥ ५ ॥
जं थेरत्ते पत्ते हयंमि सव्विंदियप्पयारंमि । अच्छउ दूरे करणं दुलहं धम्मस्स सवणं पि ॥ ६ ॥
किं बहुणा भणिणं ?, जो बालत्तेऽवि नायरइ धम्मं । संगामसमयहयसिक्खगोव सो सोअइ विरामे ॥ ७ ॥
इय जयगुरुणा नीसेससत्तसाहारणाए वाणीए । मोक्खसुहमूलबीयं कहियं सद्धम्मसव्वस्सं ॥ ८ ॥
इमं च अवक्खित्तचित्तो सवणंजलीहिं पाऊण जमालिकुमारो हिययंतो समुल्लसंतवेरगवासणो भयवंतं पणि-
वइऊण भालयलनिच्चलनिवेसियपाणिपंकयकोसं भणिउं पवत्तो—

श्रीगुणचंद
महावीरच०
८ प्रस्तावः
॥ २६२ ॥

भयवं ! तुमए जह मज्झ देसिओ मोक्खसोक्खदाणखमो । धम्मो तह नो केणवि अन्नेणं निउणमइणावि ? ॥ १ ॥
मन्ने पुव्वभवेसुं बाढं समुवज्जियं मए पुत्तं । तेण जयनाह ! तुमए सद्धिं मह दंसणं जायं ॥ २ ॥
ता जाव अम्मापियरो पुच्छामि ताव तुब्भं समीवे सफलीकरेमि पवज्जापरिग्गहेण नियजीवियं, भयवयावि
भणियं—वहुविग्घाईं धम्मकज्जाईं ना पडिवंधं कुणसुत्ति, तओ जमाली कुमारो जयगुरुं वंदिऊण संदणारूढो गओ
सगिहं, पत्थावेण य अम्मापिऊण पाए पणमिऊण भणिउमारद्धो—हंहो अम्मताया ! अज्ज मए भयवओ महावीरस्स
अंतिए धम्मो निसामिओ, सो य अमयंपिव अभिरुइओत्ति, अम्मापिऊहिं भणियं—धन्नो कयलक्खणो उवलद्ध-
जम्मजीवियफलोऽसि तुमं, नहु अकयपुत्ताण कइयावि सवणगोयरमुवगच्छइ जिणिंदवयणं, जमालिणा संलत्तं-
अम्मताया ! तदायन्नणानंतरमेव संसारभउविग्गो भीओऽहं जम्मणमरणाणं ता इच्छामि तुब्भेहिं समणुण्णाओ
समाणो समणभावं पडिवज्जिउं । इमं च अस्सुयपुव्वं निसामिऊण जमालिस्स जणणी तक्खणुप्पन्नसंताववसविस-
प्पमाणसेयसलिला सोगभरवेविरंगी पयंडमायंगकराहयकुमुयं व मिलाणलायन्नं वयणमुवहंती तक्खणकिसीभूय-
वाहुवल्लरीगलंतकणयवलया धरणिवट्ठपम्भट्टउत्तरिला विकिण्णकेसहत्या सिट्ठिलसंधिवंधणा मुच्छावसनट्ठचेयणा
धसत्ति कोट्टिमतलंमि निवडिया, अह ससंभमपधाविण्ण परियणेण निम्मलसलिलसीयरसंवलिण्ण तालियंटपव-
णेण आसासिया समाणी सुचिरं विलविऊण विमुक्कदीहनीसासा जमालिं भणिउं पवत्ता—अहो वच्छ ! अम्हाणं तुमं

जमालेवो-
धः मातु-
मुच्छां.

॥ २६२ ॥

चेव एगो पुत्तो संमओ पिओ हियनंदणो रयणकरंडगसमाणो ओवइयसमुवलद्धो, ता नो खलु वच्छ! अम्हे इच्छामो तुम्ह खणमेत्तमवि विओगं, किमंग पवज्जाणुमन्नणं?, अओ अच्छसु ताव जाव अम्हे जीवामो, कालगएहिं पुण परिणयवओ वड्हियकुलसंतई निविन्नकामभोगो पवज्जेज्जासि, जमालिणा भणियं-अम्मा! एत्थ खलु माणुसए भवे अणेगसारीरमाणसरोगसोगजरामरणपमुहोवद्वसंपगाढे असासए जलबुच्चुयसमाणे सरयगिरिसिहरसरंतसरिया-तरंगभंगुरे को एवं जाणइ-के पुर्विं मरणधम्माणो के वा पच्छा मरणधम्माणोत्ति, किं च—

जइ नाम मुणिज्ज इमंपि कोइ ता किं न होज्ज पज्जत्तं? । किं तु अयंडेवि अखंडियागमो पडइ जमदंडो ॥ १ ॥
 किंतु-कस्स न हरंति हिययं विसया? नो कस्स वल्लहा सुयणा? । किंतु खरपवणपहयं किसलयमिव भंगुरं जीयं ॥ २ ॥
 एत्तो चिय दुज्जणमाणसं व मोत्तूण रजरट्टाई । धीरा दुरणुचरंपि हु संजममग्गं समणुलग्गा ॥ ३ ॥
 ता मोहपसरमुच्छिदिकुण गयमो(अणुमण्ण)धम्मकरणत्थं । किं वल्लहं निरुंभइ कोवि हु जलणाउले गेहे? ॥ ४ ॥
 एवं च भणिए अम्मापिऊहिं कहियं-पुत्त! इमं तुह सरीरं विसिट्ठलक्खणवंजणगुणोववेयं उत्तमबलवीरियसत्त-
 जुत्तं उदग्गसोहग्गसंगयं समग्गरोगरहियं निरुवहयलट्ठपंचिंदियं पढमजोवणगुणाणुगयं, अओ कहं दुरणुचरं संजमं
 काउं पारिही?, जेण—

मत्तकरिरायदढचलणचंपणं सहइ नेव कमलवणं । उवरमसु पुत्त! दुक्करसंजमकरणाउ तेण तुमं ॥ १ ॥

श्रीगुणचंद
महावीरच०
८ प्रस्तावः

॥ २६३ ॥

जमालिणा भणियं—अम्मो ! माणुसगं सरीरं अणेमरोगसोगसंगयं अट्टिसंचयसमुट्ठियं ण्हारुसिराजालसंपिण्ढं अकुट्टिमट्ठियाभायणं व थेवेणवि विद्धंसणसीलं असुइयं रुहिरमंसवसमेयसुकाइकलुसपडिपुत्रं सवोवदवसज्झं अवस्समुज्झणिज्जंति । अविय—

निस्सारस्सवि एयस्स सारया एत्तिण्ण निवडिया । जं उवयारे वट्ठइ मोक्खत्थं उज्जमंताणं ॥ १ ॥

जइ ण्हाणविलेवणभूसणेहिं कीरइ इमस्स नो चेट्ठा । ता वासरससहरमंडलं सोहं न उवहइ ॥ २ ॥

तओ पुणोऽवि भणियं जणणीए—पुत्त ! इमाओ समुन्नयरायकुलसंभवाओ सयलकलाकुसलाओ रूवलायन्नमण-हरंगीओ जलहिवेलाओ व सकुलालंकरणाओ सुमुणिमालाओ इव मुत्ताहारपरिग्गहाओ मयगलावलीओ इव लीला-लसगामिणीओ पीणघणयणविणमियमुट्ठिगेज्झमज्झाओ मणोणुकूलवत्तिणीओ सवंगसुंदरंगीओ पियदंसणापमुहाओ अट्ठ पिययमाओ अपत्तकालेचिय परिचइऊणमचंतमजुत्तं तुह तवोकम्ममारंभिउं, तम्हा एयाहिं सद्धिं ताव मुंजाहि माणुस्सए कामभोए, परिणयवओ य एयाहिं चेव समं पवज्जं आयेरेज्जासि ।

जमालिणा कहियं—अम्मो ! एए माणुस्सया कामभोगा उचारपासवणवंतपूयसुकुसोणियसमुब्भवा मयकलेवर-निस्सरंतविस्सगंधा असुहउस्सासुवेयजणगा वीमच्छा तुच्छकालिया बहुकिलेससज्झा य अबुहजणजणियचित्तप-रितोसा साहुगरहणिज्जा अणंतचाउरंतसंसारवद्धणा करयलकलियदददुकट्ठं व असुचमाणा असंखतिकखदुक्खाणुवं-

दीक्षायाम-
विलंबः मा-
नुष्यानित्य-
ता विषय-
निन्दा.

॥ २६३ ॥

धिणो सुगङ्गमणविग्धकारिणो कहां कुसलाण खणमेत्तंपि उवभोत्तुं जुत्ता हवन्ति? । अविय—

को णाम जीवियत्थी तालउडविसं कयावि भुंजेज्जा? । उग्गाढदाढकेसरिमुहकंदरमहव घट्टेज्जा? ॥ १ ॥

जालाकलावभीसणवज्जानलमज्झमहव पविसेज्जा । निसियग्गस्सग्गधारासु वावि को वा परिभमेज्जा? ॥ २ ॥

अहवा सवंपि इमं करेज्ज कोऽवि हु सुराइसामत्था ।

विसए पुण परिभोत्तुं खेमेण न कोइ (खणमवि न सुहेण) निवसेज्जा? ॥ ३ ॥

जइ कहवि अयाणंता मूढा विसएसु संपयट्ठंति । ता किं मुणियजिणेसरवयणाणवि वट्ठिउं जुत्तं? ॥ ४ ॥

इमं च निसामिऊण पुणोऽवि भणियं जणणीए—वच्छ! इमं अज्जयपज्जयपिउपज्जायागयं बहुं हिरण्णं रययं कंसं
दूसं निहिनिवहं अलं सत्त पुरिसे जाव पकामं दाउं पकामं परिभोत्तुं ता जहेच्छं विलससु कइवय वासराइंति,
जमालिणा भणियं—अम्मो! सुवहुंपि दविणजायं अग्गिसाहियं चोरसाहियं दाइयसाहियं अधुवं असासयं असेसाण-
त्थसत्थनिबंध्यं, अओ को एत्थ पडिबंध्यो?, एवं च अणेगप्पयारेहिं अणुकूलेहिं वयणेहिं जाव पन्नविज्जमाणोऽवि
जमाली न किंपि पडिवज्जइ ताव पुणोऽवि संजमभयकरेहिं वयणेहिं अम्मापिउणो पयंपंति-वच्छ! दुरणुचरं निग्गंथं
पावयणं, जओ एत्थ लोहमया जवा चावेयच्चा गंगामहानईए पडिसोएण गंतवं महासमुदो भुयाहिं तरियच्चो असि-
धारं वयं अणुचरियच्चं, न य वच्छ! एत्थ समण्णं कप्पइ आहाकम्मियं वा उद्देसियं वा मिस्सजायं वा कीयगड-

श्रीगुणचंद
महावीरच०
८ प्रस्तावः
॥ २६४ ॥

पसुहं वा दुब्भिकखभत्तं वा गिलाणभत्तं वा वहलियाभत्तं वा सेज्जायरपिंडं वा कंदमूलफलवीयहरियभोयणं वा परिभोत्तुं, तुमं च वच्छ! सुहलालिओ न समत्थो सीयवायायवखुहापिवासापमुहदुस्तहवावीसपरीसहसहणं सुहुत्त-
मवि काउं, ता अलाहि पुणरुत्तवायावित्थरेणं, जमालिणा भणियं—अम्मताया! इमं निगंथं पावयणं कीवाणं कायराणं काउरिसाणं इहलोयपडिबद्धाणं परलोयपरंमुहाणं विसयतिसियाणं दुरणुचरं, नो सप्पुरिसाणं पडिवन्नभरधरण-
धवलाणं नियसरीरजीवियनिरवेक्खाणंति, एवं च अणुकूलेहिं पडिकूलेहि य वयणेहिं भणिओ समानो जाव जमाली न परिच्चयइ पवज्जाभिलासं ताव अकामएहिं चेव अणुमन्निओ जणणिजणगेहिं। तयणंतरं आहूया निययपु-
रिसा भणिया य, जहा—सिग्घमेव खत्तियकुडग्गामं नयरं सबाहिरम्भंतरं सम्मज्जिओवलित्तं अवणियतणकयवरं विसोहियरायमग्गं कारावेह, जमालिकुमारस्स य जोग्गं महरिहं निक्खमणभिसेयं निवत्तेह, ते य सविणयं पडिसु-
णित्ता नीहरिया भवणाओ संपाडियं रायसासणं, तयणंतरं च पुरत्थाभिमुहम्मि सीहासणे उववेसिऊण जमालि-
कुमारो मणिकणगरययपुढविमएहिं अट्ठोत्तरसयसंखेहिं अणेगेहिं कलसेहिं गंधुदुरपवरसलिलभरिएहिं ण्हाविओ। अम्मापिऊहिं निवत्तियंमि य अभिसेगे भणिओ—वच्छ! किमियाणिं तुह बहुमयं पियं पयच्छामो?, जमालिणा भणियं—अम्मताया! इच्छामि इयाणिं कुत्तियावणाओ रयहरणं पडिग्गहं च उवणिज्जमाणं तहा कासवं च वाहरि-
ज्जमाणं, एवं च निसामिऊण जमालिपिऊणा भणिया पुरिसा—अरे सिरिघराओ तिन्नि दविणसयसहस्साइं घेत्तूण

अर्थविपाकः
संयमसुक-
रतादीक्षा-
नुमतिः।

॥ २६४ ॥

कुत्तियावणाओ रयहरणं पडिगहं च एगमेगलक्खेण अणेह, एगलक्खप्पयाणेण कासवगं च सहावेह, एवमाणत्ते निग्गया पुरिसा रयहरणं पडिगहं कासवगं च घेत्तूण पडिनिवत्ता, सो य कासवो जमालिपियरं पणमिऊण एवं भणिउं पवत्तो-देव ! संदिसह जं मए करणिज्जं, तेण जंपियं-भइ ! जमालिस्स कुमारस्स परेणं जत्तेणं चउरंगुलवज्जे निक्खमणपाओगे अग्गकेसे कप्पेहि, तओ सो कासवओ सुरभिगंधोदएण करचलणे पक्खालिऊण अट्टगुणाए पोत्तीए वयणं संजमिऊण जहुत्तेण विहिणा केसे कप्पिउमारद्धो, जणणीवि रे अणवरयं कज्जलमलिणाइं अंसु-याइं मुयंती भुयगनिम्मोयनिम्मलेण उत्तरिज्जेण केसकलावं पडिच्छइ, तथणंतरं च सुरभिवारिणा पक्खालिऊण हरियंदसविलेवणपुप्फेहिं अचेइ, पंडुरवत्थंमि बंधिऊण रयणकरंडगंमि पक्खिवइ, सोगभरगगरगिरं च रुयमाणी एवं भणइ-एत्तो मए मंदपुण्णाए जण्णेसु ऊसवेसु य वहीसु य इमेहिं पुत्तो जमाली सुमरणिज्जोत्ति, एवं च अभि-क्खणं जंपमाणी तं रयणकरंडगं नियसयणिज्जस्स ऊसीसगमूले ठवेइ, अह निवत्तियमज्जणमहसवो परिहियामल-दुगुलो हेममयमउडमणिकणयकडयकुंडलालंकियसरीरो वच्छत्थलरिखोलितविमलमुत्ताकलावसोहिलो विविहाभरण-पहाभरविच्छुरियनहंगणाभोगो तक्कालमिलियविलयासमूहकीरंतमंगलायारो दाणाणंदियमग्गणगिज्जंतुदामगुणनि-वहो खंभसयसंनिविट्ठं समीरंबुयधवलधयवडसणाहं सुविचित्तचित्तरम्मं अणेगजणजणियपरितोसं सुइनेवत्थधराणं छेयाणं पवरनरजुवाणाणं सहस्सेणं उक्खित्तं झडत्ति सिबियं समारूढो, रयहरणपडिगहधारिणीए दाहिणदिसिं

श्रीगुणचंद
महावीरच०
८ प्रस्तावः
॥ २६५ ॥

निलीणाए धावीए परिवरिओ, अन्नाहि न पवस्सणीहिं धरियधषलाणवत्तो चलंतसत्तिकंतचामरावयवो दिट्ठिपह-
पइट्ठावियमणिमयअट्ठट्ठमंगलओ करितुरयरहवरारूढसयणवग्गेण अणुगमिज्जंतो वज्जंताउज्जसमुच्छलंतरवभरियनह-
विवरो पासायतलट्ठियपउरलोयनिवहेण संथुणिज्जंतो झडत्ति जमालिकुमारो तयणु पयट्ठो जिणाभिमुहं ।

अह जमालिस्स भारिया पियदंसणा तहाविहवइयरमुवलब्भ जायभववेरग्गा पवज्जं पडिवज्जिउकामा तहेव
पट्ठिया, कमेण य पत्ताहं ताहं जिणंतियं, तओ पंचरायसुयसयपरिवारो जमालिकुमारो पडिवन्नो जिणिंदेसियं
समणधम्मं, पियदंसणावि नरिंदुहिया सहस्सेण परिवुडा पवहुमाणसंवेगा समणी जायत्ति ।

अह जमाली सामाइयमाइयाइं एकारस अंगाइं ससुत्ताइं सअत्थाइं अहिज्जइ, बह्महिं चउत्थलट्ठट्ठमपमुहेहिं अण-
वरयं विचित्तेहिं तवोकम्मोहिं अप्पाणं भावितो भगवया सद्धिं पुरागराइसु विहरइ, पियदंसणावि चंदणाए पव-
त्तिणीए समं परियडइ ।

अह अन्नया कयाइं जमाली भयवंतं महावीरजिणवरं वंदित्ता विन्नविउमारद्धो-भयवं! वंछामि अहं तुम्भोहिं
अम्भणुन्नाओ समाणो अनिययविहारेहिं पंचहिं समणसएहिं सद्धिं विहरिउंति, सामीवि विमलकेवलालोयावलो-
इवसयलजियलोयभूयभाविवट्ठमाणकालकलावलंबिसुहासुहपरिणामविसेसो भाविरमणत्थं मुणिऊण जमालिस्स पुणो
पुण्यो भणमाणस्सवि मोणमवलंबिऊण जाविउं पवत्तो, जमालीऽवि अप्पडिसिद्धमणुमयंति कलिऊण पंचहिं समण-

जमाले-
दीक्षा.

॥ २६५ ॥

सएहिं सहिओ तवस्सिणीसहस्सपरिवुडाए पियदंसणाए समणुगओ अपुच्चापुच्चागामनगरागराइसु भमिउमारद्धो, अन्नया य गामाणुगामेण विहरमाणो समागओ सावत्थि नयरिं, ठिओ य कुट्टुगाभिहाणम्मि उज्जाणे, तत्थ य ठियस्स विरसेहिं लुक्खेहिं सीयलेहिं तुच्छेहिं असुंदरेहिं कालाइक्कंतेहिं पाणभोगणेहिं दुरहियासो पयंडो सरीरंमि पित्तजरो पाउब्भूओ, तेण य अच्चंतं अभिहओ समाणो भणइ—अहो समणा ! मम निमित्तं संधारयं संधारेह, ते य तच्चयणमायन्निऊण तक्खणमेव संधारयं संधारिउमारद्धा, जमालीवि अहिययरं वेयणाभिहओ निसन्नो ठाउमपा-रयंतो पुणो पुणो पुच्छइ—भो समणा ! संधारगो संधरिओ न वा ?, तेहिं भणियं—संधरिओ, एयं च सोच्चा उट्ठिओ जमाली गओ तदंतियं, संधारयं च संधरिजंतं पेच्छिऊण उप्पन्नमिच्छतो जंपिउं पवत्तो—भो मुणिणो ! इयाणिं मुणियं मए तत्तं, निप्फन्नमेव निप्फन्नं भन्नइ, न उण निप्फज्जमाणंपि, अओ संधरिज्जमाणेऽवि संधारगे संधरिओत्ति तुम्भेहिं वुत्तं तमसच्चं, एवं च—

कडमाणं कडमुप्पज्जमाणमुप्पन्नमेवमाईवि । वागरइ जं जिणिंदो दिट्ठविरोहा न तं घडइ ॥ १ ॥

अवरावरसमयसमूहजोगनिप्फज्जमाणकज्जंमि । कह पारंभे चिय कडमिमंति वोत्तुं खमं होज्जा ? ॥ २ ॥

अत्थकिरियापसाहणखमं च वत्थुत्तणं समुच्चइ । पढमसमप्पसूए य तयंपि नो विज्जइ पयत्थे ॥ ३ ॥

जइ पारंभे चिय तं कडंति एवं च सेससमएसु । करणे कडस्स आवडइ उब्भडा नूणमणवत्था ॥ ४ ॥

श्रीगुणचंद
महावीरच०
८ प्रस्तावः
॥ २६६ ॥

ता जुत्तिसंगयमिमं कडमेव कडं पयुच्चए पयडं । किरियानिद्धासमयाण होइ एवं च न विरोहो ॥ ५ ॥
इय पडिव जह समणा ! पक्खमिमं सयलदोसपरिहीणं । वुत्तंति नेय गिज्झइ कुसलेहिं किंतु जुत्तंति ॥ ६ ॥
नय सव्वन्नत्ति पसिद्धिपत्तकित्ती जिगो वयइ मिच्छा । किं तु वए चिय कइयावि जेण गरुयावि मुज्झंति ॥ ७ ॥
इय समयसत्थसवणुभवंपि तं निपविवेयमवहाय । पित्तजरविदुरिओ इय पलवइ असमंजसं बहुसो ॥ ८ ॥
एवं च मुक्कमज्जायं अजुत्तजंपिरं च जमालिं वियाणिऊण थेरेहिं भणियं—भो जमालि ! किमेवं विवरीयं परूवेसि ?,
न हु विजियरागदोसमोहा अन्नहा जंपंति तित्थयरा, न य तव्वयणं भणागंपि पक्खकखविरुद्धाइदोसलेसमावहइ,
तहाहि—जं तए भणियं—अणेगुत्तरोत्तरसमएहिं निप्फज्जमाणंमि कज्जे कहं पारंभसमएवि निप्फण्णंति वुच्चइ ?, तमजुत्तं,
जओ—जइ पढमसमए निप्फण्णं न वुच्चइ ता समयाविसेसत्तणेण बीयाइसु समएसु अनिप्फत्ती चेव हवेज्जा, जं च
अत्थकिरियाए साहगतं वत्थुलक्खणं भणियं तंपि इह अब्भिचरियं जुज्झइ, अभिहाणनाणोवओगसंभवाओ, तहा-
हि—तहाविहं वत्थुविसेसं पप्प पढमसमएवि लोगो किमेयं कुणसित्ति अन्नेण पुट्ठो वागरइ—घडं पडं वा करेमित्ति,
जं च पढमसमयकडे उत्तरोत्तरसमएसु कडकरणलक्खणाणवत्थादूसणं तंपि अन्नन्नकज्जंतरपसाहणेण अलियमेव,
किरियाकालनिद्धाकालभेयदूसणपक्खोऽवि विहलो, जं च कहियं—न वुत्तं गिज्झइ किं तु जुत्तं, तत्थवि छउम-
त्थस्स तुम्हारिसस्स कहं जुत्ताजुत्तविवेओ संभवेज्जा ?, भयवं चिय केवलालोयकलियलोयालोयभावो एत्थ पमाणं,

जमाले-
निहवत्वं.

॥ २६६ ॥

जं च भणियं गरुयावि कयावि मुञ्जंति तंपि उम्मत्तपलवियं व न कुसलाण चित्तं रंजितं पारइ, ता सुट्ठु भणियं भगवया—कडमाणं कडमुप्पज्जमाणमुप्पन्नमिच्चाइ, किंच—

जइ तिहुयणेक्कचूडामणी जिणो वागरेज्ज वितहमहो । ता तवयणेण तवोविहाणमेयं किमायरसि ? ॥ १ ॥

रज्जं रट्ठं च विवज्जिऊण आणाए तस्स निक्खमिउं । तवयणं दूसितो कह न तुमं लज्जसे इण्हि ? ॥ १ ॥

अहवाऽणाभोगसमुब्भवेण दोसेण दुट्ठु भणिएवि । जायइ पुणो विमुद्धी आलोयणनिंदणाईहिं ॥ ३ ॥

ता मोत्तुं कुवियप्पं वच्च समीवे जएकदीवस्स । पडिवज्जसु पच्छित्तं मा विफलं नेसु नियजम्मं ॥ ४ ॥

अक्खरमेत्तंपि न जो जिणिंदवयणस्स सहइ मणुस्सो । सो पावइ मिच्छत्तं तत्तो संसारपरिचुट्ठिं ॥ ५ ॥

तत्तो चिय किच्चिसतियसतिरियवसहीसु मणुयजोणीसु । दुविसहदुहपरंपरमणंतमणिवारियं लहइ ॥ ६ ॥

गरुओऽवि पावरासी जिणिंदसमयत्थसइहणहणिओ । नावत्थाणं वंधइ घणोव खरपवणपडिहणिओ ॥ ७ ॥

इय सो थेरेहिं बहुप्पयारहेऊहिं अत्थसारेहिं । तह गाढं पन्नविओ जह सहसा मोणमल्लीणो ॥ ८ ॥

अह विवरीयपरूवणापाउब्भूयपावपायच्छित्तमपडिवज्जमाणं जमालिं परिहरिऊण केऽवि थेरा भगवओ समीव-
मुवगया, अन्ने य तस्स चेव पासे ठिया, पियदंसणावि अजियासहस्सपरिवारा महिलाभावपुलभनिबिबेययाए
पुव्वपडिबंधाणुवित्तीए य जमालिस्स पक्खमणुवत्तिउमारद्धा ।

श्रीगुणचंद
महावीरच०
८ प्रस्तावः

॥ २६७ ॥

एगया य जायनीरोगसरीरो जमाली तेण असग्गहेण अप्पाणं च परं च पइदिणं वुग्गाहेमाणो वुप्पाएमाणो जिणनाहवयणं दूसेमाणो अहमेव उप्पन्ननाणदंसणधरो सब्बुत्ति अहंकारमुव्वहंतो सब्बत्थ हिंढिउं पवत्तो । अन्नया य चंपानयरीए पुण्णभदे चेइए समोसढस्स अणेगसिस्सगणपरिवुडस्स भयवओ महावीरस्स अदूरदेसंमि सो ठाऊण सगवमेवं भणिउमाढत्तो-भयवं ! जहा तुज्झ बहवे सिस्सा छउमत्था चेव भवित्ता मरणधम्मयं पत्ता तहा न खलु अहं, जओ मम दिव्वमक्खयं केवलनाणदंसणं उप्पन्नंति, तव्वसेण य सबं जहट्ठियं वत्थुत्तं अवगच्छामि, अओ एत्थ धरामंडले अहमेव अरहा सब्बू सब्बदरिसित्ति । इमं च निसामिऊण भणिओ गोअमसामिणा-भो जमाली ! जइ तुमं एवंविहो ता तुज्झ नाणं सेलेण वा थंभेण वा थूभेण वा न वारिज्जइ, अओ इमाइं दोन्नि पसिणाइं ममं वागरेहि, किं सासओ लोगो असासओ ?, किं सासओ जीवो असासओ वत्ति ?, एवं च पुच्छिओ जमाली संसय-मावण्णो जाव पच्चुत्तरं दाउमसमत्थो विच्छायमुहच्छाओ तुसिणीए संचिट्ठइ ताव भुवणेकभाणुणा महावीरेण वाग-रिओ-भो जमाली ! बहवे मम अंतेवासिणो जिणा इव समत्था इमं आयक्खिउं, किं तु तुमं व न एवं सगवमु-ल्लवंति, न य भइ ! एत्थ किंपि दुत्तेयं, जओ सासओऽवि लोगो असासओऽवि लोगो, कहं ?, कालत्तएवि अवट्ठि-यसामन्नरूवत्तणेण सासओ, ओसप्पिणीपमुहपज्जायपरियत्तणेण य असासओ, एवं जीवोऽवि सच्चावत्थासु अणुगा-मित्तणेण सासओ, नरनेरइयतिरियाइपज्जायंतरसंभवा असासओत्ति । एवं च भगवओ आइक्खमाणस्स जमाली

स्यविरादी-
नां जिनपा-
श्वेगमनं प्र-
भोत्तरे च.

॥ २६७ ॥

कुवियप्पाउलहिययत्तणेण असह्हिऊण तेण पुव्ववुग्गाहिएण नियसमणसमणीसंघेण परिवुडो पुरनगराइसु नियदं-
सणाभिप्पायं परूवयंतो विहरइ, वित्थरिया सब्बत्थ एसा संकहा जहा जमाली भगवओ मिच्छं पडिवन्नोत्ति ।

अन्नया य सो विहरमाणो पुणो गओ सावत्थि नयरिं, ठिओ य एगत्थ उज्जाणे, पियदंसणावि अज्जियासहस्स-
परिवारा महिद्धियस्स ढंकाभिहाणस्स कुंभकारस्स आवणे आपुच्छित्ता ठिया, सो य ढंको जिणवयणभावियप्पा
जाणइ जहा एयाणि मिच्छत्तमुवगयाणि, जिणवयणं न पत्तियंति, अओ जइ कहवि वोहिज्जंति तो सुद्ध लट्ठं हव-
इत्ति । अन्नया य भंडयाइं उवत्तंतेण पडिवोहणत्थं पियदंसणासाहुणीए वत्थंमि पक्खित्तो एगो जलणकणो, तेण
य दज्झमाणं वत्थं पेच्छिऊण तीए भणियं—भो महाणुभाव ! किमेयं तए कयं?, पेच्छ मम पडगो दट्ठो, तेण
भणियं—अज्जिए ! मा मुसं वयाहि, सब्बंमि चेव वत्थे निह्हे एवं भणिउं जुज्जइ, एम किर तुम्ह संमयत्थो, अन्नहा
दज्झमाणं दट्ठंति जिणवरवीरवयणं चेव पडिवज्जिउं जुत्तं ।

एयं च तीए सोच्चा तक्कालुप्पन्नसुद्धबुद्धीए । भणियं—सम्मं सावय ! मूढाऽहं बोहिया तुमए ॥ १ ॥

तइलोयतिलयभूयस्स भगवओ वद्धमाणसामिस्स । वयणं पावाए मए पडिक्कलियमेत्तियं कालं ॥ २ ॥

जस्स वयणेण विहिओ घरचाओ संजमो य पडिवन्नो । सोवि जिणो न गणिज्जइ, अहो महं मोहमाहप्पं ॥ ३ ॥

ढंकेण तओ भणियं—भयवइ ! मा वहसु चित्तसंतावं । समणीजणपरियरिया वच्चसु सब्बनुपासंमि ॥ ४ ॥

श्रीगुणचंद
महावीरच०
८ प्रस्तावः
॥ २६८ ॥

आणाए तस्स वट्टसु गरिहसु नियदुक्कडं समग्गं पि । उम्मग्गं पडिवन्नं लोयं परिहरसु बेरिं व ॥ ५ ॥
इच्छासो अणुसट्ठिति जंपिउं साहुणीसहस्सेण । परियरिया सा तत्तो तिहुयणपहुणो गया पासे ॥ ६ ॥
मोत्तुं जमालिमेगं ठंकेणऽन्नेवि बोहिया समणा । तं मोत्तूगं सब्बे तेऽवि गया जिणवरसमीवं ॥ ७ ॥
इय ताव इह भवे चिय जियवयणविकूलणाणुभावेण । मुक्को न केवलं मुणिवरेहिं सुगुणेहिंवि जमाली ॥ ८ ॥
एवं च सो मिच्छत्ताभिणिवेसेणं अप्पाणं समीववत्तिजणं च वोप्पायएंतो बहुयाइं वासाइं सामन्नपरियागं पाउ-
णित्ता अद्धमासियं च पज्जंते संलेहणं काऊण तस्स ठाणस्स अणालोइयपडिक्कंतो मओ समाणो लंतए कप्पे तेरस-
सागरोवमठिइएसु किब्बिसियसुरेसु देवत्ताए उववन्नो ।

इओ य भगवया गोयमेण जमालिं कालगयं जाणित्ता भयवंतं महावीरं परेणं विणएणं वंदित्ता भणियं—भंते !
तुब्भं कुसीसो जमाली नामं अणगारो तहाविहं उग्गं तवविसेसं आसेविऊण कहिं उववन्नो?, तओ भगवया
कहिओ सबो किब्बिसयदेवत्तलाभपज्जवसाणो से तवइयो ।

अह भणइ इंदभूई—भयवं तारिस तवंपि काऊणं । किं कारणमुववन्नो किब्बिसियसुरेसु स जमाली? ॥ १ ॥
ताहे भणियं भुवणेकभाणुणा मुणियसयलभावेण । गोयम! सुणेसु एत्थं कारणमेगग्गचित्तेण ॥ २ ॥
धम्मायाररयाणं आयरिआणं विसुद्धसीलाणं । सुत्तप्पवत्तयाणं उज्झायाणं गुणनिहीणं ॥ ३ ॥

प्रियदर्शना
बोधः जमा-
लिमरणं.

॥ २६८ ॥

कुलगणसंघाणंपिय पडिणीया जे हवन्ति इह जीया । विउलंपि तवं काउं ते किञ्चिसिएसु जायन्ति ॥ ४ ॥
 पुणरवि गोयमसामी पुच्छइ भयत्रं ! तओ सठाणाओ । चइउं कइहिं भवेहिं पाविस्सइ मोक्खपुरवासं ॥ ५ ॥
 जिणनाहेणं भणियं सुरतिरियनरेसु पंच वेलाओ । भमिऊण पत्तवोही लहिही निवाणसोकखाइं ॥ ६ ॥
 ता भो देवाणुपिया ! जमालिमुणिणो निसामिउं चरियं । धम्मगुरुप्पमुहाणं विणयपरा होज्जह सयावि ॥ ७ ॥
 इय सिक्खविउं मुणिणो समत्थजियलोयवच्छलो धीरो । विहरइ पडिबोहिंतो भवजणं परमकरुणाए ॥ ८ ॥
 विहरंतस्स य पडुणो एत्तो ससिसूरवरविमाणाणं । अवयारणअच्छरियं जह जायं तह निसामेह ॥ ९ ॥

साएए नयरे सन्निहियपाडिहेरो सुरप्पिओ नाम जक्खो, सो य पइवरिसं चित्तिज्जइ महसवो य से परमो
 कीरइ, सो य चित्तिओ समाणो चित्तगरं वावाएइ, जइ न चित्तिज्जइ ता नयरे जणमारिं विउवइ, तच्चएण य सा
 चित्तगरसेणी पलाइउमारद्धा, णरवइणा विचिंतियं-जइ इमे सबे पलाइस्संति ता अवस्समेस जक्खो अचित्तिज्जंतो
 अम्ह वहाए भविस्सइत्ति परिभाविऊण ते चित्तकरा संकलियावद्धा कया, सबेसिं नामाणि य पत्तए लिहिऊण घडए
 छुढाणि, तओ वरिसे वरिसे जस्स नामपत्तयं नीहरइ सो चित्तकम्मं जक्खस्स करेइ, एवं कालो वचइ । अन्नया य को-
 संबीनयरीए वत्थवो एगो चित्तयरदारगो चित्तविज्जासिक्खणत्थं तत्थागओ ठिओ य चित्तगरथेरीए मंदिरे, जाया य
 तप्पुत्तेण सद्धिं तस्स मिच्ची, एवं च तस्स अच्छंतस्स तंमि वरिसे समागओ थेरीसुयस्स वारगो, तओ थेरी बहुप्पयारं

श्रीगुणचंद
महावीरच०
८ प्रस्तावः

॥ २६९ ॥

उरसिराईं ताडेंती रोइउमारद्धा, पुच्छिया य तेण कोसंबीचित्तगरदारगेण-अम्मो! कीस रोयसि?, तीए भणियं-
पुत्त! एगो चिय एस मे सुओ, संपयं जक्खं चित्तिऊण जमसुहं पाविउकामोविव लक्खिज्जइ, तेण जंपियं-अम्मो!
मा रुयसु, अहं जक्खं चित्तिस्सामि, तीए भणियं-वच्छ! तुमं मे पुत्तो किं न भवसि?, तेण कहियं-तहावि चित्ति-
स्सामि, अहं जायंमि पत्थावे सो छट्ठभत्तं काऊण ण्हाओ चंदणरससमालभियदेहो नियंसियवत्थजुयलो अट्ठगुणपो-
तीए मुहं संजमिऊण नवएहिं कुच्चगेहिं पसत्थेहिं वन्नगेहिं जक्खं चित्तिऊण परेण विणएणं पायवडिओ भणइ—

देव! सुरप्पिय! को तुज्झ चित्तकम्मं विणिम्मिउं तरइ? । अच्चंतं निउणोऽविहु किं पुण अम्हारिसो मुद्धो ॥१॥

तहवि हु चवलत्तणओ न सुट्ठु जं वट्ठियं मए किंपि । तं खमियव्वं तुमए सामिय! पणयंमि को कोवो? ॥२॥

एवं धुणंतस्स तस्स परितुट्ठो जक्खो भणइ-अरे वरं वरेसु, तेण भणियं-देव! एसो चेव वरो-मा एत्तो लोगं
मारिस्ससि, जक्खेण भणियं-तुज्झ अविणासणाओ चेव सिद्धमेयं, अन्नं मग्गेसु, तेण जंपियं-जइ एवं ता जस्स
दुपयस्स चउप्पयस्स अपयस्स वा एगदेसमवि पेच्छामि तस्साणुरूवं चित्तं निव्वत्तिज्जामि, जक्खेण भणियं-एवं
होहिति, तओ सो उवलद्धवरो रत्ता नगरजणेण सकारिओ संतो गओ कोसंबीं नयरिं, तत्थ य पुव्वभणिओ सया-
णिओ राया, सो अन्नया रज्जेणं रट्ठेणं चउरंगवलविच्छडेणं अन्नेण य विभूइविसेसेणं गच्चमुव्वहंतो अत्थाणीमंडवे
निविट्ठो दूयं पुच्छइ-अरे किं मम नत्थि? जं अन्ननरिंदाणमत्थि, तेण जंपियं-देव! तुम्ह चित्तसभा नत्थि, एवं च

चंद्रमूर्त्यो-
गमनं वर-
दत्तश्चित्र-
कारः,

॥ २६९ ॥

भणिए आणत्ता राइणा सभामंडवचित्तणत्थं चित्तगरा, तेहिं च समा भूमी विभइऊण पारद्धा चित्तिउं, तस्स य वरदिन्नस्स जो अंतेउरकीलापचासन्नो पएसो सो समप्पिओ, तथा य तत्थ चित्तकम्मं कुणमाणेण एगया नरिंद-
ग्गमहिंसीए मिगावईदेवीए जालकडगंतरेण मणिमयमुद्धियाकिरणविच्छुरिओ चरणंगुट्ठओ दिट्ठो, उवमाणेण य नायमणेणं जहा मिगावई एसत्ति, तओ तेण अंगुट्ठाणुसारेण जहावट्ठियं रूवमालिहियं, तंमि य च क्खुंमि उम्मी-
लिज्जंते एगो मसिबिंदू ऊरुअंते निवडिओ, तेणावणीओ, पुणोऽवि पडिओ, एवं तइयवेलाए तं निवडियं पेच्छि-
ऊण नूणमणेण एत्थ होयवंति जायनिच्छएण नावणीओ, अह समत्तंमि चित्तकम्मे राया चित्तसभं पलोयंतो तं पएसं संपत्तो जत्थ तं मिगावईए रूवं, तं च अणिमेसच्छिणा पेच्छमाणेण दिट्ठो सो विंदू, तओ आबद्धभिउडी-
भीमो रोसवसायंविरेच्छिविच्छोहो तं च दट्ठूण नरिंदो चित्तिउमेवं समाढत्तो—

एएण पावमइणा मम पत्ती धरिसियत्ति निम्भंतं । कट्ठमन्नहा नियंसणमज्झगयंपिहु मुणेज्ज मसं ॥ १ ॥

इयरंमिवि परदारे परिभोगपरं वयं निगिण्हामो । किं पुण सए कलत्ते एयं नायंपिहु खमामो ? ॥ २ ॥

एवं परिभाविऊण सो वरदिन्नचित्तगरो समप्पिओ दंडवासियाणं, आणत्तो य वज्झो, एयं च वइयरं निसामि-
ऊण उवट्ठिया चित्तगरसेणी, विन्नविओ राया, जहा-देव ! वरलद्धओ एसो, जस्स अवयवमेत्तंपि पासइ तस्स पडि-
पुत्तं रूवमालिहइ, अओ कीस निक्कारणं कोवमुवहइ देवो ? जइ एत्थ न पचओ ता विन्नासिज्जउ, एवं च भणिए

श्रीगुणचंद
महावीरच०
८ प्रस्तावः
॥ २७० ॥

राइणा दंसावियं खुज्जाए मुहमेत्तं, तेण य तदणुरूवं निव्वत्तियं चित्तं, तहावि रत्ता पुव्वामरिसवसेण तस्स संडासओ
छिंदाविओ निव्विसओ य आणत्तो ।

तओ सो चित्तगरो पुणोऽवि गओ जक्खसमीवं, ठिओ उववासेण, भणिओ य जक्खेण—भद्द! मुंच विसायं,
ममाणुभावेण पुव्वंपिव वामहत्थेण चित्तिहिसि, एवं च लद्धे वरंमि एसो परिचित्तेइ—अहो महा पायकारिणा कंहं
निरवराहो चेव अहं एयमवत्थं पाविओ?, ता संपयं तस्स दुस्सिक्खियस्स दंसेमि दुन्नयफलंति परिभाविऊण
चित्तवट्ठियाए भिगावईए सिंगारुम्भडं रूवमालिहिऊण इत्थीआलसं चंडपज्जोयं महानरिंदमुवट्ठिओ, दंसिया चित्त-
वट्ठिगा, अवलोइया साहिलासं चंडपज्जोएण, अवलोयमाणस्स य तक्खणं चेव विसट्ठकंदोद्वदीहरा वियसिया से
दिट्ठी, पम्हुट्ठो कुलाभिमाणो परिगलिओ नयमग्गो वियंभिआ अरई समुल्लसिओ रणरणओ पज्जलिओ सव्वंगिओ
मयणानलो, सविसेसं पलोयमाणो य थंभिओव कीलिओव निच्चलनिरुद्धनयणो ठिओ मुहुत्तमेत्तं, पुच्छिओ य चित्तयरो

सुरसुंदरीए रूवं वम्महदइयाए नागकन्नाए? । दट्ठूण तए सुंदर! पडिर्विंममिप्रं इहालिहियं ॥ १ ॥

जइ सुरविलया एसा ता सच्चं भुवणविस्सुया तियसा । अह वम्महस्स लीलाए जिणउ ता सो तिलोयंपि ॥ २ ॥

अहवा भुयगाण इमा ता सोहउ निच्चमेव पायालं । पडिहणियतिमिरपसरं एयाए मुहेंदुकिरणेहिं ॥ ३ ॥

दूसिज्जइ पेच्छ इमीए कायकंतीए कंचणच्छाया । विच्छाइज्जइ नयणेहिं नीलनवनलिणलच्छीवि ॥ ४ ॥

मृगावती
चित्र.

॥ २७० ॥

अहरप्पहाएँ निहरइ विहुमकंकेलिपलवसिरीवि । रूवेऽणुरंजिएण व रंभाए वहइ समसीसिं ॥ ५ ॥

किं बहुणा ?—एवंविहवरजुवईजणस्स विरहे विडंबणा कामा । मणुयत्तंपिहु विहलं दुहावहं भूवइत्तंपि ॥ ६ ॥

तं कहसु कस्स एसा सुयणू ! को वा इमीए लाभंमि । कीरंतो य उवाओ अणुरूवो सिद्धिमावहइ ? ॥ ७ ॥

एवं नराहिवेण भणिए चित्तपरेण जंपियं—देव ! न हवइ एसा सुराईण रमणी, किंतु सयाणियरन्नो अग्गमहिंसी मिगावइनाम, मए सामन्नेण आलिहिया, विसेसओ जइ पुण परं पयावई से रूवमालिहउ, जइ एवं नाम महिला चेव सा अओ रे वज्जजंघ ! वय सिग्घं, गंतूण भणसु मम वयणेण सयाणिघनरवइं, जह सिग्घं पेसेसु मिगावइं, एवं-विह इत्थीरयणाण वरणे को तुज्झ अहिगारोत्ति ? , ता सिग्घं पेसेसु, जुज्झसज्जो वा होज्जासित्ति बुत्ते जं देवो आणवेइत्ति भणिऊण गओ दूओ, निवेइयं सयाणियस्स नरिंदसासणं, तेण य तमायन्निऊण जायकोवेण भणियं-रे दूयाहम ! जइ कहवि सो कुलकमविमुक्कमजायं उस्सिखलं पयंपइ ता तुज्झवि किं खमं वोत्तुं ? , किं भिच्चो सोऽवि न जो ससामिणो उप्पहं पवत्तस्स नियबुद्धिवित्थरेण अवजसंपंसुं परिसमेइ ? , एवंविहदुन्नयवियारिणोऽवि जायइ कुले गुरुकलंको, किं पुण बहुजणपुरओ पयडगिरा पभणिजंते ? , अन्नेसुवि रज्जंतरेसु दिहं सुयं व रे तुमे एवंविहं अकज्जं कीरंतं केणइ निवेण, किं च—जत्थ सयं चिय राया दुन्नयमेवंविहं समायरइ ततो हया मूलाओ वराइणी

श्रीगुणचंद
महावीरच०
८ प्रस्तावः
॥ २७१ ॥

तत्थ नीईवि, किं बहुणा ? एवं जंपिरस्स तुह चेव इहयं जुज्झइ विणासो काउं, जंच न कीरइ तं न य तेउत्ति कलि-
ऊण, इय निब्भत्थिऊण दूओ निद्धमणेण कंठे घेत्तूण निच्छूढो, गओ य सो चंडपज्जोयसमीवे, साहिओ य चउग्गुणो
नियवइयरो, इमोवि तेण दूयवयणेण वाढं रुढो सच्चबलेण परियरिओ पयट्ठो कोसंबीए, अणवरयपयाणएहि य
आगच्छंतं निसामिऊण सयाणिओ अप्पबलो तहाविहसंखोहसमुप्पन्नाइसारो मओ, तओ मिगावईए चित्तिं-
राया ताव संखोभेण विणट्ठो, पुत्तोऽवि असंजायबलो एयस्साणणुसरणे मा विवज्जिही, एयाणुस्सरणंमि गरुओ कुल-
कलंको, तम्हा इमं पत्तकालं-इहट्ठिया अचंतमणुलोमवयणवित्थरेण चेव कालहारिं करेमि पच्छा जमुचियं तमा-
चरिस्सामित्ति चित्तिऊण भणाविओ दूयवयणेण चंडपज्जोयनरिंदो, जहा-राए सयाणिए परोक्खम्मि तं चेव मए
सरणं, केवलं मम पुत्तो असंपत्तबलो मए विमुक्को समाणो पचंतनरिंदेहिं पेलेज्जिही, इमं च सोच्चा परमहरिसपगरि-
समुवहंतेण भणावियं रत्ता-पिए ! मम पयंडभुयदंडपरिग्गहिए तुह सुए को चिरजीवियत्थी पयं काउं समीहिज्जा ?,
तीए भणियं-अत्थि महाराय !, केवलं उरसीसए सप्पो जोयणसए वेज्जो, विणट्ठम्मि कज्जे किं तुमं काहिसि ?,
अओ जइ निप्पच्चवायं मए सह संगममभिलससि ता उज्जेणिपुरीसमुभवाहिं निदुराहिं इट्ठियाहिं इमीए नयरीए
चउदिसिं कारवेसु समुत्तुंगपायारपरिक्खेवंति, इमं चायन्निऊण पडिबन्नं राइणा, तओ चउइसवि नियरायाणो
सच्चला धरिया मग्गम्मि, पुरिसपरंपराए य आणियाओ इट्ठगाओ, निम्मविओ पायारो, तओ तीए भण्णइ-इयाणिं

शतानीक-
मरणं
मृगावती-
प्रपंचः.

॥ २७१ ॥

नगरि धन्नस्स वत्थस्स इंधणस्स य भरेहि, आसाविण्डिएण य भरिया अणेण, जाहे नयरी रोहगसज्जा जाया ताहे सा विप्पडिवन्ना, दुयाराइं वंधिऊण जुज्झिउं उवट्टिया, चंडपज्जोयरायावि विलक्खो नगरिं वेढिऊण ठिओ, अन्न-दिवसे य वेरग्गमुवगयाए चित्तिं मिगावईए-धन्ना ते गामागरनगराइसन्निवेसा जत्थ भयवं महावीरसामी भव-गिराए जणं पडिबोहंतो विहरइ, संपयं च जइ सो परमेसरो एत्थ एइ तो अहं पवयामि, इमं च तीसे संकप्पं केवलालोएण कलिऊण गोयमपमुहमुणिजणपरियुडो नवकणयकमलनिम्मियचलणो अणंतरमेव समागओ भयवं, कयं देवेहिं समोसरणं, उवविट्ठो सिंहासणे जयगुरू, तप्पभावेण य पसमियं वेरं, वद्धाविया मिगावई चारपुरि-सेहिं, दिन्नमणाए चिन्ताइरित्तं तेसिं पारिओसियं, उग्घाडियाइं गोउरकवाडाइं, महया विभवेण निग्गया मिगा-वई, जहाविहिणा वंदिओ भयवं, ठिया य समुचियठाणे, चंडपज्जोयरायावि समागओ, एत्थंतरे भगवया पारद्धा धम्मकहा ।

अह एगो पुरिसो करगहियकोदंडवाणो एस सव्वणुत्ति लोयप्पवायं निसामिऊण भयवओ अदूरदेसट्ठिओ निय-संसयं मणसा पुच्छइ, ताहे सामिणा भणिओ-भो देवाणुपिया ! वायाए पुच्छ, वरमन्नेऽवि भवसत्ता पडिबुज्झंति, एवमवि सामिणा भणिए लोयलज्जाए तेण भण्णइ-भगवं ! जा सा सा सा ?, तओ भगवया जंपियं-एवमेयंति, अह पायपीढपासट्ठिएण गोयमसामिणा सुयनाणमुणियपरमत्थेणवि भवजणपडिबोहणत्थं पुच्छियं-भयवं ! किं

श्रीगुणचंद्र
महावीरच०
८ प्रस्तावः
॥ २७२ ॥

एषण जा सा सा सत्ति संलत्तं?, भगवया कहियं—महती कहा एसा, एगग्गचित्ता निसामेह—

अत्थि इहेव जंबुदीवे दीवे चंपानाम नयरी, तत्थेवेगो सुवण्णगारो इत्थीलोलो जं जं पवररूववइं कन्नगं पेच्छइ तं
तं पंच सुवण्णसयाणि दाऊण परिणेइ, एवं च तेण परिणयंतेण कालकमेण पंच सयाणि महिलियाणं पिंडियाणि,
एकेकाए य तिलगहारद्वहारनेउरपयुहाइं आभरणाइं दिन्नाइं, जद्विसं च जाए समं भोगे भुंजइ तद्विसं सा सच्चालं-
कारपरिग्गहं ण्हाणविलेवणाइ सिंगारं च करेइ, सेसकालं पुण उवसंतवेसेण अच्छइ, अण्णहा सुवण्णगारो निम्भ-
च्छइ, न य ईसालुगत्तणेण सो निमेसमेत्तं पि गेहदुवारं मुंचइ, सयणाणवि नावगासं देइ, एवं वचंति वासरा, अन्नया
य सो अणिच्छंतो महया किलेसेण नीओ मित्तेण भोयणदाणत्थं नियमंदिरे, चिरलद्धावगासाहि य चित्तिं
तस्स गेहिणीहि—

किं अम्ह जीविणं? किं वा मणिकणगभूसणेहिं पि? । किं विभववित्तरेणवि बहुएण निरत्थएणिमिष्सा? ॥ १ ॥
जं न लभामो निबं पि विलसिउं नणु कयंततुलस्स । एयस्स पावपइणो दढमम्हे गोबरे पडिया ॥ २ ॥
बहुकालाओ गेहं जाव विमोत्तुं गओ स अन्नत्थ । मणवळियसोक्खेणं ताव वसामो खणं एकं ॥ ३ ॥
इय चित्तिऊण ण्हाया सुरहिविलेवणविलित्तसधंगा । परिहियपवरदुगुला आलिद्धासेसआभरणा ॥ ४ ॥
भालत्तलरइयकुरुला [तिलया] सिंदूरारुणियपवरसीमंता । गंधुम्भडमियनाहीपंकलिहियगल्लपच्चलया ॥ ५ ॥

श्रीवीरस-
भवसरणं
या सा सा
सोदाहरणं.

॥ २७२ ॥

तंबोलपाडलुट्टीय जाव चिट्ठंति दप्पणं घेत्तुं । समुहं पलोयमाणा ताव लहुं आगओ भत्ता ॥ ६ ॥

दइण तासि तारिस दुच्चिट्ठं तेण जायकोवेण । एगा महिला पहया तह जह सा पाविया मरणं ॥ ७ ॥

तयणंतरं च भयवसकंपिरदेहाहिं सेसमहिलाहिं । चित्तियमिमं जहेसा तह अम्हेवि हु विवज्जामो ॥ ८ ॥

तम्हा आयंसेहिं पहणामो रक्खिएण किं इमिणा ? । इइ चित्तिऊण समगं खित्ता तदभिमुहमायंसा ॥ ९ ॥

तओ एगूणपंचसयनारीसयपमुक्कदप्पणेहिं पहओ समाणो सो मओ तक्खणेण, पच्छा समुप्पणो तासिं पच्छा-
यावो-अहो का गई एत्तो पहमारियाणं भविस्सइ ?, उद्धलिस्सइ लोओ दंडिस्सइ नराहिवो अवमन्निस्सइ सयण-
वग्गो गंजिस्सइ खलयणो, तम्हा मरणमेव संपयं पत्तकालंति परिभाविऊण पिहियाइं सव्वदाराइं, पक्खित्तं गेहभं-
तरे वहुं तणकट्टपलालं, पज्जालिओ सबओ जलणो, जालाउले य तंमि विमुक्को ताहिं अप्पा, अह पच्छायावेण
साणुक्कोसयाए ताए अकामनिज्जराए सव्वाओ मरिऊण मणस्सेसु उववन्ना, कम्मधम्मसंजोगेण य एगत्थ मिलिया
एगूणपंचवि सया ते चोरा जाया, एगंमि य विसमंमि पव्वए परिवसंति ।

सो य सुवण्णयारो मरिऊण तिरिच्छेसु उववन्नो, तत्थ जा सा अणेण पढमं चिय मारिया सा एगं भवं तिरिप्पसु
उववज्जिऊण पच्छा बंभणकुले पुत्तो जाओ, कमेण य पत्तो पंचवारिसियत्तणं, सो य सुवण्णयारो तिरियभवाओ
उववट्ठिऊण तंमि चेव बंभणकुले तन्मइणित्तेण दारिया जाया, सो य पंचवारिसिओ समाणो तीसे बालग्गाहो

श्रीगुणचंद
महावीरच०
८ प्रस्तावः
॥ २७३ ॥

कओ, सा य अइदुट्टत्तेण निच्चमेव रोयइ, अन्नया य तेण बालग्गाहेण उदरदेसपरिघट्टणं कुणमाणेण तह कहवि
सा जोणिदारे छिका जह तवखणं चेव नियट्टा रोयणाओ. तओ तेण नायं-लट्ठो मए उवाओत्ति, एवं सो नीमे
रोयमाणीए निच्चकालं करेइ, अन्नया य तहा कुणमाणो नाओ सो मायापिऊहिं, ताहे हणिऊण निट्ठाडिओ निय-
गिहाओ, पलायमाणो अ गओ तं चेव चोरपल्लिं जत्थ ताणि एगूणगाणि पंच चोरसयाणि परिवसंति, सा य दारिया
अप्पडुप्पन्नजोवणा विणट्ठसीला जाया, सच्छंदं परियडंती य एगं गामं गया, सो य गामो तेहिं चोरेहिं आगंतूण
लुंठिओ, सा य तेहिं गहिया, तओ तेसिं सबेसिंपि भज्जा जाया । अन्नया य चोराणं चिंता समुप्पन्ना-अहो इमा
वराई एत्तियाणं अम्हाणं पइदिणं सरीरचेट्ठं कुणमाणी खिज्जिस्सइ, ता जइ अन्ना विइज्जिया संपज्जइ तो से
विस्सामो होज्जत्ति परिभाविऊण एगया तीसे विइज्जिया आणिया, जंचेव आणिया तंचेव चिरमहिला ईसासल्लनि-
च्चिज्जमाणमाणसा तीसे मारणत्थं छिदाइं मग्गइ, अन्नया य ते चोरा गामंतरमुसणत्थं पधाविया, तीए नायं-एस
पत्थावो वट्ठइ, ता विणासेमि एयंति परिभाविऊण नीया सा कूवतडे, भणिया य-भदे ! पेच्छ कूवमज्जे किंपि
दीसइ, सावि अविगप्पभावेण दट्ठुमारद्धा, तयणंतरं च ताए पक्खित्ता तत्थेव, चोरा य आगया पुच्छंति तीसे
वुत्तंतं, ताए भण्णइ-अप्पणो महिलं कीस न सारेह ? किमहं जाणामि ?, तेहिं सुणियं-जहा एयाए मारिया,
तओ तस्स बंभणपुत्तस्स हियए ठियं, जहा-अवस्सं एसा सा मम पावकम्मा भगिणी एरिससीलेण संभाविज्जइ,

या सा सा
सोदाहरणं.

॥ २७३ ॥

सुवइ य समीववत्ती भगवं महावीरो सवण्णु सवदरिसी, ता तं गंतूण पुच्छामित्ति, इहागओ लज्जाए मणसा पुच्छि-
उमारद्धो, तओ मए भणियं-देवाणुप्पिया ! वयणेण पुच्छ, तओ अणेण जा सा सा सत्ति कहियं, मएवि सव्वेव
सा तव भगिणीत्ति सिद्धं ।

इय गोयम ! एवंविहविडंबणाजालमूलगिहभूया । विसया विसं व विसमं दित्ति विवागं मणुस्साणं ॥ १ ॥

खणदावियसोक्खाणं भवोहसंवहियासुहनिहीणं । भोगाण कए सुद्धा जुत्ताजुत्तं न पेच्छंति ॥ २ ॥

चोज्जमिणं रागंधा पुरिसा अणवेक्खिऊण परमत्थं । जं अत्थि तं विमोत्तूण नत्थि जं तं विभारित्ति ॥ ३ ॥

तथाहि-मंसलवमेत्तनिवत्तियंपि अहरं पवालखंडं व । जलबुब्बुयसच्छहमवि नयणजुयं नीलनलिणं वा ॥ ४ ॥

चम्मावणद्धअट्ठियमयंपि वयणं मयंकव्विं व । मंसुच्चयमेत्तंपिवि थणजुयलं कणयकलसं व ॥ ५ ॥

वेल्लहलमुणालंपिव बाहुजुयं अट्ठिमंसमेत्तंपि । सोणियमुत्तविलीणं रमणंपिवि अमयकूवं व ॥ ६ ॥

मन्नंति विसयमूढा अवियारियपारमत्थियसरूवा । अचंतनिंदियाणिवि एवं अंगाणि जुवईणं ॥ ७ ॥

इय एवं करुणासायरेण सिरिवद्धमाणनाहेण । कहिए वत्थुसरूवे समग्गभुवणप्पईवेण ॥

सो पुरिसो संवेगमावन्नो पवइओ । सा य ससुरासुरनरतिरियाउलावि परिसा पयणुरागसंजुत्ता जाया । एत्थंतरे
मिगावई देवी हरिसपगरिसवियसियनयणकमला महावीरं वंदित्ता एवं वोत्तुं पवत्ता-भयवं ! जाव चंडपज्जोयराय-

श्रीगुणचंद
महावीरच०
८ प्रस्तावः

॥ २७४ ॥

मापुच्छामि ताव तुम्हं सयासे पवयामिति भणिऊण चंडपज्जोयसुवट्टिया, एवं च कहिउमाढत्ता-महाराय ! जइ तुमं अणुमन्नसि ता अहं पवयामि, रायावि तीसे महतीए परिसाए लज्जाए वारिउमपारयंतो तं विसज्जेइ, तओ मिगावई नियपुत्तं उदयणकुमारं चंडपज्जोयस्त निक्खेवगनिक्खित्तं काऊण पवइया, पज्जोयस्सऽवि अट्ठ अंगारवइप्प-मुहाओ देवीओ पवइयाओ, ताणिवि एगूणपंचचोरसयाणि पुवं पडिवन्नपवज्जेण चोरेण गंतूण पडिवोहियाणि पवज्जं च पडिवन्नाणि, अन्नो य बहुजणो संबुद्धो, पज्जोयनरवईवि जयगुरुप्पभावपडिस्संतवेराणुबंधो उदयणं कुमारं रज्जे सहत्थेण संठाविऊण गओ सनयरिं, मिगावईवि भगवया अणुसासिऊण समप्पिया चंदणवालाए पव-त्तिणीए, तीसे य समीचट्टिया जहट्टियं साहुणीजणसमुच्चियं किरियाकलावमब्भसइ ।

भयवंपि विहरमाणो वाणियगामप्पमोक्खनयरेसुं । आणंदकामदेवाइसावगे दस विबोहेइ ॥ १ ॥
जेसिं धम्ममहाभरधरणुद्धुरकंधराण तियसावि । चालिंसु खोभकरणुज्जुयावि न मणो मणागंपि ॥ २ ॥
जे इस्सरिएण लहुं करिंसु वेसमणजक्खरायमवि । पडिवालिसु य सम्मं निच्चंपि दुवालस वयाइं ॥ ३ ॥
गेहसमीचनिवेसियपोसहसालासु पोसहुज्जुत्ता । अट्ठमिचउहसीसुं समणा इव जे य निवसिंसु ॥ ४ ॥
जेसिं सरीरधाऊ सत्तवि सवन्नवयणरसभिन्ना । कुप्पावयणियवयणाणि गोयरं नेव वच्चिंसु ॥ ५ ॥
इय तेसि गुणलवोविहु नो तीरइ मारिसेहिं परिकट्टिउं । विरइंसु नूण सयमेव गणहरा जेसि चरियाइं ॥ ६ ॥

विषय-
विपाकः
मृगावत्या
चैराग्यं
दीक्षा च.

॥ २७४ ॥

अन्नेऽविहु नरवइदंडनाहसामंतमंतिपमुहजणे । पडिबोहिऊण पुणरवि कोसंबिं आगओ सामी ॥ ७ ॥
 तहियं समोसढस्सा चरिमाए पोरिसीए जयगुरुणो । विम्हइयजीवलोयाइं फालिआइं विमाणाइं ॥ ८ ॥
 साहावियाइं पचक्खदिस्समाणाणि आरुहेऊण । ओयरिया भत्तीए चंदणवडियाए ससिसूरा ॥ ९ ॥
 तेसिं विमाणनिम्मलमऊहनिवहप्पयासिए गयणे । जायं निसिंपि लोगो अवियाणंतो सुणइ धम्मं ॥ १० ॥
 नवरं नाउं समयं चंदणवाला पवत्तिणी नमिउं । सामिं समणीहिं समं निययावासं गया सहसा ॥ ११ ॥
 सा पुण मिगावई जिणकहाए वक्खित्तमाणसा धणियं । एगागिणी चिय ठिया दिणंति काऊण ओसरणे ॥ १२ ॥
 वोलीणे खणमेत्ते साइं विमाणाइं आरुहित्ताणं । ससिसूरेसु गएसु वियंभिए रयणितिमिरभरे ॥ १३ ॥
 समणीओ समीवंमी अपेच्छभाणी य सा महासत्ता । पगया पडिस्सयंमी पवत्तिणीए य तो भणिया ॥ १४ ॥
 तुम्हारिसीण सुकुलुग्गयाण जुज्जइ किमेवमायरिउं ? । एगागिणीवि य तुमं जंसि ठिया एत्तियं रयणिं ॥ १५ ॥
 पडिवज्जिय तवयणं भुज्जो भुज्जो सदुचरीयाइं । निंदंतीए तीए उप्पन्नं केवलं नाणं ॥ १६ ॥
 अह-पयलायंतीए पवत्तिणीए सप्पं पलोइयं इंतं । संथारगंमि हत्थो ठविओ तीए धराहितो ॥ १७ ॥
 निहावगमे पुच्छा अहिकहणं नाणबुज्झणऽणुतावो । निहयवणघाइकम्मा पवत्तिणी केवलं पत्ता ॥ १८ ॥
 इओ य-उप्पन्नसंसओ पढमगणइरो पणमिउं जिणं भणइ । किमवडियावि भावा विवरीयत्तं पवज्जंति ? ॥ १९ ॥

श्रीगुणचंद
महावीरच०
८ प्रस्तावः
॥ २७५ ॥

जं ओइन्नाइं नहाओ नाह ! मायंडससिविमाणाइं । गुरुणा भणियं—गोयम ! दस अच्छरियाइं एयाइं ॥ २० ॥
उवसग्ग गम्भहरणं इत्थीतित्थं अभाविया परिसा । कण्हस्स अवरकंका ससिसूरविमाणओयरणं ॥ २१ ॥
हरिवंसकुलुप्पत्ती चमरुप्पाओ य अट्टसय सिद्धा । अस्संजयाण पूया जायंति अणंतकालाओ ॥ २२ ॥
इय साहियमच्छरियं ससिसूरविमाणसंगयं एत्तो । गोसालयवुत्तंतं साहिज्जंतं निसामेह ॥ २३ ॥
सो पुव्वभणिओ गोसालो तेउलेसामाहप्पपडिहयपडिवक्खो अट्ठंगनिमित्तलवपरिन्नाणमुणियजणमणोगयसंकप्पो
अजिणोऽवि जिणसद्दमत्तणो पगासेमाणो सच्चत्थ अणिवारियप्पसरं परिब्भमंतो सावर्त्थि नयरिमागओ, ठिओ य
बहुधणधन्नपरिपुत्ताए हालाहलाभिहाणाए कुंभकारीए आवणंमि, तस्स य लोगो अमुणियपरमत्थो मणोगयसंकप्प-
परिन्नाणमेत्तसमुप्पन्नकोऊहलो जिणोत्ति पसिद्धिं निसामिऊण अणवरयं पज्जुवासणं कुणइ, भयवंपि महावीरो सम-
णसंघपरिवुडो जहन्नेणऽवि कोडिसंखेहिं देवेहिं अणुगम्ममाणो भुवणच्छेरयभूयं विभूइसमुदयमुव्वहंतो दिसिचक्कवाल-
परिसरिएण पभामंडलेण समुग्गयाणेगमायंडपरंपरं व गयणमुव्वदंसयंतो पयपरिवाडिसुरविरइयकणयंबुरुहनिवहेण
थलकमलसोहं य महियलस्स दावित्तो पइ सन्निवेसमसम्भूयभावणं जणाणं पणासयंतो पयंडपासंडदप्पखंडणं कुणमाणो
निघाणनगरमग्गं पव्वत्तयंतो कोसंबीओ निक्खमित्ता तमेव सावर्त्थि नगरिं संपाविओ, नाणाविहविहगविरायंततरुणत-
रुमणीयंमि य समोसढो कोट्टगचेइयंमि, मुणियजिणागमा य समागया परिसा, पज्जुवासिऊण य गया जहागयं, पत्ते य

मृगावत्याः
केवलं
श्रावस्त्यां
गोशालकः

॥ २७५ ॥

भिक्षाकाले छट्टपारणयं काउकामो भयवओ अणुण्णाए पविट्ठो भिक्षवट्ठं गोयमो पुरीए, तहिं च तियचउक्कचचरेसु गोसालो जिणो सबन्नत्ति परोप्परं जंपंतं जणं निसामिऊण जायसंसओ भिक्षं घेतूण पडिनियत्तो, जहाविहिं मुंजिऊण जायंमि पत्थावे समागए पुरीलोए सामिं पुच्छिउं पवत्तो-भयवं ! एत्थ जणो गोसालं जिणं सबन्नं च परिकित्तेइ तं किं घडइ मिच्छा वा ?, भगवया भणियं-भो देवाणुप्पिया ! गोसालो मंखलिपुत्तो अजिणो जिणप्पलावी मए चेव पच्चाविओ सिक्खं च गाहिओ ममं चेव मिच्छं पडिवन्नो, अओ न सबन्नू न य जिणो हवइत्ति, एवं सोच्चा पुरीजणो मुणियपरमत्थो पडिनियत्तिय नयरीए सिंघाडगतिगचउक्कचचरेसु अन्नमन्नस्स सविम्हयं परुविउमारद्धो-अहो भयवं ! महावीरो समुप्पन्नदिब्वनाणदंसणो एवं भासइ-एसो गोसालो मंखलिपुत्तो अजिणो जिणप्पलावी, अहं जिणोत्ति मिच्छं संलव-इत्ति, इमं च कन्नपरंपराए सोच्चा गोसालगो अच्चंतकोववसफुरंतओट्टुडडो आजीवियसंघपरिवुडो अमरिसमुव्वहतो अच्छइ । इओ य-भगवओ महावीरस्स अंतेवासी आणंदो नाम थेरो अणिकिखत्तछट्टवक्कम्मकरणपरो पारणगंमि पडिग्गहं गहाय निग्गओ गोयरचरियाए, उच्चावएसु य गिहेसु भिक्षं परिब्भमंतो तीसे हालाहलाए कुंभकारीए कुंभकारावणस्स अदूरेण गंतुं पवत्तो, तं च दट्ठूण गोसालो भणइ-भो आणंद ! इओ एहि, निसामेहि दिट्ठंतमेगंति, इमं च एवमायन्निऊण समागओ आणंदसाह, भणिओ य गोसालेण-भो आणंद ! इओ चिरा समइकंताए अद्दाए केइ अत्यत्थिणो वाणियगा नाणाविहमंडविच्छइभरिएणं सगडीसगडेणं सुवहुं भत्तपाणपत्थयणं गहाय एगं महंतं

श्रीगुणचंद
महावीरच०
८ प्रस्तावः

॥ २७६ ॥

जणसंचाररहियं छेत्तभूमिं व करिसयविराइयं भारहकहं व भीमअज्जुणनउलसउणिसंकुलं दीहछिन्नावायं उम्भडवि-
डविसंकडं महाडविमणुपविट्ठा, तीसे य कंचि देसमणुपत्ताणं तेसिं पुव्वग्गहियमुदयमणुदियहं पिज्जमाणं झीणं, तव-
णंतंरं ते वणिया झीणसलिला तण्हाए परम्भाहया समाणा एगत्थ मिलिऊण एवं भणिउमारद्धा—

भोयणविरहेवि जियं कइवि दिणे वसइ देहगेहंमि । सलिलाभावे पुण दीवओव पवणेण विज्झाइ ॥ १ ॥
ता जावज्जवि तण्हा कालरयणिव अवहरइ जीयं । ताव परकज्जजायं मोत्तुं सलिलं पलोएह ॥ २ ॥
एवं च ते पयट्ठा सद्वासु दिसासु पाणियनिमित्तं । कत्थइ अपेच्छमाणा एगं वणसंडमल्लीणा ॥ ३ ॥
विच्छायमुहा दीणा अपत्तकालावि संपइ मरामो । एवं पयंपमाणा तण्हावससुसियसवंगा ॥ ४ ॥
सिसिरतरुच्छायाए निमीलियच्छा य जाव चिट्ठंति । तावेगनरज्जुवाणो समागओ तेसि पासंमि ॥ ५ ॥
भणियं च तेण मुंचइ विसायमहुणा मए जओ दिट्ठो । वणसंडमज्झयारे चउम्मुहो वम्मिओ गरुओ ॥ ६ ॥
ता एह तत्थ जामो पढममुहं भिंदिमो य तस्स लहुं । पच्छा अच्छं पत्थं जलरयणं आपिबामोत्ति ॥ ७ ॥
एयं निसामिऊणं ते वणिया तक्खणेण गंतूण । भिंदंती पढममुहं तस्स तिसाविवससवंगा ॥ ८ ॥
फलहुज्जलं च सलिलं सारयससिणो मऊहजालं व । हेलाए नीहरंतं पेच्छंति तओ पहिट्ठा ते ॥ ९ ॥
तयणंतंरं च करचरणस्खालणं वयणसोहणं पियणं । वीसत्था वाणियगा निवत्तंती जहिच्छाए ॥ १० ॥

गोशालोक्तं
वणिग्ज्ञातं.

॥ २७६ ॥

पच्छा भरेति करवत्तयाइं दिइणो य कलसए चेव । दुलहं लद्धं वत्थुं कह वा नो घेप्पइ जणेण ? ॥ ११ ॥
 जाया पुणोधि चिंता तेसिं जह सलिलमित्थ लद्धमहो । तह वीयमुहे खणिए याविज्जइ नूण तवणिज्जं ॥ १२ ॥
 ता भिंदह पुणरवि वम्मियस्स वीयं मुहं लहुं चेव । इय भणिए पुरिसेहिं तहत्ति सव्वं तओ विहियं ॥ १३ ॥
 ताहे सुजच्चकंचणनिचयं तत्तो विणिग्गयं संतं । हरिसुलसियसरीरा गिण्हंति जहिच्चियं वणिया ॥ १४ ॥
 हिट्ठा भणंति वम्मियनिभेण चिंतामणी पयावइणा । अम्हारिसपहियहियट्ठयाए मन्ने कओ एत्थ ? ॥ १५ ॥
 ता अज्जवि तइयमुहं भेत्तव्वं होइ संपयमिमस्स । संभाविज्जंति इमंमि जेण रयणाणि मणिणो य ॥ १६ ॥
 एत्थंतरंमि पुरिसेहिं भिंदियं तंपि लोभनडिएहिं । अह नीहरियाइं तओ रयणाइं अणेगभेयाइं ॥ १७ ॥
 कणगं परिहरिऊणं महग्घरयणेहिं तेहिं सगडाइं । भरियाइं गाढपहरिससंभारं उव्वहंतेहिं ॥ १८ ॥
 नवरं चउत्थयंमि य मुहंमि भेत्तुं पयट्ठिया वंछा । तेसिं तु उत्तरोत्तरविसिद्धवत्थूण लाभेण ॥ १९ ॥
 अह जाय तं विहाडिंति नेव तावेगथेरपुरिसेण । तेसिं हियत्थिणा सुद्धबुद्धिणा जंपियं एयं ॥ २० ॥
 भो भो देवाणुपिया ! जलं च कणगं च रयणनिवहं च । लद्धूण सुयह वम्मियमहुणा वच्चह सगेहेसुं ॥ २१ ॥
 मा पविहाडह एयं कज्जाण गईओ हुंति कुडिलाओ । सिट्ठो सिद्धंतेविडु लोभो मूलं विणासस्स ॥ २२ ॥
 लोगेऽवि पसिद्धमिमं जं किर निवसंति गाढदाढिला । अच्चंततिवदप्पा सप्पा वम्मियनिवासेसु ॥ २३ ॥

श्रीगुणचंद
महावीरच०
८ प्रस्तावः
॥ २७७ ॥

जइ कहवि मणोवंचियजलाइलाभो इमंमि भे जाओ । तहवि न खणिउं जुज्झइ विले विले होइ किं गोहा ? ॥ २४ ॥
जओ-अनओ जणियगुणोऽविहु पयावविहवं न देइ गरुयाणं । विहिवसविमंघडंतोऽवि गुणकरो नवसयारंभो ॥ २५ ॥
अह तव्वयणं अवगण्णिऊण ते लोभतरलिया वणिया । वम्मियचउत्थमुहमवि जवेण खणिउं समाढत्ता ॥ २६ ॥
खणमाणेहिं तेहिं पयंडजमवाहुदंडसारित्थो । तस्संतो निवसंतो मुहेण परिघट्ठिओ नागो ॥ २७ ॥
ताहे सो रोसारुणनयणपहापाडलीकयदियंतो । विरइयअकालसंझोव निग्गओ वम्मियाहिंतो ॥ २८ ॥
तहवि य फारफणफलगफुरियरयणुच्छलंतरुइपडलो । पुच्छच्छडताडियभूमिवट्ट गुंजंतवणसंडो ॥ २९ ॥
सिग्घं नीहरिऊणं वम्मियसिहरग्गभागमारुहइ । पेच्छइ य भाणुमंडलमह सवियासाहिं अच्छीहिं ॥ ३० ॥
अह खणमेकं सूरं पलोइउं अणिमिसाए दिट्ठीए । ते वणिया आलोयइ सो उग्गविसो महासप्पो ॥ ३१ ॥
तयणंतरं च ते तस्स चक्खुणा तिच्चजलणजडिलेण । निह्हा समगं चिय समग्गभंडोवगरणेहिं ॥ ३२ ॥
नवरं सो एगो चिय थेरो नियभंडसगडियासहिओ । अणुकंपिगाए देवीए पाविओ वंचियं ठाणं ॥ ३३ ॥
तो भो आणंदमुणिंद ! ते जहा वाणिया अइविमूढा । अइलोभेणभिभूया सप्पाओ विणासमावज्जा ॥ ३४ ॥
तह तुज्झ धम्मसूरी समणो वरनायकुलसमुच्चओ । लद्धपसिद्धी भुवणत्तएऽवि समणो महावीरो ॥ ३५ ॥
असुरसुरनागकिन्नरनरनरवइपूयणिज्जपयकमलो । एत्तियमेत्ताएविहु सिरीए संतोसमलहंतो ॥ ३६ ॥

गोशालीत्त
वल्मीकभे-
दकवणिग्ग-
ष्टान्तः.

॥ २७७ ॥

जइ एत्तो मह संमुहमभत्तिपर वयणलेसमवि बइही । तमहं तवतेएणं भासरासिं करिस्सामि ॥ ३७ ॥
 जह पुण सो थेरनरो ते वणिए सब्बहा निवारितो । न विणट्ठो तह आणंद! तंपि नाहं विणासिस्सं ॥ ३८ ॥
 ता गच्छ तुमं नियधम्मसूरिणो कहसु सब्बमवि एयं । बलिणा समं विरोहो न कयाइ सुहावहो होइ ॥ ३९ ॥
 एवं निसामिऊण आणंदमहरिती सच्छहिययत्तणेण समुप्पन्नभयसंकप्पो अपरिसमत्तभिकखाकज्जोऽवि तओ
 ठाणाओ सिग्घाए गईए समागओ जिणंतियं, तिक्खुत्तो आयाहिणपयाहिणपुव्वगं वंदिऊण गोसालगोवइट्ठं वणि-
 यदिट्ठंतं दिट्ठीविसभुयगदहणपज्जवसाणं सब्बं परिकहेइ, पुच्छइ य-भयवं! किं गोसालो एवंविहस्सऽत्थस्स करणंमि
 समत्थो न वा?, भगवया भणियं-आणंद! समत्थो चेव, केवलं अरहंताणं भगवंताणं असमत्थो, परितावमेत्तं पुण
 करेज्जा, ता गच्छ तुमं गोयमाईणं समणाणं एयमट्ठं कहेहि, जहा-मा तुब्भं कोइ गोसालं मंखलिपुत्तं ममंतियं
 पाउब्भूयं समाणं धम्मियाएवि पडिचोयणाए पडिचोएज्जा, जओ एस ममं मिच्छं पडिवन्नोत्ति, एवं च विणएण
 पडिसुणेत्ता गओ आणंदो गोयमाईण समीवं कहिउमारद्धो य तं बइयरं, एत्थंतरे गोसालो अत्तणो पराभवमस-
 हंतो संपत्तो जिणसमीवं, अदूरे य ठाऊण भगवओ अभिमुहं एवं भणितं पवत्तो-भो कासव! तुमं मम हुत्तं एवं
 वयसि-एस गोसालो मंखलिपुत्तो मम धम्मंतेवासी इच्चाइ, तन्नं मिच्छा, जो हि गोसालो तुमंतेवासी सो सुक्काभि-
 जाइओ भवित्ता कालमासे कालं काऊण अन्नयरेसु देवलोएसु देवत्ताए उववन्नो, अहं पुण उदाई नाम महामुणी

श्रीगुणचंद
महावीरच०
८ प्रस्तावः
॥ २७८ ॥

विचित्तवचरणासमत्थं नियदेहमुज्झिऊणं तस्स गोसालगस्स सरीरगं धिरं धुवं धारणिज्जं सीयसहं उण्हसहं खुहा-
पिवासासहं विविहदंसमसगाइपरीसहोवसग्गसहं धिरसंघयणंतिकाऊण तमणुपविट्ठो, ता भो कासवा ! साहु तुमं
अपरियाणिऊण मं गोसालं मंखलिपुत्तं वाहरसि, एवं च तेण भणिए भगवया महावीरेण जंपियं-भो गोसालग !
जहा कोइ चोरपुरिसो विविहपहरणहत्थेहिं खंडरक्खपामोक्खनरनियरेहिं पारब्भमाणो णो कत्थइ गड्डं वा दरिं वा
दुग्गं वा वणगहणं वा अत्तणो गोवणत्थं अपावमाणो एगेण उन्नालोमेण वा सणलोमेण वा कप्पासपुंभेण वा तण-
सूएण वा तदंतरे दिन्नेण व अत्ताणमणावरियंपि आवरियंपिव मण्णेमाणो निब्भओ निरुच्चिग्गो अच्छइ, एवमेव
तुमंपि गोसाला ! अणण्णो संतो अण्णमप्पाणं वागरेसु, ता मा एवमलीयं वाहरसु, सुच्चेव तुह सरीरच्छाया, नो
अन्नत्ति, एवं च भगवया वुत्तो समाणो पज्जलियपयंडकोवानलो उच्चावएहिं वयणेहिं जयगुरू अक्कोसिऊण भणइ-भो
कासव ! नट्ठोसि अज्ज, भट्ठोसि अज्ज, अज्जेव न भवसि तुमंति, जो गिरिकंदरसुत्तं सीहं बोहेसि कीलाए, एत्थंतरे
भयवओ महावीरस्स अंतेवासीसच्चाणुभूर्इनामो अणगारो धम्मयारियाणुरागेणं एयमट्ठं सोदुमपारयंतो समागंतूण एवं
भणिउमारट्ठो-भो गोसालग ! तहारूवस्स समणस्स वा माहणस्स वा अंतिए जे एगमच्चि धम्मियं वयणं निसामिंति
तेऽवि तं वंदंति नमंसंति गुरुवुद्धीए पज्जुवासंति, किं पुण तुमं जो मूलाओ च्चिय भयवया चेव पच्चाविओ सिक्खाविओ
वहुस्सुत्तीकओ भगवओ चेव मिच्छं पडिवज्जंतो न लज्जसि ?, ता मा एवं कुणसु, अज्जावि सो चेव तुमं, सा चेव

गोशालक-
स्यागमनं
सत्यस्वरूप
कथा.

॥ २७८ ॥

तुह देहच्छाया, कीस अप्पाणं अवलवेसित्ति वुत्ते सत्ताणुभूईं सुणिं गोसालो समुच्छलियकोवानलो तं दिवं पयडं
 अणहियासणिजं तेउलेसं पक्खिखविऊण निदहइ तकखणेण, सो य तेयनिदहो सुहज्जवसायाणुगओ मरिऊण सह-
 स्सारे कप्पे अट्टारससागराऊ देवो जाओत्ति, गोसालगोऽवि पुणो भयवंतं अणेगप्पयारेहिं दुव्वयणेहिं पहणिउं
 पवत्तो, इओ य सुनकखत्तनामो साहू तहा अवकोसिज्जमाणं भगवंतं निसामिऊण तणं व नियजीवियमवि गणंतो
 सिग्घमागंतूण गोसालं जहा सत्ताणुभूईं तहेव अणुसासइ, नवरं गोसालगपक्खित्ततेउलेसापलीविओ समाणो भय-
 वंतं तिकखुत्तो वंदिऊण सयमेव पंच महवयाइं उच्चारैइ, समणा य समणीओ खामेइ, आलोइयपडिक्कंतो य कालं
 काऊण अब्बुए कप्पे बावीससागरोवमाउयदेवेसु देवत्तेणं उव्वज्जइ, एवं च तम्मि पंचत्तं गए संते गोसालो दुन्निग-
 हिओ वेयालोव लद्धावयासो विसेसओ परुसक्खराहिं गिराहिं तज्जणं कुणंतो वागरिओ सकारणं जयगुरुणा-भो
 महाणुभाव ! गोसालग सिट्ठपहसमइकंतं तुह चरियं, जं मए पच्चाविओ मए सिकखाविओ मए बहुस्सुईकओ
 ममावि अवण्णवाई जाओ सि, एवं च जयगुरुणा सयमेव संलत्ते तेण अणाकलियकोवावेगेण सत्तट्ठ पयाइं पच्चोस-
 क्किऊण पमुक्का महया संरंभेण भगवओ अभिमुहा तेउलेसा ।

अह मंदरगिरिरायं व निट्ठुरं जिणसरीरमक्कमिउं । असमत्था मारुयमंडलिच्च सा निहयमाहप्पा ॥ १ ॥
 सयलदिसामुहपसरियपयंडतरतेयरइयपरिवेसा । आरत्तिथदीवयमालियच्च सकखा विरायंती ॥ २ ॥

श्रीगुणचंद
महावीरच०
८ प्रस्तावः
॥ २७९ ॥

जच्चतवणिज्जपुंजुज्जलंगपहपडलविजियसोहस्स । भीयव तक्खणं चिय सामिस्स पयाहिणं कुणइ ॥ ३ ॥
तप्परिसवसेण य भुवणबंधुणो अमयसीयतणुणोऽवि । जाओ मणागमेत्तं परितावो सबगत्तंमि ॥ ४ ॥
सा य तेउलेसा अहो अहं इमिणा महापावेण एरिसमकज्जं कारावियत्ति जायतिवकोवव उहं उप्पइत्ता गोसा-
लगस्स सरीरं डहमाणी अंतो लहुमणुपविट्ठा, तओ गोसालो काउरिसोव समत्थेण नियतेण्ण विणिहओऽवि
धिट्ठिममवलंबिऊण एवं पयंपेइ-अहो कासवा ! तुमं मम इमिणा तेण्ण अभिहओ संतो अंतो छण्हं मासाणं पित्त-
जरपरिगयसरीरो दाहवेयणोवक्कमियाउओ छउमत्थो चेव कालं करिस्ससि, भगवया भणियं-भो मंखलिपुत्त ! नो
खलु अहं तुह तेण्ण अहिहओ छण्हं मासाणं अंतो कालं करिस्सामि, किं तु अन्नाइं सोलस वासाइं पडिपुन्ननाण-
दंसणधरो विहरिस्सामि, पच्छा खवियसयलकम्मंसो सिवपयं गमिस्सामि, तुमं पुण अप्पणो तेण्ण निदहसरीरो
अंतो सत्तरत्तस्स पित्तमहाजरजलणपलित्तगत्तो छउमत्थो चेव कालं करिस्ससित्ति ।

अह सच्चत्यवि नयरे सुद्धजणो जंपिउं समाढत्तो । दोण्हं एत्थ जिणाणं परोप्परं वट्ठइ विवाओ ॥ १ ॥
तत्थेगो भणइ इमं पुंविं कालं करिस्ससि तुमंति । इयरोविहु तदभिमुहं इममेव पयंपए वयणं ॥ २ ॥
न मुणिज्जइ परमत्थो को मिच्छा वयइ को य सच्चंति ? । कुसला भणंति वीरो सच्चं वागरइ नो इयरो ॥ ३ ॥
इओ य जयगुरू नियसमणगणमामंतिऊण भणइ-भो समणा ! जह तणरासी तुसरासी पत्तरासी बुसरासी

सर्वानुभूति
सुनक्षत्रदा-
हः मोशाले
तेजोदाहः.

॥ २७९ ॥

वा जलणजालापलीविया समाणी पणट्टतेया जायइ, एवं गोसालो मम वहाय तेयं निसिरित्ता विणट्टतेउलेसमा-
हप्पो जाओ, तम्हा छंदेण निब्भया तुब्भे एयं धम्मियाए चोयणाए पडिचोएह, हेऊदाहरणकारणेहिं निष्पिट्ट-
पसिणवागरणं करेहत्ति बुत्ते तहत्ति पडिसुणित्ता जयनाहं च सविणयं वंदिऊण समणा तं भणिउं पवत्ता ।

किं च-भो गोसालग ! किं तुज्झ दंसणे एस सत्थपरमत्थो । जं लोगमग्गचुक्कं तमेरिसं कम्ममायरसि ? ॥ १ ॥
तहाहि-धम्मगुरुं अवमन्नसि नियमाहप्पं पवित्थरसि बहुसो । जुत्तीहिवि जं न घडइ तं भाससि मुक्कमजाय ॥ २ ॥
वायाए जीवरक्खं पयडसि तं लोयमज्झयारंमि । सद्धम्मगुणपहाणे सयं तु निदहसि साहूवि ॥ ३ ॥

एवंविहं अकज्जं कुणंति न कयाइ किर चिलायावि । तुमए पुण अलिधवियद्दमेव सव्वं समायरियं ॥ ४ ॥
न सरसि उवयारं एत्तियंपि जं रक्खिओ सि जयगुरुणा । तह वेसियायणुम्ममुक्कतेयनिड्ज्झमाणंगो ॥ ५ ॥

इइ भगवओ समणेहिं धम्मियाए चोयणाए चोइज्जमाणो गोसालो आसुरुत्तो कोवेण मिसिमिसेमाणो समाणो
जाव साहूणं सरीरस्स रोममेत्तंपि निड्ढहिउं न तरइ ताव पडिहयसामत्थं तं नाऊण केऽवि आजीवियथेरा जयगुरुं
गुरुत्तणेण पडिवत्ता, अन्ने पुण विवेगविरहिया तहेव ठिया, गोसालगोऽवि खणमेत्तं विगमिऊण रोसेण व माणेण य
दीडुण्हं नीससंतो दाढियलोमाइं लुंचमाणो हत्थे पकंपयंतो चलणेहिं भूमिं कुट्टमाणो अंतो विसप्पंतदुस्सहतेउले-
सादाहवसेण य हा हओऽहमस्सीति पुणरुत्तं वाहरंतो अकयकज्जो चेव भगवओ समीवाओ नीहरिऊण गओ सट्ठाणं,

श्रीगुणचंद
महावीरच०
८ प्रस्तावः

॥ २८० ॥

जयगुरुणाऽपि जंपियं-भो समणा ! जं इमं गोसालेण मम वहट्ठा तेयं निसिट्ठं तं खलु अंगदंगमगहमलयमालवअ-
च्छवच्छकोच्छपाढलाढवज्जिमासिकासिकोसलअवाहसुभुत्तराभिहाणाणं सोलसण्हं जणवयाणं उच्छायणाए भासरा-
सीकरणयाए समत्थंति वुत्ते विम्बिहयहियया मुणिणो जायत्ति ।

सो य गोसालो कोडरनिहित्तदुयवहो तरुव निड्डज्झमाणो कहिंपि रइं अलहंतो तस्स दाहस्स पसमणत्थं कर-
कलिएणं भायणेणं मज्जपाणगं पियमाणो तवससंभूयमएण य अभिक्खणं गायमाणो अभिक्खणं नच्चमाणो अभि-
क्खणं हालाहलाए कुंभकारीए अंजलिपग्गहपुव्वयं पणामं कुणमाणो अभिक्खणं भंडगनिमित्तकुट्टियमट्टियंतो-
निहित्तसिसिरकलिलसलिलेण सरीरं उवसिंचमाणो अड्वियड्डाई पइक्खणं जंपमाणो परमसोगमुव्वहंतेण सिस्सग-
णेण सिसिरोवयारकारिणा परिवुडो दिणे गमेइ ।

तत्थ य सावत्थीए नयरीए अयंपुलो नाम आजीविओवासओ परिवसइ, सो य पुव्वरत्तावरत्तसमयंमि धम्मजाग-
रियं जागरमाणो जायसंसओ विचित्तेइ-अहमेयं सम्मं न सुणामि-तणगोवालिया किं संठाणा हवइ ? ता गच्छामि
धम्मयारियं धम्मोवएसगं समुप्पन्नदिवनाणदंसणं सबब्बुं गोसालं हालाहलाए कुंभकारीए आवणंमि वट्टमाणमापु-
च्छामित्ति संपेहित्ता समुग्गयंमि दिणयरे अप्पमहग्घाभरणालंकियसरीरो साओ गिहाओ पड्डिनिक्खमित्ता पायवि-
हारचारेणं कइवयपुरिसपरियरिओ गोसालयाभिमुहं गंतुं पयट्ठो, कमेण य कुंभारावणसमीवमणुपत्तो समाणो तं

साधुकृता
नोदनाते-
जोमहस्वं
गोशालक
वेष्टा.

॥ २८० ॥

गोसालं करकलियभायणमभिवक्त्रणं मइरापाणं कुणमाणं नच्चमाणं गायमाणं हालाहलाए कुंभकारीए अंजलिं
 विरयंतं मट्टियासलिलेणं सरीरं परिसिंचमाणं असंबद्धाई वयणाई पयंपमाणं पेच्छिऊण लज्जावसविमिलायंतलोयणो
 सहसच्चिय सणियं सणियं पच्चोसकंतो झडत्ति समीवट्टिएहिं दिट्ठो गोसालयसिस्सेहिं, तओ वाहरिऊण भणिओ-
 तेहिं—भो अयंपुल! तुमं पच्छिमरयणीए तणगोवालियासंठाणविसयं संसयं पकओसि, अयंपुलेण भणियं—भयवं!
 एवमेयं, पुणोऽवि गोसालगदुविलसियगोवणद्वया भणियं तेहिं—भो अयंपुल! जं च तुह गुरु हत्थगयभायणे जाव
 अंजलिं विरयंतो विहरइ तत्थवि एस भगवं इमाई निव्वाणगमणसूयगाई पज्जंतलिंगाई वागरेइ, तंजहा—

चरिमं गेयं चरिमं नट्टं चरिमं अंजलिकम्मं चरिमं पाणं अन्नं च मट्टियासीयलसलिलसरीराणुलिंपणपमुहं
 वावारं, ता अयंपुल! भगवओ चउवीसमत्तिथगरस्स गोसालगस्स पुवभणियलिंगेहिं सूइओ संपइ निव्वाणगमण-
 पत्थाओ वट्ठइ, तम्हा गच्छ तुमं स एव तुह धम्मायरिओ इमं वागरणं वागरिही, एवं च सोच्चा सो दढहरिसुच्छ-
 लंतपुलयजालो तदभिमुहं गंतुं पयट्ठो, ते आजीविथेरा सिग्घयरं गंतूण गोसालगस्स अयंपुलागमणं निवेएंति,
 तं च मज्झभायणाइ एगंते परिचयावेंति, आसणंमि य निवज्जावेंति, एत्थंतरे पत्तो अयंपुलो तिकखुत्तो य पया-
 हिणीकाऊण परेणं विणएणं वंदित्ता गोसालयं निसण्णो समुच्चियासणे, तओ गोसालएण भणियं—भो अयंपुल!
 तुमं पच्छिमरयणीसमयंमि इमं संसयमुव्वहसि जहा तणगोवालिया किंसंठाणसंठियत्ति, नणु वंसीमूलसंठिया सा

श्रीगुणचंद
महावीरच०
८ प्रस्तावः
॥ २८१ ॥

पन्नत्तत्ति, इमं च निसामिऊण पहिद्वहियओ पुणो तं वंदिऊण गओ सो सट्ठाणं । अन्नम्मि य वासरे ईसि समुवलद्ध-
चेयणो गोसालो नियमरणसमयमाभोइऊण अप्पणो सिस्से सहावेइ, तेसिं पुरओ य इमं वागरेइ-भो देवानुप्पिया !
मं कालगयं जाणिऊण मम सरीरं सुरहिगंधोदएण पक्खालिऊण सरसेण चंदणेण चच्चिऊण य महरिहं हंसल-
क्खणं पडयं नियंसावेज्जह, तयणंतरं सव्वालंकारविभूसियं सहस्सवाहिणीसिबिगासमारोवियं काऊण नीहरावेज्जह,
सावत्थीए पुरीए सिंघाडगतियचउक्कचच्चेसु इमं उग्घोसिज्जह, जहा-इमीए ओसप्पिणीए चउवीसाए तित्थयराणं
चरिमो एस गोसालगजिणो तित्थयरत्तं पालिऊण समुप्पन्नकेवलो संपयं सिद्धिं गओत्ति, इमं निसामिऊण ते सिस्सा
विणएणं सव्वं पडिसुणंति, अह सत्तमदिणंमि परिणममाणंमि समुवलद्धसुद्धबुद्धिणा पुब्बदुच्चरियनिवहसुमरणुप्पन्ना-
तुच्छपच्छायावेण चित्तियं गोसालेण—

अहह महापावोऽहं अजिणंपि जिणं भणामि अप्पाणं । सच्चं च मुसावयणंपि मुद्धलोयस्स साहेमि ॥ १ ॥

सिरिवद्धमाण तित्थंकरो गुरु धम्मदेसगो परमो । आसाइओ मए तह तेयनिसग्गेण दुग्गेण ॥ २ ॥

दुद्धरसंजमभरधरणपच्चले मुणिवरे दहंतेण । निद्वह चिय बोही मए हयासेण एमेव ॥ ३ ॥

सच्छंदं उम्मगं पयट्टमाणेण तह महीवट्ठे । अप्पा न केवलो चिय लोगोऽवि भवन्नवे खित्तो ॥ ४ ॥

अहवा समग्गभुवणत्तएऽवि तं नत्थि पावठाणमहो । जं कइवयदिणकज्जे मए अणज्जेण नो विहियं ॥ ५ ॥

चरमगेया-
दीनि गो-
शालकस्स
पश्चात्तापः

॥ २८१ ॥

तं चोज्जं जं इमिणावि दुट्टदेहेण पावभरगुरुणा । जमवयणंपिव भीमं अज्जवि नासं न वच्चामि ॥ ६ ॥
 मुट्ठेण मए चिरजीवियत्थिणा कवलियं हि तालउडं । आगामियमसुहमतक्किऊण जं एवमायरियं ॥ ७ ॥
 इय वेरग्गमुवगओ गोसालो तह न तेउलेसाए । संतप्पइ जह तेणं सपुव्वदुच्चरियवग्गेण ॥ ८ ॥

एवं च सुचिरं परिष्ठुरिऊण सो नियसिस्सगणं उच्चावयसवहसावियं काऊणं एवं भणिउं पवत्तो—भो महाणु-
 भावा! नो खलु अहं जिणो सच्चन्नू सच्चदरिसीवि, किंतु गोसालो मंखलिपुत्तो भगवओ वद्धमाणतित्थंकरस्स
 सिस्सोऽवि होऊण पच्चणीओ समणघायगो नियतेण चवाभिहओ छउमत्थो विणस्सिउकामो डंभमेत्तपयट्ठिय-
 पउट्टपरिहाराइदुन्नओ एत्तियकालमप्पाणं परं च वुग्गाहंतो विहरिओ, अओ एवंविहमहापावकारिणं कालगयं
 जाणित्ता तुग्गे वामचलणंमि रज्जूए बंधित्ता इमाए सावत्थीए पुरीए सवत्थ सिंघाडगाइसु आकट्ठिविकट्ठिं कुणमाणा
 तिक्खुत्तो वयणंमि निट्ठीवणं पक्खिवंता एसो सो गोसालो मंखलिपुत्तो अजिणो गुरुपडिणीओ समणघायगो
 असेसदोसकारी, भयवं पुण महावीरो जिणो तित्थयरो उप्पन्नदिवनाणदंसणो सच्चवाई कारुणिओ धम्मदेसगोत्ति
 महया सहेण उग्घोसमाणा य मम सरीरस्स नीहरणं करेज्जहत्ति भणिऊण दारुणवेयणाभिहयसरीरो मओ गोसा-
 लोत्ति । तं च कालगयं जाणित्ता ते आजीवियेरा नियगुरुपक्खवायमुव्वहंता कुंभकारावणस्स दुवारं पिडिऊण तस्स
 मज्झयारे सावत्थिं नयरिमालिहंति, तओ गोसालगस्स वामपायरज्जुबंधणपमुहं आघोसणापज्जवसाणं सवहपरिमो-

श्रीगुणचंद
महावीरच०
८ प्रस्तावः

॥ २८२ ॥

क्वणं करेति, तयणंतरं च तं सरीरगं सुरहिसलिलेहिं ण्हाविऊण तप्पक्खवायपडिवन्नजणधिरिकरणद्वया महया
पूयासक्कारसमुदणं सिबियाए समारोविऊण नीहराविति, मयकिच्चाणि य कुणंति ।

इओ य भगवं महावीरो सावत्थीओ नयरीओ निक्खमिऊण विहारकमेण गओ मिंढियगामनयरे, समोसदो य
मणिकोद्वयाभिहाणचेइयंमि, धम्मनिसामणत्थं च परिसा समागया, खणमेगं च पज्जुवासिऊण जहागयं पडि-
गया, अह भगवओ महावीरस्स तेण तेउलेसापरितावयसेण समुप्पन्नो पित्तजरो, तवसेण य पाउब्भूओ रुहिराइ-
सारो, रविकरपडिबोहियकणयकमलसच्छदंमि मिलायलायन्नं जायं वयणकमलं सरयदिणयरसमुज्जलावि विच्छाई-
भूया देहच्छवी वियसियकुवलयदलदीहरंमि मउलावियं लोयणजुयलं महानगरगोउरपरिहाणुरूवंमि कियत्तणमुव-
गयं बाहुवंडजुयलंति, एवंविहं च भगवओ सरीरलच्छिं पिच्छमाणो मुद्धजणो वाहरिउमारदो—अहो भगवं महा-
वीरो गोसालगतवतेयजणियपित्तज्वरविदुरियसरीरो छण्हं मासाणमभंतरे परलोयं वच्चिस्सइत्ति, इमं च पवायं
जणपरंपराओ निसामिऊण सीहो नाम भगवओ सिस्सो गुरुपेम्माणुरागेण एगंते गंतूण अहिययरमन्नभर-
रुद्धकंठविवरो कहकहविगन्धिणं रोविउं पयत्तो, इओ य केवलावलोएण अवलोइऊण भगवया वाहराविओ
एसो, भणिओ य—

किं तं जणप्पवायं निसामिउं कुणसि चित्तसंतावं ? । नेवावयाए कइयवि विउक्कमंतीह तिथयरा ॥ १ ॥

गोशालक-
स्य मृत्युः
सिंहसाधो
रोदनं च.

॥ २८२ ॥

अन्नह संगमयविमुक्कचक्कडपूयणाइजणिएहिं । मरणं हविज्ज तइयावि मज्झं तिकखेहि दुक्खेहिं ॥ २ ॥
 जो पुण तणुतणुयत्तणरुहिरइसाराइओ विगारो मे । सो(निरु)वक्कमत्तणेणं सोऽवि न दोसं यमावहइ ॥ ३ ॥
 सीहेण तओ भणियं जइवि दु एवं तहावि जयनाह ! । तुम्हावयाए तप्पइ सयलं ससुगसुरं भुवणं ॥ ४ ॥
 सिढिलियसज्झायज्झाणदाणपामोक्खधम्मवावारो । चाउच्चन्नो संघोऽवि लहई नो निव्वुइं कहवि ॥ ५ ॥
 ता पसियसु जयबंधव ! अम्हारिसहिययदाहसमणत्थं । उवइससु भेसहं जेण होइ देहं निरोगं मे ॥ ६ ॥
 एवं कहिए तयणुकंपाए भगवया भणियं—जइ एवं ता इहेव मिंढयग्गामे नयरे रेवइए गाहावइणीए समीवं
 वच्चाहि, ताए य ममनिमित्तं जं पुवं ओसहं उवक्खडियं तं परिहरिऊण इयरं अप्पणो निमित्तं निष्काइयं आणेहित्ति,
 इमं निसामिऊण हरिसवसपयट्ठपुलयपडलाउरसरीरो सीहो अणगारो समुट्ठिऊण भयवंतं वंदइ नमंसइ, तयणंतरं
 पडिग्गहं गहाय रेवइए गाहावइणीए गिहमुवागळइ, साऽवि रेवई तं अणगारं ईरियांसमिइप्पमुहचरणगुणसंपन्नं
 समणधम्मं व पच्चक्खं गिहंमि पविसमाणमवलोइऊण खिप्पामेव आसणाओ अब्भुट्ठेइ, सत्तट्ठ पयाइं सम्मुहमवसप्पइ,
 सविणयं वंदिऊण य एवं जंपइ—संदिसह भंते ! किमागमणकारणं?, सीहेण भणियं—जं तुमए वद्धमाणसामीं पडुच
 कयं तं मोत्तूण जं अत्तट्ठा निष्काइयं ओसहं तं पणामेहित्ति, तीए भणियं—भयवं ! को एवंविहदिबनाणी जो रहसि-
 कयंपि एवंविहं वइयरं परिजाणइ, सुणिणा कहियं—सयलभावाभावनिब्भासणसमत्थकेवलावलोयनिलयं भयवंतं वी-

श्रीगुणचंद
महावीरच०
८ प्रस्तावः

॥ २८३ ॥

रजिणं मोत्तूणं को अन्नो एवंविहं साहिउं पारइ?, एवं सोचा सा पहिठ्ठहियया सायरं तमोसहं मुणिणो पडिग्गहंमि पक्खिबइ, तओ सा तेण भावविसुद्धभेसहप्पयाणेण देवाउयं कम्मं निवंधइ. देवा य तीसे गिहंमि कणगरामिं नि-
सिरंति, महादाणं महादाणंति घोसंति, सीहोवि साहू तं गहाय भयवओ सम्पेइ, तं च भयवं आहारेइ, आहा-
रिए य तहिं ववगयपित्तज्जरसमुत्थविगारो अमयपुन्नसरीरोव समहिगसमुम्मिलियजच्चकंचणसच्छहच्छवी वीरो वि-
राइउं पवत्तो । अह पडिहयरोगे वद्धमाणे जिणिंदे हरिसवियसियच्छो सवसंघोऽवि जाओ । असुरसुरसमूहा वद्धि-
याणंदभरा सह नियरमणीहिं नच्चिउं संपयत्ता ।

गोयमसामीवि गणहरो महावीरं वंदिऊण पुच्छइ-भयवं! तुब्भं कुसिस्सो गोसालो कालं काऊण कहिं उववन्नो?,
भयवया भणियं-अब्भुयंमि देवलोगे बावीससागरोवमाऊ देवो जाओत्ति, गोयमेण भणियं-भयवं! कहं तहाविहमहा-
पावकरणेऽवि एवंविहदिच्चदेविट्ठिलाभो समुप्पण्णोत्ति?, तओ सिट्ठो सामिणा से सब्बोऽवि मरणसमयसमुप्पन्नातुच्छ-
पच्छायावाइ उत्तंतो, पुणोऽवि गोयमेण भणियं-भयवं! तओ ठाणाओ सो आउक्खएण कहिं उववज्जिही?, कइया
वा सिद्धिं पाविहिति?, भगवया जंपियं-गोयम! निसामेहि-इहेव जंबुदीवे दीवे भारहे वासे विंझगिरिपायमूले
पुंडाभिहाणंमि जणवए सुमइस्स रन्नो भद्दाभिहाणाए देवीए गब्भे सो गोसालो तत्तो चवित्ता पुत्तत्ताए पाउब्भवि-
स्सइ, तओ नवण्हं मासाणं समहिगाणं समइकंतानं पजाइही, तस्स य जम्मसमए तत्थ नयरे सच्चंतरेवाहिरे

श्रीवीरस्य
रोगशान्तिः
गोशालक-
वृत्तं.

॥ २८३ ॥

भारगसो य कुंभगसो य परिमलायद्वियकुलं धुयधूसरा पउमवुट्टी रयणवुट्टी य भविस्सइ, चंदसूरदंसणप्पमुहजम्म-
णमहूसवं काऊण य अम्मापियरो दुवालसमे दिवसे संपत्ते जम्मदिणाणुरूवं महापउमोत्ति से नामं करिस्संति, अह
समुचियकाले अहिगयकलाकलावं तं सोहणंमि तिहिनक्खत्तमुहुत्तंमि महया रायाभिसेएणं अभिसिंचिहिनति, तओ
सो अक्खलियपरक्कमो पयंडपयावपडिहयपडिवक्खो अहमहमिगाए पणमंतनरिंदंसदोहमउलिमालालालियचलणो
महाराओ भविस्सइ, तस्स य महापउमस्स विजयजत्तमुवट्टियस्स पुन्नभइमाणिभइनामाणो दो देवा महद्विया महापर-
क्कमा सेणाकम्मं करिस्संति, ते य राईसरसेणावइमंतिसामंतपमुहा पहाणजणा एवंविहं वइयरमुवलम्भ पहरिसुस्स-
सियरोमकूवा महापउमस्स रण्णो गुणनिष्फण्णं देवसेणोत्ति दुइज्जं नामधेयं निम्मविस्संति, अपणया य तस्स रण्णो
सरयससहरधवलं चउदंतं सत्तंगपइद्वियं लट्ठं हत्थिरयणमुप्पज्जिही, तम्मि य सो समारूढो एरावणपट्टिद्विओव
पुरंदरो उवसोभेमाणो इओ तओ परिभमिस्सइ, तयणंतरं पुणोऽवि ते राईसरादओ जणा नियपडुसिद्धिपलोयणु-
प्पन्नपमोयभरतरलिया तस्स राइणो विमलवाहणोत्ति तइयं नामधेयं पइद्विस्संति । अह अन्नया कयाई तस्स
रज्जभरमणुपालितस्स पुव्वभवम्भत्थतवस्सिजणविणासहीलणप्पमुहाणत्थपच्चइयकम्मदोसेण समणसंघोवरि बाढं प-
ओसो समुप्पज्जिही,

तो सो सधम्मकम्मुज्जएऽवि एगे तवस्सिणो हणिही । अन्ने पुण बंधिस्सइ विविहपयारेहिं बंधेहिं ॥ १ ॥

श्रीगुणचंद
महावीरच०
८ प्रस्तावः
॥ २८४ ॥

अक्रोसेही एगे उवहसिही तदपरे महापावो । अन्नेसि निग्घिणमणो काराविस्सइ छविच्छेयं ॥ २ ॥
एगेसिं हरिस्सइ वत्थपत्तकंवलपमोक्खमुवगरणं । अन्नेसिं समणाणं वारिस्सइ भत्तपाणंपि ॥ ३ ॥
अन्ने निवासिस्सइ नियनयरपुरागरासयाहिंतो । अन्ने पुण मारिस्सइ सत्थेहिं लहू सहत्थेण ॥ ४ ॥
इय एवंविहमसमंजसं तओ पेच्छिऊण पउरजणा । भत्तिविणउत्तिमंगा तं एवं विन्नविस्संति ॥ ५ ॥
देव ! न जुत्तं सोउंपि एयमच्चंतमजससंजणं । समणाण धम्मविग्घो जं एवं हवइ तुह रज्जे ॥ ६ ॥
दुट्ठाण निग्गहो सिट्ठपालणं नियकुलक्कमायरणं । रायाण एत्तियं चिय सलहिज्जइ किं थ सेसेहिं ? ॥ ७ ॥
एकमकित्ती सच्चत्थ तिहुयणे उन्नमइ महापावं । अन्नं चिय रज्जस्वओ हीलिज्जंतेसु समणेसु ॥ ८ ॥
अन्नं च-जइ देव ! कहव कुप्पंति तुम्ह समणा इमे समियपावा । ता सयलंपिवि रट्ठं दहंति हुंकारमेत्तेण ॥ ९ ॥
एएसिं पभावेणं धरंति धराणि सुहेण नरवइणो । एत्तो चिय मज्जायं जलनिहिणोऽपि हु न लंघंति ॥ १० ॥
ता देव ! विरमसु धुवं तवस्सिजणपीडणाओ एयाओ । अकलंकचिय कित्ती जह वियरइ तिहुयणे तुम्ह ॥ ११ ॥
इय पुरजणेहिं सुवहुप्पयारवयणेहिं वारिओ संतो । भावविरहेऽपि सो तं पडिसुणिही तयणुवित्तीए ॥ १२ ॥
अन्नया य सो रहवरारूढो निग्गच्छिही, इओ य सुभूमिभागे उज्जाणे तिनाणोवगओ विउलतेउलेसामाहप्प-
दुद्धरिसो विविहतवचरणनिरओ सुमंगलो नाम तवस्सी आयाविस्सइ, सो य राया तेणप्पएसेण वच्चमाणो

गोशालक-
स्य विमल-
वाहन-
भवः,

॥ २८४ ॥

तं दद्वृण निक्कारणुप्पन्नतिवकोवानलो सुमंगलं काउस्सग्गट्ठियं रहग्गभागेणं पणोल्लावेही, सो य तेण पणोल्लिओ
समाणो धरणीयले निवडिओऽवि सणियं सणियं समुट्ठिऊण पुणो काउस्सग्गेण पलंबियभुओ ठाही, सो य राया
तं उड्डसंठाणसंठियं दद्वृण पुणोऽवि रहग्गेण पणोल्लावेही, सो य मंदं मंदमुट्ठिऊण तहेव उस्सग्गेण ठाइस्सइ, नवरं
ओहीं पउंजिऊण तस्स पुव्वभवे आभोइस्सइ, तओ एवं भणिही—अरे नरिंदाहम ! न तुमं महापउमो न देवसेणो न य
विमलवाहणो, किं तु मंखलिपुत्तो गोसालगो तुमं, जेण निद्वृहा महातवस्सिणो अचासाइओ निययधम्मगुरू, ता
जइ रे तथा सच्चाणुभूइणा मुणिवरिट्ठेण पडुणावि होऊण पडिविधायमकुणमाणेण निरुवमं पसममवलंबिऊण तुह
दुविलसियं सम्ममहियासियं, सुनक्खत्तमहारिसिणा वा तित्तिक्खियं, असेसतिट्ठयणरंगातुल्लमहामल्लेण महावीरेण
वा खमियं तं, नो खलु अहं सहिस्सं, किं तु जइ एत्तो पणोल्लावेहिसि ता भवंतं सरहं सतुरयं ससारहियं नियतवते-
एणं छारुकुरुडं काहामि, सो य राया इमं निसामिऊण समुच्छलियपवलकोवानलो पुणोऽवि संदणग्गेण पणोल्ला-
वेही, अहं तइयवेलंपि पणोल्लिओ सुमंगलसाहू विसुमरियपसमसवस्सो पणट्ठगुरूवएसो सत्तट्ठ पयाइं पचोसक्किऊण
तेउलेसं निसिरिही, ताए य सरहो ससारही सतुरंगमो सो निदज्झिही, सुमंगलसाहूवि तं निद्वहिऊण पुणरवि
पचागयसुहज्झवसाणो आलोइयनियदुच्चरिओ विचित्तेहिं तवोक्कमेहिं कम्मनिज्जरणं काऊण बहुयाइं वासाइं सा-
मण्णं परिपालिऊण य मासियाए संलेहणाए संलिहियसरीरो मरिऊण सव्वट्ठसिद्धे विमाणे तेत्तीससागरोवमाऊ

श्रीगुणचंद
महावीरच०
८ प्रस्तावः

॥ २८५ ॥

देवो भविस्सइ । तओ चुओ समानो महाविदेहे सिज्झिहिति । गोयमसामिणा भणियं-भयवं ! विमलवाहणो कहिं उप्पज्झिही ?, भयवया भणियं-गोयम ! विमलवाहणो तेण मुणिणा निद्वहो सत्तमाए निरयपुढवीए अप्पइ-ट्ठाणे नरयावासे तेत्तीससागरोवमाऊ नेरइओ भविस्सइत्ति । तयणंतरं च—

सवत्तो पसरियतिकखवज्जसूलग्गवेहणसमत्थं । अणिसं सहिही विवसो तेत्तीसं सागराइं दुहं ॥ १ ॥
तत्तो उवट्ठित्ता मच्छभयं पाविकुण तिव्वेणं । पुव्वभवसाहुमारणजणिएणं पावदोसेणं ॥ २ ॥
सो सत्थहओ संतो दाहजरघोरवेयणाभिहओ । मरिउं होही पुणरवि नेरइओ सत्तममहीए ॥ ३ ॥
तत्तो मच्छो छट्ठीए नारगो इत्थिया य नेरइओ । छट्ठीए पुढवीए इत्थी नेरइओ पंचमीए ॥ ४ ॥
उरगो नेरइओ पंचमीए उरगो पुणो चउत्थीए । नेरइओ सीहो तह चउत्थपुढवीए नेरइओ ॥ ५ ॥
सीहो तच्चाए नारगो य पक्खी य तइय नेरइओ । विइज्जा पुढवीए नारगो भुयपरिस्सप्पो ॥ ६ ॥
बीयाए नेरइओ भुयपरिस्सप्पो य पढमपुढवीए । सण्णी तओ असण्णी नेरइओ पढमनरगंभि ॥ ७ ॥
तेण मुणिमारणजियपावेणं नरयवज्जठाणेषु । सत्थहओ दाहज्जरविहुरो होही य मरिही य ॥ ८ ॥
तत्तो पक्खिसिरीसिवउरपरिस्सप्पेषु णेगभेएसु । जलवरजोणिसु तहा उववज्जिय भूरिवाराओ ॥ ९ ॥
चउरिंदिएसु तेइंदिएसु वेइंदिएसु य भवित्ता । सवत्थ सत्थनिहओ विवज्झिही णेगवाराओ ॥ १० ॥

गोशाल-
कस्य भा-
विमवाः

॥ २८५ ॥

वणसइपवणानलसलिलपुढविजाईसु विविहभेयासु । कालमसंखं वसिउं अकालमरणेण सो मरिही ॥ ११ ॥

इय उब्भडनियदुच्चरियजलणजालाकलावसंतत्तो । तं किंपि नत्थि दुक्खं जं पाविस्सइ न स वरागो ॥ १२ ॥

एवं च अणेगभवुम्मज्जणनिमज्जणाइं काऊण कहकहवि समासाइयथेवकम्मविवरो सो गोमालगजीवो रायगिहे नयरे बाहिं वेसित्थित्ताए उववज्जिही, तत्थवि चिरभवसाहुवहसमुत्थनिकाइयकम्माणुवत्तणवसेण रयणीए पसुत्ता चेव एगेण विडपुरिसेण आभरणलिच्छुणा निसियखग्गधेणुनिहयनिहारियउदरा मरिऊण पुणोऽवि रायगिहस्संतो वेसित्थियत्ताए उववज्जिऊण विवज्जिही । तओ जंबुद्दीवे दीवे भारहे वासे विंझगिरिपायमूले विभेलए सन्निवेसे माहणकुले दारियत्ताए पच्चायाही, तं च कालक्रमेण उम्मुकवालभावं अम्मापियरो समुचियस्स एगस्स माहणपुत्तस्स य भारियत्ताए पणामइस्संति, अन्नया य सा गुब्बिणी ससुरकुलाओ पियहरं निज्जमाणी अंतरा समुच्छलियपवलदावानलजालाकलावकवलिया कालं काऊण अग्गिकुमारेसु देवेसु देवत्ताए उववज्जिही, तत्तो य चविऊण माणुसत्तणेण समुप्पन्नो समाणो तहाविहसुगुरुदंसणसमुवलद्धसच्चन्नुधम्मबोहो भववेरग्गमुव्वहंतो पव्वज्जं पडिवज्जिही, कहिवि पमायवसेण विराहियसामण्णो य असुरकुमारेसु देवेसु उववज्जिही, एवं कइवयभवगहणाइं पुणो पुणो विराहियसामन्नो असइं भवणवासिदेवेसु जोइसिएसु य सुरसंपयं समणुभविऊण पुणो समुवलद्धमाणुसत्तो अइयारकलंकपरिहीणं पव्वज्जं समायरिऊण सोहम्मे देवलोए देवो होही, एवं सत्त भवे जाव निकलंकं सामण्णमणुपालिऊण

श्रीगुणचंद
महावीरच०
८ प्रस्तावः
॥ २८६ ॥

महाविदेहे वासे ददपइण्णाभिहाणो ईसरसुओ होऊण जायभववेरगो परिचत्तधणसयणो थेराण अंतिए सव्वविरइं गहाय छट्ठमाइतवोकम्मविसेसेहिं पुवभवपरंपरासमज्जियाइं पावकम्माइं खविऊण केवलनाणमुप्पाडेही, नओ सो ददपइण्णकेवली मुणियगुरुजणावमाणसमुत्थमहापाववियंभियभवाडवीनिवडणकडुविवागो नियसमणसंघं सदाविऊण एवं भणिही—

हंहो देवाणुपिया ! जंबुद्दीवंमि भारहे वासे । मंखलिपुत्तो गोसालनामओऽहं पुरा आसि ॥ १ ॥
बहुकूडकवडनिरओ विवरीयपरूवगो समणघाई । धम्मगुरुपच्चणीओ समत्थदोसाण कुलभवणं ॥ २ ॥
नियतेएणं चिय दज्झमाणदेहो दढं बहुदुहत्तो । कलुणं विलवंतोऽहं पंचत्तं पाविओ तइया ॥ ३ ॥
तम्मूलं चउगइभुयगभीसणे दीहरे भवारण्णे । भमिओ सुचिरं कालं विसहंतो दारुणदुहाइं ॥ ४ ॥
ता भो देवाणुपिया ! इय सोचा मा कयावि सुगुरूणं । संघस्स पवयणस्स य पडिणीयत्तं करेज्जाह ॥ ५ ॥
बहुओऽवि पावनिवहो वच्चइ नासं मुहुत्तमेत्तेण । गुरुसाहुसंघसिद्धंतधम्मवच्छलभावेण ॥ ६ ॥
एवमणुसासिऊणं नियसमणे सो तया महासत्तो । पडिवोहिऊण भवे पाविस्सइ सासयं ठाणं ॥ ७ ॥
इय तइलोयदिवायरसिरिवीरजिणेसरेण परिकहियं । गोसालयचरियमिमं गोयमसामिस्स नीसेसं ॥ ८ ॥
एयं च तच्चरियं महादुहविवागमूलं निसामिऊण वहवे समणा य समणीओ य सावयाओ य सावियाओ य गुरु-

भाविभवाः
गोसालक-
कृतः श्रम-
णोपवेशः.

॥ २८६ ॥

पुष्पमुहाणं सविसेसं आसायणापरिहारपरायणा जायति । अहं भयवं महावीरो मिथियगामनयराओ निक्खमित्ता
समणसंघपरिवुडो गामाणुगामेण विहरमाणो संपत्तो रायगिहं नयरं, तस्स य अदूरविभागवत्तिमि गुणसिलयाभिहा-
णचेइए विरइयं देवेहिं समोसरणं, पुवक्कमेण निसन्नो सिंघासणे जयगुरू साहिउं पवत्तो दयामूलं खमामहाखंधं
मूलगुणसाहासमाउलं उत्तरगुणपत्तनिगरसंछन्नं अइसयकुसुमविराइयं जससोरभभरियभुवणंतरं विसमसरतरणिताव-
पणासगं सग्गापवग्गसुहफलदाणदुल्ललियं पवरजणसउणणिसेवणिज्जं धम्ममहाकप्पतरुवरं । एत्थावसरंमि सेणियनरा-
हिवो भयवंतं समवसरणट्टियं सोऊण पट्ठिओ अभयकुमारगेहकुमारनंदिसेणपुत्तपरियरिओ वंदणवडियाए जयगुरूणो ।
कहं चिय ?—

डिंडीरपिंडपुंडरियहरियखरकिरणबिंबकरपसरो । सहरिसहरिणच्छिकरयलुलसियचामरुग्घाओ ॥ १ ॥
गज्जंतमत्तकुंजरमयजलपडिहणियरेणुपन्भारो । तरलतरतुरयपहकरसंखोहियमहियलाभोगो ॥ २ ॥
रणज्झगिरकणयकिंकिणिमालाउलरहसमूहपरियरिओ । दप्पुब्भडसुहडसहस्सरुद्धनीसेसदिसिनिवहो ॥ ३ ॥
इय सेणिओ नरिंदो हरिसुक्करिसं परं पवहमाणो । करिणीखंधारूढो नीहरिओ नियपुराहितो ॥ ४ ॥
तयणंतरं च पत्तो समोसरणं । जहाविहिणा य पविट्ठो तयन्भंतरे, तिपयाहिणीकाऊण वंदिउं जयगुरू निविट्ठो
समुच्चिए भूमिभागे, भगवयाऽवि पारद्धा तदुच्चिया धम्मकहा । कहं ?—

श्रीगुणचंद
महावीरच०
८ प्रस्तावः

॥ २८७ ॥

भो भो महाणुभावा निम्मलबुद्धीए चिंतह सयणहा । संसारं घोरमिमं महामसाणस्स सारिच्छं ॥ १ ॥
तथाहि—उब्भडवियंभियमुही विसयपिवासा महासिवा एत्थ । दढभणिवारियपसरा सबत्तो चिय परिब्भमइ ॥ २ ॥
ओहामियसुरनरखयरविक्रमा तंतमंतदुग्गेज्झा । अनिवारियं पयट्टइ भीमा जरडाइणी निच्चं ॥ ३ ॥
पयडियपयंडपक्खा निरवेक्खकंतजीयमाहप्पा । सबत्तो पासठिया कमायगिद्धा विसप्पंति ॥ ४ ॥
दावियविविहवियारा जीवियहरणेऽवि पत्तसामत्था । दढममुणियप्पयारा रोगभुयंगा वियंभंति ॥ ५ ॥
लद्धुं छिहं थेवंपि तक्खणुप्पन्नहरिसपब्भारो । भुवणत्तयसंचरणो मरणपिसाओ समुत्थरइ ॥ ६ ॥
इट्ठविओगाणिट्ठप्पओगपामोक्खदुक्खतरुनिवहो । सबत्तो विणिवारइ विवेयदिणनाहकरपसरं ॥ ७ ॥
इय भो देवाणुपिया ! मसाणतुल्ले भवंमि भीमंमि । खणमवि न खमं वसिउं तुम्हाणं सोक्खकंखीणं ॥ ८ ॥
एवं भगवया वागरिए संसारसरूवे पडिबुद्धा बहवे पाणिणो, भावसारं च अणेगेहिं अंगीकया देसविरइसच्चवि-
रइपडिवत्ती, हरिसूसियसरीरो य सपरियणो राया गओ जहागयं, नवरं मेहकुमाररायपुत्तो अंतो वियंभंतहरिसपसरो
संसारविरागं परममुच्चहंतो सेणियनराहिवं जणणिं च पणमिऊण भणिउं पवत्तो—अंबताय ! अहमेत्तो वंछामि
तुब्भेहिं अणुण्णाओ भगवओ समीवे पवज्जं पवज्जिउं, तेहिं भणियं—पुत्त ! विसमो जोवणारंभो दुरक्खणिज्जो मयर-
द्धयसरपहारो दुद्धरा विसयाभिमुहीभवता इंदियतुरंगमा सम्मोहदायगा लडहमहिलाजणविसाला बाढं दुरज्झवसा

राजगृहे
श्रेणिका-
देर्धमोप-
देशः।

॥ २८७ ॥

पवज्जा, अच्चंतं दुरहियासा परीसहा, ता पुत्त ! पडिवालेहि कइयवि वासराइं, मेहकुमारेण भणियं-अम्मताय ! तडि-
तरलमाऊअविलसियं सरयगिरिसरियावारिवेगचडुलं जोवणं मत्तकामिणीकडक्खभंगुरा रायलच्छी, जन्नारंभा इव
दीसंतवहुविप्पओगा इट्टजणसंजोगा, ता पज्जत्तमेत्तो गेहनिवामेण, सब्बहा मा कुणह धम्मविग्घंति भणिए अणु-
ण्णाओ कहकहवि जणणिजणगेहिं, तओ महाविभूइसमुदएणं गहिया अणेण भगवओ समीवे पवज्जा, अन्नेऽवि तं
पवज्जं अणुगिण्हंतं पासिऊण बहवे नरिंदसेट्ठिसेणावइसुया जायभवविरागा पवइया ।

अह दुस्सहत्ताए परीसहाणं चलत्तणओ चित्तवित्तीए तस्स मेहकुमारसाहुस्स अणुक्कमेण पढमरयणीए चेव
पसुत्तस्स पविसंतनीहरंतमुणिचरणघट्टणुप्पन्ननिद्दाविगमस्स पवज्जापरिचायाभिमुहमाणसस्स कहकहवि अट्टदुह-
ट्टियस्स दुक्खेण बोलीणा रयणी, समुग्गयंमि रविमंडले पमिलाणवयणकमलो समुट्ठिऊण तओ ठाणाओ पवज्जं
परिमोत्तुकामो गओ भगवओ समीवे ॥

अह केवलावलोएण जिणवरो जाणिऊण भग्गमणं । मेहकुमारं साहुं महुगिराए इमं भणइ ॥ १ ॥

किं भो देवाणुपिया ! संजमजोगंमि भंगमुवहसि । पुवभववइयरं नेव सरसि सयमवि समणुभवियं ॥ २ ॥

एत्तो तइयभवंमि रण्णे किर वारणो तुहं हुंतो । तत्थ य वणग्गिणा पसरिएण संतत्तसवंगो ॥ ३ ॥

वाढं पिवासिओ सरवरंमि पाउं जलं समोगाढो । तडपंकंमि य खुत्तो तत्तो नीहरिउमचयंतो ॥ ४ ॥

श्रीगुणचंद
महावीरच०
८ प्रस्तावः

॥ २८८ ॥

पडिकरिणो दददसणग्गताडणुणत्ततिव्वेयणओ । मरिउं विंझंमि तुमं पुणरवि जाओ गयाहिवई ॥ ५ ॥
वणदवपलोयणेण य जाइं सरिऊण भयवसट्टेण । रुक्खे उक्खणिऊणं अवणित्ता तणपलालाई ॥ ६ ॥
करयलसमाई तिन्नि उ महापमाणाई थंडिलाई तए । सरियातीरे पकयाई निययगयजूहरक्खट्ठा ॥ ७ ॥ जुम्मं ।
अह अन्नया कयाई तरुवरसंघरिससंभवो जलणो । दहिउं वणं पयट्ठो पलयानलविब्भमो भीमो ॥ ८ ॥
तं पेच्छिऊण भीओ तुमं पलाणो सथंडिलाभिमुहं । हरिहरिणससगसूयरपडिहत्ये थंडिले दुन्नि ॥ ९ ॥
लंघित्ता तइयंमिं संपत्तो अच्छिउं समाढत्तो । चरणो य समुक्खित्तो कंडुयणकए तए तणुणो ॥ १० ॥
एत्थंतंरमि अन्नन्नसत्तसंपेल्लिओ ससो एगो । उक्खित्तचरणहेट्ठा ठिओ सजीयस्स रक्खट्ठा ॥ ११ ॥
तं दट्ठूणं तुमए पयहेट्ठठियं पराए करुणाए । आकुंचिऊण धरिओ नियचलणो गयणदेसंमि ॥ १२ ॥
अह वणदवोऽवि दहिउं सयलं अडविं महाविडविपुन्नं । उवसंतो ते य गया जहागयं ससगपमुहजिया ॥ १३ ॥
ताहे लुहापिवासासंतत्तो तंपि सिग्घवेगेण । अमुणियकुटियसचलणो पधाविओ पाणियाभिमुहं ॥ १४ ॥
अह एगचलणवियलत्तणेण पडिओ तुमं गिरिवरोव । तण्हालुहाकिलंतो कालगओ बहुकिलेसेण ॥ १५ ॥
तेण य ससगणुकंपणसमुवज्जियपुन्नपगरिसवसेण । लहुईकयसंसारो संपइ जाओसि रायसुओ ॥ १६ ॥
इय भो देवाणुप्पिय ! तइया पसुणावि जइ तहा तुमए । ससगजियरक्खणेणं बाढं दुक्खाई सहियाई ॥ १७ ॥

मेघस्थ
दीक्षा पूर्व-
भवश्रा-
वणं च.

॥ २८८ ॥

ता कीस वंभयारीण धम्मनिरयाण पवरसाहूणं । चलणाइघट्टणेणवि संपइ संतावमुचहसि ? ॥ १८ ॥
 सरयनिसायरधवले कुलंमि पडिवन्नमुज्झमाणस्स । किं सुंदर ! न कलंको होही आचंदकालंपि ? ॥ १९ ॥
 कइवयदिणसुहकज्जेण अज्जिऊणं पयंडपावभरं । किं कोइ भण सयन्नो अप्पाणं पाडइ भवोहे ? ॥ २० ॥
 इय एवंविहवयणेहिं भुवणदीवेण वीरनाहेण । पडिवोहिओ महप्पा मेहकुमारो मुणिवरिट्ठो ॥ २१ ॥
 जाओ सुनिचलमणो तहकहवि जिणिंदभणियमग्गंमि । जह दुक्करतवनिरयाण साहूण णिदंसणं पत्तो ॥ २२ ॥
 तस्सणुसट्ठिं सोचा संवेगकरिं परेऽवि मुणिवसहा । सविसेसमप्पमत्ता पडिवन्ना संजमुज्जोगं ॥ २३ ॥
 अह अण्णंमि दिणंमी सोचा धम्मं जिणिंदमूलंमि । भववेरग्गमुवगओ रायमुओ नंदिसेणोऽवि ॥ २४ ॥
 पव्वज्जापडिवत्तिं काउमणो सो य सेणियनरिंदं । जणणिं च बहुविहेहिं वयणेहिं पन्नवेऊण ॥ २५ ॥
 जाव भुवणेकपहुणो पासे चलिओ पवज्जिउं दिक्खं । ताव य सो भणिओ देवयाए गयणट्ठियाए इमं ॥ २६ ॥
 भो भो कुमार ! विरमसु पव्वज्जागहणओ जओ अत्थि । अज्जवि तुह भोगफलं चारित्तावारगं कम्मं ॥ २७ ॥
 थेवं कालं निवससु सगिहे ता कीस ऊसुगो होसि ? । सलहिज्जंति न कज्जाइं पुत्त ! अइरहसविहियाइं ॥ २८ ॥
 काले चिय कीरंतो वयसाओ कज्जसाहगो होइ । समयाभावे सस्सं न फलइ अबंतसित्तंपि ॥ २९ ॥
 तत्तो कुमरेण भणियं देवि ! कीस तुमभियं पयंपेसि ? । सयमेवप्पडिवन्नं कहमिव उज्झामि विरइमइं ॥ ३० ॥

श्रीगुणचंद
महावीरच०
८ प्रस्तावः
॥ २८९ ॥

किं वा काही तंपिवि चारित्तावारणं ममं कम्मं । कु(दु)स्सीलसंगरहियस्स गाढतवसोसियंगस्स ॥ ३१ ॥
इय तवयणं अवमणिकुण सिग्घं गओ समोसरणं । नवरं जयगुरुणाविहु पडिसिद्धो सो तहचेव ॥ ३२ ॥
तहविहु अइरभसवसा अभाविउं भाविरं विरइभंगं । भुवणगुरुणो समीवे निरवज्जं लेइ पवज्जं ॥ ३३ ॥
तो छट्ठमपमुहं कुणमाणो दुकरं तवचरणं । जयगुरुणा सह विहरइ वहिया गामागराईसु ॥ ३४ ॥
पढइ विचि(वि)त्तं सुत्तं परिभावइ निच्चमेव य तदत्थं । गुरुणो मूले निवसइ परीसहे सहइ थिरचित्तो ॥ ३५ ॥
संजमनिसेवणपरो विसयविरागं परं परिवहंतो । आयावइ अणवरयं सुसाणसुत्रासमाईसु ॥ ३६ ॥
अह अन्नया कयाई एगल्लविहारपडिमपरिकम्मं । काउमणो स महप्पा जाए छट्ठस्स पारणगे ॥ ३७ ॥
भिक्षुट्ठाए पविट्ठो एगोऽणाभोगदोसओ सहसा । वेसाए मंदिरंमी पयंपए धम्मलाभोत्ति ॥ ३८ ॥
तो वेसाए सहासं सवियारं जंपियं अहो समण ! । मोत्तूण दम्मलाभं न धम्मलाभेण मे कज्जं ॥ ३९ ॥
अहह कहं हसइ ममंपि बालिसा संपयंपि(ति) चित्तिता । तेण तवलद्धिणा नेवतणयमायट्ठिऊण लहुं ॥ ४० ॥
अइपवररयणरासी निवाडिया एस दम्मलाभोत्ति । भणिकुण य नीहरिओ तीए भणिओ य साणंदं ॥ ४१ ॥
भयन्नं ! उज्झसु दुकरतवचरणं कुणसु मज्झ सामित्तं । इहरा चएमि जीयं पुणरुत्तं तीए इय वुत्तं ॥ ४२ ॥
भावियमईवि तवसोसिओऽवि विन्नायविसयदोसोऽवि । कम्मवसा भग्गमणो पडिवज्जइ तीए सो वयणं ॥ ४३ ॥

मेवस्य
वैराग्यं
नंदिवेण-
दीक्षा.

॥ २८९ ॥

नवरं दस अहिंणे वा जइ नो बोहेमि अणुदिणं भवे । तो परिचएमि विसए विसंव इइ गिण्हइ पइन्नं ॥ ४४ ॥
 अह उज्झियमुणिवेसो चित्तितो देवयाए तं वयणं । जयगुरुणोऽवि निवसइ वेसाए गिहंमि स महप्पा ॥ ४५ ॥
 मुंजेइ विसयसोक्खं धम्मकहाए य बोहिउं भवे । पवज्जागहणत्थं पेसइ पासे जिणिंदस्स ॥ ४६ ॥
 अह अन्नया कयाई खीणे भोगप्फलंमि कम्मम्मि । वेरग्गावडियमई चित्तेउमिमं समाढत्तो ॥ ४७ ॥
 तुच्छं सोक्खं तडितरलमाउयं भंगुरं च तारुन्नं । रोगविदुरं सरीरं दुलंभा धम्मसामग्गी ॥ ४८ ॥
 खंडियसीलाण निरंतरं च निवडंति दुस्सहदुहाइं । एवं ठिए न जुज्जइ संपइ मह निवसिउं एत्थ ॥ ४९ ॥
 तो गंतुं जयगुरुणो पुणो समीवम्मि लेइ पवज्जं । आलोइयदुच्चरिओ विहरइ य समं जिणिंदेण ॥ ५० ॥
 चिरपवज्जापज्जायपालणं भावसारमह काउं । सो नंदिसेणसाह मरिउं देवत्तणं पत्तो ॥ ५१ ॥

इओ य सो सुदाढनागकुमारदेवो नावारूढस्स भगवओ पुवं उवसग्गं काऊण आउयस्सयचुओ समानो समु-
 प्पन्नो एगंमि रोरकुले पुत्तत्तणेण, बुद्धिं गओ य संतो करिसगवित्तीए जीवइ, तंमि य पत्थावे सो जाव नियच्छेत्तं
 लंगलेण करिसिउमारद्धो ताव पत्तो तं गामं भुवणेक्कबंधवो जिणो, तओ भगवया तस्स अणुकंपाए पडिबोहणत्थं
 पेसिओ गोयमसामी, गओ य तदंतियं, भणिओ य गोयमेण एसो-भइ! किमेयं कीरइ?, करिसगेण भणियं-जं
 कारवेइ एस हयविही, को वा अन्नो अम्हारिसाण कलाकोसल्लवज्जियाण जीवणोवाओ?, गोयमसामिणा जंपियं—

श्रीगुणचंद
महावीरच०
८ प्रस्तावः

॥ २९० ॥

एवंविहगाढकिलेससंविठत्ताए भोयणविहीए । दिणगमणियं कुणंतस्स मुद्ध ! का चंगिमा तुज्झ ? ॥ १ ॥
किं वा सरीरसोक्खं संपज्जइ को य विसयवामोहो । किं वा सुचरियनिष्फायणं च संभवइ एवं च ? ॥ २ ॥
नो एयपरिचागो सुदुक्करो दिवसोक्खकंखीणं । तुम्हारिसाण जायइ जेणऽज्जधि किर महासत्ता ॥ ३ ॥
पउरभणिकणगरयणुकराई तरुणीओ सुंदरे गेहे । मोत्तूण पन्नगंपिव धन्ना लगंति धम्मंमि ॥ ४ ॥
अन्ने पुण आकालियदुरंतदारिद्विहुयावि दढं । पावारंभपयट्ठा जम्मं सयलंपि वोळिंति ॥ ५ ॥
ते अण्णत्थवि जम्मे तहेव पुणरुत्तदुक्खसंतत्ता । तल्लोविळिं पकुणंति थोवसलिलंमि मच्छोव ॥ ६ ॥
जइ पुण ते घरवावारलक्खभागे व धम्मकज्जंमि । अम्भुज्जमंति रुंधंति नित्तुलं ता दुहदुवारं ॥ ७ ॥
किंच—एगत्तो संपज्जइ जहिच्छभोगोवभोगदुल्लिखं । धणमन्नत्तो सज्जणपसंसणिज्जा हि पवज्जा ॥ ८ ॥
एगत्तो छक्खंडाहिवस्स सेवा महानरिंदस्स । कीरइ अन्नत्तो पुण मुणिणो सद्धम्मनिरयस्स ॥ ९ ॥
सुंदर ! इमाओ दोन्नि उ गईउ लोयंमि सुप्पसिद्धाओ । एयाणं अन्नयरिं जे कुसला ते पवज्जंति ॥ १० ॥
ता वज्जसु कम्ममिमं धम्मं चिय सरसु तं महासत्त ! । दीणाण दुत्थियाण य एसो एक्को परं सरणं ॥ ११ ॥
इय गोयमेण भणिए सबइलं लंगलं च मोत्तूण । नमिउं चलणे सो भत्तिनिम्भरो भणिउमाढत्तो ॥ १२ ॥
भयवं ! विन्नाणविचज्जियस्स जइ जोग्गयत्थि मे काऽवि । ता देहि निययदिक्खं भववासाओ विरत्तस्स ॥ १३ ॥

कर्षक-
दीक्षा.

॥ २९० ॥

इय वुत्ते से परियट्ठिणोवि सिरिगोयमेण पवज्जा । तक्खणमेव विदिन्ना वोहिन्वीयंतिकाऊण ॥ १४ ॥

एवं तेण गहियदिकखेण समं पयट्ठो गोयमसामी भगवओ अभिमुहं, अह जयगुरुणो चक्खुगोयरमुवागयस्स तस्स करिसगस्स तेण सीहभववज्जियगाढेवरवेसण पम्हुट्ठा पवज्जापडियत्ती जायपयंडकोवो य भणिउं पवत्तो- भयवं ! को एसो?, गोयमेण भणियं-अम्ह धम्मगुरू, तेण भणियं-जइ तुह एसं धम्मगुरू ता मम तुमएवि न कज्जं, अलं पवज्जाएत्ति भणिऊण परिचत्तरयहरणो धाविऊण गओ खेत्तंमि, गहिया बलीवहा, उम्भीकयं लंगलं, पलग्गो पुवपवाहेण खेडेउंति । गोयमसामीवि विम्हियमणो भयवंतं पणमिऊण भणिउं पवत्तो

भुवणभुयभूयमहप्पभावपडिहणियपाणिमणपीड ! । जयनाह ! मए असरिसमिमज्ज पलोइयं चोज्जं ॥ १ ॥

जं सोक्खकरेवि हु तुज्झ दंसणे दूरओऽवि सो हलिओ । सूरस्स कोसिओ इव सोढुं तेयं अचाइंतो ॥ २ ॥

सयमेव य पडिवन्नं पवज्जं उज्झिऊण संभंतो । अइसिग्घमवक्कंतो सखेत्तहुत्तं परोट्टमणो ॥ ३ ॥

किर तुम्ह संकहावि हु जणइ अपुवं जणाण परितोसं । किं पुण चीतरुपमुहट्ठपाडिहेरुम्भवं रूवं ? ॥ ४ ॥

अह जयगुरुणा भणियं गोयम ! सो एस केसरिस्स जिओ । जो किर तिविट्ठुकालेमए दुहा फालिओ होंतो ॥ ५ ॥

तुमए मह सारहिणा निज्जविओ कोवफुरुफुरंततणू । सीहे सीहेण हए इच्चाईमदुरवयणेण ॥ ६ ॥

तप्पच्चइएणं मइ दोसेणज्जवि स वेरमुवहइ । तेणं चिय तप्पडिवोहणट्ठया पेसिओ तंसि ॥ ७ ॥

श्रीगुणचंद
महावीरच०
८ प्रस्तावः
॥ २९१ ॥

इय पुवकम्मवसवत्तिजंतुकीरंतविविहवाधारे । संसारे परमत्थेण किंपि नो विज्जए चोज्जं ॥ ८ ॥
एवं गोयमं पच्चाइऊण सामी तामलित्तिदसन्नपुरवीभयचंपाउज्जेणिगयपुरकंपिल्लनंदिपुरमदुरापमुहेसु महानगरेसु
भवसत्तजणं पडिबोहिंतो पसन्नचंददसन्नभइउदायणसालमहासालपमुहं रायनिवहं पच्चाविंतो चंडपज्जोयारिमहण-
जियसत्तुपामोक्खं नरिंदवगं च सावगधम्मे ठवेंतो कइवयकालाणंतरं पुणो समागओ रायगिहं । तत्थ य—
कक्केयणनीलयलोहियक्खपामोक्खरयणनिवहेण । कुट्टिमतलं रइज्जइ सुरेहिं आजोयणमहीए ॥ १ ॥
मणिरयणजच्चकंचणकलहोयमया सुगोउरसणाहा । तिन्नेव निम्मविज्जंति तक्खणं पवरपागारा ॥ २ ॥
अब्भंतरंमि तेसिं विचित्तरयणोहरस्सिजडिलाइं । ठाविज्जंती सीहासणाइं जोग्गाइं जयगुरुणो ॥ ३ ॥
पुवदिसिबज्जसीहासणेसु तइलोयविम्वयकराइं । कीरंति तिन्नि रूवाइं भुवणनाहस्स सरिसाइं ॥ ४ ॥
डज्झंतागुरुघणसारसिल्हयामोयसुरहियदियंता । धूवघडीण समूहो पमुच्चई सवपासेसु ॥ ५ ॥
मंदंदोलियकंकिल्लिपल्लवो विधुयधयवडाडोवो । वित्थरइ तित्थनाहाणुभावओ सीयलो पवणो ॥ ६ ॥
इय सुरगणेण सच्चायरेण निवत्तिए समोसरणे । सिंहासणे निसण्णो पुवाभिमुहो जिणवरिंदो ॥ ७ ॥
जयगुरुपउत्तिविणिउत्तपुरिसपरिकहियजिणवरागमणो । अभयकुमाराइकुमारपरिवुडो सेणियनरिंदो ॥ ८ ॥
हरिसुस्ससियसरीरो वंदणवडियाए आगओ झत्ति । असुरसुरवाणमंतरताराहिवपमुहतियसावि ॥ ९ ॥

प्रसन्नच-
न्द्रादिनां-
बोधः राज-
गृहेसमव-
सरणं.

॥ २९१ ॥

तिपयाहिणिऊण पणेण भत्तिभारेण वंदिउं नाहं । सट्ठाणेसु निसीयंति ते य सद्धम्मसवणत्थं ॥ १० ॥
 उप्पायपलयसत्तासमलंकियसयलवत्थुपरमत्थं । भव्वाणं भवभयहरं तत्तो वागरइ भुवणगुरू ॥ ११ ॥
 वागरमाणस्स य भुवणबंधुणो मुणियसयलभावोऽवि । भव्वजणवोहणत्थं गोयमसामी इमं भणइ ॥ १२ ॥
 भयवं ! भवस्स पुणरुत्तजम्मजरामरणसोगपउरस्स । किं मूलकारणं जमिह नेव जीवा विरज्जंति ? ॥ १३ ॥
 न य उज्जमंति तुह पायपउमपूयणपमोक्खवावारे । नो देससव्वविरइओ भावसारं च गिण्हंति ॥ १४ ॥
 भणियं जिणेण गोयम ! मिच्छत्तं अविरई य मूलमिह । तदणुगया नो जीवा भवभमणाओ विरज्जंति ॥ १५ ॥
 नो बहु मत्तंति जिणाहिवंपि गिण्हंति नेव विरइंपि । मिच्छत्तमज्जमत्ता किं वा कुवंति नोऽकज्जं ? ॥ १६ ॥
 जइ तेवि कम्मगंठिं सुनिद्धुरं भिंदिऊण सम्मत्तं । पायंति कहवि ता भवसंवासाओ विरज्जंति ॥ १७ ॥
 अब्भुजमंति जिणसाहुपूयणाइम्मि धम्मकज्जंमि । नवरं तेऽवि न विरइं चेत्तुं पारेंति कम्मवसा ॥ १८ ॥
 जं देसओवि सविसेसकम्मक्खयउवसमेण सा होइ । किं पुण पहाणमुणिजणकरणुचिया सबओ चेव ॥ १९ ॥
 ता गोयमेण भणियं भयवं ! सम्मत्तरयणलाभाओ । अब्भहियं गुणठाणं एवं सइ विरइभावोऽयं ॥ २० ॥
 ता साहेसु जयगुरू ! पउरगेहवावारवावडमणाणं । संभवइ देसओविहु विरई कहमिव गिहत्थाण ? ॥ २१ ॥
 तो जयगुरूणा कहियं पंचण्हं तिण्ह वा चउण्हं वा । गहणे वयाण एगस्स वावि सा होइ निहोसा ॥ २२ ॥

श्रीगुणचंद
महावीरच०
८ प्रस्तावः
॥ २९२ ॥

गोयममुणिणा भणियं जइ एवं ता जिणिंद ! सवाइं । सोदाहरणाइं कहेह ताइं भेएहिं जुत्ताइं ॥ २३ ॥
न तुमाहितो अन्नो भयवं एयं निंदसिउं सको । जं सवं सूरुचिय पयासिउं पभवए गयणं ॥ २४ ॥
इय वुत्ते सिरिवीरेण धम्मपात्तायमूलखंभेण । भणियं गोयम ! निसुणसु सवमिमं परिकहिज्जंतं ॥ २५ ॥
पंच उ अणुवयाइं गुणवयाइं च होंति तिन्नेव । सिक्खावयाइं चउरो विरईए गिहत्थलोयस्स ॥ २६ ॥
तत्थ य अणुवयाइं पढमं पाणाइवायवेरमणं । वयमवरवयपहाणं पाणाइवाओ य सो दुविहो ॥ २७ ॥
विन्नेओ बुद्धिमया सुहुमो थूलो य तत्थ पुण सुहुमो । एगिंदियजियविसओ थूलो वेइंदियाइगओ ॥ २८ ॥
संकप्पारंभेहिं दुविहो थूलो य तत्थ संकप्पो । होइ दु उवेचकरणं आरंभो पयणकिसिपमुहे ॥ २९ ॥
संकप्पोऽवि य दुविहो अवराहकरंमि निरवराहे य । जो हरइ देव(ह)दवं स सावराहोऽन्नहा इयरो ॥ ३० ॥
एवं नाऊण इमं थूले अवराहविरहिण जीवे । संकप्पओ न घाएज्ज दुविहतिविहाइभेएण ॥ ३१ ॥
इय गहियजीववहविरइसुंदरो सावगोऽणुकंपपरो । अच्चंतं कोवेऽवि दु गोमणुयाईण न करेज्जा ॥ ३२ ॥
बंधवहं छविछेयं अइभारं भत्तपाणवोच्छेयं । एए पंचइयारा जम्हा दूसंति वहविरइं ॥ ३३ ॥
एयाए दूसियाए विहलो सबोऽवि धम्मवावारो । कट्ठागुट्ठाणंपिवि निरत्थयं रत्तन्नं ॥ ३४ ॥
जं पाणिवहासत्तो सत्तो तं किंपि पावमायरइ । जेण निमेसंपि सुहं न लहइ नरयाइसु गइसु ॥ ३५ ॥

अणुव्रत-
स्वरूपं.

॥ २९२ ॥

सबत्थवि सोवक्कममइलहुयं आउयं समज्जिणइ । पियपुत्तविओगं वा पावइ हरिवम्मराउव ॥ ३६ ॥

गोयमसामिणा भणियं—भयवं ! को एस हरिवम्मरायाहिवो ?, भगवया जंपियं—गोयम ! निसामेसु, अत्थि इहेव भारहे वासे कुरुजणवए गयउरं नाम नयरं, तत्थ असंखदविणसंगओ दत्तो नाम माहणो परिवसइ, रुवजोवणा-इगुणसंगया य सिरी नाम भारिया, सब्बकज्जेसु पुच्छणिज्जो पाणाइरगेवल्लहो सब्बपसमसुस्सीलयाइगुणसंगओ नंदो नाम से वालमित्तो, सो य अचंतं कलयंटकोमलकंटो तद्वाविहवावारपरिसमत्तीए निग्गच्छिऊण निव्विजणंमि पएसे ठाऊण गंधवविणोयमायरइ, एवं च वचंति वासरा । अन्नया य दत्तस्स दियवरस्स वाढं पाउम्भूया सिरोवेयणा, तवसेण य पणट्ठा रई वियंभिओ परितावो जायाणि नीसहाणि अंगाणि खलमहिलव चक्खुगोयरमइकंता निहा निच्छिण्णा भोयणवंछा तुट्ठा जीवियासा, एवंविहं च विसमदसावडणं पेच्छिऊण तेणाहूओ नंदो, भणिओ य—अहो मित्त ! कुणसु किंपि उवायं, सब्बहा बलवई सिरोवेयणा खुड्डइव लोयणजुयलं, मणागंपि न पारेमि सुहसेज्जाग-ओवि चिट्ठिउं, जइ पुण कहवि मम निहामेत्तंपि होज्जा तो पच्चुजीवियं व अप्पाणं मन्नेज्जा, इय दीणं से वयणं निसामिऊण नंदेण भणियं—पियमित्त ! धीरो भव, परिचय कायरत्तणं, तद्वा करेमि जद्वा अकालक्खेवेण पगुणसरीरो भवसित्ति संठविऊण रयणिसमयंमि समारद्धं कागलीगेयं, जओ—

जह जह गेयनिनाओ पविसइ दत्तस्स सवणविवरंमि । तह तह निद्वावि विलज्जियव आगच्छए सणियं ॥ १ ॥

श्रीगुणचंद
महावीरच०
८ प्रस्तावः

॥ २९३ ॥

एवं च आगयाए निहाए पमुत्तो सो निम्भरं, सा चेव भज्जा नंदस्स तेण सुइसुहकारिणा गेयरवेण अवहरि-
यहियया तम्मणा जायत्ति, दत्तस्सवि परिगलंतीए रयणीए पणट्ठा सिरोवेयणा, संपत्ता सरीरनिबुई, अन्नया रहंमि
सिरीए सपणयं भणिओ नंदो—

सुहय ! जहा नियमित्तस्स देहपीडा तए समवहरिया । मज्झंमि तहा संपइ अवहरसु सरीरसंतावं ॥ १ ॥
उज्जुयभावत्तणओ अवियाणिय से मणोगयं भावं । नंदेण जंपियमिमं—कत्तो ते सुयणु ! संतावो ? ॥ २ ॥
तीए भणियं—सुंदर ! सयमवि काउं तुमं न याणासि ? । किं सच्चं पयडिज्जउ ? , सो भणइ—कहसु, को दोसो ? ॥ ३ ॥
ताहे तीए सिट्ठो कलगेयायन्नणाओ आरब्भ । सच्चो निययुत्तंतो निम्भरअणुरागसंबद्धो ॥ ४ ॥
आयन्निऊण एयं सुणिऊण य से असुंदरं भावं । नंदेणं सा भणिया कहंपि एयं सुयणु ! वयसि ? ॥ ५ ॥
दूसिज्जइ निययकुलं अजसो य दिसासु जेण वित्थरइ । मरणेऽवि हु तं धीरा कहमवि नो संपवज्जंति ॥ ६ ॥
सुवंति य नरएसुं परदारपसत्तयाण सत्ताणं । विविहाओ वेयणाओ मयच्छि ! ता उज्जसु कुवंछं ॥ ७ ॥
इय पन्नविऊण बहुप्पयारवयणेहिं तं महाभागो । नंदो ठाणाओ तओ नीहरिओ सिग्घवेणेण ॥ ८ ॥

एसो य सयलवइयरो कडगंतरिण निसामिओ दत्तेण, तओ चित्तियमणेण—अहो विणट्ठं कज्जं, जं मम महिला
नंदेण सार्द्धं एवमुल्लवइ, मन्ने नंदो मं उवलक्खिऊण चित्तरक्खट्ठा सुद्धसमायारं अप्पाणसुवदांसितो एवमुल्लविऊण

प्रथमेऽणु-
व्रते हरिव-
र्मदृष्टान्तः।

॥ २९३ ॥

एत्तो ठाणाओ सिग्घमवकंतो, ता न जुत्ता उवेहा, जओ भहिला पुरिसंतरखित्तचित्ता कयाइ अत्तणो मणोरहविग्घं
 संभाविऊण पइणो विसदाणाइणा विणासं करेज्जा, सयमसमत्था वा विडजणं विणासाय वाचारेज्जा, अओ जाव-
 ज्जवि न जायइ कोऽवि विणासो ताव वावाएमि एयं नंदं, न सब्बहा सुंदरो एस, कहमन्नहा एयाए सह रहसि
 ठाएज्जा?, किं न याणइ एसो सप्पुरिसाण चक्खुक्खेवोऽवि न जुज्जइ काउं परकलत्ते?, किं पुण निब्भरपेमगम्भो
 परोप्परमेगंतसंलावो?, एवं निच्छिऊण तस्स वावायणत्थं उवाए चित्तिउमारद्धो, सावि से भज्जा दुन्निग्गहयाए
 मयणवियारस्स अवजसनिरवेक्खत्तणओ इत्थीसहावस्स गाढाणुरागसम्भावाओ दुल्लहजणंमि जत्थ जत्थ नंदं पासति
 तत्थ तत्थ लिहियव्व थंभियव्व विचेयणव्व निचला एतमेव अणिमिसाहिं दिट्ठीहिं पेच्छमाणा अच्छइ, तीसे य तहा-
 विहावलोयणेण दत्तो बहुप्पयारं संतावमुव्वहइ, नंदोवि सुद्धसीलयाए पुव्वप्पवाहेण मुक्कसंको तस्स सगासंमि पइ-
 दिणमुवेइ, अन्नया य अवगणिऊण पुव्वोवयारं, परिचइऊण चिरकालसंभवं सिणेहं, अविमंसिऊण जुत्ताजुत्तं, अणवे-
 क्खिऊण परलोयभयं तेण दत्तमाहणेण वीसत्थहिययस्स नंदस्स तालउडविससणाहो पणामिओ तंवोलवीडओ,
 अविगप्पभावेण य गहिओ नंदेण, परिभोत्तुमारद्धो य ।

अह तंमि भुज्जमाणे अब्बुकडयाए विसविगारस्स । निन्नट्ठचेयणो झत्ति निवडिओ सो महीवट्ठे ॥ १ ॥

दत्तेणवि मायासीलयाए पणयं पयासमाणेण । पम्मुकदीहपोकं हाहारवगम्भणं रुत्तं ॥ २ ॥

श्रीगुणचंद
महावीरच०
८ प्रस्तावः
॥ २९४ ॥

मिलिओ य नयरलोगो कहिओ तेणावि तस्स वुत्तत्तो । जह सहसच्चिय जीयं नीहरियमिमस्स अनिमित्तं ॥ ३ ॥
नयरजणेणं भणियं अलाहि सोगेण कुणसु कायवं । सच्छंदविलसिएसुं किं वज्जिज्जइ कयंतस्स ? ॥ ४ ॥
एमाइ जंपिऊणं नयरजणो पडिगओ सगेहेसु । दत्तेणवि से विहिओ सरीरसकारपमुहविही ॥ ५ ॥
एवं च वावाइयंमि तंमि पणट्टकुविगप्पो भज्जाए समं निप्पच्चवायं विसयसुहमणुहवमाणो कालं बोलेइ, अन्नया
य तीए समं वरिसयालंमि ओलोयणगओ जाव निवडंतजलधाराधोरणीमणहरं गयणयलमवलोएइ ताव सहसच्चिय
तडयरारावभीसणा निवडिया तस्स सीसंमि कुलिंममालापलीवियदिसामंडला विज्जू, तीए य तणपूलगो इव नि-
इडो दत्तो, भरिऊण य तइयनरयपुढवीए सत्तसागरोवमाऊ नेरइओ उववन्नो, तहिं च अणवरयदहणकुंभीपागसाम-
लिसाहारोहणकरवत्तफालणवेयरणिनइप्पवाहणमोगगरसंचुण्णणपमुहाइं तिकखदुक्खलक्खाइं निरंतरमणुभविऊण
आउयक्खंयमि तत्तो उव्वट्ठिऊण मच्छक्खपपक्खिसरीसिबपमोक्खासु तिरिक्खजोणीसु उववन्नो, तासुवि बहुकालं
चरिऊण पुणो पुणो नरगाईसु य उववज्जिऊण कहवि कम्मलाघवेण एगंमि पच्चंतकुले जाओ पुत्तत्तणेणं, कयं च से
मंगलउत्ति नामं, तत्थ य जइवसाओ आरब्भ सो पसूओ तइवसाओ चिय तंमि कुले पाउब्भूया विविहा
रोगायंका, समुपन्ना विविहाणट्ठा, तओ तेहिं जणणिजणगेहिं चिंतियं-अहो दुट्ठलक्खणाणुगओ एस अह पुत्तो ता
जाव न देइ अकाले चिय मरणं ताव पच्छन्नो चिय अडवीए नेऊण छडिज्जइ, जीवमाणानमन्ने पुत्ता भविस्संति,

प्रथमेऽणु-
व्रते हरिव-
र्मदृष्टान्तः।

॥ २९४ ॥

किमणेण विसहरसंवहणेणंति परिभाविऊण वरिसमेत्तवओ मुक्को एसो अडवीए, अह तेणप्पएसेण समागओ सिवो
 नाम सत्थनाययो, दिट्ठो य तेण एसो, गहिओ अणुकंपाए, नीओ य वुह्मिं । अन्नया य तस्स कम्माणुभावेण सो
 सत्थवाहो सधणो ससयणोऽवि अकालखेवेण खयं गओ, सो य भिक्खावित्तीए अप्पाणं पोसंतो कमेण जोवण-
 मणुप्पत्तो, अन्नया य वसंतमासंमि पवरनेवत्थमणहरं नयरजणं विलसंतं अवलोइऊण चित्तिमणेण-अहो नूणं महा-
 पावकारी अहं, कहमन्नहा समाणेवि मणुयत्ते इमे कयपुत्ता नायरया एवं विलसंति, अहं पुण पइदिणं लुक्खभि-
 क्खाकवलकवलणेण निययउयरंपि(न) भरामि?, ता पज्जत्तं गिहवासेण, कोरेमि धम्मज्जणंति संचित्तिऊण गओ जल-
 णप्पभाभिहाणस्स तावसस्स समीवे, गहिया दिक्खा, काउमारद्धो य विविहं तवचरणं । एवं च अन्नाणतवेण
 उवज्जिया भोगा, अन्नदिवसे य पउरकंदमूलफलभक्खणेण समुप्पन्नं से पोहूसुलं, तेण य अभिहओ मरिऊण
 वसंतपुरे नयरे हरिचंदस्स रण्णो अणंगसेणाभिहाणाए अग्गमहिसीए कुब्बिसि पाउम्भुओ पुत्तत्तणेणं, पसूओ
 नियसमयंमि, कयं वद्धावणयं. पइट्ठियं च हरिवम्मोत्ति नामं, उम्मुक्कवालभावो य गाहिओ कलाकोसलं परिणाविओ
 य अट्ठ रायकन्नगाओ, अन्नया य जोगोत्ति कलिऊण हरिचंदराइणा महाविभूईए मंतिसामंतपउरजणसमक्खं उव-
 वेसिओ नियपए, जाओ सो महानरिंदो । हरिचंदरायाऽवि निविण्णकामभोगो गओ वणवासं, गहिया दिसापो-
 क्खगतावसाणं दिक्खा, परिवालेइ जहामिहियं तेसिं धम्मंति । हरिवम्मरायावि जहविहिपरिपालियपयइवग्गो

श्रीगुणचंद
महावीरच०
८ प्रस्तावः
॥ २९५ ॥

कालाणुरूपयद्वियनयमगो रज्जभरं समुच्चहइ, तस्स य विसयसुहमणुहवंतस्स समुप्पन्नो पुत्तो, कयं च से हरि-
दत्तोत्ति नामं, तस्स य राइणो सयलरज्जवावारनिरुवणनिउणो असेसनीइसत्थवियक्खणो वेसमणो नाम अमच्चो,
सो य लद्धपसरत्तणेण एवं परिभावेइ-जइ किंपि अंतरं पावेमि ता इमं रायं वावाइऊण सयमंगीकरेमि रज्जं,
किमणेण साहीणेऽवि सामंते दासत्तकरणेणं?, तद्वावि केणवि उवाएणं एयस्स राइणो पढमं ताव पुत्तं विणासेमि
पच्छा एस सुहविणासो चेव होहिति परिभावेतो अवरंमि वासरे कइवयपहाणपुरिसपरियरिओ गओ उज्जाणं, उव-
विट्ठो तरुवरच्छायाए, अइ खणंतरं अच्छिऊण कवडेण सहसत्ति उट्ठिओ तट्टाणाओ भासमाणं च परियणं निवारि-
ऊण उट्ठमुहो निज्जिमेसेण य चक्खुणा गयणमवलोइऊण परमविम्भइयमुच्चहंतो नियपरियणं भणिउं पवत्तो-भो! भो!
किं निसामियं किंपि तुम्हेहिं एत्थ?, तेहिं भणियं-सामि! किमिव?, अमच्चेण भणियं-आगासे वच्चंतीहिं देवीहिं
इमं जंपियं-जहा एस राया नियपुत्तदोसेण मरिहिति, एयं च निसामिऊण अणुकूलभासित्तणं सेवगस्स धम्मोत्ति-
कलिऊण तयणुवित्तीए भणियं परियणेण-सामि! बाढं निसामियं, केवलममंगलंति काऊण पढमं चेव न कहियं,
जइ रे जणगणिच्चिसेसस्स सामिसालस्सवि एवं होही ता पज्जत्तं मे जीविएणंति वागरिऊण अमच्चेण आयट्ठिया
कज्जलपुंजसामलुम्मिलंतकंतिपडला खग्गधेणू, समाढत्तं कवडेण नियपोट्ठिवियारणं, तओ कहकहवि बला मोडिऊण
वाहुं परियणेण उहालिया खग्गधेणू, नीओ मंदिरं, उम्भडकवडसीलयाए य परिचत्तपाणभोयणसरीरसक्कारो जरसि-

प्रथमेऽणु-
व्रते हरि-
वर्मकथा.

॥ २९५ ॥

कडमंचए निवडिऊण ठिओ एसो असंसेपि दिवसं, वासरंते य अत्थाणीगएण राइणां अमच्चं अपेच्छंतेण पुच्छिओ पडिहारो—अरे ! किं निमित्तं न आगओ अज्ज अमच्चो ?, तेण कहियं—देव ! न सुणेमि सम्मं, राइणा भणियं—सयंपि गेहं गंतूण अमच्चं पुच्छसु अणागमणकारणं, तओ जं देवो आणवेइत्ति भणिऊण गओ पडिहारो, दिट्ठो जरसि-
क्खडावडिओ सामवयणो अमच्चो, पुच्छिओ य अणेण—अमच्च ! किमकांडे चिय एवंविहमवत्थंतरमुवागओ सि ?, साहेसु कारणं, तुह अणागमणेण परितम्मइ नराहिवोत्ति वुत्ते दीहं नीससिऊण भणियममच्चेण—भो पडिहार ! किं निरत्थएण पुव्ववुत्तंतविकत्थणेण ?, एत्तियमेत्तमेव संपइ जंपियव्वं

जस्स पसाएण समग्गलोगपुज्जत्तणं समणुपत्तं । लच्छी चिरमुवभुत्ता तस्सवि हरिवम्मदेवस्स ॥ १ ॥

सुणिऊण असवणिज्जं विणाससंसूयगं तहावयणं । किं अज्जवि निलज्जं जीवियमहमुवहिस्सामि ? ॥ २ ॥

इमं च गाहाजुयलमुल्लविऊण पडेण वयणं समोच्छाइऊण ठिओ मोणेणं अमच्चो, अह परमत्थं अवियाणभाणेण पडिहारेण पुट्ठो परियणो—अहो किमेवममच्चो बाहरइ ?, तेहिं भणियं—पडिहार ! अज्ज उज्जाणमएहिं अग्गेहिं अ-
मच्चेण य गयणवाणी निसुणिया जहा देवो पुत्तदोसेण मरिहत्ति, तदायन्नणाणंतरमेव अमच्चो अप्पणो विणासंकुण-
माणो महया किलेसेण निसिद्धो मरणब्भुवगमेण य अज्जवि भोयणं न कुणइत्ति, इमं च सोच्चा पडिहारेण भणियं—
अहो ! अकित्तिमा पडुभत्ती, अहो ! असरिसं कयशुत्तणं, अहो ! ससरीरनिरवेक्खयत्ति, धुवं धन्नो एस हरिवम्मराया

श्रीगुणचंद
महावीरच०
८ प्रस्तावः
॥ २९६ ॥

जस्स एवंविहो अमच्चोत्ति वणिणऊण सो गओ नरिंदसमीवं, कहिओ य एगंते सव्वो तवुत्तंतो, इमं च आयन्निऊण अच्चंतवल्लहयाए नियजीवियस्स उदयाओ पुव्वकयदुच्चरियाणं संखुद्धो नराहिवो, वाहराविओ अमच्चो, पुच्छिओ सव्वं जहावट्ठियवइयरं, कहिओ य अणेण, तओ राइणा भणियं-अमच्च ! किमियार्णि कालोचियं?, अमच्चेण कहियं-देव ! तुम्हे च्चिय जाणह जमेत्थ उचियं, अहं पुण सयमेव सुणिऊण देवस्स भाविणिं विसमावत्थं न सव्वहा जीवियमुव्वहिस्सामि, जओ तुम्ह पायाण विरहे का अम्ह सोहा ? का वा पडुभत्ती ? किं वा सकज्जसाइणं ? ता अणुमन्नउ देवो, न एत्थ अन्नं वोत्तुं जुज्जह अम्हाणंति, राइणा भणियं-अलं मरणेण, समायरसुज्जमिह जुत्तं, अमच्चेण कहियं-देव ! संकडमिमं, के तुम्हे ? को वा तुम्ह पुत्तो ?, अओ न किंपि काउं पारियइ, राइणा भणियं-जो देवीहिं विणासकारित्ति सिद्धो सो पुत्तोऽपि परमत्थओ सत्तू चेव, ता ममाएसेण तयणुरूवं करेज्जासु, अमच्चेण भणियं-देव ! एवंविहदुट्ठाण सासणे दंडवासियाण चेव अहिगारो, ता पसीयउ देवो तेसिमेव आएसदाणेणं, तओ निरुविओ राइणा कुमारविणासणत्थं दंडवासिओ, विणासिओ तेण, पहिट्ठो अमच्चो, कया भोयणाइया सरीरचेट्ठा, चित्तियं च तेण-निहओ एस एगो कंटयो, इयार्णि राया विणासणिज्जोत्ति ।

अह तंमि सुए वहिए नायरलोएण जंपियं एवं । हा हा अहो अकज्जं नरवइणा नूणमायरियं ॥ १ ॥
जं रज्जभरसमतथो पुत्तो अविभाविऊण परमत्थं । कुस्सुयनिसामणुग्गयभयवसओ मारिओ सहसा ॥ २ ॥

प्रथमेऽणु-
व्रते हरि-
वर्मकथा.

॥ २९६ ॥

अच्छउ परेण कहिए तहाविहे दुन्निमित्तपमुहत्थे । सयमवि दिट्ठे कुसला जुत्ताजुत्तं वियारिंति ॥ ३ ॥ अन्नं च-
गहपीडामारीदुन्निमित्तदुस्सुमिणपमुहदोसगणा । देवाण पूयणाईहिं नूण सिग्घं उवसमंति ॥ ४ ॥
ता दढमणुचियमेयं कयं नरिंदेण धम्मपहवज्जं । गरुणाणं गरुउच्चिय उप्पज्जइ अहव सम्मोहो ॥ ५ ॥

इमं च सुयं कन्नपरंपराए राइणा, तओ पाउन्भूया अरई, उप्पन्नो पच्छायावो, पव्हिओ महासोगो, चत्ता रज्ज-
चिंता, इमं च परिभाविउं पवत्तो-अहो महापावोऽहं जेण मए एवंविहमकज्जमायरंतेण न गणिओ धम्मो, नावे-
क्खिओ अजसो, न अंगीकयं पोरुसं, नावलंबिया खंती, ता किमियाणि परिचयामि रज्जं?, पविसामि जलणं? पव-
ज्जामि वा वणवासं?, केण वा कएण इमाओ पावाओ मोक्खो होदित्ति चित्तमाणस्स राइणो पडिहारेण गंतूण
विन्नत्तं-देव! दुवारे नंदणुज्जाणपालगा समागया, ते य देवदंसणमभिलसंति, राइणा भणियं-लहु पवेसेह, एवं च
भणिए पवेसिया तेण, ते य निवडिया चलणेसु, विन्नविउमारद्धा-देव! तुम्ह उज्जाणे भयवं अरिट्ठनेमी समोसढो,
ता वद्धाविज्जइ तुम्हे तयागमणेणंति, इमं च सोच्चा चित्तियं राइणा-होउ ताव सोगेणं, तं च भयवंतं केवलालो-
यमुणियतिलोयवावारं जहावित्तं पुत्तविणासहेउं दुन्निमित्तमापुच्छिऊण उच्चियं करिस्सामित्ति विभाविऊण पयट्ठो
जिणाभिमुहं! इओ य सो अमच्चो मुणियसव्वन्नुसमागमो पयडीभविस्सइ संपयं मज्झ कवडविलसियंति नियदुच्च-
रियसंकाए जच्चतुरंगममारुहिऊण जीवियभएण पलाणो वेगेण । रायावि गओ भयवओ समीवं, तओ चित्तम्भंतरुल-

श्रीगुणचंद
महावीरच०
८ प्रस्तावः

॥ २९७ ॥

संतहरिसपसरो बहलरोमंचंचियसरीरो भयवंतं तिपयाहिणापुष्पगं पणमिऊण थुणिउमारद्धो । कहंचिय?—

जय नवतमालदलसामदेह, तुहु निम्मलगुणरयणोहगेह ।

अइदुज्जयनिजियकुसुमवाण !, जिण भवियहं दंसियसिद्धिद्वान् ॥ १ ॥

उत्तुंगपओहरहरिणनयणनवजोवणपवणचंदवयण ।

पइ उग्गसेणसुय जेण चत्ता, तसु एक्कह तुह पर जयइ वत्त ॥ २ ॥

ओहामियसिंधुसमत्तरयणि, अवयरिए नाह ! जायवह भवणि ।

चिंतामणिमि.पइं समुद्विजओ, सच्चं चिय जाओ समुद्विजओ ॥ ३ ॥

आपूरियनिम्भरसंखघोस-संखोहियजयजण गयदोस ।

भुयपरिहंदोलियलच्छिरमण !, सवायरेण सुरपणयचलण ! ॥ ४ ॥

तइलोकभवणनिम्मलपईव !, परमायररक्खियसयलजीव ! ।

भवि भवि जिणिंद ! तुहुं रिद्धिनेमि !, अम्हारिस लीयह होज्ज सामि ॥ ५ ॥

एय एवं थोऊणं पराए भत्तीए जयगुरुं नेमिं । हरिसियमणो नरिंदो तयणु निविद्धो महीवट्ठे ॥ ६ ॥

भयवयावि पयट्ठिया धम्मकहा, पडिबुद्धा बहवे पाणिणो, गहियनियनियसामत्थाणुरुवाभिग्गहविसेसा गया य

प्रथमेऽणु-
व्रते हरि-
वर्मकथा-

॥ २९७ ॥

जहागयं । अहं अघसरं मुणिकुण पुच्छियं राइणा-भयवं ! पुरा अमच्चेण जं अम्ह कहियं तं सच्चमलियं वा ? , भयवया भणियं-अलियं, राइणा भणियं-भयवं ! किमेवंविहं तेणाकज्जमायरियं ? , भयवया जंपियं-भो महाराय ! भोगत्थिणो रज्जत्थिणो परिवारत्थिणो पाणिणो किं किं पावं न करेति ? किं वा मायामोसं न पयडेति ? अहवा को तस्स दोसो ? , पुव्वकयकम्माण चेव विलसियमिमं, सो पुण निमित्तमेत्तं चेव वराणो, राइणा जंपियं-भयवं ! किं मए पुव्वभवे एवंविहं पावमायरियं जस्स अणुभावेण अच्चंतवल्लहस्स सुयस्स सहसच्चिय विणासं पडिवन्नो ? ,

ताहे जह पुव्वभवे महिलादोसेण दोसपरिहीणं । मित्तं विणासिकुणं समज्जियं पावमइगरुयं ॥ १ ॥

जह नारयतिरियभवेसु भूरिसो पाविकुण जरमरणे । कह कहवि माणुसत्ते लद्धे विहिण्ण य वालतवे ॥ २ ॥

इह संपत्ते रज्जे जह मित्तविणासकम्मदोसेणं । जाओ पुत्तविणासो तह सव्वं भयवया कहियं ॥ ३ ॥

इमं च सोच्चा जायगाढभवभओ हरिवम्मराया भणिउं पवत्तो-भयवं जइ पाणाइवायस्स एवंविहो असुहो सहावो ता पज्जत्तं मम रज्जेण, गिण्हामि तुह समीवे पव्वज्जं जाव अभिसिंचेमि कमवि अत्तणो पयंमिति वागरिकुण गओ नयरिं, निवेसिओ निययरज्जंमि भाइणेओ, सो य अमच्चो नाओ जहा पलाणोत्ति । तओ मोत्तूण य रायसिरिं हरिवम्मनराहिवो अणगारियं पडिवन्नोत्ति ॥

इय भो गोयम ! एसो पाणिवहाविरइमंतजंतूणं । पाउब्भवइ महंतो अणत्थसत्थो जओ तम्हा ॥ १ ॥

श्रीगुणचंद
महावीरच०
८ प्रस्तावः

॥ २९८ ॥

सवपयत्तेणं चिय संकप्पियपाणिघायवेरमणं । सग्गापवग्गसोक्खाइं कंखमाणेहिं कायव्वं ॥ २ ॥ इह पढममणुव्वयं ।
अह अलियवयणविरईसरूवमेयं अणुव्वयं नीयं । भणिमो तं पुण अलियं दुविहं थूलं च सुहुमं च ॥ १ ॥
थूलं पंचवियप्पं कन्नागोभूमिनासहरणेसु । कूडगसक्खेज्जंमि य एसो इह नियमविसओत्ति ॥ २ ॥
कन्नागहणं दुपयाण सूयगं चउपयाण गोगहणं । अपयाणं दघाणं सव्वेसिं भूमिवयणं तु ॥ ३ ॥
इयरदुयग्गहणं पुण पाहन्ननिदंसणद्वया भणियं । सुहुमं तु अलियवयणं परिहासाईसु नेयव्वं ॥ ४ ॥
थूलमुसावेरमणे एयंमि अणुव्वए पवत्तंमि । अइयारा पंच इमे परिहरणिज्जा सुसहेणं ॥ ५ ॥
सहसा अम्भक्खाणं रहसा य सदारमंतभेओ य । मोसोवएसणं कूडलेहकरणं च निचंवि ॥ ६ ॥
एयस्स पालणाऽपालणासु पयडा गुणा य दोसा य । दीसंति समक्खं चिय दिट्ठंतो भायरो दोन्नि ॥ ७ ॥
ते य भायरो गोयम ! निसामेसु, एत्थेव भारहे वासे वडवहनयरे पभाकरो नाम राया, सव्वत्थ विक्खायजसो
दुवालसविहसावयधम्मपरिपालणपरायणो जइजणपज्जुवासणवद्धलक्खो परोवयारकरणाइगुणसहस्ससमलंकिओ
सच्चो नाम सेट्ठी, तस्स य इहलोयमित्तपडिबद्धो धम्माणुट्ठाणविरदिओ कणिट्ठो बलदेवो नाम भाया, सो य जाण-
वत्तेण परविसएसु गच्छइ, अन्नया य बहुलाभो हवइत्ति निसामिऊण गओ चोडविसए, चोडरायावि सच्चसेट्ठिणो
गुणनिव्वहं जणेण वन्निज्जमाणं सुणिऊणं तहंसणाणुरागरत्तो तन्भाउयं बलदेवं भणइ-सव्वहा मम दंसणत्थं सच्चसेट्ठिं

द्वितीयेऽणु-
व्रते सत्य-
श्रेष्ठिकथा.

॥ २९८ ॥

आणेज्जासित्ति, एवं च नरिंदायरं पेच्छिऊण पडिमुयमणेण, कालक्रमेण नियमंदिरमुवागओ सच्चस्स परिकहेइ, अ-
 न्नया य चवलत्तणओ लच्छीए उदयत्तणओ अंतराइयकम्मस्स अप्पदविणो जाओ सच्चसेट्ठी, तओ तेण चोडविसयग-
 मणाय पुट्ठो पभाकरनरिंदो, अणुन्नाओ य तेण, तयणंतरं च उचियाइं महत्थाइं महग्घाइं विविहभंडाइं गहिऊण
 भाउणा समं गओ चोडविसयं सच्चसेट्ठी, तदागमणं च निसामिऊण तुट्ठो चोडराया, दवावियं निवासमंदिरं, पूइओ
 उचियपडिवत्तीए अत्तणो य समीवंमि धरिओ कइवयवासराइं, अह विणिवट्ठिए भंडे गहिए सदेसपाउग्गे पडिभंडे
 चोडविसयाहिवइमणुजाणाविऊण समारूढो नावाए सच्चसेट्ठी,

अणुकूलपवणपेल्लियमहल्लघयवडविवट्ठियावेगा । गंतुं जवा पयट्ठा नियपुरहुत्तं तओ नावा ॥ १ ॥
 तहियं आरूढा ते जाव पलोयंति कोउहल्लेण । अनिलुल्लंतकल्लोलभीसणं जलहिपेरंतं ॥ २ ॥
 ताव नियतुंगिमाविहियविंझगिरिविन्धमो लहुं दिट्ठो । सलिलोवरिं वहंतो अतुच्छदेहो महामच्छो ॥ ३ ॥
 तं दट्ठुं बलदेवेण जंपियं एस पवओ एत्थ । इंताणं नासि जओ ता तुम्हे मग्गपम्भट्ठा ॥ ४ ॥
 निज्जामगेहिं भणियं न पवओ एस किंतु मच्छोत्ति । सो चेव अयं मग्गो वामोहं कुणह मा सामि । ॥ ५ ॥
 बलदेवेण भणियं-अहं पुण इहं चेव विविहभंडपडिहत्थं जाणवत्तं हारेमि जइ मच्छो होज्जा, एवं च उभय-
 पक्खेहिवि सच्चसेट्ठिं सक्खि काऊण विहिया होइ, ते य निज्जामगा पडिवेडएण गंतुण मच्छयपिट्ठिमि परिकख-

श्रीगुणचंद
महावीरच०
८ प्रस्तावः
॥ २९९ ॥

णत्थं तणपूलयपडलं पज्जालिउमारद्धा, सो य मच्छो तेण परितत्तसरीरो झडत्ति निबुद्धो अच्छाहे जले, एवं हारियं जाणवत्तं बलदेवेण, परितुट्ठा निज्जामगा, पत्ता य कमेण नियनगरं, तओ तेहिं पडिरुद्धं जाणवत्तं, समुत्तारिऊण तीरे मुको बलदेवो, पारद्धो अणेण झगडओ निज्जामगेहिं समं, जहा असच्चा इमे मच्छहारिणो चिलाया मए विजियत्ति काऊण आडंवरमुवदंसंत्तित्ति भणिऊण बला चेव भंडमुत्तारिउमारद्धो, निज्जामगेहिं वाहिया नरवइणो आणा, न ठाइ बलदेवो, तओ रायाणं उवट्टिया दोवि पक्खा, तेसिं च परोप्परं विवदंताणं परमत्थमवियाणिऊण भणियं रत्ता-अरे ! एत्थ ववहारे को सक्खी?, निज्जामगेहिं भणियं-देव ! अत्थि चेव सक्खी, परं नियसहोयरमुवेक्खिऊण किं अम्हाणं सक्खित्तणं करिस्सइ?, राइणा भणियं-को पुण सो?, तेहिं भणियं-सच्चसेट्ठी, एवं वुत्ते एगंते ठाऊण पुच्छिओ सो रत्ता कज्जपरमत्थं,

ताहे स सच्चसेट्ठी परिभावइ किं करेमि एव ठिए? । जइ अवितहं न जंपेमि होइ ता मे वयकलंको ॥ १ ॥
जइ पुण जहेव वित्तं तहेव साहेमि ता लहू भाया । पावइ अणत्थमत्थो जाई हीरइ पसिद्धीवि ॥ २ ॥
ता दोन्निवि गरुयाइं आवडियाइं इमाइं कज्जाइं । एकंपि परिच्चइउं न तरामि करेमि किं इणिं ॥ ३ ॥
अहवा इहलोयकए कहं च चिरकालपालियं नियमं । गुरुमूले पडिवत्तं जाणंतोऽहं विराहेमि ? ॥ ४ ॥
किं एत्तो अइपावं जं जाणंतावि भवअसारत्तं । पडिसिद्धेसुवि अत्येसु मोहओ संपयट्ठंति ॥ ५ ॥

द्वितीयेऽणु-
व्रते सत्य-
श्रेष्ठिकथा.

॥ २९९ ॥

किं बहुणा ?—जइ पडइ सिरे वज्जं सयणोऽवि परंमुहो हवइ लच्छी । वच्चइ तहावि अलियं कहमवि नाहं वइस्सामि ॥ ६ ॥

इति निच्छयं काऊण भणिओ सो सेट्ठिणा नराहिवो—जं इमे वरागा निज्जामगा जंपंति तं सच्चं, मम भाया पुण अलियवाइत्ति, इमं च सोच्चा तुट्ठो राया चिंतिउं पयट्ठो-अहो अज्जवि एरिसा सच्चवाइणो दीमंति जे नियसहोयर-सिरीविणासेवि नियमज्जायं न चयंति, ता मंडिज्जइ एवंविहेहिं कलिकालेऽवि भूमिमंडलंति परिभाविऊण आहूया निज्जामगा, सरोसं तज्जिया य, जहा-रे दुरायारा ! जइ कहवि अमुणियपरमत्थेणं मम वणिएण तहाविहं जंपियं ता किं वयणछलमेत्तेणवि अणेगभंडभरियबोहित्थं घेतुं उवट्ठिया ?, एवमाईहिं वयणेहिं निम्भच्छिऊण किंचि दाऊण निद्धाडिया, दवसारंपि समप्पियं सच्चसेट्ठिस्स, बलदेवोऽवि भणिओ—मा पुण एवं करेज्जासु,

इय अलियवयणपरिहारकारिणो इह भवेऽवि जणपुज्जा । हुंति नरा परलोए लीलाए जंति निव्वाणं ॥ १ ॥ इइ बीयमणुवयं २
भणियं बीयमणुवयमेत्तो तइयं अदत्तदाणवयं । साहिज्जइ सयलाणत्थसत्थनित्थारणसमत्थं ॥ २ ॥
तं पुण दुविहमदत्तं थूलं सुहुमं च तत्थ सुहुममिणं । तरुछायाठाणाई अणणुन्नायं भयंतस्स ॥ ३ ॥
अइसंकिलेसपभवं जं निवदंडारिहं च तं थूलं । सच्चित्ताइतिभेयं थूले गिहिणो हवइ नियमो ॥ ४ ॥
एत्थ उ अप्पडिवन्ने जे दोसा ते जणेऽवि सुपसिद्धा । वहवंधतरुलंबणसिरच्छेयाई चोराणं ॥ ५ ॥
पडिवन्नेऽविहु एत्थं भवभयभीरुत्तणं परिवहंतो । सुस्सहो अइयारे पंच इमे वज्जइ सयावि ॥ ६ ॥

श्रीगुणचंद
महावीरच०
८ प्रस्तावः
॥ ३०० ॥

चोरोवणीयगहणं तक्करजोगं विरुद्धरज्जगमं । कूडतुलकूडमाणं तप्पडिरुवं च ववहारं ॥ ७ ॥
चोरिकाउ विरत्ता कहंपि चोरेहिं संपउत्तावि । वसुदत्तोव न पावंति आवइं सुइसमायांरा ॥ ८ ॥
गोयमसामिणा भणियं—भयवं ! को एस वसुदत्तो ? , जयगुरुणा कहियं—अवक्खित्तचित्तो निसामेसु, वसंतपुरे
नयरे वसुदेवो नाम इच्चो, तस्स य वसुमिक्का नाम भारिया, तीसे य अवचं न होइ, तओ सा चित्तेइ-जइ अवच्चस्स
कारणे एस मम भत्ता अन्नं परिणिस्सइ ता अहं गेहस्स असामिणी, अहं अच्चंतनिम्भराणुरागरंजियमणो अन्नं न
परिणेइ, तत्थ य मरणपज्जवसाणयाए एयस्स नरवरदाइदाईहिं हीरंते गेहसारे सविसेसं असामिणी चेव, अओ जइ
कहवि मम पुत्तो हवइ ता सोहणं संपज्जइ, इमेण य अभिप्पाएणं सा अणवरयं देवयाणं उववाइयसयाणि पयच्छइ
मंतंतवाइजणं चापुच्छइ । इओ य सोहम्मे कप्पे अरुणाभविमाणे महिहिओ विज्जुप्पभो नाम देवो, सो य पद्दा-
सन्नचवणसमयत्तणेण अत्तणो पयइविवज्जासं पेच्छिऊण वक्खित्तचित्तो भयसंभंतो परिचित्तेइ—

कह रयणनियरउग्गाढपीढियादढनिबद्धमूलोऽवि । निच्चावट्टियरुवोवि कप्परुक्खो पकंपेइ ? ॥ १ ॥
सुंदरमंदारतरुप्पसूयमालाऽमिलाणपुष्पावि । कारणविरहेऽवि कहं पमिलायइ संपयं सहसा ? ॥ २ ॥
कह जच्चकंचणुडामरोऽवि देहस्स कंतिपन्भारो । ताविच्छगुच्छसंछाइयव मालिन्नमुच्चइ ॥ ३ ॥
कह वा मुयंगनिम्मोयनिम्मलाइंपि देवइसाइं । कज्जलजलघोयाणिव अइकसिगाइं विभार्विति ? ॥ ४ ॥

दृतीयेऽणु-
व्रते वसु-
दत्तकथा.

॥ ३०० ॥

कह वा मम नयणजुयं सभावओ चिय निमेसपरिहीणं । देवत्तविरुद्धेवि हु निमीलणुम्मीलणे कुणइ ? ॥ ५ ॥
 कह अंतरंतरा पेच्छणाइयक्खित्तचित्तमवि पावा । लद्धावसरच्चिय वेरिणिव विहवइ मं निहं ? ॥ ६ ॥
 अच्चंतपेमपरवसचित्तोऽवि हु परियणो कहमियाणिं । कइवयदिणदिट्ठो इव न वयणमभिनंदए मज्झ ? ॥ ७ ॥
 ता सबहा न कुसलं तक्केमि अहं सजीवियवस्स । कल्लाणकारिणो जेण होंति न कयाइ उप्पाया ॥ ८ ॥
 इय एवंविहचिंतासंताणुप्पन्नतिवपरितावो । कप्पहुमोव वणदवपलीविओ भाइ सो तियसो ॥ ९ ॥

एवं जाव सोगपमिलाणणो सिंघासणगओ अच्छइ ताव तस्स चेव पियमित्तो कणगप्पभो नाम देवो समागओ तं पएसं, तं च तहट्ठियं दट्ठूण चिंतियमणेण—कहं अज्ज पियमित्तो सुण्णचित्तलक्खोव लक्खीयइ ?, जओ अन्नवेलासु दूराओ चिय मं आगच्छमाणं पलोइऊण सायरं सप्पणयं पढमालावासणप्पणामाइणा अभिणंदन्तो, संपयं पुण समीवमुवगयंपि न पच्चभिजाणइ, ता नूणं कारणेण होयवन्ति विभाविऊण भणिओ अणेण—भो विज्जुप्पभ ! किं चिंतिज्जइ ?, उट्ठमवलोइऊण जंपियं विज्जुप्पभेण—भो वरमित्त ! कणगप्पभ इओ एहि, इमं च आसणमलंकारेहिस्सि वुत्ते उवविट्ठो एसो, पुच्छिओ य अणेण वेमणस्सयाकारणं, कहिओ य विज्जुप्पभेण स निययवुत्तंतो, तओ कणगप्पभेण भणियं—पियमित्त ! सबहा न सुंदरमेयं, ता एहि तित्थगरस्स पुच्छामो, कहिं एत्तो तुह चुयस्स उप्पत्ती भविस्सइत्ति, विज्जुप्पभेण भणियं—एवं होउ, तओ गया विदेहखेत्ते, वंदिओ तित्थगरो, सविणयं पुच्छिओ य, जइहा—भयवं !

श्रीगुणचंद
महावीरच०
८ प्रस्तावः

॥ ३०१ ॥

कथ अहं उववज्जिस्सामि?, भयवया भणियं-वसंतपुरे नयरे वसुदेवस्स वणिणो वसुमिच्चाए भारियाए गम्भंमि पुत्तो तुमे पाउब्भविस्ससि, एवं च निसामिऊण जहागयं पडिनियत्तो विज्जुप्पभो, अन्नंमि य दिवसे सिद्धपुत्तरूवं विउ-विऊण अवयरिओ वसुदेवगिहे, साइसओत्ति कलिऊण अब्भुट्ठिओ वसुमिच्चाए, पुट्ठो य-भो महाभाग ! जाणासि तुमं मम पुत्तो भविस्सइ न वत्ति?, देवेण भणियं-जइ तं पच्चयंतं न वारेसि अहं तहा करेमि जहा ते पुत्तो होइत्ति, पडिस्सुयमणाए, अह कवडेण मंडलग्गपूयापुरस्सरं महया वित्थरेण देवयापूयं काऊण देवो भणइ-भहे ! अमुगंमि दियहे विसिट्ठसुमिणसूइओ पुत्तो ते गम्भे आयाही, तीए भणियं-तुम्ह पसाएण एवं होउ, देवो अहंसणमुवगओ, अवरंमि य वासरे सो चविऊण उप्पण्णो तीसे गम्भे, जाओ कालक्कमेण, कयं वद्धावणयं, पइट्ठियं से वसुदत्तोत्ति नामं, उचियसमए य गाहिओ कलाकोसल्लं, नीओ य एगया साहूण समीवे, कहिओ य तेहिं दुवालसवयसणाहो सावगधम्मो, पुव्वभवजिणवयणाणुरागरत्तत्तणेण य परिणओ एयस्स, तओ पडिवण्णो भावसारं तेण, गहियाणि य दुवालसवि वयाइं, परिपालेइ य निरइयाराइं, अन्नया य सविसेसजायधम्मवासणाविसेसेण तेण पुब्बिया साहुणो मुणिधम्मं, कहिओ य तेहिं । कहां चिय ?—

पंच उ महवयाइं गुत्तीओ तिन्नि पंच समिईओ । सीलंगसहस्साइं अट्टारस निरइयाराइं ॥ १ ॥

सुहतण्हापमुह परीसहा य बावीस बाढदुविसहा । विणओ य चउब्भेओ अणिययवासो य मुत्ती य ॥ २ ॥

तृतीयेऽनु-
व्रते वसु-
दत्तकथा.

॥ ३०१ ॥

पिंडविसुद्धी सुत्तत्थचित्तणं गुरुकुले सया वासो । अणवरयं तवचरणंभि उज्जमो कोहचाओ य ॥ ३ ॥
 गामकुलाइसु पडिवंधवज्जणं उत्तरोत्तरगुणेषु । अम्भुज्जमो य निच्चं वाढं संसारनिवेओ ॥ ४ ॥
 जहठियजिणमग्गपरुवणा य सत्तेसु करुणभावो य । करणाण निग्गहो तह सतत्तपरिभावणं निच्चं ॥ ५ ॥
 इय आजम्मं सुंदर ! सुणिउं धम्मस्स (मुणिधम्मसमग्ग)साहणविहाणं । अच्चंतमपमत्तेहिं कीरमाणं सिचं देइ ॥ ६ ॥
 एवं मुणीहिं कहिए संवड्ढियगाढधम्मपरिणामो । वसुदत्तो भणइ लहुं भयवं ! मह देह पव्वज्जं ॥ ७ ॥
 ताहे मुणीहिं भणियं जणणीजणगाणणुण्णवणपुवं । पव्वज्जापडिवत्ती जुज्जइ नेवऽण्णहा काउं ॥ ८ ॥
 ता सकुडुवं मोयाविऊण दिक्खं पव्वज्जसु जवेण । सण्णाणफलमिभं चिय जं चाओ सबसंगस्स ॥ ९ ॥
 एवं मुणीहिं वागरिए गओ सो अम्मापिऊण सगासे, कहिओ नियचित्तपरिणामो, तेहिं भणियं—पुत्त ! भुत्तभोगो
 पव्वज्जं गिण्हेज्जासि, अणुवयाइणा सावगधम्मेण ताव अत्ताणं परिकम्मेसु, तओ सो तेसिं अप्पत्तिवपरिहरणट्ठया
 साहण समीवे पढंतो गिहत्थवित्तीए चेव अच्छइ, पव्वज्जागहणनिच्छएण जोवणत्थोऽवि नेच्छइ परिणेतं, तं च
 तहाविहं पेच्छिऊण जणणीए भणिओ वसुदेवो—एस पुत्तो तवस्सिजणसंसग्गीए वासियहियओ नावेक्खइ विसयपडि-
 वत्तिं न मन्नइ दारपरिग्गहं नायरइ सरीरालंकरणं, ता गज्जत्तं धम्मियसेवाए, सबहा खिवसु एयं दुल्ललियगोटीए,
 जइ पुण तहाविहसंसग्गीए भावपरावत्ती जायइत्ति, पडिस्सुयमेयं सेट्ठिणा, तओ जे वाणियगा पुत्ता समानजाइ-

श्रीगुणचंद
महावीरच०
८ प्रस्तावः
॥ ३०२ ॥

वयविभवा ताण मज्झे मेलिओ एसो, ते य अच्चंतविसयगिद्धा दविणकखयं कुणंता पियरेहिं सिक्खविज्जंतावि दुहं-
तिंदियत्तणेण न तरंति नियत्तिउं, सगेहेसु य धणमलभमाणा चोरियं करेंति । अन्नया य मुसणनिमित्तेण पलोइयं
तेहिं बहुधणधणसमिद्धं समिद्धजन्नजत्तागयतन्निवासिजणसमूहं विमुक्केकथेरीरक्खणं महेसरदत्तस्स मंदिरं, तओ
विजणंति काऊण पयट्ठा रयणीए तं मुसिउं, सो य वसुदत्तो पुक्खरपत्तंपिव पंकत्तकलंकेण सुसाहुव कुसीलसंसग्गेण
न मणागंपि छिन्नो तेसिं कुसमायारेण, केवलं जणणिजणयाणुवित्तिमवलंबंतो रज्जुवद्धोव वसहो अमुणियपरमत्थो
चेव पट्ठिओ तेसिमणुमग्गेण, ते य सणियं सणियं तस्स महेसरदत्तस्स गिहे पविसमाणा वसुदत्तेण पुच्छिया-भो
किमेत्थ तुम्हे पविसह?, तेहिं भणियं-भद! चोरियाए एत्थ पविसिस्सामो, सुसमाहियचरणवयणवाचारो तुमं
एज्जाहि, तेण भणियं-नाहमिहमागमिस्सामि कुणह जं भे रोयइ, इइ भणिऊण ठिओ सो बाहिं चेव, ते पविट्ठा
भवणभंतरे, मुणिया य थेरीए, तओ सा पायवडणच्छलेण ते मुसंते मा पुत्ता! एवं करेहिति भणंती मोरपि-
च्छतेण चलणेसु लंछेइ ।

वसुदत्तो पुण चिंतइ पेच्छह अम्मापिऊण मूढत्तं । जं एवंविहदुस्सीलमज्झयारे खिवंतेहिं ॥ १ ॥
नो तेहिं चिंतियमिमं जह पावजणस्स संगइवसेण । जायइ गुणपरिहाणी पडंति विविहावयाओवि ॥ २ ॥
सयमवि पावपओयणपसाहणभुज्जओ इमो जीवो । किं पुण कुमित्तसंजोगसंभवतासुहसहावो ॥ ३ ॥

तृतीयेऽणु-
व्रते वसु-
दत्तकथा.

॥ ३०२ ॥

ता परिचएमि एए वचामि समंदिरंमि एत्ताहे । दुन्नयपरनरजोगे मरणंपि हु आवडइ जेणं ॥ ४ ॥

अहवा गुरुवयणं लंघिऊण गेहंमि वच्चमाणस्स । संपज्जइ दुव्विणओ तम्हा जं होइ तं होउ ॥ ५ ॥

इति परिभाविंत्तस्स ते सयलं गेहसारं सुसिऊण नीहरिया मंदिराओ, गया उज्जाणे, विविहप्पयारेहिं कीलि-
उमारद्धा, वसुदत्तोऽवि गुरुवयणरज्जुसंदाणिओ अचंतविरागमुव्वहंतो तेसिमेव समीवे चिट्ठइ, एत्थंतरे समुग्गयं मायं-
डमंडलं, विहडियं तमकंडं, सा य थेरी पाहुडं गहाय गया नरवइसमीवे, कहिओ सयलो जहावित्तो रयणिवइयरो,
राइणा भणियं-अचंतगंभीरयाए नयरस्स को वा कहिं वा नज्जिही?, तीए भणियं-देव! ते मए सव्वेऽवि मऊर-
पिच्छेण पाएसु अंकिया अच्छंतित्ति बुत्ते राइणा आणत्ता सव्वत्थ पुरिसा, सुनिऊणं गवेसंतेहि य तेहिं उज्जाणसं-
ठिया दिट्ठा ते सव्वेऽवि, उवलक्खिया इंगियागारेहिं, उवणीया य नरादिवस्स, तेणावि वाहराविया थेरी, तीएवि वसु-
दत्तं विमोत्तूण अन्ने परिकहिया चोरत्तणेणंति, रत्ता भणियं-कहमेसो चोरमंडलीमज्झगओऽवि न चोरो, थेरी भणइ-
न चलणेसु लंछिओत्ति, राइणा भणियं-जइ अदुट्ठो ता मुयह एयं, वसुदत्तो भणइ-देव! कहमहं दुट्ठसंसग्गीएवि
न दुट्ठो जं ममावि न कुणह निग्गहं, रत्ता कहियं-भइ! जइ एयंपि जाणसि ता कीस दुट्ठसंसर्गिं मूलाओ चिय
न उज्जेसि?, तेण भणियं-देव! दिवं पुच्छइ, एत्थंतरे मुणियजहावट्ठियतवइयरेण भणियमेगेण पुरिसेण-देव!
एस पवज्जं पडिवज्जिउकामो भावपरावत्तिनिमित्तं अम्मापियरेहिं सिणेहाणुबंधकायरेहिं संपयं चेय दुल्ललियगोटीए

श्रीगुणचंद
महावीरच०
८ प्रस्तावः

॥ ३०३ ॥

पक्खित्तो, ता तदणुरोहो चेव एयस्स अवरज्झइ, एवं निसामिऊण नराहिवेण तंबोलाइदाणेण सम्माणिऊण पेसिओ सगिहं, इयरे पुण दुक्खमारेण मारियत्ति ।

इओ य मुणिसमुच्चियविहारेण भवियपडिबोहमायरंता अप्पडिवद्धावि जिणाणाए पडिवद्धा दुरणुचरतवचरण-पज्जालियकम्मवणावि सबसत्तसुहकारया समोसठा विजयसिंहाभिहाणा सूरिणो, जाया य तियचउक्कचचरेसु हरि-सभरनिम्भरस्स जणस्स अवरोप्परमुल्लावा अहो ! अहो ! अगाहभवोहनिवडंतजन्तुगणजाणवत्ता सिवसुहपसाहणासत्ता भयवंतो सुग्गहियनामधेज्जा सूरिणो इह समोसरिया, तहाविहाणं नामसवणमेत्तंपि पावपम्भारपणासणसमत्थं, किं पुण वंदणनमंसणं?, अओ गच्छामो देवाणुप्पिया ! तेसिं वंदणत्थं, एवं च सोच्चा गंतुं पयत्ता सूरिसमीवे नायरया । सो य वसुदत्तो राइणा पेसिओ समाणो गओ निययगेहे, कहिओ जणणिजणगाण पुव्वइयरो जहा तुम्ह कूडवच्छलेण अहं अज्ज अकयधम्मो चेव विणासिओ होंतो, ता कीस सिणेहवच्छलेण अणत्थपत्थारीए संखिवह जं न मुयह धम्मकरणायत्ति वुत्ते अणुन्नाओ सो जणणिजणगेहिं, गओ सूरिणो पासे, गहिया पवज्जा, तओ एगं-तधम्मकम्मुज्जओ जाओत्ति ।

इय इंदभूह गोयम ! विमुक्कचोरिक्कपावठाणाणं । मणुयाण उभयलोगेऽवि जीवियं जायए सफलं ॥ १ ॥ इइ तईयमणुवयं । कहियं तइयमणुवयमेत्तो मेहुणनिवित्तिनिप्फणं । भण्णइ चउत्थमणुवयमवहियचित्तो निसामेसु ॥ १ ॥

तृतीयेऽणु-
व्रते वसु-
दत्तकथा.

॥ ३०३ ॥

तं मेहुन्नं दुविहं सुहुमं थूलं च तत्थ सुहुममिमं । कामोदएण ईसिं जमिंदियाणं विगारोत्ति ॥ २ ॥
 थूलं पुण संभोगो मणाइचेट्ठा व भोगकामस्स । तं पुण दुविहं नेयं ओरालविउवभेएणं ॥ ३ ॥
 ओरालियं तु दुविहं माणुसतेरिच्छभेयओ होइ । वेउव्वं पुण दिव्वं माणुसयंपि य वयं तिविहं ॥ ४ ॥
 परदारवज्जणं वा सदारतोसो य वंभचेरं वा । तत्थ य दिव्वतिरिक्खं मेहुन्नं पारदारं च ॥ ५ ॥
 जो परिहरइ सुसद्धो निच्चलचित्तो सुधम्मपडिवद्धो । सो तच्चिरओ एसो निरईयारट्ठया सम्मं ॥ ६ ॥
 वज्जेइ इत्तरियपरिग्गहियागमणं अणंगकीडं च । परवीवाहकरणं कामे तिच्चाभिलासं च ॥ ७ ॥
 किंच-असुइच्चूएसुं निंदिएसु पज्जंतदुहविवागेषु । कामेसु केऽवि धन्ना निसग्गओ चिय विरज्जंति ॥ ८ ॥
 अन्ने पुण उच्चमडमयणवाणनिब्भिज्जमाणसवंगं । अगणियजुत्ताजुत्ता अविभावियनियतणुविणासा ॥ ९ ॥
 परमणीसु परिभोगलालसा मुक्कलज्जमज्जाया । तज्जम्मे चिय पावंति आवयं किं पुणऽन्नभवे ? ॥ १० ॥ जुम्मं ।
 अवरे य तहाविहगुरूवएसओ जायनिम्मलविवेया । परजुवईणं संगं विवज्जमाणा पयत्तेण ॥ ११ ॥
 तच्चिरइमेत्तउच्चिय वड्ढंतविसुद्धधम्मपडिवंधा । होंति सिवनयरनिलया सुरिंददत्तोव नरवसहा ॥ १२ ॥ जुम्मं ।
 गोयमेण जंपियं-तइलोकदिवायर ! को एस सुरिंददत्तो ? कहं वा एयस्स गुरूवएसओ विवेयलाभो ? कहं च पर-
 दारविरइमेत्तेणवि से निच्चाणसंपत्तित्ति ? , जयगुरुणा वागरियं-निसामेसु । इहेव भारहे वासे नीसेसवसुधराभोगभूसणं

श्रीगुणचंद
महावीरच०
८ प्रस्तावः
॥ ३०४ ॥

रणंतमणिकिंकिणीमणहरवेजयंतीविराइयसुरमंदिरसमुत्तुंगसिंगं सिंगारुभडरूवरामागणोवसोहियं विजयपुरं नाम
नयरं, तहिं च समग्ननरिंदवग्गपणयसासणो सिवभदो नाम नराहिवो, सयलंतेउरप्पवरा रायसिरी नाम से भारिया,
तेसिं च देवकुमारोवमरूवो धणुधेयपमुहकलाकोसलपडिहत्यो सुरिंददत्तो नाम पुत्तो, सो य पुवभववालगिलाण-
गुरुथेरतवसुसियमुणिजणवेयावच्चावज्जियपुन्नपभारवसविट्तगाढसोहग्गोदएण पढमुम्मिलंतजोवणगुणत्तणेण य अचं-
ताभिरामसरीरो जत्थ जत्थ परिभमइ तत्थ तत्थ परिचत्तवावारंतराहिं अवगणियगुरुजणलज्जाहिं अणवेक्खियकु-
लाभिमाणाहिं नयरनारीहिं अणमिसच्छीहिं पिच्छिज्जइ, वाढमभत्थिज्जमाणो य सेट्ठिसत्थवाहप्पहाणजणजुवईहिं
सद्धिं सद्धम्मपरम्मुहो अभिरमइ य, लोगोवि एयमत्थं जाणमाणोऽवि जे चेव रक्खगा तेऽवि तुंपगत्ति विं-
तंतो न किंपि जंपइ ।

अन्नया य नयरंमि जाओ अचंतचोरोवद्दवो, तओ पउरजणेण साहियं नरिंदस्स, तेणावि तज्जिओ आरक्खिगो,
कया य सब्बप्पएसेसु जामरक्खगपरिखेवा, रयणीए सुत्तपमत्तारक्खिगनिरिक्खणत्थं कयवेसपरावत्तो पाणिपरिग्ग-
हियक्खिगो एगागी सयमेव निग्गओ गेहाओ तियच्चउक्कचच्चाइसु परिभमिउमारद्धो य, तहा भमंतस्स य रण्णो
विजणंति पढियमेगेण थेरपुरिसेणं—

चोरोहिं गेहसारो, हीरइ कुमरेण नयरतरुणिजणो । एवंविहरक्खाए नरिंद सिवभद ! भदं ते' ॥ १ ॥

चतुर्थानु-
व्रते सुरेन्द्र-
दत्तकथा.

॥ ३०४ ॥

पट्टिद्विओ य राया सोचेमं से गओ समीवंमि । अचंतविस्मियमणो सणियं भणितं पवत्तो य ॥ २ ॥

भो कहसु पढियगाहापरमत्थं तेण जंपियं सुहय ! । रायविरुद्धकहाए तीए किं मज्झ कहियाए ? ॥ ३ ॥

रत्ना वुत्तं सच्चं एवमिमं किं तु एत्थ एगंते । साहिज्जंतीएवि हु न कोऽवि दोसो अओ कहसु ॥ ४ ॥

तो तेण समग्गो नयरतरुणिविसओ कुमारवुत्तंतो । चोरोवद्वसहिओ कहिओ सिवभदनरवइणो ॥ ५ ॥

अह तं निसामिऊणं पलयानलभीमकोवरत्तञ्जो । आबद्धुम्भडभिउडी राया एवं विचित्तेइ ॥ ६ ॥

अहह ! महंतमकज्जं पावेण सुएण मज्झ आयरियं । हरिणंकनिम्मलंपि हु कुलमेवं मइलियं जेण ॥ ७ ॥

ता किं अहुणच्चिय कंधराए धरिऊण तं महापावं । निद्धाडेमि पुराओ ? किं दुव्वयणेहिं तज्जेमि ? ॥ ८ ॥

अहवा मंतीहिं समं सम्मं वीमंसिऊण तस्सुच्चियं । पकरेमि जेण सहसा कयाइं दूमंति कज्जाइं ॥ ९ ॥

इय चित्तिऊण राया गओ निययभवनं, पसुत्तो सुहसेज्जाए, जाए य पभायसमए वाहराविया मंतिणो, सिट्ठो य तेसिं रयणिवुत्तंतो, मंतीहिं भणियं-देव ! अम्हेहिं पुवंपि कुसमायारवत्ता निसामिया आसि, परं न कोऽवि सो अवसरो जाओ जत्थ तुम्ह कहिज्जइ, रत्ना जंपियं-होउ ताव समइकंतत्थविकत्थणेण, संपयं साहेह, किमेयस्स दंडं निवत्तेमो ?, मंतीहिं वागरियं-देव ! अलं दंडेण, एत्तियमेत्तमेव जुत्तं तुम्ह काउं जमेसो निज्जइ सुसाहुसमीवे, सुणाविज्जइ धम्मसत्थाइं, पढाविज्जइ रायनीई, उववेसाविज्जए विसिट्ठगोटीसु, एवमवि होही एयस्स कुसमायार-

श्रीगुणचंद
महावीरच०
८ प्रस्तावः

॥ ३०५ ॥

परिचायपरिणामो, पडिवन्नं रत्ना, बाहराविओ कुमारो, तेण य समेओ गओ धम्मसेणसूरिणो समीवे, तं च वंदिऊण निसन्नो उचियट्ठाणंभि, सूरिणाऽवि पारद्धा धम्मकहा ॥ कहं?—

भो भो देवाणुपिया! जइ वंलह सिवसुहाइं उवलहुं । ता मोत्तूण पमायं जिणिंदधम्मंमि उज्जमह ॥ १ ॥

तं नो कुणंति अहिमरविसहरहरिणारिवेरिवायाला । अचंतं कुवियाविहु जमिह पमाओ महापावो ॥ २ ॥

सो पुण पंचवियप्पो नेयवो निवुईपरिहरूवो । मइरा-कसाय-निहा-विगहा-विसयाण गहणेण ॥ ३ ॥

मइरापाणपरवसमणपसरो जुत्तमियरममुणंतो । तं नत्थि नूण पावं जं जीवो नो समायरइ ॥ ४ ॥

एत्तो चिय सुरकयकणयपवरपागारगोउरावि पुरी । बारवई जायवसंकुलावि मच्चुंमुहं पत्ता ॥ ५ ॥

पज्जंतकयविसाया महापिसाया व दिन्नअववाया । जणियदुरज्जवसाया न होति सुहया कसायावि ॥ ६ ॥

एएहिं निहयमइणो जं जीवा चरियदुकरतवावि । करडुकुरुडुव सत्तमनरयपुढवीए निवडंति ॥ ७ ॥

निहापमत्तचित्तावि पाणिणो पाउणंति न कयावि । सुयनाणधणं पत्तंपि कहिंवि हारिंति धीरहिया ॥ ८ ॥

तेणं चिय चउदसपुब्बिणोऽवि निन्नट्ठपवरसुयरयणा । मरिउं कालमणंतं अणंतकाएसुवि वसंति ॥ ९ ॥

मोत्तूण निययकिच्चं भोयणदेसित्थिरायसंबद्धा । कीरंति जेहिं विकहा कह नो ते दुक्खिया होति? ॥ १० ॥

कहवा न बालिसेणवि अच्चग्गलजंपिरत्ति गहिलत्ति । कित्तिज्जंती? मणुयत्तणेऽवि को वा गुणो तेसिं? ॥ ११ ॥

चतुर्थ्याणु-
व्रते सुरेन्द्र-
दत्तकथा.

॥ ३०५ ॥

सेविज्जन्ता जमणिट्टकारिणो ते धुवं किमच्छरियं । सुमरणमेत्तेणंपिवि दिंति दुरंतं भवं विसया ॥ १२ ॥
 विसयाण कए पुरिसा सुदुक्करंपिवि कुणंति ववसायं । आरोवेंति य संसयतुलाए नियजीवियवंपि ॥ १३ ॥
 चिरकालपालियंपि हु कुलमज्जायं चयंति तवसगा । सव्वत्थ वित्थरंतं अवजसपंसुपि न गणंति ॥ १४ ॥
 वंचंति सयणवग्गं तणं व मन्नंति निययजणगंपि । धम्मोवएसदायगमवहीरंती गुरुजणंपि ॥ १५ ॥
 प्हसंति विरागिजणं विसिट्ठगोट्ठिं चयंति दूरेण । वंचंति नेत्र सोउं सणंकुमाराइचरियाइं ॥ १६ ॥
 इय ते विसयमहाविसवामूढमणा मणागमेत्तंपि । नेवुइमपावमाणा पावेसु बहं पसज्जंति ॥ १७ ॥
 बाहिरवित्तीए तहाविहेसु धम्मेषु संपवत्तावि । पंचग्गिपमुहदुक्करतवसंतावियसरीरावि ॥ १८ ॥
 कम्मवसेणं अप्पुण्णविसयवंचो विणस्सिउं पावा । निवडंति दुग्गईए भागवयसुहंकरमुणिच्च ॥ १९ ॥
 इय पंचविहपमायं एवंविहदोसदूसियं नाउं । नरनाह ! तदेगमणो जिणिंदधम्मंमि उज्जमसु ॥ २० ॥
 एवं सूरिणा उवइट्ठे पमायप्पवंचे सुरिंददत्तकुमारो जायनिम्मलचित्तपरिणामो भणिउं पवत्तो-भयवं ! को एसो
 पुवकहियसुहंकरमुणी ? कहं वा अपुण्णविसयवंचो सो मरिउं दुग्गईं गओत्ति साहेह ममं, सूरिणा भणियं-साहेमि ॥
 मालवविसए विक्खायजसा चक्कपुरी नाम नयरी, तहिं च अणेगवणियजणवक्खुभूओ पभूयदवसंभारो सोम-
 दत्तो नाम सेट्ठी, तस्स सत्तण्हं पुत्ताणं कणिट्ठिया अणेगोवजाइयसयसंपसूया देवसिरी नाम धूया, सा य अच्चंत-

श्रीगुणचंद
महावीरच०
८ प्रस्तावः

॥ ३०६ ॥

रूपा संपत्तजोवणावि तह विहवराभावेण कालं बोलेइ, इओ य तीए नयरीए अदूरे उच्छलंतमहल्लकलोलविदलिय-
कूलाए अणेगविहगकुलकलयलाउलदियंतराए जमुणामहानईए उत्तरपुरत्थिमदिसिविभागे वेयपुराणभारहरामा-
यणवक्खाणनाणविन्नाणनिउणो नियदरिसणत्थवित्थारणपवणो सबत्थ विक्खायजसो नीसेसभागवयमुण्णिपहाणो
सुहंकरो नाम लोइयतवस्सी परिवसइ, सो य तवेण य वयणसोहग्गेण भविस्सजाणणेण य जणसम्मयत्तेण य सयलस्सवि-
नयरजणस्स बाढं पूयणिज्जो, अन्नया य तेण सोमदत्तसेट्ठिणा गुणगणावज्जियहियएण निमंतिओ सो भोयणक-
रणत्थं नियमंदिरे, गाढतव्वयणाणुरोहेण य कइवयसिस्सपरियरिओ संपत्तो भोयणसमयंमि, सपरियणेण परमभत्तीए
नमंसिओ सोमदत्तेण, सम्मज्जिओवलित्तंमि भवणभागंमि दवावियं से आसणं, तहिं च निसन्नो एसो, सेट्ठिसुएहिं
कयं परमायरेण चलणपक्खालणं, अणेगकलहोयमयकच्चोलसिप्पिसंकुलं च पइट्ठियं पुरओ परिमलं, सेट्ठी य सयमेव
निम्भरभत्तिभरतरलियचित्तो नाणाविहवंजणसणाहं पउरखंडखज्जयाइमणहरं रसवइं परिवेसिउं पवत्तो, सावि सेट्ठि-
धूया देवसिरी रणंतमणिनेउरारावमुहलियदिसावगासा हारद्धहारकुंडलकडयअंगयरसणापमुहाभरणभूसियसरीरा नि-
यंसियपवरपट्टणुग्गयदिद्वचीणंसुया कणयदंडतालविट्टमादाय तस्स भोयणं कुणंतस्स बीजणत्थमुवट्ठिया, एत्थंतरे
साहिलासं तं पलोइऊण सुहंकरतवस्सी तक्कालवियंभमाणमयणहुयवहपलित्तहियओ विभाविउमारद्धो । कइं ?—

सुसहा पन्नगपम्मुक्कफारफौंकारजलणजालोली । उच्चडकोदंडविविक्खत्ततिक्खनारायराईवि ॥ १ ॥

तुर्येऽणुव्रते
सुरेन्द्रद-
त्ताख्याने
शुभंकरवृत्तं.

॥ ३०६ ॥

न उण इमीए एए कुवलयदलदीहरच्छिविच्छोहा । सोढुं सका निक्खिमयरद्वयभावसंवलिता ॥ २ ॥

रइरंभाहरिदइयातिलोत्तमापमुहदिवनारीओ । मन्ने इमीए रूवेण लज्जियाओ न दीसंति ॥ ३ ॥

विन्नाणं ज्ञाणं सत्थकोसलं देवयाण पूया य । विहलं सर्वंपि इमं जइ एयमहं न पावेमि ॥ ४ ॥

केवलमुवायओ संगमेऽवि एयाए कहवि दिववसा । सब्बत्थ वित्थरंतो अवन्नवाओ दुसरोहो ॥ ५ ॥

अहवा किमणेण ?-हरिहरहिरण्णगन्भा वसिट्ठजमदग्गिवा(चा)सदुव्वासा ।

हरिणच्छिवयणनिहेसकारिणो जइ पुरा जाया ॥ ६ ॥

ता किं अम्हारिसमुणिजणस्स सुदुवि विसिट्ठधम्मस्स । लज्जा वयणिज्जं वा ? ता पज्जत्तं विगप्पेहिं ॥ ७ ॥ जुम्मं ।

तह कहवि करेमि जहा इमीए सद्धिं समागमो होइ । इय निच्छिऊण गंभीरभावमन्भुवगओ एसो ॥ ८ ॥

आगारसंवरं च काऊण जहापउत्तनाएण भोत्तुं पवत्तो, अह तत्कालवियंभियमयणगुरुवएसवसओ इव जाया से बुद्धी, जहा विप्पयारेमि एयं सेट्ठिं, जेण वयणिज्जविरहिओ एयाए लाभो हवइत्ति, एवं संपेहिऊण सेट्ठिणो पलोय-माणस्स दुस्सहदुक्खावेगसंसूयगो विमुक्को अणेण सिक्कारो, ससंभमेण निरुविओ सेट्ठिणा, खणंतरंमि य गए पुणोऽवि पुच्चकमेण पयडियलोमुद्धोसनिम्भरे सवयणभंगभासुरे दोब्बं तच्च च विमुक्कंमि सिक्कारे अहो किंपि अच्चंतमणिट्ठमावडि-हित्ति विभावित्तो जाव सेट्ठी अच्छइ ताव सो मुहसुद्धिं काऊण समुट्ठिओ भोयणमंडवाओ, उवविट्ठो अन्नत्थ, सेट्ठीवि

श्रीगुणचंद
महावीरच०
८ प्रस्तावः

॥ ३०७ ॥

कज्जसेसं काऊण समागओ तस्समीवं, निवडिओ तस्स चलणेसु, जोडिय करसंपुडं च भणिउमाढत्तो-भयवं ! पसायं काऊण साहेह, किं कारणं भोयणं कुणंतेहिं तुम्हेहिं तिवखुत्तो दुस्सहदुक्खावेगसूयगो इव सिक्कारो विमुक्कोत्ति?, सुहंकरेण भणियं-भो महाणुभाव ! किं साहिज्जइ?, एरिसा चेव हयपयावइणो रुई, जं सव्वं चिय रयणं सोवहवं निम्मवेइ, तहाहि-

सयलकलानिलयस्स य गयणसरोवरसहस्सपत्तस्स सुरलोयभवनमंगलकलसस्स पइपक्खं खओ कओ निसायरस्स, नीसेसतिरियलोयपईवस्स कमलसंडजइखंडणेक्कपयंडकिरणस्स भयवओ मायंडस्स अणिवत्तयउग्गाढकुट्टदोसेण विणासिया चरणा, अणेगरयणसंभारभरियगंभीरकुच्छिभागस्स महाजलुप्पीलपवाहियविवरंमुहसरियासहस्सस्स सायरस्सवि अणवरयसलिलसंहारपच्चलो निवेसिओ कुच्छिमि वज्जानलो, एवं च ठिए वत्थुपरमत्थे किमत्थि कहणिज्जं ? को वा वोढवो चित्तसंतापो ?, सेट्ठिणा भणियं-भयवं ! न मुणेमि किंपि गंभीरवयणेहिं, ता फुडक्खरं साहेह, किमिह कारणं ?, सुहंकरेण भणियं-कहेमि, अलाहि एत्तो जंपिएण, नियमज्जायाविघायपरिहारसमुज्जओ चेव जइजणो होइ, एवं भणिऊण डंभसीलयाए समुट्ठिऊण गओ सो निययासमपयं, सेट्ठीवि अयंडविइरसूयगं से वयणं निसामिऊण सं-खुद्धो परिभाविउं पवत्तो-अहो तिकालगयत्थपरिन्नाणनिउणेण महातवस्सिणा अणेण नूणं अम्ह किंपि गाढमावयाव-डणमवलोइऊणवि चित्तपीडापरिहरणट्ठया न य पयडक्खरोहिं समुल्लवियं कज्जतंतं, ता जावज्जवि न समुप्पज्जइ कोऽवि अणत्थो ताव तं मुणिवरं गाढाणुरोहपुव्वगमापुच्छिऊण जहोचियमायरामित्ति चित्तिऊण गओ तस्स आसमं,

तुर्याणुव्रते
सुरेन्द्रदत्त-
कथायां
शुभंकरा-
ख्यानं.

॥ ३०७ ॥

पडिओ से पाएसु, पणयगम्भपत्थणार्हि बहुप्पयारं तहा तहा भणिओ जहा जाओ सो अणुकूलचित्तो, तओ भणिय-
मणेण—अहो सोमदत्त ! बाढमकहणिज्जमेयं, केवलं तुह असरिसपक्खवाएण विदुरियं मे हिययं, न एत्तो गोविउं पारेइ,
अओ आयत्तेहि—भो महायस ! जा एसा तुह दुहिया सा थेवदिणमज्झंमि कुडुंबक्खयमाणस्सइत्ति लक्खणेहि
नाऊण मए भोयणे पारद्धे अकंडविणिवायतरलियचित्तेण तहाविहमणिट्ठं गोविउमसहंतेण पुणो पुणो सिक्कारो
कओ, ता भो महाणुभाव ! एयं तं कारणं, इमं च सेट्ठी निसुणिऊण वज्जासणिताडिओव मुच्छानिमीलियच्छो
इव खणं ठाऊण कहवि समवलंबियधीरभावो भणिउमाढत्तो—

भयवं ! एत्तियमेत्तं जह तुमए जाणियं सुबुद्धीए । तह उत्तरं पि किंची जाणिहिसि अओ तयं कहसु ॥ १ ॥

जं पयडमिमं लोगे जो विज्जो मुणइ रोगिणो रोगं । सो तदुच्चियमोसहमवि ता भंते ! कुणसु कारुणं ॥ २ ॥

तुम्हाणणुग्गहेणं जइ देवगुरूण पूयणं कुणिमो । अम्हे अदीणमणा ता किमजुत्तं हवेज्ज इह ? ॥ ३ ॥

निरुवगधम्माधाराण तुम्ह नोवेक्खणं खमं जेण । परहियकरणेक्कपरा चयंति नियजीवियवंपि ॥ ४ ॥

तम्हा उज्झसु संखोभमणुच्चियं कहह जमिह कायवं । पुव्वमुणिणोऽवि जेणं परोवयारं करिसु सया ॥ ५ ॥

एवं सेट्ठिणा कहिए ईसिमउलियनयणेणं जंपियं तेण—भो सोमदत्त ! सुनिबलं जंतिउम्हि तुह दक्खिण-
रज्जूए, एत्तोच्चिय महाणुभावा गिहिसंगं मोत्तूण विजणवणविहारमम्भुवगया पुव्वमुणिणो, सेट्ठिणा भणियं—अच्छउ

श्रीगुणचंद
महावीरच०
८ प्रस्तावः

॥ ३०८ ॥

ताव तेसिं संकहा, संपइ कालोचियं कहसु, तओ सुचिरं कइयवेण सिरं धुणिऊण भणियं तेण-सेट्टि! जइ अव-
स्समेयस्स दोसस्स पडिविहाणं काउमिच्छसि ता निविवरविसिद्धसुसिलिद्धकट्टघडणाए मंजूसाए अग्निभतरंमि एयं
नियधूयं पक्खिविऊण सयलभूसणसणाहं सुमुहुत्तंमि दिसिदेवयापूयापुरस्सरं जमुणानईजलंमि पवाहिज्जासि, जेण
सेसगेहजणस्स जियरक्खा भवइत्ति, तओ गुरुवयणं न अन्नहा जायइत्ति कलिऊण भयभीएण अविमंसिऊण
तदभिप्पायं कालक्खेवपरिहीणं जहुत्तसमग्गसामग्गिपुरस्सरं नियधूयमब्भंतरे पक्खिवित्ता सुहंकरमुणिणो समक्खं
दुस्सहचचविओगसोगसंभाररुद्धकंठेण अणवरयगलंतनयणवाहप्पवाहपक्खालियगंडयलेण पवाहिया सेट्टिणा जमु-
णाजले मंजूसा, सा य तरमाणा अणुसोएण गंतुमारद्धा, तेणावि सुहंकरेण आणंदसंदोहमुवहंतंतेण निययासमंमि
गंतूण भणिया नियसिस्सा-अरे तुम्हे सिग्घवेगेण गंतूण कोसमेत्तंमि नइहेट्टभागंमि ठायह, तरमाणं च मंजूसं
इंतिं जया पासह तथा तं गिणिहऊण अणुग्घाडियदुवारं मम पणामेज्जइत्ति सोचा गया ते, ठिया य जहुत्तठाणंमि,
सा य मंजूसा कलोलपणोल्लिज्जमाणी जाव गया अद्धकोसमेगं ताव नइजले मज्जणलीलं कुणमाणेण एगेण रायपुत्तेण
दूराओ चिय पलोइया, भणिया य नियपुरिसा-अरे धावह सिग्घवेगेण, गिणहह एयं वारिपूरेण हीरमाणं पयत्थंति,
पविट्ठा य वेगेण पुरिसा, गहिया अणेहिं मंजूसा, समप्पिया य रायपुत्तस्स, तेणावि उग्घाडिया सकोउहलेण, पाया-
लकन्नगव सवालंकारमणहरसरीरा नीहरिया तत्तो सा जुवई, गहिया य सहरिसेण रायपुत्तेण, चित्तियं चाणेण-अहो!

तुर्याणुव्रते
सुरेन्द्रदत्त-
कथायां
शुभंकरा-
ख्यानं.

॥ ३०८ ॥

अणुकूला मह कम्मपरिणई, केवलं एवंविहं रमणिरयणं एवं उज्झमाणेण केणवि नूणमप्पणो असिवपसमणं संभा-
 वियं भविस्सइ, ता न जुत्ता रिता चेव मंजूसा पवाहिउंति परिभाविऊण सन्निहियवणदुडुमकडं तदंभंतरे निक्खि-
 विऊण निविडं दुवारं च से बंधिऊण भगवइ जमुणे मा मे कुप्पेज्जसित्ति भणिऊण पुव्वनाएण पवाहिया एसा,
 पावियसुरलोयसिरिसमुदयं व अप्पाणं मन्नंतो तं कुवलयदलदीहरच्छि घेत्तूण गओ जहागयं, सावि मंजूसा जलेण
 बुज्झमाणी गया कोसमेत्तं, दिट्ठा य सुहंकरसीसेहिं, तओ नियगुरुणो विन्नाणाइसयं वन्नमाणेहिं नईमज्जे पवि-
 सिऊण आयहिया मंजूसा, उवणीया य गुरुणो, तेणावि असंभावणिज्जमाणंदसंदोहमुवहंतेण संगोविया गेहमज्जे,
 भणिया य नियसिस्सा—अरे अज्ज अहं देवयापूयं महया वित्थरेण भवणंभंतरे ठिओ सव्वरयणिं करिस्सामि, ता
 तुंभेहिं बाढं निव्विजणं कायवं, पडिवन्नं तेहिं, अह समागयंमि रयणिसमए मयरद्वयनिद्वयसरसहस्सपहारजज्जरिय-
 सरीरो पवरविलेवणकुसुमतंबोलप्पमुहोवगरणपरियरिओ पिहिऊण सयलगेहदुवाराइं तं मंजूसमुग्घाडित्ता एवं जं-
 पिउं पवत्तो—

हे हरिणच्छि ! किसोअरि ! पीणत्थणि ! कमलवयणि ! वरतरुणि ! । पम्मुकभयासंकं संपय मं भयसु दइयं व ॥ १ ॥
 वच्चउ विगासमहुणा लोयणकमलं मणोरहेहिं समं । सुयणु ! तुह संगमेणं मयणोऽवि मणागमुवसंमउ ॥ २ ॥
 एत्थंतरंमि गादावरोहसंजायतिववरकोदा । तण्हालुहाकिलंता अच्चंतं चावलोवेया ॥ ३ ॥

भीगुणचंद
महावीरच०
८ प्रस्तावः
॥ ३०९ ॥

वणदुट्टमकडी तडतडत्ति पुच्छच्छडाहिं ताडंती । तत्तो विडंविममुही नीहरिया घुरुदुरंती सा ॥ ४ ॥ जुम्मं ।
आ कीस चंदवयणे ! करेसि रोसंति वाहरंतो सो । चुंवणवंचाए मुहं तदभिमुहं जाव संठवइ ॥ ५ ॥
पढमं चिय ताव तडत्ति तोडिओ तिकखदसणकोडीहिं । तीए नासावंसो मूलाओ चिय समग्गो सो ॥ ६ ॥
तयणंतरं च अइतिकखनक्खनिवहेण दारियं अंगं । आमूलाओ उम्मूलियावि सवणावि से ताए ॥ ७ ॥
अणिचारियपसराए एवं तीए हणिज्जमाणेण । तेण भयकंपिरेणं वाहरियं गुरुसरेणेवं ॥ ८ ॥
रे रे धावह सिस्सा ! उग्घाडह मंदिरस्स दाराइं । एस पिसाईए अहं निज्जामि जमस्स गेहम्मि ॥ ९ ॥
इय एवं वाहरंतो भयवससंखुद्धमाणसो धणियं । तायारमलभमाणो नहदंसणुल्लिहियसवंगो ॥ १० ॥
रोसुकडाए वणमकडीए पुणरुत्तघुरुदुरंतीए । तह विणिहओ वरागो जह सो पंचत्तमणुपत्तो ॥ ११ ॥
अह उग्गयंमि दिण्यरे समागया तस्स सीसा, कया तेहिं सहा, न देइ सो य पडिवयणं, तओ विहाडियाइं
कवाडाइं, दिट्ठो विणट्ठजीओ सुहंकरो, सावि वणमकडी उग्घाडिएसु कवाडेसु पलाइऊण गया जहागयं, सीसेहि-
वि अमुणियपरमत्थेहिं कओ सुहंकरस्स सरीरसकारो ।
इय भो कुमार ! विसयाउराण अप्पुन्नवंछियट्ठाणं । निवडंति आवयाओ पयडंचिय जेण भणियमिमं ॥ १ ॥
सल्लं कामा विसं कामा, कामा आसीविसोवमा । कामे पत्थेमाणा, अकामा जंति दुग्गइं ॥ २ ॥

तुर्याणुव्रते
सुरेन्द्रदत्त-
कथायां
शुभंकरा-
ख्यानं.

॥ ३०९ ॥

एत्तो चिय जुवईणं सवियारपलोयणंपि वज्जेति । मुणिणो महाणुभावा निवसंति य सुन्नरत्नेसु ॥ ३ ॥

एवं सोच्चा सुरिंदत्तकुमारो जायगाढविसयविरागो भावसारं सूरिणो निवडिऊण चलणेसुं भणिउं पवत्तो-भयवं ! विरत्तमियाणि विसयपडिबंधाओ मह मणं, ता देह सव्वविरइं उत्तारेह भवन्नवाओ मोयावेह पुव्वदुच्चरियसत्तुनि-
वहाओत्ति, सूरिणा जंपियं-भो महायस ! अज्जवि भोगफलकम्मसञ्भावओ नत्थि तुह पव्वज्जाजोग्गया, ता गिह-
त्थधम्मेणावि केत्तियंपि कालमत्तणो तुलणं कुणसु, नरिंदेण भणियं-वच्छ ! समए चिय किरंतं सवं सुहावहं होइ,
न य गिहवासेवि दंतिंदियाणं पयणुकामकोहलोहाणं सव्वन्नुसाहुपूयापरायणाण विसिद्धणयपरिपालणपराण पुरिसाण
न धम्मो होइ, ता पुत्त ! पत्तथेरत्तो पव्वज्जं गिण्हज्जासि, संपयं तु कयसदारपरितोसो परिचत्तकुभित्तसंगो अणवर-
यधम्मसत्थसवणतल्लिच्छो अणवच्छिन्नसप्पुरिसाचरियनयाणुसरणपरिणामो गिहे चिय निवससुत्ति, दक्खिन्नसील-
याए पडिवन्नं कुमारेण, नियदारपरिभोगं च मोत्तूण गहियं परित्थीपच्चक्खाणं, अन्ने य जिणवंदणपूयणगिलाण-
पडिजागरणोसहदाणपमुहा बहवे अभिग्गहविसेसा, पडिपुन्नमणोरहो य राया कुमारेण सहिओ वंदिऊण सूरिं गओ
जहागयं, अवरवासरे य एगेण केलीकीलेण भणिओ कुमारो-भो भित्त ! सुंदरं कयं तुमए जं सयं चिय मुक्को पर-
दारपरिभोगो, अन्नहा दुच्चरियनिसामणुप्पन्नकोवेण राइणा एत्तियदिणाणि दूरदेसंतरातिही तुमं कओ हुंतो,
कुमारेण कहियं-अरे किं सच्चमेयं, परिहासो वा ?, तेण भणियं-सच्चं, कुमारेण जंपियं-जइ एवं ता जहट्टियं

भ्रीगुणचंद
महावीरच०
८ प्रस्तावः
॥ ३१० ॥

मूलाओ साहेसु, तओ तेण सिद्धो नरिंदमंतिजणणुणुल्लाववुत्तंतो, तं च सोच्चा समुप्पन्नलज्जो कुमारो परिचित्तिउं पवत्तो-अहो अच्चंतमजुत्तमायरियं मए, जं तहाविहं कुलकमविरुद्धं कुणंतेण न गणिओ लोयप्पवाओ न वीमंसिओ धम्मविरोहो न य परिभावियं तायस्स लहुयत्तणं, एवं च ठिए कइं विसिट्ठपुरिसाण निययवयणं दंसितो न लज्जामि, तम्हा न जुज्जइ इह निवसितुंति चित्तिऊण मज्झरत्तसमयंमि निम्भरपसुत्ते परियणे तोणीरं धणुदंडं च घेत्तूण पुव-देसाभिमुहं गंतुं पयट्ठो ।

इओ य-गयणवल्लहनयरे विज्जाहररत्ता महावेगनामेण पुट्ठो नाणसाराभिहाणो नेमित्तिओ, जहा एयाए मह धूयाए वसतंसणाए को पई होहिट्ति?, तेण? कहियं-जो सावत्थीनयरीनाहं कुसुमसेहरनरिंद निय-भुयवलेण एगागी हयपरक्कमं काहिट्ति, एवं सोच्चा विज्जाहरेण भणिथा खेमंकराइणो विज्जाहरा-अरे मच्छह तुच्चे सावत्थि नयरिं, तहिं च ठिया जया एवंविहपरक्कमं पुरिसं पेच्छह तया तं झत्ति घेत्तूण मम समप्पेह, जं देवो आणवेइत्ति सिरसा पडिच्छिऊण से सासणं गया ते तं पुरिं, सुरिंददत्तकुमारोऽवि एगागी नाणाविहदेसेसु परिभ-मंतो पत्तो तामेव नयरिं, ठिओ य नयरीसमीववत्तिणो उज्जाणस्स एगंमि लयाहरे, तहिं च जाव पसुत्तो अच्छइ ताव कयवयचेडीपरिवुडा कुसुमसेहरायसुया इओ तओ कीलंती कहवि कम्मविचित्तयाए एगाणिणी पविट्ठा तमेव लयाहरं, दिट्ठो अप्पडिमरूवो पसुत्तो कुमारो, सा य तीए समुप्पन्नतिव्वाणुरागाए पडिबोहिऊण पारद्धो अणु-

तुर्याणुवते
सुरेन्द्र-
दत्तकथा.

॥ ३१० ॥

कूलवयणेहिं उवसग्गिउं, नियमविग्घकारिणित्ति कलिऊण निम्भत्थिया सा कुमारेण, कहं?—

पाविट्ठि दुट्ठसीले! निक्कारणधम्मवेरिणि! तुमं मे । अवसर चक्खुपहाओ पज्जत्तं दंसणेण तुहं ॥ १ ॥
 तुम्हारिसीण संभासणेऽवि असणिच्च दारुणा पडइ । इहपरभवपडिक्कूला अच्चत्थमणत्थपत्थारी ॥ २ ॥
 इय एवमाइवयणेहिं तज्जिया सा न जाव नीहरइ । ताव करे घेत्तूणं कुमारेण ददेण निच्छूढा ॥ ३ ॥
 आ पाव! पावसि तुमं एत्तो पंचत्तमिति य जंपित्ता । कवडेण सयंचिय नहसिहाहिं उल्लिहियकायलया ॥ ४ ॥
 सा दूरे ठाऊणं हलबोलं काउमेवमारद्धा । रे रे लयाहरगयं गेण्हह पुरिसाहमं एयं ॥ ५ ॥
 कुलजुवइदूसिया जेण मज्झ एवंविहा कयावत्था । तमुवेहंता संपइ दंसिस्सइ कह मुहं रत्तो ? ॥ ६ ॥
 एवं सोच्चा नरवइसुयाय वयणं परूढकोवेहिं । आरक्खियसुहडेहिं लयाहरं वेढियं झत्ति ॥ ७ ॥
 कुमरोऽवि तीए हिययं व निट्ठुरं पाणिणो धणुं घेत्तुं । तत्तो विणिक्खमित्ता तेसिं ठिओ चक्खुपसरंमि ॥ ८ ॥
 ताहे तेहिं समगं पम्मुक्का चक्केलसरनियरा । छेयत्तणेण वंचाविया य सयला कुमारेण ॥ ९ ॥
 तप्पुहरणेहि य लहुं निहया गोमाउयच्च ते तेण । अह निमुणियवुत्तंतो रायावि समागओ तत्थ ॥ १० ॥
 अच्चंतजायकोवो जुज्झेणोवट्ठिओ सयं चेव । करितुरयरहारूढा वियंभिया सुहडसत्थावि ॥ ११ ॥
 तो चउदिसि पसरियउ सत्तुसिन्नु, पेक्खेवि अखुडु जिंव कुंभयन्नु ।

नागुणचंद
महावीरच०
८ प्रस्तावः
॥ ३११ ॥

आपीडियपरियरु सो कुमार, जुज्झणहं लग्गु सो दढप्पहारु ॥ १२ ॥
सरकप्पियपकखरतुरयघट्ट, मुसुमूरियवेरियरुडमरट्ट ।
जसु संमुहु किर जो खिवइ चक्खु, सो तक्खणि जायइ जमह भक्खु ॥ १३ ॥
एगोऽविहु भयवसकंपिराण, सो णेगरूव हूओ वेरियाण ।
लक्खिज्जइ बाणमुयं तु केम्ब, जलधार मुयंतउ मेहु जेंव ॥ १४ ॥
उब्बद्धजूडभडभिउडिभीस, तिक्खंडिय सत्तहुं सरहिं सीस ।
तमुदारुणरणकम्मेण तुट्ट, ओइन्ननहंगणि तियसवंठ ॥ १५ ॥
अवरोप्परुपेल्लिरि सुहडसत्थि, नासणह पयट्टइ अइव हत्थ ।
विवरंसुहि सावत्थीए नाहि, पवहंतइ नररुहिरप्पवाहि ॥ १६ ॥
समरंगणि जोअइ जा कुमार, संचिट्टइ रिउ अकयप्पहारु ।
ता पुव भणियविज्जाहरोहिं, अवहरिवि हरिसभरनिम्भरोहिं ॥ १७ ॥
उवणीओ खयरनरनायगस्स, हरिसूससंतमुहपंकयस्स ।
अह आगयंमि सुदिणंमि तेण, परिणाविओ कुमरु वसंतसेण ॥ १८ ॥

तुर्याणुवते
सुरेन्द्र-
दत्तकथा.

॥ ३११ ॥

सो तीए सहिउ पंचप्पयार, उवभुंजइ विसय अणन्नसार ।

अइनिच्चलु पालइ जिणह धम्म, दूरेण विवज्जइ पावकम्म ॥ १९ ॥

कालकमेण विसहय विरत्तु, पव्वज्ज लेइ सुपसंतचित्तु ।

तवचरणेहिं शोसिउ पावकम्म, पव्वक्खु विरायइ नायधम्म ॥ २० ॥

अह ससहरनिम्मलु पाविवि केवलु, पडिबोहिवि चिरु भव्वजणु ।

सिवभद्दह नंदणु भवभयमद्दणु, वच्चइ निव्वइ वरभवणु ॥ २१ ॥

इय परदारनिवित्तीमित्तंपि अणुवयं पवन्नमिमं । एवंविहोत्तरोत्तरकल्लाणनिबंधणं होइ ॥ २२ ॥

भणियं चउत्थणुव्वयमेत्तो पंचमगमाणुपुवीए । सयलपरिग्गहपरिमाणकरणविसयं पयंपेमि ॥ १ ॥

दुविहो परिग्गहो सो थूलो सुहुमो उ तत्थ सुहुमो य । परकीएसुवि वत्थुसु ईसिं मुच्छाइपरिणामो ॥ २ ॥

थूलो पुण नवभेओ धणे य धन्ने य खेत्तवत्थूसु । रुपसुवन्नचउप्पय दुप्पयकुविएसु मुणिअवो ॥ ३ ॥

इय नवभेयपरिग्गहपरिमाणं भावसारमादाय । पंचइयारविवज्जणपरायणो सावगो मइमं ॥ ४ ॥

खेत्ताइहिरन्नाईधणाइदुपयाइकुप्पमाणकमे । जोयणपयाणबंधणकारणभावेहिं नो कुणइ ॥ ५ ॥

जो पुण अइलोभवसा भणिज्जमाणोवि गुरुजणेण वहुं । थेवंपि नो परिग्गहपरिमाणवयं पवज्जेइ ॥ ६ ॥

श्रीगुणचंद
महावीरच०
८ प्रस्तावः
॥ ३१२ ॥

सो दविणाइनिमित्तं वचंतो दूरदेसनयरेसु । पविसंतोऽवि समुद्दे कुणमाणो विविहववसायं ॥ ७ ॥
लाभेऽविहु पइदिणवहुमाणधणवद्धणाभिलासो य । अचंतमहादुक्खं वासवदत्तोव पावेइ ॥ ८ ॥ विसेसयं तीहिं ।
अह गोयमेण भणियं वासवदत्तो जिणिंद ! को एस ? । जयगुरुणा संलत्तं सीसय ! सम्मं निसामेसु ॥ ९ ॥
कणयखलंमि महानयरे सुवलयचंदो नाम सेट्ठी, तस्स धणा नाम गिहिणी, तेसिं अचंतवल्लभो सबकलाकलाव-
निउणो वासवदत्तो नाम पुत्तो, सो य महारंभो महापरिगहो गरुयलाभसंभवेऽवि महालोभसंगओ, अहो निसं दवो-
वज्जणोवाए पयट्ठंतो कालं वोलेइ, तस्स य अम्मापिउणो अचंतसावगधम्मकरणसीलाणि जिणवयणायत्तणेण मुणि-
यअविरइकहुविवागाणि तं नियपुत्तं अणवरयाणेगपावट्ठाणपसत्तं पलोइऊणं भणंति-वच्छ ! सुमिणोवमं जीवियं
असारा विसया सकज्जाणुवत्तणमेत्ता सयणसंजोगा खणविपरिणामधम्मा रिद्धिसमुदया, अओ किंनिमित्तं न कुणसि
धणधन्नस्मित्तवत्थुहिरन्नसुवन्नदुपयचउप्पयाइसु इच्छापरिमाणं, न वा परलोयसुहावहं समज्जिणेसि धम्मं, तहा
वच्छ ! पिउपियामहपुरिसपरंपरागयं न माइ दव्वं, अओ निरत्थओ तदज्जणगाढपरिस्तमो, अह अपुव्वं लच्छि उवव-
ज्जिउमिच्छसि तहावि जहासत्तीए इच्छापरिणाममेव कल्लाणकारगमिच्चाइ बहुप्पयारवयणेहिं पन्नविज्जमाणोऽवि न
पडिवज्जइ कम्मभारियत्तणेण एसो मणागंपि तव्वयणं, सच्छंदचारित्ति उवेहिओ अम्मापिऊहिं । अन्नया य देसंत-
रागयवणिया पुच्छिया वासवदत्तेण-अहो किं तुम्ह देसे भंडमग्घइ ?, तेहिं कहियं-अमुगंति, तओ तव्वयणनिसाम-

पञ्चमेऽणु-
व्रते वासव-
दत्तकथा.

॥ ३१२ ॥

णचउग्गुणीभूयलोभाभिभूओ तहेसोचियभंडनिवहभरियं सगडिसागडं गहिऊण पयट्ठो देसंतरं, निसिद्धो य वाढं जणणिजणगेहिं, तहावि न ठिओ, एवं च सो अणुदिणं वचंतो गओ तामलित्तिं नयरिं, विणिवट्ठियं भंडं, समासाइओ दसगुणो लाभो, वियंभिओ य अचंतलोभसागरो, जाया बहुययरा तदज्जणवंछा, अन्नदिवसे य दुवारगएण तेण दिट्ठाइं दूरदेसागयाइं विविहसारवत्थुभरियाइं जाणवत्ताइं, ताणि य पेच्छिऊण पुच्छिओ तव्वाणियगो अणेणं-भो महायस ! कत्तो आगयाइं एयाइंति ?, तेण जंपियं-कलहदीवाओ, वासवदत्तेण कहियं-भइ ! इहचभंडेण तत्थ गएण केत्तिओ संपज्जइ लाभो ?, तेण भणियं-वीसगुणो, वासवदत्तेण जंपियं-किं सच्चमेयं ?, तेण कहियं-अज्ज ! किमसच्चभासणे फलं ?, एवं च निसामिऊण वासवदत्तेण भाडियाइं जाणवत्ताइं भरियाइं विविहकंसदोसभंजस्स, पट्ठिओ कलहदीवाभिमुहं,

अह परियणेण भणियं-चिरं विमुक्काण जणणिजणगाणं । होही दढमणुतावो सामिय ! तुम्हं विओगंमि ॥ १ ॥
 ता सारिज्जउ गेहं सम्माणिज्जंतु सयणवग्गावि । पुणरवि अत्थोवज्जणकरणे को वारिही तुम्हं ? ॥ २ ॥
 इय भणिए सो रुट्ठो निट्ठुरवयणेहिं भणिउमाढत्तो । रे तुम्ह कोऽहिगारो एवंविह भाणियवंमि ? ॥ ३ ॥
 न तुमार्हितोवि अहं जुत्ताजुत्तं मुणेमि किं पावा ! । लद्धावयासया अहव किं न भिच्चा पयंपंति ? ॥ ४ ॥
 एवं खरफरुसगिराहिं तज्जिया तेण तह अदोसावि । लज्जामिलंतनयणा जह ते मोणं समल्लीणा ॥ ५ ॥

श्रीगुणचंद
महावीरच०
८ प्रस्तावः

॥ ३१३ ॥

तेणावि सायरे पवाहियाइं जाणवत्ताइं, सिग्घवेगेण गंतुं पयत्ताणि, कमेण पत्ताइं कलहदीवं, उत्तारियं तेहिंतो भंडं, विकिणियं च, जाओ बहुओ लाभो, ठिओ य कइवयवासराइं, गहिया मणिमोत्तियसंखपट्टसुत्तपमुहपहाणकया-
णगाइं, तओ पयट्टो तामलित्तिसंमुहं, इंतस्स य जलहिमज्जे दंसिओ निज्जामगेहिं तस्स रयणदीवो, कोउहल्लेण पुच्छिया
अणेण—अरे किमिह उप्पज्जइ?, निज्जामगेहिं भणियं—कक्केयणपउमरागवज्जिंदनीलाइणो महारयणविसेत्ता ते इह
उप्पज्जंति, तेसिं समीवधरणभेत्तेण विद्दवइ रुंददारिद्रोवद्दवो, न पासंमि परिसप्पइ दप्पुब्भडो सप्पो, न नियडम-
कमइ चंडावि डाइणी, खिलियमुहोव न कडुयमुल्लवइ खलयणोवि, तओ अपरिकलियविणासेणं जायतग्गहणगाढा-
भिलासेण भणियं वासवदत्तेण—अहो निज्जामगा! जइ तत्तो हुत्तं नेह मह नावं तो चउग्गुणं देमि भे वित्तिं, तेहिं
भणियं—निज्जइ, केवलं उवलपडलाउला भूमी, जइ कहयि नावा भंगं पाविज्जा ता सव्वनासो जाएज्जा, तओ ईसि
विहसिऊण वासवदत्तेण भणियं—

जइ गयणं निवडेज्जा पल्हत्थेज्जा रसायले पुढवी । कुलगिरिणो य सपक्खा होउं व महीए वज्जेज्जा ॥ १ ॥

जलनिहिणो वा वेलाए महियलं सव्वओवि बोलिज्जा । जणणी वा नियपुत्तं हणेज्ज पढमप्पसूयंपि ॥ २ ॥

ता रत्तंपिव सुन्नं होज्ज जयं किं तु हवइ नो एयं । नय सव्वहावि अघडंतमेरिसं चित्तिउं जुत्तं ॥ ३ ॥

जो पुण इय चित्ताए पयट्टए सो धुवं महामुद्धो । करकमलगोयरगयं लच्छिं हारेज्ज किं चोज्जं ? ॥ ४ ॥

इच्छाअपरि-
माणे
वासवदत्त-
दृष्टान्तः.

॥ ३१३ ॥

ता मेलह कुविगप्पं नावं पेलेह दीवयाभिमुहीं । उच्छिदह दारिहं आचंदं रयणगहणेण ॥ ५ ॥

एवं च तेण कहिए पणट्टविणिवायभएहिं निज्जामगेहिं पवाहिया तदभिमुही नावा, जाव य केत्तियं पि विभागं गया ताव समुट्ठिओ महामगरो, तेण य मंदरमंथेणेव महियं जलहिजलं, उच्छालिया पयंडकल्लोला, तदभिघाएण भिन्ना सयसिकरा नावा, निबुडो अत्थसारो, खरपवणपहओ पलालपूलउव दिसो दिसि पलीणो परियणो, वासवदत्तोऽवि कहकहवि समासाइयफलहखंडो वेलाजलेण चुञ्चमाणो पाविओ सायरस्स पारं, कंठग्गयजीविओ य दिट्ठो एगेण तावसेणं, तेणावि करुणाए नीओ निययासमे, काराविओ कंदमूलाइणा पाणवित्तिं, वीसंतो कइवय-वासराइं, समुवलद्धसरीरावट्ठंभो य पट्ठिओ नियनयराभिमुहं

इओ य तस्स अम्मापिउणो परलोयं गयाइं, जाया य नयरंमि वत्ता, जहा-वासवदत्तोवि समुदे वोहित्थभंगेण विणासं पाविओ, ओच्छिन्नसामियंतिकाऊण गहियं धणकणसमिद्धं पि तम्मंदिरं नरिंदेण, वासवदत्तोऽवि संवलरहि-यत्तणेण धणविणाससमुत्थसोगेण य किलंतदेहो महाकट्टकप्पणाए संवच्छरमेत्तकालेण संपत्तो कणगखलनयरं, पवि-सिउमारद्धो य नियमंदिरं, एत्थंतरे उग्गीरियदंडा पधाविया नरवइनिरुविया घरारक्खगपुरिसा, भणिउं पवत्ता-अरे कप्पडिय ! घरसामियव निम्भओ कीस इह पविससि ?, किं न याणसि इमं रण्णो गिहं ?, तेण भणियं-कि-मेयं कुवलयचंदसेट्ठिणो न भवइ ?, तेहिं कहियं-हंत हुंतं पुवकाले, संपयं पुण असाभियंति रत्तो जायं, तेण भणियं-

श्रीगुणचंद
महावीरच०
८ प्रस्तावः
॥ ३१४ ॥

अरे ! कहं मइ जीवन्ते असाभियन्ति बुच्चइ ? , किमहं कुवलयचंदसेट्ठिणो पुत्तो वासवदत्तो तुम्हेहिं नो सुणिओ न वा
दिट्ठोत्ति बुत्ते किं रे ! मिच्छा पलवसित्ति निम्भच्छिऊण कंधराधरणपुव्वयं निद्धाडिओ सो तेहिं मंदिराओ,
गओ य एसो सयणाणं समीवे, तेहिवि मा पुव्वदेयं दवं मग्गिस्सइत्ति कुविगप्पेण पच्चभिजाणंतेहिवि न नयणमेत्ते,
णावि संभाविओ, गहिलोत्ति कलिऊण रत्तावि उवेहिओ ।

अह गेहसयणधणनासपमुहदुहजलणजालपज्जलिओ । सो चित्तिउं पवत्तो विवन्नलायन्नदीणमुहो ॥ १ ॥
कह अकलियपरिसंखं पुरिसपरंपरसमागयं दवं ? । कह वा सभुयवलेण य विट्ठत्तयं तं च अइवहुयं ॥ २ ॥
एकपयं चिय सवं निन्नट्ठं मज्झ मंदभग्गस्स ? । हा ! किं करेमि संपइ ? पुवं व हवेज्ज कह व धणं ? ॥ ३ ॥
एमाइविचित्तविकप्पकप्पणुप्पन्नचित्तवामोहो । उम्मत्तयं उवगओ हिंडंतो नयरत्थासु ॥ ४ ॥
चिरकालमाउयं पालिऊण बहुरोगसोगसंतत्तो । अट्टज्झाणोवगओ मरिउं तिरियत्तणं पत्तो ॥ ५ ॥
इय गोअम ! जीवाणं परिग्गहारंभविरइरहियाणं । निवडंति आवयाओ जं तेणेमं गुणकरंति ॥ ६ ॥
पंचवि अणुवयाइं सोदाहरणाइं ताव कहियाइं । एत्तो गुणवयाइं तिन्निवि लेसेण साहेमि ॥ १ ॥
उह्वाहोतिरियदिसिं चाउम्मासाइकालमाणेणं । गमणपरिमाणकरणं गुणवयं होइ पढममिह ॥ २ ॥
वज्जइ उह्वाइकममाणयणप्पेसणोभयविसुद्धं । तह चेव खेत्तवुहिं कहिंवि सइअंतरद्धं च ॥ ३ ॥

इच्छाऽपरि-
माणे
वासवदत्त-
दृष्टान्तः,

॥ ३१४ ॥

एयंमि निरह्यारे दिसिच्चए भावओ पवत्तंमि । होइ सिरी मोक्खोविय जिणपालियसावगस्सेव ॥ ४ ॥

गोयमसामिणा भणियं-जयनाह ! को एस जिणपालिओ ? , सामिणा कहियं-भो ! निसुणेसु पुंडवट्टणनयरे विक्रम-
सेणो राया, मयणमंजूसा से पट्टमहादेवी, सुबुद्धी अमच्चो, तत्थ य नयरे जिणभावियमणो जिणदत्तसेट्ठिस्स सुलसाए
भारियाए पुत्तो जिणपालिओ नाम सावगो परिवसइ, तेण य गुरुसमीवे दिसागमणपरिमाणवयं गिणहंतेण
पन्नासं पन्नासं जोअणाइं चउसुवि दिसासु मुक्काइं, एवं सो उत्तरोत्तरगुणभासं कुणमाणो अञ्छइ । इओ य विक्र-
मसेणनराहिवस्स पच्चंतदेसवत्ती सीहसेणो नाम भिल्लाहिवई देसं विह्विउमाढत्तो, तस्स य उवरि महया संरंभेण
हरिकरिहजोहवूहपरिगओऽविक्रमेवेण चलिओ विक्रमसेणो, भणिओ य सुबुद्धिणा अमच्चेण-देव ! किं तस्स गो-
माउयस्स उवरिं तुम्हे विजयजत्तं करेह ? , तुम्ह पयपयावपडिहयपरक्कमस्स का तस्स सत्ती ? , ता नियत्तह नयरी-
हुत्तं देह ममाएसं जेण तहा करेमि जहा पडिञ्छइ सिरेण सो देवस्स सासणंति बुत्ते चउरंगिणीसेणासणाहो
पेसिओ अमच्चो, सीहसेणोऽवि तं सबलवाहणं इंतं चारपुरिसेहितो नाऊण विसमगिरिकडगं घेत्तूण ठिओ, अम-
च्चोऽवि तहाठियं पेच्छिऊण जुज्झिउमपारयंतो तमेव गिरिकडगं परिवेठिऊण तत्थेव आवासिओ, दुग्गमग्गत्त-
णओ य धन्नघयाइं महग्घीह्वयं सिबिरे, जणपरंपराए य निसुणियमेयं जिणपालिएण, तओ भूरिघयभरियदोट्टियगाणं
करभेसु समारोविय वणियजणसमेओ चलिओ सो सिबिराभिमुहं, सो य सीहसेणो दुग्गे निरुद्धजवसाइपयारो

श्रीगुणचंद
महावीरच०
८ प्रस्तावः

॥ ३१५ ॥

अच्छिउमचायंतो सारधणं करितुरयसाहणं च समादाय पलाणो रयणीए, मुणियवित्तंतो य अमच्चो लग्गो तस्स अणुमग्गेण, नासंतो य दस जोअणे गंतूण वेढिओ सवत्तो अमच्चसेत्तेण, तओ सो सीहसेणो बहलतरुवरगहणंमि गिरि-
निकुंजं निस्साए काऊण ठिओ, इओ य जिणपालिओ पुद्वावासियसिबिरसंनिवेसं पत्तो समाणो दिसिपरिमाणं चिंति-
ऊण भणइ-अहो किमहमिणिंह करेमि?, पन्नासं जोयणाइं मे परिमाणं, तं च इत्तियमेत्तेणं चिय पडिपुन्नप्पायं, सेन्नं
च दसहिं जोयणेहिं दूरीभूयमियाणिं, ता वलिस्सामि पच्छाहुत्तं, न कोसमेत्तंपि एत्तो वच्चिस्सामि, सहाइणा वलिय-
लोगेण भणियं-अहो! मा मुहा अत्थहाणिं करेहि, तत्थ गयस्स तुह पभूयदविणलाभो जायइ, तेण भणियं-अलाहि
तेण दवेणं जं नियमखंडणाए संपज्जइ,

अह तस्स नियमनिच्चलचित्तपरिक्खट्टया सुरो एगो । कयउम्भडसिंगारो सवत्तो पुरिसपरिअरिओ ॥ १ ॥

सत्थाहिवरूवधरो सुरलोआओ समोअरेऊणं । पच्चासन्नो ठाउं एयंपिउं एवमाढत्तो ॥ २ ॥

हंहो सावय ! नो कीस एसि तं सप्पिविक्कयनिमित्तं? । जिणपालिएण भणियं वयभंगो हवइ जइ एमि ॥ ३ ॥

देवेण जंपियं सुट्ठु वंचिओ तंसि धुत्तलोएण । जो कुग्गहेण हारसि करट्ठियंपि हु महालाभं ॥ ४ ॥

अहवा वयस्स भंगे पावं होइत्ति तुज्झ संकप्पो । ता तल्लाभेणं चिय पायच्छित्तं चरेज्जासु ॥ ५ ॥

जिणपालिएण वुत्तं अहो किमेवं अणग्गलं वयसि? । वञ्चंति धम्मगुरुणो कयाइं किं भवसत्तजणं? ॥ ६ ॥

दिक्परि-
माणे जिन-
पालितज्ञातं

॥ ३१५ ॥

हंत ! जइ तेऽवि वंचंति कहवि ता किं न चंदविंवाओ । अमयमयाओ निवडइ पलित्तगयणानलकणोली ? ॥ ७ ॥
 किं वा न सूरविंवे विण्फुरमाणेऽवि तिमिरसंभारो । भरियभुवणंतरालो वियरइ रयणिं अकालेऽवि ? ॥ ८ ॥
 ता भइ ! नेव जुज्जइ गुरुहुत्तं तुज्ज जंपिउं एवं । अचंतपावजणगत्तणेण मज्झं पि नो सोउं ॥ ९ ॥
 जं च तए भणियमिमं वयलोवसमुत्थपावसमणत्थं । पायच्छित्तं पच्छा सेविज्जाहिसि तमजुत्तं ॥ १० ॥
 जं पढमंपि न जुज्जइ तं काउं जत्थ होइ वयलोवो । लुत्ते य तत्थ विहलो पायच्छित्ताइवावारो ॥ ११ ॥
 सहसकाराणाभोगओव वयमयलणंमि पच्छित्तं । पढमं चिय जाणंतो जो लोवइ तस्स तं विहलं ॥ १२ ॥
 इय भणिए सो देवो रंजियचित्तो विसिट्ठरूवधरो । चलियमणिकुंडलामलमऊहविच्छुरियगंडयलो ॥ १३ ॥
 ससिणेहं जोडियपाणिसंपुडो भणिउमेवमाढत्तो । धत्तो सि तुमं सावय ! वयंमि जो निचलो एवं ॥ १४ ॥
 देवोऽहं तुह सत्तं परिक्खिउं संपयं समणुपत्तो । परितुट्ठो य इयाणिं ता भण किं ते पयच्छामि ? ॥ १५ ॥
 जिणपालिएण भणियं जिणमुणिपयपूयणाणुभावेण । सवंचिय परिपुत्तं न मग्गियवं किमवि अत्थि ? ॥ १६ ॥
 ताहे सुरेण कहियं जस्सेरिस निचलत्तणं धम्मे । सो तं कयकिच्चो नणु तहावि समणुग्गहट्ठाए ॥ १७ ॥
 विसदोसहरणदक्खं रयणमिमं गिण्ह तं महासत्त ! । एवं तमप्पिऊणं देवो अहंसणं पत्तो ॥ १८ ॥
 जिणपालिओऽवि गहिऊण तं गहिऊण घयाइभंडं च । इयरवणियाण दाऊण गओ सनयरं, तत्थ य जाव

श्रीगुणचंद
महावीरच०
८ प्रस्तावः
॥ ३१६ ॥

कइवि दिवसाणि अच्छइ ताव अन्नदिवस सा नरिंदभज्जा मयणमंजूसा वासभवनंमि सुहपसुत्ता खइया विसहरेण,
तक्खणेण य निच्चिद्धा जाया, समाऊलीहूओ विक्रमसेणो राया, वाहराविया गारुडिया, पउत्ता तेहिं मंततंतोवयारा,
न य जाओ कोऽवि विसेसो, तओ पच्चक्खाया तेहिं, नरिंदेणवि गाढनेहमोहिण्ण नीणाविओ पडहगो, उग्घोसावियं
च, जहा-जो देविं उट्ठावेइ तस्स अद्धं गामनगरसमिद्धस्स रज्जस्स देमिच्छि, इमं च पडहगताडणपुब्बयं उग्घोसिज्ज-
माणं सुणियं जिणपालिण्ण, तओ निवारिओ-अणेण पडहगो, देवसमप्पियरयणं गहाय गओ नरिंदमंदिरं, रयणा-
भिसेगसलिलपाणविहिणा विगयविसविगारा कया देवी, सुत्तपबुद्धव समुट्ठिया सयणीयाओ, तुट्ठो राया, दाउमारद्धो
य रज्जद्धं, जिणपालिण्ण जहोचियं घेत्तूण सेसं पडिसिद्धं, रायावि से निलोभयं दट्ठूण पडिबुद्धो देवीए समं सावगो
जाओ, जिणपालिओऽवि संपुन्नधणवित्थारो चेइयसाहुपूयारओ सम्ममुभयलोगसफलं जीवियं काऊण मओ समाणो
परंपराए मोक्खसोक्खभागी जाओत्ति ॥

इय गोयम ! दिसिक्खपालणाए अइयारपंकमुक्काए । हुंति विसिद्धसुहकरा गुणनिवहा इहपरभवेषु ॥ १ ॥
भोगपरिभोगपरिमाणकरणमेत्तो गुणवयं बीयं । तं भोयणओ तह कम्मओ य दुविहं मुणेअवं ॥ १ ॥
भोयणओ पडिवन्ने इमंमि वज्जेज्जणंतकायाई । पंचुंवरि महुमेरयं च रयणीयभत्तं च ॥ २ ॥
सच्चित्तं पडिबद्धं अपउलदुप्पउल तुच्छभक्खणयं । भोअणओ अइयारा वज्जेयवा इमे पंच ॥ ३ ॥

दिकूपरि-
माणे जिन-
पालितज्ञातं

॥ ३१६ ॥

कम्मयओ पुण एत्थं पडिवन्ने सच्चमेव खरकम्मं । वज्जेअवं निच्चं किं पुण इंगालकम्माइं ? ॥ ४ ॥

इंगाली वणसाडी भाडी फोडी सुवज्जए कम्मं । वाणिज्जं चेव य दंतलक्खरसकेसविसविसयं ॥ ५ ॥

एवं खु जंतपीलणकम्मं निलंछणं च दवदाणं । सरदहतलायसोसं असईपोसं च वज्जेज्जा ॥ ६ ॥

दुविहपयारं च इमं जहभणियविहिए पालमाणाणं । धन्नाण भवभयं नेव होइ रविपालयाणं व ॥ ७ ॥

इंदभूइणा वागरियं-भयवं ! के इमे रविपालया ?, जयगुरुणा भणियं-कहेमि, एत्थेव जंबूदीवे दीवे भारहे खेत्ते कोसलविसयप्पहाणे दसपुरंमि नगरे नरिंदसम्मया साहणकूलसंभूया चउहसविज्जाठाणपारगा दोन्नि भायरो रवी पालगो य परिवसंति, अन्नया य गामाणुगामं विहरमाणा बहुसिस्सगणपरिवुडा विजयसेणाभिहाणा सूरिणो समागया, ते य तेसिं जाणसालाए अणुजाणाविऊण ठिया वासारत्ते, ते य दोवि भायरो सूरिसमीवे धम्मवीमंसाए समागंतूण भणंति-भयवं ! भणह नियधम्मं, सूरिणा भणियं-आयन्नह—

जीवदयापरिणामो सच्चनुनिवेइयत्थपडिवत्ती । परिगहपरिमाणं चिय एसो धम्मो समासेण ॥ १ ॥

तेहिं कहियं-भयवं ! जीवदयापरिणामोत्ति जं तुम्हेहिं वुत्तं तं न घडेइ, जओ जन्नकज्जे पसुविणासोऽवि धम्म-
चणेण निहिट्ठो, तहा सच्चनुनिवेइयत्थपडिवत्ती एयंपि न सुंदरं, सच्चन्नूणं वेदे अकहणाओ, जं च परिगहपरि-
माणंति वुत्तं तंपि निरत्थयं, जेसिं वराडियामेत्तंपि नत्थि तेसिं विफलमेव परिगहपरिमाणकरणं, विज्जमाणपयत्थे

श्रीगुणचंद
महावीरच०
८ प्रस्तावः
॥ ३१७ ॥

चेव तस्स गुणकारित्तणओ, गामसम्भावे चिय सीमासफलत्तणओत्ति, तम्हा अन्नं किंपि धम्मं परिकहेसु, सूरिणा भणियं-आउसंतो! न जुज्झइ तुम्ह एवं वोत्तं, जओ इहलोयपडिवद्धपुरिसवयणमेयं जन्नकज्जे पसुविणासो धम्मोत्ति, कहमेयंति?, बुच्चइ-‘आत्मवत् सर्वभूतानि, यः पश्यति स पश्यती’ति पारमार्थिकमुनिवचनात्, जइ पुण जीवविणासे धम्मो ता मच्छबंधलुद्धयाइणो सग्गंमि वच्चेज्जा । जं च सब्बनुणो वेदेसु न कहियत्ति वुत्तं तंपि वेयरहस्सानिसामणाओ, यतस्तत्रैव शान्त्युद्घोषणाप्रस्तावे उक्तं—ॐ लोकप्रतिष्ठितान् चतुर्विंशतिं तीर्थकरान् ऋषभाद्यान् वर्धमानान्तान् सिद्धान् शरणं प्रपद्यामहे । ॐ पवित्रमग्निं उपस्पृशामहे, येषां जातं सुजातं येषां वीरं सुवीरं येषां नम्रं सुनम्रं ब्रह्म सब्रह्मचारिणो उचितेन मनसा अनुदितेन मनसा देवस्य महर्षिभिर्महर्षयो जुहोति, याजकस्य जनस्य च एषा रक्षा भवतु शान्तिर्भवतु वृद्धिर्भवतु तुष्टिर्भवतु स्वाहा ” एवं च पसिद्धेसु सब्बत्थपइट्ठिएसु सब्बनुसु अभावकप्पणं महासंमोहो । जं च कहियं विज्जमाणपयत्थे चेव परिमाणं जुज्झइ एयंपि अणुचियं, असंतेवि अत्थे आसवनिरोहभावाओ पच्चक्खाणं गुणकरं चेव, ता भो महाणुभावा ! असेसदोसग्गिसमणघणसरिसं सब्बनुमयं अमयं व पियह अजरामरत्तकरं, मुंचह मिच्छत्तमोहसंपसूयं कदासयविसेसं, मज्झत्थत्तणमवलंबिऊण चित्तेह परमत्थं, जच्चकणगं व कसल्लेयतावपमोक्खवहुपरिक्खहिं सुपरिक्खिऊण धम्मं सम्मकरं सम्ममायरह । एवं च सूरिणा पन्नत्ते लहुकम्मयाए पडिवुद्धा ते महाणुभावा, पडिवन्नो भावसारं जिणधम्मो, गहियाइं अणुवयाइं, तंगीकयाइं

भोगोपभोगमाने रविपालकथा

॥ ३१७ ॥

तिन्निवि गुणवयाइं, पालेंति य सबजत्तेण । अन्नया य रविमाहणस्स भोयणं कुणमाणस्स उवरिद्वियघरकोइलगेण कओ
 उच्चारो, वक्खित्तचित्तत्तणओ न मुणिओ अणेण, तम्मिसभोयणकरणे य पवहियं से उयरं, खीणाइं मंससोणियाइं,
 तणुईह्याओ बाहाओ, सुक्काओ जंचाओ, सुसियं वयणं, वड्डिया तणहा, जाओ सायसेसाउओ, दंसिओ य पालएण
 विज्जाणं, तेहिवि असज्झोत्तिकाऊण पच्चक्खाओ एसो, एवं च विसमदसावडियं तं पलोइऊण झूरइ परियणो,
 रोवइ भारिया, बहुप्पयाइं विलवइ पालगो, सो य अदीणमाणसो सम्ममहियासेइ, अन्नवासरे य समागओ एगो
 देसंतरविज्जो, तस्स सयणवग्गेण दंसिओ रवी, तेणावि संमं पलोइऊण भणियं—अहो कुड्डिरोलियापुरीससंभवो
 एस दोसो, ता पंचुंवरिफलाइं समभागाइं चित्तगरोज्झमंससंमीसियाइं सुराए वट्टिऊण देह जेण सिग्घं पसमइ
 महोदरवाही, रविणा भणियं—भो भो वेज्जा ! भोयणओ वीयगुणवयपरिमाणं कुणंतेण पच्चक्खायं मए एयं, वेज्जो
 सयणवग्गो य भणइ—पगुणीभूयसरीरो सोहिं करेज्जासु, तेण कहियं—जराघुणजज्जरियविसरारुसरीरपंजरासारयं
 जाणंतो नाहं मरणेवि एयमायरामि, एवं च उज्झिओ वेज्जेण । अन्नंमि य वासरे जाव सो निसन्नो एगंतदेसे अच्छइ
 ताव पेच्छइ वसहमुत्तमज्झे निवडियं घरकोइलगं, तक्खणं चिय विणस्संतं च पेच्छिऊण चित्तियमणेण—अहो जहा
 एयं कोइलगविणाससमत्थं तहा तं दुट्ठं विसविगारमवि हणिउमलं, तम्हा जुज्जइ मज्झ एयं पाउंति परिभाविऊण
 सुमुदुत्ते णमोकारसुभरणपुरस्सरं वसहमुत्तं पीयमणेण, अह धम्मपभावेणं वेयणियखओवसमजोगा ओसह-

श्रीगुणचंद
महावीरच०
८ प्रस्तावः

॥ ३१८ ॥

माहप्पेण य जलोयरं से पसंतंति, जाओ पुणन्नवंगो, जयइ जिणिंदस्स धम्मसामत्वं, इय सवत्थ पवाओ वित्था-
रिओ नयरलोएण

सो य पालगो तन्नयरसामिणा भणिओ जहा ममामच्चत्तणं पडिवज्जसु, पालगेण भणियं-देव! मएखरकम्माणं
बलाहियत्तारक्खिगत्तपमुहाणं नियमो कओ, राइणा भणियं-किं कारणं?, तेण कहियं-देव! न जुत्तमेयं सावगाणं,
जओ तत्थ निउत्तेहिं जणो पीडियव्वो, परच्छिद्वनिहालणं कायव्वं, नरिंदचित्तावज्जणपरेहिं सवप्पयारेण दव्वमुप्पाय-
णिज्जं, तं च न जुत्तं पडिवन्नवयाणंति, रन्ना भणियं-दुट्ठाण सिक्खणे साहुण पालणे किमजुत्तं?, पालयेण जंपियं-
देव! को एवं मुणइ-एस दुट्ठो एसो साहुत्ति, जओ अवरारहस्स कारीवि अत्तणो साहुत्तणमेव पगासेइ, न य अपडिवन्न-
दोसो चिणासिउं पारियइ, कयाइ पिसुणोवणीओ साहुवि परिहम्मइ, तम्हा अइसयनाणसज्झं दुट्ठनिग्गहसिट्ठपालणं,
अणइसइणा कीरंतं विवज्जासंपि जाएज्जा, एवं च भणिए पयंडसासणत्तणओ रुट्ठो राया भणिउमाढत्तो य-अरे
वंभणाहम! वेयपुराणपइट्ठियं वंभणत्तं परिहरिय धम्मंतरं कुणमाणो मूलाओ च्चिय निग्गहट्ठाणं तुमं विसेसओ
इयाणिं ममाऽऽणालोवपयट्ठो, ता न भवसि संपयंति भणिऊण आणत्तो वज्झो, नीओ मसाणभूमीए, समारोविउ-
मारद्धो सूलाए, एत्थंतरे तप्पएसोवगएण दिट्ठो वाणमंतरेण, दढधम्मोत्ति जायाणुकंपेणं तेण सूलाठाणे कयं कण-
यसिंहासणं, तेहि य रायपुरिसेहिं पहाओ खग्गपहारोहिं, देवप्पभावेण य पहारट्ठाणेसु समुट्ठियाणि गेवेयपमुहाणि

भोगोपभो-
गमाने रवि-
पालककथा

॥ ३१८ ॥

आभरणाणि, निवेइयं च रत्नो, अह भयसंभंतमणो राया सयमेव परियणसमेओ तस्स सगासोवगओ कयंजली भणिउमाढत्तो-भो भो सद्धम्मपरेकचित्त! जं निन्निमित्तमवि मोहा एवंविहं अवत्थं उवणीओ तं खमसु मज्झ, एवं च सुचिरं पसाइऊण करेणुगाखंधे समारोहिऊण य महाविभूर्ईए पवेसिओ नयरे पालओ, जहोचियं तंवो-लाइणा संमाणिऊण पेसिओ सगिहं, परितुट्ठो जेट्ठभाया, कयं वद्धावणयं । अवरवासरे य पालगेण भणियं-हे भाय! सव्वत्रुधम्ममाहप्पमेयं जं वसहमुत्तमेत्तेणवि तुह पसंतो जलोयवदाही, ममावि निक्कारणमेव कणयसिंहासणत्तेण परिणया सुलिगा, पहारावि जाया आभरणत्तणेणं, ता मुच्चउ गेहवासवासंगो, अंगीकीरउ एत्तो सव्वविरई, को हि नाम मुणियामयपाणगुणो विससलिलं पाउमुच्छहेज्जा?, रविणा भणियं-एवं होउ, तओ ते दोवि थेराणं अंतिए पव्वज्जं गहाय समाराहियसंपुन्नसमणधम्मा सुरसिवसुहभायणं जायत्ति ॥

इय इंदभूइमुणिवर! वीयगुणवयमिमं विनिदिट्ठं । एत्तो तइयं वोच्चइ अणत्थदंडस्स विरइत्ति ॥ १ ॥

सो पुण अणत्थदंडो नेअवो चउव्विहो अवज्झाणो । पमयायरिए हिंसप्पयाण पावोवएसो य ॥ २ ॥

कंदप्पे कुकुइए मोहरियं संजुयाहिकरणं च । उवभोगपरीभोगाइरेगयं चेत्य वज्जेइ ॥ ३ ॥

जेऽणत्थदंडविरया न हुंति तेऽणत्थगाइं जंपंता । पावंति धुवं मरणं लोइयकोरिंटियमुणिव ॥ ४ ॥

जो पुण एसो कोरिंटिगो मुणी जह व मरणमणुपत्तो । तह संपय सीसंतं सव्वं गोयम! निसामेसु ॥ ५ ॥

श्रीगुणचंद
महावीरच०
८ प्रस्तावः

॥ ३१९ ॥

सालिसीसयंमि गामे भदिलो नाम माहणो, सोमदिन्ना य से भारिया, तेसिं च कोरिंटगो नाम पुत्तो अचंतवि-
रूवो, कहं?—

मुहवाहिविणिग्गयदीहविरलदंतग्गभग्गउट्टउडो । करहसिसुपुच्छसत्थहविप्फुट्टमुहरोमदोप्पेच्छो ॥ १ ॥

मज्जारककडच्छो अइटप्परकन्नधोरजुयलिकखो । अचंतकविलदेहो पायडदीसंतनसजालो ॥ २ ॥

संपज्जंततहाविहभोयणजायंतउदरपूरोऽवि । कयमासुववासो इव अचंतं किसियसवंगो ॥ ३ ॥

इय सो पुव्वकियकम्मदोसओ गाममज्झयारम्मि । दुइंसणत्तणेणं हीलाठाणं परं जाओ ॥ ४ ॥

एयारिसे य तम्मि जोवणपत्ते जणणिजणगेहिं चिंतियं—कहं एस कलत्तभोगी भविस्सइ?, जओ सव्वायरम-
ग्गियावि न सग्गामवासिणो दिंति एयस्स कन्नयंति । अन्नया दूरयरगामवासिणो वंभणस्स वड्डकुमारी बहुदविण-
दाणपुव्वयं वरिया अणेहिं से निमित्तं, जाए य लग्गसमए कोरिंटगं कयसिंगारचारुवेसं समादाय गयाइं तत्थ, तत्थ
पारद्धो विवाहोवक्कमो, रइया वेइगा, पज्जालिओ वयमहुसणाहो हुयासणो, पइविट्ठो वेइगामंडवंमि कोरिंटगो,
तक्खणं चिय दिट्ठो तीए वड्डकुमारीए, तं च पलोइऊण सचमक्कारं भणियमणाए—

अहह किमेस पिसाओ इहागओ? अहव रक्खसो वावि? । किं वा कयंतपुरिसो? नहु नहु तत्तोऽवि भीमयो ॥ १ ॥

सहि! पेच्छ पेच्छ कीलेव विलइओ दिवभूसणसमूहो । एयंमि पावरूवे कहमवि नेवावहइ सोहं ॥ २ ॥

अनर्थदंडे
कोरण्टक-
कथा.

॥ ३१९ ॥

पारद्वंमि विवाहे लक्खिज्जइ एस धूमकेउव । ता भायइ मज्झ मणो सहसा एयंमि दिट्ठंमि ॥ ३ ॥

सहिए भणियं-सुयणु ! मा एवमुल्लवसु, एसो तुज्झ पाणनाहो भविस्सइ, तीए भणियं-सहि ! सच्चमेयं ?, एस मे पाणनाहो भविस्सइ ?, तीए भणियं-सहि ! सच्चमेयं होही ?, सहिए भणियं-को इत्थ विब्भमो ?, वड्डकुमारीवि जइ परं पराभवित्ति भणिरूण विसायवसविसप्पमाणत्तिवसंतावा सणियं सणियमवक्कमिरूण जणमज्झयाओ पुरोहडा-वडंमि निवड्डिया वेगेण, तओ जाव इओ तओ समीवट्ठियजणविमुक्कहाहारवनिसामणेण धाविओ उत्तारणत्थं जणो ताव अइपउरसलिलत्तणेण कूवस्स अवस्संभवियवयाए विणासस्स मया एसा, विगयजीविया य बाहिं पक्खित्ता कूवयाओ, कओ से सरीरस्स सक्कारो, ताणि य कोरिंटगजणणिजणगार्इणि जणेण हीलिज्जमाणानि गयाणि सग्गामं, भणिओ य तेहिं एसो-वच्छ ! कोरिंटग तुह परिणयणनिमित्तं न सो कोऽवि उवाओ जो न कओ, केवलं तुह कम्मपरिणइवसेण सव्वो विहलत्तणं पत्तो, ता मा सुणिहिसि जहा अम्मापियरो ममं उवेइगाणित्ति, तेण भणियं-पुव्वकयकम्ममेव एत्थ अवरज्झइ, का तुम्ह उवेहा ?, जइ खुज्जओ दूरमूसवियवाहुवि फलं न पावइ ता किं कप्पतरुवरस्स वयणिज्जंति ?, एवं च तेसिं परोप्परोल्लावेण जाया रयणी, अह तेसु निब्भरपसुत्तेसु परमं चित्तपरितावमुव्वहंतो कोरिंटगो नीहरिओ गेहाओ, पयट्ठो तित्थदंसणत्थं, कमेण य दट्ठूण सयललोइयतित्थाइं गहिया अणेण कावालियतवस्सिदिक्खा, सुणिओ तदरिसणाभिप्पाओ, सिक्खियाइं भूमिलक्खणपमुहाइं विन्नाणाइं ।

श्रीगुणचंद
महावीरच०
८ प्रस्तावः
॥ ३२० ॥

इओ य कुसग्गपुरे नयरे अरिमइणो नाम राया, तस्स य पर्यइए चिय दयादाखिन्नविवेयसच्चविसिद्धबुद्धिसंगओ
सुमई नाम अमच्चो, तेण य राइणा कारावियं महंतं सरोवरं, आरोविओ पालीसु विचित्ततरुसमूहो, चउसुवि पासेसु
कयाओ अणाहसालाओ, निरुवियाइं अवारियसत्ताइं, तस्स य सरोवरस्स अचंतभरिअस्सवि विवरदोसेण कइवयदि-
णमेत्तेणवि सुसंतं सलिलमवलोइऊण विसन्नेण जंपियं रत्ता-अहो निरत्थओ दच्चक्खओ जाओत्ति, परियणेण भणियं-
देव ! मा संतप्पह, पूरिज्जउ एस सिलाईहिं विवरो, जइ पुण एवं कए न विप्पणस्सइ सलिलं, रायणा भणियं-
एवं कीरउ, तओ तक्खणं चेव कट्टसिलाइट्टगाहिं पूरिओ सो विवरो, जाए य वरिसयाले निवडंतुहामसलिलधा-
राहिं भरियं सरोवरं, तं कहियं च नरेहिं नरवइणो ।

ताहे तुट्ठो राया पलोयणट्ठा गओ सयं तत्थ । जावऽच्छइ खणमेगं उन्निन्नो ताव सो विवरो ॥ १ ॥

पुणरवि पुव्वपवाहेण पाणियं तेण विवरमग्गेण । अणिवारियप्पयारं पायाले गंतुमारद्धं ॥ २ ॥

तं दट्ठूण नरिंदो सोगमहासलपीडिओ झत्ति । मंताइसत्थकुसलं पुरलोयं वाहरावेइ ॥ ३ ॥

भणइ य तुम्हे सत्थत्थपारया ता कहेह सलिलमिमं । पायाले वचंतं ठाइस्सइ केणुवाएणं ? ॥ ४ ॥

परिचित्तिऊण सम्मं पयंपियं तेहिं देव ! विन्नाणं । नेवऽत्थि एत्थ वत्थुमि अम्ह किं साहिमो तेण ? ॥ ५ ॥

अह नरवइणा भणियं तहावि साहह किमेत्थ कायवं ? । मा विफलं चिय वच्चउ सुचिरेमं वेवियं दवं ॥ ६ ॥

अनर्थदंढे
कोरुण्टक-
कथा.

॥ ३२० ॥

तेहिं भणियं-देव ! जइ एवं ता नगरस्स वाहिं विदेसियसालासु य पवामंडवेसु य देवमंदिरेसु य पहियसमू-
हभीलगेसु य तवस्सिजणासमेसु य निरुवेह पुरिसे, पुच्छावेसु य तन्निवासिलोयं विवरपूरणोवायं, जइ पुण तेहिंतो
कोइ कं पि उवायं कहेज्जा, राइणा भणियं-साहु जंपियं, बहुरयणा वसुंधरा, किमिह न संभविज्जत्ति अणुमन्निऊण
तवयणं जहाभणियं सवट्ठाणेसु विसज्जिया पुरिसा, ते य जहाभणियविहीए समारद्धा पुच्छिउं ।

इओ य सो कोरिंटगकावालिओ इओ तओ देसंतरेसु परिभमंतो मंततंतोसहीसंगहं कुणंतो धाउवायखन्नवायप-
मुहदबोवज्जणोवायं परिचितंतो समागओ तमेव पुरं, ठिओ देसियसालाए, सवप्पयारेहिं अपुवुत्तिकाऊण सविणयं
पुच्छिओ सरोवरविवरपूरणोवायं रायपुरिसेहिं,

एत्थंतरंमि तेणं नियविन्नाणावलेवनडिएण । भणियं साहंकारं कित्थियमेत्तं इमं मज्झ ? ॥ १ ॥

रायपुरिसेहिं कहियं-जइ एवं एहि ता नरिंदपुरो । पयडसु नियविन्नाणं लहसु पसिद्धिं धरावलए ॥ २ ॥

एवं च सो वुत्तो समाणो अप्पणो विन्नाणेण तिहुयणंपि तणं व मन्नंतो पट्ठिओ तेहिं समं रायउलं, कमेण य पत्तो
अत्थाणमंडवं, भुणित्तिकाऊण पणमिओ राइणा, दवावियं आसणं, निसन्नो एसो, पत्थावे य पुरिसेहिं निवेइओ
रन्नो तदम्भुवगमो, तओ हरिसवियसियच्छेण भणिओ रन्ना एसो-भो रिसिवर ! करेसु पसायं, पणासेसु सरोवरस्स
विवरं जेण तण्हापरिसुसियसरीरो चउच्चिहोवि भूयग्गामो सुहेण सवकालं जहिच्छाए जलपाणं कुणइत्ति, कोरि-

श्रीगुणचंद
महावीरच०
८ प्रस्तावः

॥ ३२१ ॥

टगेण भणियं—महाराय ! केत्तियमेत्तं एयं ?, दंसेह तं विवरं जेण तदुच्चियमुवायं साहेमि, एवं वुत्ते दंसिओ सो पएसो, तेणवि तं समंतओ पलोइऊण भणियं—महाराय ! जइ एत्थ विवरे कसिणचउइसीए टप्परकन्नं मंकडवन्नं वोक्कडकुचं तालसरूवं कक्कडयच्छं अइवीभच्छं वंभणगोत्तं संजमवंतं पुरिसं खिवेह दिसिदेवयाण वलिदाणपुव्वगं नूणं ता मिलइ एस विवरो, न नीरमुवरमइ थेवंपि, एवं तेण कहिए राइणा सब्बत्थ गामागराइसु पेसिया पुरिसा, निभालिउमारद्धा य जहोवइट्टुगुणविसिट्ठं वंभणं, कत्थवि अपेच्छमाणेहि य तेहिं पडिनियत्तिऊण नियेइयं नरिंदस्स, तओ संभंतचित्तेण भणियं राइणा—भो सुमइअमच्च ! किमेवं अम्ह धम्मकज्जे निरुज्जमो तुमं ? न संपाडेसि जहोवइट्ठं वंभणंति, इमं च निसामिऊण चित्तियं मंतिणा—अहो धम्मच्छलेण पावज्जणं मुद्धलोयस्स, अहो अणत्थदंडपंडियत्तणं पासंडियाहमस्स, जं एवंविहं पावट्ठाणमुवइसंतेण न गणिओ पंचिंदियविणासो न परिचित्तिओ वंभणहच्चाकलंको न परिकलिओ नियतवलोवो, अहवा किमणेणं ?, तहा करेमि जहा पावोवएससमुलाववंळा इयरलोयस्सवि न जायइत्ति परिभावि-ऊण भणियमणेण—देव ! जारिसो अणेण पुरिसो कावालियमुणिणा समाइट्ठो तारिसो एसो चेव जइ परं हवइ, ता देव ! धम्मट्ठाणे एत्थ जइ एसो चिय खिप्पिही ता किमजुत्तं जाएज्जा ?, ‘इष्टं धर्मे नियोजये’दिति लोकेऽपि कथ्यते, राइणा भणियं—एवं होउ। अह समागए चउइसीवासरे सो चिय कोरिंटगो जहोवइट्ठविहिणा “हितं न वाच्यं अहितं न वाच्यं, हिताहितं नैव च भाषणीयम्। कोरिंटकः स्नाह महात्रती यत्, स्ववाक्यदोषाद्विवरं विशामी ॥१॥” ति

अनर्थदंडे
कोरण्टक-
कथा.

॥ ३२१ ॥

पुणरुत्तं विरसमारसंतो बला चेव पक्खित्तो वियरम्मि पाविओ य विणासंति ।

अह सच्चत्थवि नयरे वित्थरियं जहा कवालियतवस्सी । नियजीहादोसेणं पंचत्तं पाविओ विवसो ॥ १ ॥

ताहे सच्चोऽवि जणो भासागुणदोसचित्तणुज्जुत्तो । सुमुणिव संपयत्तो किमसकं मरणभीयाण ? ॥ २ ॥

इय तुज्झ मए कहिओ गोअम ! उच्छिखलुल्लवणरूवो । जमदंडोव पयंडो अणत्थदंडो दुहोहकरो ॥ ३ ॥

तिन्निवि (एयाइं मए) भणियाइं गुणवयाइं एत्ताहे । चत्तारिवि सीसंती (सिक्खाइं) निसुणसु तं गोअमसगोत्त ! ॥ १ ॥

सावज्जेयरजोगाण वज्जणासेवणोभयसरूवं । सामाइयंति तेसिं पढमं सिक्खावयं होइ ॥ २ ॥

मणवयणकायदुप्पणिहाणं इह जं न उ विवज्जेइ । सयकरणयं अणवट्टियस्स तह करणयं च गिही ॥ ३ ॥

सामाइए उज्जुत्ता अविचलचित्ता सुरोवसग्गेऽवि । होंति भवपारगामी सत्ता नणु कामदेवोव ॥ ४ ॥

जह कामदेवसद्धो संमत्तं पाविओ ममाहिंतो । सामाइए निक्कंपो सुरोवसग्गेऽवि तह सुणसु ॥ ५ ॥

चंपानयरीए विजियमंडलो जियसत्तू नाम राया, कामदेवो सेट्टी, नियनियकम्मसंपउत्ता कालं वोळित्ति, अन्नया य गामाणुगामं विहरंतो अहं तत्थ समोसद्धो, तओ उज्जाणपालगेहिं विन्नत्तो राया, जहा-देव ! भवियकमलवो-
हणदिवायरो चरिमतित्थयरो सहसंबवणुज्जाणे समोसद्धोत्ति, एवं सोच्चा रत्ना दिन्नं तेसिं महंतं पारिओसियं,
दवाविओ नयरीए पडहगो-जहा नायकुलकेउणो महावीरस्स भगवओ वंदणत्थं पत्थिवो निगच्छइ, ता भो

श्रीगुणचंद
महावीरच०
८ प्रस्तावः
॥ ३२२ ॥

लोगा ! आगच्छेह भगवंतं वंदिउंति भणिए तक्कालमिलियपुरज्जणसमेओ समागओ राया ममंतियं । इओ य सो कामदेवो पासायतलासीणो एगाभिमुहं जणनिवहमवलोइय परियणमापुच्छेइ-किं नं देवाणुप्पिया ! एस पुरज्जणसमुदओ एगदिसाए नीहरइ ?, एयमट्टमुवलभिय साहेह, तेहिं निच्छिऊण निवेइयं, जहा-तिहुयणेकनाहो जिणो समोसहो तच्चंदणवडियाए पुरलोगो वच्चइ, तओ सो समुप्पन्नसद्धाइसओ ण्हाओ चंदणोवलित्तगतो चाउग्घं-टरहारुढो अप्पमहग्घाभरणभूसिओ सियकुसुमदामोवसोहिओ निग्गओ नयराओ, समोसरणासन्ने य ओइन्नो रहवराओ पमुक्ककुसुमदामो परिहरियतंबोलो कयमुहसुद्धी एगसाडीएणं उत्तरासंगेणं चक्खुफासे अंजलि-पग्गहेणं मणसो एगत्तीभावेण य पविट्ठो समोसरणे, तिवक्खुत्तो आयाहिणपयाहिणं काऊण वंदिओ अहं, उवविट्ठो सट्ठाणे, निसामिए धम्मे संजायधम्मपरिणामो संमत्तमूलाइं पंचाणुवयाइं तिन्नि गुणवयाइं चत्तारि सिक्खावयाइं भावसारं पडिवज्जिय गिहमुवगओ, पालेइ निरइयारं सावगधम्मं । अन्नया य कुडुंवर्चिताए जेट्टपुत्तं ठवित्ता पोसह-सालाए पडिमापरिकम्मकरणट्ठा सामाइयं पडिवज्जिय ठिओ रयणीए काउसग्गेणं, एत्थंतरंमि तच्चभावनिच्चलत्तं परिकिखउं एगो तस्स समीवे ठाउं सुरो सरोसं इमं भणइ-

रे रे वणियाहम ! धम्मकम्ममेवं समुज्झसु जवेणं । पाविट्ठ कोऽहिगारो तुह एरिससाधुचेट्ठासु ? ॥ १ ॥
मा पविसअकाले चिय कयंतमुहकुहरमुग्गदाढिलं । मम वयणं अवगन्निय पुत्तकलत्ताइपरियरिओ ॥ २ ॥

सामायिके
कामदेव-
कथा.

॥ ३२२ ॥

एवं वुत्तोवि न जाव कंपिओ सो तथा महासत्तो । ताव परुट्ठो देवो गइंदरूवं विउवेइ ॥ ३ ॥
 तयणंतरमुल्लालियपयंडसुंडो घणोव गज्जंतो । वेगेण धाविकुणं गेण्हइ तं सावयं झत्ति ॥ ४ ॥
 सवत्तो गत्तं विह्वेइ चलणेहिं पक्खिवइ गयणे । तत्तो निवडंतं पुण पडियच्छइ दंतकोडीहिं ॥ ५ ॥
 एवं बहुप्पयारं तं पीडिय कुणइ भुयगरूवं सो । पच्छा तिकखाहिं दढं दाढाहिं तणुं विदारेइ ॥ ६ ॥
 तहविहु अखुच्चमाणे गिहिप्पहाणंमि कामदेवंमि । रक्खसरूवं काउं उवसरगं काउमारद्धो ॥ ७ ॥
 अह खणमेगं घोरट्टहासकरतालतालणं काउं । परिसंतो सो तियसो भत्तीए तयं इमं भणइ ॥ ८ ॥
 भो कामदेव ! सावय तियसोऽहं तुज्झ सत्तनाणट्ठा । एत्थागओ महायस ! ता पसिय वरेसु वरमेत्तो ॥ ९ ॥
 थेवोऽविहु उवयारो विहिओ तुम्हारिसे गुणनिहिंमि । अस्संखसोक्खखंधस्स कारणं होइ निब्भंतं ॥ १० ॥
 एवं भणिओऽवि सुरेण सायरं वरमुणिव थेवंपि । जाव न स कामदेवो कहमवि पच्चुत्तरं देइ ॥ ११ ॥
 ताव नमंसिय चरणे उक्कित्तिय गुणगणं च से तियसो । परमच्छरियमुवगओ जहागयं पडिनियत्तो य ॥ १२ ॥
 इयरोऽवि धम्ममाराहिकुण तइए भवंमि निघाणं । सायत्ताणंदसुहं पाविस्सइ निहयकम्मंसो ॥ १३ ॥
 इय जइ गिहिणोऽवि समुज्जमंति धम्मंमि निचला धणियं । ता उज्झियगिहवासा तवस्सिणो किं पमायंति ? ॥ १४ ॥
 एवं वीरेण जिणेसरेण जइणो पडुच वागरिए । सविसेससंजमुज्जयचित्तो जाओ समणसंघो ॥ १५ ॥

श्रीगुणचंद
महावीरच०
८ प्रस्तावः
॥ ३२३ ॥

इय जह सामाइयनिचलत्तणं कामदेवसहेणं । भवभयभीएण कयं अन्नेणवि तह विहेयवं ॥ १ ॥
दिसिवयगहियस्स दिसापरिमाणस्सेह पइदिणं जं तु । गमणपरिमाणकरणं बीयं मिक्खावयं ॥ १ ॥
वज्जइ इह आणयणप्पओगपेसप्पओगयं चेव । सहाणुरुववायं तह वहिया पोग्गलक्खेवं ॥ २ ॥
इहलोयंमिवि पइदिण दिसपरिमाणंमि कीरमाणंमि । उभएवि नो अणत्था सागरदत्तस्स व ह ॥ ३ ॥
गोयमसामिणा भणियं-जयगुरु ! को एस सागरदत्तो ? कहं वा तस्स दिसिवयपरिमाणसेव ॥ इहपारभविया-
णत्थप्पणासो जाओत्ति साहेसु, महंतमिह कोऊहलं, भगवया जंपियं-परिकहेमि, पाडलिसंडे नयेर धणसारस्स
इब्भस्स सुओ सागरदत्तो नाम, सो य असेसवसणसयसंपरिग्गहिओ दुल्ललियगोटीए परिगओ, तेहिं तेहिं पयारेहिं
दवविणासमायरइ, अन्नया य विणट्टंमि दवसारे गओ सो देसंतरेसु, पारद्धा य वहवे दविणोवज्जणीवाया, समासा-
इयाइं कइयवि दीणारसयाइं, तेहिंवि गहिऊण किंपि भंडं गओ सिंधुदेसं, विणिवट्टियं तं च, षड्ढिओ बहुलाभो,
जाओ से परितोसो, चित्तिउमारद्धो य-अहो किं इमिणा अत्थेण ? जो नियसुहियसयणवग्गस्स न जाइ विणि-
ओगं ?, ता गच्छामि निययनयरं, पेच्छामि जणगं, समप्पेमि तस्स अत्थसंचयं, दुप्पडियारो सु सो महाणुभावो,
विविहाणत्थसत्थेहिं मए संताविओ य इति परिभाविऊण गहियपवरजचतुरंगमो पयट्ठो पाडलिसंडपुराभिमुहं,
अविच्छिन्नपयाणएहिं इंतस्स अद्धपहेच्चिय जाओ वासारत्तो, अणिवारियपसरा निवडिया सलिलकुटी, पवूढा गिरि-

देशावका-
शिके साग-
रदत्तकथा.

॥ ३२३ ॥

नईओ, नचहरियसदलं जायं धरणिमंडलं, नियनियगेहाइसु अलीणो पहियसत्थो, वहलचिक्खलोलत्तणेण दुग्गमी-
 हूया भूमिमग्गा, तओ सो गंतुमसमत्थो तत्थेव य छाइऊण ठिओ, अन्नदिवसे य चरमाणं तुरंगमाणं अणुमग्ग-
 लग्गो जाव किच्चियं भूभागं वच्चइ ताव गिरिगुहागओ एगचलणोवरिनिहियसव्वंगभारो धम्मनिचओव मुत्तिमंतो
 उवसंतपरोप्परवेरेहिं हरिहरिणसदूलसूयरपमुहतिरिएहिं परिचत्तचरणपाणिएहिं उवासिज्जमाणो चउमासतयोविसेसं
 पडिवन्नो दिट्ठो अणेण अज्जसमिओ नाम चारणो मुणिवरो, तं च दट्ठूण परमविम्हयमुव्वहंतेण चिंतियं सागरदत्तेण-
 अहो अच्छरियमच्छरियं जमच्चंतदुट्ठसत्तावि एवमेयं महामुणिं पज्जुवासंति, न सव्वहा हवइ एस सामन्नविक्रमो, ता
 दंसणमवि एयस्स पवित्तयाकारणं, किं पुण विसेसवंदणंति समुच्छलियनिब्भरभत्तिपब्भारनिस्सरंतरोमंचो समीवे
 गंतूण पंचंगपणिवायपुरस्सरं निवडिओ से चलणेसु, मुणिणावि उस्सरग्गं पाराविऊण भवोत्तिकाऊण धम्मलाभेण
 पडिलामिओ एसो, तओ हरिसवियसियच्छिणा भणियं सागरदत्तेण—भयवं ! किमेवं अइदुकरं समायरह तुब्भे तवं ? किं
 वा निवसह एवंविहे एगंतवासे ?, को वा फलविसेसो एयस्स दुरणुचराणुट्ठाणस्स ?, मुणिणा भणियं—भो महाणुभाव !
 एयस्स अवस्सविणस्सरस्स सरीरस्स एस चेव लाभो जमणुट्ठिज्जइ संजमो, एसो य मणसो एगत्तीकरणमंतरेण न सम्मं
 तीरइ काउं, अओ एगंतवासो सुतवस्सीहिं सेविज्जइ, जं च तए भणियं—किमेअस्स फलं ?, तत्थ सुंदर ! निसामेसु ।

नरतिरियाइदुग्गइनिवायसंभवसुत्तिकखदुक्खाइं । दोगच्चवाहिवेयण जरमरणपमोक्खवसणाइं ॥ १ ॥

श्रीगुणवन्द
महावीरच०
८ प्रस्तावः

॥ ३२४ ॥

लीलाए चिय उम्भूलिऊण सच्चरियसंजमा पुरिसा । वच्चंति सिवपयं जेण तेण (महयं) फलं तस्स ॥ २ ॥
एत्तो चिय सप्पुरिसा रज्जं लच्छि च भोगविच्छडुं । एकपए चिय मोत्तुं संजमजोगं पवज्जंति ॥ ३ ॥
ते धन्ना कयपुन्ना ते चिय कल्लाणकोसभूया य । जे परलोयसुहावहमेगं धम्मं उवचिणंति ॥ ४ ॥
तत्तो सागरदत्तेण जंपियं जायपरमसद्धेण । भयवं ! भुवणच्छरियं एकं चरियं परं तुज्झ ॥ ५ ॥
पढमयए चिय जेणं विणिज्जिओ दुज्जओ विसमन्नाणो । उम्भूलिओ य मोहो निग्गहिओ कोहजोहोऽवि ॥ ६ ॥
विद्धंसिओ य लोभो पणासिओ सव्वहाऽभिमाणोऽवि । नियडिक्कुडंगीगहणं निदहं ज्ञाणजलणेण ॥ ७ ॥
एवंविहेण तुमए पवित्तियं तिहुअणपि नीसेसं । भवकूवे निवडंतो जाओ लोगोऽवि सालंबो ॥ ८ ॥
एको अहं अधन्नो जो तुच्छेहियसुहस्स कज्जेणं । अज्जवि तुम्ह समीवे पवज्जं नो पवज्जामि ॥ ९ ॥
चिंतामणिलाभंमिवि अहवा जो जेत्तियस्स किर जोगो । सो लहइ तत्तियं चिय ता मम उचियं कहइ धम्मं ॥ १० ॥
एवं तेण भावसारं निवेइए नियथाभिप्पाए पयडिओ साहुणा सम्मत्तमूलो दुवालसवयसणाहो सावगधम्मो,
गहिओ अणेण, तओ कइवयवासराइं परिचत्तवावारंतरो तमेव सावगधम्मं सप्पभेयं मुणिणो समीवे सम्मं वियाणिऊण
समागए सरयसमए उवसंतासु गिरिसरियासु वडंतसु पहिएसु ते जच्चतुरए गहाय गओ नियनयरं, दिट्ठो जणगो,
समप्पियं च से दविणजायं, जाओ य इमस्स परितोसो, सो य सामाइयाइधम्मनिरओ कालं वोलेइ । अवरंमि य वासरे

देशावका-
शिके साग-
रदत्तकथा.

॥ ३२४ ॥

कओ सागरदत्तेण दिसिगमणसंखेवो, जहा अज्ज अहोरत्तंपि न गेहाओ बाहिं नीहरिस्सामित्ति, एत्थ य पत्थावे चरणद्वया गया ते जच्चतुरगा, हरिया दोहिं चोरेहिं, तदवहरणं च निवेइयं रक्खगेहिं सागरदत्तस्स, तेणावि नियध-
म्माणुट्ठाणनिच्चलचित्तत्तणेण निसामिऊणवि न दिन्नं पञ्चुत्तरं, सयणवग्गोवि लग्गो जंपिउं-अहो सागरदत्त ! किमेवं कट्टसमो मोणमवलंबिय चिट्ठसि ? न धावसि चोराणुमग्गओ, जओ गोसामिए उदासीणे तयणुचरा कह पयट्ठंति ?,
सागरदत्तेण भणियं-होउ किंपि, न विराहेमि मणागंपि नियवयं, तओ निच्छयमुवलम्भ रोसेण जहागयं पडिनि यत्तो सयणवग्गो, इओ य-ते दोऽवि तक्करा पिट्ठओ कुडियमित्तमपेच्छमाणा निम्भया निरुद्धिग्गा गंतुं पयत्ता, गच्छंताण
य नीसेसतुरगगहणलोभदोसेण समुप्पन्नो दोणहंपि परोप्परं वहपरिणामो, तओ भोयणसमए पविट्ठा एगंमि गामे, कारावियं रंधणीगिहेसु पुढो पुढो थालीसु भोयणं, पक्खित्तं च अणलक्खिज्जमाणेहिं तत्थ दोहिवि महाविसं, सिद्धे
य भोयणे कयतकालोचियकायवा अमुणियावरोप्पराभिप्पाया उवविट्ठा भोयणं काउं, अह पढमकवल-
कवलणेऽवि अभिभूया ते विसविगारेण, निवडिया महीयले, कओ महाणसिणीए कलयलो, मिलिओ गामलोगो, क-
हिओ अणाए वुत्तंतो, ते य विसाभिभूया गया तक्खणमेव पंचत्तं, तुरंगमावि निस्सामियत्तिकाऊण रक्खिया
गामजणेण, इओ य-सागरदत्तो पडिपुन्नंमि देसावगासियनियमे जिणर्बिबूयापडिवात्तिं काऊण कइवयपुरिस-
पक्खित्तो चलिओ तुरयाणुमग्गेण, अच्चंतविसिट्ठसउणोवलंभे य जायलाभनिच्छओ समुप्पन्नचित्तुच्छाहो अविलंबि-

श्रीगुणचंद
महावीरच०
८ प्रस्तावः

॥ ३२५ ॥

यगईए संसुहमागच्छन्तं पहियलोयं तुरयपउत्तिमापुच्छंतो कम्मधम्मसंजोएण पत्तो तं चेव गामं, पुट्टो य तन्निवासि-
जणो, तेणावि समप्पिया तुरगा, कहिओ य चोरवुत्तंतो, सागरदत्तेणऽवि साहिओ गामलोगस्स नियमवइयरो, अओ
जिणिंदधम्मपसंसा ॥

अह सागरदत्तेणं चिंतियमुप्पन्नभवविरागेण । जह जिणधम्मपभावो पच्चक्खं चिय मए दिट्ठो ॥ १ ॥
ता किं अज्जवि वामूढमाणसो तिक्खदुक्खदायारं । घरवासं पासंपिव सयखंडं नेव तोडेमि ? ॥ २ ॥
इय चिंतिऊण चत्ताइं तेण सवाणि पावठाणाणि । गहिया जिणिंददिकखा सिवसुहभागी य जाओ य ॥ ३ ॥
इय इंदभूइ ! सिक्खावयस्स वीयस्स पालणे भणियं । फलमेत्तो तइयं पुण भणिमो सिक्खावयं ताव ॥ ४ ॥ १० ॥
आहारदेहसकारबंभवाचारचागनिप्फणं । इह पोसहंति वुच्चइ तइयं सिक्खावयं पवरं ॥ १ ॥
दुविहं च इमं नेयं देसे सवे य तत्थ सबंमि । सामाइयं पवज्जइ नियमा साहुव उवउत्तो ॥ २ ॥
अप्पडिदुप्पडिलेहियऽपमज्जसेज्जाइ वज्जइ एत्थ । सम्मं च अणणुपालणमाहाराईसु सवेसु ॥ ३ ॥
पोसेइ कुसलधम्मे जं ताहाराइचागणुट्ठाणं । इह पोसहोत्ति भण्णइ विहिणा जिणभासिएणेव ॥ ४ ॥
पाणंतिगोवसग्गेऽवि पोसहं धेत्तु जे न खंडंति । जिणदासो इव ते सुरसुहाइं मोक्खं च पावंति ॥ ५ ॥
गोयमसामिणा भणियं—भुवणेक्कदिवायर ! को एस जिणदासो ?, भयवया वागरियं—साहेमि, वसंतपुरे नयरे

देशावका-
शिके साग-
रदत्तकथा.

॥ ३२५ ॥

अच्चंतभवविरत्तचित्तो सच्चलुवइट्टपरमत्थभाविमई जिणदासो नाम सावगो, नावव पडिकूलचारिणी मंगलमुत्तिव
 तिच्चरागाणुगया मंगला नाम से भारिया, सो य बहुसो सामाइयपोसहतवोविसेसनिसेवणाभिरओ पच्चजं पडि-
 वज्जिउकामो बलतुलणं करेइ । सा य से भारिया अच्चंतसंकिलिट्ठयाए उक्कडवेयत्तणेण समणं व तं विजियमयण-
 वियारमवलोइऊण फरुसगिराए निम्भच्छंती भणइ—

हे मुद्ध ! धुत्तलोएण वंचिओ तंसि विज्जमाणेवि । जो भोगे वज्जित्ता अविज्जमाणं महसि मोक्खं ॥ १ ॥
 निल्लक्खण ! दुरणुचरं तवोविसेसं निसेविउं कीस । सोसेसि नियसरीरं ? किं अप्पा वेरिओ तुज्झ ? ॥ २ ॥
 जइ तं विसयविरत्तो पढमं चिय ता न कीस पच्चइओ । जाओ ? जमिण्ह मं परिणिऊण एवं विडंबेसि ॥ ३ ॥
 अहं तं ममनिरवेक्खी जहाभिरुइयं करेसि एवं च । अहमवि तुह निरवेक्खा जं भावइ तं करिस्सामि ॥ ४ ॥
 एवं तीए मज्जायवज्जिए जंपियंमि जिणदासो । उवसमभाविमचित्तो महुगिराए इमं भणइ ॥ ५ ॥
 भहे ! सद्धम्मपरम्मुहासि निम्मेरमुलवसि तेण । तुच्छेऽवि विसयसोक्खे कहऽन्नहा होज्ज पडिबंधो ! ॥ ६ ॥
 थोयं जीयं जरमरणरोगसोगाऽणिवारियप्पसरा । एवं ठिएवि कह सुयणु ! कुणसि तं विसयवामोहं ? ॥ ७ ॥
 तीए(ता) भणियं होउ अलं तुज्झ सद्धम्मदेसणाए ममं । सयमवि नट्टो दुचेट्ट ! धिट्ठ अन्नं पि नासेसि ॥ ८ ॥
 इय तीए दुट्ठनिट्ठरमुहीए दुब्बिणयमूलभूमीए । निम्भच्छिओ समणो जिणदासो मोणमल्लीणो ॥ ९ ॥

श्रीगुणचंद
महावीरच०
८ प्रस्तावः
॥३२६॥

अन्नया य चउद्दसिदिणंमि पडिवन्नो अणेण उववासो गहिउं चउविहंपि पोसहं, ठिओ य गिहेगंतभूयाए जाण-
सालाए निसिमि काउस्सग्गेण, मंगलावि मयरद्धएण वाहिज्जमाणी उज्झियकुलाभिमाणा अगणियाववाया नीय-
गामिणीउ कामिणीउत्ति य पवायं सच्चवित्तिव घडिया सह विडेण, गेहजणलज्जाए पयडं चिय अकज्जमायरिउ-
भपारयंती पुवदिन्नसिंगारेण विडेण सद्धि रयणीए समागया तं चेव जाणसालं, अच्चंधयारत्तणेण काउस्सग्गट्ठियं
जिणदासमपेच्छमाणीए तंमि चेव पएसे पक्खित्तो लोहकीलगतिक्खपइट्ठाणो पलंको अणाए, तक्कीलगेण य समी-
ववत्तिणो जिणदासस्स विद्धो सहायकोमलो चलणो, सा य विडेण सद्धिमकज्जमायरिउमारद्धा ।

जिणदासो पुण अइतिक्खलोहकीलगविभिन्नचलणतलो । उप्पन्नगाढवियणो चित्तिउमेवं समाढत्तो ॥ १ ॥
मा ! जीव काहिसि तुमं मणागमेत्तंपि चित्तसंतावं । सयमवि दिट्ठे विलिए भज्जाए अकज्जसत्ताए ॥ २ ॥
जं परमत्थेण न एत्थ कोऽवि भज्जा व सयणवग्गो वा । किंतु सकज्जविणासे सवंपि परंमुहं ठाइ ॥ ३ ॥
अविय-तावच्चिय दंसइ पणइभावमायरइ ताव अणुकूलं । निययत्थविसंवायं जाव न पेच्छइ पणइलोगो ॥ ४ ॥
ता एयाए धम्मत्थसुन्नचित्ताए एत्थ को दोसो ? । इत्थीसभावओ चिय दुग्गेज्झा वुच्चई जेण ॥ ५ ॥
अइरक्खियावि अइपालियावि अइगाढरूढपणयावि । वाढं उवयरियाविहु देइ दुरंतं भयं महिला ॥ ६ ॥
एत्तो चिय मुणिवसभा सुबुद्धिमाहप्पमुणियपरमत्था । पच्चक्खरक्खसीहि व महिलार्हि समं न जंपंति ॥ ७ ॥

पौपथे
जिनदास-
कथा.

॥ ३२६ ॥

ता ते चिय इह धन्ना सुलद्धनियजम्मजीवियफला य । जे उज्झिऊण महिला संजमसेलं समभिरूढा ॥ ८ ॥
 धन्नो सणंकुमारो जो पुरमंतेउरं सिरिं रज्जं । उज्झित्ता निक्खंतो परमप्पा भोक्खसोक्खकए ॥ ९ ॥
 एको अहं अधन्नो जो कुलडाए अणत्थमूलाए । दुट्ठमहिलाए कज्जे एवं वुत्थोऽम्हि घरवासे ॥ १० ॥
 अहवा समइकंतत्थसोयणेणं इमेण किं बहुणा ? । एत्तोवि सबविरइं भावेणाहं पवज्जामि ॥ ११ ॥
 इय चिंतिऊण तेणं तिविहंतिविहेण चोसिरिय संगं । पंचपरमेद्धिमंतो पारद्धो सरिउमणवरयं ॥ १२ ॥
 अह पच्चलचलणपीडोवक्कमियाऊ चइत्तु नियदेहं । भासुरसरीरधारी देवो वेमाणो जाओ ॥ १३ ॥
 आउक्खयंमि तत्तो सो चविऊणं विदेहवासंमि । निट्ठवियकम्मगंठी पाविस्सइ सासयं ठाणं ॥ १४ ॥
 इय गोवम ! निचलमाणसस्स जिणभणियधम्मकज्जंमि । जायइ जीवस्स धुवं अकालखेवेण सिवलाभो ॥ १५ ॥ ११ ॥
 भणियं तइयं सिक्खावयं इमं संपयं पुण चउत्थं । एदंपज्जसमेयं जह होइ तहा निसामेह ॥ १ ॥
 अन्नार्हणं सुद्धाण कप्पणिज्जाण देसकालजुयं । दाणं जईणमुचियं चउत्थ सिक्खावयं एयं ॥ २ ॥
 सच्चित्तनिक्खिणयं वज्जइ सच्चित्तपिहणयं चेव । कालाइकम परववएस मच्छरिय पंचेव ॥ ३ ॥
 अन्नार्हण पयाणं निचंपिय होइ गिहिज्जणस्सुचियं । जइणो पडुच्च किं पुण पोसहउववासपारणए ? ॥ ४ ॥
 अतिहीण संबिभागं नूनमकाउं न जे पजीमंति । ते साहुरक्खिओ इय देवाणवि होंति महणिज्जा ॥ ५ ॥

श्रीगुणचंद्र
महावीरच०
८ प्रस्तावः
॥ ३२७ ॥

गोयमेण जंपियं—भुवणत्तयसामिसाल ! साहेसु को एस साहुरक्खिओ?, कहं देवमहणिज्जोत्ति, भगवया वागरियं—
आयन्नसु—अत्थि सयलदिसावलयविकखाया वाणारसी नाम नयरी, तहिं वसू नाम राया, सबंतेउरपहाणा वसुमई
देवी, वणियलोयसम्मओ जिणपालिओ सेट्ठी, जिणमई से भारिया, एयाणि चत्तारिवि परमसावगाणि परोप्परं
परुढगाढपेम्माणि य एक्कचित्तत्तणेणं जिणधम्मं पालित्ति, अन्नया सेट्ठिणी नरिंदपत्ती य पंचवन्नसुरहिकुसुमदहि-
यक्खयसुगंधिगंधधूववासपडिपुन्नपडलकरपरियरियाओ गयाओ जिणालयं, विरइया अणेगविच्छित्तिमणहरा सब-
न्नाविवाण पूया, तओ विचित्तथुइथुत्तदंडएहिं सुचिरं जिणं थुणिऊण पयाहिणं दाउं वाहिं नीहरिया, ताहिं एगत्य
पएसे अचंतदुइंसणो मच्छियाजालाभिणिभिणारावभीसणो वणमुहनिस्सरंतकिमिसंवलियपूयप्पवाहो सडियंगुलि-
नासोट्ठो कुट्टवाहिविणट्टदेहो दिट्ठो एगो पुरिसो, तं च दट्ठूण देवीए भणियं—भो महाणुभाव ! कीस सबन्नूणमासा-
यणं इहट्ठिओ करेसि?, तेण भणियं—नाहमेत्थ निवासत्थी समागओ, किंतु चेइयवंदणत्थं, सेट्ठिणीए भणियं—देवि !
जइ इत्तियमेत्तमेव पओयणं पडुच्च अच्छइ ता अच्छउ, को दोसो?, जओ सुस्समणावि जाव चेइयाइं वंदंति
वक्खाणं वा करिंति सिणाणं वा पेच्छंति (सिस्साणं वायणं वा पयच्छंति पु.) ताव जिणभवणे निवसंति, देवीए
भणियं—तहावि विणट्टसारीरत्तेण न जुज्जइ एयस्स अच्छउं, अहवा निट्ठीवणाइं अकरिंतो सम्ममुवउत्तो निमेसमिसं
जिणविवावलोयणेण अप्पणो समाहिमुप्पाएउ, किमजुत्तं?, सेट्ठिणीए भणियं—एवमेयं, को महाणुभावस्स एयस्स

अतिथि-
संविभागे
साधुरक्षित-
कथा.

॥ ३२७ ॥

अवराहो?, दुष्पडियाराणि पावकम्माणि एवंविहाहिं विडंबणाहिं कयत्थिति निस्सरणं पाणिगणं, देवीए भणियं-
अलमुच्चावयभणियवेणं, भो महाणुभाव ! साहम्मिओत्तिकाऊण पूयणिज्जोसि तुमंति ता साहेसु-किं ते पियं की-
रउ?, तेण जंपियं-किमेत्थ कायवं अत्थि?, पुर्विं दुच्चिन्नाणं कम्माणं फलविवागमणुहवंतस्स समाहिमरणं चिय मे
पत्थियव्वं, तंयि भागविवज्जएण दुल्लंभं व लक्खिज्जइ, ताहिं भणियं-कहमेवं जाणिज्जइ?, कुट्टिणा भणियं-अहं
मंदभग्गो, अइसइणा भणियं-जहा तुमं मरणकाले सम्मत्तं वमिहिसि तेणेमं जाणामि, चित्तसंतावं च उव्वहामि,
ताहिं जंपियं-भइ ! तुह जइ एवं ता विसममावडियंति, एवं च खणमित्तं विगमिऊण विम्हियमणाओ गयाओ
ताओ सगिहं । अन्नंमि य वासरे चउनाणोवगओ सूरतेओ नाम सूरी समोसरिओ, तओ सेट्ठिणी देवी य गया
तवंदणत्थं, सुया धम्मकहा, पत्थावे य पुच्छियं ताहिं-भयवं ! पुवं चेइए गयाहिं अम्हेहिं जो कुट्टी दिट्ठो सो कीस
संमत्तं मरणसमए वमिही?, सूरिणा भणियं-सो पज्जंतसमए माणुस्सेसु आउवंधं काऊण उप्पज्जिही, न य गहिय-
सम्मत्तो अणंतरभवे मणुअत्तं तिरियत्तं वा पावइ, जेण भणियं-

सम्महिट्ठी जीवो विमाणवज्जं न वंधए आउं । जइ उ न संमत्तजडो अहव न वद्धाउओ पुर्विं ॥ १ ॥

रायपत्तीए भणियं-कहिं पुण सो उव्वज्जिही?, सूरिणा जंपियं-एयाए सेट्ठिणीए पुत्तत्ताएत्ति, एवं सोचा वि-
म्हियाओ वंदिय सूरिं नियत्ताओ ताओ सगिहं, निरूवाविओ भाविपुत्तसिणेहेण सो कोट्टी सेट्ठिणीए, न य कहंचि

श्रीगुणचंद
महावीरच०
८ प्रस्तावः

॥ ३२८ ॥

दिट्ठो, अइकंतेसु य कइवयवासरेसु सो मरिऊण पाउब्भूओ तीए सेट्ठिणीए गम्भे, जाओ य पडिपुन्नदियहेहिं, कयं वद्धावणयं, समागओ राया सह वसुमईए देवीए, कयमुचियकायवं सेट्ठिणा, तं च देवकुमारोवमं दारयं पेच्छिऊण भणियं देवीए-भो जिणमइ ! पेच्छ अच्छरियरूवं कम्मपरिणइं,

नीणंतपूयपवहो भीसणवणनिस्सरंतकिमिजालो । मच्छीहिं भिणिभिणंतो सडियंगुलि गलियनासोट्ठो ॥ १ ॥

एवंविहो वराओ तुज्झ गिहे पवरविहवकलियम्मि । उववन्नो कयपुन्नो सो कोट्ठी कह विसिट्ठंगो ? ॥ २ ॥

सेट्ठिणीए भणियं-देवि ! एवंविहे संसारविलसिए परमत्थेण न किंपि अच्छरियमत्थि, जओ-कम्मवसवत्तिणो पाणिणो केण केण पयारेण न परिणमंति?, देवीए जंपियं-एवमेयं, अह अइकंते वारसाहे कयं से नामं सादुरक्खियत्ति, कालेण य पत्तो कुमारभावं, गाहिओ कलाओ, संपत्तजोवणो सोहणंमि तिहिमुहुत्तंमि परिणाविओ इब्भकन्नगं, विवाहपज्जंते य समाहूओ सेट्ठिणा देवीए समेओ राया, पूइओ पहाणरयणाभरणवत्थसमप्पणेण, पाडिओ ताण चलणेसु नववहसणाहो सादुरक्खिगो, सो य देवीए सहासं भणिओ-वच्छ ! पेच्छ तं तारिसं इमं च एरिसं, सादुरक्खिएण भणियं-अंब ! न याणामि इमस्स अत्थं, एवं च तेण कहिए हसियं सहत्थतालं परोप्परं देविसेट्ठिणीहिं, तओ रत्ता जंपियं-सेट्ठि ! किमेयाओ हसंति?, सेट्ठिणा भणियं-देव ! अहंपि सम्मं न याणामि, अओ ममावि कोउगं, पुच्छउ देवो, तओ पुच्छियं रत्ता-देवि ! किमेवं तए वागरियं?, सबहा साहेहत्ति वुत्ते तीए

अतिथि-
संविभागे
साधुरक्षित-
कथा,

॥ ३२८ ॥

सिद्धो पुबुत्तो कुट्टिवुत्तंतो, तं च सोच्चा सुमरियपुबभवो साहुरक्खिओ परं निवेयमावन्नो संसारवासस्स । अन्नया य तप्पुन्नपब्भारसमागरिसिओव समागओ विजयघोसो नाम सूरी, पउरलोगेण समं सो गओ तव्वंदणत्थं, सविणयं पणमिऊण निसन्नो गुरुचलणंतिए, सुया धम्मदेसणा, तहाविहकम्मक्खओवसमेण जाओ से देसविरइपरिणामो, पडिवन्नो य सूरिसमीवे दुवालसरूवो सावगधम्मो, अन्नया य अट्टमीए कओ अणेण पोसहोववासो, इओ य कप्पसमत्तीए विहरिया सूरिणो, सो य पारणगदिवसे पोसहं पाराविऊण उचियसमए अतिहिसंविभागं काउमणो पडिओ य साहुसमीवे, गेहाओ नीहरंतो य भणिओ जणणीए—वच्छ ! कहिं वच्चसि?, भुंजेसु ताव सिद्धं वट्ठइ, साहुर-क्खिएण भणियं—अम्मो ! अतिहिसंविभागवयं पडिवज्जिय कहं गुरुणो असंविभाइय सयं भुंजामि ?, ता वाहरामि ताव साहुणो, तीए भणियं—पुत्त ! विहरिया अन्नत्थ भयवंतो किं न याणसि तुमं ?, एवं तीए कहिए गहिओ सो रणरणएण समाहओ सोगेणं पारद्धो अरईए, नियत्तिऊण य पडिओ मंचिए, चिंतिउमाढत्तो य—

कह पोसहोववासो कओ मए ? कह व विहरिया गुरुणो ? । अन्नं चित्तियमन्नं च निवडियं मंदभग्गस्स ॥ १ ॥

अहवा मरुत्थलीए किं कप्पतरु कयावि उग्गमई । मायंगमंदिरे वा लज्जइ अइरावणो हत्थी ? ॥ २ ॥

आजम्मरोरगेहे विसट्ठकंदोट्टदलविसालच्छी । लच्छी कयावि पविसइ करयलरेहंतसरसिरुहा ? ॥ ३ ॥

श्रीगुणचंद
महावीरच०
८ प्रस्तावः
॥ ३२९ ॥

अम्हारिसस्स किं वा पुन्नविहीणस्स एत्थ पत्थावे । अधरियचिंतामणिणो सुणिणो भिक्खट्ठया इति ? ॥ ४ ॥
सग्गापवग्गसंसग्गमूलहेज्जवि मज्झ पावस्स । एवं च निरणुबंधो मन्ने सम्मत्तलाभोऽवि ॥ ५ ॥
इय सो जाव अट्टदुहट्ठो सोगसमुदयरुद्धकंठो अच्छइ ताव जणणीए पुणो भणिओ—अहो पुत्त ! मा चिरावेहि,
करेसु भोयणंति, साहुरक्खिएण भणियं—अम्मो ! अलाहि भोयणेण, जइ समणे एत्थ पत्थावे सहत्थेण न पडि-
लाभेमि ता निब्भंतं न भुंजामि, एत्थंतरे तद्देसमागएण दिट्ठो सो देवेण, तओ चित्तियमणेण—अहो महाभागस्स
परिणई अहो निययसरीरनिरेक्खया, ता तहा करेमि जहा पारेइत्तिविगप्पिऊण अणेण विउच्चिओ साहुसंघाडगो,
पविट्ठो तस्स गेहे, तं च पेच्छिऊण ससंभमं भणियं जणणीए—पुत्त ! तुह पुन्नोदएण आगया कत्तोऽवि साहुणो,
ता एहि सहत्थेण पडिलाभेसु संपयं, एवं सोच्चा अणणसरिसं हरिसुल्लासं वहंतो झत्ति परिचत्तसयणिज्जो वंदिऊण
तवस्सिणो परमभत्तीए पडिलाभिऊण य कयकिच्चमप्पाणं मझंतो केत्तियंपि भूभागमणुगमिय नियत्तिओ सगिहं,
गिलाणाइचितं च काऊण जिमिओत्ति । एवं सो उभयलोगसाहगो जाओ ।

इय गोयम ! संखेवेण तुज्झ कहियाइं बारस वयाइं । एत्तियमेत्तो य इमो सावधम्मस्स परमत्थो ॥ १ ॥
एयस्स सेवणेणं गंतूण भवन्नवस्स पज्जंतं । पत्ता अणंतजीवा सासयसोक्खंमि मोक्खंमि ॥ २ ॥
ते धन्ना सप्पुरिसा तेहिं सुलद्धं च माणुसं जम्मं । जे भावसारमतुलं एयं धम्मं पवज्जंति ॥ ३ ॥

अतिथि-
संविभागे
साधुरक्षित-
कथा.

॥ ३२९ ॥

ता गोअम ! जं तुमए पुच्चं पुट्ठोमिह कह भवम्म जिआ । पुणरुत्तमणंतदुहोहपीडिया परिभमंतित्ति ? ॥ ४ ॥
 तत्थेमं चिय नणु मूलकारणं जन्न सहसिं विरइं । सम्मत्तगुणसणाहं भणियविहाणेण गिण्हंति ॥ ५ ॥
 एवं कहिए तित्थंकरेण गिहिधम्मवित्थरे तुट्ठो । पयवीढलीढसीसो पढमो सीसो जिणं थुणइ ॥ ६ ॥
 जय तियलोयपियामह ! वम्महमाहप्पनिहलणधीर ! । ललणासिंगारुम्भडकडक्खेवेऽवि अक्खुम्भ ! ॥ १ ॥
 भवगत्तपडंतजणोहसरण रणरहिय महिय तियसेहिं । नायकुलंबरपुन्निभमयंक ! जय जय निरायंक ! ॥ २ ॥
 एगेणवि जह तुमए पयत्थसत्था जए पवित्थरिया । तह अन्नतित्थिएहिं न समत्थेहिवि मणागंपि ॥ ३ ॥
 तुह अत्थसारलेसं मन्ने रोरव तित्थिया येत्तुं । जाया अनन्नमाहप्पगच्चिया नाणविभवेण ॥ ४ ॥
 जं न हणिज्जइ दिणयरकरपसरपईवजोइरयणेहिं । चित्तम्भंतरलीणं तंपि तमं पडु ! हयं तुमए ॥ ५ ॥
 असरिसं जयगुरुगुरुभत्तिपभावनिस्सरंतरोमंचो । इय थोऊण निविट्ठो सट्ठाणे गणहरवरिट्ठो ॥ ६ ॥
 एत्थंतरे दुवालसवयदेसणानिसामणसमुप्पन्नभववेरग्गेहिं केहिवि पडिचन्ना देसविरई, अन्नेहिं उज्झियाइं मिच्छत्त-
 कायवाइं, केहिवि गहिया सबविरई । इओ य सेणियनरिंदो थोवमेत्तंपि विरइं काउमसमत्यो तित्थाहिवं पणमिऊण
 भणिउमाढत्तो—भयवं ! जो अचंतमहारंभो महापरिग्गहो सवहा विरइरहिओ सो कहं भवन्नवं नित्थरिस्सइ ?
 जयगुरुणा भणियं—भो नरिंद ! सेणिय ! देसविरइं वा सबविरइं वा काउमपारयंतो सम्मत्ते निच्चलो होज्जा, एवं

श्रीगुणचंद
महावीरच०
८ प्रस्तावः

॥ ३३० ॥

जयगुरुणा उवइष्टे तहत्ति पडिवज्जिऊण जहागयं पडिगओ राया नमंतमउलिमंडलो, देवलोगं पट्टिया आखंडला, विइकंता पढमा पोरसी । अह चारणगणेहिं थुवंतो जयगुरू सिंघासणाओ समुट्टिऊण पुवं चिय सुरविरइयंमि देवच्छंदयंमि सुहसेज्जाए निसन्नो । गोयमसामीऽवि कप्पोत्तिकाऊण भगवओ मणिपायपीढासीणो धम्मदेसणं काउमारद्धो । सो य केत्तियं पुवभवाइं साहइ ? केरिसो वा लक्खिज्जइ ?, तत्थ भन्नइ—

संखाईए उ भवे साहइ जं वा परो उ पुच्छेज्जा । न य णं अणाइसेसी वियाणई एस छउमत्थो ॥ १ ॥

असुरसुरखयरकिन्नरनरतिरिया मुक्कसेसवावारा । सवणंजलीहिं तहेसणामयं परिपियंति दढं ॥ २ ॥

आइक्खइ गणनाहो धम्मं ता जाव पोरिसी बीया । पच्छा पइदिणकिच्चं सामायारिं समायरइ ॥ ३ ॥

एवं च समइकंतेसु कइसुवि वासरेसु एयंमि वासरे सिंहासणे निसन्नस्स वद्धमाणस्स नियनियट्ठाणनिविट्ठे चउ-
विहेवि देवनिकाए पंजलिउडं पज्जुवासमाणे य सेणियमहानरिंदे एगो सुरो मायासीलयाए कुट्टिरूवं विउवि-
ऊण सरसगोसीसचंदणरसच्छडाहिं सरीरविणिस्सरंतपूयसंकाकारिणीहिं भयवओ समीवमल्लीणो चलणकमलवि-
लेवणं काउमारद्धो, तं च तहाविहं दुगुंछणिज्जरूवं पेच्छिऊण चित्तियं सेणिएण—अहो को एस दुरायारो गलंत-
गाढकोढसुट्ठियसरीरदुग्गंधगंधयाहेण दूमितो सयलंपि परिसं भुवणेक्कगुरुणो समीवट्ठिओ एवं अच्चासायणं
कुणइ ?, अहवा कुणउ किंपि ताव उट्ठियाए पुण परिसाए अवस्सं मए निग्गहियवोत्ति विकप्पंतेण छीयमाणेण

गणधरदे-
शना ददु-
रांक देवा-
गमः

॥ ३३० ॥

अह कोट्टिसुरेण भणियं-जीवसुत्ति, मुहुत्तंतरे य बोलीणे छिक्कियमभयकुमारेण, पुणो तेण भणियं-जीवाहि वा मराहि वा, कालसूयरिण छीए भणियं-मा जीव मा मर, समइकंते य खणंतरे भुवणेकगुरुणा छीयं, भणियं-मर-सुत्ति, तं च सोचा अच्चंतजिणनाहपक्खवाएण वियंभियपवलकोवानलेण राइणा भणिया समीववत्तिणो पुरिसा-अरे एयं दुरायारं गुरुपच्चणीयमुट्ठियाए परिसाए हत्थे घेत्तूण मे समप्पेज्जह जेण दंसेमि दुव्विणयफलं, तेहिं भणियं-जं देवो आणवेइत्ति, अह जायंमि पहरपज्जवसाणे सट्ठाणं पट्ठिएसु तियसेसु सो कुट्ठिसुरो जयगुरुं परमायरेण पणमिऊण गंतुमारद्धो, ते य पुरिसा नरिंदाएसमणुवत्तंता तं घेत्तुमुवट्ठिया, तयणंतं च एस गओ एस गओ सो कुट्ठी एवमु-ल्लवंताण रायपुरिसाण पुरओ देवो अहसणं पत्तो, [इय वाहरंतेहिं] तेहिं विलक्खीभूयमाणसेहिं निवेइयमेयं राइणो, अह बीयदिवसे परमकोऊहलमुव्वहंतेण रत्ता पत्थावे पुच्छिओ जयगुरू-भयवं! अइकंतवासरे तुम्हं समीववत्ती कुट्ठ-विलीणकाओ अधिभावणिज्जसरूवो को पुरिसो आसि?, भयवया जंपियं-महाराय! देवो, सो संपयं दहुरंकविमाणे समुप्पन्नो, रत्ता भणियं-कहं चिय?, भगवया वागरियं-निसामेसु,

अत्थि वच्छाविसए कोसंबी नाम नयरी, तहिं च सयाणिओ नाम नरवई, साडुयगो नाम माइणो, सो य ज-म्माणंतरमेव रुंददारिद्रोवद्वपीडिओ कहकहवि कणवित्तीए कालं गमेइ, अन्नया य आवन्नसत्ताए खरमुहीनामाए भज्जाए भणिओ एसो-भो बंभण! आसन्नो पसवसमओ, न य घरे घयंतदुलाइं अत्थि, ता कीस निर्वित्तो चिट्ठसि?

श्रीगुणचंद
महावीरच०
८ प्रस्तावः

॥ ३३१ ॥

तेण भणियं-महे ! पइदिणभिक्षाभमणेण नट्ठा मे बुद्धी, ता तुमं जेव साहेसु को एत्थ पत्थाये दवज्जणोयाउत्ति ?, तीए भणियं-गच्छ, पत्थिवं ओलग्गेसु सत्तायेरेण, न तं विणा अवणिज्जइ दालिहंति बुत्ते सो पइदिणं कुसुमहत्तो पत्थिवं ओलग्गिउमाढत्तो, अन्नया य अणुकूलयाए विहिणो से विणवमवलोइऊण तुट्ठो राया, भणियं च तेण-भो बंभण ! मग्गसु जहिच्छियंति, तेण भणियं-देव ! बंभणिं आपुच्छिऊण मग्गामि, अणुमन्निओ रत्ता गओ गेहंमि, भणिया बंभणी-महे ! तुट्ठो राया, ता साहेसु किमहं पत्थेमि ?, तीए भणियं-पइदिवसमग्गासणे भोयणं दीणारं दक्खिणाए दिणमज्झे एगवारं ओसारयं च पत्थेहि, एत्तिग्गमेत्तेण चेव तुज्झ पओयणं, किमन्नेण किलेसायासनि-बंधणेण अहिगाराइणत्ति ?, पडिस्सुयमणेणं, निवेइयं च एयं रत्तो, पडिवन्नं च तेण, एवं च राइणो पुरो पइदिणं भुंजमाणो जाओ सो महाघणो, रायाणुवित्तीए य पइदिणमामंतिज्जइ भोयणकरणे य मंतिसामंतेहिं, दक्खिणालोभेण य सो गले अंगुलीपक्खेवपुच्चयं पुच्चभुत्तभोयणं वमिऊण पुणो पुणो अवरावरगिहेसु भुंजमाणो गहिओ कुट्टवाहिणा, संभिन्ना सत्तेवि तस्स सरीरावयवा, दुहंसणोत्ति पडिंसिद्धो राइणा, तट्टाणे से पइट्ठिओ जेट्ठपुत्तो, सो य रायउलंमि भोयणं लहइ, इयरो य वेलाए भोयणभेत्तमवि अपावमाणो पुत्तेहिं एगंतपरिचत्तो परिभूयमप्पाणं कलिऊण हिययंतो अमरिसमुद्यंतो चित्तेइ-अहो अकयन्नुओ खलसहावो य पुत्ताइपरियणो जेण मं एवं परिभवइ, ता तहा करेमि जहा एयस्सवि एसा अवत्था इवइत्ति चित्तिऊण वाहराविओ तेण जेट्ठपुत्तो, भणिओ य-वच्छ ! बहुरोगभरविहुरियस्स

सेइक-
द्विजकथा.

॥ ३३२ ॥

तुम्हारिसमुहकमलपलोयणेऽवि असमत्यस्स मे न जुज्झइ खणंपि जीविउं, केवलं वच्छ ! अस्स कुले एस समाचारो-
 मंतेहिं पसुं चिरमभिमंतिऊण कुटुंबस्स भक्खणत्थं पणामिज्झइ, पच्छा अप्पा उवसंहरिज्झइ, एवं कए पुत्ताइसंता-
 णस्स कल्लाणं हवइ, ता संपाडिज्झउ मे एको पसू जेणऽहं तद्दा करेमि, परितुट्ठेण समप्पिओ पुत्तेण, तेणावि न्या-
 इणा अप्पाणं अब्भंगिऊण उच्चलणियाओ पइदियहं भुंजावंतेण कुट्टवाही संचारिओ तस्स, वाहिसंभिन्नगतं च तं
 सुणिऊण आइओ तेण जेट्ठपुत्तो, भणिओ य-पुत्त ! एस पसू भए अभिमंतिओ वट्ठइ, ता तुमं सपरियणो एयमंस-
 सुवभुंजसु जेण कल्लाणभागी भवसि, अहंपि सरीरचायं करेमि, तद्दा कयं पुत्तेण, संकंतो य तम्मंसभोयणेण सपरि-
 यणस्स तस्स कुट्टवाही, तओ पहिट्ठहियओ सो निग्गओ नयराओ, पइदिणं गच्छमाणो पत्तो महाडविं च, तत्थ य
 गिम्हुम्हकिलंतो तण्हासुसियकंठो सलिलन्नेसणत्थं इओ तओ परिब्भमंतो गओ एगं गिरिनिगुंजं, दिट्ठं च तत्थ विचि-
 त्तकसायतरुपत्तपुप्फफलरसपागकलिलं सलिलं, तं च आकंठं पीयमणेण, तच्चसेण य जाओ से विरेगो, निवडियाइं कि-
 भिजालाइं सुज्झिउमारद्धं सरीरं, एवं च अणुदिणं तप्पाणेण पणट्टकुट्टवाही जायपुणन्नवसरीरो नियत्तिऊण गओ
 सगिहं, तहिं च गलंतकुट्टविणट्टदेहं पुत्ताइपरियणं दट्ठूण सामरिसं जंपियं तेण-अरे पेच्छइ नियदुच्चिलसियाणं
 कडुवियागं, तेहिं भणियं-कहं चिय ?, एवं पुच्छिए तेण सिट्ठो पुबबुत्तंतो । ताणि य एवमायन्निऊण रुट्ठाइं अको-
 सिउमारद्धाइं । कहं चिय ?—

श्रीगुणचंद
महावीरच०
८ प्रस्तावः
॥३३२॥

रे पावकम्म ! निग्घिण ! चिलायसमसील ! एरिसं काउं । अज्जवि अम्हाण पुरो कह नियवयणं पयासेसि ? ॥ १ ॥
मायंगाणवि अणुचियमेवंविहकम्ममायरंतेण । नरयंमि पाडियाओ कुलकोडीओ असंखाओ ॥ २ ॥
दुज्जम्मजाय ! तुमए लोयपवाओऽवि एस किन्न सुओ । जं सकरवट्ठिओ विसतरुत्ति नो छिंदिउं जुत्तो ? ॥ ३ ॥
इय गेहजणेण बहुप्पयारदुव्वयणदूमियसरीरो । तत्तो विणिक्खमित्ता संपत्तो एत्थ नयरम्मि ॥ ४ ॥
खुहाभिहओ य अल्लीणो नयरदुवारपालस्स, तेणावि किंपि भोयणविसेसं दाऊण भणिओ-अरे इह दुवारदे-
वयाए समीवट्ठिओ चिट्ठेज्जासु जाव अहं भयवंतं महावीरं वंदिऊण आगच्छामित्ति, पडिवन्नं च तेण, इयरोऽवि
आगओ मम वंदणत्थं, तत्थ य पत्थावे ऊसवविसेसवसओ पुरनारीजणो बलिपूयलियाईहिं तीसे दुवारदेवयाए पूयं
करेइ, सो य माहणो रोरव अच्छिन्नवंछो तं वलिं भक्खिऊण पकामाहारेण रयणीए समुप्पन्नतण्हो अइभरियपो-
ट्टत्तणेण अंतो अमायंते सलिलंमि अट्टज्झाणोवगओ मरिऊण इहेव नयरादूरवत्तिणीए पउरजलभरियाए वावीए
दहुरो जाओ, तत्थ य जाव पज्जत्तीभावमुवागओ ताव निसामेइ जलवाहिविलयाणं परोप्परोल्लावं, जहा-हले ! हले
सिग्घं पयच्छसु मे मगं जेण कयकायवा झत्ति भयवंतं महावीरं वंदामित्ति, एयं च सुणंतस्स कत्थवि मए एस
सहो सुयपुट्ठोत्ति ईहापोहमग्गणं कुणंतस्स समुप्पन्नं से जाईसरणं, सुणिओ पुव्वजम्मो, तओ अहंपि तं भयवंतं
वंदामित्ति चिंतिऊण भत्तीए नीहरिओ वावीओ, पयट्ठो आगंतुं रायमग्गेण, तत्तखणं च तुह तरलतुरयखरखुरप्प-

सेहुक-
द्विजकथा.

॥ ३३२ ॥

हारजज्जरियसरीरो सुहज्जवसायवसेण मओ समाणो दहरंके विमाणे देवत्तणेणमुप्पत्तो, अवहिमुणियपुव्ववइयरो य मम वंदणत्थं आगओ । ता देवाणुप्पिया ! न एस कुट्ठी, किंतु-सुरोत्ति ॥

सेणिएण भणियं-भयवं ! कीस पुण इमेण मया छीए भणियं-जीव, अभयकुमारेण छीए-जीव वा मर वत्ति, कालसूयरिएण छिकिए-मा जीव मा मर, तुब्भेहिं छीए भणियं-मरसुत्ति, जयगुरुणा जंपियं-सुणासु एत्थ कारणं-तुमं हि जीवमाणो रज्जसुहमुवभुंजसि, मरणे य नरयं गमिस्ससि, अओ अणेण महाणुभावेण भणियं-जीवसुत्ति । अभयकुमारोऽवि धम्मनिरतत्तणेण सावज्जवज्जणरई ता तस्स जीवमाणस्स रायलच्छिभोगो मयस्सवि सुरसोक्खलाभो, अओ जंपियं जीव वा मर वत्ति, कालसूयरिओऽवि जीवमाणो अणेगनिरवराहपाणिगणघायेणण बहं पावमज्जिणइ, मओ पुण नियमा नरयगामी, तेण भणियं-मा जीव मा मरत्ति, अवि य—

अइदुट्ठकम्मवसओ अवस्स रतव नरयठाणेण । नरनाहार्इण परं जीवियमेकं हवइ सेयं ॥ १ ॥

तवनियमसुट्ठियाणं कल्लाणं जीवियंपि मरणंपि । जीयंतऽज्जंति गुणा मयावि पुण सोग्गइं जंति ॥ २ ॥

अहियं मरणं अहियं च जीवियं पावकम्मकारीणं । तमसंमि पडंति मया वेरं वहंति जीवन्ता ॥ ३ ॥

जं च मए छीयंमि मरसुत्ति भणियं तत्थवि इमं निमित्तं-तुमं किमिह मच्चलोए विविहावयानिवासभूए वससि?, जं न माणुस्सं विग्गहमुज्झिऊण एगंतसुहं सिवं गच्छसित्ति ।

श्रीगुणचंद
महावीरच०
८ प्रस्तावः
॥ ३३३ ॥

अह सेणियनरिंदो पुबुत्तनरयनिवडणायन्नणजायगाढसोगावेगो भणिउं पवत्तो-भयवं ! समरगभुवणत्तरक्खाव-
बद्धलक्खे तुमंमि सामिसाले किं मए नरए गंतव्वं ? जेण—

तुह नाममेत्तसंकित्तणंपि नासइ दिणुब्भवं पावं । कमकमलपलोयणमवि विणिवारइ दुरियरासिंपि ॥ १ ॥

एक्केणऽवि तुह चलणोवरिंमि खित्तेण नाह ! कुसुमेण । चोज्जभिणं रुंदाणिवि नरयदुवाराइं रुज्झंति ॥ २ ॥

एकोऽवि नमोकारो कीरंतो तुज्झ सामि ! भत्तीए । जायइ हेऊ सग्गापवग्गसंवाससोक्खाणं ॥ ३ ॥

ता वाहिरोगसोगुब्भवाइं दुक्खाइं नाह ! विलसंति । जाव न सवणपुडेहिं पविसइ वयणामयं तुज्झ ॥ ४ ॥

ता कह णु नाह ! तुह नाममंतसारक्खरेहिं चिंतंतो । सेलुबुक्किन्नेहिवि होज्जा मे नरयबुहलाभो ? ॥ ५ ॥

दुग्गइगत्तम्भंतरपडंततेलोकएकसाहारे । नाहे तुमएवि ममं एवंविहवसणमावडियं ॥ ६ ॥

धी धी निरत्थयं मज्झ जीवियं मंदभग्गसिरमणिणो । जं एरिससामग्गीयवि जस्स इमा दुग्गई जाया ॥ ७ ॥

इय एवंविहअइगाढसोगविगलंतनयणसलिलेण । नरवइणा जयगुरुणो विन्नत्तं नरयभीएण ॥ ८ ॥

एवं च ससोगजंपिरं पुहईवइं अवलोइऊण करुणाभरमंधरनयणेण भणियं जिणेण-भो देवाणुप्पिय ! कीस संता-
वमुव्वहसि ? जइविय सम्मत्तलाभाओ पुव्वमेव निवद्धाऊत्ति नरए निवडिस्ससि तहावि लद्धं तुमए लहिअव्वं, जओ

श्रेणिकस्व
पश्चात्तापः
भाविजिन-
तोक्तिश्च.

॥ ३३३ ॥

खाइगसम्मदिट्ठी तुमं, आगमिस्साए य उस्सप्पिणीए तत्तो उवट्ठित्ता पउमनाभनामो पढमत्तिथयरो भविस्ससि ।
एवं निसामिऊण पहिट्ठो राया भणिउमाढत्तो—

जइ तित्थयरो होहामि नाह ! तुह पायपूयणपसाया । ता थेवकालिया नरयवेयणा मज्झ किं काही ? ॥ १ ॥
किं चोज्जं जयबंधव ! जं तुह सरणेवि मारिसेहिं लहुं । भुवणब्भुयभूयाइं सामिय ! सोक्खाइं लब्भंति ? ॥ २ ॥
अहवा किं सोऽवि पट्टु सेविज्जइ जोग्गयंपि दट्ठूण । जो अत्तणो न तुलं देइ पयं सेवगजणस्स ॥ ३ ॥
एवंविहवरकल्लाणदायगं जाणिउंपि जो न तुमं । सेवेइ जो न मणुओ सो नूणं अत्तणो सत्तू ॥ ४ ॥

एवं सुचिरं जयगुरुं अभिनंदिऊण नयरं पविट्ठेण सेणिएण वाहरिओ मंतिसामंतअंतेउरपमुहो जणो, भणिओ
य-जो जयगुरूणो समीवे पव्वज्जं पडिवज्जइ तमहं न वारेमि, एवं सोच्चा वहवे कुमारामंतिणो सामंता अंतेउरीजणो
नायरलोगो य निक्खंतो भयवओ समीवे, कइवयदिणावसाणे य अणेगार्हि देवकोडीहिं अणुगम्ममाणो भगवं वद्ध-
माणो बहिया विहरिउमारद्धो ।

एगया तद्दिणदिविखयाणंपि थेवपव्वजापजायाणं मुणीणं केवलनाणमुपज्जमाणमवलोइऊण जायसंसओ जयगु-
रुमापुच्छइ-भयवं ! किमहं केवलालोयभागी भविस्सामि न वा ?, सामिणा जंपियं-भो देवाणुप्पिय ! मा संतप्पसु,
अंते तुल्ला भविस्सामोत्ति, इमं सोच्चा तुट्ठो गोयमो । अह भयवं तेसु तेसु पुरागराइसु अइमुत्तयलोइज्झयअभय-

श्रीगुणचंद
महावीरच०
८ प्रस्तावः
॥ ३३४ ॥

कुमारधन्नयसालिभद्वखंदयसिवपमुहं भवजणं पद्माविऊण चंपापुरिं वचंतो विन्नविओ सालमहासालरायरिसीहिं-
सामि ! तुम्हाणुण्णाए अम्हे पिट्ठिचंपाए जामो, जइ पुण तहिं गयाण सयणवग्गस्स सम्मत्ताइलाभो जावइत्ति वुत्ते
गोअमसामीं नायगं तेसिं दाऊण भुवणिकवंधवो गओ चंपापुरिं, तहिं च पुव्वकमेण विरइयंमि समोसरणे निसन्नो
जयगुरु, आगओ चउच्चिहो देवनिकाओ नयरजणो य, पत्थुया तित्थाहिंवइणा धम्मदेसणा, तत्थ केणइ पत्थावेण
सामिणा इमं वागरियं-जो नियसत्तीए अट्ठावयं विलग्गइ सो तेणेव भवेण सिज्झइ, इमं च सोच्चा विम्बियमणा देवा
अन्नमन्नस्स कहिउं पवत्ता । इओ य गोअमसामी पिट्ठिचंपाए नयरीए सालमहासालाणं भगिणीसुयं गागलिनरिंदं जण-
णीजणगसमेयं पद्माविऊण इयरजणं च धम्मे ठाविऊण चंपानयरीहुत्तं गंतुं पयट्ठो, तेसिं च सालमहासालाणं अम्मापि-
उसमेयस्स गागलिमुणिणो य सुहज्झाणवसाओ समुप्पन्नं केवलं नाणं, एवं ताणि उप्पन्ननाणाणि अलक्खियसरूवाणि
मग्गंमि इत्ति । अह गोअमसामी तं जयगुरुवइट्ठं अट्ठावयारोहसिद्धिलाभरूवं देवपवायं सुणेइ, तेण य विम्बियहियओ
पत्तो जिणंतिंयं, तओ तिपयाहिणापुव्वगं पणमिऊण जयगुरुं जाव मग्गओ पलोयइ ताव सालमहासालाइणो सामीं
पयक्खिणेउं 'नमो तित्थस्स'त्ति भणित्ता केवलपरिसामिमुहं पट्ठिए दट्ठूण भणइ-भो भो कहिं वच्चइ?, एत्तो एह,
सामीं वंदइत्ति, सामिणा भणियं-गोअम ! मा केवली आसाएहि, ताहे सो खामेइ, संवेगमुवगओ चित्तेइ य-अहो
इमेहिं महाणुभावेहिं थेवपवज्जापज्जाएणवि पावियं पावणिज्जं, अहं पुण सुचिराणुचरियसामन्नोऽवि न केवलालो-

गागल्यादि
शालादि-
केवलं.

॥ ३३४ ॥

यमुवलभामि, ता किमिह कीरइ?, अहवा किमणेण चिंतिएण?, वच्चामि अट्ठावयं, जेण देवेहिं इममाइट्ठं—जो किर ससत्तीए अट्ठावयमारोहइ सो तेणेव भवेण सिज्झइत्ति, एवं च चिंतयतस्सं तस्सं अभिप्पायं अट्ठावयकडगवासि- तावसोवयारं च मुणिऊण भणियं जिणेण—भो गोयम! चेइयवंदणट्ठमट्ठावयसेलं वच्चसुत्ति, तओ भयवं गोअमो पहि- ट्ठहियओ पट्ठिओ अट्ठावयं, तहिं च अट्ठावए तमेव सुरप्पवायं निसामिऊण पत्तेयं पत्तेयं पंचपंचतावससयपरि- वारा कुंडिन्नदिन्नसेवालयाणामाणो तिन्नि कुलवइणो जहक्कमचउत्थल्लट्ठमपारणगदिणेसु सचित्तकंदमूलाइपरिसडि- यपंडुपत्तसुकसेवालभोइणो पढमवीयतइयभेहलासु समारूढा समाना तक्खणं चिय तरुणतरणिभासुरोदारसरीरं गोयमसामीं तं पएसमणुपत्तं दट्ठूण जंपंति—अहो किमेस पीवरसरीरो समणो आरुहिही जं अम्हे महातवस्सिणो तवकिसियसरीरा न तरामो आरुहिउं?, एवं च तेसिं जंपंताणं भयवं गोअमो जंवाचारणलद्धीए लूयातंतुरविकर- मेत्तेपि निस्साए काऊण अविलंबियगईए समारूढो अट्ठावयं, अह तंमि चक्खुगोयरमइक्कंतंमि ते तिन्निवि कुल- वइणो विम्बिहयमाणसा चिंतंति—जइ एस महप्पा इमिणा पहेण ओयरइ ता वयमेयस्स सिस्सा भवामोत्ति, गोअ- मसामीवि उसभाइजिणिंदे वंदिऊण ईसाणदिसिविभागे असोगतरुतले मणिसिलापट्टए तं रयणीवासमुवगओ । एत्थ य पत्थावे वेसमणो नाम सक्कदिसापालो चेइयपूयाए पज्जंते गोअमसामीं वंदित्ता समीवे निसीयइ, भयवंपि समणगुणे सवित्थरं कहइ, जहा—भयवंतो साहवो अंताहारा पंताहारा विचित्ततवकिसियदेहा हवंति इच्चाइ, वेस-

श्रीगुणचंद
महावीरच०
८ प्रस्तावः

॥ ३३५ ॥

मणो चित्तेइ-एस भयवं एरिसे साहुगुणे कहेइ, अप्पणा उ तं सरीरसिरिमुवहइ जा तियसाणवि नत्थि, इमं च तदभिप्पायं मुणिऊण गोयमसामी पुंडरीयज्झयणं परूवेइ । जहा—

पुंडरिगिणीपुरीए राया नामेण आसि पुंडरिओ । कंडरिओ से भाया पवज्जं सो पवन्नो य ॥ १ ॥

अइदुकरयाए संजमस्स सो अन्नया पराभग्गो । पवज्जं मोत्तुमणो विसयपिवासाए पारद्धो ॥ २ ॥

गुरुकुलवासं चेच्चा समागओ भाउणो समीवंमि । तेणाविह सो नातो जहेस रज्जं समीहेइ ॥ ३ ॥

ताहे पुंडरिएणं निययं रज्जं समप्पियं तस्स । तवेसो पुण गहिओ चलिओ य गुरुस्स पासंमि ॥ ४ ॥

गच्छंतो स महप्पा अणुचियआहारदोसओ मरिउं । सुद्धज्झवसाणाओ उवचियदेहोऽवि उववन्नो ॥ ५ ॥

सव्वट्ठविमाणंमि इयरो पुण गाढकिसियगतोऽवि । रुद्धज्झवसाणाओ सत्तममहिनारगो जाओ ॥ ६ ॥ जुम्मं ।

ता भो देवाणुप्पिय ! किसत्तमियरं च एत्थ नो हेऊ । किं तु सुहज्झवसाणं तं पुण जह होइ तह किच्चं ॥ ७ ॥

इय गोयमेण मणिए सो देवो मुणियमाणसविगप्पो । वंदित्ता भत्तीए जहागयं पडिनियत्तोत्ति ॥ ८ ॥

गोयमसामीऽवि निसावसाणे जिणर्विवाइ नमंसिऊण नगवराओ ओयरंतो हरिसुन्नामियकंधरेहिं सविणयं विन्नत्तो तावसेहिं-भयवं ! अम्हे तुम्ह सिस्सा तुम्हे अम्ह धम्मगुरुणो, ता पसीयह दिक्खादाणेणं, गणहारिणा जंपियं-भो महाभावा ! तुम्हं अम्हाण य तिलोयनाहो गुरु, तेहिं भणियं-तुम्हवि अन्नो गुरु?, तओ गोयमो जयगुरुणो

वैश्रवणस्या-
ग्रतः गौत-
मोक्तं पुंड-
रीकज्ञातं.

॥ ३३५ ॥

गुणसंयवं काउमारद्धो, ते य सुदुयरं वद्धियपरिणामा उवद्धिया पवइउं, पवाविया य गणहारिणा, समप्पियाणि
 तेसिं देवयाए रयहरणाइं, अह तेहिं पन्नरसतावससएहिं परियरिओ गंतुं पयत्तो, जाए य भोयणसमए गोय-
 मसामिणा भणिया ते, जहा—भो देवाणुप्पिया ! किं तुम्ह पियं भोयणं पणामिज्जउ?, तेहिं भणियं—पायसोत्ति,
 तओ सव्वलद्धिसंपन्नो भयवं घयमहुसणाहस्स पायसस्स पडिग्गहं भरित्ता आगओ, अक्खीणमहाणसिलद्धिसामत्थेण
 य सव्वे जहिच्छाए पजेमिया, तदुवरियसेसं च अप्पणा भुंजति, एवंविहं च अइसयं भगवओ पेच्छिऊण ते सुदुयरं
 आणंदिया, नवरं सुकसवोलभक्खीणं पंचणहवि तावससयाणं सुहज्जवसाणाओ केवलनाणमुप्पन्नं, कमेण य तत्तो
 वचंता पत्ता चंपापुरिं, तहिं च दिन्नस्स सपरिवारस्सवि भगवओ छत्ताइत्तं पेच्छंतस्स, कौडिन्नस्सवि सामिणो
 रूवदंसणेण केवलमुप्पन्नं, एवं जायकेवलेहिं तेहिं पन्नरसहिवि सएहिं समेओ गोयमो भयवंतं पयाहिणीकरेइ, ते य
 पयाहिणावसाणे तित्थपणामं काऊण केवलिपरिसं पडुच्च गच्छंते पेच्छिऊण भणइ—भो किमेवं वच्चह?, एह सामिं
 वंदह, जयगुरुणा कहियं—मा केवलिणो आसाएहि, तओ सो मिच्छादुक्कडंति काऊण अप्पणो नाणाणुप्पाएणं अद्धिं
 कुणंतो वुत्तो सामिणा—भो देवाणुप्पिय ! किं देवाणं वयणं गेज्झं? उयाहु जिणाणं?, गोअमो भणइ—जिणाणं,
 जयगुरुणा जंपियं—जइ एवं ता किं अद्धिं पकरेसि?, जेण मए तं पुव्वंचिय भणिओ, जहा—अंतं तुल्ला भविस्सामोत्ति,
 जं पुण संपयं चिय तुह नाणं न उप्पज्जइ तत्थ इमं कारणं—

श्रीगुणचंद
महावीरच०
८ प्रस्तावः

॥ ३३६ ॥

चिरभवपरंपरापरिचिओ सि चिररूढगाढनेहोसि । तं मे गोयम ! जेणं तेण न ते जायई नाणं ॥ १ ॥
अइथेवसंयुत्तोऽवि नेहभावो दुमिल्लओ होइ । किं पुण बहुकालन्नोन्नतुल्लसंवाससंजणिओ ? ॥ २ ॥
एत्तो चिय विणिहयनायगव सेणाहयंमि मोहम्मि । कम्मायली दल्लिज्जइ लीलायच्चिय समग्गावि ॥ ३ ॥
ता नेहपसरमुच्छिदिऊण मज्झत्थयं समायरसु । मोक्खभवाइसु किर परमसाहुणो निप्पिहा होंति ॥ ४ ॥
इय भणिए जयगुरुणा सविणयपणओ तहत्ति भणिऊण । पडिवज्जइ तं वयणं गोयमसामी मुणिवरिंदो ॥ ५ ॥
एवं गोयमसामीं संबोहिऊण विहरिओ तत्तो जयगुरु । अह परिभमंतो गामागरनगरसुंदरं वसुंधराभोगं कमेण
पत्तो मिहिलापुरिं, समोसढो य माणिभद्दाभिहाणंमि चेइए, समागया ससुरासुरावि परिसा, सिद्धो य भगवया
अभयप्पहाणमूलो अलियवयणविरइप्पहाणो परधणपरिवज्जनमणहरो सुरनरतिरियरमणीरमणपरंमुहो आर्किचणगु-
णग्घविओ समणधम्मो, तहा पंचाणुव्वयपरियरिओ गुणव्वयतियालंकिओ चउसिक्खावयसमेओ सावयधम्मो य ।
तं च सोऊण बुद्धा वहये जंतुणो, केऽवि गहियसामन्ना अन्ने पडिवन्नदंसणा जायत्ति । एत्थंतरे गोयमसामी परेणं
विणएणं पणमिऊण जयगुरुं भणइ-भयवं ! महंतं मे कोऊहलं दूसमाए सरूवसवणविसए, कुणह अणुग्गहं, साहह
जहाभाचिरंति, भणियं जिणेण-गोयम ! भाविरमवि दूसमाए वुत्तंतं साहिज्जंतं एग्गमणो निसामेसु—

गौतमस्या-
श्वासनं
भगवतो
मिथिला-
गमनं.

॥ ३३६ ॥

मह निवाणमुवगए पंचमअरओ उ दूसमा होही । तीए वसा भवोऽवि दु न जणो धम्मज्जमं काही ॥ १ ॥
 सुणिणोऽवि परोप्परकलहकारिणो बहुपरिग्गहासत्ता । वट्टिस्संति न सम्मं बाहुल्लेणं सधम्मंमि ॥ २ ॥
 पासंडिणोऽवि नियनियगंयत्थपरंमुहा मयणमूढा । पम्मुकधम्मकम्मा ओलग्गिस्संति राईणं ॥ ३ ॥
 पागयलोगो मोत्तुं कुलमेरं तेसु तेसु कज्जेसु । अचंतगरहिणसुवि वट्टिस्सइ जीविगाहेउं ॥ ४ ॥
 अत्यप्पिया य अइदप्पिया य परछिइपेच्छणपरा य । पीडिस्संति जणोहं पयंडदंडेहिं नरवइणो ॥ ५ ॥
 एकजणणीपसूयावि भाइणो जणगदवल्लोभेण । अन्नोन्नजीवघायं काउं दढमभिलसिस्संति ॥ ६ ॥
 धम्मच्छलेण पावं विमूढमइणो समायरिस्संति । पसुमेहकूवखणणाइएसु कम्मेसु वट्टंता ॥ ७ ॥
 भूयभविस्सत्थेसु य विन्नाणं देवयावयारो वा । विज्जा सिद्धी य चरा बाहुल्लेणं न होहिंति ॥ ८ ॥
 उम्मग्गदेसणामग्गनासणावंचणाभिरयचित्ता । गुरुणोऽवि जहिच्छाए धम्मायारं चरिस्संति ॥ ९ ॥
 तविहिंति खरं रविणो नो वरिसिस्संति समुचियं मेहा । रोगायंका मारी य विद्विस्संति जणनिवहं ॥ १० ॥
 उस्सिस्सलखलजणहीलणार्हिं अणिमित्तऽणत्थघडणार्हिं । पाविस्सइ खणमेत्तंपि नेव सोक्खं विसिट्ठजणो ॥ ११ ॥
 वाससहस्सा इह एकवीसइं जाव दोसपरिहीणं । दुप्पसहंतं चरणं पवित्तिही भरहखेत्तंमि ॥ १२ ॥
 इय एसो संखेवेण तुज्झ गोयस ! मए समणुसिट्ठो । दूसमकालसमुत्थो वुत्तंतो भवभयजणगो ॥ १३ ॥

श्रीगुणचंद
महावीरच०
८ प्रस्तावः

॥ ३३७ ॥

एयं सोच्चा मुणिणो संजमकजंमि तह पयट्टेह । तक्कालसमुत्थविडंवणाउ पावह जहा नेव ॥ १४ ॥
एवं जिणेण सिट्ठे सविसेसं संजमुज्जुया जाया । समणजणा अह भयवं मिहिलानयरीउ निक्खंतो ॥ १५ ॥
पत्तो पोयणपुरं, तर्हि च संखवीरसिवभट्टपमुहा नरिंदा दिक्खा गाहिया, एवं च जएकनाहो महावीरो गोयम-
सामिप्पमुहाणं चउहसण्हं समणसहस्साणं अज्जचंदणाईणं छत्तीसाइ अज्जियासहस्साणं आणंदसंखपमुहएगूणस-
ट्टिसहस्ससमहियस्स सावयलक्खस्स सुलसारेवईपमुहाणं तिण्हं सावियलक्खाणं अट्टारससहस्सहिगाणं तिण्हं चउ-
हसपुच्चिसयाणं अट्टण्हं अणुत्तरोववाइयसयाणं मग्गदेसगत्तं गुरुत्तं सामित्तं उवहंतो नाणकिरणोहिं तमनियरमवहरंतो
चिरं विहरिओ वसुंधराए । अह अग्गिभूइवाउभूईवियत्तमंडियमोरियपुत्ताकंपियायलभाइमेयज्जपहासनामेसु नवसु
गणहरेसु सिद्धिं गएसु केत्तियंपि कालं भवसत्तपडिवोहणं काऊण अप्पणो मोक्खगमणकालं पच्चासन्नमुवलक्खऊण
भयवं वद्धमाणो गओ असेसदेसलद्धपसिद्धीए पावापुरीए, तर्हि च निवभुयनिहलियपडिवक्खो हत्थिपालो नाम नरिंदो,
तस्स अणेगखंभसयसमहिट्टियाए विसिट्ठविचित्तचित्तकम्ममणहराए पवरसालभंजियाभिरामदुवारतोरणाए सबसत्तो-
वरोहरहियाए महइमहालियाए सुंकसालाए नरिंदाणुन्नापुरस्सरं ठिओ चरिमवासारत्तंमि जयगुरू । कमेण पत्तंमि जय-
गुरू कत्तियस्स अमावसादिणे अप्पणो उवरि केवलालोयविग्घकारयं सिणेहं कुणंतं गोयमं भणइ-भो देवाणुप्पिय !
एत्थ पच्चासन्नगामे गंतूण देवसम्भाभिहाणं माहणं पडिवोहेसुत्ति, जं सामी आदिसइत्ति जंपिऊण गओ गोयमो,

दूष्यमाख-
रूपं वीर-
वर्षत्संख्या.

॥ ३३७ ॥

कयं जहाइदं, वुत्थो य तत्थ । अह तस्स चेव दिणस्स पच्छिमनिसाए साइरिक्खंमि वट्टमाणंमि तीसइवरिससंखं
केवलपज्जायं परिपालिऊण कयछट्टतवोकम्मो पलियंकासणसंठिओ भयवं महावीरो सबसंवररूवं सेलेसिं जावज्जवि
न पवज्जइ ता असंभमुभंतनयणनलिणीवणेण तक्कालुग्गमंतभासरासिकूरग्गहविभावियजिणसासणोवपीडेण सबहु-
माणं विन्नत्तो सक्केण—

भयवं ! कुणह पसायं विगमह एवंपि ताव खणमेकं । जावेस भासरासिस्स नूणमुदओ अवक्कमइ ॥ १ ॥

जं एयस्सुदएण तुम्हं तित्थं कुतित्थिएहिं दढं । पीडिस्सइ सकारं न तहा पाविस्सइ जणाउ ॥ २ ॥

न य तुम्हे असमत्था एवंविहकज्जसाहणे जेण । जो तोलइ तइलोकं वलेण का तस्स इह गणणा ? ॥ ३ ॥

तथा—कहऽणंतसत्तिजुत्ता जिणा हवंतित्ति वयणमवि अम्हे । पत्तिज्जिस्सामो पडु ! जइ न तुमं ठासि खणमेकं ॥ ४ ॥

अह जयगुरुणा भणियं सुरिंद ! तीयाइतिविहकालेऽवि । नो भूयं न भविस्सइ न हवइ नूणं इमं कज्जं ॥ ५ ॥

जं आउकम्मविगमेऽवि कोवि अच्छेज्ज समयमेत्तमवि । अच्चंताणंतविसिद्धसत्तिपन्भारजुत्तोऽवि ॥ ६ ॥

अवि जोडिज्जइ सयखंडियंपि वयरागरूभवं रयणं । परिसडियमाउदलियं न उ तीरइ कहवि संघडिउं ॥ ७ ॥

ता जइ अच्चंतमभूयमत्थमम्हे न साहिमो एयं । किं एत्तिएण नाणंतसत्तिणो ? मुयसु ता मोहं ॥ ८ ॥

इय वोहिऊण सक्कं सेलेसिं जयगुरू समारुहिउं । समगं चिय वंयणियाउनामगोत्ताइं खविऊण ॥ ९ ॥

श्रीगुणचंद्र
महावीरच०
८ प्रस्तावः
॥३३८॥

जस्सट्ठाए कीरइ पुरमंदिररज्जलच्छिसंचागो । सुबइ सिणेहबंधुरबंधवजणगाढपडिबंधो ॥ १० ॥
आयाविज्जइऽसइ गिम्हुम्हवण्हिसंतत्तसकरुकरे । भूमीयलंमि हिमकणदुविसहे सीयकालेऽवि ॥ ११ ॥
भुंजिज्जइऽसइ सुदुंल्लतुच्छमरसं च भोयणं पाणं । निवसिज्जइ भीमसुसाणसुन्नगिहरन्नमाईसु ॥ १२ ॥
सेविज्जंति पइदियहमेव वीरासणाइठाणाइं । लुट्ठुमाइदुकरतवचरणाइंपि कीरंति ॥ १३ ॥
अहियासिज्जइ नरतिरियदेवविहिओवसग्गवग्गोऽवि । न गणिज्जइ दुविसहो परीसहाणं पबंधोऽपि ॥ १४ ॥

तिहुयणपणमियचलणो भवभयमहणो जिणो महावीरो ।

उभउच्चिय एगागी तं मोक्खपयं समणुपत्तो ॥ १५ ॥ सत्तहिं कुलयं ।

अह सवेऽवि सुरिंदा चउविहदेवेहिं परिकुडा झत्ति । चलियासणा वियाणियजिणनिवाणा समोइन्ना ॥ १६ ॥
विगयाणंदा बाहप्पवाहवाउलियनयणपमहंता । जगनाहस्स सरीरं नमिउमदूरे निसीयंति ॥ १७ ॥
अह सोहम्माहिर्वई गोसीसागरुपमोक्खदारूहिं । नंदणवणाणिएहिं चियमेगंते रया चित्ता ॥ १८ ॥
अह सुरहिखीरसायरजलेण ण्हविऊण जिणवरसरीरं । हरिचंदणोवलित्तं नियंसियामलदुगूलं च ॥ १९ ॥
सट्ठाणपिणद्धविचित्तरयणकिरणुब्भडाभरणरुइरं । सिवियाए संठवित्ता नेइ चियाए समीवंमि ॥ २० ॥
अह देविंदेसु जयजयारवं निम्भरं कुणंतेसु । कुसुमुकरं मुयंतेसु सवओ खयरनियरेसु ॥ २१ ॥

इन्द्रप्रार्थना
निर्वाणं च.

॥ ३३८ ॥

नचंतीसु सुरसुंदरीसु तूरेसु वज्रमाणेसु । अचंतसोगविहरे संधंमि य संधुणंतंमि ॥ २२ ॥
 अगिगकुमाराण जलणजालजालापलीवियाए लहुं । आरोविंति चियाए जिणबुंदि असुरसुरवइणो ॥ २३ ॥
 वाउकुमारा वायं कुणंति अवेरे सुरा पुण खिवंति । गंधद्वधूवमुट्ठिं घयमहुकुंमे य पुणरुत्तं ॥ २४ ॥
 मंसाइएसु दड्ढेसु तो चियं निव्विंति थणियसुरा । स्त्रीरोयवारिधारार्हिं सिसिरगंधाभिरामार्हिं ॥ २५ ॥
 अह पडुणो उवरिल्लं मंगलकएण दाहिणं सकहं । गिणहइ सको हेट्ठिलयं च चमरो असुरराया ॥ २६ ॥
 ईसाणिंदो वामं उवरिल्लं तस्स हिट्ठिमं च बली । इयरे सुरासुरिंदा जहारिहं अंगुवंगाइं ॥ २७ ॥
 तत्तो चियाय ठाणे विचित्तरयणेहिं विरइयं थूमं । निव्वाणगमणमहिमं जत्तेण कुणंति जयगुरुणो ॥ २८ ॥
 अह निव्वत्तियतक्कालजोग्गनीसेसनिययकायवा । सोगभरमंथरगिरं एवं भणिउं समाढत्ता ॥ २९ ॥
 अज्जं चिय अत्यमिओ दिवायरो अज्ज भारहं खेतं । अवहरियसाररयणं जायं नाहे सिवं पत्ते ॥ ३० ॥
 एत्तो पयंडभववेरिपीडियाणं पणद्वुद्धीण । अम्हारिसाण सरणं को होही नाह ! तुह विरहे ? ॥ ३१ ॥
 ससुरासुरंपि भुवणं मन्ने निप्पुन्नयं समग्गंपि । अन्नह कुलसेलाऊ हुंतोसि तुमं जिणवरिंदा ! ॥ ३२ ॥
 अहवाऽवस्संभाविसु वत्थुसु संतावकप्पणा विहला । एकमियार्णिं विजयउ सइ तित्थं तुज्झ जयनाह ! ॥ ३३ ॥
 इय जंपिऊण दुस्सहजयगुरुविरहगिगदूमिया सका । नंदीसरंमि गंतुं काउं अट्ठाहियामहिमं ॥ ३४ ॥

श्रीगुणचंद
महावीरच०
८ प्रस्तावः
॥ ३३९ ॥

वच्चंति देवलोगं वइरामयवट्टवरसमुग्गेसु । जिणसंकहाओ ताओ खिवंति जत्तेण पूइत्ता ॥ ३५ ॥
अह सा जिणस्स निवाणजामिणीसुरतनूकउज्जोया । दीवूसवोत्ति अज्जवि पइवरिसं कीरइ जणेण ॥ ३६ ॥
गोअमसामीवि नहोयरंतसुरवरविमाणपेच्छणओ । नाउं जिणनिवाणं चित्तेउमिमं समाढत्तो ॥ ३७ ॥
एकदिणमेत्तकज्जेण कीस नाहेण पेसिओऽहमिहं ? । चिरसंथुणसु किं वा जुज्जइ एवंविहं काउं ? ॥ ३८ ॥
हा हा अहं अहओ जो सुचिरं सेविऊण कमकमलं । पज्जंते जयगुरुणो संपइ विच्छोहिओ एवं ॥ ३९ ॥
अहवा जिणंमि वोच्छिन्नपेमदोसंमि कीस हे हियव ! । पढमं चिय पडिवंधं कुणसि ? जमेत्तो वहसि सोगं ॥ ४० ॥
संसारवल्लिजलसारणीसमो दुग्गदुग्गइदुवारं । सिवसोक्खकंसिराण मूलमणत्थाण पडिवंधो ॥ ४१ ॥
ते धन्ना सप्पुरिसा लीलाए चिय निसुंभिओ जेहिं । सुहहरिणक्खयकारी मोहमहाकेसरिकिसोरो ॥ ४२ ॥
इय सुक्कज्झाणानलनिदहुघणघाइकम्मदारुस्स । गोअमपहुस्स सहसा उप्पन्नं केवलं नाणं ॥ ४३ ॥
बारस वासाइं विबोहिऊण भवे सिवं गए तंमि । भयवं सुहम्मसामी निवाणपहं पयासेइ ॥ ४४ ॥
तंमिवि चिरकालं विहरिऊण सिरिजंबुसामिणो दाउं । गच्छगणानमणुन्नं संपत्ते सिद्धिवासंमि ॥ ४५ ॥
एवं विज्जाहरनरसुरिंदसंदोहवंदणिज्जेसु । समइकंतेसु महापहुसु सेज्जंभवाईसु ॥ ४६ ॥
अइसयगुणरयणनिही मिच्छत्ततमंधलोयदिणनाहो । इरुच्छारियवइरो वइरसामी समुप्पन्नो ॥ ४७ ॥

इन्द्रादिमि-
रंगादि-
नयनं
निर्वाण-
महश्च.

॥ ३३९ ॥

साहाइ तस्स चंदे कुलंमि निप्पडिमपसमकुलभवणं । आसि सिरिवद्धमाणो मुणिनाहो संजमनिहिच्च ॥ ४८ ॥
 बहलकलिकालतमपसरपूरियासेसविसमसमभागो । दीवेणं व मुणीणं पयासिओ जेण मुत्तिपहो ॥ ४९ ॥
 मुणिवइणो तस्स हरअट्टहाससियजसपसाहियासस्म । आसि दुवे वर सीसा जयपयडा सूरसमिणोच्च ॥ ५० ॥
 भवजलहिवीइसंभंतभवियसंताणतारणसमत्थो । बोहित्थोच्च महत्थो सिरिसूरिजिणेसरो पढमो ॥ ५१ ॥
 गुरुसाराओ धवलाउ सुविहिया (निम्मला पु.) साहुसंतई जाया । हिमवंताओ गंगच्च निग्गया सयलजणपुज्जा ॥ ५२ ॥
 अन्नो य पुत्तिमायंदसुंदरो बुद्धिसागरो सूरि । निम्मवियपवरवागरणलंदसत्थो पसत्थमई ॥ ५३ ॥
 एगंतवायविलसिरपरवाइकुरंगभंगसीहाणं । तेसिं सीसो जिणचंदसूरिनामो समुप्पन्नो ॥ ५४ ॥
 संवेगरंगसाला न केवलं कच्चविरयणा जेण । भवजणविम्हयकरी विहिया संजमपवित्तीवि ॥ ५५ ॥
 ससमयपरसमयन्नू विसुद्धसिद्धंतदेसणाकुसलो । सयलमहिवलयवित्तो अन्नो ऽभयदेवसूरित्ति ॥ ५६ ॥
 जेणालंकारधरा सलक्खणा वरपया पसन्ना य । नवंग (सिद्धंत पु.) वित्तिरवणेण भारई कामिणिच्च कया ॥ ५७ ॥
 तेसिं अत्थि विणेओ समत्थसत्थत्थबोहकुसलमई । सूरि पसन्नचंदो चंदो इव जणमणाणंदो ॥ ५८ ॥
 तवयणेणं सिरिसुमइवायगाणं विणेतलेसेण । गणिणा गुणचंदेणं रइयं सिरिवीरचरियमिमं ॥ ५९ ॥
 एयस्स विरयणंमी निव्वंधो जेसि गाढमुप्पन्नो । ते पुण मूलाओ चिय साहिज्जंते निसामेह ॥ ६० ॥

श्रीगुणचंद
महावीरच०
८ प्रस्तावः

॥ ३४० ॥

सियजसजोणहाधवलियनायकुलनहयले मयंकुव । पुवमहेसि महेसीपणओ सिरिजीवदेवपह ॥ ६१ ॥
तस्स सुसिस्सो सिद्धंतसिद्धसुविसिद्धसंजमाभिरओ । गुणरयणरोहणगिरी पयडो जिणदत्तसूरित्ति ॥ ६२ ॥
गंभीरिमाए पसमेण बुद्धिविभवेण दक्खिणत्तेण । सुंदरनएण जेसिं कोऽवि न तुल्लो जए जाओ ॥ ६३ ॥
तेहिंतो पडिबुद्धो वायडकुलभवणजयपडायनिभो । कप्पडवाणिज्जपुरे सेट्ठी गोवद्धणो आसि ॥ ६४ ॥
नंदीसरावलोयणमणाण भवाण दंसणत्थं च । कारावियं सुतुंगं बावन्नजिणालयं जेण ॥ ६५ ॥
धम्मधरणीए गिहिणीए तस्स सोढित्ति नामधेयाए । अगणिवगुणगणनिलया पुत्ता चत्तारि उप्पन्ना ॥ ६६ ॥
पढमो अम्मयनामो बीओ सिद्धोत्ति जज्जणागो य । तइओ चउत्थओ पुण विक्खाओ नन्नओ नाम ॥ ६७ ॥
नयविणयसच्चधम्मत्थसीलकलियहिं जेहिं दिट्ठेहिं । नूणं जुहिट्ठिलाईवि सहहिज्जंति सप्पुरिसा ॥ ६८ ॥
अह संथारयदिकखं पवज्जिउं भावसारमंतंभि । गोवद्धणंभि सग्गं गयंमि तह पढमपुत्तदुगे ॥ ६९ ॥
सो सेट्ठी जज्जणागो छत्तावल्लीए वासमकरिंसु । सबकणिट्ठो नन्नयसेट्ठी पुण मूलठाणेवि ॥ ७० ॥
तेसिं च भइणिपुत्तो नियपुत्ताओवि गाढपडिबंघो । आसि जसणागनामो सेट्ठी सुविसिद्धगुणनिलओ ॥ ७१ ॥
अह नन्नयस्स पुत्ता पयडा सावित्तिकुच्छिसंभूया । दोन्नि चिय उप्पन्ना गोवाइओ कवड्डी य ॥ ७२ ॥
सत्तुंजयपमुहसमत्थतित्थजत्ता पयट्ठिया जेण । पढमं चिय तस्स कवड्डिसेट्ठिणो को समो होज्ज ॥ ७३ ॥

ग्रन्थ-
कृतप्रशस्तिः

॥ ३४० ॥

पुरिसत्यकरणनिरयस्स जज्जणागस्स विस्सुयजसस्स । अत्थि जिणधम्मनिरया कलत्तगिह सुंदरी नाम ॥ ७४ ॥
 जाओ तीसे सुंदरविचित्तलक्खणविराइयसरीरो । जेट्ठो सिट्ठो पुत्तो बीओ पुण वीरनामोत्ति ॥ ७५ ॥
 को तेसि दाणविन्नाणबुद्धिसुविसुद्धधम्मगेहाण । निउणोऽवि गुणलवंपिहु होज्ज समत्थो य वित्थरिउं ? ॥ ७६ ॥
 नागो इव पिंडिज्जइ बंभंडकरंडए अमायंतो । जस्स जसोहो सारयनिसिच्छणमयलंछणच्छाओ ॥ ७७ ॥
 जिणविंसुपसत्थतित्थजत्ताइधम्मकरणेण । धम्मियजणाण मज्झे जेहि य पत्ता पढमरेहा ॥ ७८ ॥
 अन्नाणतण्हसमणी सुयनाणपवा पयट्ठिया जेहिं । सयलागमपोत्थयलेहणेण निबंपि भव्वाण ॥ ७९ ॥
 तेहिं तित्थाहिबपरमभत्तिसवस्समुवहंतेहिं । वीरजिणचरियमेयं कारवियं सुद्धबोहकरं ॥ ८० ॥
 जमजुत्तमेत्थ भणियं नियमइदुब्बलओ मए किंपि । तं साहंतु गुणहा ओच्छाइयमच्छरा विउसा ॥ ८१ ॥
 छत्तावल्लिपुरीए मुणिअंबेसरगिहंमि रइयमिमं । लिहियं च लेहएणं माहवनामेण गुणनिहिणा ॥ ८२ ॥
 नंदसिहिरुहसंखे(११३९)वोक्तंते विक्कमाओ कालंमि । जेट्ठस्स सुद्धतइयातिहिंमि सोमे समत्तमिमं ॥ ८३ ॥
 निहयसयलविग्घोऽणप्पमाहप्पजुत्तो जयइ जयपसिट्ठो वद्धमाणो जिर्णिदो ।
 तयणु जयइ तस्सासंखसोक्खेक्कमूलं, गरुयभवभयाणं नासणं सासणं च ॥ ८४ ॥

श्रीगुणचंद
महावीरच०
८ प्रस्तावः
॥ ३४१ ॥

असिवसमणदक्षो पाणिणं कप्यरुक्त्वो, जयइ जयपयासो पासनाहो जिणेसो ।
तयणु जयइ बाजी दिवपंकेरुहत्या, सुयस्यणधरिती पंकयालीणाहत्या ॥ ८५ ॥
इय जिणवरवीरस्सऽहुमो ताव बुत्तो, परमपयपयाणो नाम पत्थाव एसो ।
चरियमवि समत्तं एयसंकित्ताओ, हवउ सुहकरं वो नूणमाचंदसूरं ॥ ८६ ॥
एयं वीरजिणेसरस्स चरियं जे भावसारं जणार, वक्खाणंति पढंति निचलमणा निचं निसामिति य ।
तेसिं इट्ठविओगऽणिट्ठपडणादोगच्चरोगावया-गामोफलं खयमेइ दुक्खमखिलं सोक्खाणि वढंति य ॥ ८७ ॥

॥ ग्रंथाग्रं. १२०२५ ॥ शुभं जयतु श्रीसंचय ॥

यावलवणसमुद्रो यावन्नक्षत्रमंडितो मेरुः ।
यावच्चन्द्रादित्यौ तावदिदं पुस्तकं जयतु ॥

ग्रन्थ
कुत्प्रशस्तिः

॥ ३४१ ॥